

Dill' wen dill'
Kob Çhe
Jesucrístona'



New Testament in Zapotec, Cajonos (MX:zad:Zapotec, Cajonos)

Dill' wen dill' Kob Che Jesucrístona'
New Testament in Zapotec, Cajonos (MX:zad:Zapotec, Cajonos)

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

San Mateo	1
San Marcos	56
San Lucas	90
San Juan	146
Los Hechos	188
Romanos	239
1 Corintios	260
2 Corintios	281
Gálatas	293
Efesios	300
Filipenses	307
Colosenses	312
1 Tesalonicenses	317
2 Tesalonicenses	321
1 Timoteo	324
2 Timoteo	330
Tito	334
Filemón	337
Hebreos	338
Santiago	354
1 Pedro	359
2 Pedro	365
1 Juan	368
2 Juan	373
3 Juan	374
Judas	375
Apocalipsis	377

Dill' wen dill' kob daa bzej Matewa'

Dii xoxto' Jesucrístona'
(Lc. 3:23-38)

- 1 Dga cho'en dill' nan Jesucrístona' nake' xiiñ dia che dii Davina' na' dii Abrahama'.
- 2 Abrahama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len ben' bisheeka'.
- 3 Na' Judána' goke' xa Fáreza' len Zárana', na' xneeka' wlie' Tamar. Na' Fáreza' goke' xa Esróma', na' Esróma' goke' xa Arama'.
- 4 Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'.
- 5 Na' Salmónna' len Rahaba' gokgake' xaxña' Booza'. Na' Booza' goke' xa Obeda' na' xneena' wlie' Rut. Na' Obeda' goke' xa Isaína'.
- 6 Na' Isaína' goke' xa Davina', na' Davina' goke' xa Salomónna'. Na' xña' Salomónna', beena' bikaa Davina', goke' xool dii Uríaza'.
- 7 Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'.
- 8 Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'.
- 9 Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'.
- 10 Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'.
- 11 Na' Josíaza' goke' xa Jeconíaza' len ben' bisheeka', legaken' zoa kana' bche'byen ben' Babilóniaka' ben' Israelka' lalle'ka'.
- 12 Na' shlak ni zoagake' Babilóniana' golj Salatiela' xiiñ Jeconíaza', na' Salatiela' goke' xa Zorobabela'.
- 13 Na' Zorobabela' goke' xa Abiuda', na' Abiuda' goke' xa Eliaquima', na' Eliaquima' goke' xa Azora'.
- 14 Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'.
- 15 Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa Jacoba'.
- 16 Na' Jacoba' goke' xa Joséna' ben' che Maríana', xña' Jesúza', beena' lekzka' nsi'gake' Cristo.
- 17 Na' ka' gok wzoa shda' diaka' wzololenzan dii Abrahama' na' biyoll-lenan dii Davina'. Na' wde zi shda' diaka' bizzololenan dii Davina' axt ka bche'byengake' ben' Israelka' Babilóniana'. Na' wizak zi shda' diaka' bizzolon ka bche'byengake' legake' Babilóniana' axt ka wzoa Crístona', beena' bsel' Chioza' inabi'e.

Ka golj Jesúza'
(Lc. 2:1-7)

- 18 Ki gok ka golj Jesucrístona': Xnee Maríana' ba nakan ikaa Joséna'ne', na' ka zi soalene'ne' bi'e, la' Espíritu Santo che Chioza' bene' kwenche bi'e.
- 19 Na' Joséna' beena' ba nakan ikeene', nake' to ben' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i.
- 20 Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':
—José, xiiñ dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e.

21 Na' sane' to bi' byodo' na' wsi'ob' Jesús, la' leban' yislab' beñ' yell cheb'ka' lao saaxya che'ka' kwenche bi kwiayi'gake'.

22 Gok yog' diiki kwenche gok ka wna dii beena' wdixjee daa goll Chioza'ne', chi'e:

23 To nool wew' wee, na' sane' to bi' byodo',
na' wsi'gake'b' Emanuel.

Na' Emanuel zejín: Chioza' zoalene' cho'.

24 Na' ka biban Joséna', bene' kon ka goll anjl che Xancho Chioza'ne' na' wkee Maríana'.

25 Na' bi wdelle'ne' axt ki wxanche' bi'do'na', na' bsi'eb' Jesús.

2

Wyaj beñ' sin'ka' jawiagake' Jesúza'

1 Jesúza' golje' yell Belénna', daa lliá gana' mbani Judeana', kana' chnabia' Heródeza'. Na'ch bal' beñ' sin', beñ' nsed che beljka', za'gake' ka de gana' chla'lə wbillá', bllintegake' Jerusalénna'.

2 Na' che'gake':

—¿Gani rey che beñ' Israelka', bi'na' ba golj? Nezinto' ba goljb' la' ka de gana' chla'lə wbillá' ble'into' to belj dii bzajniin neto' nan ba goljb', daan ba za'nto' kwenche we'la'onto'b'.

3 Na' ka beni Heródeza' daa wnagake', gokshejlallee, na' lekzka' yog'lol beñ' Jerusalénka'.

4 Na'ch Heródeza' goxe' yog'lol bxožka' chnabia', na' beñ'ka' chli' chsedi ley che dii Moiséza', na' wñabile' legake' gan chiya' galj Crístoná', beena' wsel' Chioza' inabi'e.

5 Na'ch gollgake'ne':

—Yell Belénna' daa mbani Judeanan' galje', la' kan' bzej to beñ' wdixjee daa goll Chioza' le', chi'e:

6 Na' li', yell Belén llió' gani mbani Judeani,
aga inacho nako' dii liizelozi bibi zakii ladj yellka' zakii lliá Judeani;
la' lawo'ni ichej to beñ' inabi'e,
na' gap wwíe' beñ' Israelka', beñ'ka' nak yell cha'.

7 Na'ch Heródeza', ka kono gokbe'zi goxe' beñ' sin'ka' na' wñabile' legake' batyen'an ble'gakile' belja'.

8 Na'ch bselee legake' Belénna' na' golle' legake':

—Li shaj, na' li lljadiljyoll bi'do'na', na' kat' yillelileb' na' yidnale nad' kwenche len' sha' llje'lawaab'.

9 Na' ka biyoll goll Heródeza' ka', na'ch wza'gake'. Na' belja' daa ble'gakile' kana' zi' sa'gake', zejan xan yabana' lliálon lawe'ka', na' ka bllinan gana' zoa bi'do'na', na' na'zə wzoan.

10 Na' ka bizle'i beñ' sin'ka' belja', le bibagakile'.

11 Na'ch ka wyoogake' loo yoona' ble'gakile' bi'do'na' len xna'b' Maríana'. Na'ch bchek' xibe'ka' na' be'la'ogake'b'. Na' wlejgake' or, na' yal zix, na' lekzka' len nill' che to yag dii chla' zix daa le mirra, na' be'gake'n cheb'.

12 Ka biyoll be'la'ogake'b', Chioza' bsi'nile' legake' lo yel bishgal che'ka' kwenche bich yidegake' gana' zoa Heródeza'. Daan, bikaagake' nez yoblə ziyajgake' lalle'ka'.

Bxonjgake' wza'gake' Egíptona'

13 Ka wde biza' beñ' sin'ka', to anjl che Xancho Chioza' bli'lawe' Joséna' lo bishgal che'na' chi'ene':

—Wyas, na' bche' bdo'na' len xna'baa na' li shaj gana' mbani Egíptona'. Na' na'z soale axt kat'ch inia' li' yiza'le. La' Heródeza' yiyilje' bdo'na' kwenche wite'b'.

14 Na'ch lii wyaste Joséna' na' bchi'e bdo'na' len xna'baa, na' wal-lə wza'gake' zejlen-gake'b' gana' mbani Egíptona'.

¹⁵ Na' wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to beñ' wdixjee daa golle'ne', kana' wne': “Nad' biñia' bi' cha'na' kwenche biza'b' gana' mbani Egíptona'.”

Ben Heródeza' mandad witgake' bi'do'ka'

¹⁶ Na' ka gokbe'i Heródeza' bi ben beñ' sin'ka' ka golle' legake', le blee. Na' bene' mandad witgake' yog'lol bi' byodo'ka' lle' yell Belénna' len yellka' ndil nllagan, bdo' cheenka' axt bi' chop yizi, bsakee ka to yizka' ba gok ble'i beñ' sin'ka' belja'.

¹⁷ Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

¹⁸ Kwe' wbell na' gakyeshii beñ'ka' lle' yella' le Ramá.

Noolka' nak xiiñ dia che dii Raquela'
ni to kono cheengakile' gonxenlall' legake',
daa wit bi'do' che'ka'.

¹⁹ Na' ch ka wde wit Heródeza', to anjl che Xancho Chioza' bli'lawe' Joséna' lo yel bishgal che'na' shlak ni zoe' Egíptona', na' chi'ene':

²⁰ —Wyas, biche' bi'do'na' len xna'baa na' li yiyaj gana' mbani Israela', la' ba wit beñ'ka' cheengakile' witgake'b'.

²¹ Na' ch wyas Joséna' na' bichi'e bi'do'na' len xna'baa na' biyajgake' gana' mbani Israela'.

²² Na' ka wñezi Joséna' Arquelawa' ba chñabi'e lo laz dii xe' Heródeza', na' blege' yiyajgake' Judéana'. Na' Chioza' wdixje'ile'ne' lo yel bishgal che'na' yiyajgake' gana' mbani Galileana'.

²³ Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii beñ'ka' wdixjee daa goll Chioza' legake' kani'yi che Jesúsza', wnagake' wsi'gake'ne' beñ' Nazaret.

3

Juanna', beena' bchoa beñ' nisa'

(Mr. 1:1-8; Lc. 3:1-9, 15-17; Jn. 1:19-28)

¹ Na' do kana', Juan, beena' bchoa beñ' nisa', wyaje' to latj gana' bibi chashj chleb gana' mbani Judeana', na' wdixje'ile' beñ'ka' chdi'a chllag na',

² chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjlall'do'lena'.

³ Na' dii Isaíaza', beena' wdixjee daa goll Chioza'ne', wne' che Juanna':

To beñ' gosyee to lo latj ga bibi chashj chleb, na' ine':

“Li se kwas wzenagle che Xanchona'
na' wsalj yichjlall'do'leka' kat' zee.”

⁴ Na' Juanna' bene' xe'na' de xa kamey, na' nchej lsineena' to yid. Na' wdawe' bish'zo len shin baser daa de lyixaa.

⁵ Na' beñ'ka' lle' yell Jerusalénna', na' doxen gana' mbani Judeana' na' yellka' llia gaoz yao Jordánna' jazenaggake' dillaa cho'e.

⁶ Na' bixoadol'gake' saaxya che'ka', na' bchoa Juanna' legake' nisa' loo yao Jordánna'.

⁷ Na' ka ble'i Juanna' zan fariseoka' na' saduceoka' bllingake' lawe'na' kwenche wchoe' legake' nisa', na' golle' legake':

—Le' naklikzle ka bel zñia! ¿Achakile wak wxonjile' yel' zak'zi' daa wsel' Chioza'?

⁸ Li gon ka gakbe'i beñ' nan dii li ba biyaj bilenile.

⁹ Na' bi gakzile bibi yel' zak'zi' ile'ile daa inazle: “Neto' naknto' xiiñ dia che dii Abrahama'.” Dii li nia' le', axt yajki wak gon Chioza' xiiñ dia che dii Abrahama'.

¹⁰ Yog'lol-le shi bi chonle ka chiyoollalii Chioza' na' gak chele ka chak che to yag dii chbia dii zix dii bi chak wen, na' lii chchogtegake' axt xanin na' chzal'gake'n lo yi'na'.

11 Dii li nad' chchoa' le' nisa' daa chiyaj chilenile, per beena' zi' za' kollaana' napche' yel' wak xench ka nad', na' ni bi zakaa gak' xmose' kwenche galj' xe'le'na'. Len' gone' ka yidsoa Espíritu Sántona' loo yichjlall'do'lena', ka le' chiyaj chilenile', na' ben'ka' bi chiyaj chileni wzalee legake' lo yi' gabilá'.

12 Na' gone' che ben' yell-lioni ka chon beena' nox' yag xozaa daa chpa'ile' trígona' na' kooshawee trígona' na' wzeye' beb cheyinna' lo yi'na' daa biga yiyolkzə.

Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

13 Na'ch wza' Jesúza' gana' mbani Galileana' wyaje' cho'a yao Jordánna' kwenche wchoa Juanna'ne' nisa'.

14 Na' ka blline', bi nan cheeni Juanna' wchoe'ne' nisa', san chi'ene':

—Li'lan chiya' wcho' nad' nisa', na' li'lə za'zo' kwenche wchoa' li' nisa'.

15 Per Jesúza' golle'ne':

—Ben goklen bchoa' nad' nisa' la' chiya' goncho ka nak daa nllia Chioza' bia' goncho. Na'ch bchoe'ne' nisa'.

16 Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espíritu che Chioza' chetje' ka to palom na' jsoalene' le'.

17 Na'ch bengakile' shii Chioza' zoa yabana' chi'e:

—Beenin nake' Xiin', beena' chakid', na' le' chibaid' le'.

4

Goki dii xiwaa gonan ka wzenag Jesúza' cheyin

(Mr. 1:12-13; Lc. 4:1-13)

1 Na'ch Espíritu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

2 Na' ka wde choa lla choa yel bibi wdawe', na' wdone'.

3 Na'ch bllin dii xiwaa kwite'na' gollan le':

—Shi leilo' nako' Xiin' Chios, ben ka yiyak yajki yetxtil.

4 Na'ch goll Jesúza':

—Cho'a xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban.”

5 Na'ch dii xiwaa bche'n le' Jerusalénna' daa nak yell che Chioza' na' blepan le' yichj yoodo'na' gana' nak sib wal.

6 Na'ch gollan le':

—Shi leilo' nako' Xiin' Chios, lla bixit'shki ni. La' Cho'a Xtill' Chioza' nan: Wselee anjl che'ka' gap wwiagake' li', na' gox'gake' li' kwenche ki koo wchewo' yajka'.

7 Na' goll Jesúza' len:

—Lekzka' na' Cho'a Xtill' Chioza': “Bi wzo' Chioza' gone' daa nazan cho' kwenchezə xenlalloo shi gone' ka ba wne'.”

8 Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyinka'.

9 Na' gollan le':

—Yog' diiki chle'ilo' gon' li' shi wchek' xibo'na' we'lawoo nad'.

10 Na'ch goll Jesúza' len:

—Biyaj, Satanás, la' Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

11 Na'ch biza' dii xiwaa kwit Jesúza' na' bllin bal' anjlka' be'gake'ne' kon bi byalljile'.

Wzolo Jesúza' choe' cho'a xtill' Chioza' gana' mbani Galileana'
(Mr. 1:14-15; Lc. 4:14-15; 5:1-11; 6:17-19)

¹² Ka beni Jesúza' wloogake' Juanna' lillyana', bizee biyaje' gana' mbani Galileana'.

¹³ Na' bizee yell Nazareta' na' jazoe' yell Capernaúma', to yell xen dii llia cho'a nido'na' gana' mbani yell-lío che dia che dii Zabulónna' na' dii Neftalína'.

¹⁴ Na' daa jazoe' na', gok ka wna dii Isaíaza', beena' wdixjee daa goll Chioza'ne', daa wne':

¹⁵ Ka nak yell-lío daa naki che dia che dii Zabulónna' na' dii Neftalína', daa llia shlaa yao Jordánna',

gana' xoa nez daa zej cho'a nido'na'

daa llia gana' mbani Galileana',

gana' lle' zan beñ'ka' bi nak beñ' Israel,

¹⁶ beñ'ka' lle' na' gok yichjlall'do'eka' shgasj shchol,

na' Chioza' ba bselee to beeni' xen lawe'ka'.

Lao beñ'ka' lle' gana' chnabia' yel' wita'

ba chzeeni' beeni' che Chioza'.

¹⁷ Na' wzolo Jesúza' chyixje'ile' beñ' cho'a xtill' Chioza', chi'e:

—Li yiyaj yileni dii malka' chonle, la' ba bllin lla Chioza', beena' zoa yabana', inabi'e loo yichjlall'do'lena'.

Wlej Jesúza' tap beñ' wxen bel kwenche gongake'ne' txen
(Mr. 1:16-20; Lc. 5:1-11)

¹⁸ Na' ka zej Jesúza' cho'a nido' che Galileana' ble'ile' chop bish' beñ' wxen bel chzal'gake' yixja' loo nisa' chzengake' bel'a'. Toe' le Simón na' lekzka' nsi'gake'ne' Pedro, na' beena' sto lie' Andrés.

¹⁹ Na'ch Jesúza' chi'e legake':

—Li da, dino nad', na' kon ka chonle naa chbejle belki loo nisi, ka'kzan gonle yibejle beñ' lao dii mala'.

²⁰ Na' ka golle' legake' ka', lii bkwaan'tegake' yixj che'ka' na' zejlengake'ne'.

²¹ Na' zi lat'chga wza'gake' bizle'i Jesúza' zi chop bish' beñ', beena' to lie' Jacobo na' beena' sto lie' Juan, beñ'ka' nak xiin Zebedewa', lle'gake' to loo barkw chiyonshao'gake' yixja' daa chzengakile' bel'ka'. Na' lekzka' goll Jesúza' Jacóbona' len Juanna' shajlen-gake'ne'.

²² Na' lii bkwaan'tegake' barkwa' len xe'ka' na' janogake' Jesúza'.

Jesúza' chli' chsedile' beñ' zan
(Lc. 6:17-19)

²³ Na' wda Jesúza' yog' yellka' llia doxen gana' mbani Galileana', chli' chsedile' beñ' Israelka' gana' chdop chllaggake' choe'llwillgake' Chioza', cho'e dill' wen dill' kob che yel' wnabia' che Chioza', na' biyone' yog' beñ' che'i wde wdeli yillwe'.

²⁴ Na' doxen gana' mbani Síriana' wze dill' daa chon Jesúza', na' jwa'gake' yog'lol beñ'ka' che'i wde wdeli yillwe', beñ' chey chla, beñ' yoo dii xiw', beñ' chaz shon, na' beñ' net ni'a nee. Na' Jesúza' biyone' legake'.

²⁵ Na' beñ' zan inleeb jano le', beñ'ka' lle' yellka' mbani Galileana' na' yellka' mbani Decápoliza', na' beñ'ka' lle' yell Jerusalénna' na' yellka' sto mbani Judeana', na' beñ'ka' lle' yellka' llia shlaa yao Jordánna'.

5

Dill'ka' be' Jesúza' lo yaana'

¹ Ka ble'i Jesúza' beñ' zan ba nogake'ne', na'ch wyepe' to lo yaa, na' wchi'e. Na'ch beñ'ka' nakgake'ne' txen jabig'gake' kwite'na'.

² Na' wzolo Jesúza' chli' chsedile' legake', chi'e:

Ben'ka' zoa mbalaz
(Lc 6:20-23)

3 —Chakomba beṅ'ka' chakbe'gakile' chyalljgakile' gaklen Chioza' legake', la' legaken' yillingake' yabana' gana' chṅabia' Chioza'.

4'Chakomba beṅ'ka' chbellyesh', la' Chioza' yizoe' legake' mbalaz.

5'Chakomba beṅ'ka' nak beṅ' gaxjlall', la' wllin lla Chioza' wi'e legake' yell-lioni.

6'Chakomba beṅ'ka' chzelall' gakgake' beṅ' li beṅ' shao', la' Chioza' ine' nakgake' beṅ' wen lawe'na'.

7'Chakomba beṅ'ka' chiyeshii beṅ', la' ka'kzə yiyeshii Chioza' legake'.

8'Chakomba beṅ'ka' nxi nyech yichjlall'do'eka', la' legaken' ile'gakile' Chioza'.

9'Chakomba beṅ'ka' chon to dii byen soalen ljwellgake' mbalaz, la' ina beṅ' dii likzan nakgake' xiin Chios.

10'Chakomba beṅ'ka' chiya dii chen chle'i daa chongake' ka cheeni Chioza', la' legaken' yillingake' gana' chṅabi'e.

11'Chakomba le' kat' chiya dii na beṅ' chele na' chiya dii chongakile' le', na' kat'ka' chiyiljlall'gake' bittezə dill' wxiye' chele daa chonlilall'le nad'.

12Li yiba yizaki, la' yabana' gaple to dii wen dii shao'. La' ka chongakile' le' naa, ka'kzan bchi' bsak'gake' kani'yi dii beṅ'ka' wdixjee daa goll Chioza' legake'.

Nakle ka zed' na' ka beeni'
(Mr. 9:50; Lc. 14:34-35)

13'Len' nakle ka zedaa ladj beṅ' yell-lioki. Zedaa, shi bich zxi'n, aga wakch yiyonchon zxi' ni bich gak wḅhinchon, na' chchoonchon gana' wlej wshoshj beṅ' len.

14'Len' nakle ka to beeni' ladj beṅ' yell-lioki. To yell dii llia to lo yaa, zit'lə nla'n, na' bi ngashaan.

15Ni biga zoa to beṅ' chxene' kandila' na' chdose'n to dii wkwashaan len, san chzoe'n sibə kwenche wzeeni'n doxen loo yoona'.

16Ka'kzan le', li gon to dii byen gonle daa nak wen kwenche ile'i beṅ' na' we'la'ogake' Xacho Chioza' zoa yabana'.

Jesúza' cho'e dill' che ley che dii Moiséza'

17'Bi gatzile bid' kwenche yikwas' ley daa bzej dii Moisézan' wa daa bli' bsedi dii beṅ'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'lol ka na leya' na' daa bli' bsedi beṅ'ka' wdixjee daa goll Chioza' legake'.

18Dii li nia' le', shlak biṅ' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gakch yog'lol daa blie' bia' gak.

19Daan, nottezə beṅ' chyishje' to daa nllia Chioza' bia' goncho, la'kzi dii bi llialotek, na' shi wliile' beṅ' yoblə gone' ka chone', bitek bi zakee yabana' gana' chṅabia' Chioza'. San beena' gon daa nllia Chioza' bia' goncho na' wliile' beṅ' yoblə gone'n, beenan' gake' to beṅ' zakii yabana' gana' chṅabia' Chioza'.

20Na' nia' le', aga wak yillinle gana' zoa Chioza' chṅabi'e shi toz ka chonlenle fariseoka' na' beṅ'ka' chli' chsedi leya', chiya' wzenagchle che Chioza' aga ka legake'.

Bi chiya' wito beṅ'
(Lc. 12:57-59)

21Na' lekzka' che' Jesúza' legake':

—Nezkzile goll dii Moiséza' dii xozxto'choka': “Bi chiya' wito' beṅ'. La' beena' wit to beṅ' chiya' guete' daa bene' ka'.”

22Per nad' nia' le', nottez beena' chlee bish' ljwelle'na' chidolee tie' lo yel' zak'zi'na'. Na' lekzka' beena' chzoazi'yee bish' ljwelle'na', beṅ'ka' chṅabia' chiya' wwiagake' nak gongake' che'; na' beena' chnie' bish' ljwelle'na' dill' zibia', chidolee wzal' Chioza' le' lo yi' gabila'.

23 'Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljwello'na' li',

24 na'z bkwaan daa noxoo, zigaate chiyal' lljaye'xeno' bish' ljwello'na', na'tech wak wi'o Chioza' daa chzanilo' wi'one'.

25 'Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba bllino' lao beena' wchogbia' cho', na' gone' li' lo na' beena' wseje' li' lillyana'.

26 Dii li nia' li', aga wibeje' li' lillyana' axt ki chixjo' doxen daa chiyal' chixjo'.

Bi chiyal' inelen ljwell ben'

27 'Nezkzile wna dii Moiséza': "Bi chiyal' inelene' nool bi nak nool cho'."

28 San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoole'na' na' chnelene' nool yoblə.

29 'Shi jalawo' de shlina' chonan ka gono' dii mala', naklan wen wtoljo'n na' choono'n. La' wenchan soa tlaaz jalawo'na' aga ka daa yiyaj doxentio' lo yi' gabila'.

30 Na' shi noo de shlina' chonan ka gono' dii mala', naklan wen wchogo'n na' choono'n, la' wenchan soa tlaaz noona' aga ka daa yiyaj doxentio' lo yi' gabila'.

Bi nakan wen yilaa ben'ka' nshagna'

(Mt. 19:9; Mr. 10:11-12; Lc. 16:18)

31 'Nezkzile wna dii Moiséza': "Nottez beena' yilaa nool che'na' chiyal' chas to yish we'n dill' nan bilaagake'."

32 San nad' nia' le' shi to ben' byo yilee xoole'na' la'kzi xoole'na' bi chnelene' ben' yoblə, daa yileene' chone' ka yikaa noola' ben' yoblə na' gake' ka to noolə zoalentie' ben' che'na' na' chnelene' ben' yoblə. Na' beena' yikee noola' nlaa ben' che'na', lekzka' chone' ka chon beena' chnelen xool ben' yoblə.

Bibi wzoacho de taschiw kat' bin wchebcho

33 'Lekzka' nezkzile golle' dii xozxto'leka': "Bi wkwaanzo' ka'zə daa ba bchebo' lao Xancho Chioza' shi bzoatio' bi bzo' de taschiw."

34 San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan gana' zoa Chioza'.

35 Na' ni bi wzoale yell-lioni de taschiw, la' nakan ka gana' nzoa ni'a Chioza'; na' ni Jerusalenna', la' lennan' yell che beena' chnabia' doxen.

36 Na' ni bi wzoazle yichjlana' de taschiw, la' aga wak gonle ka yiyak ni to yish' yichjlana' yish' bez' shi nakan dii gasj wa gonle ka yiyakan dii gasj shi nakan yish' bez'.

37 San kon inale "wakan" wa inale "bi gakan", la' shi chzoale de taschiw bichlə wa nochlə, dii malan' chonan chonle ka'.

Chiyal' gakicho ben'

(Lc. 6:29-30)

38 'Lekzka' nezkzile' wna dii Moiséza': "Shi to ben' wshoshje' tlaa jalawo'na' lekzka' yiyono' che'. Na' shi to ben' wxope' leyo'na', lekzka' yixopo' leye'na'."

39 San nad' nia' le': Bi yizi'o wzon che ben' mala'. Shi no kap' xagoona' tlaa, bi'e daa zi shlaa.

40 Shi to ben' chbagoo dii chbagoo che' na' cheenile' ikee xkamiso'na', be'shaze' lente daa nxa kolloona'.

41 Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro.

42 Na' nottezə ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

Chiyal' gakicho ben'ka' chakzbangakile' cho'

(Lc. 6:27-28, 32-36)

43 'Na' lezk'a' nezile w nagake': "Goki bish' l jwello'na' na' bwiyi beṅ'ka' chakzi' chakzbangakile' li'."

44 San nad' nia' le': Li gaki beṅ'ka' chakzbangakile' le', li inabi Chioza' gak wen che beṅ'ka' chsak'zi'gake' le'.

45 Shi gonle ka', na'ch inezi beṅ' nakle xiin Xacho Chioza', beena' zoa yabana'. La' le' chone' ka chla' wbillalao beṅ' mal na' lao beṅ' wen, na' chone' ka chak yeja' lao beṅ' chon wen na' lao beṅ' chon mal.

46 Na' shi to beṅ'ka' nllagzile chakile, aga bi zjanayin, la' ka'klen chon beṅ' wichixjka' beṅ'ka' chakile le beṅ' mal nakgake'.

47 Na' shi to beṅ'ka' nllagzile chwaple chiox, ¿garan de dii wenna' chonle? La' ka'klen chon beṅ'ka' bi nombia'gake' Chioza'.

48 Li gak dowalj beṅ' li beṅ' shao' ka nak Xacho Chioza' zoa yabana', nake' dowalj beṅ' li beṅ' shao'.

6

Chiyal' gaklencho beṅ'

1 'Bi wli' wzez chele ladj beṅ' nan nakle beṅ' wen. La' shi kwenchezə ile'i beṅaan chonle daa nak wen, bibi laxjle gon Xacho Chioza', beena' zoa yabana'.

2 Na' kat' chaklenle beṅ'ka' chyallj chchini, bi wzelen dill', ka chon beṅ' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwenche we'la'o beṅ' legake'. Dii li nia' le', daa choe'la'o beṅ' legake', lennan' laxje'ka'.

3 San le', kat' choe'le beṅ' bi dii choe'lene', bi gonlen ka ile'i beṅ'. Na' ni to beṅ' bi ye'lene' bin chonle.

4 San li gaklen beṅ' ka kono gakbe'i. Na' Xachona', beena' chen chle'i daa chonle, gone' laxjle.

Ka chiyal' we'lwillcho Chioza'

(Lc. 11:2-4)

5 'Na' kat' choe'lwill-le Chioza', bi gonle ka beṅ' wxiye'ka'. Legake' choollall'gake' sechagake' we'lwillgake' Chioza' gana' chdop chllagcho choe'lwillchone' wa ga lle' lla' beṅ' kwenche ile'gakile' ka chongake'. Dii li nia' le', daa chle'i beṅ' ka chongake', lezannan' laxje'ka'.

6 San le', kat' we'lwill-le Chioza', li yiyoo loo lill-lena' na' li wsej puerta', na' li we'lwill Xachona', beena' kono chle'i. Na'ch Xachona', beena' chen chle'i daa chonle, gone' laxjle.

7 'Na' kat' choe'lwill-le Chioza' aga lilezi dill'ka' inale ka chon beṅ'ka' bi nombia'gake'ne', la' chakgakile' daa choe'gake' dill' zan na' wzenague' bin che'gake'ne'.

8 Bi gonle ka chongake', la' Xacho Chioza' ba nezczile' bi daa chyalljile ka zi' inabləlen.

9 Kat' we'lwill-le Chioza', kin inale:

Xanto' Chios, beṅ' zoa yaba,
we'la'oshga yog'lol beṅ' li'.

10 Na' inabia'gacho' loo yichjlall'do' yog'lol beṅ',
kwenche gak lo yell-lioni ka chaklalloo, ka chak yabana'.

11 Ka nak daa chono' cheej chaonto' yog' lla, beṅgachan naanlla.

12 Wxi'xen chento', ka chon neto' chzi'xennto' bittezə dii choni beṅ' neto'.

13 Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

La' lin' napo' yel' wnabia', na' yel' wak, na' lin' chido'loo shoo balaan xen zejli kani. Kan' nakan.

14 'La' shi le' chzi'xenle che beṅ' shi bi chongakile' le', ka'kzə Xacho Chioza' zoa yabana' si'xene' chele.

15 San shi le' bi chzi'xen che ljwell-le, ka'kzə Chioza', beena' nak Xale, bi si'xene' dii malka' chonle.

Daa chiyal' goncho kat' zoacho wbas'

16 'Kat' zoale wbas', bi gonzle cho'alaolena' nyesh' ka chon beñ' wxiye'ka', la' legake' chon cho'alawe'ka' nyesh' kwenche gakbe'i beñ' bi neej naogake'. Dii li nia' le', daa gakbe'i beñ' daa chongake', lezannan' laxje'ka'.

17 San le', kat' soale wbas', li wpaa yichjlana' na' li chib li wxis cho'alaolena'

18 kwenche bi gakbe'i beñ' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxjle.

Yel' shawaa daa de yabana'

(Lc. 12:33-34)

19 'Bi wtop wshagle yel' wni'ana' yell-lioni, la' bal diika' chaljan baka' chlliyi'gakban, na' balan chibia leyin na' chbiayi'gakan, wa choo wbanka' na' chkaagake'n.

20 San li gon ka gat' yel' shao' chele yabana', la' daa de yabana' bi galjan bado' wlliyi'ban, ni bi yibia leyin, ni bi gak sho' wbanna' ikeen.

21 La' gana' de yel' shao' chelena', na'kzan se yichjlall'do'lana' wneyi.

Jalaochoki nakgakan beeni' che kwerp chechoni

(Lc. 11:34-36)

22 'Jalaochoki nakgakan beeni' che kwerp chechoni. Shi jalaochoki chle'gakin kwaslol, doxen kwerp chechoni zoan lo beeni'na'.

23 Per shi bi chle'i jalaochoki, kwerp chechoni zoan lo yel chola'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.

Aga wak goncho yel' wni'ana' txen na' lekzka' gontecho Chioza' txen

(Lc. 16:13)

24 'Aga ga zoa to beñ' wlane' xshin chop beñ', la' wakzbanile' beena' to, na' gakchile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj inabia' yel' wni'ana' cho'.

Bi kwek yichjcho diika' chyaljicho

(Lc. 12:22-31)

25 'Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techle yel' mban chechona' aga ka daa cheej chaocho, na' zak'tech kwerp chechona' aga ka xalaancho'.

26 Li wwiakachi byindo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Xacho Chioza' zoa yabana' legakb. ¿Alechlin le', zak'techle aga ka bado'ka' ze lo llazə?

27 Na' ni tole bi gak yischooch yel' mban chelena' zi shloll la'kzi nall inlleb ze le wneyi cheyin.

28 'Na' ¿biche chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi cholgakan do.

29 Per nia' le', ni dii Salomónna', beena' wdapchga yel' shao'ka', bi bllin gak xe'na' xochi ka yejdo'ka'.

30 Na' shi Chioza' none' yejdo'ka' ze lyixaa xochi, la'kzi nakan de toldezə na'tech chtop beñ' len na' chzeye'n, ¿alechla le', gontechle' wen chele gone' xalaanle la'kzi bitek chajle'le gaklene' le'?

31 Na' bi kwek yichjzle inazle: “¿Bin yeej gaocho?” wa “¿Nak goncho gat' xalaancho?”

32 La' beñ'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezkzile' chyaljile yog' diiki.

³³ Na' daa lliarote chiyal' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyalljile.

³⁴ Bitek kwek yichjle shi wyaj wdele llaka' zi za' la' to to lla nsa' dii zed cheyin.

7

Bi chiyal' yiya yiyiljcho ben'

(Lc. 6:37-38, 41-42)

¹ 'Bi yiya yiyiljle ben', kwenche bi yiya yiyilj Chioza' le'.

² La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'.

³ ¿Biche chwiazoo' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'?

⁴ Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Benški yibej' bicha' yoo loo jalawo'na'?"

⁵ ¡Ben' wxiye'! Zigaate bwia cho'na' na'tech wwio' che bish' ljwello'na'.

⁶ 'Na' bi gonze byen we'lenle xtil' Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtil' Chioza' ben'ka' bi cheengakile' wzenaggake'n kwenche ki wlej wshoshjgake' dillaa ka chon kushka' chlej chshoshjgakb daa bi choolall'gakb gaogakb.

Chiyal' inabicho Chioza' gaklene' cho'

(Lc. 11:9-13; 6:31)

⁷ 'Li inabi Chioza' bin cheenile na' gone'n. Li yiyilj daa cheenile na' yillelilen. Li ine cho'a puerta', na' wsalje'n.

⁸ La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsaljkgake' sho'e.

⁹ 'Le' zoa xiinle, shi inabib' le' to yetxtil aga we'leb' to yaj.

¹⁰ Wa shi inabib' le' to bel' yaa, aga we'leb' to bel' znia.

¹¹ Shi le' naktele ben' mal chak we'le xiinleka' daa nak dii wen, ¿alechli Xacho Chioza' zoa yabana' ki gone' le' dii wen dii shawaa shi inabilene'n?

¹² 'Kon ka cheenile goni ben' le', ka'kzan chiyal' gonilene', la' kan' na leya' na' librka' bzej dii ben'ka' wdixjee daa goll Chioza' legake'.

Puert daa nak diido' yid

(Lc. 13:24)

¹³ 'Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n.

¹⁴ Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

Daa chbia lo yaga' chli'n bi yag daa

(Lc. 6:43-44)

¹⁵ 'Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chlliayi'gake' ben', ka chon to ba znia.

¹⁶ Ka ile'ile ka nsa' chegake' na' gakbe'ile non nakgake'. La' nezkzile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa.

¹⁷ Ka'kzan yag wenna' chbian dii wen, na' yaga' daa bi nak wen chbian dii bi nak wen.

¹⁸ La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen.

¹⁹ Yog' yag dii chbia dii bi nak wen, chchoggake'n na' chzeygake'n.

²⁰ Daan, wakbe'kzile ka nsa' che ben'ka'.

Aga yog' ben' yilline' yabana' gana' zoa Chioza' chñabi'e
(Lc. 13:25-27)

²¹ 'Aga yog' ben'ka' na nad': “Xan', Xan'”, yillingake' yabana' gana' chñabia' Chioza', lete ben'ka' chongake' ka cheeni Xa' Chioza', beena' zoa yabana'.

²² Kat'ka' illin llana' yizia' kwent che ben', zangake' inagake' nad': “Xan', Xan', neto' wdixjeento' daa wno', na' kon yel' wak cho'na' bibejnto' dii xiw'ka' yoo ben' na' bennto' dii zan yel' wak.”

²³ Na'ch yepgakee: “Biga bembia' le'. Li kwas ka'lə, le' ben' wen dii mal.”

Chop ben' bengake' twej yoo
(Lc. 6:47-49; Mr. 1:22)

²⁴ 'Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na' to lo yaj.

²⁵ Na' ka gok yejsiwaa, bgol yaoka', na' wzechga be'na' nan wllig'gakan yoona', per bi billeen daa chi'cha leninna' lo yaja'.

²⁶ Per beena' cheni cho'a xtilaani na' bi chone' ka nia', nake' ka beena' bi chajni, beena' bxe lille'na' lo yoxa'.

²⁷ Na' ka gok yejsiwaa, bgol yaoka', na' wzechga be'na' na' bllig'gakan yoona' na' wlliyi'tekzan.

²⁸ Na' ka biyoll be' Jesúza' dillii, bibani ben'ka' ka chli' chsedile',

²⁹ daa bli' bsedile' legake' lega ben' za'len yel' wñabia', aga ka chli' chsedi ben'ka' chzajni legake' leya'.

8

Jesúza' biyone' to ben' che'i léprana'
(Mr. 1:40-45; Lc. 5:12-16)

¹ Na' ka biyetj Jesúza' lo yaana', ben' zan zinogake'ne'.

² Na' kwite'na' bllin to ben' che'ile' lepra', na'ch bçhek' xibe' lawe'na', chi'ene':
—Xan', nezid' wak yikwaso' yillwe'ni chak' shel' gueenilo'.

³ Na'ch Jesúza' bçxa neena' yichje'na', chi'ene':

—Cheenid'x. Na' ñaate yikwasa'n.

Na' kon ka golle' ka', lii biyakteyi beena'.

⁴ Na'ch che' Jesúza'ne':

—Ni to kono yoo ka nak daa ba ben' cho'. Lete wyaj lao bçxa' kwenche ile'ile' ba biyakilo', na' jwa' daa chiyal' lljoo lao Chioza' ka nllia dii Moiséza' bia' goncho kwenche inezi ben' ba biyakilo'.

Biyon Jesúza' xmos xan soldadka'
(Lc. 7:1-10)

⁵ Ka billin Jesúza' yell Capernaúma' lii bllinte to xan soldad lawe'na', na' got'yoile'ne',

⁶ chi'ene':

—Xan', xmosaa die' lillaa, na' net tlaa kwerp che'na' na' le chey chle'.

⁷ Na'ch che' Jesúza'ne':

—Na' sa' yiyonee.

⁸ Na' che' xan soldadka'ne':

—Xan', aga zakii nad' kwenche shoo loo yoo lillaa. Kon ben mandad yiyakile' na' wiyakkzile'.

⁹ Nia' ka' la' zoa ben' chñabia' nad', na' nad' lekzka' chñabia' soldad cha'ka'. Kat' chep' toe': “Wyaj ni'”, na' chaje'; na' kat' chep' stoe': “Da ni'”, na' chide'; na' kat' chizep' xmosaa: “Ben dga”, na' chone'n.

¹⁰ Ka beni Jesúza' cho'a xtilleena', bibanile' na' chi'e ben'ka' nogake' le':

—Dii li nia' le', bigan' lljtia' to ben' Israel ben' gonlilallee nad' ka chonlilall' beeni nad'.

11 Na' nad' nia' le', ben' zan ben' zaak doxen yell-lioni gonlilall'gake' nad' na' lljazoalengake' txen dii Abrahama', dii Isaaca' na' dii Jacoba' yabana' gana' chñabia' Chioza'.

12 Na' ka nak ben'ka' wlej Chioza' nan lljazoagake' gana' chñabi'e, zane' wzalee gana' shgasj shchoł, gana' kwellyesh'gake' na' gaoyaaaxaj leye'ka' daa le gakshejlall'gake', daa bi goongakile' inabi'e legake'.

13 Na'ch che' Jesúza' xan soldadka':

—Biyaj lillo'na', na' gak ka cheenilo' daa chajli'o cha'.

Na' lo lla lo gorzə biyaki xmose'na'.

Biyon Jesúza' tobiin che Pédróna'

(Mr. 1:29-31; Lc. 4:38-39)

14 Na'ch wyaj Jesúza' lill Pédróna', na' ble'ile' de tobiin che'na' yo'e dii lana'.

15 Na' bex' Jesúza' neena' na' bicheje' dii lana'. Na' lii wyastie' bene' dii wdaogake'.

Jesúza' biyone' zan ben'ka' bi shao'

(Mr. 1:32-34; Lc. 4:40-41)

16 Na'ch ka ba chxoa wbillá, jwa'gake' ben' zan gana' zoa Jesúza', ben' yoo dii xiw'ka', na' shcho'azə dillaa bi'e bichejgakan. Na' lekzka' biyone' yog' ben' bi shao'.

17 Gok ka' kwenche gok ka wna dii Isaíaza', beena' wdixjee daa goll Chioza'ne', daa wne': "Le' bikee yillwe'ka' che'icho na' bene' ka bigaa yel' chey chla chechona'."

Ben'ka' cheengakile' lljanogake' Jesúza'

(Lc. 9:57-62)

18 Na' ka ble'i Jesúza' ben' zan inleeb ba nechjgake'ne', bene' mandad telene' ben'ka' nakgake'ne' txen shlaa nido'na'lə.

19 Na' wbig' to ben' chli' chsedi leya', chi'ene':

—Maestro, cheenid' sa'len' li' gattezə shajo'.

20 Na'ch che' Jesúza'ne':

—Bez'ka' nongakb yech ga chiyoogakb, na' byindo'ka' non lilldo'gakb, san nad', Ben' Bsel' Chioza' Yell-lioni, bibi lill' de.

21 Na' bchej sto ben' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

22 Na'ch goll Jesúza'ne':

—Da, dino nad'. Wikwash'kzə ljwell ben' wetka'.

Jesúza' bkweze' be'na' lo nido'na'

(Mr. 4:35-41; Lc. 8:22-25)

23 Na'ch wyoo Jesúza' loo barkwa' len ben'ka' ba nakgake'ne' txen.

24 Na' shlak zej barkwa' wtese'. Na' wzolo wzechga be'na' lo nido'na', na' wzolo chas chataan na' biyoll nisa' loo barkwa'.

25 Na'ch ben'ka' nak Jesúza' txen jasangake'ne', na' che'gake':

—jXan', bisla cho'! jBa chbe'cho yel!

26 Na'ch che' Jesúza':

—¿Berache chlleblikzle? ¿Biche bi nxenilall'le nad' kwasloł?

Na'ch wyase' bsheshlene' be'na' len nido'na', na' wlezcakan.

27 Na' ben'ka' lle'len Jesúza' loo barkwa' bibangakile' ka bene', na'ch che' ljwellgake':

—¿Noran nak beeni, lla? Axt be'na' na' nido'na' chzenaggakan che'.

Chop ben' Gadara yoogake' dii xiwaa

(Mr. 5:1-20; Lc. 8:26-39)

28 Na' ka bllin Jesúza' yell-liona' mbani Gadárana' daa llia shlaa nido'na', chop ben' yoogake' dii xiw'ka' bchejgake' loo kapsanta' jatilgake'ne'. Na' daa le zniagake' aga no chak te lo neza' chde gana' zoagake'.

- 29 Na' besyaagakan che'gakan Jesúza':
 —¿Biche za'zo' gani zoanto', Jesús, Xiin Chios? ¿Aba za'zelo' zidsak'zi'o neto' la'kzi bin' illin lla sak'zi'nto'?
- 30 Na' gaoz le' ba zan kush chaogakb.
- 31 Na'ch got'yoi dii xiw'ka' Jesúza', che'gakan le':
 —Shi yibejo' neto' loo yichjlall'do' ben'ki, we'gacho' latj yiyoonto' kushka'.
- 32 Na'ch goll Jesúza' legakan:
 —Wakkzan. Li yiyoo shka'.
 Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo niso'da' na' wche'gakb yel.
- 33 Na'ch ben'ka' chap kushka' bixonjdogake', na' ka billingake' lalle'ka' gollgake' ben' yellka' doxen ka gok che ben'ka' yoo dii xiw'ka'.
- 34 Na'ch wza' yog' ben' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

9

Jesúza' biyone' to ben' net tlaa kwerp che'na'
 (Mr. 2:1-12; Lc. 5:17-26)

- 1 Na' biyoo Jesúza' to loo barkw, na'ch bilag'gake' shlaa niso'da' na' billine' yell che'na' gana' wzee.
- 2 Na' bllinlengake' to ben' net ni'a neena' lawe'na', nxoogake'ne' to lo daa. Na' gokbe'i Jesúza' le nonlilall'gake'ne', na'ch golle' ben' we'na':
 —Btiplalloo, xiin', ba biyakxen xto'loona'.
- 3 Na'ch bal ben'ka' chli' chsedi leya' che' ljwellgake': “Ba chonz kwinn beeni ka Chioza' daa ne' ka'.”
- 4 Na' gokbe'i Jesúza' daa wza'lall'gake', na' chi'e legake':
 —¿Biche chza'lall'zle ka'?
- 5 ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”?
- 6 Na' wliid' le', nad', Ben' Bsel' Chioza', nap' yel' wñabia' yell-lioni kwenche yizi'xen' saaxya che ben'.
- Na'ch golle' beena' net ni'a neena':
 —Biyas, bitob daa cho'na', na' biyaj lillo'na'.
- 7 Na'ch biyas beena' net ni'a neena' na' ziyaje' lille'na'.
- 8 Na' ka ble'i ben'ka' ka gok, bibangakile', na' be'la'ogake' Chioza' daa bi'e yel' wak xenna' to ben' yell-lío.

Wlej Jesúza' Matewa' kwenche gone'ne' txen
 (Mr. 2:13-17; Lc. 5:27-32)

- 9 Ka biza' Jesúza' na', ble'ile' to ben' wichixj, lie' Mateo, chi'e gana' chchixje'. Na' chi'ene':
 —Da, dino nad'.
 Na'ch lii wzolla'te Matewa' janoe'ne'.
- 10 Na' shlak chi' Jesúza' lill Matewa', bllin ben' zan wichixjka' na' zan ben' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len ben'ka' nakgake'ne' txen.
- 11 Na'ch ka ble'i fariseoka' chaolen Jesúza' ben'ka', na'ch wñabgakile' ben'ka' nakgake'ne' txen, che'gake':
 —¿Biche chaolenz maestro cheleni ben' wichixjki len ben'ki bi nsa' cheyin wen?
- 12 Na' beni Jesúza' daa goll fariseoka', na'ch chi'e legake':
 —Aga ben'ka' shawaan chyalljgakile' wen rmecha' san ben'ka' bi shawaan chyalljgakile'ne'.

13 Li yiyaj na' li lljased bin zeji Cho'a Xtill' Chioza' gana' nan: "Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'." Aga bid' ni che beñ'ka' nak beñ' li beñ' shao', san bid' ni che beñ' saaxyaka'.

Wnabgakile' Jesúza' biche bi chzoa beñ'ka' nakgake'ne' txen wbas'

(Mr. 2:18-22; Lc. 5:33-39)

14 Na'ch beñ'ka' nak Juanna' txen jabig'gake' kwit Jesúza' na' wnabgakile'ne' che'gake':
—Neto' na' fariseoka' zeyi chento' chzoanto' wbas'. Na' ¿biche beñ'ka' nakgake' li' txen bi chzoagake' wbas'?

15 Na'ch che' Jesúza' legake':

—Kat' chak to wishagna' beñ'ka' chdi'a chllag lill beñ' byona' aga chdagake' nyesh', san cheej chaogake'. Na' ka'kzan beñ'ki nakgake' nad' txen, cheej chaogake' naa zoalen' legake', per wllin lla wkwas beñ' nad' kwite'ka', kana'chan soagake' wbasaa.

16 'Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nll'o' gakchan dii xench.

17 Na' aga no chгаа vino daa zi' bchejte loo yid gola', la' wchez' yid gola' na' laljə vinona', na' ka vinona' ka yida' kwiayi'gakan. San chiya' sholl vino daa zi' bchejte loo yid koba' kwenche ni ton bi kwiayi'.

Jesúza' biyone' xiin Jairona' len noola' jexee xe'na'

(Mr. 5:21-43; Lc. 8:40-56)

18 Na' ni choe'te Jesúza' dill', ka bllin to beñ' wnabia' na' bchek' xibe'na' lao Jesúza', chi'ene':

—Shintg wit to bi' nool cha'; per shi li' sa'gacho' na' wxoa noona'b' na' yibam'.

19 Na'ch lii wzolla'te Jesúza' zejlene' beñ'ka' nakgake'ne' txen lill beñ' wnabia'na'.

20 Na' ka zejgake' lill beñ' wnabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' bexee xe'na',

21 la' chakile': "Kon shel' ba bexaa xe'na' wiyakkzid'."

22 Na' biyechj Jesúza' na' ka ble'ile' noola' chi'ene':

—Btiplalloo, xiin', ba biyakilo' daa chonlilalloo nad'.

Na' lii biyakteyi noola'.

23 Na' ka bllin Jesúza' lill beñ' wnabia'na' ba lle' beñ'ka' chkwel bllaja' na' beñ' zan ba chosyaagake' chbellgake'.

24 Na'ch che' Jesúza' beñ'ka':

—Li yillesh ni. Aga witba'n san cheszbaan.

Per bxill-ligake'ne'.

25 Na' ben Jesúza' byen billeshgake', na' wyo'e na' bexee na' bi' nool weta' na' lii biyasteb'.

26 Na' yog' yellka' llia gaoz wze dill' daa bene'.

Biyon Jesúza' chop beñ' lchol

27 Na' ka biza' Jesúza', chop beñ' lchol janogake'ne'. Na' chosyaagake' zilljə che'gake':

—¿Biyesh'lall'gachi neto', xiin dia che dii Daví!

28 Ka biyoo Jesúza' loo yoona', beñ' lcholka' jabig'gake' kwite'na'. Na'ch che' Jesúza' legake':

—¿Achajle'le wak gon' ka ile'ile?

Na'ch goll beñ' lcholka'ne':

—Awe, Xannto', wak gono' ka ile'into'.

29 Na'ch bex' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

30 Na'ch bile'gakile'. Na' Jesúza' golle' legake':

—Li gon byen kono ye'le ka'.

³¹ Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

Biyon Jesúza' to ben' bi chak ine

³² Shlak chiza' ben'ka' gok ben' lchoł, bllin ben' yoblə lao Jesúza' nche'gake' to ben' bi chak ine daa yo'e dii xiwaa.

³³ Na' kon ka bibej Jesúza' dii xiwaa yoo beena' na' binie'. Na' bibani ben'ka' lle' na', nagake':

—Ni shlin bin' ile'icho yell Israeli to yel' wak ka dga ba ben beeni.

³⁴ Per fariseoka' che'gake':

—Beeni chibeje' dii xiw'ka' kon yel' wak che daa chñabia' legakan.

Chyallj ben' zan gongake' xshin Chioza'

³⁵ Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag ben' Israelka' choe'lwillgake' Chioza'. Wdixje'ile' legake' dill' wen dill' kob che yel' wñabia' che Chioza' na' biyone' ben' che'i bittezə yillwe'.

³⁶ Na' ble'i Jesúza' ben' zan zejengake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa.

³⁷ Na'ch golle' ben'ka' nakgake'ne' txen:

—Dii li nia' le', ben'ka' zi' gonlilall'gake' Chioza' zaklebgakile' to dii wlliachga to lo yellio, na' chyallj no yizi' yilapan, per to chopchga wen llinka' zoa.

³⁸ Na' li inabi Xancho Chioza' wzanche' ben'ka' wtopgake' ben'ka' gonlilall'gake'ne'.

10

Jesúza' wleje' shllin ben'ka' gakgake' postl che'

(Mr. 3:13-19; Lc. 6:12-16)

¹ Na'ch biti'a Jesúza' ben'ka' shllin wleje' na' bi'e legake' yel' wñabia' kwenche gak yibejgake' dii xiw'ka' yoo ben', na' yiyongake' ben' che'i bittezə yillwe'.

² Na' kin le postlka' shllin: zigaate wleje' Simónna', beena' lezkka' che'gake' Pedro, len ben' bishee Andréza', na'tech Jacobona' len ben' bishee Juanna', ben'ka' nak xiin Zebedewa',

³ na'ch Felípena', Bartoloména', Tomáza', Mateo, ben' wıchixja', Jacobo xiin Alfewa', Tadewa',

⁴ Simón, beena' bsi'gake' Zelote, na' Jud Scariota', beena' bene' Jesúza' lo na' ben' malka'.

Bsel' Jesúza' postlka' shllin je'gake' cho'a xtill' Chioza'

(Mr. 6:7-13; Lc. 9:1-6)

⁵ Na'ch bsel' Jesúza' ben'ka' shllin je'gake' cho'a xtill' Chioza', na' chi'e legake':

—Bi shajle yellka' gana' zoa ben'ka' bi nak ben' Israel, ni bi shajle yellka' llia gana' mbani Samáriana'.

⁶ San li shaj gana' lle' ben' Israelka', ben'ka' nak ka xil' ba wnit.

⁷ Li shaj li lljtixjee ba zoa gaoshosh inabia' Chioza' beena' zoa yabana' loo yıchjlall'do' ben'.

⁸ Li yiyon ben'ka' bi shao' na' ben'ka' che'i lepra, li yisban ben' ba wit, na' li yibej dii xiw'ka' yoo ben'. Na' ka ben' Chioza', beñe' le' yel' waka' ka'z, ka'kzan le' bibi wıchixjle yiyonle ben'.

⁹ Na' bi wa'le mech de or, de plat ni de cobre.

¹⁰ Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

¹¹ Na' kat' illinle to to yell xen wa yelldo'zə, chiljle to ben' nsa' che' wen, na' yigaanle lille'na' na' na'tezə soale axt ka illinch lla yiza'le.

¹² Na' ka sho'le lille'na' ye'lene': “Chioza' wzoe' le' mbalaz.”

13 Na' shi dii li beṅ'ka' lle' na' nakgake' beṅ' wen, wakkzə daa ye'le legake'; san shi bi nakgake' beṅ' wen, na' aga wakan.

14 Na' gattezə illinle shi kono wleb le' na' ni bi wzenaggake' chele, na' yiza'le lill beena' wa yella' gana' gongakile' le' ka' na' yishible bishtena' lliā ni'aleka'.

15 Dii li nia' le', kat' illin lla wchoglo Chioza' che beṅ', yeḷ' zak'zi' xench ile'chi beṅ' yellka' gana' gongakile' le' ka' aga ka beṅ' yell Sodómana' na' yell Gomórrana'.

Yeḷ' zak'zi'ka' yen ile'i beṅ'ka' nak Jesucristona' txen

16 'Nad' chselaa le' ka xildo' ladj ba zniaka'. Na' chiyaḷ' gake beṅ' sin' na' beṅ' wen.

17 Wsak'gale, la' wchej beṅ' lljwee le' lao beṅ'ka' chṅabia' na' wit chingake' le' gana' chdop chllagcho choe'ḷwillcho Chioza'.

18 Na' lljwa'gake' le' lao beṅ' wṅabia' xenka' daa chonḷilall'le nad', na' ka' gak we'lenle legake' cho'a xtilaana' na' ka'kzə beṅ'ka' bi nakgake' beṅ' Israel.

19 Na' kat' gongake' le' lo na' beṅ'ka', bi sele wṅeyi naklə inale wa bi inale, la' ka gal' inele, Chioza' wxoe' dillaa cho'a loll'leka'.

20 La' aga len' inele, san Espíritu che Xacho Chiozan' gone' ka inele.

21 'Beena' zoa beṅ' bishee leteze' gone'ne' lo na' beṅ'ka' witgake'ne', na' beena' zoa xiine' gone'b' lo na' beṅ' wite'b'. Na' soa beṅ' yizoshi'e xaxneena' na' gone' legake' lo na' beṅ'ka' witgake' legake'.

22 Yog'lol beṅ' gakzbangakile' le' daa nonḷilall'le nad', per beena' so sakile' bittezə daa yen ile'ile' axt kat' guete', beenan' gat' yeḷ' mban che' zejli kaṅi.

23 Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'lol yellki mbani Israeli kat' illin lla yiyed' nad', Beṅ' Bseḷ' Chioza'.

24 'To beṅ' chsed aga zak'che' ka beena' chli' chsedile', na' ka'kzə to wen llin aga zak'che' ka xane'na'.

25 Na' beena' ni chsed yibaile' gake' ka beena' chli' chsedile', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, ¿alelə ki inagake' chele ka'?

¿Non chiyaḷ' illebcho?

(Lc. 12:2-9)

26 Bi illeble beṅ'ka' biya dii wchi' wsak'gake' le'. La' daa kono nezi naa, wllin lla ila'lawin, na' aga ga de to dii ngash' dii bi illin lla ila'lawin.

27 Diika' chli' chsedid' le' do ngash'zə, li we'n dill' ladj lkwe' beṅ'. Na' diika' nia' le' to le'zə, li wzenin yog'lol beṅ'.

28 Bi illeble beṅ'ka' cheengakile' witgake' le', la' kwerp chele na'zan witgake', aga bi gak gongakile' yichjlall'do'lena'. San Chiozan' chiyaḷ' illeble, la' len' wakə wlliyayee kwerp chelena' len yichjlall'do'lena' lo yi' gabiḷa'.

29 'La'kzi wak si'cho chop byindo' kon to sintabdo', ni tob bi guet shi Xacho Chioza' bi wi'e latj.

30 Na' ka nakle le', axt yish' yichjlana' nḷabe'.

31 Daan bi chiyaḷ' illeble, la' zak'ch le' aga ka ba zan byindo'ka'.

Beṅ'ka' chchebgake' lao beṅ' nan nombia'gake' Jesús'a

(Lc. 12:8-9)

32 'Beena' we' dill' lao beṅ' ine' nake' nad' txen, ka'kzə nad' yep' Xa'na' zoa yabana' nake' nad' txen.

33 Na' beena' bi chcheb lao beṅ' nan nake' nad' txen, ka'kzə nad' yep' Xa'na' zoa yabana' bi nake' nad' txen.

Ni che Jesús'a gak beṅ' choplə

(Lc. 12:51-53; 14:26-27)

34 'Bi gakzile bid' lo yell-lioni kwenche gon' ka soalen ljwell beñ' mbalaz. Aga daan bid', san bid' kwenche wxia' wdil.

35 Daa bid' na' yidil-len beñ' byona' xe'na' na' noola' yidil-lene' xneena', na' beena' zoa xoolille' yidil-lene' le'.

36 Na' beñ'ka' zoa toz yoo gakzbani ljwelle'.

37 'Beena' chakchile' xe'na' wa xneena' aga ka nad', bi chidolee gake' nad' txen, na' ka'kzə shi chaktechile' xiine'na' ka nad', lekzka' bi chidolee gake' nad' txen.

38 Beena' bi chzani yel' mban che'na' yen ile'ile' bittezə kwenche gone' ka nia', bi chidolee gake' nad' txen.

39 Na' beena' chakile' shel' kono wchi' wsak' le', beenan' kwiayee. San beena' chzani yel' mban che'na' yen ile'ile' bittez daa nonlilallee nad', beenan' gat' to yel' mban che' zejli kani.

Ben'ka' soagake' mbalaz yabana'

(Mr. 9:41)

40 'Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'.

41 Beena' wlebe' to beñ' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to beñ' chone' daa nak shli daa chibaile' nake' beñ' li beñ' shao', lekzka' lene'n ikee ka laxj beena' chon daa nak shli.

42 Na' beena' we' la'ch' lat' nis yeej beñ'ki nakgake' nad' txen, dii li nia' le', de laxje'.

11

1 Na' ka biyoll goll Jesúza' beñ'ka' shllin bin chiyal' gongake', na'ch bizee na', na' jali jasedile' beñ' na' jtixje'ile' legake' cho'a xtill' Chioza' yellka' llia gana' mbani Galileana'.

Ben'ka' bsel' Juan wichoa nisa'

(Lc. 7:18-35)

2 Na' Juanna' beena' chchoa beñ' nisa', ba die' lillyana'. Ka wnezile' daa chon Crístona', na'ch bselee chop beñ'ka' nakgake'ne' txen gana' zoe'.

3 Na' janabgakile'ne' che'gake':

—¿Alin' beena' ba llia bia' yid'?, ¿anti chiyal' kweznto' sto beñ' yoblə?

4 Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'.

5 Li lljayelle' chon' ka chle'i beñ' lcholka', na' chiza' beñ'ka' bi chak sa', na' chiyaki beñ'ka' che'i lepra, na' chiyeni beñ' kwellka', na' chisban' beñ'ka' ba wit, na' chyixje'id' beñ' yesh'ka' dill' wen dill' kob che Chioza'.

6 Chakomba beena' chajle' cha' na' bi chakchoplallee.

7 Na' ka biza' beñ'ka' bsel' Juanna', na'ch wzolo Jesúza' be'lene' beñ'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to beñ' chakchoplallii che dill'ka' cho'e?

8 Shi bi nakan ka', ¿nakran nak beena' jawiale? ¿Ato beñ' nakw xalaane' dii le nakə? Bi nakan ka'. La' nezkzile beñ'ka' nakw xalaangake' dii le nak zoagake' loo yoo lill beñ' wnabia'ka'.

9 ¿Nakrakzan nak beena' jawiale? ¿Ato beñ' chyixjee daa che' Chioza'ne'? Dii li kan' chone', na' chontechle' ka beñ'ka' chyixjee daa che' Chioza' legake'.

10 La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na',

na' chixji'e xtilloona' kwenche soa beñ' wzenaggake' cho' kat' illino'.

11 Dii li nia' le', ladj yog' ben' yell-lioki, ni toe' bin' ichej gake' ben' zak'chi' aga ka Juanna' beena' chchoa ben' nisa'. Per nottezə beena' choe' latj inabia' Chioza' yichjlall'do'ena', zak'teche' aga ka Juanna'.

12 'Kon ka wzolo Juanna' bchoe' ben' nisa' axt naanlla, zoa ben' chsej chllongake' kono wleb yel' wñabia' che Chioza'.*

13 Librka' daa bzej dii ben'ka' wdixjee daa goll Chioza' legake' na' leya' bzej dii Moiséza' wdixjeegakan che yel' wñabia' che Chioza', na' lekzannan' cho'e Juanna' dill' naa blee.

14 Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'.

15 Ka le' chenile dga nia', li sen wneyi.

16 '¿Bera ka wsaklebid' le' mbanle naa? Le' chonle ka bi'do'ka' lle' gana' chak yaana' na' chosyaagakb' che' ljuwellb':

17 “Bkwellnto' blleja' na' bi byaale, na' belnto' daa chon nyesh' na' ni bi wchellkzle.”

18 La' Juanna' bi weej wdawe' dii wen dii shao', na' wnagake' che': “Dii xiwaan yo'e.”

19 Na'ch wdena' bid' nad' nak' Ben' Bsel' Chioza' Yell-lioni, na' cheej chaw', na' nagake' nak' to ben' waoxat na' to weezo, na' lekzka' nagake' non' txen ben' wen dii malka' na' ben' wichixjka'. Per yel' sin' che Chioza' chli'lawin ka chsa' che ben'ka' chzenaggake' che'.

Yellka' gana' bi bzenaggake' che Jesúza'

(Lc. 10:13-15)

20 Na'ch wzolo Jesúza' bsheshlene' ben' yellka' gana' bli'che' yel' waka', daa bi biyaj bilengakile' xtoleeka'. Na' wne':

21 —¡Nyesh'laz gak chele, le' ben' yell Corazín! ¡Nyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' yel' wakka' ba ble'ile, lii biyaj bilenteljagakile' xtoleeka', na' gokwljagake' lech' zeshaa na' bllaagake' dena' yichje'ka' daa le gokyesh'gakile', shel'ka'.

22 Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'.

23 Na' le' ben' Capernaúm, ¿achakile willinle yabana'? Aga willinle na', san latj gana' sak'zi'len yillinle. La' shel' ben' Sodómaka' ble'gakile' yel' wakka' daa ba ble'ile, balja biyaj bilengakile' saaxya che'ka' na' ni ndia yella', shel'ka'.

24 Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

Mbalaz soa ben'ka' gonlilall'gake' Jesúza'

(Lc. 10:21-22)

25 Na' lo gora' wne Jesúza', chi'e:

—Xa, li' nako' xan yabana' na' yell-lioni, choe'lawaa li' daa bkwashilo' ben' sin'ka' diika' ba bliilo' ben'ka' bibi chajni.

26 Beno' ka', Xa, la' kan' wyazlalloo.

27 Na'ch goll Jesúza' ben'ka':

—Xa'na' bene' lall' na' yog'lol daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'.

28 Li gonlilall' nad', yog'le le' ba chjshiaile na' nakle ka ben' ntakw nchej to dii zii dii zshab, na' nad' gon' ka yizi'lall'le.

29 Li gon ka nia', na' li wzenag daa chzajniid' le', la' nad' nak' ben' gaxjlall' na' gon' ka gat' yel' wixi'lall' chele.

* 11:12 Zoa ben' chsej chllongake' kono wleb yel' wñabia' che Chioza': dga nakan to dii lallj. Lekzka' bal ben'ka' nsed nagake' versiculoni zejín: zoa ben' chongake' axt ga zeelo chakgake' kwenche inabia' Chioza' legake'.

³⁰ Daa nia' le' gonle aga nakan dii bi gak gonle, na' daa chli' chsedid' le' bi nakan dii bi so sakile.

12

Ben'ka' nak Jesúza' txen wdishjgake' trígona' llana' chombaangake'

(Mr. 2:23-28; Lc. 6:1-5)

¹ To lla sabd, llana' chombaang ben' Israelka', wdelen Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo wdishjgake' trígona' na' wdaogake'n.

² Na' ka ble'i fariseoka' daa chon ben'ka', na'ch che'gake'ne':

—Bwia ka chon ben'ki nakgake' li' txen, chongake' daa bi chiyal' goncho llani chombaangcho.

³ Na'ch che' Jesúza' legake':

—¿Abin' wlable ka ben dii Davina' len ben'ka' nakgake'ne' txen ka wdongake'?

⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bꞑozka' de lsens gaogake'.

⁵ ¿Abin' wlable leya' gana' nan aga bi xya nakan che bꞑozka' la'kzi chongake' llinna' loo yoodo'na' llaka' chombaangcho?

⁶ Na' nia' le', ladjleni zoa to ben' zak'che' aga ka yoodo'na'.

⁷ Bilja wyajniile bi zeji Cho'a Xtil' Chioza' daa na: “Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'.” La' shel' le' wyajniilen, aga waole xya che ben' bi nap dol', shel'ka'.

⁸ Nad', Ben' Bsel' Chioza' Yell-lioni, chnabi'a lao llani chombaangcho.

Jesúza' biyone' to ben' llana' chombaang ben' Israelka'

(Mr. 3:1-6; Lc. 6:6-11)

⁹ Na'ch biza' Jesúza' latja', na' biyaje' gana' chdop chllag ben' Israelka' choe'lwillgake' Chioza'.

¹⁰ Na' ladj ben'ka' len to ben' net tlaa neena'. Na' fariseoka' chwiagake' naklæ ka si' sengake' kwenche gaogake' xya che Jesúza', na'ch wñabgakile'ne', che'gake':

—¿Beran na leya'? ¿Ade lsens yiyoncho to ben' bi shao' llani chombaangcho?

¹¹ Na'ch che' Jesúza' legake':

—Shi nole zoa to xil' chele na' ixopb to loo yech llaki chombaangcho, ¿abi yibejleb?

¹² Na' jzak'techlæ benecha' aga ka xilaa! Daan de lsens goncho daa nak wen llaki chombaangcho.

¹³ Na'ch golle' beena' net tlaa neena':

—Bli noona'.

Na' ka bli neena' lii biyakten ka nak daa zi shlaa.

¹⁴ Na' ka biza' fariseoka' gana' chdop chllaggake', be'gake' dill' nak sho' xnezi witgake' Jesúza'.

Daa wna dii Isaíaza' che Jesúza'

¹⁵ Ka gokbe'i Jesúza' daa cheengakile' gongake', na' bizee ziyaje' gan yoblæ. Na' ben' zan inlleb janoe'ne' na' biyone' yog' ben'ka' bi shao'.

¹⁶ Na' golle' ben'ka' biyone' bi we'gake' dill' daa chone'.

¹⁷ Daa bene' ka', billinin ka wna dii Isaíaza', beena' wdixjee daa goll Chioza'ne', kana' wne':

¹⁸ Beenin nake' wen llin cha', beena' ba wlej',

na' le chakidee na' chazlallaa ka chone'.

Na' wzoa' Espiritu cha'na' loo yichjlall'do'ena',

na' chixje'ile' ben'ka' lle' yell-lioni ka cheenid' gongake'.

¹⁹ Bi gakkil-lene' ben',

na' ni bi gosyee wi'e dill' yawi nez.

²⁰ Aga wisyoll wistoe' chishje' yaxtila' daa ba chashjə.

na' aga wisole' mesha' daa ba chiyol,

axt ki gone' gan wli'lao yel' li yel' shao' che'na'.

²¹ Na' ben' lle' doxen yell-lioni gongake' lez len' gaklene' legake'.

Nagake' che Jesúza' chibeje' dii xiw'ka' kon yel' wak cheyinna'

(Mr. 3:19-30; Lc. 11:14-23; 12:10)

²² Jwa'gake' lao Jesúza' to ben' yo'e dii xiw' na' bi chle'ile' ni bi chak inie'. Na' bibej Jesúza' dii xiwaa yo'e, na' bile'ile' na' gokte binie'.

²³ Yog'lol ben'ka' bibangakile' ka nak daa bene', na' chisne':

—¿Aga beenin xiin dia che dii Davina', beena' chbezcho, lla?

²⁴ Ka beni fariseoka' dillaa choe' ben'ka', na' che'gake':

—Aga bi yel' wak nap beeni. San yel' wak che Bezlona',* daa chnabia' dii xiw'ka'zan, chibejile' diika'.

²⁵ Na' gokbe'i Jesúza' daa chza'lall' fariseoka', na'ch chi'e legake':

—Shi gana' chnabia' to ben' na' tilgake' to lezgake' na' gakgake' choplə, na' kwiayi' gana' chnabi'e, na' ka'kzə shi to yell wa ben' lle' toz yoo gakgake' choplə aga wdiagake'.

²⁶ Ka'kzə Satanáza', shi yibej ljwell dii xiwiinka' yoo ben', aga wdia yel' wñabia' cheyinna', shel'ka', la' to lezgakannan' chidil-len kwingakin.

²⁷ Le' nale chibej' dii xiwaa yoo ben' kon yel' wak che Bezlona'† daa chnabia' legakan. ¿Shera ben'ka' nakle txen? ¿Alezkka' lennan' chibejlengake' dii xiw'ka' yoo ben'? Daa bi nakan ka', na' chli'n nakllejile.

²⁸ Na' shi nad' chibej' dii xiw'ka' kon yel' wak che Espíritu che Chioza' zevin ladjleni ba bla' yel' wñabia' che Chioza'.

²⁹ 'Aga no gak sho' lill to ben' wal na' kwane' dii de che' shi bi wcheje'ne' zigaate. Na'chan gak kwane' lille'na'.

³⁰ 'Beena' bi chone' nad' txen, len' chakzbanile' nad'; na' beena' bi chaklene' nad' kwenche wzenag ben' che Chioza', len' chsej chllone' wzenaggake'.

³¹ 'Na' nia' le', wizi'xen Chioza' yog' saaxya chelena' na' yog'te dii mala' daa chbell chnele, san shi inele zban che Espíritu Sántona' na' cheyi diika' chone', aga wizi'xen Chioza' chele.

³² Na' shi no ine cha', nad', Ben' Bsel' Chioza' Yell-lioni, lezkka' wizi'xen Chioza' che', san beena' ine che Espíritu Sántona', aga wizi'xene' che' naa zoe' yell-lioni ni kat' illin llana' wchogloe' che ben'.

Kon ka nak yaga', ka'te nak daa chbian

(Lc. 6:43-45)

³³ 'Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian.

³⁴ ¡Le' ben' wen dii mal! ¿Nakra gonle inele daa nak dii wen daa nakle ben' mal? La' yog' dill' daa chchej cho'a loll'chona' za'n loo yichjlall'do'chona'.

³⁵ Beena' nak ben' wen cho'e dill' wen, daa yoo dii wenna' loo yichjlall'do'ena'; na' beena' nak ben' michian bi cho'e dill' yejni'alallii, daa yoo dii michianna' loo yichjlall'do'ena'.

³⁶ Na' nad' nia' le', kat' illin lla yizi' Chioza' kwent che yog' ben', kanan' yidele kwent che yog'te dill'ka' kontele wnele.

³⁷ La' shi le' choe'le dill' wen, na'ch ina Chioza' bibi dol' naple; per shi le' bi choe'le dill' wen, na' wchogloe' chele sak'zi'le.

* **12:24** Bezlo: lezkannan' Beelzebú de xtil na' nakan sto le Satanáza'. † **12:27** Bezlo: lezkannan' Beelzebú de xtil na' nakan sto le Satanáza'.

Wnabi ben' malka' Jesúza' wli'e to yel' wak

(Mr. 8:12; Lc. 11:29-32)

³⁸ Na'ch bał fariseoka' na' ben'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwenche gakbe'into' shi Chiozan' bselee li'.

³⁹ Na' che' Jesúza' legake':

—Le' nakle ben' mal na' ben' bi chzenag che Chioza' chnable ile'ile' yel' waka' kwenche wli'n shi Chiozan' bselee nad', per aga wliid' le' daa cheenile. Lete ile'ile' to dii nak ka yel' wak daa ben Chioza' che dii Jonáza'.

⁴⁰ La' Jonáza' wyo'e shonə lla shonə yel loo lee bel xenna', na' ka'kzə nad', Ben' Bsel' Chioza' Yell-lioni, shon lla shon yel igaana' loo bana'.

⁴¹ Kat' illin lla wchoglo Chioza' che ben' yell-lioni, kanan' dii ben' Níniveka' gaogake' xya chele, le' zoale naa, la' legake' biyaj bileni saaxya che'ka' kana' wdixje'i dii Jonáza' legake' cho'a xtill' Chioza'. Na' nad', zak'techid' aga ka dii Jonáza' na' bi chzenagle cha'.

⁴² Na' lekzka' llana' kat' wchoglo Chioza' che ben' yell-lioni, noola' wnabia' yellka' lle' do lli'lə gawe' xya chele, le' zoale naa, la' len' wzee zit' nleb bidzenague' dill' sin' daa wne dii Salomónna'. Na' nad', zak'techid' aga ka dii Salomónna' na' bi chzenagle cha'.

Dii xiwaa daa chiyoo ben'

(Lc. 11:24-26)

⁴³ Kat' chichej dii xiwaa yoo ben', na' chdan gana' bibi chashj chleb chyiljan gana' yizi'lalliin. Na' kat' bi chllelin gana' yizi'lalliin,

⁴⁴ na'ch chakin: “Yiyaach' dii yoblə gana' bichejkz'.” Na' kat' yillinan gana' bichejan, nakan ka to yoo desh dii nxi nloa.

⁴⁵ Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal che beena' aga ka gok che' dii nech. Ka'kzan gak che ben' malka' lle' naa.

Bllin xna' Jesúza' len ben' bisheeka' gana' zoe'

(Mr. 3:31-35; Lc. 8:19-21)

⁴⁶ Ni choe'lente Jesúza' ben'ka' dillaa ka bllin xneena' len ben' bisheeka' goklall'gake' wshaljengake'ne' na' wzegake' lesh' chyoonaa'.

⁴⁷ Na' goll to ben' Jesúza':

—Xnoona' len ben' bishooka' zegake' lesh' chyoonaa' cheengakile' wshaljengake' li'.

⁴⁸ Na' che' Jesúza' beena' golle'ne' ka':

—¿Noran xna'na' na' noran ben' bishaaka'?

⁴⁹ Na'ch bli'e ben'ka' nakgake'ne' txen na' chi'e:

—Ben'kin xna'na' na' ben' bishaaka'.

⁵⁰ La' nottezə beena' chon ka cheeni Xa'na' zoa yabana', beenan' nake' ben' bishaa, ben' zan' na' xna'.

13

Jempl che to ben' goz goon

(Mr. 4:1-9; Lc. 8:4-8)

¹ Na' lo llana'tezə wza' Jesúza' yoona' gana' zoe' na' jchi'e cho'a nisdona'.

² Na' daa bdop ben' zan gana' chi'e, na' wyepe' jshie' to loo barkw. Na' yog' ben'ka' bdop bllag wzegake' cho'a nisdona'zə.

³ Na'ch bseesee zan jemplka' kwenche bli' bsdile' legake', chi'e:

—To ben' goz goon wzee zeje' goza'.

⁴ Na' ka zej chzalee binna', bxop balan cho'a neza' na' bllin byinka' wdaogakban.

⁵ Na' zi balan bxop ladj yajka' gana' bitek chi' yona', na' lobe' bilaan daa bi wyazan zitj.

⁶ Na' ka wna'n wbillaa', bkwedan na' wbillten daa bitek bde loinna'.

⁷ Na' zi balan bxop ladj yag yesh'ka', na' bgol yag yesh'ka' na' bi be'gakan latj igolgakan.

⁸ Na' zi ba_{lan} bxop lo yo wenna', na' wllia chgan. Ba_{lan} wllia to guiyoa, na' zi ba_{lan} wllia guiyon na' zi ba_{lan} wllia shichoa.

⁹ Ka le' chenile dga nia', li sen wneyi.

Jesúza' bzajniile' biche chzoe' jemplka'

(Mr. 4:10-12; Lc. 8:9-10)

¹⁰ Na' be_n'ka' nak Jesúza' txen jabig'gake' kwite'na', w_nabgakile'ne':

—¿Biche chseeso jemplka' kat' chli' chsedilo' be_n'?

¹¹ Na' che' Jesúza' legake':

—Chioza' cho'e latj inezile ka nak yel' w_nabia' che'na' daa kono nezi. Na' be_n'ka' bi nak nad' txen, bi cho'e latj inezgakile'n.

¹² La' beena' ze wneyi shajniile' Cho'a Xtill' Chioza', zizikli shajni'chile'n. Na' beena' bi se wneyi shajniile'n, na' gal-lallee daa ba wyajniile' lat'.

¹³ Daan chseesaa jemplka' kat' chzajniid' legake'. La' be_n'ka' chwiategake' na' bi chakbe'gakile' bin zeji daa chon', na' chengakile' daa ch_nia' na' bi chajni'gakile' bin zejin, daa bi chajle'gake' cha'.

¹⁴ Na' daa chongake' ka', chillinin ka wna dii Isaíaza' ka wdixji'e daa goll Chioza'ne', daa na:

La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

¹⁵ La' yichjlall'do'eka' nchol nntin,

na' chongake' ka be_n' ndap naguin

na' ka be_n' nshod' jalawin.

Shel' bi chongake' ka', na' shajni'gakile' daa chzajniid' legake'

na' chazan loo yichjlall'do'eka'

na' yiyaj yilengakile' dii malka' chongake',

na' yiyongakee sto be_n' wen.

¹⁶ 'Per chakomba le' chakbe'ile bi zeji diika' chle'ile chon' na' chajniile diika' chli' chsedid'.

¹⁷ Dii li nia' le', zan dii be_n'ka' wdixjee daa goll Chioza' legake' na' zan dii be_n'ka' bsa' cheyin wen lao Chioza' goklall'gake' ile'gakile' ka dga chle'ile naa, na' bi ble'gakile'n. Na' goklall'gake' yengakile' ka dga chenile naa na' bi bengakile'n.

Bizajni Jesúza' legake' bi zeji jempl che be_n' goz goona'

(Mr. 4:13-20; Lc. 8:11-15)

¹⁸ Li wzenag bin zeji jempl che be_n' goz goona'.

¹⁹ Beena' cheni cho'a xtill' Chioza' daa chzajniin le' che yel' w_nabia' che'na', na' bi chajniile'n, nake' ka cho'a neza' gana' bxop binna' daa wdao byindo'ka', la' dii xiwaa chikwasan cho'a xtill' Chioza' daa wyoo loo yichjlall'do'ena'.

²⁰ Na' beena' cheni cho'a xtill' Chioza' na' le' chibaile' chlebe'n, nake' ka ladj yajka' gana' bxop binna'

²¹ daa bitek bi loin bde na' bi bdian. La' kat' bi chak che' wa chchi' chsak' be_n' le' ni che cho'a xtill' Chioza', na' lii chbejte yichje'n.

²² Na' beena' cheni cho'a xtill' Chioza' per chi' yichje' diika' chak che' na' chzelall'tie' yel' wni'ana', na' chsej chllongakan gon xshin cho'a xtill' Chioza' lo yel' mban che'na'. Beenan' nake' ka daa bla' ladj yag yesh'ka' daa bi be'gakan latj igolan.

²³ Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binna', na' ba_{lan} wllian to guiyoa, ba_{lan} do guiyon, na' zi ba_{lan} wllian shichoa.

Jempl che yixaa daa bla' ladj trígona'

²⁴ Na' bsees' Jesúza' sto jempl, chi'e legake':

—Yel' w_nabia' che Chioza' nakan ka to be_n' goze' bin wenna' lo yell-lío che'na'.

²⁵ Per wal chela' shlak chese', wyaj to beṅ' chakzbanile'ne' jeze' ladj trígona' daa nak xenin, na' ka biyoll bene' ka' bizee.

²⁶ Na' ka bgol trígona' na' wllian, na' lekzka' bgolte xeninna' ladjinna'.

²⁷ Na' wyaj wen llinka' jellgake' xaninna': "Beṅ'do', ¿aaga biṅ wennan jezo' lo cho'na'? ¿Gara wza' xeninna' lenzan ladjinna', lla?"

²⁸ Na' che' xaninna' legake': "Nochod' beṅ' chakzbanile' nad' jene' ka'." Na' goll wen llinka' le': "¿Acheenilo' shajnto' lljalall'nto'n?"

²⁹ Na' chi'e legake': "Bi lljalall'len, la' nxoll lente trígona' wllall'le.

³⁰ San igol-lenchan trígona', na' kat' illin lla yichoggake'n, na' yep' beṅ'ka' zigaate yilall'gake' xeninna' na' gongake'n shlen wej kwenche sheyan, na'tech yitopgake' trígona' na' yigooshao'gake'n loo lillinna'."

Jempl che sa mostásana'

(Mr. 4:30-32; Lc. 13:18-19)

³¹ Na' lekzka' bzoa Jesúza' sto jempl, chi'e:

—Yel' wṅabia' che Chioza' nakan ka sa mostásana' daa goz to beṅ' lo yell-lío che'na'.

³² La'kzi sa mostásana' nakan liizelozi diido' yid lao bichlæ sa yix' kwan, kat' chla'n na' chgolan na' chakan dii xench aga ka yix' kwanka' sto, na' axt byindo'ka' chon lillbka' lo xozinna'.

Jempl che levadúrana'

(Lc. 13:20-21)

³³ Na' lekzka' bzoe' sto jempl, chi'e:

—Yel' wṅabia' che Chioza' nakan ka levadúrana' daa chchix to noolæ shona rob yezja' kwenche yisgolan kwa che yetxtila'.

Jesúza' bchine' jemplka'

(Mr. 4:33-34)

³⁴ Jesúza' toshiizi bchine' jemplka' ka bi'e dill' ladj lao lkwe' beṅ'.

³⁵ Na' daa ben Jesúza' ka', billinin daa wdixjee to beṅ' daa goll Chioza'ne', ka wne': Wchin' jemplka' ka we'len' beṅ' dill'.

We'len' beṅ' dill' cheyi daa konon' inezi dezd kana' bxe bsilte Chioza' yell-lioni.

Bizajnií Jesúza' bi zeji jempl che yixaa daa bla' ladj trígona'

³⁶ Na' bisa' Jesúza' beṅ'ka' lle' na', na' biyo'e loo yoona'. Na' beṅ'ka' nakgake'ne' txen jabig'gake' kwite'na' che'gake'ne':

—Bizajnií neto' bi zeji jempl che xen trígona'

³⁷ Na' goll Jesúza' legake':

—Kin zejín: Nad', Beṅ' Bsel' Chioza' Yell-lioni, zaklebid' beena' goz trígona'.

³⁸ Na' doxen yell-lioni zaklebin gana' goz beena' trígona'. Na' beṅ'ka' choe'gake' latj chṅabia' Chioza' yichjlall'do'eka' zaklebgakile' trígona'. Na' beṅ'ka' choe'gake' latj chṅabia' dii xiwaa yichjlall'do'eka' zaklebgakile' xen trígona'.

³⁹ Na' dii xiwaa zaklebin beṅ' mala', beena' jez ladj trígona' daa nak xenin. Na' llana' chilapgake', zaklebin llana' kwiayi' yell-lioni. Na' anjlka' zaklebgakile' beṅ'ka' chizi' chilap trígona'.

⁴⁰ Na' ka chitopgake' daa nak xen trígona' kwenche wzeygake'n, ka'kzan gak che beṅ'ka' chṅabia' dii xiwaa yichjlall'do'eka' ka illin lla kwiayi' yell-lioni.

⁴¹ Nad', Beṅ' Bsel' Chioza' Yell-lioni, wselaa anjl cha'ka' kwenche yitopgake' beṅ' wen dii malka' na' beṅ'ka' chzechgake' beṅ' yoblæ gongake' dii mala'.

⁴² Na' wza'lgake' legake' lo yi' gabila' gana' kwellyesh'gake' na' gaoxaxj leye'ka' daa le gakshejlall'gake'.

⁴³ Na' beṅ' li beṅ' shao'ka' sho'gake' balaan choo balaan xen yabana' gana' chṅabia' Xacho Chioza'. Ka le' chenile dga nia', li sen wneyi.

Jempl che mecha' ngash'

⁴⁴ 'Yel' wñabia' che Chioza' nakan ka to mech xen dii ngash' to lo yell-lío che beñ' gana' to beñ' jadi'en. Na' na'tezə bikwasheen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

Jempl che to perla dii zak'chga

⁴⁵ 'Yel' wñabia' che Chioza' zaklebin to beñ' chone' delgens che perla dii zak'chga.

⁴⁶ Na' ka bllelile' to dii liizelozi zakii, na'ch jayet' jadie' yog' dii de che' kwenche wxi'en.

Jempl che yixj che bela'

⁴⁷ 'Yel' wñabia' che Chioza' zaklebin to yixj che bel. Beñ'ka' chzen bela' chzal'gake' yixja' loo nido'na' na' chzenan zan kwen bel. ⁴⁸ Na' kat' chilla' yixja' na' chibejgake'n cho'a nido'na' na' chbe'gake' chibegake' belka' nak wen na' chgooshaogake'b to loo llom, na' baka' bi nak wen, chchoongake'b.

⁴⁹ Kan' gak che benecha' ka illin lla kwiayi' yell-lioni. Anjlka' yibegake' beñ' wenka' ladj beñ' malka',

⁵⁰ na' wzal'gake' beñ' malka' lo yi' gabiła' na' kwellyesh'gake' na' gaoxaxj leye'ka' daa le gakshejlall'gake'.

Dii koba' na' dii gola'

⁵¹ Na'ch che' Jesús'a' beñ'ka' nakgake'ne' txen:

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

⁵² Na' chi'e legake':

—Beena' chli' chsedi leya' na' nzedile' che yel' wñabia' che Chios, beena' zoa yabana', zaklebile' to xan yoo beñ' ngooshaewe dii zan dii zakii, ka dii kob na' ka dii gol, na' chbeje'gakan chchine'gakan.

Jesúza' biyaje' Nazareta'

(Mr. 6:1-6; Lc. 4:16-30)

⁵³ Ka biyoll bsees' Jesús'a' jemplka', na' bizee.

⁵⁴ Na' ka billine' yell Nazareta' gana' bgole', na' bli' bsdile' beñ' Israelka' chdop chllag gana' choe'llwillgake' Chioza'. Na' bibani beñ'ka', che'gake':

—¿Gara jxi' beeni yel' sin' che'na', na' nak chak chone' yel' wakka'?

⁵⁵ ¿Aaga xiin karpintera'zan na' xneena' lie' María? Na' ¿aaga beñ' bishee Jacóbona', Joséna', Simónna' na' Júdaza'?

⁵⁶ Na' beñ' zane'ka' zoagake' lallchoni. ¿Gara jasede' yog'lol diiki chli' chsedile', lla?

⁵⁷ Na' daa bi wyajle'gake' che Jesús'a', na' golle' legake':

—To beñ' chyixjee daa che' Chioza'ne', gattez chgoogake'ne' balaan san lall lille'na' aga no chgoo le' balaan.

⁵⁸ Na' aga bitek yel' wak ben Jesús'a' yell Nazareta' daa bi wyajle'gake' che'.

14*Betgake' Juanna', beena' bchoa beñ' nisa'*

(Mr. 6:14-29; Lc. 9:7-9)

¹ Na' do kana', Heródeza', beena' chñabia' gana' mbani Galileana', benile' ka nak daa chon Jesús'a'.

² Na' golle' beñ'ka' chon xshine'na':

—Beenan' dii Juanna', beena' bchoa beñ' nisa'. Ba bibane' ladj beñ' wetka', daan chak chone' yel' wakka'.

³ La' kana' ni mban dii Juanna', Heródeza' bselee ben' bex'gake'ne' na' wloogake'ne' lillyana' ni che Herodíaza' xool ben' bisheena', beena' le Felipe.

⁴ La' dii Juanna' golle' Heródeza':

—Bi nakan wen nkoo xool ben' bishoona'.

⁵ Na' daa golle'ne' ka' goklall' Heródeza' wite'ne', per bi biyaxjile' daa bllebe' ben'ka' chajle' daa nak Juanna' to ben' chyixjee daa che' Chioza'ne'.

⁶ Per ka wya'i Heródeza' yiz, bi' nool wew' che Herodíaza' byaab' lao ben'ka' lle' lnina'. Na' daa le biyoolallii Heródeza' ka byaab'

⁷ axt bzoe' Chioza' de taschiw bchebe' wi'eb' bittezə dii inabib' le'.

⁸ Na' kon ka bzajinii xna'baab' bem', na' che'b' Heródeza':

—Yichj Juanna', beena' chchoa ben' nisa', cheenid' gonon nad' to lo plat llilj.

⁹ Na' gokyeshii Heródeza', per daa ba bcheble' lao yog' ben'ka' goxe' lnina' wi'eb' kon daa inabib' le', beshaze' byen we'gake'b' daa wnabb'.

¹⁰ Na' bselee ben' jachoggake' yichj Juanna' loo lillyana'.

¹¹ Na' bliigake'n to lo plat llilj na' be'gake'n bi' nool wewaa na' be'baan xna'baa.

¹² Na'ch ben'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

Jesúza' bwawe' gayaa mil ben'

(Mr. 6:30-44; Lc. 9:10-17; Jn. 6:1-14)

¹³ Na' ka wnezi Jesúza' daa gok che Juanna', bizee gana' zoe' na' biyo'e to loo barkw ziyaje' gana' kono ben' lle'. Na' ka wnezi ben'ka' lle' yellka' lliia gaozə cho'a nisdona' galan zej Jesúza', na'ch wloogake' nez janogake'ne'.

¹⁴ Na' ka bichej Jesúza' loo barkwa', ble'ile' ben' zan inleeb ba lle' na', na' biyeshile' legake' na' biyone' ben'ka' bi shao'.

¹⁵ Na' ka ba wlle', na'ch ben'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaocho. Goll ben'ki yiyajgake' yellka' lliia gaozə kwenche lljxi'gake' dii gaogake'.

¹⁶ Na' che' Jesúza' legake':

—Bi chonan byen yiyajgake'. Len', li we' dii gaogake'.

¹⁷ Na' che'gake'ne':

—Gay'chga yetxtil na' zi chopchga bel' noa'nto' ni.

¹⁸ Na' che' Jesúza' legake':

—Li gonshkin ni.

¹⁹ Na'ch golle' ben'ka' kwe'gake' lo yixa'. Na' bexee yetxtilka' gay' na' belka' chop na' blis lawe'na' yabana' na' bi'e Chioza' yei' choxken. Na'ch bxoxje' yetxtilka' na' bi'en ben'ka' nakgake'ne' txen kwenche be'gake' che che ben'ka'.

²⁰ Na' wdao yog'lol ben'ka' axt ka beljgakile'. Na' ka bidaogake', na'ch bitopgake' diika' bgaan, na' biyakan shllin xet'.

²¹ Na' ben' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

Jesúza' wzee lo nisdona'

(Mr. 6:45-52; Jn. 6:16-21)

²² Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nisdona' to lezgake', na' le' bigaane' kwenche bisee ben'ka' bdop bllag.

²³ Na' wde bisee ben'ka', na'ch wyepe' to lo yaa kwenche jelwille' Chioza' toze'. Na' ni zetie' lo yaana' ka gol.

²⁴ Na' barkwa' gana' ziyoo ben'ka' nakgake'ne' txen ba zejan gchol nisdona'. Chakan to ki to ka'lə daa chas chat' nisa', na' be'na' bi cho'en latj yiyajan shlichá.

²⁵ Na' zbalz biyetj Jesúza' lo yaana' na' bizee tlo nisdona' zeje' gana' zejləgake'.

26 Na' ka ble'i beṅ'ka' non Jesúza' txen zeje' tlo nisa', le bllébgake' na' axt besyaagake', nagake':

—¡Ba za' to yel bṅen!

27 Na' lii wṅete Jesúza' legake', chi'e:

—Bi illeble. Nad'kzan'.

28 Na'ch wṅe Pédróna' chi'e:

—Xan', shi'lin', ben ka gak saa lo nisi kwenche yid' kwito'na'.

29 Na' che' Jesúza'ne':

—Dashka'.

Na'ch bchej Pédróna' loo barkwa' na' wzoloe' chzee tlo nisa' nan shaje' kwit Jesúza'.

30 Per ka gokbe'ile' zechga be'na', na' bllébe' na' lii wzolote chbi'e yel, na'ch besyee chi'e:

—¡Xan', bisla nad'!

31 Na' lii biyoṅ'te Jesúza' neena', chi'ene':

—¿Berache gokchopzilo'? ¿Biṅche bi nṅenilalloo nad' kwaslól?

32 Na' kon ka biyoogake' loo barkwa' na' bgan be'na'.

33 Na' beṅ'ka' bgaan loo barkwa', be'la'ogake' Jesúza' na' gollgake':

—Dii li, lin' Xiin Chioza'.

Jesúza' biyone' beṅ'ka' bi shao' gana' mbani Genesareta'

(Mr. 6:53-56)

34 Na' ka blag'gake' shlaa niso'na' na' bllingake' gana' mbani Genesareta'.

35 Na' beṅ' Genesaretka' biyombia'gake' Jesúza' na'ch bzungakile' beṅ' yellka' lle' gao nan ba bllin Jesúza'. Na' jwa'gake' yog' beṅ'ka' bi shao' lawe'na',

36 na' got'yogakile'ne' wi'e latj la'ch' goṅ' beṅ' we'ka' xe'na', na' yog' beṅ'ka' beṅ'gake'n biyakakile'.

15

Daa chṅinj yichjall'do' beṅecha'

(Mr. 7:1-23)

1 Bal' fariseoka' na' beṅ'ka' chli' chsedi leya', wza'gake' Jerusalénna' na' wyajgake' lao Jesúza', wṅabgakile'ne':

2 —¿Biṅche beṅ'ki nakgake' li' txen bi chongake' ka wyoolo dii xozxto'choka'? La' bi chixis chiyib neeka' ka zi' gaogake'.

3 Na' wṅabi Jesúza' legake' chi'e:

—¿Biṅche chyishjle daa nllia Chioza' bia' gonle na' zechle wṅeyi chonle ka ben dii xozxto'choka'?

4 La' kin wna Chioza': “Li gap xaxṅa'le balaan”, na' “Beena' ine zban che xe'na' wa xṅeena', chiya' guete'.”

5 Per le', nale wak ye' beṅ' xaxṅeena': “Bi gak gaklen' le', la' yog' daa nap' ba ncheb' wi'an Chioza'.”

6 Na' beena' yee xaxṅeena' ka', cho'allalene' daa nale bi chonan byen gaklene' legake'. Na' daa chonle ka', chonile daa nllia Chioza' bia' goncho ka to dii bibi zakii kwenche nole diika' wyoolo dii xozxto'choka'.

7 ¡Le' beṅ' wxiye', le' wen gan! Kwaslól inlebe be' dii Isaíaza' xtill'le, ka wne':

8 Beṅ'ki choe'la'ogake' nad' de cho'a loll'zgake', la' aga do yichj do lall'gaken' choe'la'ogake' nad'.

9 Bibi zjanayin chonzgake' ka beṅ' choe'la'o nad'; na' diika' chli' chsedgakile' nakgakan che beṅ' yell-lioz.

10 Na' wṅe Jesúza' beṅ'ka' lle' na', golle' legake':

—Li wzenag dga inia' le' na' li shajniin.

11 Aga daa cheej chao beṇaan chx̄inj chlenan yichjlall'do'ena', san dill'ka' chchej cho'enan', lennan' chx̄inj chlenan yichjlall'do'ena'.

12 Na'ch beṇ'ka' nak Jesúza' txen wbig'gake' kwite'na', gollgake'ne':

—¿Azakbe'ilo' gokzi'chgayi fariseoka' ka bengakile' wno' ka'?

13 Na'ch goll Jesúza' legake':

—Nottezə beṇ' bi chzenague' che X̄a'na' zoa yabana', yiyol yinite', na' gak che' ka chak che to yag dii chlall' beṇ' do loyin.

14 Jwayishazi fariseoka', la' nnit ncholgakilen'. Na' nezicho shi to beṇ' lchol wchi'e sto ljwell lchole', choptie' lljabix.

15 Na'ch Pédróna' golle' Jesúza':

—Bizajonii neto' bi zejin jempla' daa ba bseesoo.

16 Na'ch goll Jesúza' legake':

—¿Alezkza' lenle biṇ' shajniile bi zejin daa ba wnia'?

17 ¿Abi nezile nan daa cheej chaocho chjche'n loo leechona' na'tech chiden?

18 Per ka nak daa chnecho, lennan' chalj chxen loo yichjlall'do'chona'. Na' shi chnecho dii bi nak wen, lennan' chx̄inj chlenan cho'.

19 La' loo yichjlall'do' beṇechan' chalj chxe diiki bi nak wen: yel' chon xya, yel' chnelen ljwellin, yel' wban, yel' chyiljall' che beṇ', na' yel' chbell chne che beṇ'.

20 Diikin chx̄injan yichjlall'do' beṇ', aga daa bi chixis chiyib neena' ka zi' gawen'.

To noolə bi nak beṇ' Israel beṇ' lillalee Jesúza'

(Mr. 7:24-30)

21 Na' biza' Jesúza' wyaje' gana' mbani yell Tírona' len yell Sidónna'.

22 Na' to noolə cananea zoe' gana' mbani yellka' wbigue' kwite'na' na' wnie' zilljə, chi'ene':

—X̄an', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n leb'.

23 Per Jesúza' bikzə bi golle' noola'. Na'ch beṇ'ka' nakgake'ne' txen wbig'gake' kwite'na' gollgake'ne':

—Goll nooli yiyaje', la' kon chosyee zidnoe' cho'.

24 Na'ch goll Jesúza':

—Bsel' Chioza' nad' kwenche gaklen' to beṇ' Israelka'zə, beṇ'ka' nak ka xil'ka' wnit.

25 Na'ch noola' jabigüee kwit Jesúza' na' bchek' xibe'na' lawe'na' chi'ene':

—¿X̄an', goklengach nad'!

26 Na'ch che' Jesúza'ne':

—Bi nakan wen yikaacho yel' wawa' chao bi'do' chechoka' na' we'chon bekw'ka'.

27 Na'ch noola' chi'ene':

—Lekzilo', X̄an', per chak chao xikw'choka' diika' chxop lo yona'.

28 Na'ch goll Jesúza'ne':

—¿Noolə, nonlilall'likzo' nad'! Na' gak ka cheenilo'.

Na' katena' lii biyakteyi bi' nool che'na'.

Jesúza' biyone' beṇ' zan

29 Na' biza' Jesúza' na', na' billine' cho'a nido' che Galileana' na' wyepe' to lo yaa jchi'e.

30 Na' beṇ' zan bllin lawe'na' nche'gake' no beṇ' bi chak sa', no beṇ' lchol, no beṇ' bi chak ine, no beṇ' nxinj, no beṇ' chak bichlə yillwe'. Na' bzoagake' legake' lao Jesúza' na' biyone' legake'.

31 Na' bibani beṇ'ka' ka gok, la' beṇ'ka' bi chak ine wnegake', na' beṇ'ka' nxinj biyagkakile', na' beṇ'ka' bi chak sa' wza'gake', na' beṇ' lcholka' ble'gakile'. Na'ch yog'lol beṇ'ka' be'la'ogake' Chios, beena' choe'la'o beṇ' Israelka'.

*Jesúza' bwawe' tapa mil ben'**(Mr. 8:1-10)*

³² Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgakile' tneza'.

³³ Na' che' ben'ka' nakgake'ne' txen:

—Per ¿ga lljxi'cho dii gao yog'lol ben'ki?, la' gani lle'cho kono zoa wit' dii gaocho.

³⁴ Na'ch wñabi Jesúza' legake', chi'e:

—¿Zi balchga yetxtil chechoka' de?

Na' che'gake'ne':

—De gall yetxtilka' na' sto chop bel.

³⁵ Na'ch goll Jesúza' ben'ka' kwe'gake' lo yona'.

³⁶ Na' bexee yetxtilka' gall na' belka' na' bi'e Chioza' yel' choxken, na' bxoxje'n bi'en ben'ka' nakgake'ne' txen kwenche be'gake' che che ben'ka'.

³⁷ Na' yoguee wdao axt ka beljakile'. Na' wdena' bitopgake' dii lao'ka' bichoonan, gokten zi gall xet'.

³⁸ Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao.

³⁹ Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

16*Fariseoka' na' saduceoka' wñabgakile' Jesúza' gone' to yel' wak**(Mr. 8:11-13; Lc. 12:54-56)*

¹ Fariseoka' len saduceoka' jawiagake' Jesúza' na' wñabgakile'ne' gone' to yel' wak dii ile'gakile' kwenche wli'n shi Chiozan' bseleene'.

² Na' goll Jesúza' legake':

—Shlle'na' chwiale xan yabana' na' nale: “Le yillaa wx̄e, la' le nlatjcha.”

³ Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa.

⁴ Le' nakle ben' mal' na' ben' bi chzenag che Chioza', chñable ile'ile' to yel' wak kwenche wli'n shi Chioza' bselee nad', per bi wliid' le' daa chñable. Lete ile'ile' sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

*Dill' wxiye' che fariseoka' zaklebin levadúrana'**(Mr. 8:14-21)*

⁵ Na' ka bllingake' shlaa nisdona', ben'ka' nakgake'ne' txen gol-lall'gake' wa'gake' yetxtila'.

⁶ Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi levadúrana'.

⁷ Na' che' ljwellgake':

—Daa gol-lall'cho wa'cho yetxtilan' ne' cho' ka'.

⁸ Na' gokbe'i Jesúza' daa che' ljwellgake' na' golle' legake':

—¿Biche nazle bibi yetxtila' bia'le? ¿Biche bi nxenilall'le nad' kwaslol?

⁹ ¿Abikzan' shajniile ka nak diika' chon'? ¿Abi chjadinile kana' wdao gayaa mil ben' kon gay'zə yetxtilka' na' bal xet' dii bixjka' bitople?

¹⁰ Na' ¿shera kana' wdao tapa mil ben' kon gallə yetxtilka'? ¿Abi chjadinile bal xet' dii bixjka' bitople?

11 ¿Bi_{che} che yetxtila'lə wyajnzile ka wnia' wsak'gale che levadura che fariseoka' len saduceoka'?

12 Na' kana'ch wyajni'gakile' nan aga che levadura che yetxtilan' chi'e legake' wsak'gake' san diika' chli' chsedi fariseoka' len saduceoka'lan.

Pédrona' chi'e Jesúza'n nake' Crístona'

(Mr. 8:27-30; Lc. 9:18-21)

13 Na' ka bllin Jesúza' len ben'ka' nakgake'ne' txen gana' mbani yell Cesarea che Filípona', na'ch chi'e legake':

—¿Non na ben' yell-liona' nak', nad', Ben' Bsel' Chioza' Yell-lioni?

14 Na' che'gake'ne':

—Ba_{le}' nagake' nako' dii Juanna', beena' bchoa ben' nisa', na' zi ba_{le}' nagake' nako' Elíaza', na' zi ba_{le}' nagake' nako' dii Jeremíaza', na' ba_{le}' nagake' nako' sto ben' chyixjee daa che' Chioza'ne'.

15 Na'ch chi'e legake':

—¿Shera le'? ¿Nora nale nak'?

16 Na' Simón Pédróna' chi'ene':

—Lin' Crístóna', Xiin Chios yaa Chios banna'.

17 Na' Jesúza' chi'ene':

—Chakomba li' Simón, xiin Jonás, la' aga nochlan bzajnii li' daa ba wno'. Xa'na' zoa yabanan' ba bzajniile'n li'.

18 Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch ben'ka' gonlilall'gake' nad', na' ni yel' wita' bi yizoin wlliyi'n ben'ka' ba wlej' kwenche nakgake' lall' na'.

19 Na' gon' li' yel' w_nabia' daa zaklebi to xiinya dii chsaljan yabana' gana' ch_nabia' Chioza'. Na' diika' ino' bi chiya' gon ben' yell-lioni, lekzka' ina Chioza' zoa yabana', na' diika' ino' wak gongake', lekzka' ina Chioza' zoa yabana'.

20 Na' goll Jesúza' ben'ka' nakgake'ne' txen ni to kono ye'gake' len' Crístóna', beena' bsel' Chioza' inabi'e.

Jesúza' bi'e dill' witgake'ne'

(Mr. 8:31-9:1; Lc. 9:22-27)

21 Na' lo llana' wzolo Jesúza' bzajniile' ben'ka' nakgake'ne' txen daa llia bia' gak che'. Golle legake' chonan byen yiyaje' Jerusalénna' kwenche gake' lo na' ben' golka' ch_nabia' na' lo na' b_xozka' ch_nabia' na' lo na' ben'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shon lla yibane' ladj ben' wetka'.

22 Na'ch Pédróna' wleje' Jesúza' ladj ben'ka' chi'ene':

—Xan', jbat gak cho' ka ba wno'!

23 Na' biyechj Jesúza' chi'e Pédróna':

—Kwas ka'lə, Satanás. Cheenzilo' bi gon' daa llia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

24 Na' che' Jesúza' ben'ka' nakgake'ne' txen:

—Shi no cheeni gon nad' txen, chiya' wsanlall' kwine', na' izani yel' mban che'na' yen ile'ile' bittez ni cha', na' gone' ka chazlallaa.

25 La' beena' bi chzani yel' mban che'na', beenan' kwiayi', san beena' chzani yel' mban che'na' yen ile'ile' bittez ni cha', beenan' gat' to yel' mban che' zejli kani.

26 ¿Bera zjanayin gap ben' yog'te dii de yell-lioni, shi le' kwiayee? Aga bi de wi'e lo laz yel' mban che'na' kwenche bi kwiayee.

27 La' nad', Ben' Bsel' Chioza' Yell-lioni, yiyed' len anjl cha'ka' zinsa' balaan xen che Xa' Chioza'. Kana'chan chixj' to to ben' kon ka dii bene'.

28 Dii li' nia' le', ba_l-le lle'le' ni, ni mbanle ile'ile' yel' w_nabia' cha'na', nad', Ben' Bsel' Chioza' Yell-lioni.

17

*Biyak Jesúza' nlla'lə**(Mr. 9:2-13; Lc. 9:28-36)*

¹ Ka wde xop lla, bche' Jesúza' Pédróna', na' Jacóbona' len beñ' bishee Juanna', na' to lezgake' wyajlene' to lo yaa xen.

² Na' ka lle'gake' lo yaana', gok Jesúza' nlla'lə lawe'ka'. Wyep wyeeni' cho'alawe'na' kakzə wbillə', na' xe'na' nakwe' gokan xtil llyish axt chey cheeni'n.

³ Na' beñ'ka' lle'lengake'ne' ble'gakile' dii Moiséza' na' Elíaza' chshaljlengake' Jesúza'.

⁴ Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shon ransh, ton cho', ston che Moiséza' na' ston che Elíaza'.

⁵ Na' ka golle' ka', betj to bej dii chey cheeni' na' bkwashaan legake', na' loo beja' bengakile' che' Chioza':

—Beenin Xiinaa, beena' chakid', na' chazlall'chga' ka chone'. Li wzenag che'.

⁶ Na' beñ'ka' nak Jesúza' txen, ka bengakile' wne Chioza', le bblebchagake' na' to bdoszgake' lo yona'.

⁷ Na' whig' Jesúza' kwite'ka' bexee legake', chi'e:

—Li yiyas. Bi illeble.

⁸ Na' ka bilis yichje'ka', koch no beñ'ka' ble'gakile', stochga Jesúza'.

⁹ Na' ka biza'gake' lo yaana' goll Jesúza' legake':

—Ni to kono ye'le ka nak dga ba ble'ile axt kat'ch nad', Beñ' Bsel' Chioza' Yell-lioni, ba biban' ladj beñ' wetka'.

¹⁰ Na'ch beñ'ka' nak Jesúza' txen che'gake'ne':

—¿Berache naz beñ'ka' chli' chsedi leya' zigaate Elíazan' yiyed?

¹¹ Na' goll Jesúza' legake':

—Dii li ka nakannan', zigaate Elíazan' yiyede' yigwee xnezi yog'lohte.

¹² Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnazan chegake'. Na' ka'kzan gongakile' nad', Beñ' Bsel' Chioza' Yell-lioni.

¹³ Na' gokbe'gakile' nan che Juanna', beena' bchoa beñ' nisan' cho'e dill'.

*Jesúza' biyone' to bi' chaz shon**(Mr. 9:14-29; Lc. 9:37-43)*

¹⁴ Na' ka billingake' gana' lle' lla' beñ', na'ch bchej to beñ' jabigee kwit Jesúza' na' bchek' xibe'na' lawe'na', chi'ene':

¹⁵ —Maestro, biyesh'gachi bi' cha'ni. Chazb' shon na' le chzak'zi'b'. Zan shii ba bzala'n leb' lo yi'na' na' lekzka' loo nisa'.

¹⁶ Na' ba jwa'b' lao beñ'ka' nakgake' li' txen na' bi gok yiyongake'b'.

¹⁷ Na' goll Jesúza':

—¿Zi'tegalə chelena', le' beñ' mal na' beñ' bi chajle'! ¿Zi ka'k'tek chiyal' soalen' le'? Na' ¿zi ka'k'tek chiyal' soid' le'? Li da diwa' bi' xkwidaa ni.

¹⁸ Na'ch bsheshlen Jesúza' dii xiwaa yoob' na' bichejan. Na' katena' biyakib'.

¹⁹ Na' ka biyoll gok ka', beñ'ka' nak Jesúza' txen bshaljlengake'ne' to lezgake', gollgake':

—¿Bi'che bi gok yibejnto' dii xiwaa yoo bi' xkwidaa?

²⁰ Na' goll Jesúza' legake':

—Bi gok yibejlen, la' bi chajle'le Chioza' gone' ka yichejan. Dii li nia' le', shel'ka' yel' chajle' chelena' nakan la'ch' ka sa mostásana' daa nak diido'zə, wakte ye'le yaani: “Bkwas ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'.

²¹ Kwenche gak yibejle dii xiwaa ka daa bibej' bi' xkwidaa, chiyal' soale wbas' na' soachechle we'llwill-le Chioza'.

Sto shii wdixjee Jesúza' witgake'ne'

(Mr. 9:30-32; Lc. 9:43-45)

²² Na' shlak chdalen Jesúza' ben'ka' nakgake'ne' txen gana' mbani Galileana', golle' legake':

—Nad', Ben' Bsel' Chioza' Yell-lioni, gak' lo na' ben' malka'.

²³ Na' witgake' nad', na' ka gak shon lla yiban' ladj ben' wetka'.

Na' ka golle' legake' ka', le gokyesh'gakile'.

Jesúza' wdixje' daa chiyal' gaxj che yoodo'na'

²⁴ Na' ka billin Jesúza' len ben'ka' nakgake'ne' txen Capernaúma', ben' Israelka' ben'ka' chchixj che yoodo'na' jawiagake' Pédróna', na' wñabgakile'ne':

—¿Achyixj maestro chelena' daa chidol'cho we'cho che yoodo'na'?

²⁵ Na' goll Pédróna' legake':

—Awe, chyixje'n.

Na' ka biyoo Pédróna' loo yooná' gana' zoagake', Jesúza' bkwialoe' dillaa chi'e:

—¿Nak ka chakilo', Simón? Ben'ka' chñabia' yell-lioni, ¿aben' wlall che'kan' chchixjgake'?, ¿awa ben' zit'kan'?

²⁶ Na' billii Pédróna' xtilleena':

—Ben' zit'kan' chchixjgake'.

Na' goll Jesúza'ne':

—Zejin ben' wlall che'ka' bi chonan byen chixjgake'.

²⁷ Per kwenche bi wshaachogake', wyaj cho'a nisdona' na' wzaloo daa chzenilo' belá'. Na' bel necha' senó' wxoo cho'aba' na' loo cho'aba' yillelilo' to mech. Waktekzin lljtixjo' che choptecho.

18

Ben'ka' nak Jesúza' txen gokdilgake' nogaken' nak ben' zak'chi

(Mr. 9:33-37; Lc. 9:46-48)

¹ Na' do kana'kzə, ben'ka' nak Jesúza' txen jabig'gake' kwite'na' che'gake'ne':

—¿Noran nak ben' zak'chi ladj ben'ka' chñabia' Chioza'?

² Na' wñe Jesúza' to bi'do' na' bzie'b' ladje'ka'.

³ Na'ch chi'e legake':

—Dii li nia' le', beena' bi yiyak yichjlall'do'ena' ka che bi'do'ni kwenche inabia' Chioza' le', bi lene' ben'ka' chñabia' Chioza'.

⁴ Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxna'baa, beenan' zak'chi ladj ben'ka' chñabia' Chioza'.

⁵ Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

Xoll ibixcho lao dii mala'

(Mr. 9:42-48; Lc. 17:1-2)

⁶ Nottez beena' wchixe' to ben' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlegkake'ne' yel loo nisdona' aga ka daa wchixe' ben' lao dii mala'.

⁷ ¡Nyesh'laz che ben' yell-lioki!, la' biga iyallji daa gonan ka wxinj wlengake'. Per ¡nyesh'lazch gak che beena' gon ka wxinj wlen ben' yoblə!

⁸ Na' shi noona' wa ni'ona' gonan ka ibixó' lao dii mala', naklan wen wchogo'n na' choonó'n, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol.

⁹ Na' shi daa ile'ilo' kon jalawo'na' gonan ka ibixó' lao dii mala', naklan wen wlechjo'n na' choonó'n, la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabila'.

Jempl che xilaa wnit
(Lc. 15:3-7)

¹⁰ 'Bi gonile nakzi ni to beṅ'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. ¹¹ La' nad', Beṅ' Bseḷ' Chioza' Yell-lioni, bid' kwenche yisla' beṅ'ka' yoo nez daa wlliyi'n legake'.

¹² '¿Nak chakile? Shi to beṅ' lle' to guiyoa xil' che' na' nit tob, ¿abi wkwaane' baka' taplalj twalj na' shaje' lljadilje' bana' wnit?

¹³ Na' shi yillelile'b, lech yibaile' cheb aga ka che baka' taplalj twalj baka' lle' tozga.

¹⁴ Ka'kzan Xacho Chioza' zoa yabana' cheenile' ni to beṅ'ki zi' wzolo chonlilall' nad' bi kwiayi' sheḷ'ka'.

Chiyal' si'xencho che beṅ'ka' nakcho txen chonlilall'cho Chioza'
(Lc. 17:3)

¹⁵ 'Shi to beṅ' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bizoaleno'ne' wen.

¹⁶ Per shi bi wzenague' bin yoone', na'ch wchi'o sto chop beṅ' kwenche gagkake' taschiw che daa yoone'.

¹⁷ Na' shi ni ka' bi wzenague' chele, wak ye'le yog' beṅ'ka' nakle txen nonlilall'le Chioza' ka nak daa ba bene' kwenche we'lengake'ne' dill'. Na' shi ni che beṅ'ka' bi wzenague', na'chan gonilene' ka to beṅ' bi nonlilall' Chioza' wa ka to beṅ' wichixj.

¹⁸ 'Na' dii li nia' le', diika' inale bi gon beṅ' yell-lioni, lekzka' ina Chioza' zoa yabana', na' diika' inale wak gon beṅ' yell-lioni, lekzka' ina Chioza' zoa yabana'.

¹⁹ 'Na' lekzka' nia' le', shi chople idili xtill'lana' yell-lioni kat' bi inable lao Xa' Chioza', beena' zoa yabana', na' gone' daa inabile'ne'.

²⁰ La' gana' chdop chope' wa shone' choe'la'ogake' nad', na'kz zoa' ladjeka'.

²¹ Na' wbig' Pédrona' kwit Jesúsza', chi'ene':

—Xan', ¿bal shii chiyal' yizi'xen' che bish' ljwellaa shi bi dii mal chone' cha'? ¿Azeelo gall shii?

²² Na' che' Jesúsza'ne':

—Aga nia' li' zeelo gall shii yizi'xeno' che bish' ljwello'na', san nia' li' chiyal' yizi'xeno' guiyon shin'chopə shii.*

Jempl che beena' bi bizi'xen che bish' ljwelle'na'

²³ 'Yel' wṅabia' che Chioza' zaklebin to beṅ' wṅabia' beena' bizi' kwent che mecha' daa chal' wen llin che'ka'.

²⁴ Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inleeb.

²⁵ Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xoole' na' yog'lol dii de che' kwenche yiyaxj xyana' daa llie'.

²⁶ Na' beena' chbag' mecha' bchek' xibe'na' lao xane'na', chonyeshee, chi'e: “Xan', wdapgach yel' chxenlall' cha', wiyixjkz' doxen daa chbagaa cho'.”

²⁷ Na' xane'na' biyeshile'ne', na' bene' ka'z doxen daa chalee che', na' bisane'ne'.

²⁸ Per le', ka bicheje' lill xane'na', billague' sto wen llin beṅ' chal' lat'do' xmeche', na' lii bniztie' yene'na' chi'ene': “iBiyon xmechaa daa chaloo!”

²⁹ Na' bchek' xib beena' lawe'na' na' chonyeshee, chi'ene': “Wdapgach yel' chxenlall' cha', wiyixjkz' doxen daa chbagaa cho'.”

³⁰ Na' bi goonile', san lii wyajtje' ji'ene' part kwenche wloogake'ne' lillyana' axt ki yiyixje' doxen daa chalee che'.

* **18:22** Guiyon shin'chopə shii: bal yishka' nyoj de dill' griegona' nan gall shii de guiyonshin'. Per chopten zejin toshiizi chiyal' yizi'xencho che beṅ'.

³¹ Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'.

³² Na' wizax xane'na' le', chi'ene': "Ben' mal inleeb nako'. Nad' ben' ka'z doxen daa chaloo cha' daa benyeshoo lawa'.

³³ Ka'kzan nan chiyal' yiyeshilo' bish' ljwello'na' chal' cho', ka biyeshid' li'."

³⁴ Na' daa le bllaachga xane'na', bene'ne' lo na' ben'ka' wdixjgake'ne' lillyana' na' wit chingake'ne' axt ki yiyixjche' doxen daa chalee.

³⁵ Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che ljwell-le do yichj do lall'le.

19

Bi chiyal' yilaa ljwell ben'ka' nkaa cheyin

(Mr. 10:1-12; Lc. 16:18)

¹ Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa llia shlaa yao Jordánna'.

² Na' ben' zan zjanogake'ne', na' na' biyone' ben'ka' bi shao'.

³ Na' wbig' bal' fariseoka' lao Jesúza' daa goklall'gake' wi'e dill' dii wchixa'n le', na' che'gake'ne':

—¿Ade lsens yilaa xool ben' ni che bizə diido' chone' dii bi chiyoolallee?

⁴ Na'ch che' Jesúza' legake':

—¿Abin' wlable gana' nan ka wxw wzil yell-lioni Chioza' bene' benecha', ben' byo na' noolə?

⁵ Na' wne': "Daan, wlaa ben' byona' xaxneena' kat' ikaa che', na' soalene' xoolena' gakgake' toz."

⁶ Na' bich nakgake' chop, san ba nakgake' toz. Na' daan bi chiyal' yilaa xool ben', la' Chiozan' ba btilé' legake'.

⁷ Na' gollgake'ne':

—Na' ¿biche ben' dii Moiséza' mandad kat' to ben' yilaa xoolena' chiyal' wlise' to yish dii we'n dill' bich nake' xoolena' wak yichoonene'ne'?

⁸ Na' goll Jesúza' legake':

—Yel' widenag chelenan' be' dii Moiséza' latj yilaa xool-lena'. Per ka ben Chioza' ben' nechka', bi gokan ka'.

⁹ Nad' nia' le', shi nool chelena' bi chdalene' ben' yoblə, bi chiyal' yilaalene' na' yikaale nool yoblə, la' shi ka' gonle, na' chonle ka beena' zoalente xoolena' na' chdalene' noolə yoblə.

¹⁰ Na' ben'ka' nakgake'ne' txen gollgake'ne':

—Shi ka' nak che beena' chshagna', naklan wen kono wshagna'.

¹¹ Na' goll Jesúza' legake':

—Aga yog' ben' chajni'gakile' dga, lete ben'ka' chon Chioza' ka shajni'gakile'n.

¹² La' de dii chllonan wshagna' ben'. Bal' ben' bi chshagna'gake' daa bi nak kwerp che'ka' wen ka chaljtegake', na' zi bale' bi chshagna'gake' daa bxinj benecha' kwerp che'ka'. Na' zi bale' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

Jwa'gake' bi'do'ka' lao Jesúza'

(Mr. 10:13-16; Lc. 18:15-17)

¹³ Na' wyaj ben' jwa' bi'do' che'ka' lao Jesúza' kwenche wxoa neena' yichjb'ka' na' we'lwille' Chioza' ni chegakb'. Per ben'ka' nakgake'ne' txen bsheshlengake' ben'ka' zjwa' bi'do'ka'.

¹⁴ Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chnabi'e loo yichjlall'do' ben'ka' nak ka legakb'.

¹⁵ Na' ka biyoll bxoā na' Jesúza' yichj bi'do'ka', na'ch bizēē ziyaje' gan yoblā.

To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

¹⁶ Na' bllin to bi' wew' lao Jesúza' che'b' le':

—Maestro, ¿bi dii wennan' chiyal' gon' kwenche gat' to yel' mban cha' zejli kañi?

¹⁷ Na'ch goll Jesúza' leb':

—¿Bi che chnabzilo' nad' che daa nak wen? Toz Chioza' nake' ben' wen. Na' shi cheenilo' gat' to yel' mban cho' zejli kañi, chiyal' gono' diika' bllia Chioza' bia' goncho.

¹⁸ Na' goll bi' wewaane':

—¿Bera diika' chiyal' gon', lla?

Na' che' Jesúza':

—Bi wito' ben', bi soaleno' nool bi nak nool cho', bi kwano' bi de che ben', bi chiljllalloo bizā gon ino' che ben'.

¹⁹ Wdap balaan xaxnoona' na' goki bish' ljwello'na' ka chaki kwino'.

²⁰ Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

²¹ Na' goll Jesúza' leb':

—Shi lekzilo' cheenilo' gako' dowalj ben' li ben' shao', biyaj jayet' yog' dii de cho' na' xmechinna' wyoon ben' yesh'ka', na' yido' gono' nad' txen. Na' kat' yillino' yabana' na' gon Chioza' li' yel' shawaa.

²² Na' ka beni bi' wewaa dga, nyesh' inleeb gokib' na' biza'b', la' bi' wni'a nleeban nakb'.

²³ Na' goll Jesúza' ben'ka' nakgake'ne' txen:

—Dii li nia' le', lallj inleeb chonan che ben' wni'ana' yilline' yabana' gana' chnabia' Chioza'.

²⁴ Sto shii nia' le', lobe'ch te to kamey to xan yesh' aga ka to ben' wni'a yilline' yabana' gana' chnabia' Chioza'.

²⁵ Na' bibangakile' ka wne', na' che' ljwellgake':

—¿Notg gak yillin lao Chioza', shka'?

²⁶ Na' bwia Jesúza' legake', na' golle':

—Ni to ben' yell-liona' bi gak gone' dga, san Chioza' yog'lołte chak gone'.

²⁷ Na' che' Pédrone'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

²⁸ Na' che' Jesúza' legake':

—Dii li nia' le', kat' illin lla yikob yog'loł dii de, nad', Ben' Bsel' Chioza' Yell-lioni, kwi'a inabi'a gana' sho'a balaan xen wal, na' le', shllinte, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che ben' Israelka'.

²⁹ Na' nottez beena' ba wlej yichje' lille'na', ben' bisheeka', ben' zane'ka', xaxneeka', wa xiin xoole', wa yell-lio che' ni cha', Chioza'kzā wi'ene' dii zak' dii xen inleebch aga ka daa wlej yichje', na' lekzka' wi'ene' to yel' mban zejli kañi.

³⁰ Per ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gakgake' ben' zakii.

20

Jempl che wen llinka'

¹ Na' wna Jesúza':

—Yel' wnabia' che Chioza' chzaklebin daa gok che to xan yell-lio beena' naz yag uvana'. Na' shzildo' wzee zeje' zjtijle' wen llinka' kwenche lljengake' llinna' gana' naze' yag uvaka'.

² Na' bgaan'gake' dill' chixje' legake' che lla, na'ch bselee legake' gana' lljengake' llinna'.

³ Na' ba gok shon gor chon ben' nechka' llinna' ka wyaje' dii yoblə gana' chak yaana', na' ble'ile' lle' ben' bibi llin de gongake'.

⁴ Na'ch chi'e legake': "Li shaj li lljen llinna' gana' naz' yag uvana' na' chixj' le' daa chidol'le." Na' wza'gake' zejgake' llinna'.

⁵ Na' do ka gobill wizaje' dii yoblə, na' lekzka' chida shonə, bizllelile' ben' yoblə lljengake' llin che'na'.

⁶ Na' do ka chida gay', wizaje' dii yoblə na' bizle'ile' ben' lle'zgake'. Na'ch chi'e legake': "¿Biche bi benle llinna' naanlla?"

⁷ Na' goll ben'ka'ne': "La' ni to kono bche' neto' llinna'." Na' golle' legake': "Li shaj, lla, li lljen llinna' gana' naz' yag uvana'."

⁸ Na' ka wzeles yela' na' che' xan yag uvana' beena' ngoo lo nee llinna': "Biyax wen llinka' na' wdixjgake'. Zigaate ben'ka' zi' wyoo llinna' chixjo', na' yiyoll-lin ben'ka' wzolo nech."

⁹ Na' bene' kon ka goll xane'na', na' wdixje' zigaate ben'ka' wyoo llinna' do ka chida gay'. Na' wdixje' to toe' che llakzə.

¹⁰ Na' ka gol' chixje' ben'ka' wyoogake' llinna' shzildo', gokgakile' wxoache' laxje'ka'. Per bich bi bxoe' san che llachokzə wdixje' legake'.

¹¹ Na' ka ba nox'gake' laxje'ka', wzologake' biz chon chnagake' che xan llinna',

¹² na' gollgake'ne': "Do lla wzento' lo bana' bennto' xshino'na' na' toz ka wdixjo' neto' len ben'ka' zi' wyoo, na' zi' tgorchga bengake' llinna'."

¹³ Na' che' xan llinna' toe': "Bish'dawaa, aga bi laxjo' chzeshaa. ¿Aaga bgaan'cho dill' che llan chixj' li'?

¹⁴ Wkaa laxjo'na', na' biyaj. Nad' cheenid' chixj' ben'ka' wyoo llinna' ba wlle'ch ka to daa ba wkoo.

¹⁵ Jwayishaz nad' bi gonid' xmechaa. ¿Anti chakziilo' daa chonid' ben' wen?"

¹⁶ Na' ka wde bzoa Jesúza' jempli, na' chi'e ben'ka':

—Ka'kzan ben' zan nakgake' ben' zakii, wllin lla bich bi sak'gake', na' ben' zan bi nakgake' ben' zakii, wllin lla gakgake' ben' zakii.

Sto shii wdixjee Jesúza' witgake'ne'

(Mr. 10:32-34; Lc. 18:31-34)

¹⁷ Ka ziyaj Jesúza' Jerusalénna' wñie' to ben'ka' shllinzə, chi'e:

¹⁸ —Naa ba ziyajcho Jerusalénna', gana' gongake' nad', Ben' Bsel' Chioza' yell-lioni, lo na' bxozka' chñabia' na' lo na' ben'ka' chli' chsedi leya', na' wchoglogake' witgake' nad'.

¹⁹ Na' gongake' nad' lo na' ben'ka' bi nak ben' Israel kwenche wtitgakile' nad' na' wit chingake' nad', na'tech wda'gake' nad' lee yag cruza', per ka gak shon lla yiban' ladj ben' wetka'.

Daa wñab xna' Jacóbona' len Juanna' lao Jesúza'

(Mr. 10:35-45)

²⁰ Na' Jacóbona' len Juanna', ben'ka' nak xiin Zebedewa', wbig'lengake' xneeka' kwit Jesúza', na' xneeka' bchek' xibe'na' lawe'na' wñabile'ne' to goklen.

²¹ Na' goll Jesúza'ne':

—¿Bera goklenan cheenilo' gon' cho'?

Na' golle'ne':

—Cheenid' gongacho' goklen kweko' bi' cha'ki shlaa wej kwito'na' kat'ka' illin lla inabi'o.

²² Na' goll Jesúza'ne':

—Ni bi nezile bin chñable. ¿Awizoile wtil-le yel' zak'zi'na' ka daa wtil' na' gak chele ka daa gak cha'?

Na' gollgake'ne':

—Wizokzinto'n.

²³ Na' goll Jesúza' legake':

—Lekzile wtil-le ka daa wtil', na' gak chele ka daa gak cha', per daa nale kwe'le shlaa wej kwitaa bi nak lo na' gon' ka nale, san Xa'nan' ba mbeje' ben'ka' wi'en.

²⁴ Na' ben'ka' zi shi, bllaagake' Juanna' len Jacóbona' daa wñabgake' kwe'gake' kwit Jesúza'.

²⁵ Na' bitop Jesúza' legake', na' chi'e:

—Nezkzile zoa ben' wñabia' na' ben' zakii che to to yell na' chongakile' kon daa nazan chegake' ben' yell che'ka'.

²⁶ Per aga kan' chiya! gonle. Shi nole cheenile gake ben' mbejlawin chiya! gake ka to ben' chon xshin ben'.

²⁷ Na' shi nole cheenile gake ben' zakii, chiya! gake ka ben' ndoo lla yel chone' xshin ben'.

²⁸ Ka nak nad', Ben' Bsel' Chioza' Yell-lioni, aga bid' kwenche gaken ben' nad', san bid' kwenche gaken' ben' na' wi'a yel' mban cha'ni kwenche yisla' ben' zan lao saaxya che'ka'.

Jesúza' biyone' chop ben' lchol

(Mr. 10:46-52; Lc. 18:35-43)

²⁹ Na' ka biza' Jesúza' yell Jericóna' len ben'ka' nakgake'ne' txen, ben' zan inleeb janogake'ne'.

³⁰ Na' cho'a neza' chi' chop ben' lchol, na' ka bengakile' bide Jesúza' kwite'ka' na'ch besyaagake', che'gake':

—iXan', xiin dia che dii Daví, biyesh'lall'gachi neto'!

³¹ Na' ben'ka' zejlen Jesúza' bsheshlengake' legake' kwenche nan kwe'gake' lliz, per zizikla besyaachgake', che'gake':

—iXan', xiin dia che dii Daví, biyesh'lall'gachi neto'!

³² Na'ch wlez Jesúza' na' wñie' ben' lcholka', na' chi'e legake':

—¿Beran cheenile gon' chele?

³³ Na'ch che' ben' lcholka'ne':

—Xan', bengach ka ile'into'.

³⁴ Na' biyesh'lallii Jesúza' legake' na' bexee jalawe'ka'. Na' katena' gok ble'gakile' na' janogake' Jesúza'.

21

Bllin Jesúza' Jerusalénna'

(Mr. 11:1-11; Lc. 19:28-40; Jn. 12:12-19)

¹ Na' ka ba zoa yillingake' Jerusalénna', bllingake' cho'a yell Betfagéna' daa llia kwit Yaa Olívoza'. Na' wlej Jesúza' chop ben'ka' nakgake'ne' txen na' bselee legake' yella'.

² Na' chi'e legake':

—Li shaj yella' daa llia shlaana'. Na' ile'ile to burr ba noolə da'b yag na' nche' to xiindo'b. Na' wsell-leb wche'legakb nilə.

³ Na' shi no bi ina le', na' ye'lene': “Xannto'nan' chyalljile' legakb, na' lii yidsan-tento'gakb.”

⁴ Na' daa gok ka', billinin ka bzej dii beena' wdixjee daa goll Chioza'ne' daa wne':

⁵ Li ye' ben'ka' lle' yell Siónna':

“Li wwia, ba za' ben' wñabia' chelena', nake' ben' gaxjlall' na' llie' to burrdo'; xiin to ba choa' yoa'.”

⁶ Na' wza' ben'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka golle' legake'.

7 Na' jxi'gake' burra' len xiinba' na' bche'gake' legakb kwit Jesúza'. Na'ch bxoagake' xe'ka' koll'bka', na'ch wllia Jesúza'b zeje' Jerusalénna'.

8 Na' beñ' zan wdixjgake' xe'ka' tneza', na' zi bale' bchoggake' no zin na' wdixjgake'n tneza' gana' zeje'.

9 Na' beñ'ka' llialo lao Jesúza', na' ka'kzə beñ'ka' nogake'ne', wzologake' chosyaagake', nagake':

—¡We'la'ocho beeni nak xiin dia che dii Davina! ¡Gonleeyshga Xancho Chioza' beeni ba bselee! ¡Li da we'la'ocho Chioza' zoa yabana'!

10 Na' ka wyoo Jesúza' yell Jerusalénna', na' yog' beñ'ka' lle' na' bllesh bcheengake', nagake':

—¿Noraz beeni bla' ni, lla?

11 Na' beñ'ka' che'gake':

—Beenin Jesúza' beñ' Nazareta' yell daa mbani Galileana', beena' chyixjee daa che' Chioza'ne'.

Bishesh Jesúza' beñ'ka' chit' chde lesh' chyoodo'na'

(Mr. 11:15-19; Lc. 19:45-48; Jn. 2:13-22)

12 Na' wyoo Jesúza' lesh' chyoodo'na' na' bisheshe' yog' beñ'ka' chit' chde na'. Na'ch bishi'e mes che beñ'ka' chsha' mecha' na' bzoles bzolline' gana' chi' beñ'ka' chit'gake' palomka'.

13 Na' ka wde bene' ka' chi'e legake':

—Cho'a xtill' Chioza' nan: “Lillaa nakan ga choe'lwill beñ' nad”, na' le', ba nonzlen ka to ga chdop chllag wban.

14 Na' shlak zoa Jesúza' yoodo'na', bal beñ' lcho' na' beñ' bi chak sa'gake' wen bllingake' lawe'na', na' biyone' legake'.

15 Na' bxozka' chñabia' na' beñ'ka' chli' chsedi leya' le bllaagake' ka ble'gakile' yel' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': “¡We'la'ocho beeni nak xiin dia che dii Davina!”

16 Na' gollgake' Jesúza':

—¿Achenilo' ka na bi'do'ka'?

Na' chi'e legake':

—Awe, chenkzid'. ¿Abin' wlable Cho'a Xtill' Chioza' gana' na: Chchino' cho'a loll' bi' xkwid'do'ka' na' bdo'ka' ni chall' chxop kwenche chol chnegakb' li' ka chiyal' we'la'o beñ' li'?

17 Na'ch bicheje' ladj beñ'ka', na' bizee yell Jerusalénna' ziyaje' yell Betániana' gana' wdie' yel.

Jesúza' bene' ka wbill to yag yixwew

(Mr. 11:12-14, 20-26)

18 Na' betiyo biza'gake' shzildo' yell Betániana' kwenche biyajgake' yell Jerusalénna' dii yoblə, na' tneza' wzolo chdon Jesúza'.

19 Na' ble'ile' to yag yixwew dii zoa cho'a neza', na' jawie' shi llia. Per zeelo xlaguinnaz' llia. Na' golle'n:

—¡Batch kwio' yixwewa'!

Na' katena' lii wbillte yaga'.

20 Na' ka ble'i beñ'ka' nakgake'ne' txen ka gok, le bibangakile', na' che'gake'ne':

—¿Berache lii wbilltelikazə yag yixwewa'?

21 Na'ch che' Jesúza' legake':

—Dii li nia' le', shi nonlilall'le Chioza' na' bi gakchoplall'le, aga daazan gak gonle, san wakte ye'le yaani: “Bkwas, na' jsoa loo nisdona'”, na' gak ka ye'len.

22 Na' yog' daa inabile Chioza' ka we'lwill-lene' gonkze'n kon shi nonlilall'lene'.

Yel' wnabia' che Jesúsza'
(Mr. 11:27-33; Lc. 20:1-8)

²³ Na' wyaj Jesúsza' dii yoblə yoodo'na' kwenche jali' jasedile' ben'ka'. Na' shlak chli' chsedile' legake', b̄xozka' ch̄nabia' na' ben' golka' ch̄nabia' ben' Israelka' bllingake', na' che'gake'ne':

—¿Nora lsens cheyi chono' diiki? ¿No ben' li' yel' wnabia'na'?

²⁴ Na' goll Jesúsza' legake':

—Lekzka' de to dii cheenid' in̄abid' le'. Na' shi le' in̄ale nad' daa in̄abid' le', na' in̄ia' le' no lsens cheyi chon' yog' diiki.

²⁵ Li in̄ashki nad', ¿nora bsel' Juanna' kwenche bidchoe' ben' nisa'? ¿AChioza' anti ben' yell-lioni?

Na' wzologake' chakguedgake' to legake', nagake':

—Shi ye'chone' Chioza' bseleene' na'ch in̄e' cho': “¿Bīche bi wyajle'le che', lla?”

²⁶ Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lolē' chajle'gake' Chioza' bselee Juanna' kwenche bidtixji'e daa golle'ne'.

²⁷ Na'ch che'gake' Jesúsza':

—Bi nezinto' non bsel' dii Juanna'.

Na' goll Jesúsza' legake':

—Lekzka' nad', aga wnia' le' nora lsens cheyin chon' diiki.

Jempl che chop xiin ben'

²⁸ Na' goll Jesúsza' legake':

—¿Bi ka in̄ale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana'.”

²⁹ Na' che' xiine'na'ne': “¿Bi sha'!” Per na'tech biyajib' na' wyajkzb' jem' llinna'.

³⁰ Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha'.” Per bi wyajb'.

³¹ Li in̄ashki, ¿nora bi'ka' chop ben' ka cheeni xab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúsza' legake':

—Dii li nia' le', ben' w̄ichixjka' na' noolə wdaka', lelgaken' zigaate we'gake' latj in̄abia' Chioza' legake' aga ka le'.

³² La' ka bid Juanna' bchoe' ben' nisa', bidzajniile' le' ka chiyal' soa kwezle, per le' aga wyajle'le che', lete ben' w̄ichixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

Jempl che wen linka' nak ben' mal

(Mr. 12:1-12; Lc. 20:9-19)

³³ Li wzenag jempli sto. Wzoa to ben' biyaze' yag uva lo yell-lio che'na' na'ch wlo'en leej, na'tech benschawee to ga wsigake' uvaka'. Na' lekzka' bene' to yoo sibə gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'.

³⁴ Na' ka gol' yishibgake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche ljaxi'gake' uvaka' daa chidolee.

³⁵ Per ka bllingake' gana' lle' ben'ka' chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekgake'ne' na' beena' sto btakwgake'ne' yaja'.

³⁶ Na'ch bsel' xan yag uvaka' zanch wen llin che'ka' aga ka to ben'ka' bselee dii nech, per ben'ka' chap yag uvaka' bengakile' legake' ka bengakile' ben' nechka' bllin.

³⁷ Na'ch xan yag uvaka' bselee kwinkz xiine'na', chakile': “Wapgake' balaan bi' cha'ni na' we'gake'b' daa chidolaa.”

³⁸ Per beṅ'ka' chap yag uvaka' ka ble'gakile' xiine'na', na'ch che' ljwelle': "Bi'nin xiin xan yag uvaki na' leban' yigaanlem' yog' dii nape'. Li da witchob' kwenche yigaanlencho daa gaki cheb'."

³⁹ Na'ch beṅ'gake'b' bibejgake'b' gana' lle' yag uvaka' na' betgake'b'.

⁴⁰ Na' Jesúza' chi'e beṅ'ka' lle' na':

—¿Nakra ka chakile gon xan yag uvaka' che beṅ'ka' chapgake'n ka illine' kwine'?

⁴¹ Na' che' beṅ'ka':

—Ba nakten wite' legake' na' bi yiyeshile' legake' daa nakgake' beṅ' mal. Na' yiyone' yell-lío che'na' lo na' beṅ' yoblə, beṅ' yiyoe'gake'ne' daa chidolee kat' yishibgake'n.

⁴² Na' goll Jesúza' legake':

—¿Abigan' wlable Cho'a Xtill' Chioza' gana' na:

Yaja' daa bi wyoolall' wen yooka',

leyeṅ'lannan' yaja' daa ba nchejcha yoonā.

Dgan ben Xancho Chioza'

na' nakan to dii yibanicho?

⁴³ Daan nia' le', kon ka gon xan yag uvaka' yiyone' yell-lío che'na' lall' na' beṅ' yoblə, beṅ' gongake' ka cheenile', ka'kzan gon Chioza' chele. Kwej yichje' le', na' beṅ'ka' wzenaggake' che', si'gake' banez yel' wṅabia' che'na'.

⁴⁴ Na' ka nak yaja', nottezə beṅ' lljchaze' lawinna' kwiayee, na' shi idakwan beṅ', axt wshoshjan le'.

⁴⁵ Na' ka biyoll bzenag bṅozka' chṅabia' na' fariseoka' jemplki bzoa Jesúza', na'ch gokbe'gakile' chegake'n chṅie'.

⁴⁶ Na'ch goklall'gake' gox'gake'ne', per bi biyaxjgakile', la' bllēbgake' beṅ'ka' lle' na' daa chajle'gake' Jesúza' nake' to beṅ' chyixjee daa che' Chioza'ne'.

22

Jempl che to wishagna'

¹ Na' Jesúza' bseesile' legake' sto jempl, chi'e:

² —Yel' wṅabia' che Chioza' chzaklebin to beṅ' wṅabia', beṅ' bene' to lni che xiine'na' ka bshagna'b'.

³ Na' bselee wen llin che'ka' lljanegake' beṅ'ka' ba bye', per beṅ'ka' bye' bi goongakile' shajgake'.

⁴ Na'ch bizselee zi shkwen wen llin che'ka' chi'e legake': "Li lljell beṅ'ka' ba bya' yid lni che bi' cha'na' ba de daa gaocho. Ba betgake' goon' cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho."

⁵ Per beṅ'ka' ba bye' bi bengake' kwent daa goll wen llinka'. Toe' wyaj jawia' yell-lío che'na' na' stoe' wzee zeje' delgens che'na'.

⁶ Na' beṅ'ka' sto beṅ'gake' wen llinka' na' biya dii bengakile' legake' axt ka witgake'.

⁷ Na' le bllaachga beṅ' wṅabia'na', na'ch bselee soldad che'ka' kwenche jetgake' legake' na' bzeygake' yell che'ka'.

⁸ Na'ch chi'e wen llin che'ka' sto: "Ba gok daa yeej gaocho, na' wentelan bi wlen beṅ'ka' bya'.

⁹ Na' li shaj lyell na' li wche' kon no beṅ' yillagle tneza' kwenche yidgake' yeej gaogake'."

¹⁰ Na'ch wza' wen llinka' zejgake', na' jxi'gake' kon no beṅ' billaggake', ka beṅ' wen ka beṅ' mal. Na' billa'cha lill beṅ' wṅabia'na'.

¹¹ Na' ka wyoo beṅ' wṅabia'na' chwie' beṅ'ka' ba ndop nllag, na' ladj beṅ'ka' len to beṅ' bi nakw xe'na' daa chiyal' gakwe' gana' chak wishagna'na'.

12 Na' goll ben' wñabia'na'ne': "Bish'dawaa, ¿nakra gok wyoozo' na' bi nakw xo'na' daa chiyal' gako' kwenche leno' gani chak wishagna'ni?" Na' beena' bikzə bi billet-lallee yeene'.

13 Na'ch che' ben' wñabia'na' ben'ka' chde yel' wawa': "Li wchej ni'a na' beeni na' li yibeje' na' li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee."

14 La' ben' zan nak ben'ka' chax chñab Chioza', per balchgagake' kweje' gakgake' lall' nee.

Wñabgakile' Jesúza' shi chiyal' chixjgake' daa chñab ben' wñabia'na'
(Mr. 12:13-17; Lc. 20:19-26)

15 Na' biza' fariseoka', na' wloogake' xñezi naklə gongake' kwenche we' Jesúza' dill' dii wchixa'n le'.

16 Na'ch bsel'gake' bal ben'ka' nakgake'ne' txen na' zi bal ben'ka' nak Heródeza' txen kwenche wyajgake' lao Jesúza' na' jellgake'ne':

—Maestro, ñezinto' nako' ben' li ben' shao' na' chli' chsedilo' ben' che nez li che Chioza' kon ka nakan, na' bi chshoo cho'a xtilloona' lao nottezə ben', la' bi chwio' no nakgake'.

17 Daan cheeninto' inagacho' neto' nak ka chakilo': ¿Achiyal' chixjcho daa chñab ben' wñabia' Césara', anti bi chiyal' chixjchon?

18 Na' gokbe'i Jesúza' aga do lall'gaken' gollgake'ne' ka', na'ch chi'e legake':

—Le' ben' wxiye', aga dii leilen nale ka'.

19 Li wli'shki nad' to mech daa chyixjile ben' wñabia'na'.

Na' be'gake'ne' to mech.

20 Na' goll Jesúza' legake':

—¿Nora cho'alawin na' no leyin da' lee mech?

21 Na'ch che'gake'ne':

—Che ben' wñabia', Césaran'.

Na' che' Jesúza' legake':

—Na'len, li we' Césara' daa naki che', na' lezkza' li we' Chioza' daa naki che'.

22 Na'ch bibangakile' daa goll Jesúza' ka'. Na' biza'gake' kwite'na' ziyajgake'.

Saduceoka' wñabgake' nak gak kat' yiban ben' wetka'
(Mr. 12:18-27; Lc. 20:27-40)

23 Na' lo llana'kzə saduceoka', ben'ka' bi chajle'gake' yiban ben' wetka', wyajgake' lao Jesúza', na' wñabgakile'ne':

24 —Maestro, dii Moiséza' wne' shi to ben' byo guete' na' kono xiine' wzoa, ben' bisheena' chiyal' yikee xool dii ben' bisheena' kwenche soa xiin dia che dii ben' weta'.

25 Na' ki gok che gall bish' ben' nakgake' neto' txen. Ben' necha' bshagnee, na' wite' na' kono xiine' wzoa, na' ben' bishee, ben' wchopina', bikee xoole'na'.

26 Na' lezkza' wit ben' wchopina' na' kono xiine' wzoa. Na' ka'kzə wit ben' wyonina' na' axt biyate ben'ka' gall wit. Na' ni togake' bi wzoa xiingake'.

27 Na' ka wde wit yog'lóle' na'ch lezkza' wit noola'.

28 Na' kat' yiban ben' wetka', ñaa, ¿nora ben'ka' gall bish' gaki xoole' noola'? la' yog'lolen' wkaagake'ne'.

29 Na'ch che' Jesúza' legake':

—Naklejzilen daa bi ñezile ka na Cho'a Xtill' Chioza', na' ka nak yel' wak che'na'.

30 La' kat' yiban ben' wetka', koch no yikaa ljjwellin, ni koch no wit' wde xiinin, san yiyakgake' ka anjlka' lle' yabana'.

31 Na' ka nak daa yiban ben' wetka', ñaa, ¿abin' wlable daa wna kwinn Chioza', gana' nan:

32 "Nad nak' Chios che Abrahamá', Isaaca' na' Jacoba'?" Na' bi nake' Chios che ben' wet, san nake' Chios che ben' ban, la' lao Chioza' mban ben'ki.

³³ Na' ka beni beṅ'ka' lle' na' daa wna Jesúza', le bibangakile' ka chli' chsedile'.

Daa lliáloté daa bliá Chioza' bia' goncho

(Mr. 12:28-34)

³⁴ Ka wnezi fariseoka' ba wleklí Jesúza' saduceoka', na'ch wyajgake' kwite'na'.

³⁵ Na' to beena' chli' chsedí leya' wṅabile' Jesúza' kwenḅhezə wchixeene', chí'e:

³⁶ —Maestro, ḅberan lliáloté nllia leya' bia' goncho?

³⁷ Na' Jesúza' golle'ne':

—“Chiyal' gakilo' Xancho Chioza' do yichj do lalloo na' axt ga zeelo chajniilo'.”

³⁸ Dgan liizelozi chonte na' lliálon lawi yog' diika' nllia leya' bia'.

³⁹ Na' de wchopina' nakan katekzə dii necha', na' nan: “Chiyal' gakilo' bish' ljjwello'ka' ka chaki kwino'.”

⁴⁰ Na' diiki chop chejin doxen ka na leya' len diika' bzej dii beṅ'ka' wdixjee daa goll Chioza' legake'.

Crístona' nake' xiin dia che dii Davina'

(Mr. 12:35-37; Lc. 20:41-44)

⁴¹ Na' shlak ndop nllag fariseoka' kwit Jesúza'

⁴² wṅabile' legake':

—ḅNak ka chakile che Crístona', beena' inabia'? ḅNo xiin dia cheyin nake'?

Na' che'gake'ne':

—Xiin dia che dii Davinan'.

⁴³ Na' che' Jesúza' legake':

—Na' ḅberache ben Espíritu Sántona' ka goll dii Davina'ne': “Xan”? La' kin na daa bzeje':

⁴⁴ Xancho Chioza' golle' Xan'na':

“Wche' kwit' de shlini,

shlak wzoa' xñi'ona' beṅ'ka' chakzbani li'.”

⁴⁵ Na' shi kwín dii Davina' golle' Crístona': “Xan”, ḅberache nazle nake' xiin dia che', shka'?

⁴⁶ Na' ni toe' bi gok yilligake' xtilleena'. Na' zeelo kana' koch no biyaxji bi inabgakile'ne'.

23

Jesúza' chawe' xya che fariseoka' na' beṅ'ka' chli' chsedí leya'

(Mr. 12:38-40; Lc. 11:37-54; 20:45-47)

¹ Na'ch Jesúza' golle' beṅ'ka' nakgake'ne' txen len beṅ'ka' lle' na', chí'e:

² —Beṅ'ka' chli' chsedí leya' na' fariseoka' nak lo na'gake' wzajni'gakile' beṅ' daa bzej dii Moiséza'.

³ Na' chiyal' wzenagle chegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyal' gonle.

⁴ Dii zan dii che'gake' beṅ' chiyal' gongake', na' nakan ka to yoa' xen dii chwa'gake' beṅ' dii kono so saki, na' legake' bikz bi chda na'gake' kwenche gaklengake'.

⁵ Na' yog' diika' chongake' chongake'n kwenchezə ile'i beṅ' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtill' Chioza' daa chda' loxgue'ka' na' daa chcheḷ neeka' chongake'n dii xench aga ka che beṅ' yoblə, na' chtonchgake' lox xe'ka' aga ka che beṅ' yoblə. ⁶ Na' kat' chajgake' lnika', le chibagakile' kwe'gake' gana' chbe' beṅ'ka' zakii, na' lekzka'yen' chjengake' gana' chdop chllaggake' choe'lwillgake' Chioza'.

⁷ Na' le chibagakile' gap beṅ' legake' balaan kat' chillaggake' legake' ga lle' lla' beṅ' na' ye'gake' legake': “maestro”.

⁸ “San le', bi we'le latj ina beṅ' le' “maestro”, la' toz nadaan nak' Maestro chele na' yog'le nakle ka bish' ljjwellin.

⁹ Na' kono ye'le “xa” lo yell-lioni, la' toz Chioza', beena' zoa yabana', nake' Xale.

¹⁰ Ni bi we'le latj inagake' le' “maestro”, la' toz nad', Cristo, nak' Maestro chele.

11 La' beena' nak beṅ' gaṅjall' na' chaklene', beenan' nake' beṅ' zak'chi ladjlena'.

12 Na' beena' chon kwine' beṅ' zakii, Chioza' gone'ne' beṅ' bibi zakii. Na' beena' chon kwine' ka beṅ' bibi zakii, Chioza' gone'ne' beṅ' zakii.

13 'iNyesh'laz gak chele, le' chli' chsedile' leya' na' le' fariseo, daa nakle beṅ' wxiye'! La' chsej chllonle gombia' beṅ' yel' wṅabia' che Chioza', na' ni bi choe'le latj inabi'e le', ni bi choe'le latj che beṅ'ka' cheengakile' inabi'e legake'.

14 'iNyesh'laz gak chele, le' chli' chsedile' leya' na' le' fariseo, daa nakle beṅ' wxiye'! La' chkaale lill nool wizebka' na' choe'lwill-le Chioza' ssha nleb kwenche gaki beṅ' nakle beṅ' wen. Na' daa chonle ka', Chioza' wsak'zi'che' le' aga ka beṅ' yoblə.

15 'iNyesh'laz gak chele, le' chli' chsedile' leya' na' le' fariseo, daa nakle beṅ' wxiye'! Chdale to ni to na' chyilje beṅ' wsede' daa chli' chsedile. Na' kat' chllelilene' chónlene' beṅ' malch aga ka le' na' chlliayi'chlene' axt choplə ka to ba mbiayi'le.

16 'iNyesh'laz gak chele, le' nakle ka beṅ' lchol, beṅ' chakile' wak wchi'e sto beṅ' lchol! La' nale: "Shi to beṅ' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n." Na' chiznale: "Shi wzoe' de taschiw ora' daa de loo yoodo'na', na'chan chiya! gone' daa bchebe'."

17 'iLe' nakle ka beṅ' lchol daa bi nteyile! ¿Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios.

18 Na' lekzka' chiznale: "Shi to beṅ' wchebe' to dii gone' na' wzoe' de taschiw gana' chzeygake' bayix'ka' chitgake' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiya! gone' daa bchebe'."

19 'iLe' nakle ka beṅ' lchol daa bi chajniile! ¿Abi chakbe'ile' gana' chzeygake' bayixaa chzanile we'le Chioza' zak'chan aga ka bayixaa chzeygake' lawinna'?, la' gana' chzeygake'b chonan leb ba che Chios.

20 La' beena' chcheb wi'e to dii wi'e na' chzoe' de taschiw gana' chzeygake'b, aga toz lennan' chzoe' de taschiw, san lekzka' len yog' daa xoa lawinnan'.

21 Na' beena' chcheb wi'e to dii wi'e na' chzoe' de taschiw yoodo'na', aga toz yoodo'nan' chzoe' de taschiw, san lekzka' len Chiozan' daa nakan lill xlatje'.

22 Na' lekzka' beena' chcheb wi'e to dii wi'e na' chzoe' de taschiw yabana', aga toz yabanan' chzoe' de taschiw, san len Chiozan' daa nakan gana' chnabi'e.

23 'iNyesh'laz gak chele, le' chli' chsedile leya' na' le' fariseo, daa nakle beṅ' wxiye'! Choe'le Chioza' diézmona' axt len yixweja', aníza', na' cominna', per bi chonle daa lliatotech daa nllia Chioza' bia' goncho. Dii lliatotech goncho daa nak shli, yiyesh'lalicho beṅ', na' gonlilall'cho Chioza' do yichj do lall'cho. Diikin chiya! gonle, per lekzka' bi chiya! wsanle gonle diika' sto.

24 'iLe' nakle ka to beṅ' lchol beṅ' chakile' wak wchi'e sto beṅ' lchol! Na' chonle ka to beṅ' chone' byen chibeje' to bi'a lesdo' loo yel' wao che'na' na' bi chakbe'ile' chebe' to kamey.

25 'iNyesh'laz gak chele, le' chli' chsedile leya' na' le' fariseo, daa nakle beṅ' wxiye'! Nakle ka xig' yeen dii nxi nyech kolliinna' per lo'inna' bi nxe bi nzak' nakan, daa chonle ka chaki beṅ' nakle beṅ' wen per le chzelall'le bi dii de che beṅ' na' chbanlen.

26 Na' le' fariseo, i'nakle ka beṅ' lchol daa bi chajniile! Li yiyaj yileni daa chonle kwenche gake beṅ' wen ka chaki beṅ' nakle, na'ch gake ka xig' yeen dii nxi nyech ka loolə ka koll'in.

27 'iNyesh'laz gak chele, le' chli' chsedile leya' na' le' fariseo, daa nakle beṅ' wxiye'! La' nakle ka to lill beṅ' wet dii nyebgake' yiw' na' nla' lawinna' xochi, per lo'inna' lle' lla'n lilit wetka' na' bichlə dii zban.

28 Kan' nakle le' daa chonle ka chaki beṅ' nakle beṅ' li beṅ' shao' per loo yichjlall'do'lena' lle' lla'n de wxiye' na' dii mal.

29 'iNyesh'laz gak chele, le' chli' chsedile leya' na' le' fariseo, daa nakle ben' wxiye'! Chonshao'zle gana' bkwash'gake' dii ben'ka' wdixjee daa goll Chioza' legake' kani'yi, na' chonle xochi gana' bkwash'gake' nochlə ben'ka' gok ben' li ben' shao'.

30 Na' nale: “Shel'ka' neto' ba zoanto' kana' wzoa dii xozxto'nto'ka' aga bennto' legake' txen ka betgake' dii ben'ka' wdixjee daa goll Chioza' legake'.”

31 Per kwinkzlen chli'le nakle toz ben'ka' betgake' dii ben'ka' wdixjee daa goll Chioza' legake' kani'yi, la' toz ka chonlenle legake'.

32 iNa' li yisyoll li yisto li gon dii mala' daa bi biyoll gon dii xozxto'leka'!

33 'iLe' nakle ka bel znia! Bi gakile shi wilale lo yi' gabila'.

34 Daan wselaa ben' chixje'gakile' le' daa yepgakee. Wselaa ben' sin' ben' chajni kwenche wli' wsedgakile' le' cho'a xtilaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwill-le Chioza', na' zi balgake' lljalagle to to yellka' gana' illingake'.

35 Na' daa gonle ka', yidobile yel' wit che yog'lol ben' li ben' shao'ka' bet dii xozxto'leka', wzolozin dii Abela' beena' gok ben' li ben' shao', axt dii Zacaría'za', xiin Berequí'aza', beena' betgake' latja' daa de cho'a yoodo'na', kwit gana' chzeygake' bayix'ka'.

36 Dii li nia' le', ka le' zoale naa chidol'le sak'zi'le che yog' daa ben dii xozxto'leka'.

Jesúza' gokyeshile' che ben' Jerusalénka' (Lc. 13:34-35)

37 'iLe' ben' Jerusalén, le' chitle ben'ka' chyixjee daa che' Chioza' legake', na' chlliale yaj ben'ka' chselee chixje'gakile' le' cho'a xtilleena'! iZan shii goklallaa gon' chele ka chon jeda' chiyellb xiindo'bka' xan xilba', na' bi goklall'le!

38 Na' naa ba wlej yichj Chioza' le', na' gani lle'le idesh iloan.

39 Na' nia' le', bich ile'ile nad' axt kat'ch illin lla inale: “iGaklenshga Xancho Chioza' beeni ba bselee!”

24

Jesúza' bi'e dill' yiyinj yoodo'na' (Mr. 13:1-2; Lc. 21:5-6)

1 Na' ka bichej Jesúza' loo yoodo'na' kwenche yiyaje' gan yoblə, ben'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'.

2 Na'ch che' Jesúza' legake':

—Yog' dga chle'ile naa, dii li nia' le' wllin lla kat' yiyinj doxenan, ni to yaj bich igaan koll' ljwellin.

Diika' gak kat' ba zoa te che yell-lioni (Mr. 13:3-23; Lc. 21:7-24; 17:22-24)

3 Na'ch biyajgake' lo Yaa Olívoza', na' ka chi' Jesúza' lo yaana' na'ch wbig' ben'ka' nakgake'ne' txen na' xochitezə wñabgakile'ne', che'gake':

—Cheeninto' ino' neto' batran gak daa ba wno'. ¿Nakran gak kat' ba zoa yiyedo' dii yoblə na' kat' ba zoa te che yell-lioni?

4 Na'ch che' Jesúza' legake':

—Wsak'yen'gale kwenche kono siye'z le'.

5 La' ben' zan ichej inazgake': “Nadaan Crístona'.” Na' ben' zan shajle'.

6 Na' yenile chak wdil to ni to na', per bi gakshejlall'le. La' dii chiya'l'kz gakan, per aga ba bllin lla te che yell-lionin kat' ba chak ka'.

7 La' yidil-len ljwell yellka' na' ben' wñabia'ka' yidil-len ljwellgake', na' kwe' yillwe', kwe' wbin, na' zan yell gak bedxo' wal.

8 Kat' ba chak diiki, shinz chzolo ka nak daa yen ile'i ben' yell-lioki.

9 'Na'ch gongake' le' lo na' beṇ'ka' w̄chi' wsak' le', na' witgake' le', na' yog' beṇ' yell-lioki gakzbangakile' le' daa nonlilall'le nad'.

10 Na' kat' ba chak diiki beṇ' zan bich gonlilall'gake' nad', na' gakzbani ljwelle' na' gon ljwellgake' lo na' beṇ' malka'.

11 Na' ichej zan beṇ' gonzgake' ka beṇ' chyixjee daa che' Chioza' legake', na' beṇ' zan shajle'.

12 Na' daa kwe'chachga dii mala', beṇ' zan bich gakgakile' Chioza' ni bish' ljwelle'ka'.

13 Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kaṇi.

14 Na' ka nak dill' wen dill' kob che yel' wṇabia' che Chioza', chonan byen lljtixjeegake'n doxen yell-lioni kwenche yog'lol beṇ' yengakile'n, na' kana'chan te che yell-lioni.

15 'Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wṇitan balaan cheyinna', na' chiyal' sele wṇeyi bin zejin. Na' kat' ile'ile'n loo yoodo'na'

16 kanan' beṇ'ka' zoa Judeana' chiyal' wxonjgake' shajgake' yaa yaoka'.

17 Na' beena' lia koll' lille'na' ni bich gal' yiyetje' lljaleje' dii de loo yoo lille'na'.

18 Na' beena' chda lyixaa ni bich gal' yiyaje' lille'na' lljaxi'e xe'na'.

19 iNyesh'laz gak che noolka' noa' na' noolka' chwall' chxop llana' gak ka'!

20 Li inabi Chioza' kwenche llana' wxonjile dga bi gakan kat'ka' chbe' dii zaga' wa to lla sabd, llana' chombaanchō.

21 La' yel' zak'zi' wal inleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde gokan kochno yen ile'i ka len.

22 Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' beṇ'ka' ba wleje' kwenche nakgake' lall' nee.

23 'Na' llaka' chak ka' shi no ina le': "Li wwia, ni ze Crístona", wa ine' le': "Na' zie", bi shajle'le.

24 La' wchej beṇ' siye'gake', inazgake': "Nadaan Crístona", wa "Nadaan chyixji'a daa na Chioza". Na' lekzka' gongake' dii gonan ka yibani beṇ', na' gongake' yel' wak xen kwenche siye'gake' beṇ', axt shel' wxegakile' siye'gake' beṇ'ka' ba wlej Chioza' nakgake' lo nee.

25 Na' naa ba bzenid' le' ka nak daa zi' gak.

26 Daan shi no inaz le': "Crístona' zoe' latja' gana' bibi chashj chleb", bi shajle; wa shi no inaz le': "Loo yoonā' zoe'", bi shajle'le.

27 La' kat' nad', Beṇ' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'.

28 La' gana' de ba weta' nan' chllag llodka'.

Kat' yiyed Jesucrístona'

(Mr. 13:24-37; Lc. 21:25-33; 17:26-30, 34-36)

29 'Na' kate yiyoll yel' zak'zi'ka', lii gakte shgasj shchol lao wbilla' na' bewaa bich wzeeni'n na' beljka' ixopgakan, na' yog' diika' lia xan yabana' inibgakan.

30 Na'ch yog' beṇ' lle' yell-lioni ile'gakile' nad', Beṇ' Bsel' Chioza' Yell-lioni, zizaa ladj bejka' kon yel' wak na' balaan xen. Na' yog' beṇ'ka' lle' doxen yell-lioni kwellyesh'gake'.

31 Na' ka kwell trompeta' zillj wselaa anjl cha'ka' zbii zkaan yell-lioni kwenche yitopgake' beṇ'ka' wlej Chioza' nak lall' nee.

32 'Na' li wwia ka chak che yag yixwewa': kat' ba chzolo chibia xlaguiinna', na' chakbe'ile ba zoa yiyoo la'o linna'.

33 Ka'kzan, kat' ile'ile ba chak yog' diika' ba wnia' le' gaka, na' gake'ile ba zoa gaoshosh te che yell-lioni.

34 Dii li nia' le', aga ba wit beṇ'ki zoa naa kat' gak yog' diiki lia bia' gaka.

35 Yabana' na' yell-lioni te chegakin, san cho'a xtillaana' biga te cheyin na' gak ka nan.

³⁶ 'Kono nezi bi lla bi gor te che yell-lioni, ni anjlka lle' yabana', ni nad' nak' Xiin Chioza'. Toz Xa' Chioza' nezile'n.

³⁷ 'Na' ka gok kana' wzoa dii Noéna', ka'kzan chak kat' nad', Ben' Bsel' Chioza' Yell-lioni, yiyed' dii yoblə.

³⁸ La' ben'ka' wzoa kana' zi' gak yej ziw' wala', cheej chaogake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xoolə'na' loo barkwa'.

³⁹ Na' ben'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Ben' Bsel' Chioza' Yell-lioni, zizaa.

⁴⁰ Kana'n, gana' lle' chop ben' lyixaa, toe' yichi'a na' beena' sto yigaane'.

⁴¹ Na' gana' lle' chop noolə chotgake', toe' yichi'a na' stoe' yigaane'.

⁴² Daan li se kwas kwezle nad' nak' Xanle, la' bi nezile bi lla bi gor zizaa.

⁴³ Li shajni'kachi dga, shel' xan yoonə' nezile' bi gor illin ben' wbanna' lille'na', aga wes yele' kwenche bi wi'e latj sho' wbanna' lille'na'.

⁴⁴ Na' daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

Jempl che wen linka', beena' chon wen na' beena' bi chon wen

(Lc. 12:41-48)

⁴⁵ 'Na' li gak ka to wen llin ben' chajni na' chone' daa chiya' gone' na' kat' chza' xane'na' chone' lall' nee lille'na' kwenche wi'e dii yeej gao wen linka' sto gor cheyin.

⁴⁶ Chakomba wen llinna' daa chilalile' chone' daa chidolee gone' kat' yillin xane'na'.

⁴⁷ La' dii li nia' le', xane'na' gone' lall' nee yog' dii de che'.

⁴⁸ Per shi wen llinna' nake' ben' mal na' gakile': "Wllaljachkzi xan'na' yilee."

⁴⁹ Na' soloe' wit chine' wen linka' nak lall' nee na' yeej gaolene' weezoka'.

⁵⁰ Na' llana' bi nonyen'le' lez, tokonganz yillin xane'na'.

⁵¹ Na' daa bi chone' wen, na' wsak'zi' ene' ka sak'zi' ben' wxiye'ka' gana' kwellyesh'gake' na' gaoxaxj leye'ka' daa le gakshejlall'gake'.

25

Jempl che shi bi' nool wew'ka'

¹ 'Yel' wnabia' che Chioza' chzaklebin daa gok che shi bi' nool wew' wyaj to wishagna', na' be'g'g'g' kandil cheb'ka' jlezg'g' bi' byona' lill noola'.

² Na' gay'g'g' nteyi na' zi gay'g'g' bi nteyi.

³ Bi'ka' bi nteyi kontele wza'len kandil cheb'ka', per bich be'g'g' seta' yigaagakba'n.

⁴ Na' bi'ka' nteyi, be'g'g' kandil cheb'ka' na' be'g'teg'g' seta' yigaagakba'n.

⁵ Na' bi' wishagna'na' wlle'ib' na' bi' nool wew'ka' chbez gokxwesg'g' na' wtesg'g'.

⁶ Na' do ka chel besyaa to ben', chi'e: "iBa za' bi' wishagna'na', li sho' lljatilchob'!"

⁷ Na' wyas bi' nool wew'ka' wzolog'g' chiyonshao' kandil cheb'ka'.

⁸ Na' bi' nool wew'ka' bi nteyi gollg'g' bi'ka' zi gay': "Li gon'gach neto' lat' set chelena' la' ba chibill chento'ni."

⁹ Per bi'ka' nox' seta' che'g'g': "Bi gon'nto'n, kwenche ki iyalljichon ganga. Wenlə li shaj li lljxi' chelena' gana' chiteen."

¹⁰ Na' shlak zejg'g' zjxi'g'g' seta', bllin bi' wishagna'na' na' bi'ka' nox' seta' wyoolen-g'g' ben'ka' loo yoonə' gana' chak wishagna'na', na'ch wyej puerta'.

¹¹ Na' ka billin bi' nool wew'ka' jxi' seta', wneg'g' xan yoonə' che'g'g': "iBen'do', bsaljgach shoonto'!"

¹² Per xan yoonə' chi'e leg'g': "Bi wsalj', la' bi nombi'a le'."

¹³ Na'ch che' Jesúza' ben'ka':

—Ka'kzə le', chiya' se kwasle, la' aga nezile bi lla bi gor zizaa.

Jempl che ben'ka' bgaanlen xmech xane'ka'

14 'Yel' wñabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

15 'Na' toe' bi'e gayaa mil mech de or, na' stoe' chopa milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'.

16 Na' beena' bi'e gayaa milan, benlene'n llin na' bene' gan zi gayaa milan.

17 Na' lekzka' beena' bi'e chopa milan, benlene'n llin na' bene' gan zi chopa milan.

18 San beena' bi'e to milan, jtene' to yech na' bkwasheen.

19 'Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'.

20 Na'ch zigaate beena' bi'e gayaa mil mech de or blline' lawe'na', chi'ene': "Xan', ni de de gayaa mila' beno' nad', na' ni de zi gayaa mil daa benlena'n gan."

21 Na' che' xane'na'ne': "Le wen beno', to wen llin wen inleeb nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'."

22 Na'ch wdena' bllin wen llinna' bkwaanlene' chopa mil, chi'ene': "Xan', ni de de chopa mila' beno' nad', na' ni de zi chopa mil daa benlena'n gan."

23 Na'ch che' xane'na'ne': "Le wen beno', to wen llin inleeb wen nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'."

24 Per ka bllin wen llinna' bkwaanlene' to mil, na' golle' xane'na': "Xan', nezid' nako' ben' zña, na' to chizi'zo' banez daa chon ben' yoblə.

25 Na'chan blleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' chekzo'n."

26 Na'ch che' xane'na'ne': "Ben' lia, bikz bi llin yejni'alallii chono'. Nezteilo' to chizi'z' banez daa chon ben' yoblə.

27 Na' daa nezilo' kan' chon', çberache ki joo xmechaa gana' chon yichjin shlak bi wzoa'? Shel' beno' ka', na' naa ba biyed' yiyono'n lente yichjinna', shel'ka'."

28 Na'ch golle' ben'ka' lle' na': "Li yikaa mecha' daa bkwaanlene' na' li we'n beena' nap shi milan.

29 La' kan' nakan, beena' chgone' llin daa yoo lo nee, gonche' lall' nee dii xench axt gat' kwe'chile'; san beena' bi chgone' llin daa yoo lo nee, axt daa ngoo lo nee lat' yidoyo.

30 Na' wen llinni bi yejni'alallii, li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee."

Ka gak kat' wchoglo Jesúsza' che ben'

31 'Kat' ziza' nad', Ben' Bsel' Chioza' Yell-lioni, len balaan xen cha'na' na' yog' anjl cha'ka', na' wli'a yel' wñabia' choo yel' wñabia' xen cha'na'.

32 Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'.

33 Na' wzoa' shlaa de shli cha'ni ben'ka' zaklebi xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni.

34 Na' nad', ben' wñabia', yep' ben'ka' lle' shlaa de shli cha'ni: "Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie' yell-liona'.

35 La' ka wdon', bwaole nad'; na' ka wbilid', benle dii weej'; na' ka wda' ka ben' zit', bleble nad' lill-lena'.

36 Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'."

37 Na' yog' ben' li ben' shao'ka' inagake' nad': "Xan', çbatran ble'into' li' chdono' na' bwaonto' li'? çBatran ble'into' li' chbililo' na' bennto' daa weejo'?"

38 ¿Batran ble'into' li' chdo' ka beṅ' zit' na' blebnto' li' loo yoo lillnto'na'? ¿Batran ble'into' li' chdo' bibi xalaano' de na' beṅnto'n?

39 Na' ¿batran gokbe'into' bi shawoo wa gotoo lillyana' na' bidwianto' li'?"

40 Na' nad', beṅ' wṅabia', yepgakee: “Dii li nia' le', yog' daa benle che beṅ'ka' byallj bchini, beṅ'ka' nak beṅ' bishaa na' beṅ' zan', la'kzi bi nakgake' beṅ' zakii, nad'kzan benile ka'.”

41 Na'ch yep' beṅ'ka' lle' shlaa de robesi: “Li kwas ka'la, le' wen dii mal. Lo yi' gabiḷa' daa chal' zejli kaṅi chidoḷ'le yiyajle gana' ba non Chioza' sak'zi' dii xiwaa len anjl cheyinka'.

42 La' ka wdon' bi beṅle dii gaw'; na' ka wbiḷid' bi beṅle dii yeej'.

43 Na' ka wda' ka beṅ' zit', aga bleble nad' loo yoo lill-le. Na' ka byallj xalaana', aga bi beṅle; na' ka bi shawaa wa gotaa lillyana', aga bidwiale nad'.”

44 Na' inagake' nad': “Xan', ¿batran wdono', wa wbiḷilo', wa wdo' ka beṅ' zit', wa bibi xalaano' got', wa bi shawoo, wa gotoo lillyana' na' bi goklennto' li'?"

45 Na' yepgakee: “Dii li nia' le', daa bi goklenle beṅ'ka' byallj bchini, beṅ'ka' nak beṅ' bishaa na' beṅ' zan', la'kzi bi nakgake' beṅ' zakii, nad'kzan bi goklenle.”

46 Na' beṅ' malkan' yiyajgake' gana' tegake' yel' sak'zi'na' zejli kaṅi, na' beṅ'ka' nak beṅ' li beṅ' shao' soalengake' nad' zejli kaṅi.

26

Wloogake' xnezin gox'gake' Jesúza'

(Mr. 14:1-2; Lc. 22:1-2; Jn. 11:45-53)

1 Na' ka biyoll be' Jesúza' yog' dill'ka', na'ch golle' beṅ'ka' nakgake'ne' txen:

2 —Ba nezkzile zi chop llazan chyallj gal' lni Paskwa', na' nad', Beṅ' Bsel' Chioza' Yell-lioni, gak' lo na' beṅ'ka' witgake' nad' lee yag cruza'.

3 Na'ch bḫozka' chṅabia' na' beṅ'ka' chli' chsedi leya' na' beṅ' golka' chṅabia' beṅ' Israelka' bdopgake' lill bḫoz choo bḫoz xenna', beena' le Caifás.

4 Na' wloogake' xnezin gox'gake' Jesúza' xochizi, ka ki gakbe'i beṅ', na' witgake'ne'.

5 Na' che' ljwelle':

—Bi gox'chone' shlak chal' lnina' kwenche bi wta wnecho beṅ'.

To noolə bwazje' set zixa' yichj Jesúza'

(Mr. 14:3-9; Jn. 12:1-8)

6 Na' ka zoa Jesúza' Betániana' len beṅ'ka' nakgake'ne' txen, wyajgake' lill to beṅ' le' Simón, beena' gok yillwe' daa le lepra.

7 Na' shlak chi' Jesúza' cho'a mesa', bllin to noolə noxee to lmet de yaj xochi na' yollan set dii chla' zix dii zak' mech xen, na'ch bwazje'n yichj Jesúza'.

8 Na' ka ble'i beṅ'ka' nak Jesúza' txen daa ben noola', le bllaagake' na' che' ljwelle':

—¿Bi che benditjz beeni seta'?

9 Shel' bet'chokle'n, la' dii xen zakaan, na' bi'e xmechinna' beṅ' yesh'ka', shel'ka'.

10 Na' beni Jesúza' ka choe'gake' dill', na' golle' legake':

—¿Bi che chnezle che nooli? La' daa ba bene' cha' nakan dii wen.

11 Ka nak beṅ' yesh'ka', toshiizi soagake' ladjlena', san nad', aga toshiizi soalen' le'.

12 Daa ba bwazj nooli nad' set zixa', bene' ka' kwenche gakshao'zega kwerp cha'ni kat' wkwash'gake' nad'.

13 Na' dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' bdie' Jesúza' lo na' bḫozka' chṅabia'

(Mr. 14:10-11; Lc 22:3-6)

14 Na'ch beena' le Jud Scariot, beena' nak txen beṅ'ka' shllin, wyaje' lao bḫozka' chṅabia'.

15 Na' golle' legake':

—¿Ka'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat.

16 Na'ch lo llana'tez wzolo Juda' chinoe' nakan gone' kwenche gone' Jesúza' lo na' ben'ka'.

Xancho Jesúza' wdaolene' ben'ka' nakgake'ne' txen xshe'na'

(Mr. 14:12-25; Lc. 22:7-23; Jn. 13:21-30; 1 Co. 11:23-26)

17 Lla nech che lni Paskwa', llana' chaogake' yetxtila' daa bi nchix lewadúrana', ben'ka' nak Jesúza' txen wyajgake' kwite'na' che'gake'ne':

—¿Ga cheenilo' ljasini'anto' xshe' che lni Paskwi?

18 Na'ch che' Jesúza' legake':

—Li shaj yell Jerusalénna', na' beena' yillagle ye'lene': “Maestrona' ne' ba zoa gak daa llia bia' gak che', na' lillo'na' cheenile' wsini'anto' daa gaolennto'ne' xshe' che lni Paskwi.”

19 Na'ch ben'ka' nakgake'ne' txen bengake' kon ka golle' legake', na' jasini'agake' xshe' che lni Paskwa'.

20 Na' ka gol, wche'len Jesúza' ben'ka' shllin cho'a mesa'.

21 Na' shlak chaogake' che' Jesúza' legake':

—Dii li nia' le', tole gonle nad' lo na' ben'ka' chakzi' chakzbani nad'.

22 Na' ka golle' legake' ka' le gokyesh'gakile' na' to toe' che'gake'ne':

—Xan', ¿anadaan gon' ka', lla?

23 Na'ch che' Jesúza' legake':

—Beena' ba bleejlene' nad' yetxtil che'na' loo yeena', beena'kzan' gone' nad' lo na' ben'ka' chakzi' chakzbani nad'.

24 Ka nak nad', Ben' Bsel' Chioza' Yell-lioni, wit ben' nad' kon ka na Cho'a Xtil' Chioza', per nyesh'laz gak che beena' gone' nad' lo na' ben'ka'! ¡Naklan wen shel'ka' bi golje'!

25 Na'ch Juda', beena' wdie' Jesúza' lo na' ben'ka', chi'ene':

—Maestro, ¿anadaan gon' ka'?

Na'ch che' Jesúza'ne':

—Kan' ba wno'z.

26 Na' shlak chaogake', bex' Jesúza' yetxtila' na' bi'e Chioza' yel' choxken, na' bxoje'n na'ch bi'en ben'ka' nakgake'ne' txen, chi'e:

—Li gao dga. Lennan' kwerp cha'ni.

27 Na'tech bexee to kop dii yoll vino, na' bi'e Chioza' yel' choxken na' bi'en legake', na' golle':

—Yog'le li yeej dga yoll loo kopi,

28 la' lennan' xchen'na' daa gon ka gak li dii koba' bcheb Chioza' gone'. Na' laljan kwenche yiyakxen saaxya che ben' zan.

29 Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chnabia' Xa' Chioza', kana'chan yeejlana'n le' dii yoblə.

Jesúza' chi'e bi wcheb Pédróna' shi nombi'ene'

(Mr. 14:26-31; Lc. 22:31-34; Jn. 13:36-38)

30 Na' ka bidaogake', belgake' be'la'ogake' Chioza' na'ch biyajgake' lo yaa Olívoza'.

31 Na' ka ziyajgake', che' Jesúza' legake':

—Yog'le kwej yichjle nad' naanlle'. La' kin na Cho'a Xtil' Chioza': “Wit' beena' chap xil'ka' na' illeshlesgakb.”

32 Per ka yiban' ladj ben' wetka', yiyaa Galileana' lljalez' le'.

33 Na'ch che' Pédróna'ne':

—La'kzi yog' ben'ki kwej yichjgake' li', nad' bi kwej yichj' li'.

34 Na'ch che' Jesúza'ne':

—Dii li nia' li', naanlle' shon shii bi wchebo' shi nombi'o nad' ka zi' kwell shikwteza'.

³⁵ Na' Pédróna' chi'ene':
—La'kzi guetlenta' li', biga inia' bi nombi'a li'.
Na' ka'kzə goll yog'lol ben'ka' nakgake'ne' txen.

Jesúza' be'lwille' Chioza' latja' le Getsemaní
(Mr. 14:32-42; Lc. 22:39-46)

³⁶ Na' ka bllinlen Jesúza' ben'ka' nakgake'ne' txen latja' le Getsemaní, na'ch golle' legake':
—Nizə li kwe' shlak shaa daa ka'lə llje'lwill' Chioza'.

³⁷ Na' bchi'e Pédróna' na' chop bish'te xiin Zebedewa', na' wzolo chakyeshile' dii wal inleeb.

³⁸ Na' golle' legake':
—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁹ Na' blee legake' zi lat' na' bchek' yichje'na' lo yona' na' be'lwille' Chioza', chi'e:
—Xadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

⁴⁰ Na'ch biyaje' gana' lle' ben'ka' shon, na' ble'ile' ba chesgake'. Na' golle' Pédróna':
—¿Abikzə bchejlat'gaile la'ch' tgor kwezle nad' bi guesle?

⁴¹ Bi guesle. Li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

⁴² Na'ch wyaje' de wchop shii jelwille' Chioza', chi'e:

—Xadawaa, shi ba nakten idil illag' dga, gakkzə ka cheenilo'.

⁴³ Na' ka billine' dii yoblə lekzka' cheslagake' daa bi wzogakile' bishgala'.

⁴⁴ Na' bikzə bisbane' legake', na' wzee sto shii jelwille' Chioza' de wyon shii na' golle'ne' ka ba gollkze'ne'.

⁴⁵ Na'ch biyaje' gana' bgaan ben'ka', na' golle' legake':

—¿Ani chestkile? Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'.

⁴⁶ Li chas na' li sho'. Ba za' beena' wdie' nad' lo neeka'.

Bex'gake' Jesúza'
(Mr. 14:43-50; Lc. 22:47-53; Jn. 18:2-11)

⁴⁷ Bilan' yiyoll yee Jesúza' ka' ka bllin Juda' beena' nak txen ben'ka' shllin, nchi'e ben' zan ben'ka' bsel' bxozka' chnabia' len ben' golka' chnabia' ben' Israelka'. Na' nox'gake' no spad na' no yag.

⁴⁸ Na' Juda' ba bzajniile' ben'ka' nchi'e nakan gone' wli'e beena' gox'gake', golle': “Kon beena' wnop', len gox'le.”

⁴⁹ Na' ka bllinlene' ben'ka' kwit Jesúza', lii wbig'tie' lawe'na' chi'ene':

—¿Chiox naa, maestro!

Na'ch bnope'ne'.

⁵⁰ Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te ben'ka' bex'gake' Jesúza'.

⁵¹ Na' ka bex'gake'ne', to beena' nake'ne' txen wleje' spad che'na' na' wdine'n xmos bxoz choo bxoz xenna', bchogtie' tlaa nague'na'.

⁵² Na'ch goll Jesúza'ne':

—Bigooshao' spad cho'na', la' yog' ben'ka' chitgakile' ben' yesya, lekzka' len guetgakile'.

⁵³ ¿Achakile bi gak inabid' Xa'na' gaklene' nad' na' lii wsel'tie' anjl zan inleeb, shel'ka'?

⁵⁴ Per shi ka' gon', ¿nakra gak yillini Cho'a Xtill' Chioza' gana' nan chonan byen gak ki?

⁵⁵ Na'ch goll Jesúza' ben'ka' ba nox'gake'ne':

—¿Achakile' no wban no nad' za'lenzle no spad no yag kwenche gox'le nad'? Yog' lla bli' bsedid' ben' loo yoodo'na', ¿biche bi bex'le nad' shlak bli' bsedid' ben' na'?

⁵⁶ Per daa chonle ki, chillinin ka na Cho'a Xtil' Chioza' daa bzej dii beṅ'ka' wdixjee daa golle' legake'.

Na'ch yog'lol beṅ'ka' nak Jesúza' txen bxonjgake' na' bkwaan'gake' toze'.

Jwa'gake' Jesúza' lao beṅ'ka' chṅabia' beṅ' Israelka'

(Mr. 14:53-65; Lc. 22:54-55, 63-71; Jn. 18:12-14,19-24)

⁵⁷ Na' beṅ'ka' beṅ'gake' Jesúza' jwa'gake'ne' lill Caifáza', beena' nak bṅoz choo bṅoz xen, na' lille'na' ba ndop nllag beṅ'ka' chli' chsedi leya' na' beṅ' golka' chṅabia'.

⁵⁸ Na' Pédrona' janoe' Jesúza' de zit'lə, bllintie' lesh' chyoo che bṅoz choo bṅoz xenna' na' jche'lene' beṅ'ka' chap yoodo'na' kwenche ile'ile' ka gak che Jesúza'.

⁵⁹ Na' bṅozka' chṅabia' len beṅ'ka' chṅabia' beṅ' Israelka' wdiljgake' beṅ' chiljlallee che Jesúza' kwenche wchoglogake' guete'.

⁶⁰ Na' la'kzi beṅ' zan beṅ'ka' biya dii biyiljlall'gake' che Jesúza', aga bidili cho'a dill' che'ka', axt ki bllin chop beṅ'

⁶¹ be'gake' toz dill', che'gake':

—Ki wna beeni: “Nad' wak yichinj' yoodo' che Chioza' na' shoṅ llazə yiyontia'n dii yoblə.”

⁶² Na'ch wzolla' bṅoz choo bṅoz xenna', golle' Jesúza':

—¿Abikz bi ino' cheyi dga nagake' cho'?

⁶³ Na' Jesúza' bikzə wnie'. Na'ch che' bṅoz choo bṅoz xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiine'.

⁶⁴ Na' goll Jesúza'ne':

—Awe, kan' nakan. Na' lekzka' nia' le', wle'ile nad', Beṅ' Bsel' Chioza' Yell-lioni, kwi'a shlaa de shli che Chioza', beena' zeelo nap yel' wak choo yel' wak xenna', na' lekzka' ile'ile nad' zizaa ladj bejka' ze xan yabana'.

⁶⁵ Na'ch bsho' bchez' xa bṅoz choo bṅoz xenna'. Na' daa bene' ka', bli'e nan le bllee, na' wne:

—iKwinle ba benile naz beeni nake' Xiin Chioza'! Bich chyaljicho beṅ' gao xya che'.

⁶⁶ ¿Bi ka inale?

Na'ch gollgake'ne':

—Chiyal' guete'.

⁶⁷ Na'ch bllaa xeneeka' cho'alao Jesúza' na' wdap' wlall'gake'ne'.

⁶⁸ Na' che'gake'ne':

—Shi lin' Crístona', wnashki non wdap' wlall' li'.

Pédrona' bi bchebe' shi nombi'e Jesúza'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' shlak chak ka', Pédrona' chi'e lesh' chyoon'a' ka bllin to noolə wen mandad kwite'na' chi'ene':

—Lenon' nako' txen Jesúza', beṅ' Galileana'.

⁷⁰ Na' lao yog' beṅ'ka' lle' na', aga bcheb Pédrona' shi nake' Jesúza' txen, na' golle' noola':

—Bi neqid' bin no'.

⁷¹ Na' ka ziyaje' cho'a puerta' bizle'i sto beṅ' yoblə le' na' chi'e beṅ'ka' lle' na':

—Len beenin nake' txen Jesúza', beṅ' Nazareta'.

⁷² Na' lekzka' aga bizcheb Pédrona' shi nake' Jesúza' txen, bzoatie' Chioza' de taschiw, chi'ene':

—Bi nombi'a beena'.

⁷³ Na' gokzə xtit na' jabig' beṅ'ka' lle' na' kwit Pédrona' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

⁷⁴ Na'ch wzolo Pédrona' chone' zṅia, chi'e:

—iDii balkzan nia' bi nombi'ane'! iChioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'.

⁷⁵ Na'ch jadini Pédróna' daa goll Jesúza'ne': "Shon shii bi wchebo' shi nombi'o nad' ka zi' kwell shikwteza'." Na'ch biza' Pédróna' chbellyeshee.

27

Jwa'gake' Jesúza' lao Pilátóna'

(Mr. 15:1; Lc. 23:1-2; Jn. 18:28-32)

¹ Na' ka wyeeni', yog'lol bxoza' chnabia' na' ben' golka' chnabia' ben' Israelka' bengake' toz dill' witgake' Jesúza'.

² Na' bchejgake'ne' jwa'gake'ne' lao Pilátóna' beena' chnabia' gana' mbani Judeana'.

Wit Juda'

³ Juda', beena' bene' Jesúza' lo na' ben'ka', ka gokbe'ile' ba nakan witgake' Jesúza' na' wdao bdiachgan le'. Na'ch wyaje' lao bxoza' chnabia' na' lao ben' golka' chnabia' jasane' shichoate mech de plata' daa be'gake'ne'.

⁴ Na' chi'e legake':

—Le malchga ben' daa bdia' to ben' bibi dol' nape' lo na'lena'.

Na' legake' che'gake'ne':

—¿Bera kwent che neto'? Li'z nezilo' bin beno'.

⁵ Na' jaza' Juda' mecha' loo yoodo'na', na' tech jayet kwine' jaloo do yene'.

⁶ Na' bxoza' chnabia' bitopgake' mecha' na' che' ljwellgake':

—Bi gak yiyonchon toz mech che yoodo'na', la' nakan dii ba nap xya.

⁷ Na' be'gake' dill' yizi'gakile' mecha' to yell-lio dii le Yell-lio che Ben' Wen Yes' gana' wkwash'gake' ben' zit'ka'.

⁸ Daan axt naanlla yell-liona' len Yell-lio Chen.

⁹ Na' daa gok ka', billinin ka wna dii Jeremíaza', beena' wdixjee daa goll Chioza'ne', ka wne': "Bikaagake' shichoa mech plat daa bchogbia' ben' Israelka' zak' beena'.

¹⁰ Na' kon len wxi'gakile' Yell-lio che Ben' Wen Yesaa, kon kana' wna Xancho Chioza' nad'."

Bllin Jesúza' lao Pilátóna'

(Mr. 15:2-5; Lc. 23:3-5; Jn. 18:33-38)

¹¹ Ka bllin Jesúza' lao Pilátóna', na'ch che' Pilátóna'ne':

—¿Alin' ben' wñabia' che ben' Israelka'?

Na' che' Jesúza'ne':

—Kan' ba wno'.

¹² Na' shlak bxoza' chnabia' na' ben' golka' chnabia' ben' Israelka' chaogake' xya che', bibi dill' billi'e legake'.

¹³ Na'ch goll Pilátóna'ne':

—¿Abi chenilo' diika' chaogake' xya cho'?

¹⁴ Per Jesúza' ni to diika' chaogake' xya che' ni shcho'a dill' bi billi'e, na' le bibanchgayi Pilátóna'.

Bchoglogake' guet Jesúza'

(Mr. 15:6-20; Lc. 23:13-25; Jn. 18:38-19:16)

¹⁵ Na' ben' wñabia'na' yooloe' yog' yiz chisane' to ben' de lillyana' lla lni Paskwa', kon beena' inab yog' ben' yell yisane'.

¹⁶ Na' de to ben' lillyana', ben' le zeyi che' nake' ben' mal, na' lie' Barrabás.

¹⁷ Na' ka ndop nllag ben' yellka', che' Pilátóna' legake':

—¿No ben'ki cheenile yisan'?, ¿aBarrabáza', awa Jesúzi, beeni nsi'gake' Cristo?

¹⁸ Golle' legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

19 Shlak chi' Pilátona' gana' chone' yel' joschisa', bsel' xooole'na' to rson, chi'ene': "Bi gaklebiló' beñ'ka' chao xya che beena', la' aga bi dol' che' de, la' nll'e'yi wñeid' to yel che', na' le bsheban nad'."

20 Per bxoꝝka' chñabia' na' beñ' golka' chñabia' beñ' Israelka' wlooyel'gake' beñ'ka' lle' lla' na' inabgake' yisane' Barrabáza' na' gone' mandad guet Jesúza'.

21 Na' Pilátona' sto shii wñabile' legake':

—¿No beñ'ki chop cheenile yisan'?

Na' beñ'ka' che'gake'ne':

—¡Bisan Barrabáza'!

22 Na' che' Pilátona' legake':

—Na' ¿bera ka gonid' Jesúzi beeni nsi'gake' Cristo?

Na' yog'lol'e' che'gake'ne':

—¡Bdee lee yag cruza'!

23 Na' che' Pilátona' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¡Bdee lee yag cruza'!

24 Na' ka gokbe'i Pilátona' bich bi de gone' daa zizikchli ba chaklleshgakile', bene' mandad jxi'gake' nisa' kwenche binee lao yog' beñ'ka', na' chi'e':

—Aga bi dol' nap' nad' daa guet beeni. Len' gak xbag'lene'.

25 Na' yog'lol' beñ'ka' che'gake'ne':

—¡Neto' len xiin'nto'ka' idobinto'ne'!

26 Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

27 Na' soldadka' bche'gake' Jesúza' gana' chon Pilátona' yel' joschisa' na' biti'agake' yog'lol' soldadka' nakgake' txen.

28 Na'ch wdingake' xa Jesúza' na' bwakwgake'ne' to lech' xna ka che to beñ' wñabia'.

29 Na' bengake' to bxoꝝ de xis yesh' na' bllingake'n yichje'na' ka to corona, na' nee de shlina' bgoꝝ'gake'ne' to bar. Na'ch bchek' xibe'ka' lawe'na' na' btitjgakile'ne' che'gake':

—¡Toshiizi sechgayi che beeni chñabia' beñ' Israelka'!

30 Na'ch no chlla' xeneeka' le', no chikaagake' bara' daa bgoꝝ'gake'ne' na' chyingake'n yichje'na'.

31 Na' ka wde btitjgakile'ne' na'ch biyingake' lechaa bwakwgake'ne' na' biwakwgake' xe'na' nakwkze'. Na'ch bche'gake'ne' kwenche wda'gake'ne' lee yag cruza'.

Bda'gake' Jesúza' lee yag cruza'

(Mr. 15:21-32; Lc. 23:26-43; Jn. 19:17-27)

32 Na' ka ba chchejgake' cho'a yell Jerusalénna', billaggake' to beñ' Cirene, beñ' le Simón, na' bengake' byen bi'e yag cruz che Jesúza'.

33 Na' ka' bllingake' latja' le Gólgota, na' zejín Latj che llit yichj beñ' wet.

34 Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

35 Na' ka biyoll bda'gake'ne' lee yag cruza', soldadka' bengake' to wyitj kwenche got'bia' nogake' yidol' xa Jesúza'.

36 Na'tech wche'gake' wdapgake'ne'.

37 Na' yichj yag cruz che'na' bda'gake' to dii choe'n dill' biche nda'gake'ne' na', na' nan: "Beenin Jesúza', beñ' wñabia' che beñ' Israelka'."

38 Na' lekzka' bda'gake' chop beñ' wban shlaa wej kwit yag cruz che Jesúza'.

39 Na' beñ'ka' chde gana' dee, chta yichje'ka' na' chgoogake'ne' belban,

40 che'gake'ne':

—Li' wno' yichinjo' yoodo'na' na' shon llazə yiyontio'n, įbisla kwino' lee yag cruzi shi leilo' nako' Xiin Chios!

⁴¹ Na' lekzka' b̄xozka' ch̄n̄abia' na' beñ'ka' chli' chsedi leya', na' fariseoka' len beñ' golka' ch̄n̄abia' btitjgakile'ne', che' ljwelle':

⁴² —Gok bisle' beñ' yoblə per bi chak yisla kwine'. Shi leile' len' beñ' w̄n̄abia' chechona', cho' beñ' Israel, yiyetjshkile' lee yag cruzi' naa kwenche shajle'cho che'.

⁴³ N̄xenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

⁴⁴ Na' axt wbanka' da' lee yag cruzi' kwite'na' lekzka' biya dii che'gake'ne'.

Wit Jesúza'

(Mr. 15:33-41; Lc. 23:44-49; Jn. 19:28-30)

⁴⁵ Na' do ka gobill kat' b̄ichoł doxen yell-lioni axt do ka chida shonch biyeeni'.

⁴⁶ Na' do ka chida shonə besyaa Jesúza' zilljə, ne':

—Elí, Elí, ¿lama sabactani? —na' zejın: Chios cha', Chios cha', ¿biche ba wlej yichjzo' nad'?

⁴⁷ Na' bal beñ'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

⁴⁸ Na' toe' lii zejdotie' jxi'e to dii b̄leeje' loo vino daa nak zichj zla', na'ch bzoen to lo xis na' jazoe'n cho'a Jesúza' kwenche yeeje'n.

⁴⁹ Na' beñ'ka' sto che'gake':

—Jwayishkile'na', la'shki shi wid Elíaza' kwenche yidsle'ne'.

⁵⁰ Na' ka biyoll besyaa Jesúza' zilljə dii yoblə, na' wite'.

⁵¹ Na' ka wite', lechaa ze loo yoodo'na' lii bchez'ten gokan choplə. Na' gok to bedxo' na' wlaa yajka'. ⁵² Na' lekzka' axt biyalj gana' bgash' beñ' wetka'. Na' zan beñ' wetka', beñ'ka' ben̄ilall' Chioza', bibangake' sto shii

⁵³ na' bichejgake' gana' bgash'gake'. Na' ka bibanch Jesúza', biyoogake' yell Jerusalenna', na' beñ' zan ble'gakile' legake'.

⁵⁴ Na' x̄an soldadka' len beñ'ka' chaplene' Jesúza' le b̄lebgake' ka wxo' na' bichlə diika' gok. Na' wnagake':

—Dii likzan Xiin Chios beeni.

⁵⁵ Na' zan noolka' wno Jesúza' dezd gana' mbani Galileana', beñ'ka' goklengake'ne' che bi dii byalljile', lle'gake' de zit'lə bwiagake' doxen ka gok.

⁵⁶ Na' ladje'ka' len María, beñ' yell Magdálana', na' María beena' nak x̄na' Jacóbona' len Joséna', na' x̄na' beñ'ka' nak xiin Zebedewa'.

Bkwash'gake' Jesúza'

(Mr. 15:42-47; Lc. 23:50-56; Jn. 19:38-42)

⁵⁷ Na' ka chzeles yela' bllin to beñ' wni'a lie' José, beena' nak beñ' yell Arimatea na' goke' txen Jesúza'.

⁵⁸ Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'.

⁵⁹ Na' bikaa Joséna' kwerp che Jesúza' na' bitobe'ne' to lech' xtil.

⁶⁰ Na' jlo'ene' to loo ba kob dii zi' beshawee to lee yaj. Na'tech bdee to yaj xen cho'ayinna'. Na'ch bizee.

⁶¹ Na' María, beñ' yell Magdálana', len Maríana' sto wche'gake' cho'a bana'.

Beñ'ka' wdap cho'a ba che Jesúza'

⁶² Na' betiyo, llana' chombaən beñ' Israelka', wyaj b̄xozka' ch̄n̄abia' len fariseoka' lao Pilátona',

⁶³ che'gake'ne':

—Beñ'do', ba jadininto' ka wna dii beñ' wxiye'na' kana' mbane', wne' yiyon lla yibane' dii yoblə ladj beñ' wetka'.

⁶⁴ Na' bsel'gach ben' lljtape' gana' bkwash'gake'ne' axt ka gakch shon lla kwenche bi shaj ben'ka' nakgake'ne' txen do wal chel lljalejgake' kwerp che'na', na' tena' ye'gake' ben': "Ba bibane' dii yoblə ladj ben' wetka'." La' shi ba bengake' ka', na'ch gongake' to dii wxiye' walch aga ka dii necha'.

⁶⁵ Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gakgake'.

⁶⁶ Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

28

Biban Jesúza' ladj ben' wetka'

(Mr. 16:1-8; Lc. 24:1-12; Jn. 20:1-10)

¹ Na' ka wde lla sabda', llana' chombaangake', ni bal lla nech che xmanna' sto, wyaj María nool Magdálana', len Maríana' sto jawiagake' cho'a bana'.

² Na' wzolo to bedxo' xen wal daa betj to anjl che Xancho Chioza' yabana', na' ka blline' cho'a bana' na' bikwase' yaja' daa nsejan cho'a bana' na' wllie' lawinna'.

³ Na' anjla' chey cheeni'e kakzə ga chep yes na' xe'na' nakan xtil inleeb.

⁴ Na' ka ble'i soldadka' le' axt bxiztitgake' daa le bllebgake' na' axt witgake' shlet.

⁵ Na'ch che' anjla' noolka':

—Bi illeble. Neqid' Jesúzan' chiyilje, beena' wit lee yag cruza'.

⁶ Koch no de ni. Ba bibane' kon ka wne'. Li dakachi wwiale gani wdixjgake'ne'.

⁷ Na' li yiyajdo li lljayell ben'ka' nakgake'ne' txen: "Ba bibane' ladj ben' wetka' na' ba ziyaje' Galileana' lljaleze' le', na' na'kzə ile' ilene'." Na' ba wnia' le' ka'.

⁸ Na'ch biza'do noolka' cho'a bana' chllebgake' na' le chibagakile' zjadixje'gakile' ben'ka' nak Jesúza' txen daa goll anjla' legake'.

⁹ Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wdel'gake' ni'ena' be'la'ogake'ne'.

¹⁰ Na' che' Jesúza' legake':

—Bi illeble. Li lljayell ben' bishaaka' shajgake' Galileana' na' ile'gakile' nad' na'.

Wxi' laxj soldadka' kwenche bi we'gake' dill' biban Jesúza'

¹¹ Na' ka biza' noolka', bal soldadka' wdap gana' bkwash'gake' Jesúza' biyajgake' yell Jerusalénna' jayellgake' bxozka' chnabia' yog' diika' gok.

¹² Na'ch wyaj bxozka' chnabia' je'lengake' ben' golka' chnabia' dill' naklə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen,

¹³ che'gake':

—Inatezle wal chel shlak chesle, ben'ka' nak Jesúza' txen bidlejjgake' kwerp che'na'.

¹⁴ Na' shi ba binezi Pilátona' dga, neto'kzə lljazajniinto'ne' nakan gok kwenche bibi gonile' le'.

¹⁵ Na'ch soldadka' be'gake' mecha' na' biza'gake' jazegake'n dill' kon ka gollgake' legake'. Na' axt naanlla ben' Israelka' ni nagake' ka'.

Jesúza' golle' legake' we'gake' xtilleena' doxen yell-lioni

(Mr. 16:14-18; Lc. 24:36-49; Jn. 20:19-23)

¹⁶ Na' wyaj ben'ka' shnej, ben'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'.

¹⁷ Na' ka ble'gakile' Jesúza', be'la'ogake'ne', per balgake' gokchoplall'gake'.

¹⁸ Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni.

¹⁹ Daan, li shaj doxen yell-lioni, li lljali' lljasedi yog' ben' kwenche gakgake' nad' txen. Na' wchoale legake' nis daa ba nonlilall'gake' Xacho Chioza', na' nad', Xiine', len Espiritu Sántona'.

²⁰ Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.

Dill' wen dill' kob daa bzej Márcona'

Juanna', beena' bchoa ben' nis

(Mt. 3:1-12; Lc. 3:1-9, 15-17; Jn. 1:19-28)

¹ Ki wzolo dill' wen dill' kob che Jesucrístona', beena' nak Xiin Chioza'.

² Gok ka wna dii Isaíaza', beena' wdixjee daa goll Chioza'ne':

Wselaa to ben' kwialoe' lawo'na',

wi'e xtilloona' kwenche ba lle' ben' wzenague' cho' kat' illino'.

³ To ben' wnie' zilljə to lo latj gana' bibi chashj chleb, chi'e:

“Li se kwas wzenagle che Xanchona' na' wsalj yichjlall'do'leka' kat' zee.”

⁴ Na' bllin Juanna' latja' gana' bibi chashj chleb. Bchoe' ben' nis, na' wdixje'ile' ben' chiya' yiyaj yilengakile' na' choagake' nis kwenche yizi'xen Chioza' saaxya che'ka'.

⁵ Na' yog' ben'ka' lle' gana' mbani Judeana' na' ben'ka' lle' yell Jerusalenna' jazenaggake' dillaa cho'e. Na' bixoadol'gake' saaxya che'ka', na' bchoa Juanna' legake' nis loo yao Jordanna'.

⁶ Na' xa Juanna' gokan de xa kamey na' bchej lsineena' to yid. Na' wdawe' bish'zo na'ch shin baser dii de lyixaa.

⁷ Na' wdixje'ile' ben'ka' cho'a xtil' Chioza', chi'e:

—Zi' za'lə beena' napch yel' wak xench ka nad', na' ni bi zaka' gag' xmose' kwenche wlechj' xe'le'na'.

⁸ Nad' ba bchoa' le' nisa', san le', gone' ka yidsoa Espíritu che Chioza' loo yichjlall'do'lenna'.

Jesúza' wchoe' nisa'

(Mt. 3:13-17; Lc. 3:21-22)

⁹ Na' kana'yen' Jesúza' wzee yell Nazareta' daa lli' gana' mbani Galileana' na' wyaje' cho'a yao Jordanna' gana' bchoa Juanna'ne' nisa'.

¹⁰ Na' shlak chichej Jesúza' loo nisa', ble'ile' byalj yabana' na' betj Espíritu che Chioza' jsoalene'ne' na' ble'ile' Espírituna' ka to palom.

¹¹ Na' bengakile' wne Chioza' yabana', chi'e Jesúza':

—Lin' nako' Xiin', chakchgaid' li' na' le' chibaid' li'.

Dii xiwaa goklalliin kooyela'n Jesúza' gone' ka cheenin

(Mt. 4:1-11; Lc. 4:1-13)

¹² Na' lli' bche'te Espíritu che Chioza' le' latja' gana' bibi chashj chleb.

¹³ Na' wzoe' na' choa lla ladj ba zniaka', na' Satanáza' daa chnabia' dii xiw'ka' goklalliin kooyela'n le' gone' ka cheenin. Na' ka wde, jaklen anjlka' le'.

Wzolo Jesúza' choe'lene' ben' xtil' Chioza' gana' mbani Galileana'

(Mt. 4:12-17; Lc. 4:14-15)

¹⁴ Biyoll wloogake' Juanna' lillyana', Jesúza' wyaje' gana' mbani Galileana' na' je'lene' ben' dill' wen dill' kob che Chioza',

¹⁵ chi'e:

—Ba bllin lla inabia' Chioza' loo yichjlall'do'lenna'. Li yiyaj yileni dii malka' chonle na' li shajle' dill' wen dill' kob che'na'.

Jesúza' goxe' tap ben' wxen bel

(Mt. 4:18-22; Lc. 5:1-11)

¹⁶ Shlak ngoo Jesúza' nez cho'a nido' che Galileana', ble'ile' Simónna' len ben' bishee Andréza', chzal'gake' yixj daa chzengakile' belka' loo nido'na', la' lennan' noni xshingake'.

¹⁷ Na' goll Jesúza' legake':

—Li da, dino nad'. Na' ka chonle chbejle belka' loo nisi, ka'kzan gonle yibejle ben' lao dii mala'.

¹⁸ Na' ka biyoll golle' legake' ka', lii bkwaan'tegake' yixja' daa chzengakile' belka' na' zejlelake'ne'.

¹⁹ Ka ba wza'gake' zi lat', ble'i Jesúza' Jacóbona' len ben' bishee Juanna', ben'ka' nak xiin Zebedewa', lle'gake' loo barkwa' chiyonshao'gake' yixja' daa chzengakile' belka'.

²⁰ Na' lii wnetie' legake', na' bkwaan'gake' xe'ka', beena' le Zebedeo, len ben'ka' chaklen legake' loo barkwa', na' wyajlelake' Jesúza'.

Jesúza' bibeje' dii xiwaa yoo to ben'
(Lc. 4:31-37)

²¹ Na' bllingake' yell Carpernaúma'. Na' lla sabda', llana' chombaan ben' Israelka', wyaj Jesúza' gana' chdop chllaggake' choe'llwillgake' Chioza' na' wzoloe' chli' chsedile' legake'.

²² Na' bibani ben'ka' lle' na' ka chli' chsedi Jesúza', la' bli' bsedile' legake' lega ben' nap yel' wñabia', na' bi chli' chsedile' ka ben'ka' chli' chsedi leya'.

²³ Na' ladj ben'ka' chdop chllag gana' chli' chsedile' legake', len to ben' yo'e dii xiwaa, na' besyaan, che'n:

²⁴ —iJwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li' na' nezid' nako' dowalj ben' li ben' shao' che Chios.

²⁵ Na' Jesúza' bsheshlene'n, chi'e:

—iLliza wzoa! iBichej loo yichjlall'do' beeni!

²⁶ Na' dii xiwaa wchoonan beena' na' bchix btojan le' na' bichejan chosyaadian.

²⁷ Na' yog' ben'ka' lle' na' bibangakile', na' che' ljwellgake':

—¿Bi dii kob dga chli' chsedi beeni, lla? iNakbia' nape' yel' wñabia', la' axt len dii xiw'ka' chsheshlene' na' chzoagakan xtillee!

²⁸ Na' lii wzete dill' doxen gana' mbani Galileana' ka nak daa chon Jesúza'.

Jesúza' biyone' tobiin che Simón Pédróna'
(Mt. 8:14-15; Lc. 4:38-39)

²⁹ Na' biza' Jesúza' gana' chdop chllaggake' na' biyajlene' Jacóbona' len Juanna' lill Simónna' na' Andréza'.

³⁰ Na' tobiin che Simónna' die' yo'e dii la. Na' gollgake' Jesúza' daa chak che'.

³¹ Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

Jesúza' biyone' ben' zan
(Mt. 8:16-17; Lc. 4:40-41)

³² Na' ka ba wxoa wbilla', jwa'gake' lao Jesúza' yog' ben'ka' bi shao' na' ben'ka' yoo dii xiwaa.

³³ Na' yog' ben'ka' lle' yella' bdi'a bllaggake' cho'a yoona' gana' zoe'.

³⁴ Na' Jesúza' biyone' ben' chak wde wdeli yillwe'. Na' lezkka' bibeje' dii xiw'ka' yoo ben', na' bi bi'e latj inegakan daa nombia'gakan le'.

Jesúza' cho'e cho'a xtill' Chioza' gana' mbani Galileana'
(Lc. 4:42-44)

³⁵ Na' Jesúza' wyase' ni bal, na' bcheje' yella' jelwille' Chioza' ga kono ben' lle'.

³⁶ Na' wyaj Simónna' len ben'ka' nakgake'ne' txen jadiljgake'ne',

³⁷ na' ka billelgakile'ne' na'ch gollgake'ne':

—Yog'z ben' chiyiljgake' li'.

³⁸ Na' che' Jesúza' legake':

—Li sho' yellka' sto, diika' llia gaozə, kwenche lezkka' llje'len' cho'a xtill' Chioza' ben'ka' lle' na', la' ni cheyinnan' bid'.

³⁹ Na' wda Jesúza' yog' yellka' llia doxen gana' mbani Galileana' choe'lene' ben'ka' cho'a xtil' Chioza' yog' gana' chdop chllag ben' Israelka' choe'lwillgake' Chioza', na' bibeje' dii xiw'ka' yoo ben'.

Jesúza' biyone' to ben' chak yillwe' daa le lepra

(Mt. 8:1-4; Lc. 5:12-16)

⁴⁰ To ben' chak yillwe' daa le lepra blline' lawe'na' na' b̄chek' xibe'na' lawe'na', chi'e: —Shi cheenilo', wak yikwaso' yillwe'ni chak'.

⁴¹ Na' biyesh'lallii Jesúza'ne', na' b̄xoa neena' yichje'na' chi'e: —Cheenid'x. Na' naate yikwasa'n.

⁴² Na' katena' lii bikwaste léprana' na' biyakile'.

⁴³ Na' Jesúza', chi'ene':

⁴⁴ —Kono yoo dga ba ben' cho'. San wyaj jali'lawo' lao b̄xoa', na' jwa' daa chiya' lljoo lao Chioza' ka nllia dii Moiséza' bia' goncho kwenche inezile' ba biyakilo'.

⁴⁵ Per ka bizee, wzoloe' bi'e dill' lao yog'lol ben' daa gokə. Na' daa bene' ka', bich gok sho' Jesúza' ka n̄la'zə yellka', san bigaane' ga kono ben' lle'. Per bia'kzə wyaj ben' za' wde wdeli yell jawiagake'ne'.

2

Biyon Jesúza' to ben' net ni'a neena'

(Mt. 9:1-8; Lc. 5:17-26)

¹ Wde to chop lla, Jesúza' billine' sto shii yell Capernaúma'. Na' ka w̄nezi ben'ka' lle' na' ba billine' yoona' gana' wzoe',

² na' bdi'a bllag ben' zan inleeb loo yoona' axt bich chaki lesh' chyoonā' she'gake'. Na' bli' b̄sedile' legake' cho'a xtil' Chioza'.

³ Na' bllin tap ben' n̄lengake' to ben' net ni'a neena'.

⁴ Na' daa bi gok illingake' gana' zete Jesúza' daa lle' ben' zan inleeb, na' wzologake' b̄saljgake' koll' yoona' na' b̄letjgake'ne' do daa che'na'.

⁵ Na' ka gokbe'i Jesúza' chajle'gake' che', golle' ben' we'na': —Xiin, ba biyakxen saaxya cho'ka'.

⁶ Na' chi' bal ben'ka' chli' ch̄sedi leya', na' wza'lall'gake':

⁷ “¿Berache naz beeni ka? Chonz kwine' ka Chioza'. Kono zoa sto ben' gak yizi'xen saaxya che ben', san toz Chioza' gak yizi'xene'n.”

⁸ Na' lii gokbe'teyi Jesúza' daa chza'lall'gake', na' w̄nabile' legake', chi'e: —¿Berache chza'lall'zle ka?

⁹ ¿Achakile chyalljchid' ye' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez”?

¹⁰ Na' wliid' le', nad' Ben' Bsel' Chioza' nap' ye' w̄nabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

¹¹ —Nia' li', biyas, bitob daa cho'na', na' biyaj lillo'na'.

¹² Na' lii biyastie' bitobe' daa che'na' na' bizee chwiāte ben'ka' lle' na'. Na' yog'zgake' bibani na' be'la'ogake' Chioza', che'gake':

—Bigan' ile'icho ka dga.

Jesúza' goxe' Levína' kwenche gake'ne' txen

(Mt. 9:9-13; Lc. 5:27-32)

¹³ Na' wyaj Jesúza' sto shii cho'a nido'na' na' ben' zan janogake'ne', na' bli' b̄sedile' legake'.

¹⁴ Na' wde Jesúza' gana' chi' Levína', xiin Alfewa', ch̄chixje' daa chkaa ben' Rómaka'. Na' chi'ene':

—Da, dino nad'.

Na' wzolla' Levína' janoe'ne'.

¹⁵ Na' to shii Jesúza' len beṅ'ka' nakgake'ne' txen cheej chaogake' lill Levína', na' zan beṅ' wiçhixjka' na' beṅ'ka' zeyi çhegake' nakgake' beṅ' mal cheej chaolengake'ne', la' beṅ' zan ba nak beṅ'ka' no le'.

¹⁶ Na' baḷ fariseoka', beṅ'ka' lekzka' chli' chsedi leya', ka ble'gakile' cheej chaolen Jesúza' beṅ'ka', na' gollgake' beṅ'ka' nakgake'ne' txen:

—¿Berache cheej chaolenz beena' chli' chsedi le' beṅ' wiçhixjka' na' beṅ' malka'?

¹⁷ Na' ka beni Jesúza' che'gake' ka', na'ch chi'e:

—Beṅ'ka' zoa shi'a shao' aga no wen rmech chyalljgakile', san beṅ'ka' bi shawaan chyalljgakile'ne'. Ka'kzə nad', aga bid' ni che beṅ'ka' nak beṅ' li beṅ' shao', san ni che beṅ' malkan' bid'.

Wnabgakile' Jesúza' biçhe bi chon beṅ'ka' nakgake'ne' txen wbasaa
(Mt. 9:14-17; Lc. 5:33-39)

¹⁸ To shii beṅ'ka' nak Juanna' txen na' beṅ'ka' nak fariseoka' txen chzoagake' wbas'. Na' baḷ beṅ' wyajgake' lao Jesúza' na' che'gake'ne':

—Beṅ'ka' nak Juanna' txen na' beṅ'ka' nak fariseoka' txen chzoagake' wbas'. ¿Berache beṅ'ka' nakgake' li' txen bi chongake'n?

¹⁹ Na' che' Jesúza' legake':

—¿Awak soa beṅ'ka' chaxe' to ga chak wishagna' wbasaa shlak chak lnina'? Bi gakan, la' shlak zoalen beena' chshagna' legake' aga wak soagake' wbasaa.

²⁰ San wllin lla kat' yikwas beṅ' beena' chshagna' ladje'ka', kana'chan soagake' wbasaa.

²¹ Ni to beṅ' bi chida' chichollee lee lech' gola' lat' lech' kob, la' lech' koba' yibe'n kat' çhibe'n na' zizikli wçhez'chan lech' gola', na' dii xench gak gana' nchez'.

²² Ni biga zoa beṅ' chguee vino koba' loo yid golka', la' vino koba' wçhezaan yid gola' na' kwiayi' vino koba' lente yid gola'. Na' daan, chiyaḷ' sholl vino koba' loo yid koba'.

Beṅ'ka' non Jesúza' txen chyishjgake' do che trígona' llana' chombaangake'
(Mt. 12:1-8; Lc. 6:1-5)

²³ Na' to lla sabd, llana' chombaṅ beṅ' Israelka', wdelen Jesúza' beṅ'ka' nakgake'ne' txen to ga naz to beṅ' trigo, na' wzolo beṅ'ka' nakgake'ne' txen wdishjgake' trígona' wdaogake'n.

²⁴ Na' goll fariseoka'ne':

—¿Berache chonz beṅ'ki nako' txen daa bi chiyaḷ' gongake' llani chombaṅcho?

²⁵ Na' golle' legake':

—¿Ani shlin biṅ' wlable daa ben dii Davina' to shii kon beṅ'ka' nakgake'ne' txen ka byallj daa gaogake'?

²⁶ Kana' nak Abiatarā' bḫoz choo bḫoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki che Chioza' na' wdaolene'n beṅ'ka' nakgake'ne' txen, la'kzi toz bḫozkan' chiyaḷ' gaogake'n.

²⁷ Na' lekzka' golle' legake':

—Chioza' wleje' llani chombaṅcho kwenche gaklenan benecha', aga bḫe bsile' benecha' kwenchezə we'la'ogake' llani chombaṅchon.

²⁸ Daan, nad', Beṅ' Bsel' Chioza' Yell-lioni, chṅabi'a lao llani chombaṅcho.

3

Beena' net neena' tlaa
(Mt. 12:9-14; Lc. 6:6-11)

¹ Na' sto shii wyaj Jesúza' gana' chdop chllaggake' choe' lwillgake' Chioza' na' ladj beṅ'ka' lle' na' len to beṅ' net neena' tlaa.

² Na' chwiayen'gake' shi wiyon Jesúza'ne' lla sabda', llana' chombaangake', kwenche gaogake' xya che'.

³ Na' che' Jesúza' beena' net neena' tlaa:

—Wzolla' na' wze gchol ben'ki.

⁴ Na'ch wnable' ben'ka' ndop nllag na':

—¿Beran na leya' chiyal' goncho lla sabdka'? ¿Agoncho daa nak wen, anti goncho daa nak mal? ¿Ayislacho ben', anti witchone'?

Na' kokzno billii xtilleena'.

⁵ Na' ka chwie' ben'ka' lle' na', blee na' gokyeshile' daa nakgake' ben' lall'do' chech, na' chi'e beena':

—Bli noona'.

Na'ch bli na' beena' na' lii biyakteyin.

⁶ Na' bichej fariseoka' na' wzologake' chgoogake' xnezin len ben'ka' non Heródeza' txen kwenche witgake' Jesúza'.

Ben' zan bdop bllag cho'a nido'na' gana' chda Jesúza'

⁷ Na' biza' Jesúza' gana' zoe' na' zejlene' ben'ka' nakgake'ne' txen cho'a nido'na' na' ben' zan ben' Galiléaka' wnogake' legake'.

⁸ Na' ben' zan ben'ka' lle' gana' mbani Judeana', na' yell Jerusalénna', na' gana' mbani Idumeana', na' ben'ka' lle' shlaa yao Jordánna' na' yellka' ndil nllag yell Tírona' na'ch yell Sidónna', ka wnezgakile' chon Jesúza' dii zan yel' wak, na' wyajgake' jawiagake'ne'.

⁹ Na' daa lle' ben' zan inleeb, golle' ben'ka' nakgake'ne' txen yisbig'gake' to barkw gana' lljshie' kwenche bi idakwyill' ben' be ben' zilka' le'. ¹⁰ La' ben' zan inleeb ba biyone' na' yog' ben'ka' bi shao' chdi'a chllaggake' lawe'na' kwenche gox'gake'ne' na' yiyakgakile'.

¹¹ Na' dii xiw'ka' yoo bal ben'ka', ka chle'gakin Jesúza', chongakan ka chchek' xib ben'ka' lawe'na' na' chosyaagakan, che'gakan:

—¿Lin' nako' Xiin Chioza'!

¹² Na' Jesúza' bsheshlene'gakan kwenche bi inagakan ka' ga lle' lla' ben'.

Jesúza' chbeje' shllin postlka'

(Mt. 10:1-4; Lc. 6:12-16)

¹³ Ka biyoll ben Jesúza' diika', na' wleje' bal ben'ka' wyazlallee gakgake'ne' txen na' wyajlengake'ne' to lo yaa.

¹⁴ Na' wleje' shllin ben'ka' kwenche talengake'ne' txen na' kwenche wselee legake' llje'gake' cho'a xtill' Chioza', na' bsi'e legake' postl.

¹⁵ Na' bi'e legake' yel' wñabia' kwenche yiyongake' ben'ka' bi shao' na' yibejgake' dii xiw'ka' yoo ben'.

¹⁶ Ben'kin wleje' shllin: Simónna', beena' bisi'e Pedro;

¹⁷ Jacóbona' len ben' bishee Juanna', ben'ka' nak xiin Zebedewa', (ben'ka' bsi'e Boanerges, daa zeji ben' nak ka yi' wziv' dii chashj chtin);

¹⁸ na' Andréza', Felípena', Bartoloména', Matewa', Tomáza', Jacóbona', xiin Alfewa', Tadewa', Simón, beena' wlen cananistka',

¹⁹ na'ch Jud Scariota', beena' bene' Jesúza' lo na' ben' malka'.

Wnagake' che Jesúza' bchine' yel' wak che dii xiwaa

(Mt. 12:22-32; Lc. 11:14-23; 12:10)

²⁰ Na' Jesúza' len ben'ka' nakgake'ne' txen biyajgake' gana' zoagake'. Na' daa bizdi'a bizllag ben' zan inleeb, ni bi gok latj gaogake'.

²¹ Ka wñezi ben'ka' nak bish' ljwell Jesúza', wyajgake' nan lljaxi'gake'ne', la' gokgakile' ba chaktonte'n.

²² Na' lekzka' ben'ka' chli' chsedi leya', ben'ka' zaak Jerusalénna', nagake' che':

—Bezlo daa chñabia' dii xiw'kan' yo'e, na' yel' wak cheyinnan' chisheshile' dii xiw'ka'.

²³ Na' gox Jesúza' legake' na' bzoe' to jempl lawe'ka', chi'e:

—¿Nakra gon Satanáza' yibej ljwell dii xiwiinna'?

²⁴ Ben'ka' lle' toz yell shi til-len ljwellgake' na' gakgake' choplə, aga ssha soagake'.

²⁵ Na' ben'ka' lle' toz yoo shi illaa ljwellgake' na' gakgake' choplə, aga ssha soagake'.

²⁶ Na' shi Satanáza' na' dii xiw'ka' nak lall' na'yin yiyakdilgakan na' gakgakan choplə, bi idiagakan, san ba bllin lla kwiayi'gakannan', shi naa.

²⁷ Kono gak sho' loo yoo lill to ben' wal na' kwane' bi de che' shi bi wcheje'ne' zigaate, na'chan wtesh wloe' loo lille'na'.

²⁸ Dii li nia' le', Chioza' yizi'xene' yog'lol saaxya na' yog'lol dii mal daa chbell chne ben' che';

²⁹ san beena' ine zban che Espíritu Sántona', biga yizi'xene' che', na' toshiizi gak xbaguee cheyi daa wchell wnie' che'.

³⁰ Golle' legake' ka' daa wnagake' che' dii xiwaan yo'e.

Xna' Jesúza' na' ben' bisheeka'

(Mt. 12:46-50; Lc. 8:19-21)

³¹ Na'ch bllin xna' Jesúza' len ben' bisheeka', wzegake' lesh' chyoonna' na' bsel'gake' ben' janegake'ne'.

³² Na' ben'ka' chi' kwit Jesúza' gollgake'ne':

—Ba chiyilj xnoona' li' len ben' bishooka'.

³³ Na' chi'e legake':

—¿Anezile noran xna'na' na' ben' bishaaka'?

³⁴ Na' chwie' ben'ka' chi' kwite'na' na'ch chi'e:

—Ben'kin xna'na' na' ben' bishaaka'.

³⁵ Nottezə beena' chon ka cheeni Chioza', len' ben' bishaana', ben' zanna' na'ch xna'na'.

4

Jempl che to ben' goz goon

(Mt. 13:1-9; Lc. 8:4-8)

¹ Sto shii wzolo Jesúza' bli' bsedile' ben' cho'a nisdona', na' daa bdop bllag ben' zan inleeb jshie' to loo barkw daa chi' cho'a nisdona', na' ben'ka' bdi'a bllag wllgake' cho'a nisdona'.

² Na' dii zan dii bli' bsedile' legake' na' bchine' jemplka', na' golle' legake':

³ —Li wzenag dga. To ben' goz goon wzee zeje' goza'.

⁴ Na' ka zej chzalee binna', balan bxop cho'a neza' na' bllin byinka' wdaogakban.

⁵ Na' zi balan bxop ladj yajka', gana' bitek bi yo chi'. Na' tolbe' bilaan, daa bi chi'tekan yona'.

⁶ Per ka bla' wbillla', bkwedgakan. Na' daa bi bde loinna', wbillan.

⁷ Na' zi balan bxop ladj yag yesh'ka' na' yag yesh'ka' bi be'gakan latj igolgakan na' bibi wllian.

⁸ Na' zi balan bxop gana' chi' yo wenna', na' bgolgakan na' le wlligakan. Balan wllia shichoa wej, na' zi balan guiyon wej, na'ch to guiyoa wej.

⁹ Na' chi'e legake':

—Ka le' chenile dga nia', li sen wneyi.

Jesúza' bzajniile' legake' biche chseesee jemplka'

(Mt. 13:10-17; Lc. 8:9-10)

¹⁰ Na' ka bgaan stoz Jesúza', ben'ka' wlle' gaoshosh kwite'na' len ben'ka' shllin, wnabgakile'ne' bi zeji jempla' daa bseesile' legake'.

¹¹ Na' chi'e legake':

—Chioza' cho'e latj inezile daa kono wnezi che yel' wnabia' che'na'. Per ben'ka' bi chzenag che', chseesid' legake' jemplka'

¹² kwenche la'kzi ile'tegakile' ka chon', bi shajni'gakile' bi zejin, na' la'kzi yentegakile' xtilaana', bi shajni'gakile'n, kwenche bi yiyaj yilengakile' lao Chioza' na' bi yizi'xene' chegake'.

Jesúza' bizajniile' bi zeji jempla'

(Mt. 13:18-23; Lc. 8:11-15)

¹³ Na' chi'e legake':

—Shi bi chajniile jempli, ¿nakra gonle shajniile diika' sto?

¹⁴ Beena' chaz zaklebile' beena' choe' cho'a xtil' Chioza'.

¹⁵ Zoa beñ' chengakile' cho'a xtil' Chioza' na' kat' ba bengakile'n, lii zejte dii xiwaa chikwasan daa loo yichjlall'do'eka'. Na' chak chegake' ka gok che binna' daa bxop cho'a neza'.

¹⁶ Zi balgake' chak chegake' ka gok che binna' daa bxop ladj yajka' na' aga bi logakin bde. La' ka chengakile' cho'a xtil Chioza' chiba chizak'gakile' chzenaggake'n

¹⁷ per shlollchga chajle'gake'. Na' kat' bi chen chle'gakile' ni che cho'a xtil' Chioza', lii chbej yichjtegake'n.

¹⁸ Zi balgake' chak chegake' ka gok che binna' daa bxop ladj yag yesh'ka'. Chengakile' cho'a xtil' Chioza',

¹⁹ per chi' yichjgake' diika' chak chegake', na' zetegake' wneyi che yel' wni'ana' na' chzelall'tegake' yog'lolte daa de yell-lioni. Na' legakannan' chsej chllongakan gon xshin cho'a xtil' Chioza' loo yichjlall'do'eka'.

²⁰ Na' zoa zi bal beñ' chengakile' cho'a xtil' Chioza' na' chajle'gake' do yichj do lall'gake', na' chon xshinin loo yichjlall'do'eka'. Na' chak chegake' ka binna' bxop lo yo wenna' daa wllia shichoa wej, na' guiyon wej na'ch to guiyoa wej.

Jempl che to kandil

(Lc. 8:16-18)

²¹ Na' lekzka' chi'e legake':

—Biga zoa beñ' chxene' kandila' na' chdose'n to dii wkwashaan len wa chni'en xan xlague'na', san chzoe'n sibə kwenche wzeeni'n doxen loo yoona'.

²² Na' lekzka' yog'lolte dii ngash' naa wllin lla yila' lawin, na' daa kono nezi naa wllin lla inezi beñaan.

²³ Le' chenile dga nia', li sen wneyi.

²⁴ Na' lekzka' chi'e legake':

—Li se wneyi cheyi dga chzenagle. Na' shi gonle ka dii le, Chioza' wzajni'chile' le' dii xench.

²⁵ Beena' chzenag, zizikchli shajni'chile', na' beena' bi chzenag, axt daa ba benile' lat' yiyal-lallee.

Jempl che binna' daa chgol

²⁶ Na' lekzka' chi'e legake':

—Yel' wñabia' che Chioza' zaklebin daa chak che binna' chaz beñ'.

²⁷ Beena' chaz chañ, chila' daa chaze' na' chgolan la'kzi chese' wa chechj chdaze', ka'kzə shi wal' wa tella, na' ni bi nezile' nak chak chgolan.

²⁸ Lo yell-lioni chla' daa chaz beñ': zigaate chila'n, na' chgolan, na' chzen do, na'tech chbian.

²⁹ Na' kat' ba gol daa chbian, na' chizi' chilape'n.

Jempl che sa mostásana'

(Mt. 13:31-32; Lc. 13:18-19)

³⁰ Lekzka' che' Jesúza' legake':

—¿Bera ka wsaklebicho yel' wñabia' che Chioza', lla? wa ¿bera ka jempl wchincho wsaklebichon?

³¹ Yel' wñabia' che Chioza' nakan ka sa mostásana' daa chazgake'. La'kzi lennan' binna' daa liizelozi nesh'ch,

³² kat' ba bla'n na'ch chgolan na' chakan dii xench ka yog'te yix' kwan yoblə, na' chak xозиinka' dii xen axt byindo'ka' wak lljshiagakban na' sho'gakb xol cheyinna'.

Jesúza' bchine' jempl ka bli' bsedile' ben'

(Mt. 13:34-35)

³³ Dii zan jempl bchin Jesúza' ka bli' bsedile' ben'ka' cho'a xtill' Chioza', bene' kon ga zeelo wyajni'gakile'.

³⁴ Na' toshiizi bzoe' jemplka' lao ben'ka' bdi'a bllag, na' toz ben'ka' nakgake'ne' txen bizajniile' bi zejín yog' diika'.

Jesúza' bkweze' to yejpe' wal lo nido'na'

(Mt. 8:23-27; Lc. 8:22-25)

³⁵ Na' ka gol, golle' ben'ka' nakgake'ne' txen:

—Techo shlaa nido'ni.

³⁶ Na' biza'gake' kwit ben'ka' bdi'a bllag na' biche'gake' Jesúza' loo barkwa' daa chi' cho'a nido'na', na' lench barkw yoblə ziyajlengake'.

³⁷ Na' wze to yejpe' wal na' wzolo nido'na' chas chataan axt ba chiyollan loo barkwa', na' ba wzolo chbe'n yel.

³⁸ Na' ba de Jesúza' chese' xaninna' nkogtie' to dii nkogue', na' jashangake'ne' che'gake':

—¡Maestro! ¿Abikzə chakbe'ilo' ba chbe'cho yel?

³⁹ Na' wyase' bsheshlene' be'na', na' chi'e nido'na':

—Lliz wzoa.

Na' wlez be'na' na' wche'lli nido'na'.

⁴⁰ Na' golle' ben'ka' nakgake'ne' txen:

—¿Biche chllebzle? ¿Abikzan' gonlilall'le nad'?

⁴¹ Na' le bllebgake', na' che' ljwellgake':

—¿Nora beeni, lla?, axt be'na' na'ch nido'ni chzoagakan xtillee.

5

Bibej Jesúza' dii xiwaa yoo ben' Gadárana'

(Mt. 8:28-34; Lc. 8:26-39)

¹ Na'ch bllingake' gana' mbani Gadárana' daa llia shlaa nido'na'.

² Na' ka bichej Jesúza' loo barkwa', na' wbig' to ben' yo'e dii xiwaa. Na' beeni bcheje' loo kapsanta'

³ gana' none' ka lill xlatje'. Na' kono gok wchej le', ni gdenna' bi ben llin.

⁴ Zan shii bchejgake' ni'a neena' gdenka', na' tolbe'do' chchogue'gakan, na' kono wzoyi le'.

⁵ Ka wal ka tella chechj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'.

⁶ De zit'lə ble'ile' zej Jesúza' na' bxonjdoe' jatile'ne' na' jachek' xibe'na' lawe'na',

⁷ na' besyee zillj, chi'e:

—¡Bi wlalli' cho' kon nad', Jesús, Xiin Chios, ben' choo ben' xen! Chat'yoid' li', ¡bcheb lao Chioza' bi wsak'zi'o nad'!

⁸ Gollan ka' daa goll Jesúza' len:

—¡Dii xiw', bichej loo kwerp che beeni!

⁹ Na' goll Jesúza' len:

—¿Bin lio'?

Na' che'n:

—Legiónan lia, la' zannto' nak.

¹⁰ Na' got'yochgain Jesúza' bi wseleegakan gan yoblə.

11 Na' gaozə kwit yaana' gana' lle'gake', lle' zan kush chaogakb.

12 Na' got'yoi dii x̄iw'ka' le', che'gakan:

—Bsel' neto' gana' lle' kushka' na' be' latj yiyoonto' legakb.

13 Na' bi'e latj chegakin, na' bichejgakan jayoogakan kushka'. Na' nakgakb ka chop mil, na' wzologakb chxonjdogakb jabixgakb loo nido'na', na' jche'gakb yel.

14 Na' beñ'ka' chap kushka' ziyajdogake' jayellgake' beñ'ka' lle' yella' na' beñ'ka' lle' lyixaa daa ble'gakile', na' beñ' zan jawia daa gok.

15 Na' ka bllingake' gana' ze Jesúsza', ble'gakile' beena' wyoo dii x̄iw'ka' chi'e kwite'na' ba biyakw xe'na' na' ba biyeen biyeeniile', na' bllebake'.

16 Na' beñ'ka' ble'i daa gok che beena' wyoo dii x̄iw'ka' na' daa gok che kushka', be'gake'n dill' lao beñ'ka' bllin.

17 Na' got'yogakile' Jesúsza' yiyaje' gan yoblə.

18 Ka chiyoo Jesúsza' loo barkwa', beena' wyoo dii x̄iw'ka' got'yoile'ne' wi'e latj shaj-lene'ne'.

19 Per bi bi'e latj, san chi'ene':

—Biyaj lillo'na' gana' lle' bish' ljwello'ka', na' jayellgake' ka nak diiki ba ben X̄ancho Chioza' cho' na' ka ba biyesh'lallile' li'.

20 Na'ch biza' beena' na' jaye' dill' doxen gana' mbani Decápoliza' daa ben Jesúsza' che', na' yog' beñ' bibani.

Biyon Jesúsza' noola' bex' xe'na' na' lekzka' xiin Jairona'

(Mt. 9:18-26; Lc. 8:40-56)

21 Ka billinlen Jesúsza' barkwa' shlaa nido'na', na' bdi'a bllag beñ' zan cho'a nido'na' gana' billine'.

22 Na' bllin to beñ' le Jairo, nake' to beñ'ka' chgoogake' x̄nezi diika' chon beñ' Israelka' gana' chdop chllaggake' choe'lwillgake' Chioza'. Na' ka blline' gana' ze Jesúsza', b̄chek' xibe' lawe'na'

23 na' benyesh'chgue', chi'e:

—Ba chet bi' cha'na'. Ben goklen sho'gach wxoa noona' yichjbaa kwenche yiyakib' na' ibanchb'.

24 Na' wyajlen Jesúsza' le', na' beñ' zan inleeb nogake'ne' axt bdakwyillgake'ne'.

25 Na' ladj beñ' zan walka' len to noolə ba gok shllin yiz chzoe' wbaa.

26 Dii zan dii ba ben ble'ile' lao beñ' wen rmechka', na' ba blliyee yog' dii de che' na' bi gokkze' rmech, san gokxinlile'.

27 Na' ka benile' xtill' Jesúsza', jni'e ladj beñ' zan walka' no le' na' jexee xe'na'.

28 La' gokile': “La'ch' xe'na' shel' ba bexaa, na' yiyakid'.”

29 Na' katena' wlez wbaana' na' gokbe'ile' ba bigaa yillwe' che'na'.

30 Na' gokbe'i Jesúsza' b̄chey yel' wak che'na', na' biyechje' chi'e beñ'ka':

—¿Noran bex' xa'na'?

31 Na' beñ'ka' non le' txen che'gake'ne':

—Beñ' zan walan ndakwyill li'. ¿Biche nazo': “Non ba bex' nad'”?

32 Na' ze Jesúsza' chwie' beñ'ka' lle' kwite'na' kwenche inezile' non bex' le'.

33 Na'ch noola', daa ba gokbe'ile' biyakile', de chall chllebzile' wdie' na' b̄chek' xibe'na' lawe'na' na' golle' le' doxen daa ba gok che'.

34 Na' che' Jesúsza'ne':

—Xiin', daa chonlilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

35 Na' ni chshaljte Jesúsza' ka bllin to chop beñ' wza' lill Jairona', chi'ene':

—Ba wit bi' cho'na'. Bich gonilo' maestroni zed.

36 Na' bi ben Jesúsza' legake' kwent, na' golle' Jairona':

—Bi illebo'. Kon b̄xenilall' nad'.

³⁷ Na' bi bi'e latj shajlen beṅ' yoblə le', lete Pédróna' na' chop bish'te, Jacóbona' na'ch Juanna'.

³⁸ Na' ka bllingake' lill Jairóna', ble'ile' le chakyeshii beṅ'ka' lle' na' na'ch chbellgake' na' le chosyaagake'.

³⁹ Na' jabiguee gana' lle'gake' na' golle' legake':

—¿Berache chonzle daṅe na' chbellzle? Aga ba wit bi'do'nán', san cheszbaan.

⁴⁰ Na' bxillgakile' Jesúza'. Na' bisheshe' yog'lóle' na' wyoolene' xaxṅa'baa na' beṅ'ka' zejlene' txen gana' de bi'do'na'.

⁴¹ Na' beṅee na'baa na' golle'b':

—Talita, cumi* —na' zejín: Bi' nooldo', nia' li' biyas.

⁴² Na' bi' nooldo'na' lii biyasteb' na' bidab', la' ba gokkzib' shllín yizan. Na' bibanchgayi beṅ'ka' lle' na'.

⁴³ Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

6

Billin Jesúza' yell Nazareta'

(Mt. 13:53-58; Lc. 4:16-30)

¹ Na' biza' Jesúza' biyaje' lalle'na', na' beṅ'ka' nakgake'ne' txen zejleṅgake'ne'.

² Na' ka bllin lla sabda', llana' chombaan beṅ' Israelka', wyaje' gana' chdop chllaggake' choe'llwillgake' Chioza' na' wzoloe' bli' bsdile' beṅ'ka' lle' na'. Na' zan beṅ'ka' bzenag xtilleena' bibangakile', na' che'gake':

—¿Gara jasedz beeni diiki, lla? ¿Gara za' yel' sin' che beeni, na' yel' wakka' chone', lla?

³ ¿Aaga beenin karpintera', beena' nak xiín Maríana', na' beṅ' bish' Jacóbona', Joséna', Júdaza' na'ch Simónna'? Na' lekzka' beṅ' zane'ka' zoagake' lallchoni.

Na' bi wyajle'gake' che'.

⁴ Na' che' Jesúza' legake':

—To beṅ' chyixjee daa che' Chioza'ne', gattez chgoogake'ne' balaan, san lall lille'na' aga no chgoo le' balaan.

⁵ Na' aga bitek yel' wak gok gone' na', lete xonjchga beṅ' we'ka' bxoā neena' yichje'ka' na' biyone' legake'.

⁶ Na' bibanile' daa bi chajle' beṅ'ka' che'. Na' wde' bli' bsdile' beṅ'ka' lle' to to yellka' lla gaozə yell Nazareta'.

Jesúza' bselee beṅ'ka' shllín llje'gake' cho'a xtil' Chioza'

(Mt. 10:5-15; Lc. 9:1-6)

⁷ Na' wnie' beṅ'ka' shllín, na' bselee chop weje', na' bi'e legake' yel' wṅabia' kwenche yibejgake' dii xiw'ka' yoo beṅ'.

⁸ Na' golle' legake' bibi gox'gake' kat' koogake' nez; bi chiya'l' wa'gake' yixj ga koo xshinlaze'ka', ni dii gaogake', ni mech, san twejz yag bar gox'gake'.

⁹ Na' shkwe'z xelgake' wlej, na' zi shkwe'z xe'ka' gawk.

¹⁰ Na' chi'e legake':

—Yoona' gana' illinle, na'z soale axt ka illinch lla yiza'le.

¹¹ Na' yella' gana' bi wlebgake' le' ni bi wzenaggake' chele, ka yiza'le na', yishible bishtena' lla ni'aleka' kwenche gakbe'gakile' aga wenan chongake' bi chlebgake' cho'a xtil' Chioza'. Dii li' nia' le', kat' illin lla wchoglo Chioza' che beṅ', beṅ'ka' lle' yella' gana' bi wlebgake' le', ile'gakile' yel' zak'zi' xench aga ka beṅ'ka' wlle' yell Sodómana' na' yell Gomórrana'.

¹² Na' wza'gake' zjtixje'gakile' beṅ' chiya'l' yiyaj yilengakile' saaxya che'ka'.

* 5:41 Talita, cumi: dill'ki nakgakan dill' arameo.

13 Na' bibejgake' zan dii xiw'ka' yoo beṅ', na' bshongake' lat' wej seta' yichj beṅ'ka' bi shao' na' biyakgakile'.

Betgake' Juanna', beena' bchoa beṅ' nis
(Mt. 14:1-12; Lc. 9:7-9)

14 Na' Heródeza', beena' wṅabia' gana' mbani Galileana', benile' yog' daa chon Jesúza', daa le ba zeyi che'. Baḷ beṅ'ka' che'gake':

—Dii Juanna', beena' bchoa beṅ' nisan' ba biban, daan chone' yel' wakka'.

15 Zi bale' che':

—Elíazan' ba biyed.

Na' zi bale' che':

—Nake' beṅ' chyixjee daa che' Chioza'ne', ka beṅ'ka' wzoa kani'yi.

16 Ka beni Heródeza' dill'ki, na' chi'e:

—jBeenan' dii Juanna', beena' ben' mandad wchog yichje'na'! jBa bibane' ladj beṅ' wetka'!

17 La' kwini Heródeza' bene' mandad beṅ'gake' Juanna' na' bseje'ne' lillyana' daa bshelene'ne' daa bikee Herodíaza', xool beṅ' bishee, Felípena'.

18 Juanna' golle'ne':

—Xya nleb nakan bikoo xool beṅ' bishoona'.

19 Na' bllaa Herodíaza' Juanna' na' goklallee wite'ne', per bibi gok gone'

20 daa chlleb Heródeza' Juanna', daa nezile' nake' to beṅ' li beṅ' shao' beṅ' nak lall' na' Chioza', na' bi bi'e latj no bi goni le'. Na' la'kzi chakchoplallee che dill'ka' cho'e, bibaile' bzenague' che'.

21 Per ka wyayi Heródeza' yiz, bene' to lni na' goxe' beṅ'ka' chṅabia', na' xan soldadka', na' beṅ'ka' mbejlawin gana' mbani Galileana'. Na' got' xlatjin gon Herodíaza' ka cheenile'.

22 Na' bi' nool wew' che Herodíaza' byaab' lao beṅ'ka' lle' lṅina', na' le bibayi Heródeza' len beṅ'ka' chaolene' ka byaab'. Na' golle'b':

—Wṅab bittezə cheenilo' na' goṅa'n.

23 Na' bchebe' wi'eb' daa cheenib', la'kzi axt gashj gana' chṅabi'e wi'eb'.

24 Na' bichejb' janabib' xṅa'baa:

—jBera ka iṅab', lla?

Na' che' xṅa'baa:

—Wṅab yichj Juan wichoa nisa'.

25 Na' lli biyooteb' gana' chi' Heródeza', na' che'b':

—Cheenid' yichj Juanna' to lo plat llilj naate.

26 Na' le gokyeshii Heródeza', per daa ba bcheble' lao yog' beṅ'ka' goxe', bi goklallee wllonile'b' daa chṅabib' le'.

27 Na' lli bsel'tie' to soldad jachogue' yen Juanna' loo lillyana'

28 na' bllie' yichje'na' to lo plat. Na' bi'en bi' nool wewaa na' leb' be'baan xṅa'baa.

29 Ka wṅezi beṅ'ka' nak Juanna' txen, na' jaxi'gake' kwerp che'na' na' jakwash'gake'ne'.

Bwao Jesúza' gayaa mil beṅ'
(Mt. 14:13-21; Lc. 9:10-17; Jn. 6:1-14)

30 Ka billin postlka' gana' zoa Jesúza', na' gollgake'ne' yog' diika' jengake' na' daa jali' jasedgakile' beṅ'.

31 Na' che' Jesúza' legake':

—Li sho' shajcho ga kono beṅ' lle' kwenche yizi'lall'lat'cho.

Golle' ka' daa le chdia chllag beṅ' zan lawe'ka', na' ni bi chak latj gaogake'.

32 Na' wyoogake' to barkw wyajgake' ga kono beṅ' lle'.

33 Na' beṅ' zan ble'gakile' ka wza'gake' na' biyombia'gake' legake', na' wza'do beṅ'ka' lle' to to yell zejdogake' gana' illin barkwa' na' nechlagake' bllin.

34 Na' ka bichej Jesúza' loo barkwa' ble'ile' ba bdi'a bllag beṅ' zan inleeb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsedile' legake'.

35 Na' ka wlle', beṅ'ka' nakgake'ne' txen wbig'gake' lawe'na' che'gake'ne':

—Ba wlle' naa, na' gani lle'cho kono zoa wit' dii gaocho.

36 Goll beṅ'ki yiyajgake' ranshka', na' yellka' llia gaozə kwenche lljxi'gake' daa gao-gake'.

37 Na' che' Jesúza' legake':

—Len', li we' dii gaogake'.

Na' che'gake'ne':

—¿Nakra gonnto' lljxi'nto' yetxtilka' gao yog' beṅ'ki? la' wyejljain che chop guioa lla che laxj beṅ'.

38 Na' che' Jesúza' legake':

—Li lljawia ka'k' yetxtilka' naple.

Na' ka wnezgakile' ka'ka'n de, na' che'gake'ne':

—De gayaan, na' zi chop beṅ'.

39 Na'ch goll Jesúza' legake' kwekgake' xonj wej beṅ'ka' lo yixa'.

40 Na' wche' to guioa wejgake' na' shiyon wejgake'.

41 Na' beṅ' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choxken, na' bxoxje' yetxtilka' bi'en beṅ'ka' nakgake'ne' txen kwenche be'gake' che che beṅ'ka'. Na' lekzka' yog'gake' be'gake' belka'.

42 Na' yog'lolgake' wdaogake' ka beljgakile'.

43 Na' postlka' bitopgake' yetxtilka' len belka' bichoonan, na' biyakan zi shllin xet'.

44 Na' beṅ'ka' wdao, to beṅ' byoka'zə gokgake' gayaa mil.

Jesúza' wzee lo nido'na'

(Mt. 14:22-27; Jn. 6:16-21)

45 Na' ka wde, bigoo Jesúza' beṅ'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa llia zi shlaa nido'na', shlak bisee beṅ'ka' bdi'a bllag na'.

46 Na' ka biya beṅ'ka' billesh, na' wyaje' lo yaana' jelwille' Chioza'.

47 Na' ka gol, ba zej barkwa' gchol nido'na' na' stoz Jesúza' bgaane' gana' biza'n.

48 Na' ble'ile' le chllaglogaken' daa za' be'na' gana' zejləgake'. Na' ni bal wlo'e nez tlo nido'na' zeje' gana' ziyajlgake'. Na' ba zoa yidie' lawe'ka'

49 ka ble'gakile'ne' zeje' tlo nido'na' na' gokgakile' yel bxenzan. Na' besyaagake'

50 daa le bllebgake' daa ble'gakile'. Na' lii wnetie' legake', chi'e:

—Bi illeble, nad'kzan.

51 Na' biyepé' loo barkwa' na' wche'lli be'na'. Na' le bibangakile',

52 la' aga ba wyajni'gakile' yel' waka' daa bene' che yetxtilka' daa gokgake' beṅ' lall'do' wal.

Jesúza' biyone' beṅ'ka' bi shao' gana' mbani Genesareta'

(Mt. 14:34-36)

53 Na' ka biyoll wdegake' lo nido'na' na' bllingake' yell-lío daa mbani Genesareta', na' bda' barkw che'ka' yag cho'a nido'na'.

54 Ka bchejgake' loo barkwa', lii biyombia'te beṅ' Genesaretka' Jesúza'.

55 Na' wdadogake' doxen gana' mbani lalle'ka' btopgake' beṅ' bi shao', na' lo daazə nxoagake' legake' chjwa'gake' legake' gana' nezgakile' bllin Jesúza'.

56 Na' gattezə chaje' laa yelldo'ka' laa yell xenka', wa laa ranshka', chyixjgake' beṅ'ka' bi shao' tneza' gana' chdie'. Na' chat'yogakile'ne' wi'e latj gox'gake' la'ch' xe'na'. Na' yog' beṅ'ka' gok beṅ'gake'n biyakgakile'.

7

Diika' chxinj chlenan yichjlall'do'chona'
(Mt. 15:1-20)

¹ Fariseoka' len zi baḷ beṅ'ka' chli' chsedi leya', beṅ'ka' zaak Jerusalénna', bllingake' lao Jesúza'.

² Na' ka ble'gakile' baḷ beṅ'ka' nak Jesúza' txen bi biḡis biyib neeka' ka zi' gaogake', na' wdaogake' xya chegake'.

³ (La' fariseoka' len yog'z beṅ' Israelka' ni nogake' daa bli' bsemi dii xozxtoe'ka' legake' nan bi gak gaogake' shi biṅ' yixis yiyib neeka'.

⁴ Na' ka chiyoll chajgake' lao yaana' shi bi yixis yiyib neeka' bi gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'.)

⁵ Na' fariseoka' len beṅ'ka' chli' chsedi leya' wṅabgakile' Jesúza', che'gake':
—¿Biche bi chon beṅ'ki nako' txen ka bli' bsemi dii xozxto'choka' cho?', la' bi chixis chiyib neeka' kat' cheej chaogake'.

⁶ Na' che' Jesúza' legake':
—Kwaslōl inleban wṅe dii Isaíaza' chele, le' beṅ' wxiye', kana' bzeje' daa na:
Ka nak beṅ'ki, de cho'a dill'zan choe'la'ogake' nad',
na' aga choe'la'ogake' nad' do yichj do lall'gake'.

⁷ Bibi zjanayin chongake' ka choe'la'o nad';
na' daa chli' chsedgakile' nakan dii chyiljall'z beṅ'.

⁸ Na' le' chbej yichjle daa nllia Chioza' bia' gonle kwenche gonle daa chyiljall' beṅ' yell-lioni.

⁹ Na' lekzka' golle' legake':
—Chzoale ka'lə daa nllia Chioza' bia' gonle kwenche gonle daa bli' bsemi dii xozxto'leka' le'.

¹⁰ Moiséza' wne': “Li koo xaxṅa'ləna' balaan”, na' “Beena' ine zban che xaxṅeena' chiyal' guete.”

¹¹ Na' le' choe'le latj yee beṅ' xaxṅeena': “Bi gak gaklen' le', la' yog' dga de cha' ba ncheb' wi'an Chioza'.”

¹² Na' daa nale ka', bich chonle byen gaklen beṅ' xaxṅeena'.

¹³ Na' daa chonle ka', chzoale cho'a xtill' Chioza' ka'lə kwenche chonle daa bli' bsemi dii xozxto'leka' le'. Na' dii zanch ka dga chonle.

¹⁴ Na' wṅe Jesúza' yog' beṅ'ka' lle' na', na' golle' legake':

—Li wzenag dga inia' le', na' li shajniin:

¹⁵ Aga daa cheej chao beṅ' yell-lionin chxinj chlenan le'. San daa chalj chxe loo yichjlall'do'enan' chxinj chlenan le'.

¹⁶ Ka le' chenile dga nia', li sen wneyi.

¹⁷ Na' ka bikwase' kwit beṅ'ka' lle' na' biyo'e loo yoona' gana' zoagake', na' beṅ'ka' nakgake'ne' txen wṅabgakile'ne' bi zejin daa golle' beṅ'ka'.

¹⁸ Na' golle' legake':

—¿Ani le' bi chajniilen? ¿Abi chajniile aga daa cheej chao beṅaan chxinj chlenan le'?

¹⁹ La' aga loo yichjlall'do'enan' illinan, san loo li'enan' lljche'n, na'tech yichejan.

Na' daa golle' ka', zejin bittezə yel' wao wak yeej gaocho.

²⁰ Na' lekzka' golle':

—Daa chchej loo yichjlall'do' beṅ' yell-lioni, lennan' chxinj chlenan le'.

²¹ La' loo yichjlall'do'ekan' chalj chxe diiki bi nak wen: yel' chza'lall' mal, yel' chṅelen ljwellin, yel' chiyit ljwellin,

²² yel' wban, yel' wzelall', yel' wen dii mal, yel' wxiye', yel' wenlen kwerp cheyinna' daa bi nxe bi nzak', yel' xe', yel' wyilj wzan dill' che beṅ', yel' chep cha'lall', na' yel' nchol nnti.

²³ Yog'lol dii malki chalj chxegakan loo yichjlall'do' beṇ' na' chxṇj chlengakan legake'.

To noolə bi nake' beṇ' Israel benlilallee Jesúza'
(Mt. 15:21-28)

²⁴ Na' biza' Jesúza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inezin, per bi gok wkwashee.

²⁵ Na' to noolə, beṇ' zoa to bi' nool che' yoob' dii xiwaa, ka wṇezile' bllin Jesúza', lii wyajtje' jaček' xibe'na' lawe'na'.

²⁶ Na' noola' nake' beṇ' griego, na' golje' gana' mbani Sirofeníciana'. Na' got'yoile' Jesúza' yibeje' dii xiwaa yoo bi' nool che'na'.

²⁷ Na' goll Jesúza' le':

—Yog'zə beṇ' zigaate chwawe' xiṇe'ka'. La' bi nakan wen koyochō daa chao xiṇchoka' na' wza'chon lao bekw'ka'.

²⁸ Na' che' noola' le':

—Lekzilo'n, beṇ'do', per bekw'ka' chbe'gakb xan mesa' na' chitopgakb blaaka' chxop.

²⁹ Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

³⁰ Na' ka billin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

Biyon Jesúza' to beṇ' kwell na' bi chak inetie'

³¹ Na' biza' Jesúza' gana' mbani Tírona' na' bidie' yell Sidónna' na' billine' gana' de nisko' che Galileana', gana' mbani Decápoliza'.

³² Na' jwa'gake' lawe'na' to beṇ' kwell na' leyi bi cha'yen' inie', na' got'yogakile'ne' wṇoa neena' yichje'na'.

³³ Na' bche' Jesúza'ne' ka'lə gana' kono lle', na' bṇe' xbene'na' loo nague'na', na' bllaa xeneena' lo xbene'na', bshile'n lo lol' beena'.

³⁴ Na' blis jalawe'na' cha'lə, wkaalallee, na' golle'ne':

—jÉfata! —zejin: jByalj!

³⁵ Na' lii byaljte nague'na', na' gok bita lolleena' na' bishalje' wen.

³⁶ Na' che' Jesúza' beṇ'ka' ble'i kono ye'gake' ka'. Na' la'kzi golle' legake' ka', zizikli bzegake'n dill'.

³⁷ Na' le bibangakile', che'gake':

—Yog'lolte chak gon beeni, chiyone' beṇ'ka' bi cheni, na' beṇ'ka' bi chak ine, chone' ka chṇegake'.

8

Jesúza' bwawe' tapa mil beṇ'
(Mt. 15:32-39)

¹ Do kana', beṇ' zan inleeb bdop bllag. Na' daa bibi de yeej gaogake', wṇe Jesúza' beṇ'ka' nakgake'ne' txen chi'e legake':

² —Chiyeshid' beṇ'ki, la' ba gok shon lla zoalengake' nad' na' bibi de yeej gaogake'.

³ Na' shi yiselaa legake' bi neej naogake', xoll ichol-lall'gake' tneza', la' balgake' za'gake' zit'.

⁴ Na' beṇ'ka' nakgake'ne' txen che'gake'ne':

—¿Gatg lljxi'cho dii gao yog' beṇ'ki?, la' gani lle'cho kono zoa wit' dii gaocho.

⁵ Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

6 Na' bene' mandad kwe' beṅ'ka' lo yona', na' beṅee gallte yetxtilka', na' ka biyoll bi'e Chioza' yeḷ' choḅken, na' bxoxje'n na' bi'en beṅ'ka' nakgake'ne' txen kwenḅe ḅhishgake' ḅe ḅe beṅ'ka'.

7 Na' lekzka' noḅ'gake' zto ḅhop beḷ. Na' bi'e Chioza' yeḷ' choḅken, na' golle' beṅ'ka' nakgake'ne' txen we'gake' ḅe ḅe beṅ'ka'.

8 Na' yog'loḷgake' weej wdaogake' aḅt ka beljgakile', na' bitopgake' zi gall xet' diika' bichooṅan.

9 Beṅ'ka' weej wdao gokgake' ka tapa mil. Na' Jesúza' bisee ḷegake'

10 na' bizee biyoolene' beṅ'ka' nakgake'ne' txen loo barkwa' na' ziyajgake' gana' mbani Dalmanútana'.

Fariseoka' goklall'gake' gon Jesúza' to yeḷ' wak lawe'ka'

(Mt. 16:1-4; Lc. 12:54-56)

11 Na' bllin fariseoka' na' wzologake' chakguedlengake' Jesúza'. Na' daa goklall'gake' wchixgake'ne', wṅabgakile'ne' gone' to yeḷ' wak lawe'ka' kwenḅe gakbia' shi Chioza'kzan bseleene'.

12 Na' Jesúza' aḅt wkaalallee, golle':

—ḅBerache le' zoale naa ḅnabzle gon' to yeḷ' wak dii ile'ile'? Dii ḷi nia' le', aga bi yeḷ' wak gon' ile'ile'.

13 Na' bizee kwite'ka', na' biyo'e loo barkwa' sto shii ziyaje' shḷaa nido'na'.

Dill' wxiye' ḅe fariseoka' zaklebin levadúrana'

(Mt. 16:5-12)

14 Na' beṅ'ka' nak Jesúza' txen goḷ-lall'gake' wa'gake' yetxtil ḅe'ka', na' tlish'chga dii noa'gake' loo barkw ḅe'ka'.

15 Na' che' Jesúza' ḷegake':

—Wsak'gale bi shajle'le dill' wxiye' ḅe fariseoka' na' ḅe Heródeza', daa zaklebi levadúrana'.

16 Na' beṅ'ka' nakgake'ne' txen che' ljwellgake':

—Daa bi bi'acho yetxtilan' ne' ka'.

17 Na' gokbe'i Jesúza' dillaa choe'gake', na' golle' ḷegake':

—ḅBerache chakzile daa bi bi'ale yetxtilan' nia' ka'? ḅAbin' shajni'kzile' ni biṅ' gakbe'ile ka nak diika' chon'? ḅAbin' iyalj yichjlall'do'lenan'?

18 Zoate jalaoleka' na' bi chle'ile, na' zoate nagleka' na' bi chenile'. ḅAbi ḅhjadinile ka ben'?

19 Kana' bxoxj' gay' yetxtilka' na' wdao beṅ'ka' gaya' mil, ḅbaḷ xet' diika' bichooṅan?

Na' gollgake'ne':

—Shllin.

20 —Na' kana' bxoxj' gall yetxtilka' na' wdao beṅ'ka' tapa mil, ḅbaḷ xet' diika' bichooṅan?

Na' che'gake'ne':

—Zi gallan.

21 Na' che' Jesúza' ḷegake':

—ḅAna' ni ka' biṅ' shajni'kzile'?

Jesúza' biyone' to beṅ' ḷḅhoḷyell Betsáidana'

22 Na' bllingake' yella' le Betsaida, na' beṅ'ka' lle' yella' jwa'gake' to beṅ' ḷḅhoḷ lao Jesúza' na' got'yogakile'ne' goḅ'gache'ne'.

23 Na' beḅ' Jesúza' na' beṅ' ḷḅhoḷa' na' wleje'ne' yella'. Na' bll'e ḅeneena' jalawe'na' na' bḅoa neena' yichje'na', na' wṅabile'ne' shi ba chle'ile'.

24 Na' che' beṅ' ḷḅhoḷa':

—Chle'id' ḅonj beṅ', na' nakgake' ka yag dii chza'.

25 Na' Jesúza' beḅee jalawe'na' sto shii, na' biyakile'. Na' ble'ile' kwasloḷ yog'loḷte.

26 Na' bisel' Jesúza'ne' shḷicha lille'na', chi'ene':

—Bi lljayoo dill' yella'.

Pédrona' bi'e dill' Jesúzan' nake' Crístona'
(Mt. 16:13-20; Lc. 9:18-21)

²⁷ Na' biza'len Jesúza' beñ'ka' nakgake'ne' txen wyajgake' yellka' mbani Cesarea de Filípona'. Na' shlak ngoogake' nez, wñabile' legake', chi'e:

—¿Non na beñ' nak'?

²⁸ Na' che'gake'ne':

—Balgake' nagake' lin' dii Juanna', beena' bchoa beñ' nisa', na' zi balgake' nagake' lin' Elíaza', na' zi balgake' nagake' nako' sto beñ' wdixjee daa goll Chioza'ne' kani'yi.

²⁹ Na' chi'e legake':

—Shera le', ¿nora nale nak'?

Na' che' Pédróna':

—Lin' Crístóna', beena' ncheb Chioza' wselee.

³⁰ Na' che' Jesúza' legake' kono ye'gake' ka'.

Jesúza' cho'e dill' guete'
(Mt. 16:21-28; Lc. 9:22-27)

³¹ Na' wzolo Jesúza' bli' bsdile' legake' nan le', Beñ' Bsel' Chioza' Yell-lioni, chonan byen sak'zi'e dii xen, na' beñ' golka' chñabia' na' bñozka' chñabia' na'ch beñ'ka' chli' chsedi leya' gakzbangakile'ne', na' chonan byen witgake'ne' na' yibane' ka' gak shon lla.

³² Na' bshaljlene' legake' kwasloł daa gak che'. Na'ch wlej Pédróna'ne' ka'lə na' wzolo golle'ne' bi koo cho'e daa.

³³ Na' biyechj Jesúza' chwie' beñ'ka' nakgake'ne' txen, na' bsheshlene' Pédróna', chi'ene':
—¿Kwas ka'lə, Satanás!, la' bi chajniilo' daa cheeni Chioza' gone', san de yell-liozan chajniilo'.

³⁴ Na' wñe Jesúza' beñ'ka' nakgake'ne' txen len beñ'ka' lle' na', na' chi'e:

—Shi no cheeni gake' nad' txen, chiyał' wsanlall' kwine' na' izanile' yeł' mban che'na' yen ile'ile' bittez ni cha', na' gone' ka' chazlallaa.

³⁵ La' beena' bi chzanile' yeł' mban che'na', beenan' kwiayi', san beena' chzanile' yeł' mban che'na' ni cha' na' ni che dill' wen dill' kob cha'na', beenan' gat' to yeł' mban che' zejli kani.

³⁶ Bibi zjanayin gap beñ' yog'loł daa de yell-lioni, shi le' kwiayee.

³⁷ Na' aga zakii chixje' kwenche yisla yeł' mban che'na'.

³⁸ Nottezə beena' chido'i wchebe' nombi'e nad' wa wi'e cho'a xtillaana' lao beñ' saaxyaka' beñ'ka' bi chonlilall' nad', ka'kzə nad', Beñ' Bsel' Chioza' Yell-lioni, yiyii yido'id' le' kat' yiyedlen' anjl cha'ka' na' zinsa' balaan xen che Xa' Chioza'.

9

¹ Na' lekzka' golle' legake':

—Dii li nia' le', bal-le lle'leni, ni mbanle ile'ile ka chñabia'len Chioza' yeł' wak xen che'na'.

Jesúza' biyake' nlla'lə
(Mt. 17:1-13; Lc. 9:28-36)

² Wde xop lla, Jesúza' wyaje' to lo yaa sibə, na' bñi'e Pédróna', Jacóbona' na'ch Juanna'. Na' lawe'ka' biyake' nlla'lə.

³ Na' xe'na' axt chep cheeni'n, na' biga zoa beñ' chibe'n xtil inleeb ka' gokan.

⁴ Na' ble'gakile' Elíaza' na'ch dii Moiséza' chshaljleengake' Jesúza'.

⁵ Na' che' Pédróna' Jesúza':

—Maestro, jwen inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

⁶ Kon bi billet-lallee golle', daa chleebchgagake'.

7 Na' wze to bej bkwashaan legake', na' loo beja' wne Chioza', chi'e:

—Beenin xiinaa, na' le chakidee. Li wzenag che'.

8 Na' ka bwiagake' gana' wlle' ben'ka' shon, stoz Jesúza' ze.

9 Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Ben' Bsel' Chioza' Yell-lioni, ba bibane' ladj ben' wetka'.

10 Na' daa golle' ka', ni to kono ben' yoblə gollgake' daa ben ble'gakile', la'kzi wñabi ljwellgake', bi zejin daa golle' yibane' ladj ben' wetka'.

11 Na' wñabgakile' Jesúza', che'gake'ne':

—¿Biche naz ben'ka' chli' chsedi leya' nan zigaate Elíazan' yiyed?

12 Na' chi'e legake':

—Dii li, Elíaza' yide' zigaate yidgwee xnezi yog'lolte. ¿Abi nezile biche Cho'a Xtill' Chioza' nan Beena' Bsel' Chioza' Yell-lioni chonan byen sak'zi'chgue' na' gakzbani ben' le'?

13 Na' nia' le', ba biyed Elíaza', na' bengakile'ne' daa nazan chegake', kon ka na Cho'a Xtill' Chioza' gongake' che'.

Biyon Jesúza' to bi' yoo dii xiw'

(Mt. 17:14-21; Lc. 9:37-43)

14 Na' ka billingake' gana' lle' ben'ka' sto, ben'ka' nakgake'ne' txen, na' ble'gakile' lle' ben' zan inleeb kwite'ka', na' len bal ben'ka' chli' chsedi leya' chakguedlengake' legake'.

15 Na' ben'ka' lle' na' ka ble'gakile' Jesúza', bibangakile' na' wza'dogake' jawapgake'ne' chiox.

16 Na' chi'e legake':

—¿Bi cheyin chakguedlenile ben'ka'?

17 Na' to beena' len ladj ben'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoob' to dii xiw' na' chllonan ineb'.

18 Gattezə chdab' dii xiwaa choxa'n leb' na'ch chchoonan leb' lo yona'. Na' chbia bllin' cho'abaa, na' chaoxaxj leybaa na' chzecha kwerp che'baa. Na' ba gosh' ben'ki nako' txen yibejgake' dii xiwaa yoob', per bi chakgake'.

19 Na' che' Jesúza' legake':

—¿Le' ben' bi chajle'! ¿Zi' ka'k'tek chiya' soalen' le'? ¿Zi' ka'k'tek chiya' soid' le'? Li llxi'shkib' ni.

20 Na' jwa'gake'b' lawe'na'. Na' ka ble'i dii xiwaa Jesúza', benan ka wyazb' shona'. Na' billeeb' lo yona' na' wbix wtolb' na' wllia bllin'na' cho'abaa.

21 Na' wñabi Jesúza' xabaa, chi'e:

—¿Batrate wzolo chakb' ki?

Na' che' xabaa:

—Kana' nakteb' bi'do' chakb' ka'.

22 Na' zan shii ba bzal' dii xiwaab' lo yi'na' na' loo nisa' kwenche witan leb'. Na' shi wak yiyono'b', biyesh'lall'gachi neto' na' goklengach neto'.

23 Na' che' Jesúza':

—¿Biche nazo' shi wak'?, la' beena' chonlilall' Chioza' aga bi dii lallj gat' che'.

24 Na' besyaa xabaa, chi'e:

—Chonlilallaane'. ¿Goklen nad' gonlilall'chee!

25 Na' ka ble'i Jesúza' ba chdop chllag ben' zan inleeb, na' bsheshlene' dii xiwaa, chi'en:

—Dii xiw', lin' chono' kwenche bi cheni bi'ni ni bi chak ineb', nad' nia' li', bichej, na' bich gak yiyoo sto shii.

26 Na' besyaa dii xiwaa, na' bxizan leb' zibia' wal na' bichejan, na' gotb' ka bi' wet. Na' ben' zan wngake': "Ba witb'."

27 Na' bex' Jesúza' na'ba' kwenche bisolleeb'.

28 Na' ka biyoo Jesúza' to loo yoo, ben'ka' nakgake'ne' txen wñabgakile'ne' to lezgake', che'gake':

—¿Berache bi gok yibejnto' dii xiwaa?

²⁹ Na' chi'e legake':

—Kwenche gak yichej dii xiw' ka dga, chiyal' soale wbas' na' we'lwill-le Chioza'.

Jesúza' sto shii cho'e dill' guete'

(Mt. 17:22-23; Lc. 9:43-45)

³⁰ Na' biza'gake', na' bidegake' gana' mbani Galileana'. Na' Jesúza' bi goklallee no inezi gan zoagake'

³¹ daa chzajniile' ben'ka' nakgake'ne' txen. Na' chi'e legake':

—Nad', Ben' Bsel' Chioza' Yell-lioni, gon ben' nad' lo na' ben' malka' na' witgake' nad', na' ka gak shon lla, yiban' ladj ben' wetka'.

³² Na' bi wyajni'gakile' daa chi'e legake', na' bi biyaxjgakile' inabgakile'ne' biche che'ze' ka'.

¿Noran zak'chi?

(Mt. 18:1-5; Lc. 9:46-48)

³³ Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi cheyin chakguedzle shlak zingoocho neza'?

³⁴ Na' ni togake' bi wne, daa gokguedgake' che noyen'gaken' nak ben' zak'chi.

³⁵ Na' wche' Jesúza' na' goxe' ben'ka' shllin, chi'e legake':

—Shi nole cheenile gakle ben' zakii, chiyal' gon kwinle ka wen llin che ben'.

³⁶ Na'ch bzoe' to bi'do' ladjeka'. Na' blene'b' chi'e legake':

³⁷ —Nottezə ben' wlebe' to bi'do' ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'.

Beena' bi chakzbani cho', txenkzan nake' cho'

(Lc. 9:49-50; Mt. 10:42)

³⁸ Na' che' Juanna' le':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben' na' blonnto' gone' ka', la' bi nake' cho' txen.

³⁹ Na' che' Jesúza':

—Bi wllonle gone' ka', la' beena' chzetj lia'na' kwenche chone' yel' wak, aga wak inie' zban cha'.

⁴⁰ La' beena' bi chakzbani cho', txenkzan nake' cho'.

⁴¹ Na' nottezə beena' gone' le' la'ch' lat' nis yeejle daa nakle nad' txen, dii li nia' le', de dii si'e banez.

Diika' gon ka ibixcho lao dii mala'

(Mt. 18:6-9; Lc. 17:1-2)

⁴² 'Nottezə beena' gon ka ibix to ben' zi' chzolo chonlilallee nad', naklan wen wwal'gake' yene'na' to yaj che molinna' na' lljazal'gake'ne' loo nisdona' aga ka daa gone' ka ibix ben' lao dii mala'.

⁴³ Na' shi noona' chonan ka ibixo' lao dii mala', bchogan. Wenchlan bi de noona' tlaa yillino' kwit Chioza' aga ka daa yiyaj doxentio' lo yi' gabila' daa biga yiyol,

⁴⁴ gana' ni bzogaa bi chet ni biga chiyol yi'na'.

⁴⁵ Na' shi ni'ona' chonan ka chono' to dii mal, bchogan. Wenchlan bi de ni'ona' tlaa yillino' kwit Chioza' aga ka daa yiyaj doxentio' lo yi' gabila',

⁴⁶ gana' ni bzogaa bi chet ni biga chiyol yi'na'.

⁴⁷ Na' shi jalawo'na' chonan ka chono' to dii mal, wlejan. Wenchlan bi de jalawo'na' tlaa yillino' gana' zoa Chioza' chnabi'e aga ka daa yiyaj doxentio' lo yi' gabila',

⁴⁸ gana' bi chet bzogaa ni biga chiyol yi'na'.

⁴⁹ 'Ka yog'te diika' chzangakile' choe'gake' Chioza' chgoogake'n zed', ka'kzan yog'te ben'ka' nonlilall' nad' yen ile'gakile' yel' zak'zi'na' yell-lioni.

⁵⁰ Zedaa nakan dii wen, per shi bich nakan zxi', aga wakch yiyonchon zxi' dii yoblə kwenche wchinchon. Chiyal' soalen ljwell-le mbalaz, na' shi gonle ka', nakle ka yel' wao daa yoo zed' na' sian.

10

Bi chiyal' yilaa ben'ka' nshagna'
(Mt. 19:1-12; Lc. 16:18)

¹ Biza' Jesúza' Capernaúma' ziyaje' gana' mbani Judeana' na' lo yell-liona' daa de shlaa yao Jordánna'. Na' bizdi'a bizllag ben' zan lawe'na' na' wzoloe' chli' chsedile' legake' kon ka ba yooloe' chone'.

² Na' bal' fariseoka' wbig'gake' lawe'na', na' kwenchezə wchixgake'ne' wñabgakile'ne' shi de lsens yilaa xool ben'.

³ Na' chi'e legake':

—¿Bin bllia dii Moiséza' bia' gonle?

⁴ Na' che'gake'ne':

—Dii Moiséza' bi'e latj yichoon ben' byona' xool'na' na' wi'ene' to yish daa cho'e dill' ba bilaagake'.

⁵ Na' che' Jesúza' legake':

—Dii Moiséza' bllie' bia' gonle ka' daa nakle ben' widenag.

⁶ Per dii nech ka wxe wzil yell-lioni, Chioza' “bene' ben' byona' na'ch noola'.”

⁷ “Daan, ben' byona' wlee xaxneena' kwenche soalene' xool'na'

⁸ na' gagake' toz.” Na' bich nakgake' chop, san ba nakgake' toz.

⁹ Na' ben'ka' ba non Chioza' toz, ni to ben' yell-lio bi chiyal' yilee legake'.

¹⁰ Ka billingake' yoona' gana' zoagake', ben'ka' nakgake'ne' txen wñabgakile'ne' cheyi daa golle' ka'.

¹¹ Na' che' Jesúza' legake':

—Beena' yilee nool che'na' na' yishagnee nool yoblə, chone' ka beena' zoakzə nool che' na' chdalene' nool yoblə.

¹² Na' shi noola' yilee ben' che'na' na' yikee ben' yoblə, chone' ka beena' zoakzə ben' che' na' chdalene' ben' yoblə.

Jesúza' chonleeye' bi'do'ka'
(Mt. 19:13-15; Lc. 18:15-17)

¹³ Na' bal' ben' jwa'gake' bi'do' che'ka' lao Jesúza' kwenche wxoa neena' yichjb'ka' na' gonleeye' legakb'. Na' ben'ka' nakgake'ne' txen wzologake' chsheshlengake' ben'ka' zjwa' bi'do'ka'.

¹⁴ Na' ka ble'i Jesúza' chsheshlengake' ben'ka', bllie na' chi'e legake':

—Li we' latj yid bi'do'ki lawa'ni, bi wllonle, la' Chioza' chñabi'e loo yichjlall'do' ben'ka' nak ka legakb'.

¹⁵ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

¹⁶ Na' blene' bi'do'ka', na' bxoa neena' yichjb'ka' na' benleeye' legakb'.

To bi' wew', bi' wni'a, bshaljlem' Jesúza'
(Mt. 19:16-30; Lc. 18:18-30)

¹⁷ Ka ba chiza' Jesúza' yigwee nez, bllindo to bi' wew' bchek' xibbaa lawe'na' che'bee:

—Maestro, li' nako' ben' wen. ¿Beran chiyal' gon' kwenche gat' to yel' mban cha' zejli kani?

¹⁸ Na' che' Jesúza' leb':

—¿Berache nazo' nad' ben' wen? Toz Chioza' nake' ben' wen.

19 Ba nezkzilo' daa nllia Chioza' bia' goncho: “Bi wito' beṅ', bi soaleno' nool bi nak nool cho', bi kwano', bi chiljalloo bizə gon ino' che beṅ', ni bi siyoo, na' wdap balaan xaxnoo.”

20 Na'ch che'bee:

—Maestro, kana' naktia' bi' xkwid' chon' yog' diika'.

21 Na' bwia Jesúza' leb' kon yel' chaki, chi'e:

—Stozə daa chyallj gono': jayet' yog' dii de cho' na' be'n beṅ' yesh'ka', na' gat' to yel' shao' cho' yabana'. Na' da dino' nad'.

22 Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.

23 Na' bwia Jesúza' beṅ'ka' lle' na', na' chi'e beṅ'ka' nakgake'ne' txen:

—¿Lallj inleeb chonan che beṅ' wni'aka' we'gake' latj inabia' Chioza' legake'!

24 Na' bibani beṅ'ka' nakgake'ne' txen daa golle' ka'. Na' chizi'e legake':

—Le' xiindawaa, chonan lallj che beṅ' wni'ana' yilline' yabana' gana' chnabia' Chioza'.

25 Lobe'ch te to kamey to xan yesh' aga ka to beṅ' wni'a yilline' yabana' gana' chnabia' Chioza'.

26 Ka bengakile' golle' ka', zizikli bibangakile', na' che' ljwellgake':

—¿Notg gak yillin lao Chioza', shka'?

27 Na' bwia Jesúza' legake' chi'e:

—Ni to beṅ' yell-lío bi' gak gone' dga, per Chioza' aga bi' dii lallj che' de, la' yog' lołte chak gone'.

28 Na' Pédróna' chi'ene':

—Neto' ba wlej yichjnto' yog' loł dii napnto' kwenche nonnto' li' txen.

29 Na' che' Jesúza':

—Dii li' nia' le', nottezə beṅ' ba bzanile' no lille', no xaxnee, no beṅ' bishee, no beṅ' zane', no xiin xoole', no yell-lío che' ni cha' nad' na' ni che dill' wen dill' kob cha'na',

30 lo yell-lioni Chioza' yiyo'ene' dii zanch ka diika' wlej yichje', no lille', no beṅ' bishee, no beṅ' zane', no xiine', no yell-lío che' la'kzi chiya dii wsak'zi' beṅ' le', na' illin lla gat' to yel' mban che' zejli kaṅi.

31 Per beṅ' zan nakgake' beṅ' zakii naa, wllin lla bich bi' sak'gake', na' beṅ' zan bi' nakgake' beṅ' zakii, wllin lla gagkake' beṅ' zakii.

De wyon shii Jesúza' cho'e dill' guete'

(Mt. 20:17-19; Lc. 18:31-34)

32 Ka ziyajgake' Jerusalénna', na' zillialo Jesúza' lao beṅ'ka' nakgake'ne' txen. Na' le' chibangakile', na' beṅ'ka' zinoch le' le' chllebgake'. Na' bche' Jesúza' beṅ'ka' shllin ka'la' na' wzoloe' cho'e dill' lawe'ka' daa gak che',

33 chi'e legake':

—Ba gokbe'kzile' ba ziyajcho Jerusalénna', na' nad', Beṅ' Bsel' Chioza' Yell-lioni, gongake' nad' lo na' bxozka' chnabia' na' beṅ'ka' chli' chsedi leya', na' wchoglogake' cha' guet' na' gongake' nad' lo na' beṅ' zit'ka'.

34 Na' wtitjgakile' nad', na' wlla' xeneeka' nad', na' wit chingake' nad', na' witgake' nad'. Na' ka gak shon lla yiban' ladj beṅ' wetka'.

To dii wñab Jacóbona' len Juanna' lao Jesúza'

(Mt. 20:20-28)

35 Na' Jacóbona' len Juanna', beṅ'ka' nak xiin Zebedewa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga inabinto' li'.

36 Na' chi'e legake':

—¿Beran cheenile' gon' chele?

37 Na' che'gake'ne':

—We'gacho' latj kwe'nto' sh_laa wej kwito'na' kat' solo in_{ab}i'o gana' de balaan_n xen cho'na'.

³⁸ Na' che' Jesúza' legake':

—Aga nezile' bin ch_nable. ¿Awzoile' wti_l-le ka ye_l' zak'zi'ka' idi_l illag' na' gak chele ka gak cha'?

³⁹ Na' che'gake'ne':

—Wzointo'n.

Na' che' Jesúza' legake':

—Dii li, wti_l-le ka ye_l' zak'zi'ka' idi_l illag' na' gak chele ka gak cha'.

⁴⁰ Per daa nale kwe'le sh_laa wej kwitaa bi nak lo na' gona'n, san be_n'ka' ba mbej Chiozan', gakan chegake'.

⁴¹ Ka beni be_n'ka' zi shi, na' bllaagake' Jacóbona' na'ch Juanna'.

⁴² Na' w_ne Jesúza' legake', chi'e:

—Nezkzile be_n'ka' ch_nabia' yell-lioni na' be_n'ka' zakii chongake' byen chzenag be_n' chegake'.

⁴³ Per aga kan' chiya_l' gonle. Shi nole cheenile gake be_n' mbejlawin chiya_l' gon kwinle ka wen llin che be_n'.

⁴⁴ Na' shi nole cheenile gake be_n' zakii, chiya_l' gake ka be_n' ndoo lla yel chone' xshin be_n'.

⁴⁵ La' nad', Be_n' Bse_l' Chioza' Yell-lioni, aga bid' kwenche gaken be_n' nad', san bid' kwenche gaken be_n' na' wi'a ye_l' mban cha'na' kwenche yisla' be_n' zan lao saaxyana'.

Jesúza' biyone' be_n' lcho_la' le Bartimeo

(Mt. 20:29-34; Lc. 18:35-43)

⁴⁶ Na' bllingake' Jericóna', na' ka ba chichej Jesúza' yella' kon be_n'ka' nakgake'ne' txen na' len be_n' zanch zinogake'ne', na' chi' to be_n' lcho_l cho'a neza' cheenile' no we' le' mech, na' lie' Bartimeo, xiin to be_n' le Timeo.

⁴⁷ Na' ka benile' nan Jesús, be_n' Nazaretan', wdena', na' wzoloe' chosyee, chi'e:

—¡Jesús, xiin dia che dii Daví, biyesh'lall'gachi nad'!

⁴⁸ Na' be_n' zan bsheshlengake'ne' daa chosyee, na' zizikli chosyaache', chi'e:

—¡Xiin dia che dii Daví, biyesh'lall'gachi nad'!

⁴⁹ Na' wlez Jesúza' chi'e:

—Li inie'.

Na' w_negake'ne', che'gake':

—Btiplaloo, wzolla', ba ch_nie' li'.

⁵⁰ Na' bzalee ka'lə lechaa n_xoa kolleena' na' wzollee jsie' lao Jesúza'.

⁵¹ Na' w_nabile'ne', chi'e:

—¿Bin cheenilo' gon' cho'?

Na' che' be_n' lcho_la'ne':

—Maestro, cheenid' ile'id'.

⁵² Na' che' Jesúza'ne':

—Wak yiyajo'. Daa ba be_nlilaloo nad', ba biyakilo'.

Na' katena' lii ble'teile' na' wnoe' Jesúza'.

11

Ka billin Jesúza' Jerusalénna'

(Mt. 21:1-11; Lc. 19:28-40; Jn. 12:12-19)

¹ Ka ba zoa yillingake' Jerusalénna', na' wdegake' gaozə gana' llia yell Betfagéna' na' yell Betániana', kwit Yaa Olívoza', na' Jesúza' bselee chop be_n'ka' nakgake'ne' txen,

² chi'e legake':

—Li shaj yella' daa llia gaozə, na' ka illinle na', ile'ile to burr chbando', ba konon' kwia, da'b yaga'. Na' wsell-leb wche'leb nilə.

³ Na' shi no inaz le': “¿Berache chsellzleb?”, na' ye'lene': “Xanchonan' chyalljile'b xtit, na' yiyontie'b.”

⁴ Na'ch wyaj ben'ka' bselee, na' ble'gakile' to burr da'b to cho'a yoo gana' chde neza', na' bsellgake'b.

⁵ Na' ben'ka' lle' na' wñabgakile' legake':

—¿Bin chonle? ¿Biçe chsellzleb?

⁶ Na' gollgake' legake' daa goll Jesúza', na' be'gake' latj bche'gake'b.

⁷ Na' bxoagake' xe'ka' koll' burra' na' jasangake'b lao Jesúza', na' wllie'b.

⁸ Na' ben' zan bshiljgake' xe'ka' tneza', na' zi bałe' bchoggake' no zin na' wdixjgake'n tneza'.

⁹ Na' ka ben'ka' llialo lao Jesúza' ka ben'ka' nogake'ne', chosyaagake', nagake':

—¿Li we'la'o Chioza'! ¿Gonleeyshga Xancho Chioza' beeni ba bselee!

¹⁰ ¿Gonleeyshga Xancho Chioza' yel' wñabia' che beeni zee lo dia che dii xozxto'cho Davina'! ¿Li da we'la'ocho Chioza' zoa yabana'!

¹¹ Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll bwie' doxenten na' ziyaje' Betániana' len ben'ka' shllin, daa ba wlle'.

Bllaa Jesúza' daa bibi dii zix llia yag yixwewa'

(Mt. 21:18-19)

¹² Na' betiyo ka biza'gake' Betániana', wdon Jesúza'.

¹³ Na' zit'lə ble'ile to yag yixwew llia xlaguinna', na' jawie' shi lekzka' llian yixwewa'. Na' ka blline' zeelo xlaguinna' llia, la' aga tiemp che yixwew kana'. ¹⁴ Na'ch golle' yaga':

—¿Batch kwio' dii gao ben'!

Na' beni ben'ka' nakgake'ne' txen ka golle'n.

Jesúza' bisheshe' ben'ka' chit' chde lesh' chyoodo'na'

(Mt. 21:12-17; Lc. 19:45-48; Jn. 2:13-22)

¹⁵ Na' ka billingake' Jerusalénna', Jesúza' wyo'e lesh' chyoodo'na' na' wzoloe' bishesh bicheene' ben'ka' chit' chde na' ben'ka' cha'o chzi'. Na' bishi'e mes che ben'ka' chshaa mecha' na' bzoles bzolline' gana' chi' ben'ka' chit'gake' palomka'.

¹⁶ Na' bi bi'e latj no sho'lench dii wit' wdie' lesh' chyoodo'na'.

¹⁷ Na' wzoloe' chli' chsedile' ben'ka' lle' na', chi'e:

—Cho'a Xtill' Chioza' nan: “Lilla'na' nakan ga choe'lwill yog'te ben' lle' doxen lo yell-lioni nad'”, per le', ba nonzlen ka to ga chdop chllag wban.

¹⁸ Na' ka beni bxoзка' chñabia' na' ben'ka' chli' chsedi leya' ka wne', wzologake' wdiljlall'gake' nak gongake' witgake'ne', daa le chllebgake'ne', la' yog' ben' chibangakile' ka chli' chsedile' legake'.

¹⁹ Na' ka gol, biza'len Jesúza' ben'ka' nakgake'ne' txen Jerusalénna'.

Wbill yag yixwewa'

(Mt. 21:20-22)

²⁰ Na' betiyo shzila' ka wdegake' gana' zoa yag yixwewa', ble'gakile' ba wbill ax̄t loinna'.

²¹ Na' jadini Pédróna' daa goll Jesúza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

²² Na' che' Jesúza' legake':

—Li gonlilall' Chioza'.

²³ Dii li nia' le, nottezə beena' yee yaani: “Bkwas ka'lə na' jsoa loo niso'na'”, na' bi gonchoplallee, san shajli'e, na' gak ka ine'.

²⁴ Daan nia' le', bittezə inable kat' we'lwill-le Chioza', li shajle' ba nakkzan gone'n, na' ikaalen.

²⁵ Na' kat'ka' choe'lwill-le Chioza', li si'xen che bish' ljwell-lena' shi bi chone' chele kwenche Xalena' beena' zoa yabana' si'xene' saaxya cheleka'.

²⁶ La' shi le' bi si'xen che ljwell-le, lekzka' Xalena', beena' zoa yabana', bi si'xene' saaxya cheleka'.

Yel' wnabia' che Jesúsza'

(Mt. 21:23-27; Lc. 20:1-8)

²⁷ Na' billingake' Jerusalenna' sto shii, na' shlak chda Jesúsza' lesh' chyoodo'na', wbig' bxoza' chnabia', len ben'ka' chli' chsedi leya' na' ben' golka' chnabia',

²⁸ na' che'gake'ne':

—Wnashki neto', ¿nora lsens cheyi chono' diiki? ¿No ben' li' yel' wnabia'na' kwenche chono' diiki?

²⁹ Na' che' Jesúsza' legake':

—Lekzka' nad', de to dii inabid' le'. Na' shi le' inale nad' daa inabid' le', na' inia' le' no lsens cheyin chon' yog' diiki.

³⁰ ¿Noran bsel' Juanna' kwenche bidchoe' ben' nisa'? ¿AChiozan' bseleene', anti ben' yell-liona'zan? Li inashki nad'.

³¹ Na'ch choe'len ljwellgake' dill', che'gake':

—Shi ye'chone' Chioza' bseleene', lobe' ine' cho': “¿Berache ki wyajle'le che', lla?”

³² Na' bite gak yize'chone' nozə beñaan bseleene'.

Bi biyaxjgakile' ye'gake'ne' ka' daa bllebgake' ben' yellka', la' yog'zgake' yoo yichjgake' Juanna' goke' to ben' wdixjee daa goll Chioza'ne'.

³³ Na' gollgake' Jesúsza':

—Bi nezinto'.

Na' che' Jesúsza' legake':

—Lekzka' nad', bi inia' le' no ben' nad' yel' wnabia'na' chon' diiki.

12

Jempl che wen llinka' ben'ka' nak ben' mal

(Mt. 21:33-46; Lc. 20:9-19)

¹ Na' wzolo Jesúsza' bseesile' legake' to jempl, chi'e:

—To ben' biyaze' yag uva. Na' wlo'en leeja', na' beshawee gana' wsigake' uvaka', na' bene' to yoo sibə, gana' kwia beena' gap wwie'n.

'Na'tech bene'n lo na' to chop ben' na' wzee zeje' zit'. ² Na' ka bllin lla yishibgake' uvaka', bselee to wen llin che'na' lao ben'ka' chap yag uvaka' kwenche lljaxi'e daa chidolee.

³ Per ben'ka' bex'gake' wen llin che'na', na' bet wdingake'ne' na' bilaggake'ne' to ka che'.

⁴ Na' xan yag uvaka' bselee sto wen llin che' lawe'ka', na' blaagake' yichje'na', na' chiya dii bengakile'ne'.

⁵ Na'ch bselee stoe', na' betgake'ne'. Na'tech bselee zanch ben' yoblə; na' balgake' bengakile' zibia', na' zi balgake' betgake'.

⁶ 'Na' ni chgaan bi'na' nakyen' xiine', bi'na' le chakile'. Na' bseleeb', la' gokile': “Wapgake' balaan bi' cha'ni.”

⁷ Na' ben'ka' nak lo na'gake' yag uvaka' che' ljwellgake': “Bi'nin gaki cheb' dga chapcho. Li da witchob', na' gakin checho.”

⁸ Na' bex'gake'b' na'ch betgake'b' na' bibejgake' kwerp chebaa gana' lle' yag uvaka'.

⁹ Na' wnabi Jesúsza' legake':

—¿Beraka chakile gon xan yag uvaka'? De de shaje' na' lljete' ben'ka' na' yiyone' yell-lio che'na' gana' lle' yag uvaka' lo na' ben' yoblə.

¹⁰ ¿Abigan' wlable Cho'a Xtill' Chioza?', gana' na:
Yaja' daa bi wyoolall' wen yooka',
leyen'lannan' yaja' daa ba nchejcha yooná'.

¹¹ Dgan ben Xancho Chioza' na' nakan to dii yibanicho.

¹² Na'ch goklall'gake' gox'gake' Jesúza' daa gokbe'gakile' bchine' jempla' daa bi chajle'gake' che'. Per daa chllebgake' ben'ka' ndop nllag, biza'gake' bibi bengakile'ne'.

Janabgakile' Jesúza' shi chiyal' chixjgake' daa chñab ben' Rómaka'

(Mt. 22:15-22; Lc. 20:20-26)

¹³ Na' bsel'gake' lao Jesúza' bal' fariseoka' na' zi bal' ben'ka' nak Heródeza' txen, kwencheza kweyjelgakile'ne' na' lljadaogake' xya che'.

¹⁴ Na' wyajgake' lawe'na', che'gake'ne':

—Maestro, nezinto' dillaa choo nakan dii li. Na' biga chshoo cho'a xtilloona' lao nottez ben', la' bi chwio' shi no nakgake'. San chli'o nez li che Chioza' kon ka nakan. Wnashki neto': ¿Achiyal' chixjcho daa chñab beena' chñabia' Rómána', anti bi chiyal' chixjchon?

¹⁵ Na' gokbe'i Jesúza' aga do lall'gake'n che'gake'ne' ka', na'ch chi'e legake':

—¿Berache chyiljall'zle wchixle nad'? Li gonshki ni to mech kwenche ile'ida'n.

¹⁶ Na' be'gake'ne'n, na' che' Jesúza' legake':

—¿Nora cho'alawin na' no lein da' lee mechí?

Na' che'gake'ne':

—Che beena' chñabia' Rómanan'.

¹⁷ Na' che' Jesúza' legake':

—Na'len li we' beena' chñabia' Rómána' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

Wnabgakile' Jesúza' nak gak kat' yiban ben' wetka'

(Mt. 22:23-33; Lc. 20:27-40)

¹⁸ Na' wyaj bal' saduceoka' lao Jesúza'. Na' daa nagake' bich yiban ben' wetka', wnabgakile'ne' dga:

¹⁹ —Maestro, ley daa bzej dii Moiséza' nan shi to ben' byo guete' na' yigaan xoolena' wizeb na' kono xiingake' wzoa, ben' bisheena' chiyal' yikee nool wizeba' kwenche soa xiin dia che dii ben' bisheena'.

²⁰ Na' to shii wzoa gall bish' ben'. Na' ben' necha' bshagnee, na' wite' na' kono xiine' wzoa.

²¹ Na' ben' wchopina' bikee noola', na' lekzka' wite' na' kono xiine' wzoa. Na' ka'kza' gok che ben' wyonina'.

²² Na' gall bish'te ben'ki wzoalengake' noola' na' kono xiingake' wzoa. Na' ka' wde wit yog'lolgake', lekzka' wit noola'.

²³ Na' kat' yiban ben' wetka', ¿norayen'en' gak ben' che noola', lla? la' gall bish'tegaken' wkaagake'ne'.

²⁴ Na' che' Jesúza' legake':

—Naklejjilen, daa bi nombia'le Cho'a Xtill' Chioza' ni yel' wak che'na'.

²⁵ Kat'ka' yiban ben' wetka', koch no ikaa ljwellin, ni koch no wit' wde xiinin, san yiyakgake' ka anjlka' lle' yabana'.

²⁶ Na' ka' nak daa yiban ben' wetka', ¿abin' wlable daa bzej dii Moiséza' gana' cho'en dill' che yagdo'na' chal', na' goll Chioza' dii Moiséza': “Nadaan Chios che Abrahama', Isaaca', na'ch Jacoba'”?

²⁷ Na' bi nake' Chios che ben' wet, san nake' Chios che ben' ban. Dii xen inlleb naklejjile.

Daa llialloch lao diika' bllia Chioza' bia' goncho

(Mt. 22:34-40)

²⁸ Na' beni to beṇ' chli' chsedi leya' ka golle' legake'. Na' daa gokbe'ile' le wen billi'e xtilleeka', na' wṇabile'ne':

—¿Beran lliälote nllia leya' bia' goncho?

²⁹ Na' che' Jesúza'ne':

—Daa lliälote lao diika' nllia Chioza' bia' goncho, len daa na: “Li wzenag, le' beṇ' Israel, Xancho Chioza' zeelo nake' Chios.

³⁰ Goki Xano' Chioza' do yichj do lalloo, axt ga zeelo chajniilo', na' do ka nak fuerz cho'na'.”

³¹ Na' de wchopina' nakan ka dii necha': “Chiya! gakilo' bish' ljwello'na' ka chaki kwino'.” Bich de dii zak'chi ka diiki.

³² Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'.

³³ Na' daa gakicho Chioza' do yichj do lall'cho, na' axt ga zeelo chajniicho, na' do ka nak fuerz chechona', na' gaki bish' ljwellchona' ka chaki kwincho, zak'chan aga ka yog'lotte bayix'ka' chitgake' na' chzeygake'b lao Chioza'.

³⁴ Na' ka gokbe'i Jesúza' kayeṇ'nan billii beena' xtilleena', na' chi'ene':

—Zi lat'zə chyalljilo' kwenche inabia' Chioza' yichjlall'do'na'.

Na' koch no biyaxji inabchile'ne'.

Crístona' nake' xiin dia che dii rey Davina'

(Mt. 22:41-46; Lc. 20:41-44)

³⁵ Na' shlak chli' chsedi Jesúza' beṇ'ka' lesh' chyoodo'na', na' chi'e legake':

—¿Berache nazə beṇ'ka' chli' chsedi leya' nan Crístona', beena' ba mbej Chioza' inabi'e, nake' xiin dia che dii Davina'?

³⁶ La' kwin dii Davina' bi'e dill' daa goll Espíritu che Chioza'ne', kana' wne':

Xancho Chioza' golle' Xan'na':

“Wche' kwit' de shlini,

shlak wzoa' xni'ona' beṇ'ka' chakzbani li'.”

³⁷ Len kwin dii Davinan' golle' Crístona': Xan', ¿berache nazgake' Crístona' nake' xiin dia che dii Davina'?

Na' beṇ' zanka' ndop nllag bibagakile' xtilleena'.

Jesúza' chawe' xya che beṇ'ka' chli' chsedi leya'

(Mt. 23:1-36; Lc. 11:37-54; 20:45-47)

³⁸ Na' ka chli' chsedi Jesúza' beṇ'ka', chi'e legake':

—Wsak'gale bi gonle ka beṇ'ka' chli' chsedi leya'. Le chibagakile' gon xe'ka' dii ton, na' cheengakile' yog'zə beṇ' gapgake' legake' balaan ladj lkwe' beṇ'.

³⁹ Na' gana' chdop chllagcho choe'lwillcho Chioza' le chibagakile' kwe'gake' gana' chbe' beṇ'ka' zakii, na' ka'kzə chongake' ga de yel' wao.

⁴⁰ Na' lekzka' chkaatezgake' lill nool wizebka', na' kwenche ina beṇ' le shlichə zej beṇ'ki lao Chioza', chongake' ka choe'lwill Chioza' ssha nleb. Na' daa chongake' ka', ba naktēn ile'chgakile' yel' zi' walch.

Daa bzani to nool wizeb, bi'en Chioza'

(Lc. 21:1-4)

⁴¹ To shii chi' Jesúza' gaozə gana' chgoogake' mech che yoodo'na' na' chwie' beṇ'ka' chgoogake' mecha'. Na' beṇ' zan beṇ' wni'aka' wloogake' mech xen.

⁴² Na' bllin to nool wizeb, beṇ' yesh', wlo'e chop sintabdo'.

⁴³ Na' wne Jesúza' beṇ'ka' nakgake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te beṇ'ka' wloo mech xench.

⁴⁴ La' yog'gake' daa chichoonzannan' be'gake', san le', naktie' nool yesh', ba wlo'e doxen daa nape' la'kzi chyalljile'n.

13

Jesúza' bi'e dill' wllin lla kwiaiyi' yoodo'na'

(Mt. 24:1-2; Lc. 21:5-6)

¹ Ka chichej Jesúza' lesh' chyoodo'na', to beñ'ka' nakgake'ne' txen chi'ene':

—Maestro, bwiakachi ka xochi nak yajki na' yooki.

² Na' che' Jesúza' le':

—Ka nak yooki chwiale ñaa, wllin lla kwiaiyi' yogaan na' ni sto yaj bich kwia koll' ljwellin.

Diika' gak kat' ba zoa te che yell-lioni

(Mt. 24:3-28; Lc. 21:7-24; 17:22-24)

³ Na' ziyajgake' lo Yaa Olívoza' gana' nla' yoodo'na'. Na' shlak chi' Jesúza' na', Pédrona', Jacóbona', Juanna', na'ch Andréza' wñabgakile'ne' to lezgake':

⁴ —Cheeninto' ino' neto' batran gak daa ba wno'. ¿Bera ka ile'into' gak kwenche inezinto' nan ba zoa gaoshosh gakan?

⁵ Na' che' Jesúza' legake':

—Bi we'le latj no siye' le'.

⁶ La' beñ' zan ichej na' inazgake': “Nadaan Crístona”, na' beñ' zan shajle'.

⁷ Na' ka yenile chak wdil to ni to na', bi illeble. La' chonan byen gaggakan, per aga ba bllin lla te che yell-lionin.

⁸ La' yidil-len ljwell yellka' na' beñ' wñabia'ka' yidil-len ljwellgake'. Na' zan latj gak bedxo', na' gat' wbin, na' kwe' wdil wishesh. Kat' ba chak diiki shinz chzolo ka nak daa yen ile'i beñ' yell-liokin.

⁹ Wsak'gale, la' gongake' le' lall' na' beñ'ka' chñabia' cho' beñ' Israel, na' wit chingake' le' gana' chdop chllagcho choe'ljwillcho Chioza'. Na' daa nakle nad' txen, lljwa'gake' le' lao beñ' wñabia' xenka' na' lao nochlā beñ'ka' chñabia', na' ka' gak we'le xtillaana' lawe'ka'.

¹⁰ Na' ka zi' te che yell-lioni, chiyal' illilj dill' wen dill' kob cha'na' doxen yell-lioni.

¹¹ Na' kat' ba zjwa'gake' le' lao beñ'ka' chñabia', bi sele wñeyi bin ye'le legake', san daa wzajni Chioza' len' inele, la' aga tobia'lall'zlen inele, san Espíritu Sántonan' inē.

¹² Beena' zoa beñ' bish' golje', leteze' gone'ne' lo na' beñ'ka' witgake'ne', na' beena' zoa xiine', leteze' gone' xiine'na lo na' beñ'ka' witgake'ne', na' bal' beñ', xiine'ka'teza gongake' xaxneeka' lo na' beñ'ka' witgake' legake'.

¹³ Na' yog'za beñ' gakzbangakile' le' daa nonlilall'le nad'. Per beena' so saki bittez dii yen ile'ile' axt ka yiyoll diika' yen ile'ile', beenan' gat' to yel' mban che' zejli kanī.

¹⁴ Na' kat' ile'ile' ba zoa daa nak dii zban inlebb latja' gana' bi chiyal' soan, na'ch beñ'ka' lle' Judeana' chiyal' wxonjgake' shajgake' lo yaaka'lā. (Le' chlable dga, li shajniin.)

¹⁵ Na' beena' lia koll' lille'na' ni bi gal' yiyetje' lljaleje' dii de loo lille'na'.

¹⁶ Na' beena' chda lyixaa, ni bich gal' yiyaje' lille'na' kwenche lljadoyoe' xe'na'.

¹⁷ ¡Nyesh'laz gak che noolka' noa' na' noolka' chwall' chxop llana' gak ka'!

¹⁸ Li inabi Chioza' bi gak dga kat'ka' chbe' dii zaga',

¹⁹ La' yel' zak'zi' wal inlebban nak daa yen ile'ile', daa konon' yen ile'kzi dezd ka bxe bsil Chioza' yell-lioni axt ñaa, na' kat' ba wde gokan kochno yen ile'i ka len.

²⁰ Na' shi Xancho Chioza' bi wzeshee llaka' gak ka', kono yila shel'ka'. Per wzesheen daa chakile' beñ'ka' ba wleje' nakgake' lall' nee.

²¹ Na' kat' gak diika', shi no ina le': “Li wwia, ni ze Crístona”, wa inē', “Li wwia, na' zie”, bi shajle'le.

²² La' wchej beñ' siye'gake' inazgake': “Nadaan Crístona”, na' beñ' chonz ka chyixjee daa che' Chioza'ne', na' wli'gake' no yel' wak kwenche siye'gake' beñ', axt shel' wxegakile' siye'gake' beñ'ka' ba wlej Chioza' nakgake' lo nee.

²³ Wsak'gale. Ba bzenid' le' ka nak yog' diiki zi' gak.

*Kat' yiyed Crístona' dii yoblə**(Mt. 24:29-35, 42-44; Lc. 21:25-36)*

²⁴ 'Na' kat' ba biyoll wde yel' zak'zi'ka', lii yicholte lao wbilla' na' beo'do'na' bich wzeeni'n.

²⁵ Na' beljdo'ka' ixopgakan na' yog' diika' lliā xan yabana' inibgakan.

²⁶ Na' ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak choo yel' wak xen cha'na' na' balaan cha'na'.

²⁷ Na' wselaa anjl cha'ka' tap laate yell-lioni ax̄t gana' zeelo chiyollan kwenche yitop-gake' ben'ka' nak lall' na'.

²⁸ 'Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'.

²⁹ Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni.

³⁰ Dii li nia' le', aga ba wit ben'ki zoa naa kat' gak yog' diiki.

³¹ Yabana' na' yell-lioni te chegakin, san cho'a xtillaana' aga wde bi gak ka nan.

³² 'Na' kono nezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' nezile'n.

³³ 'Li wsak', na' li se kwas, na' li we'lwill Chioza', la' bi nezile bat illin lla gakan.

³⁴ Nakan ka ben to ben' ba zoa see shaje' to yell zit', na' golle' ben'ka' chon xshine'na' gapgake' lille'na'. Na' to togake' bene' lall' na'gake' daa gongake', na' golle' beena' chap cho'a leej che'na' bi guetlalleen.

³⁵ Li se kwas, la' bi nezile bat yila' xan yoona'; shi yilee chaldo'zə, wa yilee chel, wa kat' chbell tezka', wa yilee cheeni'lesdo'.

³⁶ Shi tokonganə yilee na' yidolile' le' bich ze kwasle.

³⁷ Dga nia' le', lekzka' yog'lol beñaan chep' ka', li se kwas.

14*Wloogake' xnezin gox'gake' Jesúza'**(Mt. 26:1-5; Lc. 22:1-2; Jn. 11:45-53)*

¹ Chyallj zi chop llazə gal' lni Paskwa', kana' chaogake' yetxtila' bi yoo lewadúrana', na' b̄oxzka' ch̄nabia' na' ben'ka' chli' chsedi leya' biyiljlall'gake' naklə siye'gake' Jesúza' kwenche gox'gake'ne' na' witgake'ne'.

² Na' che' ljwellgake':

—Bi gox'chone' lo l̄ina' kwenche bi wsees w̄cheencho ben' yell.

*Bwazj to noolə set zixə' yichj Jesúza'**(Mt. 26:6-13; Jn. 12:1-8)*

³ Ka zoa Jesúza' Betániana', wyaje' lill beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoollan set zix̄ de nardo na' dii xen zakaan. Na' wdishje' yen lmeta' na' bwazje' set zixə' yichj Jesúza'.

⁴ Na' bal ben'ka' lle' na' bllaagake', na' che' ljwellgake':

—¿Berache benditjz nooli set zixə'?

⁵ Shel' bet'chokle'n na' bi'e mecha' ben' yesh'ka', la' zakaan che shon guiyoa lla che laxj ben'.

Na' bsheshlengake' noola' daa bene' ka'.

⁶ Na' che' Jesúza':

—Bibi ye'lene'. ¿Berache chsheshlenzlene'? Daa ba bene' cha' nakan dii wen.

⁷ Ka nak ben' yesh'ka', toshiizi soagake' ladjlena', na' wak gaklenle legake' kat'ka' cheenile'; san nad', aga toshiizin soalen' le'.

⁸ Ka nak nooli ba bene' daa zeelo gok bene'. Ba bwazje' nad' set zixə' kwenche gakshao'zega kwerp cha'ni kat' wkwash'gake' nad'.

⁹ Dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

Juda' chchebe' gone' Jesúza' lo na' beñ' malka'

(Mt. 26:14-16; Lc. 22:3-6)

¹⁰ Na' Jud Scariota', beena' nake' txen beñ'ka' shllin, wyaje' lao bꝑozka' chñabia' kwenche gone' Jesúza' lo na'gake'.

¹¹ Na' ka golle' ka', bibagakile' na' bchebgake' we'gake'ne' mech. Na' wzolo Juda' chinoe' nakan gone' kwenche gone' Jesúza' lo na'gake'.

Lle'na' zeelo wdaolengake' Jesúza'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' lla nech che lnina' kat' chaogake' yetxtila' daa bi nchixə lewadúrana', llana' chitgake' xil'do'na' chaogake' lni Paskwa', beñ'ka' nak Jesúza' txen wñabgakile'ne':

—¿Ga cheenilo' lljasini'anto' xshe' che lni Paskwi?

¹³ Na' bselee chopgake', chi'e legake':

—Li shaj yell Jerusalénna' na' yillagle to beñ' byo zino'e to chee nis, na' lljanólene'.

¹⁴ Na' gana' yiyo'e, li yee xan yoona': "Maestrona' ne': ¿Garan zoa yoona' gana' gaolene' beñ'ka' nakgake'ne' txen lle' lni Paskwi?"

¹⁵ Na' wliile' le' to yoo xen dii llia shkwia cha'lə ga ba nonshao'tie'. Na' nan' wsini'ale daa gaochi xshe'na'.

¹⁶ Na' wza' beñ'ka' bselee, wyajgake' yella'. Na' gok kon kayen' golle' legake'. Na' bsini'agake' daa gaogake' lle' lni Paskwa'.

¹⁷ Na' ka gol billinlen Jesúza' beñ'ka' shllin yoona'.

¹⁸ Na' shlak chigake' cho'a mesa' chaogake', goll Jesúza' legake':

—Dii li nia' le', tole chi'le ni chaolenle nad' gonle nad' lo na' beñ'ka' chakzi' chakzbani nad'.

¹⁹ Na' gokyesh'gakile', na' wzolo to togake' chñabgakile'ne':

—¿Anadaan gon' ka', lla?

²⁰ Na' che' Jesúza' legake':

—Ladjleni, ka le' nakle shllin chleejenle nad' yetxtila' loo yeeni, len beena' gon ka'.

²¹ Ka nak nad', Beñ' Bsel' Chioza' Yell-lioni, wit beñ' nad' ka na Cho'a Xtill' Chioza'. Per nyesh'laz gak che beena' gone' nad' lo na' beñ'ka'. Naklan wen shel'ka' bi golje'.

²² Na' shlak chaogake', beñ' Jesúza' yetxtila' na' bi'e Chioza' yel' choxken, na' bꝑoxje'n na' bi'en legake', chi'e:

—Li gao dga. Lennan' kwerp cha'ni.

²³ Na' bexee kopa', na' bi'e Chioza' yel' choxken na' bdie'n lawe'ka' na' yog'lolgake' weejgake' daa yollan.

²⁴ Na' chi'e legake':

—Lennan' xchen'na' daa gon ka gak li dii koba' bcheb Chioza' gone'. Na' laljan kwenche gaklenan beñ' zan.

²⁵ Dii li nia' le', bichga yeej' xis uvana' axt ki illin lla yeeja'n gana' chñabia' Chioza'.

Jesúza' golle' bi wcheb Pédrone' shi nombi'ene'

(Mt. 26:30-35; Lc. 22:31-34; Jn. 13:36-38)

²⁶ Na' ka biyoll belgake' be'la'ogake' Chioza', na'ch wyajgake' lo Yaa Olívoza'.

²⁷ Na' che' Jesúza' legake':

—Yog'le le' kwey yichje nad'. La' Cho'a Xtill' Chioza' nan: "Wit' beena' chap xil'ka', na' guesles xil'ka' chape'."

²⁸ Per kat' ba biban' ladj beñ' wetka', na' yiyaa Galileana' lljalez' le'.

²⁹ Na' che' Pédrone'ne':

—La'kzi yog' beñ'ki choonlall'gake' li', nad' bi gon' ka'.

³⁰ Na' che' Jesúza'ne':

—Dii li nia' li', ñaanyel ka zi' kwell teza' de wchop shii, shon shii wi'o dill' nan bi nombi'o nad'.

³¹ Na' zeyid Pédróna' chi'ene':

—La' guetlencia' li', biga inia' bi nombi'a li'.

Na' yog'zgake' che'gake'ne' ka'.

Be'lwill Jesúza' Chioza' gana' le Getsemaní

(Mt. 26:36-46; Lc. 22:39-46)

³² Na' wyajgake' to latj gana' le Getsemaní, na' che' Jesúza' ben'ka' nakgake'ne' txen:

—Nizə li kwe' shlak llje'lwill' Chioza'.

³³ Na' bchi'e Pédróna', Jacóbona', na'ch Juanna', na' wzoloe' chakyeshile' na'ch chakch-gaile' dii wal inleeb.

³⁴ Na' chi'e legake':

—Axt chaklikazid' lii guettia' daa le chakyeshii yichjlall'dawaani. Li igaan nizə na' bi guesle.

³⁵ Na' wzee zi lat' kwite'ka', na' bchek' xibe'na' lo yona' na' be'lwille' Chioza' chi'ene' shi wak ten ka'zə daa wtile'.

³⁶ Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil illag'. Per aga gak ka cheenid', san gak ka cheenilo' li'.

³⁷ Na' biyaje' gana' lle'gake' na' ble'ile' ba chesgake'. Na' chi'e Pédróna':

—Simón, ¿Aba cheson'? ¿Abikzə bchejlat'gailo' la'ch' tgor bi gueso'?

³⁸ Bi guesle, li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'chona' gonchon per beli chenna' bi chizoin.

³⁹ Na' wyaje' sto shii jelwille' Chioza', na' toz ka golle'ne'.

⁴⁰ Na' ka billine' gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billelgakile' ye'gake'ne'.

⁴¹ Na' ka billine' de wyon shii, chi'e legake':

—¿Ani cheskzle? Ba gok. Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'.

⁴² Li chas. Li sho'. Ba za' beena' gone' nad' lo na'gake'.

Bex'gake' Jesúza'

(Mt. 26:47-56; Lc. 22:47-53; Jn. 18:2-11)

⁴³ Ni choe'te Jesúza' dill' ka bllin Juda', beena' wlen ben'ka' shllin, lene' ben' zan ben'ka' bsel' bxozka' chñabia' len ben'ka' chli' chsedi leya' na'ch ben' golka' chñabia', nox'gake' spad, na' no yag.

⁴⁴ Na' Juda', beena' bene'ne' lo na' ben'ka', ba be'le' dill', chi'e:

—Beena' wnop', len' gox'le, na' wche'lene'.

⁴⁵ Na' ka bllingake', jabiguae lao Jesúza' na' chi'ene':

—¡Maestro!

Na'ch bnope'ne'.

⁴⁶ Na' lii bex'tegake' Jesúza' bche'gake'ne'.

⁴⁷ Na' to beena' len na' wleje' spad che'na' bchogue' shlaa nag xmos bxoz choo bxoz xenna'.

⁴⁸ Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no ben' wban?

⁴⁹ Yog' lla wzoa' ladjlena' bli' bsedid' loo yoodo'na', na' biga bex'le nad'. Per chonan byen gak ka na Cho'a Xtill' Chioza'.

⁵⁰ Na' yog'lol ben'ka' ben Jesúza' txen wchoonlall'gake'ne' na' bxonjgake'.

Bi' xkwidaa bixonj

⁵¹ Na' to bi' xkwid' nob' le' ndobb' to lech'. Na' ka bex'gake'b'

⁵² bsam' lechaa ndobb' na' bxonjb' gal'yidzb'.

Bdegake' Jesúza' lao ben'ka' chnabia' ben' Israelka'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Na' jwa'gake' Jesúza' lao bxōz choo bxōz xenna', na' bdi'a yog'lol̄ bxōzka' chnabia' na' ben' golka' chnabia' na'ch ben'ka' chli' chsedi leya'.

⁵⁴ Na' zit' zit'lə̄ jano Pédrona'ne' bllintie' lesh' lill bxōz choo bxōz xenna'. Na' wche'lene' ben'ka' chap yoodo'na' chbillgake' cho'a yi'na'.

⁵⁵ Na' bxōzka' chnabia' na' yog'lol̄ ben'ka' chnabia' ben' Israelka' lle' na' chiyiljyollgake' ga si' sengake' kwenche wchoglogake' che Jesúza' guete', per bi bllel dii gao xya che'.

⁵⁶ La'kzi ben' zan chiya de wxiye' che'gake' che', bi bidili cho'a dillaa choe'gake'.

⁵⁷ Balgake' wzolla'gake' chziye'gake' na' chaogake' xya che', che'gake':

⁵⁸ —Neto' ba beninto' ne': “Nad' wchinj yoodo'ni dga ben ben' yell-lioki. Na' ka gak shon̄ lla yilis' ston na' aga ben' yell-lionichan gone'n.”

⁵⁹ Na' la'kzi wxiye'gake', bi bidili cho'a xtilleeka'.

⁶⁰ Na' bxōz choo bxōz xenna' wzollee ladj ben'ka' na' chi'e Jesúza':

—¿Abikz bi ino' cheyi dga na ben'ki cho'?

⁶¹ Na' Jesúza' wzie' lliz bibi gollkze'. Na' bxōz choo bxōz xenna' chizi'ene':

—¿Alin' Crístona', Xiin̄ Chioza'?

⁶² Na' che' Jesúza'ne':

—Awe, nadaan. Na' ile'ile nad', Ben' Bsel' Chioza' Yell-lioni, chi'a de shli che Chioza', ben' yel' wak choo ben' yel' wak xenna', na' lekzka' ile'ile' zizaa ladj bejka' ze xan yabana'.

⁶³ Na' bxōz choo bxōz xenna' bsho' bchez' xe'na' kwenche chli'n nan le chllee. Na' chi'e: —Bich chyalljicho ben' gawe' xya che beeni.

⁶⁴ Kwinle ba benile ka chnie' che Chioza'. ¿Nakra gonchon?

Na' yog'lol̄gake' bchoglogake' che' nan chiyal' guete'.

⁶⁵ Na' balgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' ben'ka' chap yoodo'na' wdap'gake' xague'na'.

Bi bcheb Pédrona' shi nombi'e Jesúza'

(Mt. 26:69-75; Lc. 22:56-62; Jn. 18:15-18, 25-27)

⁶⁶ Na' Pédrona' zie' lesh' chyoonā' de lli'lə̄ ka bllin to noolə̄, ben' nak xmos bxōz choo bxōz xenna'.

⁶⁷ Na' ka ble'ile' Pédrona' chbille' cho'a yi'na', na' wzie' chwie'ne' chi'e:

—Lenon' nako' txen Jesús, ben' Nazareta'.

⁶⁸ Na' bi bcheb Pédrona', san chi'e:

—Bi nombi'a beena', ni bi nezid' bi dillaan choo.

Na' bicheje' na' jazie' cho'a leeja'. Na' wchell to tez.

⁶⁹ Na' ble'i noola'ne' sto shii, na' golle' ben'ka' sto:

—Beenin lene' ben'ka' nak Jesúza' txen.

⁷⁰ Na' sto shii bi bchebe' nake'ne' txen. Na' ka gok zi shloll, ben'ka' lle' na' gollgake'ne' sto shii:

—Dii li lenon' nako'ne' txen, la' nakbia' nako' ben' Galilea.

⁷¹ Na' Pédrona' wzoloe' chone' zn̄ia, chi'e:

—Chioza' gone' yel' zi' cha' shi chziye'zan nia' bi nombi'ane'.

⁷² Na' katena' lii wchellte teza' de wchop shii. Na' jadini Pédrona' daa goll Jesúza'ne': “Ka zi' kwel teza' de wchop shii, na' gak shon̄ shii bi wchebo' shi nombi'o nad'.” Na' wzoloe' chbelle'.

15

*Bdegake' Jesúza' lao Pilátona'**(Mt. 27:1-2, 11-14; Lc. 23:1-5; Jn. 18:28-38)*

¹ Na' ka wyeeni' bidi'a b̄xozka' ch̄n̄abia' len beñ' golka' ch̄n̄abia', na' beñ'ka' chli' chsedi leya' na'ch yog'loł beñ'ka' ch̄n̄abia'gake' yell Israela'. Na' b̄chejgake' Jesúza' jwa'gake'ne' lao Pilátona'.

² Na' w̄n̄abi Pilátona'ne', chi'e:

—¿Alin' nako' beñ' w̄n̄abia' che beñ' Israelka'?

Na' che' Jesúza'ne':

—Kan' ba wno'.

³ Na' b̄xozka' ch̄n̄abia' dii zan dii chaogake' xya che'.

⁴ Na' che' Pilátona'ne' sto shii:

—¿Abibi in̄akzo'? Bwialat', dii zan dii chaogake' xya cho'.

⁵ Na' bibi goll Jesúza'ne'. Na' bibani Pilátona' daa bibi golle'ne'.

*B̄choglogake' guet Jesúza'**(Mt. 27:15-31; Lc. 23:13-25; Jn. 18:38-19:16)*

⁶ Na' kat' chal' ln̄ina', Pilátona' chisane' to beñ'ka' nseje' lillyana', beena' in̄ab beñ' yellka' wsane'.

⁷ To beñ' le Barrabás die' lillyana' len beñ'ka' benlene' xyana' daa b̄xegake' wdila'.

⁸ Na' bdi'a bllag beñ' yellka', na' che'gake' Pilátona' gone' ka chonkze' yog' yiz.

⁹ Na' che' Pilátona' legake':

—¿Acheenile yisan' beñ' w̄n̄abia' cheleni, le' nakle beñ' Israel?

¹⁰ La' chakbe'ile' nan b̄xozka' ch̄n̄abia' daa chakxe'zgakile'nen' jwa'gake'ne' lawe'na'.

¹¹ Na' b̄xozka' ch̄n̄abia' bta b̄negake' beñ'ka' lle' na' kwenche in̄abgake' yisane' Barrabáza'.

¹² Na' che' Pilátona' legake':

—Na' bera cheenile' gonid' beena' nale nake' beñ' w̄n̄abia' chele, le' beñ' Israel.

¹³ Na' besyaagake' che'gake':

—¿Bdee lee yag cruza'!

¹⁴ Na' che' Pilátona' legake':

—¿Bera dii malan' bene'?

Na' zizikli besyaagake' che'gake':

—¿Bdee lee yag cruza'!

¹⁵ Na' daa goklall' Pilátona' yigaane' wen lao beñ'ka' lle' na', bisane' Barrabáza'. Na' bene' mandad wit chingake' Jesúza', na'tech bene'ne' lo na' beñ'ka' wda'gake'ne' lee yag cruza'.

¹⁶ Na' b̄che' soldadka' Jesúza' lesh' chyoonā' gana' chon Pilátona' yel' jos̄chisa', na' biti'a bishaggake' yog' soldadka' lle' na'.

¹⁷ Na' bwakwgake'ne' to lech' x̄na, na' bengake' to b̄xoon de xis yesh' na' bllingake'n yichje'na' ka to corona.

¹⁸ Na' wzologake' chosyaagake' nagake':

—¿Soashga beñ' w̄n̄abia' che beñ' Israelka' mbalaz!

¹⁹ Na' wdingake' xisa' yichje'na', na' bllaa x̄neeka' le', na' b̄chek' xibe'ka' lawe'na' bengake' ka beñ' chgwee balaan.

²⁰ Ka biyoll btitjgakile'ne', bikwasgake' lech' x̄nana' daa b̄xoagake' kolleena' na' biwakwgake'ne' xe'na'kzā. Na' wlejjgake'ne' kwenche lljada'gake'ne' lee yag cruza'.

*Bda'gake' Jesúza' lee yag cruza'**(Mt. 27:32-44; Lc. 23:26-43; Jn. 19:17-27)*

²¹ To beñ' yell Cirene lie' Simón, x̄a Alejándrona' na' Rúfona', zizee lyixaa. Na' ka billague' legake', bengake' byen bi'e yag cruz che Jesúza'.

22 Na' bche'gake' Jesúza' latja' le Gólgota, na' zejin: Latj che llit yichj ben' wet.

23 Na' bshabgakile'ne' vino daa nchixə mírrana', per bi weeje'n.

24 Na' bda'gake'ne' lee yag cruza'. Na' soldadka' bengake' to wyitj kwenche yilaagake' xe'na' na' ikaagake' daa yidol' to togake'.

25 Na' chida ga kana' bda'gake'ne' lee yag cruza'.

26 Na' yichj yag cruz che'na' bda'gake' to dii cho'en dill' biche nda'gake'ne' lee yag cruza', nan: "Beenin ben' wnabia' che ben' Israelka'."

27 Na' bda'lengake'ne' chop ben' wban, toe' wda' kwite' de shlina', na' stoe' kwite' de robesa'. 28 Na' billinin ka na Cho'a Xtill' Chioza' daa nan: "Ble'gakilene' ka to ben' mal."

29 Na' ben'ka' chde na', chnelegakile'ne', na' chta yichje'ka' che'gake':

—jLin' wnazo' yichinjo' yoodo'na' na' lo shon llazə yiyono'n,

30 bislashki kwino' na' biyetj lee yag cruza'!

31 Na' lekzka' chon bxozka' chnabia' len ben'ka' chli' chsedi leya', chnelegakile'ne', che'gake':

—Ben' yoblə gok bisle', na' bi chak yisla kwine'.

32 Shi leile' len' Crístona', ben' wnabia' chechona', cho' ben' Israel, yiyetjshkile' lee yag cruza' naa kwenche ile'teicho na' shajle'cho che'.

Na' axt len ben'ka' da'lene' lee yag cruza' chnelegakile'ne'.

Ka wit Jesúza'

(Mt. 27:45-56; Lc. 23:44-49; Jn. 19:28-30)

33 Ka bllin gobill, doxen yell-liona' bichol, bllinte chida shon.

34 Na' chida shon besyaa Jesúza' zillj, chi'e:

—Eloí, Eloí, ¿lama sabactani?*" —na' zejin: Chios cha', Chios cha', ¿biche ba wlej yichjzo' nad'?

35 Na' bal ben'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

36 Na' zejdo toe' na' bleeje' to dii chzi' nisa' gana' yollə vino daa zichj zla' na' bzoe'n to lo xis kwenche bzoe'n cho'ena' xope'n, na' chi'e:

—Jwayishkile'na', wwiashkicho shi wid Elíaza' yiletje'ne'.

37 Na' besyaadia Jesúza', na'ch wite'.

38 Na' ka wite', lechaa ze loo yoodo'na' bcheza'n gokan choplə.

39 Na' beena' chnabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiin Chioza'.

40 Lekzka' zi bal noolka' lle'gake' de zit'lə chwiagake'. Na' ladje'ka' len María ben' Magdálana', na' Saloména', na'ch María, beena' nak xna' Joséna' len Jacóbona', ben' neshaa.

41 Noolkin wnogake' Jesúza' na' goklengake'ne' kana' zoe' gana' mbani Galileana'. Na' lekzka' len zanch noolka' ben'ka' wyajlengake'ne' Jerusalénna'.

Bkwash'gake' Jesúza'

(Mt. 27:57-61; Lc. 23:50-56; Jn. 19:38-42)

42 Na' llana' gok ka' nakan llana' chsini'a ben' Israelka' che llana' chombaangake'. Na' ka gol,

43 bllin José ben' Arimatéana', beena' nak txen ben'ka' chnabia' ben' Israelka', na' lene' none' lez beena' wsel' Chioza' inabi'e. Na' biyaxjile' wyaje' lao Pilátona' janabe' lsens yiletje' kwerp che Jesúza'.

44 Na' bibani Pilátona' daa ba wite'. Na' goxe' beena' chnabia' soldadka' kwenche inabilene' shi dii likzan ba witen'.

* 15:34

45 Na' ka che' beena' chñabia' soldadka' ba wite' na' wxenlallee, na' bi'e lsens biletj Joséna' kwerp che'na'.

46 Na' wxi' Joséna' to lech' de lino na' biletje' kwerp che Jesúsna' na' bitobe'ne' lechaa. Na' jlo'ene' to loo blej, na' bisejile'n to yaj xen.

47 Na' María ben' yell Magdálana', na' María, xna' Joséna', chwiayen'gake' gana' jlo'ene'.

16

Biban Jesúsna' ladj ben' wetka'

(Mt. 28:1-10; Lc. 24:1-12; Jn. 20:1-10)

1 Na' ka wde lla sabda', llana' chombaen ben' Israelka', María ben' Magdálana' len Saloména', na'ch María, xna' Jacóbona', wxi'gake' diika' chla' zix kwenche wlla'gake'n kwerp che Jesúsna'.

2 Na' lla nech che xmanna', shinzə chla' wbilldo'na', wyajgake' cho'a ba che'na'.

3 Na' ka zejgake' che' ljwellgake':

—¿Nora gaklen cho' wkwase' yaja' daa chi' cho'a ba che'na', lla?

4 Per ka bllingake', ble'gakile' bich chi' yaj xenna' cho'a bana'.

5 Na' ka wyoogake' loo bana', ble'gakile' chi' to ben' xkwid' de shli che bana' nakwe' to lech' llyish dii ton. Na' le bbleb noolka'.

6 Na' chi'e legake':

—Bi illeble. Le' chiyiljle Jesús, ben' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixjgake'ne'.

7 Li yiyaj lao ben'ka' nakgake'ne' txen na' len lao Pédróna', na' li lljayellgake': “Ba ziyaje' zjaleze' le' Galileana', na' na' yile'ile'ne' sto shii, kon ka wne' le'.”

8 Na'ch bichej noolka' loo bana' ziyajdogake' ax̄t chxiztitgake' daa le chllebgake'. Na' kono bi gollgake' daa le bblebgake'.

Bli'lao Jesúsna' María ben' yell Magdálana'

(Jn. 20:11-18)

9 Na' ka biban Jesúsna' ladj ben' wetka' lla nech che xmanna' shzildo', zigaate bli'lawe' María ben' yell Magdálana', beena' bibej Jesúsna' gall dii xiw'ka'.

10 Na' Maríana' wyaje' lao ben'ka' wdalen Jesúsna' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúsna'.

11 Na' ka beni ben'ki mban Jesúsna' na' ba ble'teyi Maríana'ne', bi wyajle'gake'.

Bli'lao Jesúsna' chop ben'ka' nakgake'ne' txen

(Lc. 24:13-35)

12 Ka biyoll gok ka', chop ben'ka' nak Jesúsna' txen ngoogake' nez zejgake' lyixaa, na' bli'lawe' legake' na' nake' nlla'la.

13 Na' biyajgake' gana' lle' ben'ka' sto, jayellgake' legake' ba ble'gakile'ne', na' ni chegake' bi wyajle'gake'.

Jesúsna' golle' ben'ka' nakgake'ne' txen we'gake' xtilleena' doxen lo yell-lioni

(Mt. 28:16-20; Lc. 24:36-49; Jn. 20:19-23)

14 Na' wdetch, bli'lao Jesúsna' ben'ka' shnej shlak chi'gake' chaogake'. Na' bsheshlene' legake' daa bi chajle'gake' na' daa nakgake' lall'do' chech, la' bi wyajle'gake' che ben'ka' ble'gakile'ne' ka wde bibane'.

15 Na' chi'e legake':

—Li shaj doxen yell-lioni, li lljtixje'i yog'lol ben' dill' wen dill' kob cha'na'.

16 Beena' shajle' na' choe' nisa', gat' yel' mban che' zejli kaní, san beena' bi shajle', chogbi'a kwiayee.

17 Na' diikin gon ben'ka' nonlilall' nad': wchingake' lia'na' yibejgake' dii xiwaa yoo ben'; na' inegake' dill' kob dii bi nombia'gake';

¹⁸ na' shi gonzin gox'gake' no bel wa yeejgake' dii nak yierb, aga bi gakgakile'. Na' lekzka' wxoa neeka' yichj ben' we'ka' na' yiyakgakile'.

Biyep Jesúza' yabana'

(Lc. 24:50-53)

¹⁹ Ka biyoll bshaljlene' legake', Xancho Jesúza' biyep'e yabana' na' jachi'e kwit Chioza' shlaa de shlina'.

²⁰ Na' ben'ka' nakgake'ne' txen wyajgake' doxen jtixje'gake' cho'a xtilleena' na' Xancho Jesúza' goklene' legake' bengake' yel' wakka' kwenche wyajle' ben' dillaa be'gake' nakan dii li.

Dill' wen dill' kob daa bzej Lúcaza'

Dga bzej Lúcaza' na' bseleen lao Teófilona'

¹ Ben' zan ba goklall'gake' wzejgake' to to diika' ba gok ladjnto'ni

² kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'.

³ Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki,

⁴ kwenche inezilo' daa ba bli' bsemi'gakile' li' nakan dowalj dii li.

Wdixjee anjla' galj Juanna'

⁵ Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xoole', Elizabeta', lekzka' goke' xiin dia che dii bñoz Aarónna'.

⁶ Na' chop xooltie' chongake' wen lao Chioza', na' chongake' yog'lołte daa nllie' bia'.

⁷ Na' aga no xiingake' wzoa daa nak Elizabeta' nool will; na' ba naktegage' ben' gol.

⁸ Na' to shii ka bidoł' bñozka' nak Zacaríaza' txen gongake' xshin Chioza' daa nak lo na'gake',

⁹ bengake' to wyitj, ka yoologake' chongake', kwenche got'bia' noe' yidoł' lljlo' llen yala' loo lill xlatj Xancho Chioza'. Na' bidoł' Zacaríaza' gone'n.

¹⁰ Na' shlak chgwee llen yala' loo yoodo'na', ben' zan bgaan chyoole' choe'łwillgake' Chioza'.

¹¹ Na' bli'lao to anjl che Xancho Chioza' Zacaríaza', na' anjla' zie' shlaa de shlina' gana' chzeygake' yala'. ¹² Ka ble'i Zacaríaza' anjla', bikzə bi billet-lallee gone' daa le bllibe'.

¹³ Na' anjla' chi'ene':

—Bi illebo' Zacarías, la' Chioza' ba bzenague' daa chñabilo'ne', na' xoolo' Elizabeta' sane' to xiino' na' wsi'ob' Juan.

¹⁴ Na' yibachgailo' kat' galjb', na' lekzka' ben' zan yibayi,

¹⁵ la' xiino'na' gakb' to ben' zakii lao Chioza'. Bi chiyal' wnixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjlb'.

¹⁶ Na' yigoob' ben' zan xiin dia che Israela' lo xnez Chioza', beena' nak Xangake'.

¹⁷ Na' kwialob' lao Xanchona', na' soalen Espíritu che Chioza' leb' ka wzoalene' Elíaza', na' gapb' yel' wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shli lao Chioza'. Na' diikin gom' kwenche kat' za' Xanchona' na' gonlilall'gake'ne'.

¹⁸ Na'ch che' Zacaríaza' anjla':

—¿Nakra gak inezid' shi lekzilo'n?, la' ba nak' ben' gol na' lekzka' nool cha'na'.

¹⁹ Na'ch che' anjla'ne':

—Nadaan anjl Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni.

²⁰ Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

²¹ Na' ben'ka' lle' chyoole' chbezgake' yichej Zacaríaza', goklejjgakile' daa wllaile' loo yoodo'na'.

²² Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

²³ Na' ka biyoll ben Zacaríaza' daa llia bia' gone' yoodo'na', na'ch biyaje' lille'na'.

24 Na' ka wde gok diiki, na' bia' xoole', Elizabeta'. Na' lao gay' beo' bichkzə ga bcheje', na' wne':

25 “Xancho Chioza' ba goklene' nad' kwenche bich sia' yel' zto' lao beñ'.”

Wdixjee anjla' galj Jesúza'

26 Na' ka gok xop beo' noa' Elizabeta', bsel' Chioza' anjla' le Gabriel yella' le Nazaret daa llia gana' mbani Galileana',

27 gana' zoa to nool wew' lie' María. Na' Maríana' ba nakan wshagna'lene' to beñ' le José, na' Joséna' nake' xiin dia che dii rey Davina'.

28 Na' wyoo anjla' gana' zoa Maríana' na' chi'ene':

—ǰChwap' li' chiox, nool, beñ' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lolte nool.

29 Na' Maríana' bibanile' daa golle'ne' ka', na' gokile' berache naz beeni nad' ka'.

30 Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'.

31 Na' naa woo to bdo' na' kat' galjb' na' wsi'ob' Jesús.

32 Na' gakb' to beñ' zakii na' ye'gake'b' Xiin Chios, beena' nak liizelozi beñ' choo beñ' xen. Na' Xancho Chioza' gone'b' to beñ' wñabia' ka dii xoxzto'b' Davina'

33 kwenche toshiizi inabia'b' le' beñ' Israel, le' nakle xiin dia che dii Jacoba', na' yel' wñabia' che'baa bi yiyoll yidon.

34 Na'ch wñabi Maríana' anjla', chi'ene':

—ǰNakra gakz wa', lla?, la' aga no beñ' byo zoalen'.

35 Na'ch che' anjla' le':

—Espíritu Sántona' yidsoalene' li', na' yel' wak che Chioza', beena' nak liizelozi beñ' choo beñ' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios.

36 Lekzka' dialla cho' Elizabeta' ba no'e, la'kzi ba nake' beñ' gol. Na' la'kzi chaki beñ' nake' nool will, ba gok xop beo' no'e.

37 Aga bi de dii bi chak gon Chioza'.

38 Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

Jawia Maríana' Elizabeta'

39 Na' lli wza'te Maríana' wyaje' to yell dii llia yaa yao che Judeana'.

40 Na' blline' lill Zacaríaza' na' bwape' Elizabeta' chiox.

41 Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjlall'do'ena',

42 na' wñie' zillj, chi'ene':

—Chioza' ba benleeyche' li' ladj yog'lol nool, na' lekzka' bdo' cho'na'.

43 ǰNora nak' nad' zidwia'zə xna' Xan'na' nad', lla?

44 La' kon ka bwapo' nad' chiox, lli bxit'te bdo' cha'ni loo li'ani daa chibaib'.

45 Chakomba li' wyajli'o ka wna anjla', la' yog' daa wna Xanchona', aga wde bi gakan.

46 Na'ch wna Maríana':

Do yichj do lallaa choe'lawaa Xancho Chioza'.

47 Chibayi yichjlall'dawaani lao Chioza', beena' chisla nad'.

48 Ba biyesh'lallile' nad' nak' xmose',
naa solo yog' beñ' ine' nad': “Chakomba li'.”

49 La' Chioza', beena' nap yel' wak choo yel' wak xen, ba bene' dii wen inleeb cha'.

Nake' liizelozi beñ' li beñ' shao',

50 na' chiyesh'lallile' yog'te beñ'ka' chall chlebgake'ne'.

51 Dii zakii nleeb ba benlene' yel' wak che'na'.

Ba bchinj bselle' yog'lol daa nan gon ben'ka' chep cha'lall'.

⁵² Ba bikwase' yel' wñabia' che ben' wñabia'ka',
na' ben'ka' ble'gakile' nakzi, Chioza' ba bene' legake' ben' zakii.

⁵³ Na' ben'ka' chbil chdon, ba bzesh bzeljile' legake' kon dii wen dii shao' che'na',
na' bilague' ben' wni'aka' to ka cha'gake'.

⁵⁴ Ba goklene' cho' ben' Israel, cho' nakcho xmose',
na' toshiizi chiyesh'lallile' cho',

⁵⁵ kon ka bchebe' gone' che dii xozxto'cho Abrahamama'
na' yog' ben' zizaak lo dia che'na'.

⁵⁶ Na' Mariana' bgaane' ka do shon beo' lill Elizabeta', na'ch bizee ziyaje' lille'na'.

Golj Juanna'

⁵⁷ Na' ka bllin lla wxan Elizabeta', wxane' to bi' byodo'.

⁵⁸ Na'ch ka wnezi ben' wlill che'ka' na' ben' dialla che'ka', wyajgake' bibalengakile'ne'
daa ba biyeshii Xancho Chioza' le'.

⁵⁹ Na' ka gokib' to xman, jloogake'b' sen daa ne' circuncisión, na' goklall'gake'
wsi'gake'b' Zacarías ka le xabaa.

⁶⁰ Na' che' xna'baa:

—¿Bi gakan! Juanan chiya' wsi'nto'b'.

⁶¹ Na' gollgake'ne':

—¿Bi che wsi'zo'b' ka'? La' aga no dialla cho' le ka'.

⁶² Na'ch bengake' sen kwenche wñabgakile' xabaa bi cheenile' wsi'e bdo'na'.

⁶³ Na'ch wñabe' to yagla'do' kwenche bzeje'n, na' daa bzeje' nan: “Juanan wsi'nto'b'.”
Na' yog' ben'ka' bibani.

⁶⁴ Na' lii gokte bine Zacaríaza', na'ch wzoloe' choe'lawee Chioza'.

⁶⁵ Na' ben' wlill che'ka' bllibgake' ka nak daa gok, na' yog' yellka' lle' ladj yaa yao che
Judeana' wze dill' ka gok.

⁶⁶ Na' yog' ben'ka' beni ka gok, gokgakile':

—¿Noran gak bi'do'ni, lla?

Wnagake' ka', la' nakbia' zoalen Xancho Chioza' leb'.

Daa wna Zacaríaza'

⁶⁷ Na' Espíritu Sántona' wñabi'e yichjlall'do' xab' Zacaríaza' na' bi'e cho'a xtill' Chioza',
wne':

⁶⁸ Choe'lawaa Xanchona', beena' nak Chios checho, cho' ben' Israel,
la' ba bide' ladjchoni, cho' nakcho ben' yell che', kwenche yisle' cho' lawi dii mala'.

⁶⁹ Na' ba bselee to ben' nap yel' wak xen yisle' cho',
na' zee lo dia che dii Davina', beena' gok xmose'.

⁷⁰ Ba chak ka bchebe' gone' kani'yi daa golle' dii ben'ka' wdixjee cho'a xtilleena', ben'ka'
gok lall' nee.

⁷¹ Bchebe' yisle' cho' lao ben'ka' bi chle'shii cho', na' lao yog' ben'ka' chakzi' chakzbani
cho'.

⁷² Na' golle' dii xozxto'choka' yiyeshile' legake',
na' bi gal-lallee ka nak diika' bchebe' gone'.

⁷³ Ki nak daa bcheb Chioza' gone' che dii xozxto'cho Abrahamama':

⁷⁴ Bchebe' yisle' cho' lao ben'ka' bi chle'shii cho'

kwenche we'la'ochone' na' bibi wwall wsheban cho',

⁷⁵ na' gon kwincholall' nee na' goncho ka yiyoolallile' shlak mbancho.

⁷⁶ Na'ch Zacaríaza' chi'e bdo' che'na':

Na' li', xiindawaa, ina ben' li' ben' chyixjee daa na Chioza', beena' nak liizelozu ben' choo
ben' xen.

Na' kwialozog' lao Xanchona' kwenche wzenaggake' che' kat' zee.

77 Wzenilo' ben' wlall chechoka' daa chiyaḷ' gongake' kwenche yizi'xen Chioza' saaxya che'ka' na' yisle' legake' bi tegake' lo yel' zak'zi'na'.

78 La' Chios chechona' chakile' cho' na' chiyesh'lallile' cho', na' wselee to ben' za' yabana' nsee to beeni' che yichjall'do' ben' yell-lioni

79 kwenche sho' beeni'na' loo yichjall'do' ben'ka' chda gani nak shgasj shchoḷ ni che dii mala' daa nsa' yel' wit, na' wliile' cho' nez li che'na' na' soacho mbalaz.

80 Shlak bgol Juanna', ben Chioza'ne' ben' wal. Na' wzoe' to latj gana' bibi chashj chleb axt ka bllin lla wzoloe' be'lene' ben' Israelka' cho'a xtil' Chioza'.

2

Golj Jesúza' (Mt. 1:18-25)

1 Kana' chñabia' César Augústoná', bene' byen ibab baḷ ben' lle' to to yell doxen yell-liona' gana' chñabi'e.

2 Na' ka wbabgake' dii nech, beena' le Cirenio nake' gobernador che Síriana'.

3 Na' benan byen biyaj yog' ben' yell che chegake' kwenche jada' lie'ka'.

4 Na' daa nak Joséna' xiin dia che dii Davina', bizee yell Nazareta' daa llia gana' mbani Galileana', na' biyaje' yell Belénna' gana' golj dii Davina', daa llia gana' mbani Judeana'.

5 Na' kwenche ibabgake' biyaje' yell Belénna' len Maríana', beena' ba nakan ikee. Na' Maríana' ba no'e.

6 Na' shlak zoagake' Belénna', bllin lla sane'.

7 Na' wxane' to bi' byodo' nakb' bi' nech, na' btobe'b' lechaa na' wdixje'b' gana' chao bayix'ka', la' bich bi latj bllel gana' chigaan ben'.

Jtixje' i anjla' ben'ka' chap xil'ka' ba golj Jesúza'

8 Na' lle'na' goljb', gaozə yell Belénna' lle' xonj ben' chapgake' xil' che'ka'.

9 Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le bllibgake'.

10 Na' che' anjla' legake':

—Bi illeble, la' ziditixje'id' le' dill' wen dill' koba' daa gonan ka yibachgayi yog' ben'.

11 La' naa yell che dii Davina' ba golj beena' yisla le' lao dii mala'. Na' len' Xancho Crístoná', beena' chbezle wsel' Chioza'.

12 Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

13 Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

14 ¡We'la'ocho Chioza' zoa yabana'!

Mbalaz ben'ka' zoa yell-lioni, ben'ka' ba bli'yi Chioza' yel' goklen che'na'.

15 Na' ka biza' anjlka' ziyajgake' yabana', na'ch che' ljwell ben'ka' chap xil'ka':

—Li yidoshki Belénna', li sho' diwiashki daa ba gok, daa ba wdixje'i anjl che Xanchona' cho'.

16 Na'ch ziyajdogake' Belénna' na' bllingake' gana' zoa Maríana' len Joséna', na' bdo'na' deb' gana' chao bayix'ka'.

17 Na' ka biyoll ble'gakile'b', na' be'gake' dill' lao ben' wlall che'ka' daa goll anjla' legake' che bdo'na'.

18 Na' yog' ben'ka' beni ka wna wap xil'ka' bibangakile' ka dillaa be'gake'.

19 Na' Maríana' kon ka biyoll bzenague' dill'ka' na' bgaanan loo yichjall'do'ena', na' gokile' bera zejín dga.

20 Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

Jwa'gake' Jesúza' yoodo'na'

21 Na' ka gokib' to xman, wloogake'b' sen daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

22 Na' kon ka na ley che dii Moiséza' gongake', wlezgake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'.

23 Bengake' ka', la' ley che Xanchona' nan: “Bi' byo nech che yog'lol ben', chiya' gongake'b' lo na' Chioza'.”

24 Na' jaake' je'la'ogake' Xancho Chioza' jengake' ka na leya' daa nan chiya' witgake' chop ngolbex wa chop palom.

25 Na' kana' jwa'gake' Jesúsza' yoodo'na', zoa to ben' le Simeón Jerusalénna'. Nake' to ben' chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' ben' Israelka'. Na' zoalen Espíritu Santo che Chioza' le'.

26 Na' Espíritu Sántona' ba bzenile'ne' nan aga wete' shi bin' ile'ile' Crístona', beena' chbezgake' wsel' Xancho Chioza' kwenche inabi'e.

27 Na' Espíritu Sántona'kz bseleene' yoodo'na', na' na' zie' ka bllinlen xaxna' Jesúsza' leb' kwenche gongakile'b' ka na leya'.

28 Na'ch bñen Simeónna' leb' na' be'lawee Chioza', chi'e:

29 Chios cha', be' latj guet' mbalaz naa,
la' ba beno' daa bchebo' gono' cha', nad' nak' xmoso'.

30 La' ba ble'id' beena' yisla neto',

31 beena' ba bseloo lao yog'lol ben' yell-lioki.

32 Len' kwee beeni'na' loo yichjlall'do' ben'ka' bi nakgake' ben' Israel.
Na' gone' ka neto' ben' Israel sho'nto' balaan, neto' naknto' yell cho'.

33 Na'ch Joséna' len xna'ba bibangakile' ka nak daa wna Simeónna' cheb'.

34 Na'ch wñabi Simeónna' Chioza' gaklene' legake', na' chi'e Maríana', xna' Jesúsza':

—Ba nchogbi'a Chioza' che bi'do'ni gom' kwenche zan ben' Israelka' kwiayi'gake' na' lekzka' zane' yila. Na' wliib' ben' ka nak yel' wak che Chioza', na' ben' zan inegake' zban cheb' na' bi shajle'gake' cheb',

35 na'ch gakbia' ka chza'lall' ben' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

36 Na' lekzka' yoodo'na' zoa to nool goldo', ben' chyixjee daa che' Chioza'ne', na' lie' Ana. Nake' xiin dii Fanuela' na' xiin dia che dii Asera'. Ben' xkwid'ze' bshagnee, na' gall yizchga wzoalene' ben' che'na' ka wite'.

37 Nake' noolə wizeb na' ba gokile' taplalj tap yiz. Na' toshiizi zoe' yoodo'na', na' ka wal ka tella zoe' choe'lawee Chioza', na' tlizi chzoe' wbas' na' choe'lwille'ne'.

38 Na' lekzka' wbiguee kwite'ka' na' bi'e Chioza' yel' choxken daa ba bselee beena' gaklene' ben' Israelka'. Na' bi'e dill' che Jesúsza' lao ben' Jerusalénka', ben'ka' chbez wsel' Chioza' beena' yisla legake' lao dii mala'.

Biyajgake' Nazareta'

39 Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa llia gana' mbani Galileana'.

40 Na' Jesúsza' bgolb' na' zejch gokb' bi' wal na' bi' sin', na' le goklen Chioza' leb'.

Jesúza' jashaljem' ben' sin'ka' yoodo'na'

41 Xaxna' Jesúsza' chajgake' Jerusalénna' yog' yiz kat' chal' lni Paskwa'.

42 Na' ka goki Jesúsza' shllin yiz, wyajlengake'b' lnina' kon ka yoologake'.

43 Na' ka wde lnina' biza' xaxna'baa, na' bi gokbe'gakile' bigaan Jesúsza' Jerusalénna'.

44 Gokgakile' do ladj ben'ka' ziyajlengake' zilem', na' kon bigootezgake' nez do lla. Na' ka biyiljgake'b' ladj ben' dialla che'ka' na' ben'ka' nombia'gake'

45 aga billelgakile'b'. Na' bibiigake' jadiljgake'b' Jerusalénna'.

46 Na' ka gok shonə lla billelgakile'b' yoodo'na', chi'b' ladj ben'ka' chli' chsedi leya' chzenagb' xtill'leeka' na' chnabib' legake' che daa choe'gake' dill'.

47 Na' yog' ben'ka' chzenag xtill'baa chibangakile' yel' chajni che'baa na' ka chilliib' xtill' ben'ka' chli' chsedi leya'.

48 Na' ka ble'i xaxna'baab' bibangakile'. Na'ch che' xna'baa:

—Xiindawaa, ¿bi che benzilo' neto' ka'? Xo'ni na' nad' ba gokshejlall'chgainto' biyiljnto' li'.

49 Na'ch che' Jesús'a' legake':

—¿Bi che chiyiljzle nad'? ¿Abi nezile chiyal' soa' lill Xa'na'?

50 Na' aga wyajni'gakile' bi zejin daa gollb' legake'.

51 Na'ch Jesús'a' biyajlem' legake' Nazareta' na' bzenagb' chegake' toshiizi. Na' xna'baa aga gol-lallee diika' gok.

52 Na' Jesús'a' zejch bgolb' na' wdapchb' yel' sin', na' Chioza' bibachile'b', na' lekzka' bibayi ben' leb'.

3

Juanna', beena' bchoa ben' nis

(Mt. 3:1-12; Mr. 1:1-8; Jn. 1:19-28)

1 Na' ka gok shin' yiz chnabia' César Tibériona', na' Poncio Pilátona' chnabi'e gana' mbani Judéana', na' Heródeza' chnabi'e gana' mbani Galileana', na' ben' bishee Felípena' chnabi'e gana' mbani Ituréana' len Traconítana', na' Lisániaza' chnabi'e gana' mbani Abilíniana',

2 na' Anáza' len Caifáza' nakgake' bxo'z choo bxo'z xen che ben' Israelka'. Na' kana'yen' wne Chioza' Juanna', xiin Zacaríaza', kana' zoe' to latj gana' bibi chashj chleb.

3 Na'ch wyaj Juanna' jte' doxen yell-liona' de cho'a yao Jordánna' na' wdxije'ile' ben' chiyal' yiyaj yilengakile' na' choagake' nis kwenche yizi'xen Chioza' chegake'.

4 Bene' kon ka bzej dii Isaíaza' gana' nan:

To ben' gosyee latja' gana' bibi chashj chleb, na' ine':

“Li se kwas wzenagle che Xanchona'

na' wsalj yichjlall'do'leka' kat' zee.

5 La' le' gone' ka chon ben' chillee ga nak xitj yao,

na' ka ben' chchinj yaa kwenche chileshe'n.

Na' chilie' yog'lol' nez dii nyok nlew,

na' chillee xitjka' chi' lo neza'.

6 Na' yog'lol' ben' ile'gakile' ka gon Chioza' yisle' ben' lawi dii mala'.”

7 Na' ben' zan chllin lao Juanna' kwenche wchoe' legake' nisa', na'ch kat' chllingake' lawe'na', chi'e legake':

—¿Le' naklikzle ka bel' znia! ¿Achakile wak wxonjile' yel' zak'zi' daa wsel' Chioza'?

8 Li gon ka gakbe'i ben' nan dii li ba biyaj bilenile'. Na' bi gakzile bibi yel' zak'zi' ile'ile daa inazle: “Neto' naknto' xiin dia che dii Abrahama'.” Ni inia' le' axt yajki wak gon Chioza' xiin dia che dii Abrahama'.

9 Yog'lol'-le shi bi chonle ka chiyoolallii Chioza' na' gak chele ka chak che to yag dii choe' dii zix dii bi nak wen, na' lii chchogtegake'n na' chzal'gake'n lo yi'na'.

10 Na' ben'ka' chzenag xtill' Juanna' che'gake'ne':

—¿Beran chiyal' gonnto', shka'?

11 Na'ch che' Juanna' legake':

—Beena' de chop kwe' xe', chiyal' wi'e shkwe' che beena' bi de che'. Na' beena' de dii cheej chawe', chiyal' gaolene'n beena' bi de cheyin.

12 Na' lekzka' bllin bal' ben' wichixjka' kwenche wchoa Juanna' legake' nisa', na' wñabgakile'ne':

—Maestro, ¿beran chiyal' gonnto', shka'?

13 Na'ch che' Juanna' legake':

—Bi wchixjle dii xenchlə ka to daa chiyal' wchixjle.

14 Na' lekzka' bal' beŋ'ka' nak soldad wŋabgakile'ne':

—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble beŋ' kwenche ikaazle bi de che', ni bi wtobilene' dii bi nak ka'. Li gon banez laxjləna'.

15 Na' beŋ' zan yoo yichjgake' ila' Crístona', beena' wsel' Chioza' kwenche inabi'e, na' yog'ze' gokgakile' Juanna'ljan Crístona'.

16 Na' Juanna' golle' legake':

—Zi' za' beena' napch yel' wak xench ka nad'. Na' nad' ni bi zakaa gak' xmose' kwenche wlechj' xele'na'. Nad' chchoa' le' nis daa chiyaj chilēnile, san len' gone' ka yidsoa Espiritu Sántona' loo yichjlall'do'lēna', na' beŋ'ka' bi chiyaj chilēni, wselee legake' lo yi' gabilā'.

17 Na' daa gon Crístona' che beŋ' chzaklebin ka daa chon beena' nox' yag xoz' daa chpa'ile' trígona', na' yitope' trígona' kooshaween na' wzeye' beb cheyinna' lo yi'na' daa biga yiyolkzə.

18 Kan' nak diika' bzajni Juanna' beŋ'ka', na' dii zanch dill' dii be'lene' legake' kana' bi'e dill' wen dill' kob che Chioza'.

19 Na' Juanna' lekzka' bsheshlene' Heródeza', beena' wŋabia' Galileana', daa bikee Herodíaza', xool beŋ' bishee Felípena', na' che bichlə dii malka' ba bene'.

20 Na'ch Heródeza' benche' bish' l'jwell dii malka' ba bene' daa wlo'e Juanna' lillyana'.

Wchoa Jesúza' nisa'

(Mt. 3:13-17; Mr. 1:9-11)

21 Kana' chchoa Juanna' beŋ' nisa', len Jesúza' bchoe'n. Na' shlak choe'lwill Jesúza' Chioza', byalj yabana'

22 na' betj Espiritu Sántona' jsoalene'ne', na' ble'gakile' Espirituna' ka to palom. Na' bengakile' shii Chioza' za'n yabana', chi'e:

—Lin' nako' Xiin', chakchgaid' li' na' le chibaid' li'.

Beŋ'ka' nak dia che Jesucrístona'

(Mt. 1:1-17)

23 Na' do shichoa yizi Jesúza' ka wzoloe' bene' yog' daa llia bia' gone'. Na' yog' beŋ' wnagake' xiin Josénan'. Na' Joséna' goke' xiin Elína',

24 Elína' goke' xiin Matata', Matata' goke' xiin Levína', Levína' goke' xiin Məlquina', Məlquina' goke' xiin Jánana', Jánana' goke' xiin Joséna'.

25 Joséna' goke' xiin Matatíaza', Matatíaza' goke' xiin Amóza', Amóza' goke' xiin Nahuma', Nahuma' goke' xiin Éslina', Éslina' goke' xiin Nagaina'.

26 Nagaina' goke' xiin Maata', Maata' goke' xiin Matatíaza', Matatíaza' goke' xiin Semeina', Semeina' goke' xiin Joséna', Joséna' goke' xiin Judána'.

27 Judána' goke' xiin Joánana', Joánana' goke' xiin Résana', Résana' goke' xiin Zorobabela', Zorobabela' goke' xiin Salatiela', Salatiela' goke' xiin Nérina'.

28 Nérina' goke' xiin Məlquina', Məlquina' goke' xiin Ádina', Ádina' goke' xiin Cosama', Cosama' goke' xiin Elmodama', Elmodama' goke' xiin Era'.

29 Era' goke' xiin Josuéna', Josuéna' goke' xiin Eliezera', Eliezera' goke' xiin Jorima', Jorima' goke' xiin Matata'.

30 Matata' goke' xiin Levína', Levína' goke' xiin Simeónna', Simeónna' goke' xiin Judána', Judána' goke' xiin Joséna', Joséna' goke' xiin Jonánna', Jonánna' goke' xiin Eliaquima'.

31 Eliaquima' goke' xiin Meleana', Meleana' goke' xiin Mainána', Mainána' goke' xiin Matátana', na' Matátana' goke' xiin Natánna'.

³² Natánna' goke' xiin Davina', Davina' goke' xiin Isaína', Isaína' goke' xiin Obeda', Obeda' goke' xiin Booza', na' Booza' goke' xiin Salmónna', Salmónna' goke' xiin Naasónna'.

³³ Naasónna' goke' xiin Aminadaba', Aminadaba' goke' xiin Arama', Arama' goke' xiin Ezroma', Ezroma' goke' xiin Fáreza', Fáreza' goke' xiin Judána'.

³⁴ Judána' goke' xiin Jacoba', Jacoba' goke' xiin Isaaca', Isaaca' goke' xiin Abrahama', Abrahama' goke' xiin Taréna', Taréna' goke' xiin Nacora'.

³⁵ Nacora' goke' xiin Seruga', Seruga' goke' xiin Ragauna', Ragauna' goke' xiin Pelega', Pelega' goke' xiin Hebera', Hebera' goke' xiin Sálana'.

³⁶ Sálana' goke' xiin Cainánna', Cainánna' goke' xiin Arfaxada', Arfaxada' goke' xiin Sema', Sema' goke' xiin Noéna', Noéna' goke' xiin Lameca'.

³⁷ Lameca' goke' xiin Matusalénna', Matusalénna' goke' xiin Enoca', Enoca' goke' xiin Jareda', Jareda' goke' xiin Mahalaleela', Mahalaleela' goke' xiin Cainánna'.

³⁸ Cainánna' goke' xiin Enóza', Enóza' goke' xiin Seta', Seta' goke' xiin Adánna', na' Adánna' goke' xiin Chioza'.

4

Dii xiwaa goklalliin kooyela'n Jesúza' gone' ka cheenin

(Mt. 4:1-11; Mr. 1:12-13)

¹ Ka biza' Jesúza' cho'a yao Jordanna', Espíritu Sántona', beena' chnabia' loo yichjlall'do'ena', bchi'ene' latja' gana' bibi chashj chleb.

² Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'.

³ Na'ch che' dii xiwaane':

—Shi leilo' nako' Xiin Chios, goll yaji yiyakan yetxtil.

⁴ Na'ch che' Jesúza':

—Cho'a Xtill' Chioza' nan: “Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'.”

⁵ Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' llia yell-lioni.

⁶ Na'ch che'n le':

—Gon' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'.

⁷ Na' goña'n li' shi wchek' xibo'na' we'lawoo nad'.

⁸ Na' che' Jesúza':

—Cho'a Xtill' Chioza' nan: “Be'la'o toz Xano' Chioza' na' kon daa ine', lennan' gono'.”

⁹ Na'ch ka wde, bizche' dii xiwaa Jesúza' Jerusalénna' na' bñepan le' yichj yoodo'na' gana' nakch sib wal, na' gollan le':

—Shi leilo' nako' Xiin Chios, lla bxit'shki ni.

¹⁰ La' Cho'a Xtill' Chioza' nan:

Chioza' wselee anjl che'ka' gap wwiagake' li',

¹¹ na' gox'gake' li'

kwenche ki koo wchewo' yajka'.

¹² Na'ch che' Jesúza':

—Lekzka' na' Cho'a Xtill' Chioza': “Bi wzo' Chioza' gone' daa nazan cho' kwenche xenlalloo shi gone' ka ba wne'.”

¹³ Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

Wzolo Jesúza' bi'e Cho'a Xtill' Chioza' Galileana'

(Mt. 4:12-17; Mr. 1:14-15)

14 Jesúza' billine' gana' mbani Galileana' ziyoochgue' yel' wak che Espíritu Sántona', na' doxenzə na' wze dill' daa chone'.

15 Na' chjali' chjasedile' ben' Israelka' gana' chdop chllaggake' choe'lwillgake' Chioza', na' yog' ben' nagake' le xochi cho'e dill'.

Billin Jesúza' yell Nazareta'

(Mt. 13:53-58; Mr. 6:1-6)

16 Na'ch biyaje' Nazareta', yella' gana' bgole'. Na' ka bllin lla sabda', llana' chombaan ben' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'.

17 Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:

18 Espíritu che Xancho Chioza' zoalene' nad', na' Chioza' ba bzoe' nad' zidyen' ben' yesh'ka' dill' wen dill' kob che'na'.

Ba bselee nad' kwenche zidtip' lall' ben'ka' chakyeshii yichjlall'do'eka', na' zidtxje'id' ben' wak yisell yilaagake',

na' gon' ka ile'i ben' lcholka',

na' gaklen' ben'ka' chchi' chsak' ben' legake',

19 na' wi'a dill' ba bllin lla gaklen Xanchona' ben' yell-lioki.

20 Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'.

21 Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

22 Na' yog' ben'ka' lle' na' che' ljwellgake' le chon beeni, na' chibangakile' ka xochi cho'e dill'. Na' che' ljwellgake':

—¿Aaga beenin xiin Joséna'?

23 Na'ch che' Jesúza' legake':

—Wnaljale cha' ka dillaa de: “Wen rmech, biyon kwino'.” Na' lekzka' wnaljale nad': “Daa beninto' beno' Capernaúma' lekzka' benschkin lallchoni.”

24 Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'.

25 Na' nia' le', zan nool wizeb wlle' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli.

26 Na' bi bsel' Chioza' Elíaza' kwenche gaklene' nool wizebka' lle' ni, san bseleene' to yell zit' daa le Sarepta, daa llia gaozə yell Sidónna', gana' goklene' to nool wizeb zoa na'.

27 Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Síriana' biyone', beena' le Naamán.

28 Na' yog' ben'ka' lle' gana' chdop chllaggake' le bllaagake' daa wna Jesúza' ka'.

29 Na' lii wzolla'tegake' bibejgake' Jesúza' yella', na' bche'gake'ne' to ga ze bdiñj xen wal, goklall'gake' lljachixgake'ne'.

30 Per Jesúza' bicheje' ladje'ka' na' ziyaje'.

Bibej Jesúza' dii xiwaa yoo to ben'

(Mr. 1:21-28)

31 Jesúza' wyaje' Capernaúma', sto yell daa llia gana' mbani Galileana', na' bli' bsdile' ben'ka' lla sabda', llana' chombaan ben' Israelka'.

32 Na' bibangakile' ka chli' chsedi Jesúza', la' bli' bsdile' legake' lega ben' nap yel' wnabia'.

33 Na' gana' chdop chllaggake', len to ben' yoo dii xiwaa na' bgosyaan le' zillj wal, chi'e:

³⁴ —jwayi neto', Jesús, ben' Nazaret! ¿Abido' kwenche wlliyoo neton'? Nad' nombi'a li', na' nezd' nako' liizelozi ben' li ben' shao' che Chios.

³⁵ Na'ch bsheshlen Jesús'a dii xiwaa, golle'n:

—jLizə wzoa! jBichej!

Na' chwiate ben'ka' bchix btoł dii xiwaa beena', na' bichejan na' bikzə gayile' bi goki.

³⁶ Na' yog' ben'ka' lle' na' bibangakile', na' che' ljwellgake':

—¿Naktekan nak cho'a xtill' beeni, lla? Ka chneze' chillesh dii xiw'ka' yoo ben' daa napchgue' yel' wñabia' na' yel' wak.

³⁷ Na' doxen na' wze dill' ka nak daa chon Jesús'a.

Biyon Jesús'a tobiin che Simón Pédróna'

(Mt. 8:14-15; Mr. 1:29-31)

³⁸ Na' biza' Jesús'a gana' chdop chllaggake' na' biyaje' lill Simónna'. Na' tobiin che Simónna' bi shawee, yoochgue' dii lana', na' wñabgakile' Jesús'a gaklene'ne'.

³⁹ Na'ch wbig' Jesús'a kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

Jesús'a biyone' ben' zan

(Mt. 8:16-17; Mr. 1:32-34)

⁴⁰ Na' ka ba chxoa wbillā', ben'ka' lle' na' jwa'gake' lao Jesús'a ben'ka' chak wde wdeli yillwe'. Na' bxoā neena' to togake' na' biyakgakile'.

⁴¹ Na' bibeje' dii xiwaa yoo ben' zan, na' ka bichejgakan chosyaagakan zillj inleeb, che'gakan:

—Lin' nako' Xiin Chioza'.

Na'ch bsheshlen Jesús'a legakan. Bi bi'e latj inegakan la' nezgakin len' nake' Crístóna', beena' chbez ben' Israelka' wsel' Chioza' inabi'e.

Wda Jesús'a bi'e Cho'a Xtill' Chioza' Galileana'

(Mr. 1:35-39)

⁴² Ka wyeeni', bchej Jesús'a yella' na' wyaje' ga kono lle'. Per ben' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaañlene' legake'.

⁴³ Na'ch goll Jesús'a legake':

—Łekzka' chiyāł' chixje'id' ben'ka' lle' yell yoblə ka nak yel' wñabia' che Chioza', la' daan bselee nad'.

⁴⁴ Na' wda Jesús'a wdixji'e cho'a xtill' Chioza' to to gana' chdop chllag ben' Israelka' choe'łwillgake' Chioza'.

5

Wxengake' bel' zan

(Mt. 4:18-22; Mr. 1:16-20)

¹ To shii bllin Jesús'a cho'a nido' che Genesareta' na' bllin ben' zan wal axt bdakwyillgake'ne', daa cheengakile' wzenaggake' cho'a xtill' Chioza'.

² Na' ble'i Jesús'a chop barkw chi'gakan cho'a nido'na'. Ba bichej ben' wxen belka' na' ba chiyibgake' yixj che'ka'.

³ Na'ch wyoo Jesús'a loo barkw che Simónna', na' wñabile'ne' wllig' zilateen loo nido'na'. Na' wche' Jesús'a loo barkwa' na' wzoloe' bli' bsedile' ben'ka'.

⁴ Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wzāl'le yixj chelena' kwenche senle belka'.

⁵ Na'ch che' Simónna':

—Maestro, do yel ba bennto' llinna' na' ni tlish'b bi bdołinto', per shi kan' no', wzāl'chnto' yixjki.

⁶ Na' ka bzāl'gake' yixj che'ka', wxenan bel' zan inleeb. Na' ka nan yibejgake' yixja' wzolo chcheza'n.

⁷ Na' blaa neeka' beṅ'ka' lle' loo barkwa' sto kwenche jaklengake' legake'. Na' ka bllin beṅ'ka', na'ch bissha'chagake' chopte barkwka' axt ba chakgakan ka dii kwe' yel.

⁸ Ka ble'i Simón Pédróna' ka gok, bḥek' xibe'na' lao Jesúza' na' chi'ene':

—Bikwasgach kwitii Xan', la' beṅ' saaxyaz nad'.

⁹ Golle'ne' ka' daa bibanile', na' ka'kzə beṅ'ka' lene' bibangakile' daa bdoḷ' beḷ' zan inleeb.

¹⁰ Na' lekzka' bibani Jacóbona' len Juanna' xiin Zebedewa', la' lengaken' nakgake' txen Simónna'. Na' che' Jesúza' Simónna':

—Bi illebo'. Kon ka chono' naa chbejo' beḷki loo nisi, ka'kzan gono' yibejo' beṅ' lao dii mala'.

¹¹ Na' ka billinlengake' barkwka' cho'a nisdona', na'zə bkwaangake'n len xshinlaze'ka' na'ch janogake' Jesúza'.

Biyon Jesúza' to beṅ' chake' yillwe' daa le lepra

(Mt. 8:1-4; Mr. 1:40-45)

¹² Na' shlak zoa Jesúza' to yell, bllin to beṅ' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bḥek' xibe'na' lawe'na' na' bḥek' yichje'na' axt lo yona' na' got'yoile'ne', chi'ene':

—Xan', nezid' wak yikwaso' yillwe'ni chak' shi cheenilo'.

¹³ Na'ch Jesúza' bxoā neena' yichj beena', na' chi'ene':

—Cheenid'x. Na' naate yikwasan'.

Na' kon ka golle' ka' lii biyakteyi beena'.

¹⁴ Na'ch che' Jesúza'ne':

—Kono yoo ka ba beṅ' cho'. Lete wyaj lao bxoza' kwenche ile'ile' ba biyakilo', na' jwa' daa chiyaḷ' lljoo che Chioza' daa nllia dii Moiséza' bia' kwenche inezi beṅ' ba biyakilo'.

¹⁵ Na' la'kzi golle'ne' ka', zizikchli wzeyi che', na' beṅ' zan bdop bllaggake' kwenche bzenaggake' cho'a xtilleena' na' kwenche biyone' bittezə yillwe' dii chakgake'.

¹⁶ Per Jesúza' yooloe' chaje' ga kono beṅ' chak kwenche chjelwille' Chioza'.

Biyon Jesúza' to beṅ' net ni'a neena'

(Mt. 9:1-8; Mr. 2:1-12)

¹⁷ To lla ka chli' chsedi Jesúza', xonj fariseoka' na' beṅ'ka' chli' chsedi leya', na' beṅ'ka' za' yog' yellka' daa mbani Galileana' na'ch daa mbani Judeana' na' lekzka' beṅ' za' yell Jerusalenna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' beṅ'ka' bi shao'.

¹⁸ Na'ch bllin to chop beṅ' nḷengake' to beṅ' net ni'a neena' nxoagake'ne' to lo daa. Goklall'gake' sho'lengake'ne' loo yoona' kwenche lljwa'gake'ne' lao Jesúza',

¹⁹ per bi gok sho'lengake'ne' daa nyichachga beṅ'ka' loo yoona'. Na'ch wyepgake' koll' yoona'lə na' bkwasgake' dexka' kwenche gok bletjgake'ne' do daa che'na' ladj beṅ'ka' lle' na' kwenche blline' lao Jesúza'.

²⁰ Na' ble'i Jesúza' le nḷenilall'gake'ne', na'ch chi'e beṅ' we'na':

—Bish'dawaa, ba biyakxen saaxya cho'ka'.

²¹ Na'ch beṅ'ka' chli' chsedi leya' na' fariseoka' wza'lall'gake', chakgakile': “¿Nora beeni chonz kwine' ka Chioza'? iLa' toz Chiozan' chak chizi'xene' saaxya che beṅ'!”

²² Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka'?

²³ ¿Achakile chyalljchid' yel' wak xench yep' beeni: “Ba bizi'xen' saaxya cho'na'”, ka daa yepee: “Biyas na' bigoo nez’?”

²⁴ Na' wliid' le', nad', Beṅ' Bsel' Chioza', nap' yel' wṇabia' yell-lioni kwenche yizi'xen' saaxya che beṅ'.

Na'ch golle' beena' net ni'a neena':

—Naa nia' li', biyas, bitob daa cho'na' na' biyaj lillo'na'.

²⁵ Na' lii biyaste beena' chwiate beṅ'ka' lle' na', bitobe' daa che'na' bizee ziyaje' lill-le' choe'lawee Chioza'.

²⁶ Na' yog'lol beṅ'ka' bibangakile' na' be'la'ogake' Chioza', na' do chllebzgake' che'gake':
—Naanlla ba ble'icho dga chonan ka chibanicho.

Gox Jesúza' Levína'

(Mt. 9:9-13; Mr. 2:13-17)

²⁷ Ka biza' Jesúza', na' ble'ile' to beṅ' wiçhixj lie' Leví, chi'e gana' chçhixjgake'. Na' chi'ene':

—Da, dino nad'.

²⁸ Na'ch lii wzolla'te Levína', wlej yichje' xshine'na' na' janoe' Jesúza'.

²⁹ Na' Levína' bene' to lni xen che Jesúza' lille'na'. Na' wyaj beṅ' zan beṅ' wiçhixjka' na' zi baḷ beṅ' yoblə wdaogake' txen.

³⁰ Na' fariseoka' na' beṅ'ka' chli' chsedi leya' wzologake' chakdil-lengake' beṅ'ka' nak Jesúza' txen, che'gake':

—¿Berache cheej chaolenle beṅ' wiçhixjka' na' beṅ' malka'?

³¹ Na'ch che' Jesúza' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'.

³² Aga bid' ni che beṅ'ka' nak beṅ' li beṅ' shao', san bid' kwenche yep' beṅ' saaxyaka' chiyal' yiyaj yilengakile'.

Wnabgakile' Jesúza' che wbasaa

(Mt. 9:14-17; Mr. 2:18-22)

³³ Na' wnabgakile' Jesúza', che'gake'ne':

—Beṅ'ka' nak Juanna' txen na' beṅ'ka' nak fariseoka' txen zekizezi chzoagake' wbas' na' choe'lwillgake' Chioza'. Na' ¿berache beṅ'ki nakgake' li' txen bi chzoagake' wbas'?

³⁴ Na' chi'e legake':

—Kat' de to yel' wishagna', aga wak gonle byen beṅ'ka' chdop chllag soagake' wbasaa shlak zoalengake' bi'na' chshagna'. Na' ka'kzan beṅ'ki nakgake' nad' txen, cheej chaogake' naa zoen' legake'.

³⁵ Per wllin lla wkwas beṅ' nad' ladje'ka', kana'chan soagake' wbasaa.

³⁶ Na' lekzka' bzoe' sto jempl, chi'e legake':

—Ni to beṅ' bi chçhogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wnelebin lech' koba'.

³⁷ Na' ni kono chgaa vinona' daa zi' chchejte to loo yid gola'. La' shi no gon ka', vino koba' wchezaan yid gola' na' chopten kwiayi'.

³⁸ San vino koba' chiyal' shollan loo yid koba'.

³⁹ Na' lekzka' to beṅ' ba yooloe' cheeje' vino gola' aga weenile' yeeje' dii koba', daa chziachile' dii gola'.

6

Wdishjgake' do che trígona' lla sabda'

(Mt. 12:1-8; Mr. 2:23-28)

¹ To lla sabd, llana' chombaan beṅ' Israelka', wdelen Jesúza' beṅ'ka' nakgake'ne' txen to ga naz beṅ' trígona', na' beṅ'ka' zejlengake'ne' wzolo wdishjgake' trígona' na' wxobgake'n wdaogake'n.

² Na' baḷ fariseoka' gollgake' legake':

—¿Biçhe chonzle daa bi chiyal' goncho llani chombaancho?

³ Na'ch che' Jesúza' legake':

—¿Abin' wlable gana' cho'en dill' ka ben dii Davina' len beṅ'ka' nakgake'ne' txen ka wdongake'?

⁴ Wyo'e loo lill xlatj Chioza' na' wdoyoe' yetxtilka' daa naki che Chioza' daa toz bxoza' de lsens gaogake'. Na' lekzka' bi'en beṅ'ka' nakgake'ne' txen.

⁵ Na' lekzka' chi'e fariseoka':

—Nad', Beṅ' Bsel' Chioza' Yell-lioni, chṅabi'a lao llani chombaṅcho.

Biyon Jesúza' to beṅ' lla sabda'

(Mt. 12:9-14; Mr. 3:1-6)

⁶ Na' sto lla sabd, llana' chombaṅ beṅ' Israelka', wyaj Jesúza' gana' chdop chllaggake' choe'llwillgake' Chioza' na' wzoloe' chli' chsedile' legake'. Na' ladj beṅ'ka' len to beṅ' net nee de shlina'.

⁷ Na' fariseoka' na' beṅ'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaṅgake', kwenche gaogake' xya che'.

⁸ Na' gokbe'i Jesúza' daa chza'lall'gake', na'ch golle' beena' net tṅaa neena':

—Wzolla' na' wze gchola'.

Na'ch wzolla' beena', wzie' gchola'.

⁹ Na'ch goll Jesúza' beṅ'ka':

—Ni inabid' le': ¿Beran na leya' chiya' goncho lla sabdka'? ¿Agoncho dii wenna' anti goncho dii mala'? ¿Ayislacho beṅ' anti witchone'?

¹⁰ Na'ch bwia Jesúza' legake', na' chi'e beena' net tṅaa neena':

—Bli noona'.

Na'ch bli neena' na' biyakin.

¹¹ Na' fariseoka' na' beṅ'ka' chli' chsedi leya' le bllaagake' na' choe'gake' dill' nak ka gongake' che Jesúza'.

Wlej Jesúza' postlka' shllin

(Mt. 10:1-4; Mr. 3:13-19)

¹² Na' wyaj Jesúza' to lo yaa kwenche jel'wille' Chioza', na' do yel be'llwille'ne'.

¹³ Ka wyeeni', goxe' beṅ'ka' nakgake'ne' txen na' ladj beṅ'ka' wleje' beṅ'ki shllin na' bsi'e legake' posti:

¹⁴ Simónna' beena' bsi'e Pedro, len beṅ' bishee Andréza', na' Jacóbona', Juanna', Felípena', Bartoloména',

¹⁵ Matewa', Tomáza', Jacobo xiin Alfewa', Simónna', beena' bsi'gake' Zelote,

¹⁶ Judas, beṅ' bish' Jacóbona'* na' Jud Scariota', beena' bene' Jesúza' lo na' beṅ' malka'.

Bli' bsemi Jesúza' beṅ' zan

(Mt. 4:23-25)

¹⁷ Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' beṅ' zan inleeb, beṅ' zaak doxen gana' mbani Judeana' na' yell Jerusalénna', na' beṅ' zaak cho'a nido'na' gana' mbani yell Tírona' na' yell Sidónna'.

¹⁸ Wyajgake' kwit Jesúza' kwenche wzenaggake' xtilleena' na' yiyakgakile' bi yillwe' dii chakgake'. Na' lekzka' biyaki beṅ'ka' chsak'zi' dii xiw'ka' legake'.

¹⁹ Yog'z beṅ' goklall'gake' idi'gake' Jesúza' daa ba nezgakile' chchej yel' wak che'na' na' chiyaki yog' beṅ'.

Ben'ka' zoa mbalaz na' beṅ'ka' bi zoa mbalaz

(Mt. 5:1-12)

²⁰ Na'ch bwia Jesúza' beṅ'ka' nakgake'ne' txen, na' chi'e legake':

—Chakomba le' nakle beṅ' yesh' daa chleble yel' wṅabia' che Chioza'.

²¹ 'Chakomba le' chbiṅ chdonle ṅaa; wllin lla yesh yeljile.

'Chakomba le' chbell-le ṅaa; wllin lla yixill-le.

* **6:16** Beṅ' bish' Jacóbona': beṅ'ka' nsed nagake' chiya' inṅan xiin Jacóbona'.

22 'Chakomba le' shi chakzbani beṅ' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to beṅ' wen dii mal ni cha', nad', Beṅ' Bseḷ' Chioza' Yell-lioni.

23 Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xozxtoe'ka' beṅ'ka' wdixjee daa goll Chioza' legake' kani'yi.

24 'Nyesh'laz gak chele, le' nakle beṅ' wni'a, la'kzi le wen chak chele naa.

25 'Nyesh'laz gak chele, le' de dii cheej chaole naa, la' wllin lla ibil idonle.

'Nyesh'laz gak chele, le' chyitj chxill-le naa; wllin lla kwellyesh'le.

26 'Nyesh'laz gak chele, le' choe'la'o yog' beṅ' le', la' ka'kzə be'la'o dii xozxto'leka' dii beṅ'ka' benzə ka chyixjee daa che' Chioza' legake'.

Chiyal' gakicho beṅ'ka' chakzbani cho'

(Mt. 5:38-48; 7:12)

27 'Le' chzenagle naa, nia' le', li gaki beṅ'ka' chakzbani le'. Li gonigake' wen.

28 Li inabi Chioza' gone' ka gak wen che beṅ'ka' chyishj bia' blag' chele. Li inabi Chioza' gaklene' beṅ'ka' chiya dii nagake' chele.

29 Shi no kap' xag'lana' tlaa, li wze daa zi shlaa. Na' shi no koyo xachel-lena', li we'tega len xkamislana'.

30 Nottezə beṅ' shi bi inabe' chele, li we'n. Na' ka', shi no ikaa bi de chele, bi yinabzilene'n.

31 Li goni beṅ' kon ka cheenile gongakile' le'.

32 'Shi to beṅ'ka' nllagzile chakile, ¿garan de dii wenna' daa chonle? La' ka'klen chon beṅ' saaxyaka'.

33 Lekzka' shi to beṅ'ka' chonzi le' wen chiyonile wen, ¿garan de dii wenna' chonle? La' ka'klen chon beṅ' saaxyaka'.

34 Na' shi choe'le bi choe'le beṅ' daa nezile yigwee wzonna', ¿garan de dii wenna' daa chonle? La' ka'klen chon beṅ' ssaxyaka', choe'gake' bi choe'gake' daa nongake' lez wigoogake' wzon che'ka'.

35 Na' le', naalla, chiyal' gakile beṅ'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' inezi beṅ' nakle xiin Chios, beena' nak beṅ' choo beṅ' xen, la' le' chone' wen che beṅ'ka' bi choe' le' yel' choxken na' beṅ' wen dii malka'.

36 Chiyal' yiyeshii ljwell-le ka chiyeshii Xacho Chioza' yog' beṅ'.

Bi wwia wyile bi chon beṅ'

(Mt. 7:1-5)

37 'Bi wwia wyile bi chon beṅ', kwenche bi gon Chioza' xya chele. Bibi wtobile' beṅ', kwenche bi gaple dol' lao Chioza'. Li si'xen che ljwell-le, na' Chioza' si'xene' chele.

38 Li we' beṅ' bi chyalljile' na' Chioza' yiyone'n. Na' yiyonchle' dii xench, ka chon beṅ' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le beṅ' bi de chele, ka'kzan goni Chioza' le'.

39 Na' bzoa Jesús'a to jempl, chi'e legake':

—Nezicho bi gak to beṅ' lchol wchi'e sto beṅ' lchol, la' choptegake' lljabixgake' to loo yech.

40 Na' beena' chsed bi gak ine': "Chonch' ka beena' chli' chsedile' nad'." Kat'ch yiyoll yido wsede', kana'chan gake' ka beena' bli' bsdile'ne'.

41 '¿Bi'che chwiazo' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'?

42 Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Beṅshki yibej' bicha' yoo loo jalawo'na'?" ;Beṅ' wxiye'! Zigaate bwia cho'na' na' tech wwio' che' bish' ljwello'na'.

Daa chbia to yag chli'n bi yag daa
(Mt. 7:17-20; 12:33-35)

⁴³ 'Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen.

⁴⁴ Ka ile'icho daa chbia to yag, na' chñezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'.

⁴⁵ Ka'kzan beena' nak beñ' wen, choe' dill' wen, la' loo yichjlall'do'enan' yoo dii wenna'. Na' beena' nak beñ' mal, cho'e dill' dii nak mal, la' loo yichjlall'do'enan' yoo dii mala', la' yog' daa chñecho chchejan loo yichjlall'do'chona'.

Chop ben' bengake' twej yoo
(Mt. 7:24-27)

⁴⁶ '¿Berache nazle nad' "Xan', Xan'", na' bi chonle daa nia' le'?

⁴⁷ Ni inia' le' no zaklebi beena' chone' nad' txen na' chzenague' cha' na' chone' ka nia'.

⁴⁸ Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'.

⁴⁹ Na' beena' cheni cho'a xtilaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wlliaiyi'tekkan.

7

Biyon Jesúsza' xmos xan soldadka'
(Mt. 8:5-13)

¹ Ka biyoll be'len Jesúsza' beñ'ka' dill', biyaje' Capernaúma'.

² Na' yella' zoa to beñ' Roma beñ' chñabi'e to guiyoa soldad, na' zoa to xmose' lille'na', beena' le' chakile', na' chake' to yillwe' dii chonan ka witan le'.

³ Na' ka beni xan soldadka' choe'gake' xtill' Jesúsza', na'ch bselee bal beñ' golka' chñabia' Israela' kwenche ljet'yogakile'ne' lljayene' beena' bi shao'.

⁴ Na' ka bllin beñ' golka' kwit Jesúsza', got'yogakile'ne', che'gake':

—Xan soldadka' chidolee gakleno'ne',

⁵ la' le' chakile' cho' beñ' Israel na' len' bene' yoona' gana' chdi'anto' choe'lwillnto' Chioza'.

⁶ Na'ch wyajlen Jesúsza' legake'. Na' ka ba zoa yillingake' lille'na', xan soldadka' bselee bal beñ' nllaguile' kwenche jellgake' Jesúsza' dill'ki:

—Xan', bi sio' wñeyi yido', la' bi chidoḷaa shoo loo lillii.

⁷ Daan bi biyaxjid' yid' kwint' yidtil' li'. La'ch' to chop cho'a dill' shel' ino' na' yiyakile'.

⁸ La' zoa no chñabia' nad', na' lekzka' chñabi'a soldad cha'ka'. Na' kat' chep' toe': "Wyaj ni", na' chaje'. Na' kat' chep' stoe': "Da ni", na' chide'. Na' kat' chep' xmosaa: "Ben dga", na' chone'n.

⁹ Na' ka beni Jesúsza' xtill' beena' na' bibanile', na' biyechje' bwie' beñ'ka' zjanogake'ne', na' chi'e legake':

—Dii li, ni to beñ' Israel biñ' illag' beñ' gonlilall'likze' nad' ka chonlilall' beeni nad'.

¹⁰ Na'ch ziyaj beñ'ka' bsel' xan soldadka', na' ka billingake' lille'na' ble'gakile' ba biyaki xmose'na'.

Bisban Jesúsza' xiin to nool wizeb bi' ba wit

¹¹ Ka wde, na' wyaj Jesúsza' sto yell dii le Naín kon beñ'ka' nakgake'ne' txen na' lench zan beñ' yoblə.

¹² Na' ka bllingake' cho'a yella', ble'gakile' zjakwash' beñ'ka' to bi' wet. Na' bi'na' wit nakb' bi' tlish', na' xna'baa nake' noolə wizeb. Na' beñ' zan beñ' yellka' zjakwash'gake'b'.

¹³ Na' ka ble'i Xancho Jesúsza' noola', na' biyeshile'ne', chi'ene':

—Bi kwello'.

14 Na'ch jabigüee beḅee gana' xoa bi' weta', na' wlez beḅ'ka' nḅengake'b'. Na' golle' bi' weta':

—Bi' xkwid', nia' li', ḅibiyas!

15 Na' bi' weta' lii bibanteb' na' bibe'b' na' wzolo chiḅeb', na' biyon Jesúza'b' lo na' xḅa'baa.

16 Na' ka ble'i beḅ'ka' daa bene', yog'lolze' blleb na' wzologake' choe'la'ogake' Chioza', nagake':

—Ladjchoni ba bla' to beḅ' zakii beḅ' chyixjee daa che' Chioza'ne'.

Na' lekzka' nagake':

—Chiozan' ba blee kwenḅe gaklene' cho' nakcho yell ḅe'.

17 Na' doxen gana' mbani Judeana' na' yellka' lia gaozə wḅezgakile' daa ben Jesúza'.

Ben'ka' bsel' Juanna' lao Jesúza'

(Mt. 11:2-19)

18 Na' beḅ'ka' nongake' Juanna' t xen jayellgake'ne' yog' diika' chon Jesúza'. Na'ch Juanna' wḅie' ḅhope'

19 na' bselee legake' gana' zoa Jesúza' kwenḅe janabgakile'ne' shi leyen'en' beena' lia bia' yid wa shi chiyal' kwezgake' sto beḅ' yoblə.

20 Na' ka bllin beḅ'ka' bsel' Juanna' kwit Jesúza', che'gake'ne':

—Juanna', beena' chchoa beḅ' nisa', bselee neto' kwenḅe zidḅabinto' li' shi li'yen'kzan nako' Crístona', beena' chbeznto' wsel' Chioza' kwenḅe inabi'e, wa shi chiyal' kweznto' stoe'.

21 Na' shlak zegake' na', biyon Jesúza' beḅ' zan beḅ' chak yillwe', na' lekzka' bibeje' dii xiw'ka' yoo beḅ', na' bene' ka ble'i beḅ' zan beḅ' lḅholka'.

22 Na'ch che' Jesúza' beḅ'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' beḅ' lḅholka' chle'gakile', na' beḅ'ka' bi chak sa' chza'gake', na' beḅ'ka' chak yillwe'na' daa le lepra chiyakgakile', na' beḅ' kwelka' chengakile', na' chiban beḅ' wetka', na' chyixje'id' beḅ' yesh'ka' dill' wen dill' kob ḅe Chioza'.

23 Chakomba beena' chajle' ḅha' na' bi chakḅoplallee.

24 Na' ka biza' beḅ'ka' bsel' Juanna', Jesúza' bi'e xtill' Juanna' lao beḅ'ka' lle' na', chi'e:

—¿Nakra nak beena' jawiale latja' gana' bibi chashj chḅeb? ¿Anake' to beḅ' chakḅoplallii ḅhe dill'ka' cho'e?

25 Na' shi bi nake' ka', ¿nakran nak beena' jawiale, shka'? ¿Ato beḅ' nakwe' lech' dii zakii? La' nezkzile beḅ'ka' nakw lech' dii zakii, na' naptegake' bittezə dii chzelall'gake', zoagake' lill beḅ' wḅabia'ka', aga zoagake' latja' gana' bibi chashj chḅeb.

26 Na' ¿nakran nak beena' jawiale, shka'? ¿Ato beḅ' chyixjee daa che' Chioza'ne'? Dii li kan' chone', na' chontechle' ka to beḅ' chyixjee daa che' Chioza'ne'.

27 La' ḅhe beenin cho'e Cho'a Xtill' Chioza' dill' gana' nan:

Wselaa beena' kwialo lawo'na',

na' chixji'e xtilloona' kwenḅe soa beḅ' wzenaggake' ḅho' kat' illino'.

28 Na' nia' le', lao yog'lolte beḅ' yell-lioni, ni to konon' ichej beḅ' zak'teche' ka Juanna'. Per nottezə beena' choe' latj inabia' Chioza' loo yichjlall'do'ena', zak'teche' ka Juanna'.

29 Na' yog'lol beḅ'ka' bchoa Juanna' nisa', no beḅ' wiḅhixjka' na' zan beḅ' yoblə, ka bengakile' daa wna Jesúza', gokbe'gakile' dill' li dill' shao' nak cho'a xtill' Chioza'.

30 Na' fariseoka' na' beḅ'ka' chli' chsedi leya' bi goongakile' wchoa Juanna' legake' nisa', ni bi goklall'gake' gon Chioza' dii wenna' cheenile' gone' ḅhegake'.

31 Na'ch goll Xancho Jesúza' legake':

—¿Bi ka wsaklebid' le' mbanle ḅaa? ¿No ka inia' nakle?

32 Nakle ka bi'do'ka' chbe' gana' chak yaana' na' chosyaagakb' che' ljwellb': “Bkwellnto' blleja' na' bi byaale, na' beḅ'nto' dii chon nyesh', na' ni bi wchell-le.”

³³ La' bid Juan wichoa nisa', na' bi chawe' yetxtil ni bi cheeje' vino, na' nale che': "Dii xiwaan yo'e."

³⁴ Na'ch bid' nad', Ben' Bsel' Chioza' Yell-lioni, na' chle'ile cheej chaw', na' nale cha': "Le ben' waoxat nak beeni na' cheejtie', na' nllagteile' ben' saaxyaka' na' ben' wixhixjka'."

³⁵ Per yel' sin' che Chioza' chli'lawin ka nsa' che ben'ka' chzenaggake' cheyin.

Jesúza' wyaje' lill Simónna', beena' nak fariseo

³⁶ To fariseo wnie' Jesúza' kwenche gaogake' lille'na'. Ka blline' na' wchi'e cho'a mesa'.

³⁷ Na' to noolə wda zoa yella', ka wnezile' zjtao Jesúza' lill farisewa', na'ch wyaje' noxe to lmet de yaj xochi na' yollan set zix.

³⁸ De chbellzile' jabiguae xni'a Jesúza' na' bisbisile' ni'ena' nis xchell che'na'. Na' bisbillile'n yish' yichje'na', na' bnop'e'n na' bwazje'n set zixa'.

³⁹ Na' farisewa', beena' wnie' Jesúza' lille'na', ka ble'ile' ka chon noola', na' gokile': "Shel'ka' dii li nak beeni to ben' chyixjee daa che' Chioza'ne', wakbe'ile' nan nooli chox' ni'ena' nake' ben' saaxya."

⁴⁰ Na'ch che' Jesúza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

⁴¹ Na'ch che' Jesúza':

—Chop ben' chbag'gake' mech che to ben' chon yichjin. Toe' chbaguee gay' guioa mech plat*, na' stoe' chbaguee shiyonan.

⁴² Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no ben'ka' chop gakchile'ne'?

⁴³ Na'ch che' Simónna':

—Chakid' beena' chbag' dii xench.

Na' che' Jesúza'ne':

—Lekzilo', kan' nakan.

⁴⁴ Na'ch bwia Jesúza' noola' na' chi'e Simónna':

—Bwiakachi nooli. Ka wyo'a loo lillo'ni bi beño' nisa' kwenche chib ni'ani, per nooli ba wdibile' nis xchell che'na' ni'ani na' bisbillile'n yish' yichje'na'. ⁴⁵ Bi bnopo' nad', per nooli kon ka wyo'a chnoptezi chnope' ni'ani.

⁴⁶ Bi wdebo' yichjii set, per nooli ba bwazje' set zixa' ni'ani.

⁴⁷ Daan nia' li', la'kzi dii zan saaxya ba ben nooli, ba biyakxengakan daa le chakchgaile' nad'. Na' beena' lat'zə biyakxen che', lekzka' lat'chga chakile' nad'.

⁴⁸ Na'ch golle' noola':

—Ba biyakxen saaxya cho'ka'.

⁴⁹ Na' ben'ka' chi'lengake' Jesúza' txen wzologake' che' ljwellgake':

—¿Nora beeni, lla, axt saaxyaka' chizi'xene'?

⁵⁰ Na' Jesúza' chi'e noola':

—Daa chonlilalloo nad', ba bilo' lao yel' zak'zi'na'. Biyaj mbalaz.

8

Noolka' goklengake' Jesúza'

¹ Ka wde dga, wda Jesúza' zan yell xen na' zan yelldo', chyixji'e dill' koba' nan Chioza' chnabi'e loo yichjlall'do' ben'ka' chzenag che'. Na' postl che'ka' shllin chdalengake'ne' txen.

² Na' lekzka' len bal noolka' ba biyone'. Bale' bibeje' dii xiw'ka' wyoogake', na' zi bale' gokgake' yillwe' na' biyone' legake'. Na' ladje'ka' len Mariana', noola' nsi'gake' Magdalena, beena' bibej Jesúza' gall dii xiw'ka'.

* **7:41** Mech plat: dill' griegona' nan denario, na' nakan to mech dii zak' che shlla llin.

³ Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' beñ'ka' jano Jesúza' na' bçhingake' dii de çhegake' kwençhe goklengake'ne'.

Jempl che to beñ' goz goon

(Mt. 13:1-9; Mr. 4:1-9)

⁴ Beñ' zan bllesh to to yell jawiagake' Jesúza', na' ka bdop beñ' zan wal na'ch bseesile' legake' to jempl, chi'e:

⁵ —To beñ' goz goon wzee zeje' goza'. Na' ka zej chzalee biñna', balan bxop cho'a neza' na' blej bshoshj beñ' len, na' bllin byiñka' wdaogakban.

⁶ Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan.

⁷ Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan.

⁸ Na' zi balan bxop lo yo wenna', na' le bgolgakan na' axt do to guiyoa wej wllia to ton. Na' ka biyoll bseesee jempla', na'ch wñie' zilljə chi'e:

—Le' chenile dga nia', li sen wñeyi.

Bzajnií Jesúza' biçhe chzoe' jemplka'

(Mt. 13:10-17; Mr. 4:10-12)

⁹ Na'ch wñab beñ'ka' nakgake'ne' txen bi zejin jempla' daa bseesee.

¹⁰ Na' che' Jesúza' legake':

—Chioza' cho'e latj inezile daa kono ñezkzi, ka chñabi'e loo yichjlall'do' beñ'ka' chzenaggake' che'. Na' beñ'ka' sto chseesid' legake' shgal' jempl, la' la'kzi chle'gakile' bin chon', kon chongake' ka beñ' bi chle'i. Na' la'kzi chengakile' bin nia', aga chajni'gakile'n.

Bzajnií Jesúza' bi zeji jempl che beñ' goz goona'

(Mt. 13:18-23; Mr. 4:13-20)

¹¹ 'Kin zeji jempl che beñ' goz goona': cho'a xtill' Chioza' nakan ka biñna' daa goze'.

¹² Na' zoa beñ' chzenaggake' cho'a xtill' Chioza', na' lii ze'te dii xiwaa chikwasan daa kwençhe bi shajle'gake' na' kwiayi'gake'. Chak çhegake' ka gok che biñna' daa bxop cho'a neza'.

¹³ Na' zoa beñ' chibagakile' chzenaggake' cho'a xtill' Chioza' na' chlebgake'n, per kat' chak bi chak çhegake' na' chbej yichjgake'n. Chak çhegake' ka gok che biñna' bi bde loinna' daa bxopan lo yaja'.

¹⁴ Na' zoa beñ' chzenague' cho'a xtill' Chioza', per chi'ch yichjgake' daa chak çhegake' na' che yel' wni'ana', na' che bichlə dii chzelall'gake', na' bi chakchagake' lo xnez Chioza'. Chak çhegake' ka gok che biñna' bxop ladj yag yesh'ka'.

¹⁵ Na' zoa beñ' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bittezə dii chak çhegake'. Beñ'kin chak çhegake' ka gok che biñna' bxop lo yo wenna' daa le wllia.

Jempl che to kandil

(Mr. 4:21-25)

¹⁶ Biga zoa to beñ' chxene' kandila' na' chdose'n to dii wkwashaan daa wa chzoe'n xan xlague'na', san chzoe'n sibə kwençhe ile'i beñ'ka' sho' loo yoona'.

¹⁷ Na' lekzka' yog'lolte dii ngash' ñaa, wllin lla yila' lawin, na' daa kono ñezi ñaa, wllin lla inezi beñaan.

¹⁸ 'Li wzenag dga nia' le' ñaa. Beena' chzenag zizikchli shajni'chile', na' beena' bi chzenag, daa ba bzenague' lat', yog'lolan yiyal-lallee.

Xña' Jesúza' len beñ' bisheeka'

(Mt. 12:46-50; Mr. 3:31-35)

¹⁹ Na'ch bllin xña' Jesúza' len beñ' bisheeka' gana' zoe', na' bi gok ibig'gake' kwite'na' daa lle' beñ' zan.

²⁰ Na' wbig' to beṅ' golle' Jesúza':

—Xṅoona' len beṅ' bishooka' lle'gake' lesh' chyoonā' na' cheengakile' wshaljengake' li'.

²¹ Na' goll Jesúza':

—Beṅ'ka' chzenaggake' cho'a xṅill' Chioza' na' chongake' ka nan, legaken' nakgake' xṅa' na' beṅ' bishaa.

Jesúza' bkweze' to be' wal lo nido'na'

(Mt. 8:23-27; Mr. 4:35-41)

²² To lla wyoo Jesúza' to loo barkw len beṅ'ka' nakgake'ne' txen na' golle' legake':

—Techo shlaalə nido'ni.

Na'ch wza'gake'.

²³ Na' shlak ngoo barkwa' nez, wtes Jesúza'. Na'ch wze to be' wal lo nido'na' na' wzolo chas chat' nisa' na' biyollan loo barkwa', na' zi lat'zə nan kwe'n yel.

²⁴ Na' jasbangake' Jesúza', che'gake'ne':

—¡Maestro! ¡Maestro! ¡Ba chbe'cho yel!

Na' wyas Jesúza' na' bsheshlene' be'na' len nido'na'. Na' wlezkakan, bich bi gok.

²⁵ Na'ch golle' legake':

—¿Abi chonlilall'kzle nad'?

Na' legake' le chllebgake' na' le chibangakile' na' che' ljwellgake':

—¿Nora beeni lla?, axt be'na' na' nido'na' chzenaggakan che'.

Bibej Jesúza' dii xiwaa yoo to beṅ' Gadara

(Mt. 8:28-34; Mr. 5:1-20)

²⁶ Na'ch bllingake' yell-lío che beṅ' Gadáraka', daa lliā shlaa nido'na' ndil yell-lío che Galileana'.

²⁷ Ka bichej Jesúza' loo barkwa' jabig' to beṅ' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'.

²⁸ Na' ka ble'ile' Jesúza', besyee na' jaçhek' xibe' lawe'na', na' zillj inlleb chi'e:

—Jwayiz nad', Jesús Xiin Chios, beṅ' nak liizelozi beṅ' choo beṅ' xen. Ben goklen bi wsak'zi'o nad'.

²⁹ Gollan ka' daa ba chon Jesúza' byen yichejan. Ba wlla chṅabi'an le' na' la'kzi chchejgake' ni'a neena' gdenna', lobe' chçhogue'n. Na' dii xiwaa chtadon le' na' chjsoe' ga kono beṅ' lle'.

³⁰ Na' che' Jesúza':

—¿Bin lio'?

Na' chi'e:

—Legiōnan lia'.

Golle' ka', la' zanannan' yo'e.

³¹ Na' got'yogakin Jesúza' bi wseleegakan gana' kwiayi'gakan.

³² Na' gaozə zoa to yaa gana' lle' kush zan chaogakb. Na' dii xiw'ka' wzeyidgakan wṅabgakin Jesúza' wi'e latj yiyoogakan kushka', na' bi'e latj.

³³ Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bdiṅj na' jshoogakb loo nisa' na' witgakb.

³⁴ Na' beṅ'ka' chap kushka' ka ble'gakile' daa gok, biyajdogake' jazengakile'n beṅ'ka' lle' yella' na' beṅ'ka' lle' lyixaa.

³⁵ Na'ch bllesh beṅ'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'.

³⁶ Na' beṅ'ka' ble'gakile' daa gok, gollgake' beṅ'ka' zi' bllin nakan gok biyaki beena' wyoo dii xiw'ka'.

³⁷ Na' yog'lol ben' Gadáraka' got'yogakile' Jesúza' yizee lalle'ka' daa le chllebgake' ka bene'. Na' biyo'e loo barkwa' ziyaje'.

³⁸ Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

³⁹ —Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

Biyon Jesúza' noola' bexee xe'na' na' lekzka' xiin Jairona'

(Mt. 9:18-26; Mr. 5:21-43)

⁴⁰ Ka billin Jesúza' shlaa nisdona', le chiba chizaki ben'ka' lle' na', la' yog'zgake'n chbezgake' le'.

⁴¹ Na'ch bllin to ben' le Jairo, nake' to ben'ka' chgoo xnezi cheyi diika' chon ben' Israelka' gana' chdop chllaggake' choe'llwillgake' Chioza'. Na' bchek' xibe'na' lao Jesúza' na' got'yoile'ne' shaje' lille'na',

⁴² daa ba chakshwet bi' nool che'na'. Nakb' to bi' tlish' tyaj, na' ka do shllin yizib'. Na' shlak zej Jesúza' ben' zan janogake'ne' axt bdakwyillgake'ne'.

⁴³ Na' ladj ben'ka' zjano Jesúza' len to noolə ba gok shllin yiz chzoe' wbaana'. Na' ba blliyee yog' dii de che' daa chajtezi chaje' lao ben' wen rmechka', na' ni to kono gok yiyon le'.

⁴⁴ Na'ch wbiguee koll' Jesúza' bexee xe'na', na' katena' lii biyakteile'.

⁴⁵ Na'ch goll Jesúza' ben'ka' zjano le':

—¿No beena' ba bex' nad'?

Na' ni to kono bcheb. Na'ch goll Pédrone'ne':

—Maestro, ben'kin chdakwyillgake' li' na' chllig'gake' li' to ki to ka'lə. ¿Biche nazo': "Non ba bex' nad'?"

⁴⁶ Na' che' Jesúza' legake':

—Nochodan' ba bex' nad', la' gokbe'teid' bchej yel' wak cha'na'.

⁴⁷ Na' noola', ka gokbe'ile' aga wak wkwashee, do chllebze' jachek' xibe'na' lao Jesúza'. Na' lao yog'lol ben'ka' lle' na', golle' biche bex'ze' xe'na' na' daa bexeen lii biyakteile'.

⁴⁸ Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbalaz.

⁴⁹ Ni choe'telə Jesúza' dill' ka bllin to ben' wzee lill Jairona', na' jelle'ne':

—Ba wit bi' cho'na'. Bich gonilo' Maestroni zed.

⁵⁰ Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

⁵¹ Na' ka bllingake' lille'na', aga be' Jesúza' latj sho' ben' yoblə, lete Pédrone', Jacóbona', Juanna' na' xaxna' bi' weta'zə.

⁵² Yog'lol ben'ka' lle' lill Jairona' chbellgake' daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbaan.

⁵³ Na' bxill-ləgake' che', la' nezgakile' ba witbaan.

⁵⁴ Na'ch bex' Jesúza' na' bi' wetdo'na' na' wnie' zilljə, chi'e:

—Biyas, bi'do'.

⁵⁵ Na'ch bibam' na' lii biyasteb'. Na' goll Jesúza' legake' we'gake' dii gaob'.

⁵⁶ Na' xaxna'baa le bibangakile', na' che' Jesúza' legake' ni to kono ye'gake' daa gok.

9

Ben'ka' shllin jtixje'gake' cho'a xtil' Chioza'

(Mt. 10:5-15; Mr. 6:7-13)

¹ Na' bitop Jesúza' ben'ka' shllin, na' bi'e legake' yel' wak na' yel' wñabia' kwenche yibejgake' yog'lol dii xiw'ka' yoo ben' na' yiyongake' ben' che'i yillwe'.

² Na' bselee legake' kwenche llje'gake' dill' ka nak yel' wñabia' che Chioza', na' yiyon-gake' ben'ka' bi shao'.

³ Na' chi'e legake':

—To ka chazlen li shaj. Bi gox'le yag bar, bi wa'zle yixj ga koo xshinlazle, bi wa'le dii gaole, ni mech, na' ni zi shkwe' xale.

⁴ Na' yoonā' gana' illinle, na'tezə soale axt ka illinch lla yiza'le.

⁵ Na' yella' gana' bi wlebgake' le', kat' yiza'le, yishible bishtena' llia ni'aleka' kwenche gakbe'gakile' aga wenan chongake' bi chlebgake' cho'a xtil' Chioza'.

⁶ Na'ch wza' ben'ka' nakgake'ne' txen na' wyajgake' to to yell wdixje'gake' dill' wen dill' kob che Chioza' na' biyongake' ben'ka' bi shao'.

Wit Juanna', beena' bchoa ben' nisa'

(Mt. 14:1-12; Mr. 6:14-29)

⁷ Heródeza', beena' wñabia' gana' mbani Galileana', benile' yog' daa chon Jesúsza'. Na' chakile' nora beena', la' bal' ben' nagake' dii Juan wichoa nisan' ba bibane' dii yoblə.

⁸ Na' zi bale' nagake' Eliázan' ba bila' dii yoblə. Na' zi bale' nagake' nochod' dii ben'ka' wdixjee daa goll Chioza' legake' kani'yin ba biban ladj ben' wetka'.

⁹ Na' Heródeza' wne':

—Nad' ben' mandad wchog yen dii Juanna'. ¿Noraz beena' chenzid' nagake' chiya dii chone', lla?

Na' le goklall' Heródeza' ile'ile' Jesúsza'.

Jesúza' bwawe' gayaa mil ben'

(Mt. 14:13-21; Mr. 6:30-44; Jn. 6:1-14)

¹⁰ Na' ka billin postika' shllin, na' gollgake' Jesúsza' yog'lol diika' jengake'. Na'ch bchi'e to lezgake' yella' le Betsaida.

¹¹ Na' ka wñezi ben'ka' ba zej Jesúsza', na'ch wloogake' nez zjanogake'ne' na' ka bllingake' lawe'na', blebe' legake' na' bzajniile' legake' ka nak yel' wñabia' che Chioza', na' biyone' ben'ka' bi shao'.

¹² Na' ka ba wlle', ben'ka' shllin jabig'gake' kwit Jesúsza' na' gollgake'ne':

—Goll ben'ki yiyajgake' yellka' wa no ranshdo'ka' llia gaozə lljadiljgake' dii gaogake' na' ga guesgake', la' ga ni zoacho bikzə bi de.

¹³ Na' che' Jesúsza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel, lechozə shi willjxi'chnto' che yoguee.

¹⁴ Gollgake'ne' ka' la' ka do gayaa mil ben' byoka' lle' na'. Na'ch che' Jesúsza' ben'ka' shllin:

—Li ye'gake' kwe' shiyon wejgake'.

¹⁵ Na' bzoagake' xtillee na' wlekgake' ben'ka'.

¹⁶ Na'ch be' Jesúsza' yetxtilka' gay' na' belka' chop. Na' blis jalawe'na' yabana' bi'e Chioza' yel' choxken, na' bxoxje'n na' bi'en ben'ka' nakgake'ne' txen na'ch be'gake' che che ben'ka'.

¹⁷ Na' yog'gake' wdao ka beljgakile', na' diika' bichoonan bitopgake'n biyakten shllin xet'.

Pédrona' bi'e dill' nan Jesúsza'n beena' wlej Chioza' inabi'e

(Mt. 16:13-19; Mr. 8:27-29)

¹⁸ To shii ka choe'llwill Jesúsza' Chioza', na' lle' ben'ka' nakgake'ne' txen, na' wñabile' legake':

—¿Non na ben'ka' nak'?

¹⁹ Na' che'gake'ne':

—Bale' nagake' nako' dii Juan wichoa nisa', na' zi bale' nagake' nako' Elíaza', na' zi bale' nagake' nako' to ben' wdixjee daa goll Chioza'ne' kani'yi, na' ba bibane' ladj ben' wetka'.

²⁰ Na'ch chi'e legake':

—Shera le', ¿nora nale nak'?

Na'ch che' Pédrona'ne':

—Lin' Crístona', beena' ncheb Chioza' wselee.

²¹ Na'ch goll Jesúza' legake' ni to kono ye'gake' ka'.

Goll Jesúza' postl che'ka' wit ben' le'

(Mt. 16:20-28; Mr. 8:30-9:1)

²² Na' chi'e legake':

—Kon ka nchogbia' cha', nad', Ben' Bsel' Chioza' Yell-lioni, biya dii wchi' wsak'gake' nad'. Na' ben' golka' chñabia' wzoagake' nad' ka'lə na' ka'kzə bχozka' chñabia' na' ben'ka' chli' chsedi leya'. Na' chonan byen witgake' nad', na' ka gak shon lla yiban' ladj ben' wetka'.

²³ Na'ch golle' yog'lolé':

—Shi no cheeni gon nad' txen, chiyal' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa.

²⁴ La' beena' bi chzani yel' mban che'na' yen ile'ile' bittez ni cha', beenan' kwiayi'. San beena' chzani yel' mban che'na' ni cha', beenan' gat' to yel' mban che' zejli kani.

²⁵ Bibi zjanayin gap ben' yog'lol daa de yell-lioni, shi le' kwiayee.

²⁶ Nottezə ben' chiyi chido'i nad' na' che cho'a xtilaana', ka'kz nad', Ben' Bsel' Chioza' Yell-lioni, yiyi yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'.

²⁷ Na' dii li nia' le', bal-le lle'le ni, ni mbanle kat' wli' Chioza' yel' wñabia' che'na'.

Jesúza' biyake' nlla'lə

(Mt. 17:1-8; Mr. 9:2-8)

²⁸ Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' bchi'e Pédrona', Juanna' na' Jacóbona'.

²⁹ Na' shlak choe'lwille' Chioza', biyak cho'alawe'na' nlla'lə, na' biyak xe'na' xtil axt chey cheeni'n.

³⁰ Na' gokxe chop ben' bshaljlengake'ne', toe' dii Moiséza' na' beena' sto Elíaza'.

³¹ Na' yel' chey cheeni'na' nechjan legake'. Na' chshaljlengake'ne' che ka nak yel' wita' ile'ile' Jerusalénna'.

³² Na' Pédrona' len Juanna' na' Jacóbona' le chakxwesgake', per bendiplall'gake' bi wtesgake', na'ch ble'gakile' yel' chey cheeni' che Jesúza' na' che ben'ka' zi chop bllin kwite'na'.

³³ Na' ka ba chikwas dii Moiséza' na' Elíaza' kwit Jesúza', Pédrona' golle' Jesúza':

—Maestro, jle wen zoacho nizə! Gonnto' shonə ransh, to cho', to che dii Moiséza' na' sto che Elíaza'.

Na' ni bi gokbe'i Pédrona' bin golle'.

³⁴ Na' ni choe'tie' dill', ka wze to bej gana' lle'gake' na' bkwashaan legake'. Na' le bblebgake' ka gokbe'gakile' ba yoogake' loo beja'.

³⁵ Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

³⁶ Na' ka wde goll Chioza' legake' ka', na' ble'gakile' stozə Jesúza' ze. Na' ni to kono gollgake' daa ben ble'gakile'.

Biyon Jesúza' to bi' wew'yoo dii xiwaa

(Mt. 17:14-21; Mr. 9:14-29)

³⁷ Betyo, ka biyetjgake' lo yaana', ben' zan wal jatilgake' legake'.

³⁸ Na'ch ladj ben'ka' wne to ben' byo zillj, chi'e Jesúza':

—Maestro, ben goklen bwiagach bi' cha'ni, la' tlish' tyajchgabaan zoa.

³⁹ Dii xiwaa choxa'n leb' na' tokonganz chosyaab', na' chonan ka chazb' shon̄ axt chbia bllin' cho'abaa. Na' chiya dii chonin leb', na' aga cheenin wsanan leb'.

⁴⁰ Ba got'yoid' ben'ki nakgake' li' txen yibejgachgake' dii xiwaa yoob', na' bi gokgake' yibejgake'n.

⁴¹ Na'ch che' Jesúza':

—¿Zi'tegalə chelena', le' ben' mal na' ben' bi chajle'! ¿Zi ka'k'tek chiya'l' soalen' le'? Na' ¿zi ka'k'tek chiya'l' soid' le'? Da diwa' bi' cho'na' ni.

⁴² Na' ka zej bi'na' kwit Jesúza' na' wchoon̄ dii xiwaa leb' lo yona' na' wyazb' shona' sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa.

⁴³ Na' yog' ben'ka' lle' na' bibangakile' daa ble'gakile' yel' wak xen che Chioza'.

Sto shii wdixjee Jesúza' witgake'ne'

(Mt. 17:22-23; Mr. 9:30-32)

Na' shlak chibani yog' ben'ka' ble'i daa ben Jesúza', na' golle' ben'ka' nakgake'ne' txen:

⁴⁴ —Li wzeyen' nagle dga inia' le': gongake' nad', Ben' Bsel' Chioza' Yell-lioni, lall' na' ben'ka' chakzi' chakzbani nad'.

⁴⁵ Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bblebgake' inabgakile'ne' bi zejin daa golle' legake'.

¿Noran zak'chi?

(Mt. 18:1-5; Mr. 9:33-37)

⁴⁶ Na' wzolo chakdil'-len ljwellgake' nogaken' nak ben' zak'chi.

⁴⁷ Ka gokbe'i Jesúza' daa chza'lall'gake', na'ch wdoyoe' to bi'do' na' bzie'b' kwite'na'.

⁴⁸ Na' chi'e legake':

—Nottezə ben' wlebe' laa to bi'do'zə ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' ben' zak'chi ladjlena'.

Beena' bi chakile' cho' zi', txenkzan nake' cho'

(Mr. 9:38-40)

⁴⁹ Na'ch goll Juanna'ne':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben'. Na' bllonnto' gone' ka', la' bi nake' cho' txen.

⁵⁰ Na' che' Jesúza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

Jesúza' bsheshlene' Jacóbona' len Juanna'

⁵¹ Na' ka ba zoa yiyaj Jesúza' yabana', na'ch btoblallee yiyaje' Jerusalénna'.

⁵² Na' bselee ben' wllialozegagake' na' wyajgake' to yell daa mbani Samáriana' jtiljgake' gana' yigaane'.

⁵³ Na' ben' Samáriaka' bi blebgake'ne' daa nezgakile' Jerusalénna'lan yiyaje'.

⁵⁴ Na' chop ben'ka' nakgake'ne' txen, Jacóbona' len Juanna', ka ble'gakile' ka ben ben' Samáriaka', na' che'gake' Jesúza':

—Xan', ¿acheenilo' inabinto' Chioza' wselee yi'na' kwenche sheytega ben'ki?

⁵⁵ Na' biyechj Jesúza' bsheshlene' legake', chi'e:

—Aga nezile non chnabia' yichjlall'do'lena' nazle ka'.

⁵⁶ Nad', Ben' Bsel' Chioza' Yell-lioni, aga zaa kwenche wlliyaa yel' mban che ben', san zaa kwenche yisla' yel' mban che'kan'.

Na'ch biyajgake' yell yoblə.

Ben'ka' goklall' lljano Jesúza'

(Mt. 8:19-22)

⁵⁷ Na' ka zejgake' tneza', to beṅ' chi'e Jesúza':

—Xan', cheenid' sa'len' li' gattezə shajo'.

⁵⁸ Na' che' Jesúza'ne':

—Zoa yech ga chiyoo bez'ka', na' byindo'ka' non lilldo'gakb, san nad', Beṅ' Bseḷ' Chioza' Yell-lioni, biga de yigaan'.

⁵⁹ Na'ch che' Jesúza' sto beṅ':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

⁶⁰ Na'ch che' Jesúza'ne':

—Bibi gakilo', wikwash'kzə ljwell beṅ' wetka'. San li', jtixje'i beṅ' ka nak yel' wṅabia' che Chioza'.

⁶¹ Na'ch sto beṅ' yoblə chizi'e Jesúza':

—Xan', cheenid' sa'len' li' per zigaate be' latj ljalaaach' dill' bish' ljwell'ka'.

⁶² Na' che' Jesúza'ne':

—To beṅ' chwaane' goon, aga wak wwie' gozkoll'lə. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.

10

Jesúza' bselee guiyon shllin beṅ' jtixje'gake' cho'a xtilleena'

¹ Na' ka wde dga, Jesúza' wleje' zi guiyon shi beṅ'* na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'.

² Na' golle' legake':

—Dii li nia' le', dii xen wal daa yizi' yilaple de, na' to choptgui wen linka' zoa. Na' li inabi Chioza', beena' nak xan llinna' wsel'stoe' wen linka' kwenche yizi' yilapgake'n.

³ Li shajshki naa, nad' chselaa le' ka xil'do' ba zej ladj ba zṅia. ⁴ Bi wa'le ga koo xshinlazle, ni mech, ni zi shkwe' xel-le; na' bi shazile wwaple beṅ' chiox tneza'.

⁵ Na' ka sho'le to lill beṅ', zigaate wwaplene' chiox, ye'lene': “Soashgale mbalaz, le' zoale yooni.”

⁶ Na' shi zoa beṅ' cheenile' soe' mbalaz, na' yel' mbalaza' yigaanlenan le'. Na' shi bi cheenile', na' yibiilenan le'.

⁷ Na' yoonā' gana' illinle na'tezə yigaanle na' yeej gaole kon bi gongake' le', la' to wen llin chiyal' ikaa laxje'. Na' bi lljsoale to to yoo.

⁸ Kat' illinle to yell ga wlebgake' le', yeej gaotezle bittezə dii gongake' le'.

⁹ Na' yiyonle beṅ'ka' bi shao' yella', na' ye'le legake': “Yel' wṅabia' che Chioza' ba bla'n laoleni.”

¹⁰ Na' shi illinle to yell ga bi wlebgake' le', li yide lyell, li ye'gake':

¹¹ “Axt bishte che yell cheleni wllia ni'anto'ni chibibnto'n kwenche gakbe'ile aga wenan chonle bi chleble cho'a xtil' Chioza'. Na' li koosha yichjle dga inanto' le', yel' wṅabia' che Chioza'n ba bla'n laoleni.”

¹² Na' nia' le', beṅ'ka' lle' yellka' gana' bi wlebgake' le', dii xench nak yel' zak'zi'na' ile'gakile' aga ka beṅ' yell Sodómaka' llana' wchoglo Chioza' che beṅ'.

Ben'ka' bi bzenag xtil' Jesúza'

(Mt. 11:20-24)

¹³ iNyesh'laz gak chele, le' beṅ' yell Corazín na' le' beṅ' yell Betsaida! La' shel' gok yel' wakka' yell Tirona' na' Sidónna' ka diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazjgake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'.

* 10:1

14 Kat' illin lla w̄choglo Chioza' che ben', yel' zi' xench ile'ile aga ka ben' yell Tíroka' na' ben' yell Sidonka'.

15 Na' le' ben' yell Capernaúm, bi gonle lez yillinle yabana', la' Chioza' wzalee le' gana' sak'zi'le.

16 Na'ch che' Jesúza' ben'ka' bselee:

—Ben'ka' chzenaggake' chele, cha'kzan chzenaggake'. Na' ben'ka' bi chlebgake' le', nad'kzan bi chlebgake'. Na' beena' bi chlebe' nad', lekzka' bi chlebe' Chioza', beena' bsel' nad'.

Billin ben'ka' guiyon shi

17 Na' ben'ka' guiyon shi† le chibagakile' ka billingake' kwit Jesúza', na' che'gake'ne':

—Xan', axt dii xiw'ka' chilleshgakan ka chzetjnto' lio'na'.

18 Na'ch che' Jesúza' legake':

—Ble'id' Satanáza' daa chnabia' dii xiw'ka' bxopan yabana' ka chxop to yi' wziw'.

19 Nad' ba ben' le' yel' waka' kwenche la'kzi gad' no bel znia wa no bexjoni' le' aga bi gakile', na' wlej wshoshjtele yog' daa chon dii xiwaa.

20 Per bi yibaile daa chisheshle dii xiw'ka', san li yibayi daa ba da' lelana' lee libra' de yabana'.

Jesúza' bibaile'

(Mt. 11:25-27; 13:16-17)

21 Na' katena' Espíritu Sántona' bene' ka bibachgayi Jesúza', na' wne':

—Xa, li' nako' Xan yabana' na' yell-lioni, na' choe'lawaa li' daa ba bliilo' ben'ka' bibi chajni daa bi bliilo' ben' sin'ka' na' ben'ka' nteyi. Kan' ba wyazlalloo gono', Xa.

22 'Xa'na' ba none' lall' na' yog'te dii de. Na' ni to kono nezi noyen'an' nak' nad' Xiine'; toz Xa'na' nezile'n. Na' ni to kono nezi noyen'an' nak' Xa'na'; toz nad' Xiine' nezid', na' chon' ka inezi ben'ka' cheenid' inezgakile'n.

23 Na'ch biyechje' bwie' ben'ka' nakgake'ne' txen, chi'e legake':

—Chakomba ben'ka' chle'gakile' diika' chle'ile naa.

24 Nia' le' ka', la' zan ben'ka' wdixjee daa goll Chioza' legake' na' zan ben' wnabia'ka' goklall'gake' ile'gakile' diiki chle'ile naa, na' bi ble'gakile'n. Goklall'gake' yengakile' dga chenile naa, na' bi bengakile'n.

To ben' Samaria bene' to dii wen

25 Na'ch wbig' to ben' chli' chsedi leya' wnabile' Jesúza' kwenchezə inezile' shi wak yillii Jesúza' xtilleena', na' wnabile'ne':

—Maestro, ¿bin chiyal' gon' kwenche gat' to yel' mban cha' zejli kani?

26 Na'ch che' Jesúza'ne':

—¿Bin na leya' chiyal' goncho? ¿Bi na daa chlabo'?

27 Na'ch beena' chli' chsedi leya' chi'e:

—“Chiyal' gakicho Xancho Chioza' do yichj do lall'cho, do ka nak fuerz chechona', na' axt ga zeelo chajniicho; na' gaki bish' ljwellcho ka chaki kwincho.”

28 Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban cho' zejli kani.

29 Na' beena' bi goklall' wnít kwine', na'ch chi'ene':

—¿Noran bish' ljwell'?

30 Na'ch che' Jesúza'ne':

—To ben' ziyo'e nez daa ziza' Jerusalénna' daa ziyaj Jericólə, na' bchej wbanka' tneza' wlangake' yog'te diika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'.

† 10:17

³¹ Na' shintk gok ka' ka wde to b̄xoz lo neza'. Na' ka ble'ile' beena' de na', to wdeze' ka'lə.

³² Na' lekzka' wde to beñ' nake' xiin dia che dii Levína'. Na' ka ble'ile' chtoĭ beena' na', lekzka' to wdeze' ka'lə.

³³ Na' sto beñ' Samaria lekzka' zeje' tneza' ka ble'ile' beena' chtoĭ na', na' biyeshile'ne'.

³⁴ Na' jabigüee kwite'na', na'ch bllie' lo we'na' set na'ch vino, na' b̄cheje'n. Na' bilepe'ne' koll' bayix' che'na', biçi'ene' to yoo gana' wdape'ne'.

³⁵ Na' betiyo, ka ba zoa yiza' beñ' Samáriana', wleje' chop mech plat‡, na' bi'en xan yooná' kwenche gap wwie'ne' zan lla, na' chi'ene': "Wdap bwiagach beeni, na' shi bi gaki mechi chkwaan', na' yiyixja'n kat' zizaa dii yoblə."

³⁶ Na' çnora beñ'ki shon chakilo' beni bish' ljwell beena' wlan beñ' wbanka'?

³⁷ Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiyal' gono'.

Jesúza' jawie' Mártana' na' Maríana'

³⁸ Na' shlak ngoo Jesúza' nez, blline' to yelldo' na' to noolə le Marta blebe'ne' lille'na'.

³⁹ Na' zoa to beñ' bil Mártana' lie' María, na' Maríana' wchi'e lao Jesúza' chzenague' dillaa cho'e.

⁴⁰ Na' Mártana', dechga daa gone' na' wzeche' wñeyi cheyin, na'ch wyaje' kwit Jesúza', chi'ene':

—Xan', goll-lat' beñ' bila'ni gaklene' nad'. Toz' ndakw' yog' mandadka'.

⁴¹ Na' che' Jesúza'ne':

—Marta, Marta, chi'chga yichjo' na' zechgo' wneyi cheyi diika' gono'.

⁴² Per toz daa de nakan dii lialloch na' Maríani ba wleje'n, na' kono gakyikaan lawe'na'.

11

Bli' Jesúza' nak we'lwillgake' Chioza'

(Mt. 6:9-15; 7:7-11)

¹ Shlin choe'lwill Jesúza' Chioza' to latj, na' ka biyoll be'lwille'ne', to beena' nake'ne' txen golle'ne':

—Xan', bli'yi neto' nakan chiyal' we'lwillnto' Chioza', ka ben Juanna' bli' b̄sedile' beñ'ka' bengake'ne' txen.

² Na'ch che' Jesúza' legake':

—Kat' we'lwill-le Chioza' kin inale:

Xanto' Chios, beñ' zoa yaba,

we'la'oshga yog'lol beñ' li'.

Na' inabia'gacho' loo yichjlall'do' yog'lol beñ'

kwenche gak lo yell-lioni ka chazlalloo, kon ka chak yabana'.

³ Ka nak daa choño' cheej chaonto' yog' lla, bengachan ñaanlla.

⁴ Wxi'xen chento', ka chon neto' chzi'xennto' bittezə dii choni beñ' neto'.

Bi we'gacho' latj ibixnto' gonnto' daa bi nak wen, san bislagach neto' lo ñi'a na' dii mala'.

⁵ Na'ch che' Jesúza' legake':

—Inatezcho shi zoa to beñ' nllaguile na' do chel shajle lille'na' na' ye'lene': "Beñ' bish'dawaa, beñ' shloll nad' shon yetxtil,

⁶ la' ba bla' lilla'na' to beñ' nllaguid', zee zit', na' bikzə bi de cha' wshabidee."

⁷ Na'ch beena' yoo loolə lii inatie' le': "Bi gonzilo' nad' zed, ba nsejl' lillii na' ba delen' bi' cha'ki. Aga wak chas' gon' daa chyalljilo'."

‡ 10:35 Mech plat: dill' griegona' nan denario, na' nakan to mech dii zak' che shlla llin.

8 Na' nia' le', la'kzi nllagteile'ne', bi chase' wi'ene' daa chnabile'ne'. San shi seyide' inabe'n, chen ki cheenile' chase' wi'e yog' daa chyalljile.

9 Daan nia' le': Li inabi Chioza' bin cheenile na' gone'n. Li yiyiljan na' willelkzilen. Li wtankw lee puerta', na' wsaljke'n.

10 La' beena' chnabile' to bi chnabile' ben', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsaljkzgake'n.

11 'Ka chak chele le' nakle ben' chisgol chischoo bi'do', ka inabi xiinlena' le' yetxtila', aga we'leb' to yaj. Wa shi inabib' le' to bel gaob', aga we'leb' to bel znia.

12 Wa shi inabib' le' to lit gaob', aga we'leb' to bexjoni'.

13 Le' naktele ben' mal, chak we'le xiinleka' daa nak dii wen. iNa' Xacho Chioza' zoa yabana' nakteche' ben' wench! Na' wi'e Espiritu Santo che'na' soe' loo yichjlall'do' yog' ben' inabe'ne'.

Nagake' Jesúza' chibeje' dii xiw'ka' kon yel' wak che Bezlona'
(Mt. 12:22-30; Mr. 3:19-27)

14 Jesúza' chibeje' to dii xiw' yoo to ben' bi chak inie', na' ka bichejan na'ch gok binie'. Na' ben'ka' lle' na', bibangakile' daa bene'.

15 Na' bale' che'gake':

—Kon yel' wak che Bezlona', daa chnabia' dii xiw'kan', chibeji beeni dii xiw'ka'.

16 Na' zi bale' wñabgakile'ne' gone' to yel' wak dii ile'gakile' kwenche wli'n shi Chioza'kzan bseleene'.

17 Na' ba nezli Jesúza' daa chza'lall'gake', na'ch chi'e legake':

—Shi ben'ka' lle' to yell gake' choplæ na' til-len ljwellgake', na' kwiayi' yella', shi naa. Na' lekzka' shi ben'ka' lle' toz yoo til-len ljwellgake', aga ssha soagake' toz.

18 Na' ka'kzə Satanáza' na' dii xiw'ka' yoo lo na'yin, shi gake'gakan choplæ na' kwiayi' yel' wñabia' cheyinna'. Nia' le' ka' daa nale yel' wak che Bezlonan* chibejid' dii xiw'ka' yoo ben'.

19 Shi chibej' dii xiwaa yoo ben' kon yel' wak che Bezlona', † ¿sheralæ ben'ka' nakle txen? ¿Alezkza' lennan' chibejlengake' dii xiwaa yoo ben'? Daa bi nakan ka', chli'n naklejlilen.

20 Na' daa chibej' dii xiwaa yoo ben' kon yel' wak che Chioza', lennan' chli'n ba bla' yel' wñabia' che Chioza' ladjleni.

21 'Kat' to ben' wal nape' dii gonile' znia na' chape' lille'na', aga no gak lljtoyo dii de che'.

22 Per shi illin sto ben' walch til-lene'ne', na' gone'ne' gan, na'ch yigoyoe' yog' daa none' lez wñiaile', na' kwantie' yog' daa yoo loo lille'na' na' wi'e lat' wej che ben'ka' nakgake'ne' txen.

23 'Beena' bi nake' nad' txen, chakzbanile' nad'. Na' beena' bi chaklen kwenche wzenag ben' cho'a xtill' Chioza', len' chsej chllone' wzenaggake'n.

Chillin dii xiwaa sto shii gana' bichejan
(Mt. 12:43-45)

24 'Kat' chichej to dii xiw' dii yoo ben', na' chjadan ga bibi dekzə na' chyiljan gana' yizi'lalliin. Na' shi bi chllelin gana' yizi'lalliin na'ch chakin: “Yiyaachkz' dii yoblæ gana' bichejkz'.”

25 Na' ka chillinan gana' bichejan, nakan ka to loo yoo dii nxi nloa na' nakan xochi.

26 Na'ch chza'n chxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlæ mal che beena' aga ka gok che' dii nech.

Chakomba beena' chzenag cho'a xtill' Chioza'

27 Na' shlak che' Jesúza' ka', to noolæ zie' ladj ben'ka' lle' na' wñie' zilljə, chi'e:

—iChakomba noola' wxane' li' na' bwall bxo'pe' li'!

* 11:18 Bezlonan': lekzannan' Beelzebú de xtil na' nakan sto le Satanáza'. † 11:19 Bezlona': lekzannan' Beelzebú de xtil na' nakan sto le Satanáza'.

²⁸ Na' che' Jesúza'ne':

—¡Mbalazch beṅ'ka' chzenaggake' cho'a xstill' Chioza' na' chongake' ka nan!

Ben'ka' bi chajle' che Jesúza' wṅabgake' wli'e to yel' wak

(Mt. 12:38-42; Mr. 8:12)

²⁹ Na' bdi'a bllagch beṅ'ka' kwit Jesúza' na' golle' legake':

—Le' zoale ṅaa, nxinj yichjlall'do'leka'. Chṅable wliid' le' to yel' wak, na' aga wliid' le' daa cheenile. Lete ile'ile to dii nak ka yel' waka' daa ben Chioza' che dii Jonáza'.

³⁰ Daa gok che Jonáza' bli'n yel' wak che Chioza' lao beṅ' Níniveka'. Kakzə nad', Beṅ' Bsel' Chioza' Yell-lioni, wli'a yel' wak che Chioza' laolena', le' zoale ṅaa.

³¹ Na' llana' wḥoglo Chioza' che beṅ', na' yiban noola' wṅabia' do lli'lə, na' gawe' xya chele lao Chioza', le' zoale ṅaa, ine' chiyal' sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' beṅ' zak'chi ka dii Salomónna', na' bi chzenagle cha'.

³² Na' lekzka' llana' wḥoglo Chioza' che beṅ', na' yiban beṅ' Níniveka' na' gaogake' xya chele lao Chioza', le' zoale ṅaa, inagake' chiyal' sak'zi'le. La' legake' biyaj bileni saaxya che'ka' ka be'len Jonáza' legake' cho'a xstill' Chioza', na' nad' zoa' ni, nak' beṅ' zak'chi ka dii Jonáza', na' bi chzenagle cha'.

Jalaochona' nakan ka to yi' che kwerp chechona'

(Mt. 5:15; 6:22-23)

³³ Na' lekzka' chi'e legake':

—Biga zoa beṅ' chxene' to kandil na' chzoe'n to ga ngash' wa wdoseen to dii wk-washaan len, san chzoe'n sibə kwenche ile'i beṅ'ka' sho' loo yooná'.

³⁴ Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i jalawo'na', kwerp cho'na' zoan lo yel chola'.

³⁵ Na' bsak' wze wṅeyi kwenche ki lwaa to' lo beeni'na', tazo' lo yel cho'la'la.

³⁶ Shi doxen kwerp cho'na' yoon beeni', na' ni to dii shgasj shḥol bi yoon, na' ile'ilo' kwaslöl ka chle'ilo' kat' ze to yi' chzeeni'n doxen.

Jesúza' chsheshlene' fariseoka' na' beṅ'ka' chli' chsedi leya'

(Mt. 23:1-36; Mr. 12:38-40; Lc. 20:45-47)

³⁷ Na' ka biyoll be' Jesúza' dillaa, na' bḥe' to fariseo le' lljtawe' lille'na'. Na' wyoo Jesúza' lille'na' na' wchi'e cho'a mesa'.

³⁸ Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'.

³⁹ Na'ch che' Xancho Jesúza'ne':

—Le' fariseo nakle ka xig' yeeṅ dii nyib xise' tcho'a tlawin na' lo'inna' besjan. Chaki beṅ' le beṅ' wen nakle, len le' chibaile chkaale bi de che beṅ' na' chibaile chonle bichlə dii mal.

⁴⁰ ¡Le' beṅ' bi nteyi! ¿Abi chakbe'ile Chioza', beena' ben kwerp chechoni, lekze'n bene' yichjlall'do'choni?

⁴¹ Li izani bi de chele, li we'n beṅ' bibi de che', na'ch yixi' yiyech yichjlall'do'lena'.

⁴² ¡Nyesh'laz gak chele, le' fariseo! Choe'le Chioza' lat' wej‡ no yixwej, no kwanirod na' bichlə yix' kwan dii mbekle. Na' bi chonle daa nak shlichá na' bi chakteile' Chioza'. La' daayen'an llialach gonle per lekzka' bi wsanle kweje daa chṅab Chioza'.

⁴³ ¡Nyesh'laz gak chele, le' fariseo! Le' chibaile kwe'le gana' chbe' beṅ'ka' zakii gana' chdop chllagcho choe'llwillcho Chioza', na' cheenile yog' beṅ' kwee le' balaan ga lle' lla' beṅ'.

⁴⁴ ¡Nyesh'laz gak chele, daa nakle beṅ' wxiye'! Nakle ka to ba che beṅ' wet dii bi nla' lawinna' dii bi chle'i beṅ' na' chaj chdegake' lawinna', ni bi chakbe'gakile' bin naki loolə.

‡ 11:42 Lat' wej: literalmente la décima parte.

⁴⁵ Na'ch to beena' chli' chsedi leya' golle' Jesúza':

—Maestro, daa no' ka' len neto' chzoazi'yoo.

⁴⁶ Na' goll Jesúza':

—i'Lezkka' nyesh'laz gak chele, le' chli' chsedile leya'! Dii zan dii che'le beñ' chiya'l' gongake', na' nakan ka to yoa' xen dii chwa'le legake' dii kono soyi, na' le' bikz bi chda na'le kwenche gaklenle legake'.

⁴⁷ 'iNyesh'laz gak chele! Le' chonshao'zle cho'a ba che dii beñ'ka' wdixjee daa goll Chioza' legake', beñ'ka' bet dii xozxto'leka'.

⁴⁸ Na' daa chonle ka' zejin chonle txen dii xozxto'leka' ka nak daa bengake'. La' legaken' betgake' beñ'ka', na' le' chonshao'le cho'a ba che'ka'.

⁴⁹ 'Na' daan, lo yel' sin' che Chioza' wne': “Wselaa beñ' chixjee daa yeppee na' len beñ' wi'e cho'a xtilaana', na' bale' witgake' na' zi bale' biya dii gongakile'ne'.”

⁵⁰ Na' le' zoale naa, lenle ile'ile ka yel' zi'na' ile'i beñ'ka' blalj xchen dii beñ'ka' wdixjee daa goll Chioza' legake', wzolozan ka wxw wzil yell-lioni.

⁵¹ Le' zoale naa, lenle chidol'le sak'zi'le ni che yel' wit che dii Abela' axt dii Zacaríaza', beena' betgake' cho'a yoodo'na' kwit gana' chzeygake' bayix'ka'.

⁵² 'iNyesh'laz gak chele, le' chli' chsedile leya'! La' nazle chsedile beñ' che Chioza', per ni le' bi cheenile wzenagle daa nan, na' chllontele shajni beñ'ka' chzenagan.

⁵³ Na' ka goll Jesúza' ka', beñ'ka' chli' chsedi leya' na' fariseoka' zizikli bllaagake' na' wzologake' chongakile'ne' zed wal wñabgakile'ne' chiya dii nak lallj,

⁵⁴ goklall'gake' we' Jesúza' dill' dii wchixa'n le'.

12

Dill' wxiye' che fariseoka' zaklebin levadúrana'

¹ Na'ch bdop bllag beñ' zan inleeb gana' zoa Jesúza' axt chdakw ljwellgake', na' wzoloe' zigaate be'lene' beñ'ka' nakgake'ne' txen dill', chi'e:

—Wsak'gale bi shajle'le dill' wxiye' che fariseoka' daa zaklebi levadúrana'.

² La' daa kono nezi naa, wllin lla inezi beñaan, na' yog'lol' daa ngash' naa, wllin lla ila' lawin.

³ Na' yog' daa chakile kono beni daa wnale, wllin lla inezgakile'n. Na' daa wnale ka yoole loolə nsejshoshle yoona', axt gosya'i beñ' wzie'n dill'.

Beena' chiya'l' illeblecho

(Mt. 10:26-31)

⁴ 'Le' nllaguid', nia' le' bi illeble beñ'ka' witgake' le', la' kachokzan zeelo gak gongakile' le'.

⁵ Per ni inia' le' non chiya'l' illeble: li illeble Chioza', la' ka yiyoll yikee yel' mban chelena' lezkka' nape' yel' wñabia' wzalee le' lo yi' gabi'la'. Len', li illeble.

⁶ 'Nezicho wak si'cho gay' byindo' kon chop sintabdo'. La'kzi aga bitek zak'gakb, ni tob bi mbej yichj Chioza'.

⁷ Na' ka'kzə le', axt to to yish' yichjlana' mbab. Na' bi illeble, la' zak'chle aga ka zan byindo'ka'.

Beñ'ka' chchebgake' nakgake' Crístona' txen

(Mt. 10:32-33; 12:32; 10:19-20)

⁸ 'Na' nia' le', beena' wcheb lao beñ' nake' nad' txen, lezkka' nad', Beñ' Bsel' Chioza' Yell-lioni, wi'a dill' lao yog'lol' anjl che Chioza', yepgakee beeni nake' nad' txen.

⁹ San beena' bi wcheb nake' nad' txen, lezkka' nad', wi'a dill' lao yog'lol' anjl che Chioza', yepgakee beeni bi nake' nad' txen.

¹⁰ 'Na' beena' biz gon ina cha', nad', Beñ' Bsel' Chioza' Yell-lioni, wizi'xen Chioza' che', san beena' ine zban che Espíritu Sántona', aga wizi'xen Chioza' che'.

11 'Kat' lɿjwa'gake' le' lao beŋ'ka' chŋabia' gana' chdop chllagcho choe'lwill-cho Chioza', wa lao beŋ' chchogbia' che beŋ' wa lao joschis, bi sele wŋeyi naklə yilliile cho'a xtill' beŋ'ka' wa bin inale.

12 La' kat' inele, Espiritu Sántona'kzan wzajniile' le' daa chiyał' inale.

Dii nxolla' nsa'yel' wni'ana'

13 Na' ladj beŋ'ka' ndop nllag wŋe to beŋ', golle' Jesúza':

—Maestro, gollgach beŋ' bishaana' gone' daa chidoł' ikaa che dii xanto'na'.

14 Na' che' Jesúza'ne':

—¿Nora bzoa nad' ladjleni ka to beŋ' chon yel' joschis che beŋ' wa beŋ' chlāa bi dii de che beŋ'?

15 Na' lekzka' chi'e:

—Li wsak' kwenche bi selall'le gat'ch bi gat' chele, la' aga dii kan' llialo lo yel' mban chelena'.

16 Na'ch bzoe' to jempl, chi'e legake':

—Wzoa to beŋ' wni'a na' dii zan bizi' bilape' lo yell-lío che'na'.

17 Na'ch chakile': “¿Nakra ka gona'n naa? Biga de kooshawaa dga bizi' bilap'.”

18 Na'ch wne': “Ba nezid' bi gon'. Yichinj' yoonā' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichlə dii de cha'.

19 Na'ch zan yiz yizia' banez che daa ngooshawaa, na' yizi'lallaa na' yeej gaw', na' soa' mbalaz.”

20 Na' goll Chioza'ne': “Li, beŋ' bi nteyi, naanlle' gueto' na' daa ngooshawoo, nola cheyi gakan.”

21 Kan' gak che beena' chtop chshag yel' wni'ana', na' bibi zakee lao Chioza'.

Chioza' chap chwie' beŋ'ka' nak xiine'

(Mt. 6:25-34)

22 Ka wde dga, Jesúza' golle' beŋ'ka' nakgake'ne' txen:

—Naa nia' le': Bi sele wŋeyi che daa yeej gaole, ni bi sele wŋeyi che xalaanlena'.

23 La' zak'techlə yel' mban chelena' aga ka daa yeej gaole, na' zak'tech xkwerplena' aga ka xalaanlena'.

24 Li wwiakachi bechjka', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' legakb. Na' le', naa, zak'techle aga ka bado'ka' ze lo llazə.

25 Ni tole bi gak yischoochle yel' mban chelena' ni zi tgor la'kzi nall inleeb selen wŋeyi.

26 Shi dga nak diido'zə bi chak gonlen, ¿berache zezle wŋeyi che bichlə dii yoblə?

27 Li wwiakachi ka chgol yejdo'ka', len aga bi llin chongakan ni bi cholgakan do. Na' nia' le', ni Salomónna', beena' wdapchga yel' shao'ka', bi bllin gak xe'na' xochi ka yejdo'ka'.

28 Shi Chioza' none' xochi yejdo'ka' ze lyixaa, la'kzi xtitchgan mbanan na'ch wtop beŋ' len wlli'en lo yi'na', ¿alechlin ki gone' chele, la'kzi bitek chajle'le gaklene' le'?

29 Na' daan bi setekle wŋeyi ga sa' daa yeej gaole.

30 La' beŋ'ka' bi nonlilall'gake' Chioza' to daazə chinogake'. Per le', Chioza' nake' Xale, na' nezile' chyalljilen.

31 Li se wŋeyi wzenagle che Chioza' kwenche inabi'e le', na' gonkze' yog' daa chyalljile.

Yel' shao' daa de yabana'

(Mt. 6:19-21)

32 Bi illeble. La'kzi bi nyanle, Xacho Chioza', yel' beŋ' wen che'na', chaklallee yillinle inabia'lenlene' gana' chŋabi'e.

33 Li wit' wde bi de chele, na' li gaklen beŋ' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban.

34 Na' gana' de yel' shao' chelena', na'kzan se yichjlall'do'lēna' wŋeyi.

Chiyal' se kwascho ka yiyed Jesúza'

³⁵⁻³⁶ Na' lekzka' chi'e legake':

—Li gaktó ka wen llinka', beñ'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n.

³⁷ Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'.

³⁸ Chakomba beñ'ka' chbezgake' yillin xane'ka' la'kzi yilline' do chel wa do zbalzə.

³⁹ Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'.

⁴⁰ Ka'kzan le' chiyal' sele wneyi toshiizi kwezle nad', Beñ' Bsel' Chioza' Yell-lioni, la' tokonganə yiyed'.

Wen llinna' chon wen na' beena' bi chon wen (Mt. 24:45-51)

⁴¹ Na'ch wñabi Pédróna' Jesúza', chi'ene':

—Xan', ¿ato neto'zan no' ka', anti che yog' beñaan no' ka'?

⁴² Na'ch goll Xancho Jesúza':

—¿Nakra chakile chon to wen llin wen, beñ' nezi nak gone' llinna', shi xane'na' gone' lall' nee yog'te beñ'ka' zoa loo yoo lille'na' kwenche wweej wwawe' legake' gor cheyin?

⁴³ Chakomba wen llinna' chilalile' chone' daa nak lall' nee ka yillin xane'na'.

⁴⁴ Dii li nia' le', xane'na' gone' lall' nee yog'lol dii de che'.

⁴⁵ Na' shi wen llinna' gakile': “Akza naa yila' xan'na'”, na'ch soloe' gonile' zban wen llinka' sto, ka nool ka beñ' byo, na' soloe' yeej gawe' na' sollile'.

⁴⁶ Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che beñ'ka' bi chongake' daa chiyal' gongake'.

⁴⁷ Beñ' wen llinna' nezi bin cheeni xane'na' gone', na' bi chone'n ni bi zie'n wneyi, na' wit chinchga xane'na' le'.

⁴⁸ Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalə wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lolte diika' bene' lall' nee.

Gak ben' chopla ni che Jesúza' (Mt. 10:34-36)

⁴⁹ Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ñinan.

⁵⁰ Biya dii yen ile'id', na' le ba chakyeshid' axt ni illini llana'.

⁵¹ ¿Achakile bid' yell-lioni kwenche gon' ka soalen ljwell beñ' mbalaz? Aga kan', san daa bid' illaa ljwellgake' na' gaggake' chopla.

⁵² La' naa, shi to yoo lle' gayee, na' gaggake' chopla, shone' til'lengake' beñ'ka' chop, na' beñ'ka' zi chop til'lengake' beñ'ka' zi shonə.

⁵³ Xa bi' byona' til-lene'b', na' leb' til-lem' xabaa. Na' xna' bi' noola' til'lene'b', na' leb' til-lem' xna'baa. Na' noola' til-lene' xoolille'na', na' xoolille'na' til-lene' le'.

Bi chajni'gakile' bi zejín daa chon Jesúza' (Mt. 16:1-4; Mr. 8:11-13)

⁵⁴ Na' lekzka' che' Jesúza' beñ'ka' lle' na':

—Kat' chle'ile ziza' beja' gana' chxoalə wbillá, lii natele: “Wakə yeja'”, na' kayen' chak.

⁵⁵ Na' kat' chde be'na' daa za' lli'lə, na' nale: “Le zey'chga yizak'”, na' kayen' chak.

⁵⁶ ¿Le' beñ' wxiye'! Kat' chle'ile bin chak xan yabana' na' lo yell-lioni nezile beran gak. ¿Bi'che bi chakbe'ile bin zeji daa chon Chioza' llaki zoacho naa?

Chiyal' yiyoe'xencho ben'ka' chao xya checho
(Mt. 5:25-26)

⁵⁷ ¿Biche ki chiyiljle to kwinzle daa nak dii li dii shao'?

⁵⁸ Shi no chao xya chele na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chchogbia' che ben', na' le' gone' le' lo na' beena' wseje' le' lillyana'.

⁵⁹ Na' nia' le', aga wichejle lillyana' axt ki chixjle doxen daa chiyal' chixjle.

13

Chiyal' yiyaj yilenicho dii malka' choncho

¹ Na' lo llana'tezə bllin bal ben' lao Jesúsza' gollgake'ne' ka ben Pilátona' bene' mandad betgake' bal ben' Galiléaka' ka chitgake' bayix'ka' choe'la'ogake' Chioza'. Na' xchene'ka' biyakan toz kon xchen bayix'ka' betgake'.

² Na' che' Jesúsza' legake':

—¿Achakile ben' Galiléaka' betgake' nakchgake' ben' malch aga ka nochlə ben' wlall che'ka'?

³ Nia' le' bi nakan ka'. Shi le' bi yiyaj yilenile dii malka' chonle, lekzka' yog'le kwiayi'.

⁴ Shera ben' Jerusalénka' shin'shonə, ben'ka' wit daa bdakwgake' yoo siba' daa zoa Siloéna', ¿achakile' napchgake' dol' aga ka ben' wlall che'ka'?

⁵ Nia' le' bi nakan ka'. Na' shi le' bi yiyaj yilenile dii malka' chonle, lekzka' yog'le kwiayi'.

Jempl che yag yixwewa' daa bi wllia

⁶ Na'ch bzoa Jesúsza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian.

⁷ Na'ch chi'e beena' chap yell-lío che'na': “Ba gok shon yiz chidwia' shi llian yixwewa', na' ni to bibi chbian. Bchogchoklan, la' nlanchozkan yell-lioni.”

⁸ Na' beena' chape' yell-lío che'na' chi'e: “Xan', zi zoashkin zi twiz na' wcheen' xaninna' na' wllan ben'na'.

⁹ Shera shicholə wbian. Na' shi bi wlliakzan, na' wchogo'n.”

Biyon Jesúsza' to noolə llana' chombaan ben' Israelka'

¹⁰ Na' to lla sabd, llana' chombaan ben' Israelka', chli' chsedi Jesúsza' ben'ka' chdop chllag gana' choe'llwillgake' Chioza'.

¹¹ Na' len to noolə ba gok shin'shon yiz nlew dii xiwaa le', na' bichkzə gok yizie' shli.

¹² Na' ka ble'i Jesúsza'ne' wnie'ne' na' golle'ne':

—Noolə, ba bikwas yillwe' cho'na'.

¹³ Na'ch bxoə neena' koll' noola' na' katena' lii bizetie' shlichə, na' wzoloe' choe'lawee Chioza'.

¹⁴ Na' beena' chgoo xnezi cheyi diika' chongake' gana' chdop chllaggake' blee daa biyon Jesúsza' noola' llana' chombaangake', na'ch chi'e ben'ka' lle' na':

—De xop lla goncho llinna', na' bittezə llaka' yidle kwenche yiyakile, na' bi gonle lez yiyakile' llani chombaanchə.

¹⁵ Na'ch che' Xancho Jesúsza' legake':

—Le' ben' wxiye', ¿abi wsell-le goon cheleka' wa burr cheleka' lljaweejlegakb nisa' llani chombaanchə?

¹⁶ Nooli nake' xiin dia che dii Abrahama', na' ba gok shin'shon yiz Satanáza' daa chnabia' dii xiw'ka' nonan le' ka ben' ncheje'. ¿Ana' chakile bi nakan wen biyonee llani chombaanchə?

¹⁷ Na' ka goll Jesúsza' ka', yog' ben'ka' chakzbangakile'ne' biyii bido'gakile', na' yog' ben'ka' sto bibagakile' daa ble'gakile' yel' wakka' chone'.

Jempl che sa mostásana'
(Mt. 13:31-32; Mr. 4:30-32)

18 Na'ch wna Jesúza':

—¿Nakra ka nak yel' wñabia' che Chioza', lla? Na' ¿bera ka wsaklebida'n?

19 Zaklebin sa mostásana' daa goz to ben' lo yell-lío che'na', na' ka bla'n na' bgolan gokan to yag xen na' axt byiñdo'ka' ben lillbka' lo xoziinna'.

Jempl che levadúrana'
(Mt. 13:33)

20 Na' lekzka' chize' Jesúza':

—Dga sto wsaklebida'n yel' wñabia' che Chioza'.

21 Zaklebin levadúrana' daa chchix to noolə shoña rob yezj kwenche yisgolan kwa che yetxtila'.

Chiyal' sho'cho puertdo'naz
(Mt. 7:13-14, 21-23)

22 Shlak ziyaj Jesúza' Jerusalénna', bidie' yell yelka' na' yelldo'ka' na' bli' bsdile' ben'.

23 Na' bchej to ben' wñabile'ne', chi'ene':

—Maestro, ¿ato chopchga ben' yila bi kwiayi'gake'?

Na'ch che' Jesúza'ne':

24 —Li gon byen sho'le cho'a puert daa nak diido'zə kwenche soalenle Chioza'. La' ben' zan gaklall'gake' sho'gake'n, na' bi gak sho'gake'.

25 Na' ka solla' xan yoona' wseje' puerta', na' le', igaanle cho'a puerta' wtankwle le'inna' na' ye'lene': “Ben'do', bsaljgach kwenche sho'nto'.” Na' xan yoona' ine' le': “Bi nombi'a le' ni bi nezid' ga ben' le'.”

26 Na'ch ye'lene': “Weej wdaolennto' li' txen, na' bli' bsdilo' neto' yell chento'na'.”

27 Na'ch ine' le': “Bi nombi'a le', ni bi nezid' ga ben' le'. Li lljayaak do na'lə yog'lol-le le' ben' wen dii mal.”

28 Na' kwellchgale axt gaoxaxj leylena' daa le gakshejlall'le ka ile'ile dii Abrahama', dii Isaaca', dii Jacoba' na' yog' dii ben'ka' wdixjee daa goll Chioza' legake' lle'gake' yabana' gana' chñabia' Chioza', na' le', bi gok yiyoole.

29 Na' wde wdeli ben' lle' zbii zkaan yell-lioni yillingake' yabana' gana' chñabia' Chioza' na' kwe'gake' gaogake'.

30 Na' bal ben' bi nak ben' zakii naa gakgake' ben' zakii, na' ben'ka' nak ben' zakii naa bich gakgake' ben' zakii.

Wchell Jesúza' ni che ben' Jerusalénka'
(Mt. 23:37-39)

31 Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

32 Na' che' Jesúza' legake':

—Li yiyaj na' li lljayell ben' wxiye'na': “Nin soa' to chop shon lla kwenche yibej' dii xiw'ka' yoo ben' na' yiyon' ben' bi shao', na' sheelo diika' chon'.”

33 Chonan byen kooch' nez naa, wxə len willj kwenche yiyaa Jerusalénna' gana' chitgake' ben'ka' chyixjee daa che' Chioza', la' agagan' witgake' legake' gan yoblə.

34 'iLe' ben' Jerusalén, chitle ben'ka' chiditixjee daa che' Chioza' legake', na' yaja' chitile ben'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiindobka' xan xilba', na' le' bi goonile'.

35 Li koo yichjle dga inia' le', Chioza' kwey yichje' gani zoale. Na' nia' le', aga wle'chile nad' axt kat'ch illin lla inale: “¿Gaklenshga Xancho Chioza' beeni ba bselee!”

14

Jesúza' biyone' to ben' yo'e yi

¹ To lla sabd, llana' chombaꝯ ben' Israelka', wyaj Jesúza' jtawe' lill to fariseo, ben' chꝯabia', na' fariseoka' sto chinaꝯ chinogake'ne'.

² Na' lawe'na' ze to ben' yo'e yi.

³ Na'ch Jesúza' wꝯabile' fariseoka' na' ben'ka' chli' chsedi leya', chi'e legake':

—¿Ade lsens yiyoncho to ben' bi shao' llani chombaꝯcho, anti bi den?

⁴ Na' legake' bikzə bi gollgake'ne'. Na'ch Jesúza' beꝯee beena' yoo yina' na' biyone'ne', na' golle'ne':

—Wak yiyajo'.

⁵ Na'ch chi'e fariseoka':

—Shi to burr chele wa to goꝯ chele ixopb to loo yech to lla chombaꝯcho, ¿abi yibejleb katena' la'kzi nakan llana' chombaꝯcho?

⁶ Na' bikz bi billet-lall'gake' ye'gake'ne'.

Ben'ka' chaxgake' to ga chak wishagna'

⁷ Na' ble'i Jesúza' ka chon ben'ka' wdaolene' lill farisewa', wche'gake' gana' chbe' ben'ka' zakii. Na'ch bseese to jemꝯl, chi'e legake':

⁸ —Kat' no gax le' to ga chak wishagna', bi kwe'le gana' chbe' ben'ka' zakii. La' shera shi ila' ben' zak'chi ka le',

⁹ na' beena' goxe' le' ine': “Wzolla' kwenꝯhe kwe' beeni gani chi'o.” Na'ch do chido'zile yizolla'le na' lljache'le xanteyin.

¹⁰ Na' bi gonle ka'. San kat' no gax le', chiyaꝯ lljche'le xanteyin kwenꝯhe kat' ila' beena' goxe' le' na' ine': “Bish'dawaa, nilə wda kwi'o gani zak'chi.” Na' ka' sho'le balaꝯ lao ben'ka' chi'lenle cho'a mesa'.

¹¹ La' beena' chon kwine' ben' choo ben' xen, Chioza' gone'ne' ben' bibi zakii; na' beena' chakile' bibi zakee, Chioza' gone'ne' ben' choo ben' xen.

¹² Na' lekzka' che' Jesúza' beena' goxe'ne' lille'na':

—Kat' cheenilo' wwawo' ben', bi gaxo' ben' zoalanzo' wen, no ben' bishoo, no ben' dialla cho', ni no ben' wllil cho', ben' nake' ben' wni'a, la' legake' lekzka' wak yigoogake' wzonna' yiwaogake' li' ka beno' chegake'.

¹³ Aga kan' gono', san byi ben' yesh', ben' net ni'a nee, ben' bi chak sa' wen na' ben' lꝯhol. Ben'kan' chiyaꝯ gaxo',

¹⁴ na'ch so' mbalaz. La' ben'kan' aga wak yigoogake' wzon cho', san Chiozan' yigwee wzon cho'na' llana' kat' yisbane' ben' wenka' ladj ben' wetka'.

Jemꝯl che to ben' ben to lni xen

¹⁵ Na' to beena' chi'lene' Jesúza' cho'a mesa', ka benile' wne' ka', na' chi'ene':

—¿Chakomba ben'ka' lljadaogake' gana' chꝯabia' Chioza'!

¹⁶ Na'ch che' Jesúza'ne':

—Wzoa to ben' bene' to lni xen, na' goxe' ben' zan kwenꝯhe shajgake' lille'na' lljtaogake'.

¹⁷ Na' ka gol' gaogake', bselee to wen llin che'na' jelle' ben'ka' ba bye': “Li dagach, la' ba gok daa gaocho.”

¹⁸ Na' yog' ben'ka' janie' wzologake' chche'gake' dill'. Toe' golle'ne': “Zi' bizi'a lat' yellio na' chonan byen lljawia'n. Ye'gacho'ne' si'xene' bi gak yid'.”

¹⁹ Na' beena' sto chi'ene': “Zi' bizi'a gay' kwe' goꝯ na' chonan byen wwia' shi wak gaꝯꝯakb. Ye'gacho'ne' si'xene' bi gak yid'.”

²⁰ Na' beena' sto chi'ene': “Zi' bshagna', na' bi gak yid'.”

²¹ Na'ch biza' wen llinna' jayelle' xane'na' yog' daa goll ben'ka' le'. Na'ch bllaa xane'na' na' chi'e wen llin che'na': “Lobe' jta lyell na' bche' kon no ben' yillago', no ben' yesh', no ben' net ni'a nee, no ben' lchol, na' no ben' bi chak sa' wen.”

²² Na' ka jasane' ben'ka' jatope', na'ch chi'e xane'na': “Xan', ba ben' ka wno', na' ni dech latj sho' ben'.”

²³ Na'ch che' xane'na': “Wyaj do yawi nezka' na' ben byen yid ben'ka' yillago' kwenche yilla' loo lilla'ni.

²⁴ Na' nia' le', ka nak ben'ka' bya' dii nech, ni toe' bi gaogake' daa ba bsini'a.”

Yel' zak'zi'na' yen ile'icho ni che Jesucristona'

²⁵ Ben' zan zjanogake' Jesús'a', na'ch biyechje' chi'e legake':

²⁶ —Shi nole cheeni gake nad' txen, chiya' gachile nad' aga ka xaxna'le, xool-le, xiinle, ben' bish'le, ben' zanle, na' axt yel' mban chelena'. Shi bi gakile' nad', aga wak gake nad' txen.

²⁷ Na' lekzka' beena' bi chzanile' yel' mban che'na', gak bittezə dii gak che', kwenche gone' daa chazlallaa, aga wak gake' nad' txen.

²⁸ Shi nole cheenile gonle to yoo sib wal, zigaate chiya' wwiale ka'k' gaki na' shi waki xmechlena' sheeloin.

²⁹ La' shi ba wlekwle leninna' na' tena' bich bi de wzeeloilen, na' yog' ben'ka' ile'gakile' bi biyollan wxillgakile' le'.

³⁰ Na' inagake': “Kon wdishj beena' len yoona' na' bi goki xmeche'na' wzeeloe'n.”

³¹ Na' ka'kz to ben' wñabia', shi cheenile' til-lene' sto wñabia' yoblə, na' lekzka' chiya' wsakee shi wzo' shi mil ben'ka' nape' til-lengake' beena' nap galja mil ben'.

³² Na' shi gakbe'ile' bi soi ben'ka' nape', na' zi' illinlə ben' wñabia'na' sto, wselee to chop ben' lljellgake'ne': “Bizə tilcho.”

³³ Na' ka' le', shi bi choonlall'le yog' dii de chele, aga wakə gake nad' txen.

Kat' bich zxi' zedaa
(Mt. 5:13; Mr. 9:50)

³⁴ Zedaa nakan dii wen, na' shi bich zxi'n aga wakch yiyonchon zxi' dii yoblə kwenche wchinchon.

³⁵ Ni bi gak wchinchon lwaa ben', san choonchon. Na' le' chenile dga nia', li sen wneyi.

15

Jempl che xilaa wnit
(Mt. 18:10-14)

¹ Yog' ben' wichixjka' na' ben' saaxyaka' jabig'gake' kwit Jesús'a' kwenche bzenaggake' dillaa cho'e.

² Na' fariseoka' na' ben'ka' chli' chsedi leya' wzologake' biz chon chnagake' che Jesús'a', che'gake':

—Chlebtezə beeni ben' saaxyaka' na' chaolenteze' legake'.

³ Na'ch bzoa Jesús'a' to jempl, golle' legake':

⁴ —Shi tole nape to guiyoa xil' na' nit tob, na' wkwaanle baka' taplalj twalj lyixaa na' lljadilje bana' wnit, na' axt kon ka yillelb gonle.

⁵ Na' ka yillelb, yibaile yixoaaleb yaaxizlena'.

⁶ Na' ka yillinle lill-lena' wtople ben'ka' nllaguile na' ben' wlill cheleka', na' ye'le legake': “Li yibaleni nad', la' ba biljel xil' cha'na' bana' wnit.”

⁷ Na' nia' le', ka'kzan chibayi Chioza' len anjl che'ka' yabana' kat' to ben' wen dii mal chiyajile' saaxya che'na' aga ka taplalj twalj ben'ka' bi chonan byen yiyajgakile'.

Jempl che mecha' wnit

⁸ Wa shi to noolə de shi mech plat che' na' nit ton, na' wxene' yi' che'na' na' wloe' loo lille'na' na' yiyilje'n axt ki yillelile'n.

⁹ Na' ka yillelile'n na' wtope' noolka' nllaguile' na' ben' wlill che'ka', na' yee legake': "Li yibaleni nad', la' ba billeg mech cha'na' daa wnit."

¹⁰ Na' nia' le', ka'kzan chibayi Chioza' len anjl che'ka' kat' chiyaj chileni to ben' saaxya.

Jempl che bi'na' benditj xmech xabaa

¹¹ Na' lekzka' che' Jesúza' legake':

—To ben' wzoa chop xiine',

¹² na' bi' neshaa gollb' xabaa: "Xa, bla daa de cho' na' ben' nad' daa chiyal' ikaa." Na'ch bla xabaa daa de che' na' bi'en legakb'.

¹³ Na' aga wlla, biyit' bide bi' neshaa daa bi'eb', na' mecha' daa bex'b' cheyin wya-jlema'n to yell zit' na' jenditjba'n na' jem' kon daa nazan cheb'.

¹⁴ Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'.

¹⁵ Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nlee kushka' kwenche jtapb' legakb'.

¹⁶ Na' daa le chdom' goklall'b' gaob' daa chao kushka', na' ni len bi be'gake'b'.

¹⁷ Na' gokib': "Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni.

¹⁸ Ba ziyachoklə kwit xa'na' na' yepee: Xadawaa, ba bxinj' blen' lao Chioza' na' lawo'na'.

¹⁹ Bich chidolaa gak' xiino', san beni nad' ka nottezə wen llin cho'ki."

²⁰ Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnope'b'.

²¹ Na'ch che'b' xabaa: "Xadawaa, ba bxinj' blen' lao Chioza' na' lawo'na', bich chidolaa gak' xiino'."

²² Na' xabaa chi'e wen llin che'ka': "Lobe'zə li lljlej tgot lech' daa liizelozi nakch na' li wwakwba'n, na' lekzka' li wllin to niy xbemaa na' li wllin yel ni'abaa.

²³ Na' li lljxi' me'do'na' mbejchlawin, li witb kwenche gaochob na' goncho to lni,

²⁴ la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billegb'." Na'ch wzologake' bengake' lnina'.

²⁵ Na' ka wzolo lnina', xiine' bi' necha' chdab' lyixaa. Na' ka billim' gaozə lillbaa, benib' chkwell wikwellka' na' chakte wiyaana'.

²⁶ Na'ch wneb' to wen llinka' na' wñabibee bin chak lillbaa.

²⁷ Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'."

²⁸ Na' xiine' bi' necha' bllaab' na' bi goonib' yiyoob'. Na'ch bchej xabaa got'yoile'b' kwenche yiyoob'.

²⁹ Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' goño' nad' la'ch' to shibdo' kwenche wit'b yeej gaolem' bi'ka' nllaguid'.

³⁰ Na' naa bila' xiino'ni biyit' bideb' yog' daa bi'ob' na' benditj' xmecho'na' kon noolə wdaka', na' ba betzo' me'do'na', bana' le nak, ni cheb'."

³¹ Na'ch che' xabaa: "Xiindawaa, li zoaleno' nad' toshiizi, na' yog' bi' de cha' chekzo' daa.

³² Per chonan byen naa yibaicho na' goncho lnini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billegb'."

16

Jempl che wen llinna', beena' benditj daa de che xane'na'

¹ Na' lekzka' goll Jesúza' ben'ka' nakgake'ne' txen:

—Wzoa to ben' wni'a nape' to wen llin che', na' bene' lo nee yog' dii de che'. Na' wyaj ba| ben' jellgake'ne': “Le chonditj beena' daa beno' lo nee.”

² Na'ch wne xane'na' le', chi'ene': “Ba benid' ka nagake' chono', na' chiya| yidio' kwent diika' ngoo lo no', la' bich gon' xshino'na'.”

³ Na'ch chaki wen llinna': “¿Nakra gona'n naa, bich gon' xan'na' llinna' gon'? Bi soid' gon' llin wal, na' chido'id' yep' ben' yiyesh'gakile' nad' gongake' lat' wej xmech'.

⁴ Ba nezid' nak gon' kwenche wleb ben' nad' lille'ka' kat' bich gat' llin cha'na'.”

⁵ Na'ch goxe' to to ben'ka' chal'gake' che xane'na', na' ben' necha' wnable'ne', chi'ene': “¿Ka'k' chaloo che xan'na'?”

⁶ Na' beena' chi'e: “Chalaa to guiyoa medid* set.” Na'ch chi'ene': “Ni de yisha', lobe'zə wche' na' bda'n shiyonzannan' chaloo.”

⁷ Na' ka wde, wnable' beena' sto, chi'ene': “¿Shera li? ¿Ka'k' chaloo?” Na' beena' chi'ene': “Chalaa to guiyoa gush trigo.” Na'ch chi'ene': “Ni de yisha' na' bda'n taplalj gushzannan' chaloo.”

⁸ Na' xan wen llinna' be'lawee wen llin mal che'na' daa biyiljallee naklan gone'n. La' ben'ka' zech wneyi che daa chak lo yell-lioni, chiyiljal'chgake' nak soalen ljwell-gake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlal'do'eka'.

⁹ Na' nia' le', li wchin yel' shawaa de chele yell-lioni kwenche gaklenle ben', na' kat' ba wde che yel' shawaa, Chioza' wlebe' le' soalenlene' zejli kani.

¹⁰ Na' beena' chon ka chiya| kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiya| kon daa nak lall' nee, ka'kzə gone' shi bitekchlə dii xench koo lall' nee.

¹¹ Shi bi chonle ka chiya| kon yel' shawaa de yell-lioni, bi gonzle lez ikaale yel' shawaa de yabana'.

¹² Na' shi bi chonle ka chiya| kon yel' shawaa nak lall' na'le yell-lioni, ¿nakra gon Chioza' gone' le' yel' shawaa daa gaki chele?

¹³ Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

¹⁴ Na' fariseoka' le chzelall'gake' mecha', na' ka bengakile' dillaa choe' Jesúza', bxill-gakile'ne'.

¹⁵ Na'ch che' Jesúza' legake':

—La'kzi nale nakle ben' wen, Chioza' nezile' nakan nak yichjlal'do'lena'. La' daa chaki ben' yell-lioni nakan dii lliyalote, leyen'lannan' chakzbani Chioza'.

Leya' na' yel' wñabia' che Chioza'

¹⁶ Na' lekzka' che' Jesúza':

—Leya' na' daa bli' bsedi dii ben'ka' wdixjee daa goll Chioza' legake', legakannan' wñabia'gakan axt ka bllin lla bid Juanna'. Na' ka bid Juanna', wzolo chzenag ben' dill' wen dill' kob che yel' wñabia' che Chioza', na' chongake' to dii byen kwenche inabi'e loo yichjlal'do'eka'.

¹⁷ Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

Bi chiya| yilaa ben'ka' nshagna' (Mt. 19:1-12; Mr. 10:1-12)

* 16:6 Medid: to to medidki gokan ka do 37 litr.

18 'Shi to beṇ' byo yilee xoolē'na' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa beṇ' che'na' le', lekzka' chone' ka chon beena' zoalente nool che'na' na' chdalene' noolə yoblə.

Beṇ' wni'ana' na' Lázaronā'

19 Na' chize' Jesúza' beṇ'ka':

—Wzoa to beṇ' wni'a na' chakwe' shgal' lech' dii wen na' yog' lla chaoshawe'.

20 Na' lekzka' wzoa to beṇ' yesh' wlie' Lázaro, na' lliā we'na' doxen kwerp che'na'. Na' tliži chjchi'e cho'a yoo che beṇ' wni'ana',

21 gokile' gawe' la'ch' blaaka' chxop xan mes che'na', na' axt bekw'ka' chleegakb we'na' llie'.

22 Na' bllin lla wit beṇ' yeshaa, na' biče' anjl che Chioza'ne' kwenche jazoalene' dii Abrahamā'. Na' lekzka' wit beṇ' wni'ana' na' bkwash'gake'ne'.

23 Na' dii beṇ' wni'ana' chdezi'chgue' gana' lle' beṇ' wetka', na' blis jalawe'na' na' zit'lə ble'ile' dii Lázaronā' chi'e kwit dii Abrahamā'.

24 Na'ch wnie' zilljə chi'e: “Xadawaa Abraham, biyesh'gachi nad' na' bsel' Lázaronā' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni.”

25 Na' Abrahamā' chi'ene': “Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o.

26 Na' ziznakan sto, ze to bdiṇj xen gcholi, na' aga wak te beṇ'ki yidgake' gana' lle'le, na' beṇ'ka' lle' na' aga wak tegake' yidgake' gani zoanto'.”

27 Na'ch che' beṇ' wnia'na'ne': “Chnabid' li' shka', xadawaa Abraham, ben goklen bsel'gach Lázaronā' lill xa'na'

28 gana' zoa zi gay' beṇ' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni.”

29 Na' Abrahamā' chi'ene': “Napkzgake' daa bzej dii Moiséza' na' daa bzej dii beṇ'ka' wdixjee daa goll Chioza'. jNa' chiyal' wzenaggake'n!”

30 Na' che' beṇ' wnia'na'ne': “Aga wakan, xadawaa Abraham, san shel' to beṇ' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'.”

31 Na' che' Abrahamā'ne': “Shi bi chzenaggake' daa bzej dii Moiséza' na' daa bzej dii beṇ'ka' wdixjee daa goll Chioza', lekzka' aga wyajle'gake' la'kzi yiban to beṇ' wet.”

17

Bi goncho ka ixop beṇ' yoblə gone' dii mala'

(Mt. 18:6-7, 21-22; Mr. 9:42)

1 Na'ch che' Jesúza' beṇ'ka' nakgake'ne' txen:

—Bia'kzə de dii gon ka ixop beṇ' gone' dii mala', per jnyesh'laz gak che beena' wchixe' beṇ' yoblə gone' dii mala'!

2 Wenlan shel' wwal'gake' yene'na' to yaj che molin na' lljazal'gake'ne' loo nido'na' aga ka daa wchixe' to beṇ'ki chajle'gake' cha'.

3 Daan, li wsak'.

'Shi to bish' ljwell-le gone' mal chele, li wsheshlene', na' shi yiyajile' daa bene' chele, li yizi'xen che'.

4 La'kzi axt gall shii shlla gone' bi gone' chele, na' gall shiite ine' le': “Chiyajid' daa ben' cho'”, chiyal' yizi'xenle che'.

Daa gak gon to beṇ' chajle'

5 Na'ch goll postlka' Xancho Jesúza':

—Goklen neto' gonlilall'chnto' Chioza'.

6 Na'ch che' Xancho Jesúza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala': “Blall'shki, na' jsoa loo nisdó' na'lə”, na' gon yaga' daa ye'len, shel'ka'.

Daa chiyal' gon to wen llin

⁷ Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': “Biyoo, na' wche' kwenche gawo'.”

⁸ Aga we'lene' ka', san ye'l-lene': “Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'.”

⁹ Na' ni bi we'lene' yel' choxken daa ba bene' daa che'lene' gone'.

¹⁰ Lekzka' le', kat' ba biyoll benle yog' daa non Chioza' mandad gonle, chiyal' inale: “Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'.”

Biyon Jesúsza' shi ben' chak yillwe' daa le lepra

¹¹ Na' shlak zjada Jesúsza' Jerusalénna', wdie' gana' ndil yell-lioka' mbani Samáriana' na' Galileana'.

¹² Na' ka blline' to cho'a yelldo', bllesh shi ben' chakgake' yillwe' daa le lepra kwenche lljatilgake'ne', na' de zit'lə wzegake'

¹³ besyaagake' zilljə, che'gake'ne':

—¡Jesús, Maestro, biyesh'lall'gachi neto'!

¹⁴ Na' ka ble'i Jesúsza' legake', na' golle':

—Li shaj lao bxo'zka' kwenche ile'gakile' le'.

Na' shlak zejgake' bigaa yillwe' che'ka'.

¹⁵ Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'.

¹⁶ Na' b'chek' xibe'na' lao Jesúsza' na' bdose' lo yona' kwenche bi'ene' yel' choxken. Na' beena' ben ka' nake' ben' Samaria.

¹⁷ Na'ch che' Jesúsza':

—¿Aaga shigaken' biyaki? ¿Garan ben'ka' zi ga?

¹⁸ ¿Atochga ben' zitiin bibi'e choe'lawee Chioza'?

¹⁹ Na'ch che' Jesúsza' beena':

—Bizolla' na' biyaj. Ba biyakilo' daa wyajli'o cha'.

Yel' wnabia' che Chioza'

(Mt. 24:23-28, 36-41)

²⁰ Na'ch wnabi fariseoka' Jesúsza' batran solo inabia' Chioza' lo yell-lioni. Na' chi'e legake':

—Ka nak yel' wnabia' che Chioza', aga nakan ka to dii ile'tekzicho.

²¹ Aga no ina: “Ni chnabia' Chioza'”, wa “Na' chnabi'e”, la' ladjlenikzan ba bla' yel' wnabia' che'na'.

²² Na'ch chi'e ben'ka' nakgake'ne' txen:

—Wllin lla kat' gaklall'le la'ch' zi shlla ile'chile inabi'a, nad', Ben' Bsel' Chioza' Yell-lioni, na' aga wle'chile nad'.

²³ Na' ichej ben' ine': “Ni zoe'”, wa “Na' zoe'.” Na' bi shajle, ni bi gonle ben'ka' txen.

²⁴ La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni.

²⁵ Na' chonan byen zigaate biya daa yen ile'id', na' ben'ki zoa naa wzoagake' nad' ka'lə.

²⁶ Kon ka gok kana' wzoa dii Noéna', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni.

²⁷ Kana' wzoa dii Noéna', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' blinte llana' wyoo dii Noéna' loo barkwa'. Na' wzolo chak yejsiwaa yell-lioni axt billa'cha lawinna' nisa', na' blliyi'n yog'lolé'.

²⁸ Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaangake', na' chon lillgake'.

²⁹ Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' ben' yell Sodómaka'.

³⁰ Na' ka'kzan gak llana' kat' yiyed', nad', Ben' Bsel' Chioza' Yell-lioni.

³¹ 'Llana' zizaa, shi to ben' llie' yichj lille'na' na' xshinlaze'na' den loo yoo che'na', bi yiyetize' kwenche lljaleje'n. Na' shi to ben' zeje' lyixaa, bi yiyajze' lille'na'. ³² Li lljadini ka gok che dii xool Lota'.

³³ Beena' bi chsanlall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kani.

³⁴ Na' nia' le', lle'na' kat' zizaa, chop ben' die' toz blag, toe' yichi'a na' stoe' yigaan.

³⁵ Na' gana' lle' chop noolə chotgake', toe' yichi'a na' stoe' yigaan.

³⁶ Na' chop ben' byo chongake' llin lyixaa, toe' yichi'a na' beena' sto yigaane'.

³⁷ Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

18

Jempl che to nool wizeb na' to ben' wen yel' joschis

¹ Na' bzoa Jesúza' to jempl kwenche bli' bsedile' legake' bi lljshyagakile' we'llwillgake' Chioza'.

² Chi'e legake':

—Wzoa to ben' wen yel' joschis to yell, na' bi chall chllebe' Chioza', ni bibi chakile' shi bi chiyoolallii ben' ka chone'.

³ Na' yella' wzoa to noolə wizeb na' chajtezi chaje' lawe'na', chi'ene': “Bensha yel' joschis cha'ni.”

⁴ Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': “La'kzi bi chall chlleb' Chioza' na' ni bibi chakid' shi bi chiyoolallii ben' ka chon',

⁵ gonch' yel' joschis che nooli kwenche bich yidyembeguile' nad'.”

⁶ Na' Xancho Jesúza' chi'e legake':

—Li wzenag ka ben ben' wen yel' joschisa', beena' bi chall chlleb Chioza'.

⁷ ¿Achakile Chioza' bi gaklene' ben'ka' ba wleje' nakgake' lall' nee, ben'ka' choe'llwillgake'ne' ka wal' ka tella? ¿Awllaile' gaklene' legake'?

⁸ Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch ben' nonlilall' nad' yell-lioni, lla?

Jempl che to fariseo na' to ben' wichixj

⁹ Na' bzoa Jesúza' sto jempl che ben'ka' chakgakile' nakgake' ben' wen lao Chioza' na' chongakile' ben' yoblə nakzi. Na' wne':

¹⁰ —Chop ben' wyajgake' yoodo'na' kwenche je'llwillgake' Chioza'. Toe' nake' fariseo na' beena' sto nake' ben' wichixj.

¹¹ Na' farisewa' zie' chshalj chshon che kwine', chi'e: “Chios cha', choxkeno' bi chon' ka chon ben' yoblə, bi chzi' chban', bi nak' ben' wen dii mal, agagan' kwej yichj' nool cha'na' kwenche soalen' nool yoblə, na' ni bi chon' ka chon ben' wichixji.

¹² Chop shii to xman chzoa' wbas', na' lawi yog' daa chon' gan chbej' daa chidołoo ikoo.”*

¹³ Na' ben' wichixja', zit'lə wzie' na' ni bi biyaxjile' wlis lawe'na' wwie' yabana', san chballee cho'a lcho'ena' chi'e: “¿Chios cha', biyesh'gachi nad' daa nak' ben' saaxya!”

¹⁴ Na' nia' le', Chioza' bzenague' che ben' wichixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' ben' choo ben'

* **18:12** Daa chidołoo ikoo: literalmente la décima parte.

xen, Chioza' gone'ne' beṅ' bibi zakii. Na' beena' chakile' bibi zakee, Chioza' gone'ne' beṅ' choo beṅ' xen.

Benleey Jesúza' bi'do'ka'

(Mt. 19:13-15; Mr. 10:13-16)

¹⁵ Na' lekzka' beṅ' zan jwa' bi'do' che'ka' lao Jesúza' kwenche bxoā neena' yichjb'ka' na' wṅabile' Chioza' gaklene'gakb'. Na' ka ble'i beṅ'ka' nakgake'ne' txen, bsheshlengake' legake'.

¹⁶ Na' Jesúza' goxe' bi'do'ka', na' chi'e beṅ'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'.

¹⁷ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

To beṅ' zakii beṅ' nak beṅ' wni'a be'lene' Jesúza' dill'

(Mt. 19:16-30; Mr. 10:17-31)

¹⁸ To beṅ' zakii wṅabile' Jesúza', chi'ene':

—Maestro, li' nako' beṅ' wen. Wna nad' beran chiyaḷ' gon' kwenche gat' to yel' mban cha' zejli kaṅi.

¹⁹ Na'ch che' Jesúza'ne':

—¿Berache nazo' nad' beṅ' wen? Toz Chioza' nake' beṅ' wen.

²⁰ Ba nezkzilo' daa nllia Chioza' bia' goncho: “Bi soaleno' nool bi nak nool cho', bi wito' beṅ', bi kwano', bi chiljalloo bizə gon ino' che beṅ', na' wdap balaan xaxnoo.”

²¹ Na'ch che' beena'ne':

—Kana' naktia' bi' xkwid' chon' yog' diika'.

²² Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n beṅ' yesh'ka'. Na' shi gono' ka', na' gat' to yel' shao' cho' yabana'. Na' da, dino' nad'.

²³ Na' ka beni beena' ka goll Jesúza'ne', le gokyeshile', la' beṅ' wni'a nlliban'.

²⁴ Na' ka ble'i Jesúza' le gokyeshile', na' chi'e:

—jLallj inleeb chonan che beṅ' wni'aka' we'gake' latj inabia' Chioza' legake'!

²⁵ Lobe'ch te to kamey xan yeshaa aga ka to beṅ' wni'a yiyo'e yabana'.

²⁶ Na' beṅ'ka' beni, gollgake'ne':

—¿Noran yila shka'?

²⁷ Na'ch che' Jesúza' legake':

—Daa bi chak gon beṅcha', Chioza' chak gone'n.

²⁸ Na'ch che' Pédrona' Jesúza':

—Xan', ba wlej yichjnto' yog' dii de chento' kwenche naknto' li' txen.

²⁹ Na'ch che' Jesúza' legake':

—Dii li nia' le', nottezə beṅ' ba bzanile' no lille', no xaxnee, no beṅ' bishee, no beṅ' zane', no xiin xooole' kwenche cho'e latj chṅabia' Chioza'ne',

³⁰ Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kaṅi.

De wyon shii wdixjee Jesúza' guete'

(Mt. 20:17-19; Mr. 10:32-34)

³¹ Na'ch wlej Jesúza' beṅ'ka' shllin ka'lə, beṅ'ka' nakgake'ne' txen, chi'e legake':

—Dga ziyajcho Jerusalenna' naa, yillinin daa bzej dii beṅ'ka' wdixjee daa goll Chioza' kani'yi daa gak cha', nad', Beṅ' Bsel' Chioza' Yell-lioni.

³² La' gongake' nad' lo na' beṅ'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'.

³³ Na' wit chingake' nad' na'tech witgake' nad', na' yiyon lla yiban' ladj beṅ' wetka'.

³⁴ Na' beṇ'ka' nakgake'ne' txen ni lat' bi wyajni'gakile' daa golle' legake', na' ni bi wṇezgakile' berache chi'e legake' ka', la' daa golle' legake' nakan dii bi gak shajni'gakile'.

Biyon Jesúza' to beṇ' l̄choḷ yell Jericóna'
(Mt. 20:29-34; Mr. 10:46-52)

³⁵ Na' ka ba chllin Jesúza' yell Jericóna', na' chi' to beṇ' l̄choḷ cho'a neza' chṇabile' beṇ' yiyesh'lall'gakile'ne' we'gake' lat' wej xmeche'.

³⁶ Na' ka benile' chde beṇ' zan na'ch wṇabe' bin chak.

³⁷ Na' gollgake'ne':

—Jesús, beṇ' Nazaretan', chda ni.

³⁸ Na'ch besyee, chi'e:

—¡Jesús, Xiin dia che dii Daví, biyesh'lall'gachi nad'!

³⁹ Na' beṇ'ka' llialo lao Jesúza' chsheshlengake'ne' kwenche kwi'e llizə, na' zizikchlə chosyee, chi'e:

—¡Xiin dia che dii Daví, biyesh'lall'gachi nad'!

⁴⁰ Na'ch wlez Jesúza' na' bene' mandad ljxi'gake'ne'. Na' ka bllin beṇ' l̄choḷa' lawe'na' na'ch wṇabile'ne':

⁴¹ —¿Beran cheenilo' gon' cho'?

Na'ch che' beṇ' l̄choḷa'ne':

—Xan', cheenid' ile'id'.

⁴² Na'ch che' Jesúza'ne':

—Daa ba chonlilalloo nad' na' ile'ilo'.

⁴³ Na' katena' lii bile'teile', na'ch janoe' Jesúza' choe'lawee Chioza'. Na' yog' beṇ'ka' ble'i daa ben Jesúza' be'la'ogake' Chioza'.

19

Jesúza' na' Zaquewa'

¹ Na'ch bllin Jesúza' yell Jericóna' na' wdie' gchoḷ yella'.

² Na' yella' zoa to beṇ' wni'a lie' Zaqueo, na' ngoo lall' nee xonj wiçhixjka'.

³ Na' goklallee ile'ile' Jesúza', per bi gok ile'ile'ne' daa nake' beṇ' bçhekwdə' na' daa zejlen Jesúza' beṇ' zan.

⁴ Na'ch wllialodoe' lawe'ka' na' wyepe' to lo yag xen kwenche ile'ile'ne' ka tie'.

⁵ Na' ka bllin Jesúza' xan yaga', na' blis lawe'na' chi'ene':

—Zaqueo, btalalloo biyetj, la' lillo'nan' yigaana' naa.

⁶ Na'ch biyetjdo Zaquewa' chibaile' biçi'e Jesúza' lille'na'.

⁷ Na' ka ble'i beṇ'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill beṇ' saaxyani, na.

⁸ Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' beṇ' yesh'ka', na' yog' beṇ'ka' ba bçhixj' dii xench, yiyoe'gakee taplə ka daa ba wlan' çhegake'.

⁹ Na'ch che' Jesúza'ne':

—Naanlla ba bisla Chioza' beṇ'ki zoa loo yooni kwenche bi kwiayi'gake', daa len Zaquewi nake' xiin dia che dii Abraham'a'.

¹⁰ La' ka nak' nad', Beṇ' Bsel' Chioza' Yell-lioni, bid' kwenche yiyilj' na' yisla' beṇ'ka' yoo nez daa wlliaiyi'n legake'.

Jempl che beena' bkwaanlen wen llin che'ka' mech

¹¹ Shlak chzenag beṇ'ka' daa che' Jesúza', bseesile' legake' to jempl, daa ba zoa illine' Jerusalenna' na' legake' gokgakile' daa nake' beṇ' bsel' Chioza' lii solotie' inabi'e.

¹² Na'ch chi'e legake':

—To ben' zakii bcheje' wyaje' to yell zit' wal kwenche lljalane' yel' wñabia' che lalle'na', na' ka yilline' inabi'e.

13 Na' ka zi' see, wñie' shi wen llin che'ka' na' bi'e legake' twej mech dii zak' dii xen na' chi'e legake': “Ni de mechi, li gonlenan delgens shlak bi soa.”

14 Na' ben' wlall che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche jellgake'ne': “Bi cheeninto' inabia' beeni neto'.”

15 Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche inezile' ka'k' wej ben mecha' gan daa bkwaanlene' to toe'.

16 Na' ka bllin ben' necha' lawe'na' na' chi'ene': “Xan', xmecho'na' bkwaan'lenu' nad' bena'n gan shin.”

17 Na'ch ben' wñabia'na' chi'ene': “Wenkzan beno'. Daa beno' ka chiya' kon lat' mecha' bkwaanlen' li', wzoa' li' inabi'o shi yell.”

18 Na' ka bllin beena' sto lawe'na' na' chi'ene': “Xan', xmecho'na' bkwaan'lenu' nad' bena'n gan gayaan.”

19 Na' lekzka' chi'e beena': “Wzoa' li' inabi'o gay' yell.”

20 Na'ch bllin stoe' lawe'na' na' chi'ene': “Xan', ni de xmecho'na' bkwaan'lenu' nad'. Blall'tipteza'n to lech' na' wlooshawaan

21 daa bllib' li', la' le ben' znia nako'. Chkaatezo' dii bi naki cho', na' chizi' chilaptezo' dii goz goon ben' yoblə.”

22 Na'ch che' ben' wñabia'na' le': “Bikzbi yejni'alallii beno'. Kon ka ba wno' ka'kzan gak cho'. Nezilo' nak' ben' znia, na' chkaatez' dii bi naki cha' na' chizi' chilap' dii goz goon ben' yoblə.

23 Na' daa nezilo' ka' chon', ¿berache ki bi'o xmechaa gon yichjin kwenche yikaan naa ba biyed'?”

24 Na'ch chi'e ben'ka' lle' na': “Li yikaa mecha' daa bi'ane' na' li we'n beena' bene' gan shin.”

25 Na'ch che' ben'ka'ne': “Xan', ba napkzə beena' shin.”

26 Na' che' ben' wñabia'na' legake': “Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, ax't daa ngoo lo nee lat' yidoyo.

27 Na' ka nak ben'ka' chakzbangakile' nad', ben'ka' bi cheengakile' inabi'a, li lljxi'gake' ni na' li witgake' ile'teid'.”

Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

28 Na' ka wde wna Jesúza' ka', na'ch bigoolene' nez ben'ka' nakgake'ne' txen ziyajgake' Jerusalénna'.

29 Na' ka billingake' xni'a yaa daa le Yaa Olivos, gaozə yellka' le Betfagé na' Betania, na'ch bselee chop ben'ka' nakgake'ne' txen,

30 na' chi'e legake':

—Li shaj yella' llia na', na' ka illinle ile'ile to burr chbando', ba konon' kwia, da'b yag. Na' wsell-leb wche'leb nilə.

31 Na' shi no inaz le': “¿Berache chsellzleb?”, na' ye'lene': “Xanchonan' chyalljile'b.”

32 Na'ch wyaj ben'ka' bselee, na' ka billingake' ble'gakile' to burr chbando' da'b yag, kon kayen' goll Jesúza' legake'.

33 Na' ka chsellgake' burra' na'ch che' xama' legake':

—¿Berache chsell-leb?

34 Na'ch che'gake'ne':

—Xanchonan' chyalljile'b.

³⁵ Na'ch b̄che'gake'b jwa'gake'b lao Jesúza' na' b̄xoagake' xe'ka' koll'ba' na' b̄lliagake' Jesúza' koll'ba'.

³⁶ Na' shlak zej Jesúza' llie' burra', chshilj xa ben'ka' tlo neza'.

³⁷ Na' ka ba chillingake' gaozə gana' chiyetj nez daa ziza' Yaa Olívoza', yog'lōl ben'ka' nakgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' yel' wakka' bene'.

³⁸ Na'ch nagake':

—ǰGaklenshga X̄ancho Chioza' beeni ba bselee inabi'e! ǰLi da, we'la'ocho Chioza' zoa yabana' daa bene' ka zoalenchone' mbalaz!

³⁹ Na' baǰ fariseoka' len ladj ben'ka' no Jesúza', che'gake'ne':

—Maestro, goll ben'ki nakgake' li' txen soagake' llizə.

⁴⁰ Na' che' Jesúza' legake':

—Nia' le', shi ben'ki soagake' llizə, na' yaj kilə solo gosyaagakan we'la'ogakan nad'.

⁴¹ Na' ka billine' gaozə yell Jerusalénna', gokyeshile' ka ble'ile'n na' wchelle' che ben'ka' zoa na'.

⁴² Na' chi'e:

—ǰShel'ka' naanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile.

⁴³ Wllin lla ila' ben'ka' chakzbangakile' le' na' wzechjgake' yelli leej na' kono gak sho' ichej.

⁴⁴ Na' ni sto yaj che lill-leka' bich yikwaangake' koll' ljwellin, na' witgake' le' len xiinleka', la' bi gokbe'ile ka bla' Chioza' ladjleni.

Bishesh Jesúza' ben'ka' chit' chde lesh' chyoodo'na'

(Mt. 21:12-17; Mr. 11:15-19; Jn 2:13-22)

⁴⁵ Na'ch ka bllin Jesúza' cho'a yoodo'na' na' bisheshe' ben'ka' chit' chde.

⁴⁶ Na' chi'e legake':

—Cho'a Xtill' Chioza' nan: “Lilla'na' nakan ga choe'lwill ben' nad'”, na' le' naa ba nonzlen ka to ga chdop chllag wban.

⁴⁷ Na' yog' lla bli' b̄sedi Jesúza' ben' gana' zoa yoodo'na', na' b̄xozka' chn̄abia' na' ben'ka' chli' ch̄sedi leya' na' nochlə ben' w̄n̄abia' che ben' Israelka' la'kzi biyiljlall'gake' naklə gongake' kwenche witgake'ne'

⁴⁸ bikzə bi gok gongake', la' yog'zə ben' chibagakile' chzenaggake' dill'ka' cho'e.

20

Yel' w̄n̄abia' che Jesúza'

(Mt. 21:23-27; Mr. 11:27-33)

¹ Na' bllin to lla, shlak chli' ch̄sedi Jesúza' ben'ka' lesh' chyoodo'na' na' chyixje'ile' legake' dill' wen dill' kob che Chioza', bllin b̄xozka' chn̄abia' na' ben'ka' chli' ch̄sedi leya' len ben' golka' chn̄abia'.

² Na' che'gake'ne':

—Wnashki neto', ǰbi yel' w̄n̄abia' napo' chono' diiki? Na' ǰnora ben' li' yel' w̄n̄abia'ni?

³ Na'ch che' Jesúza' legake':

—Lekzka' nad' de to dii inabid' le', li inashki nad':

⁴ ǰNoran bsel' Juanna' kwenche bidchoe' ben' nisa'? ǰAChiozan' bseleene'? ǰAnti ben' yell-liona'zan bseleene', lla?

⁵ Na'ch wzologake' choe'len ljwellgake' dill', che'gake':

—ǰNakra ka ye'chone', lla? Shi ye'chone' Chioza' bseleene', lobe' ine' cho': “ǰBerache ki wyajle'le che', shka'?”

⁶ Na' shi yize'chone' nozə ben' bseleene', yog' ben'ki wlligake' cho' yaj witgake' cho', la' yog'gake' chajle'gake' Juanna' bi'e dill' daa goll Chioza'ne'.

⁷ Na'ch gollgake' Jesúza':

—Bi ñezinto' no bsel' beena'.

⁸ Na'ch che' Jesúza' legake':

—Lekzka' nad' aga wnia' le' noran beñ nad' yel' wñabia'na' kwenche chon' diiki.

Jempl che wen llin malka'

(Mt. 21:33-44; Mr. 12:1-11)

⁹ Na' Jesúza' bseese to jempl lao beñ'ka' lle' na':

—To beñ' billee yag uva, na' bene'n lall' na' beñ'ka' gap wwian, na' wzee wyaje' ssha gan yoblə.

¹⁰ Na' ka bizi' bilap beñ'ka' uvana', xaninna' bselee to wen llin che' kwenche lljelle' beñ'ka' nak lall' na'gake' yag uvaka' we'gake'ne' daa chidolee yikee. Na' beñ'ka' chapgake' yag uvaka' be'gake'ne' bet wdingake'ne', na'tech bilaggake'ne' to ka' che'.

¹¹ Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'.

¹² Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

¹³ Na'ch chaki xan yag uvaka': “¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'.”

¹⁴ Na' ka ble'i beñ'ka' chap yag uvaka' xiine'na', na'ch che' ljwelle': “Bi'nin yigaanlem' yell-lioni. Li da witchob' kwenche yigaanlenchon.”

¹⁵ Na' wlelgake'b' gana' lle' yag uvaka' na' betgake'b'.

Na'ch wñabi Jesúza' beñ'ka' chzenag:

—¿Nakra ka chakile goni xan yag uvaka' beñ'ka', lla?

¹⁶ Ba nakten shaje' na' lljete' beñ'ka' chap yag uva che'na' na' yiyone' yell-lío che'na' lall' na' beñ' yoblə.

Na' ka beni beñ'ka' wne' ka', na' wnagake':

—¡Bat we' Chioza' latj gak ka'!

¹⁷ Na' bwia Jesúza' legake', chi'e:

—¿Beran zejin Cho'a Xtill' Chioza' gana' na:

Yaja' daa bi wyoolall' wen yooka',

leyen'lannan' yaja' daa ba nchejcha yoonā?

¹⁸ Nottezə beñ' lljchaze' lawinna' kwiayee, na' shi idakwan beñ', axt wshoshjan le'.

Janabgakile' Jesúza' shi chiyal' chixjgake' daa chñab beena' chñabia' Rómana'

(Mt. 21:45-46; 22:15-22; Mr. 12:12-17)

¹⁹ Na' bñozka' chñabia' na' beñ'ka' chli' chsedi leya' goklall'gake' gox'gake' Jesúza' ka biyoll golle' ka', la' gokbe'gakile' chezgaken' wñie' daa bi chajle'gake' che'. Per bblebgake' beñ'ka' ndop nllag na'.

²⁰ Na'ch bsel'gake' to chop beñ' wiwia wiyi, na' bentezgake' ka beñ' cheenchgayi wzenag che'. Per aga do lall'gaken' wyajgake', san kwenchezə kwejyelgakile' Jesúzan' na' lljadaogake' xya che' lao beena' chñabia' gana' mbani Judeana'.

²¹ Na' wñabgakile'ne':

—Maestro, ñezinto' daa no' na' daa chli'o nakan dii li, na' aga chwio' nak nak beñ', shi nake' beñ' zakii wa shi bi nake'. Nezinto' chli'o nez li che Chioza' kon ka nakan.

²² Wnashki neto': ¿Achiyal' chixjcho daa chñab Césara', beena' chñabia', anti bi chiyal' chixjchon?

²³ Na' gokbe'i Jesúza' aga do lall'gaken' wñabgakile'ne', na'ch chi'e:

²⁴ —Li wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Che Césaran', beena' chñabia' Rómana'.

²⁵ Na'ch chi'e:

—Na'len, li we' Césara' daa naki che', na' lekzka' li we' Chioza' daa naki che'.

²⁶ Na' ni shcho'a dill' daa bi'e lao ben'ka' bi gok wchingake'n kwenche gaogake' xya che'. Na' bibangakile' ka golle' legake' na' bibe'gake' llizə.

Wnabgakile' Jesúza' nak gak kat' yiban ben' wetka'

(Mt. 22:23-33; Mr. 12:18-27)

²⁷ Ka wde dga, bllin bal saduceoka' lao Jesúza', ben'ka' bi chajle' daa yiban ben' wetka'. Na'ch che'gake' Jesúza':

²⁸ —Maestro, leya' bzej dii Moiséza' nan: shi to ben' byo guete' na' igaan xoolena' wizeb na' kono xiingake' wzoa, ben' bish' ben' weta' chiyal' yikee nool wizeba' kwenche soa xiin dia che dii ben' bisheena'.

²⁹ Ki gok to shii, wzoa gall bish' ben', na' ben' necha' bshagnee, na' wite' na' kono xiine' wzoa.

³⁰ Na' ben' wchopina' bikee noola', na' lekzka' wite' na' kono xiine' wzoa.

³¹ Na' ben' wyoñina', lekzka' bizkee noola', na' wizete' na' kono xiine' wzoa. Na' lekzka' ben'ka' zi tap bizkaagake' noola' na' witgake', na' ni to ben'ka' gall bi wzoa xiingake' kon noola'.

³² Na' ka bllin lla lekzka' wit noola'.

³³ Na' kat' yiban ben' wetka', ¿norayen'en' gak ben' che', lla?, la' galltien' wzoalene'.

³⁴ Na'ch che' Jesúza' legake':

—Ben'ka' lle' yell-lioni naa chkaa ljwellgake', na' lekzka' choe' yel' wishagna' che xiine'ka'.

³⁵ San ben'ka' ina Chioza' zak'gake' yiyajgake' gana' zoe' ka yibangake' ladj ben' wetka', aga ka'chan gongake'. La' koch no wshagna' gana' zoa Chioza',

³⁶ ni koch no guet, san soagake' ka zoa anjlka'. Na' gagkake' xiin Chios daa ba bisbane' legake' ladj ben' wetka'.

³⁷ Kwin dii Moiséza' bzeje' kwenche inezicho yiban ben' wetka' kana' bzeje' che yag yeshaa daa ble'ile' chal'niñ. Na' wne' Xancho Chioza' nake' Chios che Abraham'a', Isaaca' na' Jacoba'.

³⁸ Na' Chioza' aga nake' Chios che ben' wet, san nake' Chios che ben' de yel' mban cheyin. La' yog'lol ben' nxenilallii Chioza', dekzə yel' mban chegake'.

³⁹ Na'ch bal ben'ka' chli' chsedi leya' gollgake'ne':

—Maestro, ka ba wnayenoon nakan.

⁴⁰ Na' bich bi biyaxjchgakile' inabchgakile'ne'.

Crístona' nake' xiin dia che dii Davina'

(Mt. 22:41-46; Mr. 12:35-37)

⁴¹ Na' che' Jesúza' legake':

—¿Berache nazə ben' Crístona' nake' xiin dia che dii Davina'?,

⁴² len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shli ni

⁴³ shlak wzoa' xni'ona' ben'ka' chakzbani li.”

⁴⁴ ¿Berache chakzile Crístona' nake' xiin dia che dii Davina', len kwin Davina' golle'ne': “Xan”?”

Jesúza' wne' nan ben'ka' chli' chsedi leya' chongake' mal

(Mt. 23:1-36; Mr. 12:38-40; Lc. 11:37-54)

⁴⁵ Na' shlak chzenag yog' ben'ka' lle' na', Jesúza' golle' ben'ka' nakgake'ne' txen:

⁴⁶ —Li wsak' bi gonle ka chon ben'ki chli' chsedi leya'. Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj lkwe' ben'. Na' gana' chdop chllagcho choe'llwillcho Chioza' chbagakile' kwe'gake' gana' chbe' ben'ka' zakii, na' ka'kzə chongake' ga de yel' waw.

⁴⁷ Na' lekzka' chkaatezgake' lill nool wizebka', na' chongake' ka chshaljlen Chioza' ssha nleb kwenche gaki ben' le wen chongake'. Na' daa chongake' ka', ba nakten ile'gakile' yel' zak'zi' wala'.

21

Daa bzani to nool wizeb, bi'en Chioza'
(Mr. 12:41-44)

¹ Na' ble'i Jesúza' ka chgoo ben' wni'aka' mecha' gana' chgoo ben' mech che yoodo'na'.

² Na' lekzka' ble'ile' to nool yesh', ben' wizeb, wlo'e chop sintabdo'.

³ Na' goll Jesúza' legake':

—Dii li nia' le', la'kzi nool wizebi nake' ben' yesh', ba be'che' dii xench aga ka yog'te ben'ka'.

⁴ La' yog'gake' choe'gake' daa chichoonan che'ka', na' le', naktie' ben' yesh', wlo'e doxen daa nape', la'kzi chyalljile'n.

Jesúza' chi'e wllin to lla kwiayi' yoodo'na'
(Mt. 24:1-2; Mr. 13:1-2)

⁵ Na' bal ben'ka' choe'gake' xtill' yoodo'na' ka xochi nak yajka' nongakile'n na' diika' bzani ben' be'gake'n yoodo'na'. Na'ch che' Jesúza' legake':

⁶ —Ka nak diiki chwiale naa, wllin lla kwiayi' yogaan, ni sto yaj bich kwia koll' ljwellin.

Diika' gak kat' ba zoa te che yell-lioni
(Mt. 24:3-28; Mr. 13:3-23)

⁷ Na'ch wñabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'into' gak kwenche inezinto' nan ba zoa gaoshosh gakan?

⁸ Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake': “Nadaan Crístona”, na' lekzka' inazgake': “Ba bllin lla kwiayi' yell-lioni.” Bi gonle legake' txen.

⁹ Na' ka yenile chak no wdil wa chtop chshag ljwell ben' kwenche soshyi'gake' ben' wñabia'ka', bi illeble. Chonan byen zigaate gak diiki, per aga lii tete che yell-lioni kat' ba chakgakan.

¹⁰ Na'ch golle' legake':

—Ganga kwe' wdila' na' til yell kon yell.

¹¹ Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban ben'.

¹² Na' ka zi gak diiki, gox'gake' le' na' biya dii gongakile' le'. Na' lljwa'gake' le' gana' chdop chllagcho choe'lwill-cho Chioza' na' yiya yiyiljgake' le' na' koogake' le' lillya, na' lljwa'gake' le' lao ben' wñabia' xenka' na' lao ben' wñabia'ka' sto ni cha'.

¹³ Na' kat' gak chele ka', na'chlə gat' latj we'le cho'a xtillaana' lawe'ka'.

¹⁴ Na' bi sezle wneyi naklə inale kat' lljsele lao ben' wñabia'ka',

¹⁵ La' nad'kzan wzajniid' le' nakan inale na' gon' le' yel' sin'na' kwenche ni to ben'ka' chakzbangakile' le' bi sogakile' inagake' bi nakan ka nale.

¹⁶ Na' no xaxna'tezle, no ben' bish'le, no dialla chele, na' no ben' zoalenle wen gongake' le' lo na' ben' wñabia'ka', na' witgake' bal-le.

¹⁷ Na' ax't yog'zə ben' gakzbangakile' le' daa nonlilall'le nad'.

¹⁸ Per li koo yichjle, Chioza' gaklene' le' na' ni tlish' yish' yichjlēna' bi kwiayi'.

¹⁹ Na' shi sechale lawi daa yen ile'ile na' bi gakchoplall'le, na'chan gat' to yel' mban chele dii bi te cheyin.

²⁰ Na' kat' ile'ile nechj soldadka' Jerusalēni, kanan' inezile nan ba zoa kwiayi'n.

21 Na'ch ben'ka' lle' gani mbani Judeani, chiyal' wxonjgake' lljakwash'gake' do yaa yaoka', na' ben'ka' lle' yelli, chiyal' wxonjgake', na' ben'ka' zej lyixaa, bichoklæ yiyedgake' yelli.

22 La' kanan' gon Chioza' yel' zi' che yog'ze' kwenche yillinin doxen ka na Cho'a Xtilleena'.

23 iNyesh'laz wal gak che noolka' noa' na' noolka' chwall' chxop llana' gak diiki! La' dii xen daa yen ile'i ben' Israelki.

24 Balgake' guet lo wdila' na' zi bale' wche'gake' pres yell zit'ka'. Na' ben' zit'ka' wlej wshoshjgake' yell Jerusalenni axt kat'ch illin lla yiyoll yido ka lia bia' gongake'.

Kat'ka'yiyed Jesúza'

(Mt. 24:29-35, 42-44; Mr. 13:24-37)

25 'Na' lo wbillla', lo bewaa na'ch lo beljka' gak dii gonan ka yibani ben'. Na' ben'ka' lle' yell-lioni gakshejlall'gake' na' illebgake' kat' gon nisdona' sshag wal daa so' kwe'n.

26 Na' axt ichol-lall' ben' daa chllebgake' kwiayi'lengake' yell-lioni, la' axt yog' diika' lia xan yabana' inibgakan.

27 Na'ch ile'gakile' nad', Ben' Bsel' Chioza' Yell-lioni, zizaa to lo bej kon yel' wak xen na' balaan xen.

28 Na' kat' solo gak diiki, li wtipch lall'le, la' ba zoa gaoshosh yidsla' len'.

29 Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlæ yag.

30 Kat' chle'ile ba chibia xlaguinka', chakbe'ile ba zoa yiyoo la'o linna'.

31 Ka'kzæ, kat' ile'ile ba chak diiki ba wnia', chiyal' inezile ba zoa gao wli' Chioza' yel' wñabia' che'na'.

32 'Dii li nia' le', aga ba wit ben'ka' zoa naa kat' gak yog' diiki.

33 'Yabana' na' yell-lioni te chegakin, san cho'a xtillaana' aga wde bi gak ka nan.

34 'Li wsak' bi we'le latj sho' diika' wxinjan yichjlall'do'lena'. Bi wlanzle yel' weezo, na' bi sezle wneyi bi chak chele. Li wsak' kwenche aga sha chel-le chon llana' zizaa.

35 La' tokonganzan gak diiki yen ile'i yog'te ben'ka' lle' doxen yell-lioni.

36 Na' le', li se wneyi, li inabi Chioza' toshiizi gaklene' le' kwenche yilale lao yog' diiki lia bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

37 Na' Jesúza' bli' bsedile' ben' yog' lla yoodo'na', na' ka chal, chjagaane' lo Yaa Olívoza'.

38 Na' yog' zil yog' ben' chajgake' yoodo'na' chjazenaggake' daa chli' chsedile'.

22

Wloogake' xnezin witgake' Jesúza'

(Mt. 26:1-5, 14-16; Mr. 14:1-2, 10-11; Jn. 11:45-53)

1 Ba zoa gaozæ lni Paskwa' kat' chaogake' yetxtil daa bi nchix lewadúrana'.

2 Na' bxoza' chñabia' len ben'ka' chli' chsedi leya' chiyljlall'gake' naklæ gongake' witgake' Jesúza' ka kono gakbe'i, la' bllebgake' shi bi goni ben' wlall che'ka' legake'.

3 Na'ch xan dii xiw'ka' daa le Satanás wyoon loo yichjlall'do' Jud Scariota', beena' nak txen ben'ka' shllin.

4 Na' wyaje' lao bxoza' chñabia' len lao ben'ka' ngoo lall' na' ben'ka' chap yoodo'na', na' bi'e dill' nakan gone' Jesúza' lall' na'gake'.

5 Na' le bibagakile' na' bchebgake' we'gake'ne' mech.

6 Na'ch bchebe' gone'ne' lall' na'gake'. Na' wzolo chinoe' batan gat' latj kat' kono ben' lle' gone' Jesúza' lall' na'gake'.

Lle'na' zeelo wdaolengake' Jesúza'

(Mt. 26:17-29; Mr. 14:12-25; Jn. 13:21-30; 1 Co. 11:23-26)

7 Na' bllin llana' chsini'agake' che lnina', llana' chzolo chaogake' yetxtil daa bi' nchix levadúrana' na' chitgake' to xil'do', bana' gaogake' lle' Paskwa'.

8 Na'ch wlej Jesúza' Pédróna' len Juanna' na' chi'e legake':

—Li lljasini'a daa gaocho ln̄i Paskwi.

9 Na'ch che'gake'ne':

—¿Garan cheenilo' lljasini'anto'n?

10 Na' che' Jesúza' legake':

—Ka sho'le Jerusalénna', na' ile'ile to ben̄' byo zino'e to chee nis, na' li lljanoe' axt yoona' gana' yilline'.

11 Na' ye'le xan yoona': “Maestrona' chnabile' li': ¿Garan zoa yoona' wyoone' gana' gaolene' ben̄'ka' nakgake'ne' txen lle' Paskwi?”

12 Na' wliile' le' to yoo xen dii llia shkwiana' cha'lə ga ba nonshao'tie'. Nan' wsini'ale daa gaocho xshe'na'.

13 Na' wloogake' nez zejgake', na' kon kayen̄' golle' legake' gok. Na' bsini'agake' daa wdaogake' lle' ln̄i Paskwa'.

14 Na' ka gol' gaogake' xshe'na', Jesúza' wche'lene' postl che'ka' cho'a mesa'.

15 Na'ch chi'e legake':

—Ba goklall'chga' yeej gaolen' le' ln̄i Paskwi naa bin̄' witgake' nad'.

16 Na' ba nia' le', zeelo naa cheej chaw' dga. Bichga yeej gawa'n axt ki illin llana' wli' Chioza' yel' wn̄abia' xen che'na', kana'ch yeej gawa'n dii yoblə.

17 Na' bexee kopa' na' bi'e Chioza' yel' choxken, na' chi'e:

—Li gox' dga, li yeejan lat' wej.

18 Na' nia' le', bichga yeej' nis uvani axt ki illin lla wli' Chioza' yel' wn̄abia' xen che'na'.

19 Na'ch bexee yetxtila' na' bi'e yel' choxken Chioza'. Na' bxoxje'n bi'en legake' kwenche wdaogake'n, na' chi'e:

—Dgan kwerp cha'ni, chzanlallidaan ni chele. Kin gonle kwenche lljadinile nad'.

20 Na' lekzka' bene' ka wde wdaogake' xshe'na', bexee kopa' sto shii, na'ch chi'e:

—Dga yoll loo kopi zej̄in xchen'na' daa laljə ni chele daa gonan ka gakli dii koba' bcheb Chioza' gone'.

21 Na' naa, beena' gone' nad' lo na' ben̄'ka' chakzi'gakile' nad' chi'lene' nad' cho'a mesi.

22 La' ba bllin lla gak ka nak daa llia bia' gak cha', nad', Ben̄' Bsel' Chioza' Yell-lioni, per jnyesh'laz gak che beena' gone' nad' lo na' ben̄' malka'!

23 Na'ch ben̄'ka' nakgake'ne' txen wzologake' chnabi ljwellgake' noen' gone'ne' lo na' ben̄'ka'.

Gokgued ben̄'ka' nak Jesúza' txen nogaken' zak'chi

24 Na' lekzka' chakdil̄-len ljwellgake' nogaken' nak ben̄' zak'chi.

25 Na' che' Jesúza' legake':

—Zoa ben̄' wn̄abia' to to nación, na' chongake' byen chzenag ben̄' chegake', na' nagake' che kwingake' le chaklengake' ben̄'.

26 San le', bi chiya' gonle ka'. Shi nole nakle ben̄' zakii, chiya' wchek' yichjle ka to bi' xkwid', na' shi nole chn̄abia', chiya' gonle ka nottezə ben̄' wen mandad.

27 ¿Noran nak ben̄' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' ben̄' zak'chi. San nad', la'kzi naktia' xanle, zoa' ladjeni ka to ben̄' wen mandad chele.

28 Le' ba wzoalenle nad' lao yog'te daa ba gok cha'.

29 Na' daan, gon' le' yel' wn̄abia'na' ka daa ben̄' Xa'na' nad'.

30 Na' yeej gaolenle nad' gana' in̄abi'a. Na' kwe'le gana' in̄abia'le yizi'le kwent che shllin kwen ben̄'ka' nak xiin̄ dia che dii Israela'.

Jesúza' wne' bi wcheb Pédróna' shi nombi'ene'
(Mt. 26:31-35; Mr. 14:27-31; Jn. 13:36-38)

³¹ Na' lekzka' golle' Simón Pédróna':

—Simón, Simón, Satanáza', daa chñabia' dii xiw'ka', ba wñaban le' gake lo na'yin kwenche gondinj gonganin le'.

³² Na' nad' ba wñabid' Chioza' gaklene' li', Simón, kwenche gonlilall'cho nad'. Na' kat' ba biyajilo' cheyi daa gono', na' gakleno' beñ'ki nako' txen kwenche soachehgake' gonlilall'gake' nad'.

³³ Na' che' Simónna':

—Xan', ba nchoglallaa laa lillyana' sa'len' li' wa axt guetlen' li' txen.

³⁴ Na' che' Jesúza':

—Pedro, nia' li', naanlle' shon shii bi wchebo' shi nombi'o nad' ka zi' kwell shikwteza'.

Ba zoa gaoz wtil Jesúza' daa gak che'

³⁵ Na'ch che' Jesúza' legake':

—¿Azyalljile bi byalljile kana' bselaa le' na' bibi beñ'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

³⁶ Na'ch golle':

—Per ñaach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n.

³⁷ Nia' le', chonan byen gak cha' kon ka na Cho'a Xtill' Chioza' gana' na: “Gongakile'ne' ka chongakile' to beñ' wen dii mal.”

³⁸ Na' che'gake':

—Xan', ni napnto' chop spad.

Na' chi'e:

—Lliz li soachokla.

Be'lwill Jesúza' Chioza' gana' le Getsemaní

(Mt. 26:36-46; Mr. 14:32-42)

³⁹ Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano beñ'ka' nakgake'ne' txen.

⁴⁰ Na' ka bllingake' latja', na' chi'e legake':

—Li we'lwill Chioza' kwenche bi we'zle latj gon beli chenna' le' gan.

⁴¹ Na' bkwase' kwite'ka', ka to ga zeelo chllin to yaj dii chzal'cho, na'ch bchek' xibe'na' be'lwille' Chioza'.

⁴² Na' golle':

—Xa, shi li' cheenilo', bislagach nad' lawi dga ba zoa idil illag'; per aga gak ka cheenid', san gak ka cheenilo'.

⁴³ Na'ch bli'lao to anjl beñ' za' yabana' le', na' biyo'ene' fuerz.

⁴⁴ Na' daa le chakyesh'chgaile', zizikli be'lwillche' Chioza' axt biyaklolje'. Na' nis yes che'na' daa chxop lo yona' nakan ka to blon wej chen.

⁴⁵ Biyoll be'lwille' Chioza', na' bizollee biyaje' gana' lle' beñ'ka' nakgake'ne' txen, na' ka billine' kwite'ka' ba chesgake' daa chakyesh'gakile'.

⁴⁶ Na' chi'e legake':

—¿Berache chesze? Li chas na' li we'lwill Chioza' kwenche bi we'zle latj gon beli chenna' le' gan.

Bex'gake' Jesúza'

(Mt. 26:47-56; Mr. 14:43-50; Jn. 18:2-11)

⁴⁷ Ni choe'te Jesúza' dill', ka bllin beñ' zan, na' beena' le Jud, beena' nak txen beñ'ka' shllin, nchi'e legake'. Na' ka blline' jabigüee kwit Jesúza' na' bnope' xagueena'.

48 Na'ch che' Jesúza'ne':

—Jud, ¿akon dga bnopo' nad' chono' nad', Ben' Bsel' Chioza' Yell-lioni, lo na' ben'ki?

49 Na' ben'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awñiayinto' spadki?

50 Na' toe' lii wdintie'n to mos che b̄xoz choo b̄xoz xenna' b̄chogtie' nague' de sh̄lina'.

51 Na' che' Jesúza':

—Bich bi gonile ben'ka'.

Na'ch bida' Jesúza' nag beena'.

52 Na' daa bllin b̄xozka' chñabia' len ben'ka' chap yoodo'na', na' ben' golka' chñabia', kwenche gox̄'gake'ne', chi'e legake':

—¿Berache za'zle nox̄'le yag na' spad kwenche zidñizle nad' ka to no ben' wban?

53 Yog' lla wzoa' ladjlena' yoodo'na' na' bi bex̄'le nad'. Per ñaach bllin lla gonle ka cheenile na' ñaayen' chñabia' dii mala' daa chñabia' gana' shgasj sh̄chol.

Bi b̄cheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Na'ch bn̄izgake' Jesúza' na' b̄che'gake'ne' lill b̄xoz choo b̄xoz xenna', na' zit' zit'lə zjano Pédrona'ne'.

55 Na' bxengake' yi'na' lesh' chyoo che b̄xoz choo b̄xoz xenna' na' wche'gake' cho'a yi'na', na' wlen Pédrona' legake'.

56 Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

57 Na' Pédrona' aga b̄chebe', na' chi'ene':

—Noolə, aga nombi'a beena'.

58 Na' gokzə xtit bizle'i ben' yoblə Pédrona' na' chizi'ene':

—Lekzka' lenon' nako' ben'ka' txen.

Na' Pédrona' chi'ene':

—Bi len' nak' ben'ka' txen.

59 Na' wizak ka do' zi' tgor na' wize' sto ben' yoblə:

—Dii likzan len beeni nake' txen Jesúza' la' lekzka' ben' Galilean.

60 Na'ch che' Pédrona'ne':

—¿Ni bi nezid' bi dillaan choo!

Na' ni che'telə Pédrona' ka', ka wchell to shikwtez.

61 Na'ch biyechj Xancho Jesúza' bwie' Pédrona', na' Pédrona' jadinile' daa golle'ne', kana' chi'e: “Naanlle' shon̄ shii bi wchebo' shi nombi'o nad' ka zi' kwell shikwteza.”

62 Na' bichej Pédrona' gana' lle' ben'ka' na' wchellyeshee.

Btitjgakile' Jesúza'

(Mt. 26:67-68; Mr. 14:65)

63 Na'ch ben'ka' chapgake' Jesúza' btitjgakile'ne' na' wdap' wlall'gake'ne'.

64 Na' bsejgake' jalawe'na', na'ch wlall'gake'ne', che'gake'ne':

—¿Wnashki non wlall' li'!

65 Na' biya dii gollgake'ne' kwenche gakile' zi'.

Wde Jesúza' lao ben'ka' chñabia'gake' ben' Israelka'

(Mt. 26:59-66; Mr. 14:55-64; Jn. 18:19-24)

66 Na' ka wyeeni', bidop ben'ka' chñabia' ben' Israelka', len b̄xozka' chñabia' na' ben'ka' chli' chsedi leya'. Na' bdegake' Jesúza' lawe'ka'. Na'ch wñabgakile'ne', che'gake':

67 —Wnashki neto' shi li'kzan Crístona', beena' chbeznto'.

Na' che' Jesúza':

—Shi in̄ia' le': “Awe, nadaan”, aga wyajle'le' cha'.

68 Na' shi in̄abid' le' bi dii in̄abid' le', aga williilen na' ni bi yisanle nad', shi ñaa.

⁶⁹ Na' naate, nad', Ben' Bsel' Chioza' Yell-lioni, kwi'a kwit de shli che Chioza', beena' nap yel' wak xenna'.

⁷⁰ Na'ch yog'ze' wñabgakile'ne':

—¿Ana' lin' nako' Xiin Chioza'?

Na'ch che' Jesúza':

—Awe, shlikzan ba wnale.

⁷¹ Na'ch che' ljwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

23

Wde Jesúza' lao Pilátona'

(Mt. 27:1-2, 11-14; Mr. 15:1-5; Jn. 18:28-38)

¹ Na'ch yog'loł ben'ka' bizolla'gake' na' jwa'gake' Jesúza' lao Pilátona'.

² Na'ch wzologake' chaogake' xya che Jesúza', che'gake':

—Ba bidolinto' beeni chta chnie' ben' wlall chento'ka'. Chi'e bi chiyał' chixjcho daa chñab Césara', beena' chñabia', na' lekzka' naze' nake' Crístona', na' daa ne' ka' zejin nake' to ben' wñabia'.

³ Na'ch wñabi Pilátona' Jesúza', chi'ene':

—¿Alin' nako' ben' wñabia' che ben' Israelki?

Na'ch che' Jesúza'ne':

—Kan' nakan.

⁴ Na'ch che' Pilátona' bñozka' chñabia' na' yog' ben'ka' lle' na':

—Ni to dii mal bi chillelid' chon beeni.

⁵ Na' zizikchli che'gake':

—Diika' chli' chsedile' chta chñen yog'loł ben' lle' doxen lallnto'ni. Wzoloze' Galileana', na' axt Judeani ba bide'.

Bde Pilátona' Jesúza' lao Heródeza'

⁶ Ka gollgake' Pilátona' ka', na'ch wñabile' legake' shi nak Jesúza' ben' Galilea.

⁷ Na' ka wñezile' nake' ben' Galilea, na'ch bdie'ne' lao Heródeza', beena' nñane' chñabi'e Galileana', la' kana'yen' zoa Heródeza' Jerusalénna'.

⁸ Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' ben' xtilleena'. Na' goki Heródeza' ile'ile' gone' to yel' wak.

⁹ Na' biya dii wñabile' Jesúza', na' ni to daa wñabile'ne' bi billi'e.

¹⁰ Na' lekzka' na' lle' bñozka' chñabia' len ben'ka' chli' chsedile' leya', na' zizikli chaogake' xya che Jesúza'.

¹¹ Na'ch Heródeza' len soldad che'ka' biya dii bengakile'ne', na' btitjgakile'ne' bwakw-gake'ne' to lech' ka daa chakw to ben' wñabia'. Na'tech bizsel' Heródeza'ne' lao Pilátona'.

¹² Na' lo llana' bizoalen Pilátona' Heródeza' wen, la' kana'te chakzbani ljwelle'.

Bchoglogake' guet Jesúza'

(Mt. 27:15-26; Mr. 15:6-15; Jn. 18:39-19:16)

¹³ Na'ch bitia' Pilátona' bñozka' chñabia', na' ben'ka' chñabia'gake' ben' Israelka' na'ch ben' yell,

¹⁴ na' golle' legake':

—Le' bidwa'le beeni lawii, nale chta chnie' ben', na' nad' ba wñabidee laoleni, na' bi chillelid' ni to daa nale che' shi li ka chone'n.

¹⁵ Na' ni Heródeza' bi billelile' shi bi dol' nap beeni, na' ba bizseleene' laochoni. Na' ba ble'teile' aga bi bene' inacho wchoglozcho guete'.

¹⁶ Na' naa gon' mandad wit chingake'ne' na'tech yisane.

¹⁷ Na' ka chakz yog' yiz, chiyał' yisane' to beena' nej lillyana' kat' chał' Ini Paskwa'.

¹⁸ Na' yog' ben'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

19 Nyixjgake' Barrabáza' lillyana' daa bxie' wdila' yell Jerusalénna', na' bettie' to beñ'.

20 Na' daa cheeni Pilátona' yisane' Jesúsza', na' stokzə wñabile' beñ'ka' shi wisane'ne'.

21 Na' beñ'ka' zizikchli chosyaagake', che'gake':

—¡Bdee lee yag cruza'! ¡Bdee lee yag cruza'!

22 Na' de wyoñ shiyi che' Pilátona' legake':

—¿Bera dii malan' nezile ba ben beeni, lla? Bi chillelid' ni to dii mal dii ba bene' kwenche guete'. Gonch' mandad wit chingake'ne' na'tech yisane.

23 Na' beñ'ka' wzeyidgake' chosyaagake' chñabgakile'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'.

24 Na' bçhoglall' Pilátona' gone' ka cheeni beñ'ka'.

25 Na' bisane' beena' wñabgake', beena' de lillyana' daa bxie' wdila' na' daa bettie' to beñ'. Na' bene' Jesúsza' lo na'gake' kwenche gongakile'ne' ka chaklall'gake'.

Bda'gake' Jesúsza' lee yag cruza'

(Mt. 27:32-44; Mr. 15:22-32; Jn. 19:17-27)

26 Na' ka nche'gake' Jesúsza' lljada'gake'ne' lee yag cruza', billaggake' to beñ' Cirene lie' Simón zizee lyixaa. Na' beç'gake'ne' bwa'gake'ne' yag cruz che Jesúsza' na'ch janoe'ne'.

27 Na' beñ' zan zjanogake'ne', na' zan noolka' chbellgake' na' chosyaagake' ni che Jesúsza'.

28 Na' biyeçhj Jesúsza' bwie' legake' na' golle':

—Le' nool Jerusalén, bi kwelzle cha'; li kwell che kwine na' che xiinleka'.

29 La' wllin lla kat' ina beñ': “Chakomba nool willka', beñ'ka' bi wxan na' bi bwall bxopgake'.”

30 Na'ch beñ'ka' zoa llana' gak ka', solo inagake': “She! iyinjtega yaa yaoki idakwtegan neto'.”

31 Shi yag yaa yag banna' chongakile'n kon daa nazan chegake', ¿alechla ki gongakile' yag billa'?

32 Na' lekzka' nche'gake' chop beñ' wen dii mal kwenche witgake' legake' txen len Jesúsza'.

33 Na' ka bllingake' latja' gana' le Llit Yichj Ben' Wet, bda'gake' Jesúsza' lee yag cruza'. Na' lekzka' bda'gake' chopte beñ' wen dii malka' shlaa wej kwite'na'.

34 Na' ka chda'gake' Jesúsza' lee yag cruza', chi'e:

—Xa, wxi'xen chegake', la' aga neçgakile' bin chongake'.

Na' soldadka' bengake' to wyitj kwenche wneçgakile' nogake' yido! xe'na'.

35 Na' lle' beñ' zan chwiagake', na' axt beñ'ka' chñabia'gake' beñ' Israelka' btitjgakile'ne', nagake':

—Gok bisle' beñ' yoblə, na' naa yishashki kwine' shi leile' len' Crístona', beena' ba wlej Chioza'.

36 Na' lekzka' soldadka' btitjgakilene', na' jabig'gake' kwit yag cruza' gana' nda'gake'ne' na' bshabgakile'ne' to vino dii nak zichj zla'.

37 Na' che'gake'ne':

—Shi lin' nako' beñ' wñabia' che beñ' Israelki, bislashki kwino'.

38 Na' yichj yag cruz che'na' bda'gake' to dii cho'en dill' biçhe nda'gake'ne' lee yag cruza', nan: “Beenin beñ' wñabia' che beñ' Israelka'.” Bzejgake'n dill' griego, dill' latín na' dill' hebreo.

39 Na' to beñ' wen dii mala', beena' da' kwit Jesúsza', biya dii golle'ne', chi'ene':

—Shi lin' Crístona', Beena' Bsel' Chioza' inabia', bislashki kwino' na' lekzka' bisla neto'.

40 Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'.

⁴¹ Cho', ka chiyal'kz gak chechon' kwenche chixjcho che dii mala' daa bencho; san beeni aga bi dii mal bene'.

⁴² Na'ch golle' Jesúza':

—Jesús, lljadingachilo' nad' kat'ka' solo inabi'o.

⁴³ Na'ch che' Jesúza'ne':

—Dii li nia' li', naanlla soaleno' nad' latja' gana' nak mbalaz.

Wit Jesúza'

(Mt. 27:45-56; Mr. 15:33-41; Jn. 19:28-30)

⁴⁴ Na' do ka gobill bichol doxen yell-liona', blinte do ka chida shon,

⁴⁵ daa bich bzeeni' wbillá'. Na' lechaa ze loo yoodo'na' bllon' gokan chop laalá.

⁴⁶ Na'ch besyaa Jesúza' zilljá, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

⁴⁷ Na' ka ble'i beena' chñabia' soldadka' diika' gok, be'lawee Chioza', chi'e:

—Dii li beeni nake' dowalj ben' wen.

⁴⁸ Na' yog' ben'ka' lle' na', ka ble'gakile' ka gok, ziyajgake' chball'gake' cho'alcho'eka'.

⁴⁹ Na' yog' ben'ka' nombia'gake' Jesúza', do noolka' za'lengake'ne' axt Galileana', wzegake' zit'lá chwiagake' ka gok.

Bkwash'gake' Jesúza'

(Mt. 27:57-61; Mr. 15:42-47; Jn. 19:38-42)

⁵⁰ Wzoa to ben' wlie' José, ben' yell Arimatea, daa mbani Judéana'. Na' Joséna' nake' txen ben'ka' chñabia' ben' Israelka'. Nake' to ben' wen na' to ben' chon ka cheeni Chioza',

⁵¹ na' zoe' chbeze' wsel' Chioza' beena' inabia'. Na' Joséna' aga wyoolallee ka ben ben'ka' chñabia'lene' daa betgake' Jesúza', na' bi benlene' legake' txen.

⁵² Na'ch wyaje' lao Pilátona' na' wñabe' lsens yiletje' kwerp che Jesúza'.

⁵³ Na' biletje'ne' lee yag cruza', na'ch bitobe'ne' to lech' xen na' jlo'ene' to loo blej daa benschawee, ga bin' wkash'gake' ni tlish' ben' wet.

⁵⁴ Na' llana' gok diiki nakan lla chsini'a ben' Israelka' chegake' kwenche bibi llin gongake' lla sabda', llana' chombaangake', na' zi lat'zə chyallj solo llana' chombaangake'.

⁵⁵ Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'.

⁵⁶ Na'ch biza'gake', na' ka billingake' gana' zoagake', benschao'gake' daa chl'a' zix. Na' bizi'lall'gake' lla sabda' kon ka na leya'.

24

Biban Jesúza' ladj ben' wetka'

(Mt. 28:1-10; Mr. 16:1-8; Jn. 20:1-10)

¹ Na' lla necha' chizolo xmanna', wizaj noolka' ni bal cho'a bana', nox'gake' diika' chl'a' zix daa benschao'gake', na' wyaj zi bal noolá yoblá kon legake'.

² Na' ble'gakile' aga chi'ch yaja' cho'a bana'. ³ Na' wyoogake' loo bleja', na' ble'gakile' aga bich bi kwerp che Xancho Jesúza' de na'.

⁴ Na' shlak chakgakile' bera zejín dga, kat'kzali ble'gakile' chop ben' byo, nakwgake' lech' dii chey cheeni', zegake' kwite'ka'.

⁵ Na' noolka' bllebchagake' na' bchek' yichje'ka' axt lo yona'. Na'ch ben'ka' zena' che'gake':

—¿Berache chiyiljzle beena' mban ladj ben' wetki?

⁶ Kochno de ni. Ba bibane' ladj ben' wetki. Li lljadini daa wne' le' kana' zoalene' le' Galileana'.

7 Wne' chonan byen Beena' Bsel' Chioza' Yell-lioni gake' lo na' ben' malka', na' witgake'ne' lee yag cruza', na' ka yiyon lla yibane' ladj ben' wetka'.

8 Na'ch jadini noolka' daa goll Jesúza' legake'.

9 Na' biza'gake' biyajgake' gana' lle' postlka' shnej len yog' ben'ka' sto gokgake'ne' txen, na' be'gake' dill' yog' daa gok chegake'.

10 Na' noolkin jayellgake' postlka' daa gok chegake': María ben' yell Magdálana', Juánana', María xna' Jacóbona', na' len zi bal nool yoblə.

11 Na' postlka' ni lat' bi wyajle'gake' daa goll noolka' legake' daa gokgakile' bizan chon chnagake'.

12 Na' Pédrona' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'lə. Na'ch bizee zjade' gana' zoe' chibanile' ka nak daa ba gok.

Bli'lao Jesúza' chop ben' tnez Emaúza'

(Mr. 16:12-13)

13 Na' lo llana' gok ka', chop ben'ka' nak Jesúza' txen wyajgake' to yell dii le Emaús, na' nlaa ljwellin ka do shnej kilometro kon Jerusalénna'.

14 Na' lo zej ngoogake' nez choe'gake' dill' cheyi diika' ba gok.

15 Na' shlak choe'gake' dill' cheyi diika' gok, na' jabig' kwín Jesúza' kwite'ka' na' zejlene' legake' txen.

16 Na' la'kzi chwiagake'ne', aga gokbe'gakile' no beena'.

17 Na'ch wñabi Jesúza' legake':

—¿Bera dillaan choe'le za'le ni? ¿Beraçhe chakyesh'zile?

18 Na' toe', beena' le Cleofas, chi'ene':

—Yog'zə ben' nezgakile' daa ba gok Jerusalénna' llaki ba wde. ¿Astozo' li' bi nezilo' daa ba gok?

19 Na'ch chi'e legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel' wak na' bi'e dill' zakii dii nak shli lao Chioza' na' lao ben'.

20 Na' bxozka' chñabia' na' ben'ka' chñabia'gake' cho' ben' Israel bengake'ne' lo na' joschiska' kwenche bçhoglogake' che' guete', na' bda'gake'ne' lee yag cruza'.

21 Neto' nonnto' lez nan len' yibeje' cho' ben' Israel lo na' ben' zit'ka'. Na' ba gok shon lla gok diiki.

22 Na' bal noolka' nak neto' txen wyajgake' cho'a bana' daa baabali, na' le bibaninto' ka wnagake'

23 bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, ben' goll legake' mbankzə Jesúza'.

24 Na'ch wyaj bal ben' byoka' nonlennto' txen cho'a bleja', na' nakan kon ka wna noolka', per aga no Jesúza' ble'gakile'.

25 Na'ch che' Jesúza' legake':

—¡Le' ben' bi chajni! ¡Bi llabia' bat shajle'le daa bzej dii ben'ka' wdixjee daa goll Chioza' legake'!

26 ¿Abi nezile lliakzə bia' biya daa yen ile'i beena' nak Crístona' ka zi' yiyo'e gana' sho'e balaan xenna'?

27 Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

28 Na' ka bllingake' yella' gana' zejgake', bentezə Jesúza' ka ben' shaj gan yoblə.

29 Na' ben'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal.

Na'ch wyoo Jesúza' bigaanlene' legake'.

³⁰ Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bxoxje'n na' bi'en legake'.

³¹ Na'ch biyombia'yen'gake' nan len' Jesúza', na' to binitloze'.

³² Na'ch che' ljwelle':

—jBera daan, axt mbalaz inleeb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

³³ Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlā ben'ka' nakgake'ne' txen,

³⁴ na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

³⁵ Na'ch ben'ka' chop gollgake' legake' ka gok chegake' tneza', na' ka biyombia'gake' Jesúza' ka bxoxje' yetxtila' bi'en legake'.

Jali'lao Jesúza' ben'ka' nakgake'ne' txen

(Mt. 28:16-20; Mr. 16:14-18; Jn. 20:19-23)

³⁶ Na' shlak ni choe'gake' dillaa, tokonganzi jaze Jesúza' ladjeka' na' bwape' legake' chiox, chi'e legake':

—Soashgale mbalaz.

³⁷ Na' le bllebgake' daa chakgakile' yel bxenzen chwiagake'.

³⁸ Na' che' Jesúza' legake':

—¿Berache chllebzle? ¿Biche chak choplall'zle?

³⁹ Li wwia ni'a na'ki kwenche inezile nad'kzan. Li gox' nad' kwenche inezile aga nak' to yel bxen, la' to yel bxen bibi bel' bibi llit yoon ka nak' nad'.

⁴⁰ Na' ka golle' legake' ka', bliile' legake' ni'a neena'.

⁴¹ Na' yel' chiba chizaki che'ka' na' yel' chibanina', ni bi chakbe'gakile' shi lekzen'. Na'ch chi'e legake':

—¿Abi de lat' dii gaocho?

⁴² Na'ch be'gake'ne' lat' bel' ba bwey'gake' lo yi'na'.

⁴³ Na' bexeeb wdawe'b chwiategake'.

⁴⁴ Na' chi'e:

—Ka nak daa ba gok cha', lennan' wnia' le' kana' ni zoalen' le', kana' wnia' llia bia' yillinin gak cha' yog' diika' bzej dii Moiséza', na' diika' bzej dii ben'ka' wdixjee daa goll Chioza' legake' na' diika' da' lee sálmoka'.

⁴⁵ Na'ch ben Jesúza' ka wyajni'gakile' diika' na Cho'a Xtill' Chioza',

⁴⁶ chi'e legake':

—Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon lla yibane' ladj ben' wetka'.

⁴⁷ Na' lezkka' nan: ides cho'a xtilleena' daa nan shi yiyaj yileni ben' dii malka' chongake' na' yiyakxen chegake'. Na' solozan Jerusalénni na' illiljan doxente.

⁴⁸ Na' le' chiya' ye'le ben' yog' diiki ba ble'ile gok cha'.

⁴⁹ Na' nad' wselaa beena' bcheb Xa' Chioza' gone' gaklene' le', na' li soatezə Jerusalénni axt kat'ch Xa'na' gone' le' yel' waka' daa za' yabana'.

Biyep Jesúza' yabana'

(Mr. 16:19-20)

⁵⁰ Na'ch bche' Jesúza' legake' wyajgake' yell Betániana'. Na' blis neena' benleeye' legake'.

⁵¹ Na' ni chonleeytie' legake', ka bikwase' kwite'ka' na' biyep'e yabana'.

⁵² Na' ben'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'.

⁵³ Na' wzoatezi wzoagake' be'la'ogake' Chioza' yoodo'na'.

Dill' wen dill' kob daa bzej Juanna'

Beena' nak Xtill' Chioza' golje' goke' to beñ'

¹ Ba zoakzə beena' le Xtill' Chios ka wxe wzil yog'lołte dii de. Len' ba zoalene' Chioza', na' lekzen' Chioza',

² na' dezd nechte ba zoalenkze' Chioza'.

³ Len' bene' yog'te dii de, na' biga de to dii bi bene'.

⁴ Len' cho'e yel' mban, na' nake' beeni' che beñ' yell-lioni.

⁵ Na' beeni' che'na' chzeeni'n yell-lioni gani nak shgasj shchol ni che dii mala', na' yel chol'a' bi bizoyin yisolan beeni'na'.

⁶ Wzoa to beñ' bsel' Chioza' wlie' Juan.

⁷ Juanna' bidyee dill' che beena' nsa' beeni'na' kwenche yog' beñ' gonlilall'gake'ne'.

⁸ Aga Juanna'yen'nan nsee beeni'na', san to bidtixje'ze' che beena' nsa' beeni'nan'.

⁹ Beena' nsa' beeni'na' daa nak dowalj daa wzeeni'n lao yog'loł beñ', ba zee yell-lioni.

¹⁰ Na' beena' nsa' beeni'na' bidsoe' yell-lioni, na' la'kzi le' bxe bsile' yell-lioni, beñ'ka' lle' lawinna' aga gokbe'gakile' non nake'.

¹¹ Blline' ladj beñ'ka' nak beñ' yell che', na' legake' bi blebgake'ne'.

¹² Per yog' beñ'ka' blebgake'ne' na' benlilall'gake'ne', bene' legake' xiin' Chios.

¹³ Na' aga daa nakgake' beñ' de beli chenana, wa daa cheeni beñ' soalen ljwellen', ni aga daa cheeni beñ' soa xiinen', san daa benlilall'gake'nen' gokgake' xiin' Chios.

¹⁴ Na' beena' le Xtill' Chios golje' goke' to beñ' de beli chen na' wzoe' ladjnto'ni. Na' ble'into'ne' nake' beñ' zakii nleb daa nake' Xiin' tlish' tyaj Xacho Chioza', na' nake' beñ' lall'do' xen inleb na' bli'e do ka nak dii lina'.

¹⁵ Na' Juanna' bi'e dill' che' wne':

—Che beenin bzajniid' le' kana' wnia': "Beena' zi' za' nake' beñ' zak'chi aga ka nad', la' ba zoakze' kana' zi' soa' nad'."

¹⁶ Daa nake' beñ' wen inleb na' daa chakchgaile' cho', dii zan dii wenka' ba bene' che yog'cho.

¹⁷ Dii Moiséza' bzajniile' cho' diika' bllia Chioza' bia' goncho; per Jesucristona' bli'e yel' chiyesh'lalli che Chioza' len dii li che'na'.

¹⁸ Ni to konon' ile'i Chioza', per Xiine'na' nak tlish' tyaj, beena' zoalene'ne', len' bidliile' cho' ka nake'.

Juanna', beena' bchoa beñ' nisa', bi'e xtill' Jesucristona'

(Mt. 3:11-12; Mr. 1:7-8; Lc. 3:15-17)

¹⁹ Beñ' wñabia' che beñ' Israelka' lle' Jerusalenna' bsel'gake' to chop bxož na' sto chop beñ'ka' nak xiin' dia che dii Levína' kwenche janabgakile' Juanna' non nake'.

²⁰ Na' bi bkwashēe non nake', san golle' legake':

—Aga nadaan Cristona', beena' chbezcho wsel' Chioza'.

²¹ Na'ch wiznabgakile'ne':

—¿Norakzan nako' shka'? ¿Alin' Elíaza', beena' wdixjee daa goll Chioza'ne' kani'yi?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche chixji'e daa che' Chioza'ne', shka'?

Na' che' Juanna':

—Akza le' nad'.

²² Na'ch che'gake'ne':

—¿Norakzə li', shka'? Cheeninto' inezinto' kwenche lljayellnto' ben'ka' bsel' neto' non nako'. ¿Bi ka ino' che kwino'?

²³ Na'ch che' Juanna' legake':

—Dii Isaíaza', beena' wdixjee daa goll Chioza'ne' kani'yi, dill' chan' bi'e kana' wne': “To ben' gosyee zillj latja' gana' bibi chashj chleb, na' ine': Li se kwas kwenche wzenagle che Xanchona' kat' zee.”

²⁴ Na' ben'ka' bsel' fariseoka'

²⁵ wñabgakile'ne':

—¿Berache chchoazo' ben' nis shi aga lin' Crístona', ni Elíaza', ni beena' llia bia' wsel' Chioza' kwenche chixji'e daa chi'ene'?

²⁶ Na' che' Juanna' legake':

—Nad' chchoa' ben' nis, per ladjleni zoa to ben' bi nombia'le,

²⁷ na' len' zi' wli'lawe'. Na' nad' ni bi zakaa gak' xmose' kwenche galj' la'ch' xe'le'na'.

²⁸ Yog' diiki gok gana' le Betania, daa llia shlaa yao Jordanna', gana' bchoa Juanna' ben' nisa'.

Jesúza', beena' bsel' Chioza', zaklebile' xil'do'na' chitgake'

²⁹ Na' betiyo ble'i Juanna' Jesúza' zeje' kwite'na', na' chi'e:

—Li wwia, beenin bsel' Chioza' na' zaklebile' xil'do'na' chitcho, la' len' yikwase' saaxya che ben' yell-lioni.

³⁰ Na' xtill' beenin bi'a kana' wnia': “Zi' za' to ben' zak'chi ka nad', na' ba zoakz beeni kana' zi' soa'.”

³¹ Ni nad' bi wñezid' no xtilliin bi'a, per kwenche gombia' ben' Israelki le', bidchoa' ben' nis.

³² Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' le'.

³³ La' ni nad' bi wñezid' no xtilliin bi'a, per Chioza', beena' bsel' nad' chchoa' ben' nis, wne': “Ile'ilo' yetj Espíritu cha'na' lljsoalene' beena' wlej', na' len' gone' ka yidsoa Espíritu Sántona' loo yichjlall'do' ben'!”

³⁴ Ba ble'id' gok ka wna Chioza' nad', na' ñaa nia' le' beenin Xiin Chioza'.

Ben'ka' bengake' Jesúza' txen dii nech

³⁵ Na' betiyo Juanna' zelene' chop ben'ka' nakgake'ne' txen.

³⁶ Na' ka ble'ile' chda Jesúza' na', na'ch chi'e:

—Li wwia, beenin bsel' Chioza' na' zaklebile' xil'do'na' chitcho kwenche chiyakxen saaxya chechoka'.

³⁷ Na' chop ben'ka' nak Juanna' txen, ka bengakile' wna Juanna' ka', na' janogake' Jesúza'.

³⁸ Na'ch ka biyechj Jesúza', ble'ile' zjanogake'ne' na' chi'e legake':

—¿Bin cheenile'?

Na' che'gake'ne':

—Rabí, ¿garan zo'?

(Na' Rabí zejín: ben' chli' chsedi ben'.)

³⁹ Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana, la' ka do chida tapan billinlengake'ne' gana' zoe'.

⁴⁰ Na' beena' le Andrés, ben' bish' Simón Pédróna', len sto ben' yoblə gokgake' chopə janogake' Jesúza' ka bengakile' daa wna Juanna' che'.

⁴¹ Na' Andréza' lii jadjiltie' ben' bishee Simónna', na' chi'ene':

—Ba billeminto' beena' nak Mesíaza'—. Na' Mesías zejín Cristo, beena' chbezgake' wsel' Chioza' kwenche inabi'e.

⁴² Na'ch Andréza' b̄chi'e Simónna' gana' zoa Jesúza', na' ka ble'i Jesúza'ne', chi'ene':
—Lin' Simón, xiin̄ Jonáza', na' ñaa yilio' Cefas—. Na' Cefas zejín Pedro.

Jesúza' golle' Felípena' len Natanaela' gakgake'ne' txen

⁴³ Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':
—Da dino nad'.

⁴⁴ Felípena' nake' beñ' yell Betsaida, gana' nak lall Andréza' na' Pédróna'.

⁴⁵ Na'ch jadjilj Felípena' Natanaela' na' chi'ene':

—Ba billelinto' beena' bzej dii Moiséza' xtilleena' lee libr̄ che leya'. Na' lekzka' chen' bzej dii beñ'ka' wdixjee daa goll Chioza' legake' kani'yi. Len' Jesúza', beñ' Nazareta', xiin̄ Joséna'.

⁴⁶ Na' Natanaela' chi'ene':

—¿Aka Nazareta' ichej to beñ' zakii?

Na' Felípena' golle'ne':

—Dakachi kwenche gakbe'ilo'.

⁴⁷ Na' ka ble'i Jesúza' zej Natanaela' gana' zie', golle':

—Ni za' to beñ' nak dowalj beñ' Israel, to beñ' bi nak beñ' wxiye'.

⁴⁸ Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yid̄nelə Felípena' li', ble'id' li' xan yag yix̄wewa'.

⁴⁹ Na' goll Natanaela'ne':

—Maestro, lin' nako' Xiin̄ Chioza'. Na' lin' beena' zid̄nabia' neto' beñ' Israel.

⁵⁰ Na' goll Jesúza'ne':

—¿Aadaa wnia' ble'id' li' xan yag yix̄wewan' chajli'o cha'? Zi' ile'chilo' dii xench aga ka dga.

⁵¹ Na' lekzka' gollch Jesúza':

—Dii li nia' le', ile'ile yabana' nyaljan, na' beñ'ka' nak anjl̄ che Chioza' chep chetjgake' lawa', nad', Beñ' Bsel' Chioza' Yell-lioni.

2

Got' to wishagna' yella' le Caná

¹ Na' biyon̄ lla got' to wishagna' yella' le Caná daa lliá gana' mbani Galileana', na' na' len x̄na' Jesúza'.

² Na' lekzka' goxgake' Jesúza' na' beñ'ka' nakgake'ne' txen.

³ Na' shlak chak l̄nina' bibill vino che'ka', na' goll x̄na' Jesúza'ne':

—Ba bibill vino che beñ'ki.

⁴ Na'ch che' Jesúza'ne':

—¿Berache nazo' nad' ka'? Biñ' gal' gon' daa lliá bia' gon'.

⁵ Per x̄neena' golle' wen mandadka':

—Li gon kon bin̄ in̄e' le'.

⁶ Na' na' zoa x̄op yes' xen de yaj, dii choll nis, diika' chon llin kat' beñ' Israelka' chixi chiyechgake' kon ka na ley che'ka'. Na' to to yes'ka' chollan ka do shon̄ yid nis.

⁷ Na' che' Jesúza' wen mandadka':

—Li kaa nisa' l̄oo yes'ki.

Na' wda'gake'n axt ka billa'chagakan.

⁸ Na'ch che' Jesúza' legake':

—Li gash' lataan ñaa na' li lljeen beena' ngoo lo neen.

Na' bengake' ka golle'.

⁹ Na' beena' ngoo lo neen bnixe' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna',

¹⁰ chi'eb':

—Yog' ben' zigaate chdie' vino wenna', na' kat' ba weej ben'ka' len lnina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹ Yel' waki dga ben Jesúza' yell Canána' daa llia gana' mbani Galileana', lennan' bene' dii nech. Na' ka' bli'e yel' wak che'na' nape', na'ch ben'ka' nongake' le' txen benlilall'gake'ne'.

¹² Na' ka wde, biyaje' Capernaúma' len xneena', len ben' bisheeka' na' len ben'ka' nakgake'ne' txen, na' wzoagake' na' to chop shon lla.

Bishesh Jesúza' ben'ka' chit' chde lesh' chyoodo'na'

(Mt. 21:12-13; Mr. 11:15-18; Lc. 19:45-46)

¹³ Na' ka ba zoa gal' lni Paskwa' daa chon ben' Israelka', wyaj Jesúza' Jerusalénna'.

¹⁴ Na' ka blline' lesh' chyoodo'na', ble'ile' lle' ben' chit'gake' goon, xil', na' palom, na' lekzka' na' chi' ben'ka' chisha' mecha'.

¹⁵ Na' ka ble'ile' ka chak, bene' to do tashj, na' kon len bisheshile' yog'lole' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'.

¹⁶ Na' ben'ka' chit' palomka', golle' legake':

—Li yishesh baki ni! Bi gonzle lill Xa'na' ka lao yaa!

¹⁷ Na'ch ben'ka' nakgake'ne' txen jadingakile' Cho'a Xtill' Chioza' gana' nan: “Daa le chakid' lill xlatjo'na' len wlliyi'n nad'.”

¹⁸ Na'ch ben' Israelka' lle' na' che'gake' Jesúza':

—Bi yel' wak gono' dii wli'n napo' yel' wnabia' kwenche chono' diiki?

¹⁹ Na' che' Jesúza' legake':

—Li yichinj yoodo'ni na' lo shonə llazə yiyona'n.

²⁰ Na'ch che' ben' Israelka' le':

—Xopiyon yiz bengake' yoodo'ni, na' li' nazo' shonə llazə yiyono'n.

²¹ Per daa goll Jesúza' legake' ka', kwerp che'nan' bsaklebile' yoodo'na'.

²² Na'ch ka biban Jesúza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtill' Chioza' na' dill'ka' be' Jesúza'.

Nombia' Jesúza' yichjlall'do' yog'cho

²³ Na' shlak zoa Jesúza' lni Paskwa' Jerusalénna', ben' zan wyajle'gake' che' daa ble'gakile' yel' wakka' bene'.

²⁴ Per Jesúza' bi bxenilallee legake', la' nombi'e yichjlall'do' yog'lol ben'.

²⁵ Aga byalljile' no yee le' nakan nak benecha', la' kwaslol nombi'e yichjlall'do'eka'.

3

Jesúza' bshaljlene' Nicodémona'

¹ Wzoa to fariseo ben' wle Nicodemo, na' goke' to ben' wnabia' ladj ben' Israelka'.

² Na' Nicodémona' wyaje' jawie' Jesúza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi gak gono' yel' wakka' chono' shel' bi zoalen Chioza' li'.

³ Na'ch Jesúza' chi'ene':

—Dii li nia' li', beena' bi yiyalj dii yoblə aga wak lljazoe' gana' chnabia' Chioza'.

⁴ Na' che' Nicodémona'ne':

—Nakra gon to ben' gol yiyaljze' dii yoblə? La' aga wak yiyo'e loo lee xneena' kwenche yiyalje' sto shii.

⁵ Na' Jesúza' chi'ene':

—Dii li nia' li', kono gak yiyaj gana' zoa Chioza' chnabi'e shi bin' galjlenile' nis * na' yikob Espiritu che Chioza' yichjall'do'ena' kwenche gake' ka ben' galj sto shii.

⁶ Beena' nak xiin ben' de beli chen, de beli chenchokzan nake'. Per beena' chikob Espiritu che Chioza'ne', nake' xiin Chios na' de to yel' mban che' daa bi te cheyin.

⁷ Bi yibanilo' daa nia' li': "Yog' ben' chiyal' galje' dii yoblə."

⁸ Kat' chze be'na' na' chajan kon ga cheenin, na' la'kzi chenicho ka sshag chonan aga nezicho galan za'n, ni bi nezicho galan zejan. Lekzkan' aga nezicho nakan chon Espiritu che Chioza' kwenche chiyalj ben' dii yoblə.

⁹ Na'ch wiznabi Nicodémona'ne':

—¿Nakra gak gakz dga?

¹⁰ Na' che' Jesúsza'ne':

—Len naktio' to ben' chli' chsedi ben' Israelki, ¿ana' bi nezilo' diiki?

¹¹ Dii li nia' li', choe'nto' dill' che daa nezinto' na' daa ben ble'into', per bi chajle'le daa nanto' le'.

¹² Shi bi chajle'le daa wnia' le' che diika' chak yell-lioni, ¿alechlə shi we'len' le' dill' che daa nak che yabana'?

¹³ 'Ni to konoñ' shep yabana', toz nad', Ben' Bsel' Chioza' Yell-lioni, nak' ben' za' yabana'.

¹⁴ Na' ka ben dii Moiséza' gana' bibi chashj chleb bdee bel de broncena' lee yaga', ka'kzan gongakile' nad', Ben' Bsel' Chioza' Yell-lioni. Wda'gake' nad' lee yaga'

¹⁵ kwenche nottez ben' gonlilall' nad' bi kwiayee, san gat' to yel' mban che' zejli kani.

Chaki Chioza' yog' ben' yell-lio

¹⁶ 'Daa le chakchgayi Chioza' ben' yell-lioni, bselee Xiine'na' tlish' tyaj kwenche nottez ben' gonlilalleene' bi kwiayee, san gat' yel' mban che' zejli kani.

¹⁷ Chioza' bselee xiine'na' yell-lioni aga kwenche wliayee benaan, san kwenche yisle' legaken'.

¹⁸ 'Beena' nonlilall' Xiin Chioza', bich nchoglo che' sak'zi'e, san beena' bi nonlilalleene', ba nchoglo che' kwiayee daa bi nonlilalle Xiin tlish' tyaj Chioza'.

¹⁹ Ba nchoglo kwiayi' ben' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel chola' aga ka beeni'na'.

²⁰ Yog' ben'ka' chon diika' bi yejni'alallii chakzbangakile' beeni'na', na' aga will-jabig'lat'gake' lawinna' daa chlebgake' wli'lawi dii mala' chongake'.

²¹ San ben'ka' zoagake' chongake' ka na dill' li che Chioza', chbig'gake' lao beeni' che'na' kwenche gakbia' chongake' ka cheeni Chioza'.

Juanna', beena' bchoa ben' nisa', be'che' xtill' Jesúsza'

²² Ka wde, wyaj Jesúsza' Judeana' len ben'ka' nakgake'ne' txen na' wzoagake' na' xtit wen, na' bchoagake' ben' nis.

²³ Na' Juanna' lekzka' chchoe' ben' nis gana' le Enón, gaozə gana' le Salim, la' na' de nis zil, na' chaj ben' kwenche chchoe' legake' nisa'.

²⁴ Diiki gokgakan kana' zi' koogake' Juanna' lillyana'.

²⁵ Na'ch ben'ka' nakgake' Juanna' txen gokdil'-lengake' sto ben' Israel ni cheyi diika' yoologake' chongake' kwenche chixi chiyechgake' lao Chioza'.

²⁶ Na' wyajgake' jellgake' Juanna':

—Maestro, beena' wzeleno' shlaa yao Jordanna', beena' bi'o xtilleena', ba chchoe' ben' nis na' yog'zə ben' chajgake' kwite'na'.

²⁷ Na'ch che' Juanna' legake':

—Kono gak bi gon shi Chioza' bi wi'e latj.

* **3:5** Galjlenile' nis: bal ben'ka' nsed nagake' zejlin daa chchoacho nisa', na' zi balgake' nagake' zejlin nisa' daa chzani xna'chona' cho', na' zi balgake' nagake' zejlin daa chixis chiyib Espirituna' cho' kat' chonlilall'cho Cristona'.

²⁸ Kwinkzle benile kana' wnia' aga nadaan Crístona', beena' chbezcho wsel' Chioza', san nak' to beñ' bselee kwenche kwialoa' lawe'na' na' yep' beñ' wzenaggake' che'.

²⁹ To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwit-baa, le chibaib' ka chenib' chshaljb'. Kayeñ'nan chak cha', le chibaid' daa chzenaggake' che Crístona'.

³⁰ Len' zizikchli seyi che', na' nad' bichtek seyi cha'.

Beena' za' yabana'

³¹ 'Ka nak beena' za' yabana', len' zak'chi' aga ka yog'lol beñ'. Na' beñ'ka' lle' yell-lioni, chinogake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte beñ',

³² na' choe' dill' cheyi diika' ba ben ble'ile' yabana', per balchga beñ' chajle' xtilleena'.

³³ Na' nottez beena' chajle' che', chli'e Chioza' cho'e dill' li.

³⁴ Beena' bsel' Chioza', cho'a xtill' Chiozan' cho'e, la' Chioza' no'ene' do ka nak Espíritu che'na'.

³⁵ Chioza' chakile' Xiine'na', na' ba bene' lall' nee yog'lolte dii de.

³⁶ Na' beena' gonlilall' Xiin Chioza' gat' yel' mban che' zejli kañi. Per beena' bi cheeni gonlilalleene' bi gat' yel' mban che' zejli kañi, san ile'ile' yel' zak'zi'na' we' Chioza'.

4

Bshaljen Jesúza' to nool Samaria

¹ Fariseoka' gokbe'gakile' beñ' zanch nakgake' Jesúza' txen, na' beñ' zanch chchoe' nisa' aga ka Juanna',

² la'kzi aga kwín Jesúzan' bchoe' beñ' nisa', san beñ'ka' nakgake'ne' txenan.

³ Na' ka gokbe'i Jesúza' ba nezi fariseoka' beñ' zanch nakgake'ne' txen, na' ch bizee gana' mbani Judeana' ziyaje' gana' mbani Galiléana'lə.

⁴ Na' kwenche yilline' gana' mbani Galileana' chiya' yidie' gana' mbani Samáriana'.

⁵ Na' billingake' to yell dii le Sicar, daa lliana' mbani Samáriana'. Na' yella' llian gaozə gana' de yell-liona' be' dii Jacoba' xiine' dii Joséna'.

⁶ Na' lo yell-liona' lliana' wden dii Jacoba'. Na' ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill.

⁷⁻⁸ Na' beñ'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Beñ' lat' nis yeej'.

⁹ Na' ch che' noolə Samáriana'ne':

—¿Berache chñabzilo' nad' nisa' yeejo'?, la' beñ' Israel li', na' nool Samaria nad'.

Golle' ka' la' beñ' Israelka' bi zoalengake' wen beñ' Samáriaka'.

¹⁰ Na' ch che' Jesúza'ne':

—Shel'ka' nezshailo' daa chon Chioza' na' no nad' chñabid' li' nisa' yeej', ba wñabilo' nad' gon daa yeejo', shel'ka', la' nap' to nis yaa nis ban daa gon li'.

¹¹ Na' noola' chi'ene':

—Beñ'do', bibi noxoo wlepilo' nisa', na' posi le zitjan. ¿Gara lljxi'o nis yaa nis banna' gono' nad' nazo' ka'?

¹² Dii xozxto'cho Jacoba' bkwaanlene' neto' posi gani weeje', na' weeje' xiine'ka' na' bayix' che'ka'. ¿Achakilo' zak'chilo' ka le'?

¹³ Na' che' Jesúza'ne':

—Nottezə beñ' cheeje' nis che' posi, wbilchkzile' dii yoblə.

¹⁴ San beena' yeej' nisa' daa wi'ane', aga wbilchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kañi.

¹⁵ Na' ch che' noola'ne':

—Beñ'do', beñ' nad' nisa' no' ka' kwenche bich ibilid' na' bich yid beja' ni.

16 Na' che' Jesúza'ne':

—Biyaj jaṇe beṇ' cho'na', na' dalene' ni.

17 Na' che' noola'ne':

—Aga no beṇ' cha' zoa.

Na' Jesúza' chi'ene':

—Lekzilo' no' ka', aga no beṇ' cho' zoa.

18 La' ba gok gay' beṇ' cho'ka', na' beena' zoaleno' naa ni bi nshagna'lenkzo'ne'. Shlikzan ba wṇio'.

19 Na'ch noola' chi'ene':

—Beṇ'do', ba gokbe'id' nako' to beṇ' chyixjee daa na Chioza'.

20 Dii xozxto'nto'ka' be'la'ogake' Chioza' lo yaani, na' le' beṇ' Israel nale chonan byen we'la'ochone' Jerusalénna'.

21 Na' che' Jesúza'ne':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusalénna' kwenche we'la'ole Xacho Chioza'.

22 Le' beṇ' Samaria ni bi nombia'le non choe'la'ole, san neto' beṇ' Israel nom-bia'nto' Chioza', beena' choe'la'onto', la' ladjnto'nan' ichej beena' yisle' beṇ' kwenche bi kwiayi'gake'.

23 Ba zoa illin lla, wa ba bblinkz llana' beṇ'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'.

24 Chioza' nake' Espíritu, na' beṇ'ka' cheengakile' we'la'ogake'ne', chiyal' we'la'ogake'ne' dowalj na' do yichj do lall'gake'.

25 Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

26 Na' che' Jesúza'ne':

—Nad'kzan' beena' no' ka', na' len' chshaljlene' li'.

27 Na' shlak choe'lene' noola' dill', billin beṇ'ka' nakgake'ne' txen na' bibangakile' daa chshaljlen Jesúza' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'.

28 Na'ch noola' bkwaane' chee nis che'na' na'zə, na' biyaje' jayelle' beṇ' wlall che'ka':

29 —Li da lljawiacho to beṇ' ba wne' nad' yog' diika' ba ben'. ¿Aaga len' Crístona', lla?

30 Na'ch blleshgake' yella' wyajgake' gana' chi' Jesúza'.

31 Na' shlak ziyaj noola' zeyid beṇ'ka' nak Jesúza' txen che'gake'ne':

—Maestro, wdao lat'.

32 Na' Jesúza' chi'e legake':

—De to yel' wao cha' daa bi nombia'le.

33 Na'ch che' ljwell beṇ'ka' nakgake'ne' txen:

—¿Anti no ba bidwa' dii wdawe', lla?

34 Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'.

35 Le' nazle: “Chyalljch zi tap beo' kwenche yizi' yilapcho.” Per nad' nia' le', li wwiakachi ba de daa yizi' yilapcho.

36 Beena' chyixjee cho'a xtill' Chioza' naa, zaklebile' to beṇ' ba chilalile' chizi' chilape'. Na' beṇ'ka' chzenag daa chyixji'e, gat' to yel' mban chegake' zejli kani, na' beena' goz yibalenile' beena' chizi' chilap.

37 Nakan ka dillaa de daa na: “Beṇ' yoblan chaz na' beṇ' yoblə chizi' chilap.”

38 Nad' ba bselaa le' lljalaple gana' bi bllaglole gozle, la' le' gonle ka wzenag beṇ' cho'a xtill' Chioza' daa wdixjee beṇ' yoblə.

³⁹ Ben' zan ben' Samáriaka', ben'ka' lle' yell Sicara' benlilall'gake' Jesúza' daa goll noola' legake': "Ba wne' nad' yog'te dii ba ben'."

⁴⁰ Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaane' na' chop lla.

⁴¹ Na' ben' zanch benlilall'gake'ne' daa bengakile' dillaa cho'e.

⁴² Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' nezinto' dii li lekzen' beena' yisla ben' yell-lioni kwenche bi kwiayi'gake'.

Jesúza' biyone' xiin to ben' wñabia'

⁴³ Na' ka gok chop lla, bizee biyaje' gana' mbani Galileana'.

⁴⁴ Kwinkz Jesúza' wne' nan to ben' chyixjee daa che' Chioza'ne' aga no chgoo le' balaan lalle'na'.

⁴⁵ Na' ka billine' gana' mbani Galileana', blebgake'ne' daa ble'gakile' yog' daa bene' Jerusalénna' ka gol' lni Paskwa'.

⁴⁶ Na' dii yoblə wizaj Jesúza' yell Canána' daa llii gana' mbani Galileana', gana' biyone' nisa' vino. Na' yella' zoa to ben' zakii ben' chon llin che ben' wñabia'na', na' zoa to xiine' bi' byo bi shao'b'.

⁴⁷ Na' ka wnezile' ba billin Jesúza' Galileana' zizee Judeana'lə, na' wyaje' lawe'na' got'yoile'ne' shaje' lljayene' bi' che'na' daa ba chakshwetb'.

⁴⁸ Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹ Na' ben' wñabia'na' chi'ene':

—Ben'do', ben goklen dagach ñaate, shategali bin' guet bi' cha'na'.

⁵⁰ Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee.

⁵¹ Na' ka ba zoa yilline' lille'na' jatil xmore'ka' le', che'gake'ne':

—Ba biyaki bi' cho'na'.

⁵² Na'ch wñabile' legake' ka do bi gor wzolo chiyakshao'lall'b'. Na' che'gake'ne':

—Daa ñeji do ka chida to bichejb' dii lana'.

⁵³ Na'ch gokbe'i xabaa biyakshao'lall'b' ka gora' goll Jesúza'ne': "Biyaj jawia. Aga wet bi'na'." Na' le' len yog' ben'ka' zoa lille'na' benlilall'gake' Jesúza'.

⁵⁴ Dga gok de wchopi yel' wakka' ben Jesúza' Galileana' ka zizee Judeana'.

5

Biyon Jesúza' to ben' net ni'a nee

¹ Ka wde gok diiki, gol' to lni che ben' Israelka' Jerusalénna', na' biyaj Jesúza' lñina'.

² Na' Jerusalénna', gaozə cho'a puerta' le Puert Che Xil'ka' llii to tang dii le Betesda dill' hebreo. Na' gay' koridor nechjan tanga'.

³ Na' loo koridorka' de ben' zan ben' we', no ben' lchol, no ben' bi chak sa' wen, na' no ben' net ni'a nee, chbezgake' ta nisa'.

⁴ La' zoa kat' chetj to anjl cho'a tanga' chte' nisa', na' beena' chyobi cho'e loo nisa' chiyoll chta anjla'n chiyakile' bittezə yillwe' che'ile'.

⁵ Na' ladj ben'ka' lle' na' len to ben' ba gok shin'shonichoa yiz bi shawee.

⁶ Na' ble'i Jesúza'ne' na' gokbe'ile' ba wlla die' ka', na'ch chi'ene':

—¿Acheenilo' yiyakilo'?

⁷ Na'ch beena' bi shao' chi'ene':

—Ben'do', aga no zoa cha' wletje' nad' loo nisi kat' chdan. Na' kat' chakid' yetj' loo nisa', ben' yoblə lii chjsho'tie' lo'inna'.

⁸ Na'ch che' Jesúza'ne':

—Biyas, bitob daa cho'na' biyoo'n na' bigoo nez.

⁹ Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'.

¹⁰ Na' ben'ka' chnabia' ben' Israelka' gollgake' beena' biyaki:

—Lla chombaanchoo naa. Aga bi lsens de woo daa cho'na'.

¹¹ Na'ch che' beena' legake':

—Beena' biyone' nad' len' wne': “Bitob daa cho'na' biyoo'n na' bigoo nez.”

¹² Na'ch che'gake'ne':

—¿Nora beena' wna li': “Bitob daa cho'na' biyoo'n na' bigoo nez”?

¹³ Na' beena' biyaki aga nezile' non biyon le', la' Jesúza' ba bikwase' ladj ben'ka' lle' na'.

¹⁴ Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwenche ki wtilcho' dii walch.

¹⁵ Na'ch beena' biyaje' lao ben' wñabia' che ben' Israelka' jayelle' legake' nan Jesúza' biyone'ne'.

¹⁶ Na' daa ben Jesúza' yel' waka' lla sabda', llana' chombaangake', goklall'gake' witgake'ne'.

¹⁷ Na' Jesúza' chi'e legake':

—Xa'na' bittezə lla chone' llin na' ka'kzə nad'.

¹⁸ Na'ch ben' wñabia' che ben' Israelka' goklall'gake' witgake'ne' aga toz daa wdishje' leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wñabia' daa nap Xiin Chioza'

¹⁹ Na' Jesúza' chi'e legake':

—Dii li nia' le', nad', Xiin Chios, aga bi gak gon' tobia'loz', san daa chle'id' chon Xa'nan' lekzannan' chon'.

²⁰ La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techlə ka diiki, dii gonan ka yibanchile.

²¹ Ka chon Xa'na' chisbane' ben' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə ben' cheenid' wi'an.

²² Na' Xa'na' aga ga chchogloe' che ben', san nad' nak' Xiine', ba bene' lall' na' wchogloa' che yog'lol ben'.

²³ Bene' ka' kwenche yog' ben' koogake' nad' balaanna' ka daa chgoogake' Xa'na'. Beena' bi chgwee nad' balaan, nad' nak' Xiin Chios, lekzka' bi chgwee Xa'na' balaan, beena' bsel' nad'.

²⁴ 'Dii li nia' le', beena' chzenag xtilaana' na' chonlilallee beena' bsel' nad', gat' yel' mban che' zejli kañi. Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin.

²⁵ Dii li nia' le', wllin lla kat' ben' wetka' yengakile' inia' legake', nad' nak' Xiin Chios, na' ben'ka' yengakile' kat' inia' na' yibangake'.

²⁶ Xa'na' nape' yel' wak kwenche wi'e yel' mban che ben' daa bi te cheyin. Ka'kzə ba bene' nad' Xiine' yel' wak kwenche wi'a yel' mban che ben' daa bi te cheyin.

²⁷ Na' lekzka' ba bene' nad' yel' wñabia' kwenche gon' yel' joschis daa nak' Ben' Bsel' Chioza' Yell-lioni.

²⁸ Bi yibanile daa nia' ka', la' wllin lla wllin gor yeni yog'te ben' wetka' kat' inia' legake'.

²⁹ Na' ka yengakile' inia' na'ch yichejgake' loo bana'. Na' ben'ka' ben dii wenna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kañi.

Jesúza' bli'e yel' wñabia' che'na'

³⁰ 'Ni to bibi gak gon' tobia'loz', san chchogloa' che ben' kon ka nllia Chioza' bia' gon', na' kon ka nakannan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'.

³¹ Na' shi nad' wi'a dill' che kwin', nezid' aga no shajle' cha'.

³² San zoa to ben' cho'e xtillaana', na' nezid' daa ne' cha' nakan shlich'a.

³³ Le' bsel'le ben' janabgakile' Juanna' bi ka ine' cha', na' dillaa daa bi'e cha' nakan dii li.

³⁴ La'kzi nad' bi chyalljid' we' ben' yell-lioni xtillaa; nia' le' diiki kwenche yilale na' bi kwiayi'le.

³⁵ Juanna' goke' ka to yi' dii bzeeni' na' le bibaile bzenagle che' tolde.

³⁶ Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'.

³⁷ Xa'na', beena' bsel' nad', lekzka' ba bi'e dill' cha'. Ni shlin bigan' yenile inie' ni bin' ile'ilene' nak nake'.

³⁸ Na' cho'a xtilleena' bin' sho'n loo yichjlall'do'lena', la' bi chajle'le cha', nad' ben' bselee.

³⁹ Le' chsedchgale Cho'a Xtill' Chioza' daa chakile le'inna' yillelile nakla ka gonle kwenche gat' yel' mban chele zejli ka'ni. Na' la'kzi Cho'a Xtill' Chioza' choe'n xtillaana',

⁴⁰ aga cheenile gakle nad' txen kwenche gat' yel' mban chele daa bi te cheyin.

⁴¹ 'Aga chyalljid' no koo nad' balaan'.

⁴² Na' nombia' le', na' nezid' aga chakile Chioza'.

⁴³ Xa' Chioza' bselee nad' na' ba bid', na' bi chzenagle cha'. San shi yid ben' yoblə tobia'loze', beena'lan le gak chele.

⁴⁴ ¿Nakrazə gonle shajle'le cha'? La' gangazə chgoo ljwell-le balaan', na' bi chinole sho'le balaan' che beena' zeelo nak Chios.

⁴⁵ Bi gakile nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle lez gaklene' le', len' gawe' xya chele lao Xa' Chioza'.

⁴⁶ La' shel' chajle'le daa bzej dii Moiséza', lekzka' wyajle'le cha', shel'ka'. La' len' bzeje' xtillaana'.

⁴⁷ Na' daa bi chajle'le che daa bzej dii Moiséza', ¿nakra gonle shajle'le che diiki nia'?

6

Bwao Jesúsza' wdeli gayaa mil ben'

(Mt. 14:13-21; Mr. 6:30-44; Lc. 9:10-17)

¹ Na' ka wde, Jesúsza' wyaje' shlaa nisdə' che Galileana', daa lekzka' le nisdə' che Tiberias.

² Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'.

³ Na'ch wyep Jesúsza' to lo yaa na' wche'lene' ben'ka' nakgake'ne' txen.

⁴ Na' ba zoa gal' lni Paskw che ben' Israelka'.

⁵ Ka ble'i Jesúsza' ben' zan ba bllin gana' chi'e, na' chi'e Felípena':

—¿Gara lljxi'cho dii gao yog' ben'ki?

⁶ Golle' ka' daa chakile' la'shki bi yee Felípena', la' ba nezczile' nakan gone'.

⁷ Na' Felípena' chi'ene':

—Aga waki laxj to ben' che xon' beo' lljxi'yicho dii gao yog' ben'ki lat' wej.

⁸ Na' sto beena' nak Jesúsza' txen lie' Andrés, ben' bish' Simón Pédrone', chi'ene':

⁹ —Ni ze to bi' xkwid' no'ab' gay' yetxtil de cebada na' zi chop bel'. Per bizə daa par yog' ben'ki.

¹⁰ Na'ch Jesúsza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil.

11 Na'ch beḡ Jesúza' yetxtilka', na' bi'e Chioza' yel' choḡken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' aḡt ka beljgakile'. Na' lekzka' bene' che belka'.

12 Na' ka beljgakile', na'ch chi'e ben'ka' nakgake'ne' txen:

—Li yitop yog'loḡ dii lao'ka' bichoonan kwenche bibi gakditj.

13 Na'ch bitopgake'n, biyakte shllin xet' diika' bichoonan lao yetxtilka' gay'.

14 Na' ka ble'i ben'ka' yel' waka' daa ben Jesúza', na'ch che' ljwellgake':

—Dii li beenin nake' beena' llia bia' yid yell-lioni kwenche chixji'e daa che' Chioza'ne'.

15 Na' daa gokbe'i Jesúza' cheengakile' yi'che'gake'ne' kwenche wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

Wza' Jesúza' lo nido'na'

(Mt. 14:22-27; Mr. 6:45-52)

16 Ka ba chal, ben'ka' nak Jesúza' txen biyetjgake' cho'a nido'na'.

17 Na' biyoogake' to loo barkw kwenche ziyajgake' yell Capernaúma'. Ba goḡ na' bin' yillin Jesúza' kwite'ka'.

18 Na'ch wzolo wzechga be'na' na' wzolo chas chat' nido'na'.

19 Na' ka do gay' wa xop kilómetro ba wza'len barkwa' legake' lo nido'na' kat' ble'gakile' Jesúza' zeje' tlo nido'na' zjatile' barkwa' na' le bllebake'.

20 Na' Jesúza' chi'e legake':

—Nad'kzan, jbi illeble!

21 Na' chibagakile' bigoogake'ne' loo barkwa', na' lii blintekzgake' gana' chwiagake' illingake'.

Zan ben' chiyiljgake' Jesúza'

22 Na' betiyo gokbe'i ben'ka' bigaan shlaa nido'na' nan tochga barkwa' got' na' to ben'ka' nonz Jesúza' txen biyoogake'n na' bi len Jesúza' biyoolene' legake'.

23 Na' gaozə gana' wdaogake' yetxtilka' ka wde be' Xancho Jesúza' Chioza' yel' choḡken, bllin sto chop barkw dii za' yell Tibériaza'.

24 Na' ka gokbe'i ben'ka' aga no Jesúza' nla' ni ben'ka' nakgake'ne' txen, na'ch biyoogake' loo barkwka' ziyajgake' Capernaúma' jadiljgake'ne'.

Jesúza' nake' ka to yel' wao dii chona'n yel' mban

25 Na' ka bllingake' shlaa nido'na' jadi'gake'ne', na' gollgake'ne':

—Maestro, ¿bat biyedo' ni?

26 Na' Jesúza' chi'e legake':

—Dii li nia' le', chiyilje nad' aga daa wyajni'lati'le bi zejin yel' wakka' benan', san daa wdaoze aḡt ka beljilen.

27 Bi yilaḡ yizodzile kwenche gat' dii yeej gaole, la' dii te cheyin nak daa. San li gal' kwe'no daa gon yel' mban chele zejli kaḡi, daa gon' nad', Ben' Bsel' Chioza' Yell-lioni. La' Xa' Chioza' ba bene'n lall' na' wi'an.

28 Na' che'gake'ne':

—¿Beran chiyal' gonnto' kwenche gonnto' daa cheeni Chioza'?

29 Na' che' Jesúza' legake':

—Daa cheeni Chioza' gonle, gonlilall'le nad', ben' bselee.

30 Na'ch che'gake'ne':

—¿Bera yel' wak gono' ile'into' kwenche shajle'nto' cho'? ¿Bi ka gono'?

31 Dii xozxto'choka' wdaogake' daa le maná latja' gana' bibi chashj chleb, ka na Cho'a Xtill' Chioza' gana' na: “Yel' wawa' daa za' yabana' bi'en wdaogake'.”

32 Na' che' Jesúza' legake':

—Dii li nia' le', aga dowaljen' yel' wao daa za' yabanan' be' dii Moiséza' legake', san Xa'na' chone' daa nak dowalj yel' wao daa za' yabana'.

³³ L̄a' nad', beṅ' za' yabana', nak' ka to yel' wao dii choe' Chioza' beṅ' yell-lioki kwenche ibangake'.

³⁴ Na'ch che'gake'ne':

—Beṅ'do', bengach neto' toshiizi yel' wawa' no' ka'.

³⁵ Na' che' Jesúza' legake':

—Nad' nak' ka yel' wawa' daa choe'n yel' mban che beṅ'. Beena' gake' nad' txen, gake' ka beṅ' nelj nlla'i toshiizi. Na' beena' gonlilallee nad', gake' ka to beṅ' bichga ibili.

³⁶ Per kon ka ba wnia' le', la'kzi ba ble'ile nad' bi chajle'le.

³⁷ Yog' beṅ'ka' chon X̄a'na' lall' na', gakgake' nad' txen. Na' beena' gake' nad' txen aga wzoa'ne' ka'la.

³⁸ L̄a' zaa yabana' na' zoa' yell-lioni aga kwenche gon' daa nazan chan', san zaa kwenche gon' daa cheeni X̄a'na', beena' bsel' nad'.

³⁹ Na' X̄a'na', beena' bsel' nad', cheenile' bi wi'a latj kwiayi' ni to beṅ'ka' ba wleje' kwenche gakgake' nad' txen. San cheenile' yisban' legake' ladj beṅ' wetka' kat' illin lla te che yell-lioni.

⁴⁰ Na' dgan cheeni X̄a'na', beena' bsel' nad': chaklallee gat' yel' mban zejli kani che yog'lol beṅ' gakbe'i nak' Xiine' na' gonlilallee nad'. Na' nad' yisbanee ladj beṅ' wetka' kat' te che yell-lioni.

⁴¹ Na'ch beṅ' wṅabia' che beṅ' Israelka' wzologake' biz chon chnagake' che Jesúza' daa wne': “Nad' nak' yel' wao daa za' yabana'.”

⁴² Na' che'gake':

—¿Aga beenin Jesús, xiṅ Joséna'? Nombia'cho xaxna' beeni. ¿Berache naze': “nad' za' yabana'”?

⁴³ Na'ch che' Jesúza' legake':

—Bibi gon inazle cheyi daa wnia' le'.

⁴⁴ Ni to kono gak gon nad' txen shi X̄a'na', beena' bsel' nad', bi gone' le' lall' na'. Na' beṅ'ka' nak nad' txen, yisban' legake' kat' te che yell-lioni.

⁴⁵ Lee librka' bzej dii beṅ'ka' wdixjee daa goll Chioza' legake' kani'yi nan: “Chioza' wli' wsedile' yog'lolte beṅ'.” Na' yog' beṅ' chzenag che X̄a'na' na' chajni'gakile' daa ne', legaken' chongake' nad' txen.

⁴⁶ Aga ga zoa beṅ' ba ble'ile' X̄a'na'; toz nad', beṅ' za' yabana', ba ble'idee.

⁴⁷ Dii li nia' le', nottez beṅ' nonlilallee nad' de yel' mban che' zejli kani.

⁴⁸ Nadaan nak' ka yel' wawa' daa choe'n yel' mban che beṅ' zejli kani.

⁴⁹ Dii xozxto'leka' wdaogake' daa le maná latja' gana' bibi chashj chleb na' bia'kza witgake'.

⁵⁰ San nad' cho'a dill' che yel' wao daa za' yabana', na' beena' gawe'n aga bi yel' wit zejli kani ile'ile'.

⁵¹ Nadaan nak' yel' wao daa za' yabana' daa cho'en yel' mban che beṅ'. Beena' gao yel' wawi, ibane' zejli kani. Na' yel' wawa' daa wi'ane', lennan' beli chen cha'ni daa chzanid' kwenche gat' yel' mban che beṅ' yell-lioni.

⁵² Na'ch beṅ' Israelka' wzolo chshesh chnegake', che' ljwelle':

—¿Nakra gon beeni gone' beli chen che'na' gaochon?

⁵³ Na' che' Jesúza' legake':

—Nad', Beṅ' Bsel' Chioza' Yell-lioni, dii li nia' le', shi bi gaole kwerp cha'ni na' shi bi yeejle chen cha'ni, aga wat' yel' mban chele daa bi te cheyin.

⁵⁴ L̄a' beṅ'ka' gaogake' kwerp cha'ni na' yeejgake' chen cha'ni, beṅ'kan' gat' yel' mban chegake' zejli kani. Na' kat' illin lla te che yell-lioni, nad' yisbangakee ladj beṅ' wetka'.

⁵⁵ L̄a' kwerp cha'ni nakan dowalj yel' wao, na' chen cha'ni nakan dowalj dii cheeje'.

⁵⁶ Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen.

57 Xa'na', beena' bsel' nad', zoe' zejli kani na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'.

58 Beli chen cha'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii xozxto'leka' na' bia'kzə witgake'. Beena' gao yel' wawa' daa za' yabana', ibane' zejli kani.

59 Diikin wna Jesúza' shlak bli' bsedile' beñ' gana' chdop chllag beñ' Israelka' choe'lwilgake' Chioza' yell Capernaúma'.

Dill' dii nsa'yel' mban

60 Na' zan beñ'ka' nogake'ne', ka bengakile' daa wna Jesúza', na' wnagake':

—Lallj inleeb nak dga chli' chsedi beeni. ¿Notgui gon ka ne'?

61 Na' Jesúza' gokbe'ile' bi wyazlall'gake' xtillee'na', na'ch wñabile' legake':

—¿Achakzbanile dga ba wnia' le'?

62 ¿Nakra gonle shel'ka' ile'ile nad', Beñ' Bsel' Chioza' Yell-lioni, yiyep' gana' wzaa?

63 Espíritu che Chioza' cho'e yel' mban che beñ', la' beli chenna' aga bi zakiin. Dill'ka' ba wnia' gonan ka soalen Espírituna' le' na' gat' yel' mban chele.

64 Per bia'kzə zoa bal-le bi chajle'le.

Goll Jesúza' legake' ka', la' dezd nechte ba nezkzile' no beñ'ka' bi chajle' che' na' non gon le' lo na' beñ' malka'.

65 Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

66 Na' lo llana'tez beñ' zan beñ'ka' nakgake'ne' txen bkwasgake' bich janogake'ne'.

67 Na'ch che' Jesúza' beñ'ka' shllin, beñ'ka' nakgake'ne' txen:

—¿Alezkza' lenle cheenile yiyajle'?

68 Na' Simón Pédróna' chi'ene':

—Xan', aga nochlə cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kani.

69 Ba wyajle'nto' cho', na' nezinto' lin' Crístóna', Xiin Chios yaa Chios banna'.

70 Na' Jesúza' chi'e legake':

—Ba wlej' shllinle gake nad' txen. Per tole nakle dii xiwaa txen.

71 Wne' ka' che Jud Scariota', xiin to beñ' le Simón, la' nezile' nan Juda' gone'ne' lall' na' beñ' malka', la'kzi wlene' beñ'ka' shllin.

7

Ben'ka' nak beñ' bish' golj Jesúza' bi wyajle'gake' che'

1 Ka wde dga, Jesúza' wde' doxen gana' mbani Galileana'. La' bi goklallee shaje' gana' mbani Judeana' daa cheeni beñ' wñabia' che beñ' Israelka' witgake'ne'.

2 Na' ka ba zoa gal' lni che ranshdo'ka' daa chon beñ' Israelka' yog' yiz,

3 beñ'ka' nak beñ' bish' golj Jesúza' che'gake'ne':

—Bi yigaano' nizə, san wyaj Judeana' kwenche beñ'ka' ba non li' txen ile'gakile' yel' wakka' chono'.

4 La' beena' cheeni seyi che', aga chkwashee diika' chone'. Bachgali chono' yel' wakki, jentegan lao yog'lol beñ'.

5 La' ni beñ' bisheekan' bi wyajle'gake' che'.

6 Na'ch che' Jesúza' legake':

—Biñ' illin lla illin gor gon' daa llia bia' gon'. San le', bat'tez wak shajle.

7 Beñ' yell-lioki bibi de dii gonan ka gakzbangakile' le', san nadaan chakzbangakile' daa chepgakee malan' chongake'.

8 Li shaj le' lnina'. San nad' bi saa, la' biñ' illin lla illin gor gak cha' daa llia bia'.

9 Biyoll golle' legake' ka' na' bigaane' Galileana' zi xtit.

Wyaj Jesúza' lnina'

¹⁰ Na' ka wde wza' beñ' bisheeka', lekzka' wzee wyaje' lnina' do ngash'z.

¹¹ Na' beñ'ka' chñabia' beñ' Israelka' chiyiljgake'ne' lo lnina', che' ljwellgake':

—¿Garanzi beena', lla?

¹² Na' ladj beñ'ka' lle' lnina', beñ' zan choe'gake' xtill' Jesúza'. Bale' che': “Nake' beñ' wen.” Na' zi bale' che': “Bi nake' beñ' wen, la' chdaze' chziyee beñ'!”

¹³ Per ni to kono biyaxji we' xtill' Jesúza' ka nla'z daa chllebgake' beñ'ka' chñabia' beñ' Israelka'.

¹⁴ Na' ba zej shon tap lla chak lnina' ka bllin Jesúza' gana' zoa yoodo'na' na' wzoloe' chli' chsedile' beñ'.

¹⁵ Na' chibani beñ' Israelka', na' che' ljwelle':

—¿Nakra chak chli' chsedile' beeni beñ', len' aga bi nsede'?

¹⁶ Na' che' Jesúza' legake':

—Diika' chli' chsedid' aga nakan dii chyiljlall'z', san beena' bsel' nad', len' bli' bsedile' nad' diiki.

¹⁷ Nottez beñ' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chyiljlall'z'.

¹⁸ Beena' tobialoze' cho'e xtillee, balaan che kwinzen' chyilje', san beena' chyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

¹⁹ Dii Moiséza' bene' le' ley che Chioza', na' ni tole bi chonle ka nllian bia' gonle. ¿Bi che cheenzile witle nad'?

²⁰ Na'ch beñ'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

²¹ Na' che' Jesúza' legake':

—Tochga yel' waka' ba ble'ile ben' llana' chombaancha na' yog'le chibanile.

²² Dii li dii Moiséza' bene' byen yog'tele nakle beñ' byo chiyal' sho'le sen daa le circuncisión, la'kzi aga len' wzololene'n, san dii xoxzto'leka'ten. Daan chgoole bi' byodo'ka' sen na' la'kzi nakan lla chombaancha.

²³ Na' shi choe'le latj sho' bi' byodo'ka' sen daa le circuncisión lo llana' chombaancha kwenche gak ka na leya' daa bzej dii Moiséza', ¿bi che chllaazle nad' daa biyon' to beñ' llana' chombaancha?

²⁴ Bi wchoglizle che beñ' shi bi chle'ile chone', san cheenin inezile nakyen'an nakan kwenche we'le dill' kon ka nakan.

Jesúza' wne' zee gana' zoa Chioza'

²⁵ Na'ch bal beñ' Jerusalénka' nagake':

—¿Aaga beenin cheengakile' witgake', lla?

²⁶ Li wwia ka cho'e dill' ladj lkwe' beñ', na' ni to kono bi che'. ¿Anti ba chajle'lza beñ' wñabia'ka' nan dii li beeni nake' Crístona', beena' wsel' Chioza' inabi'e, lla?

²⁷ Cho' nezicho ga beñ' beeni. San kat' yid beena' nak Crístona', ni to kono inezi galə za' beena'.

²⁸ Jesúza' chli' chsedile' beñ'ka' yoodo'na', na' ka benile' daa wna beñ'ka' che', na' wnie' zillj chi'e:

—Chakzile nombia'le nad' na' nezile ga beñ' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene',

²⁹ san nad' nombi'ane', la' gana' zoen' wzaa, na' len' bselee nad'.

³⁰ Na'ch bale' goklall'gake' gox'gake'ne', per ni toe' bi bex' le', la' bin' illin lla illin gor gak che' daa lla bia'.

³¹ Na' beñ' zan wyajle'gake' che', na' wnagake':

—Kat' yid beena' nak Crístona', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

32 Na' fariseoka' bengakile' dillaa daa choe' beñ'ka' che Jesúza'. Na' legake' len b̄oxzka' chñabia' bsel'gake' beñ'ka' chap yoodo'na' kwenche lljex'gake' Jesúza'.

33 Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'.

34 Na' yiyiljle nad' per aga willelile nad' daa bi gak yidle gana' lljazoa'.

35 Na'ch beñ' Israelka' che' ljwellgake':

—¿Garan yiyaj beeni na' bich yillelichone', lla? ¿Anti gana' lle' beñ' wlall chechoka', beñ'ka' lle' lall beñ' zit'kan' shaje' kwenche lljasedile' beñ' griegoka', lla?

36 ¿Beran zejín daa ne': "Yiyiljle nad', per aga willelile nad' daa bi gak yidle gana' lljazoa'?"

Espíritu che Chioza' nake' ka nis yaa nis ban

37 Na' llana' zeelo gok ln̄ina', llana' nak lla choo lla xen, wzolla' Jesúza' na' wñie' zillj, chi'e:

—Shi nole chb̄ili, li da yeejle nisa' daa gon' le'.

38 Na' gak kon ka na Cho'a Xtill' Chioza' gana' nan beena' gonlilallee nad', gak loo yichjlall'do'ena' ka ga chaltit nis yaa nis ban.

39 Na' daa wna Jesúza' ka', zejín soa Espíritu che Chioza' loo yichjlall'do' beena' gonlilall' le'. La' ka gora' biñ' yidsoa Espírituna' loo yichjlall'do' beñ' daa biñ' sho' Jesúza' balaanna' daa llia bia' sho'e kat' yiyepe' gana' zoa Chioza'.

Gok beñ'ka' chop shon kwenl̄a

40 Na' bal beñ'ka' bengakile' daa wna Jesúza' na' wnagake':

—Dii li beeni nake' beena' llia bia' yid kwenche chixji'e daa che' Chioza'ne'.

41 Na' zi bale' che'gake':

—Beenikzan' Crístona', beena' chbezcho wsel' Chioza' in̄abi'e.

Na' zi bale' che'gake':

—¿Achakile ladj beñ' Galileaka' ichej beena' wsel' Chioza' in̄abi'e?

42 Cho'a xtill' Chioza' nan lo dia che dii Davina' galj beena' nak Crístona', na' gake' beñ' yell Belén ka dii Davina'.

43 Ka' gok, gogkake' chop shon kwenl̄a ni che Jesúza'.

44 Bale' goklall'gake' gox'gake'ne', per ni toe' bi biyaxji.

Beñ'ka' wñabia' beñ' Israelka' bi wyajle'gake' che Jesúza'

45 Na'ch beñ'ka' chap yoodo'na' billingake' gana' zoa fariseoka' len b̄oxzka' chñabia'. Na'ch che'gake' legake':

—¿Biche bi b̄che'lene'?

46 Na' beñ'ka' chap yoodo'na' che'gake':

—Ni to konon' we' dill' ka dillaa choe' beena'.

47 Na'ch che' fariseoka':

—¿Alezkza' lenle ba wxiyee?

48 Ni to beñ' wñabia' chechoka', ni neto' fariseo bi chajle'nto' che'.

49 Per beñ'ki bi nombia'gake' leya', ba wlliyi'gake'.

50 Na' farisewa' le Nicodemo, beena' wyaj lao Jesúza' wal-l̄a, chi'e legake':

51 —Ley chechona' nan aga wak wchoglocho che to beñ' in̄acho chone' mal shi biñ' wzenagcho dillaa wi'e kwenche inezicho bin chone'. ¿Anti aga kan' nakan?

52 Na'ch che'gake'ne':

—¿Alezkza' beñ' Galilea li'? Bsed kwenche inezilo' ni to beñ' chyixjee daa che' Chioza'ne' bin' ichej gana' mbani Galileana'.

53 Na'ch billeshgake' ziyaj lill che chegake'.

8

Noola' bidol'len beṅ' byona'

¹ Na' Jesúza' wyaje' lo Yaa Olívoza'.

² Na' betiyo ka wyeeni' wizaje' yoodo'na'. Na' beṅ' zan inleeb wbig' kwite'na', na' wchi'e wzoloe' bli' bsedile' legake'.

³ Na'ch beṅ'ka' chli' chsedi leya' len fariseoka' nche'gake' to noolə bidol'lene' to beṅ' byo, na' bzegake'ne' ladj beṅ'ka' lle' na'.

⁴ Na' che'gake' Jesúza':

—Maestro, ba bidolinto' nooli kon to beṅ' byo.

⁵ Na' nezinto' leya' daa bzej dii Moiséza' nan chiyal' wicho noolka' chon ka' kon yaj. ¿Shera li', bi ka ino'?

⁶ Che'gake'ne' ka' kwenchez kweygake'ne' dill' ga si' sengake' na' gaogake' xya che'. Na'ch Jesúza' bchekee bzeje' lo yona' kon xbene'na'.

⁷ Na' daa zeyidgake' chnabgakile'ne', na' bibe'shawee chi'e legake':

—Beena' bibi saaxya che' de, wak soloe' wtakwe'ne' yaja'.

⁸ Na'ch bizchekee chizzeje' lo yona'.

⁹ Na' ka goll Jesúza' legake' ka', na' biza' twej tweje', wzolozan beṅ' golka' na'tech beṅ' xkwid'ka', na' stoz noola' bgaanlene' Jesúza'.

¹⁰ Na' bibe'shao' Jesúza' dii yoblə, na' chi'ene':

—Noolə, ¿garan beṅ'ka' chao xya cho'? ¿Ani toe' bibi beni li'?

¹¹ Na' che' noola'ne':

—Ni toe', beṅ'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj wleno'.

Jesúza' nsee beeni' che beṅ' yell-lioni

¹² Na'ch Jesúza' bizoloe' choe'lene' beṅ'ka' lle' na' dill', chi'e:

—Nad' nak' beeni' che beṅ' yell-lioni. Beena' gone' nad' txen bich soe' lo yel choḷ che dii mala', san loo yichjlall'do'ena' gape' beeni' daa nsa' yeḷ mban zejli kaṅi.

¹³ Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

¹⁴ Na' che' Jesúza' legake':

—La'kzi choa' dill' che kwin', nezid' nakan dill' li, la' nezid' gan zaa na' gan yiyaa. San le', aga nezile gan zaa, ni bi nezile gan yiyaa.

¹⁵ Le' chchoglole che beṅ' lega beṅ' yell-lio. San nad' bi chchogloa' che beṅ'.

¹⁶ Per shi nad' wchogloa' che beṅ', kon ka nakannan' wchogloa'n, la' aga tobia'lozaan chchogloa'n, san Xa'na', beena' bsel' nad', naknto' txen chchoglonto' che beṅ'.

¹⁷ Ley chelena' nan shi chop beṅ' toz ka chitili xtilleeka' chiyal' shajle'cho chegake'.

¹⁸ Na' nak chopnto', nad' cho'a dill' che kwin', na' lekzka' Xa'na', beena' bsel' nad', cho'e dill' cha'.

¹⁹ Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

²⁰ Jesúza' bi'e dill'ki shlak bli' bsedile' beṅ' latja' gana' chi' daa chgoogake' mech che yoodo'na', per ni to kono bex' le' daa biṅ' illin lla biṅ' illin gor gak che' daa lia bia'.

Jesúza' wne' kono gak yiyaj gana' yiyaje'

²¹ Na'ch Jesúza' wizi'e legake':

—Nad' yiyaa, na' yiyiljle nad', na' gana' yiyaa aga wak sa'le, la' lao saaxya cheleka' guetle.

²² Na'ch beñ' wñabia' che beñ' Israelka' che' ljwellgake':

—¿Acheenile' yiyit kwinen', lla? ¿Adaan naze': "Gana' yiyaa bi gak sa'le"?

²³ Na'ch che' Jesúza' legake':

—Le' nakle beñ' yell-lío, na' nad' zaa yabana'. Le' chonle lega beñ' yell-lío, san nad' bi chon' ka le' beñ' yell-lío.

²⁴ Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

²⁵ Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wñiakz' le' dii nechte.

²⁶ Dii zan dii gak inia' dii gaogakan xya chele. Per beena' bsel' nad' cho'e dill' li, na' daa wne' nad' lennan' choe'len' beñ' yell-lioni dill'.

²⁷ Na' legake' aga wyajni'gakile' shi xtill' Xe'nan' choe'lene' legake'.

²⁸ Na' daan chi'e legake':

—Kat' ba bda'le nad', Beñ' Bsel' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsemi Xa'na' nad', lennan' cho'a dill'.

²⁹ La' Xa'na', beena' bsel' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

³⁰ Na' ka biyoll be' Jesúza' dill'ka', beñ' zan benlilall'gake'ne'.

Ben'ka' chñabia' dii mala' yichjlall'do'eka'

³¹ Na'ch che' Jesúza' ben' Israelka' ba chajle' che':

—Shi le' soachechle gonle ka ba wnia', dii li txenan ba nakle nad', shi naa.

³² Na' gombia'le dill' li cha'na', na' kat' ba nombia'len, gakle ka to beñ' ba biyell bila' lao daa ntakw nchejan le'.

³³ Na'ch che'gake'ne':

—Neto' naknto' xiin dia che dii Abrahama' na' axt naanlla aga non' inabia' neto' kwenche gonznto' kon daa ine'. ¿Berache nazo' yiyell yila'nto'?

³⁴ Na' che' Jesúza' legake':

—Dii li nia' le', nottez beena' chon dii mala' nake' ka beñ' ndoo lawinna' daa chñabi'an le'.

³⁵ To wen llin aga toshiizi soe' lill xane'na', san xiin xan llinna', toshiizi soe' lill xe'na'.

³⁶ Na' shi nad', Xiin Chios, yisell yilaa le' lawi dii mala', dii li wiyell wila'le lawinna'.

³⁷ Nezkzid' nakle xiin dia che dii Abrahama', per cheenile witle nad' daa bi chleble cho'a xtillaani.

³⁸ Nad' cho'a dill' che daa ba ble'id' gana' zoa Xa'na', na' le', chonle ka na xalena'.

³⁹ Na' che'gake'ne':

—Xiin dia che dii Abrahama' neto'.

Na' Jesúza' chi'e legake':

—Shel' nakle dowalj xiin dia che dii Abrahama', kon ka ben dii Abrahama' chonle, shel'ka'.

⁴⁰ La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle.

⁴¹ Le' chonle kon ka chon xalena'.

Na'ch che'gake'ne':

—Aga naknto' ka to beñ' bi wyoo xayin. Toz Chioza' nake' Xanto'.

⁴² Na'ch che' Jesúza' legake':

—Shel' lekzile Chioza' nake' Xale, wakile nad' shel'ka', la' kwite'nan' wzaa. Aga tobialozaan bid', san Chiozan' bselee nad'.

⁴³ Na' aga chajniile diika' nia' le' daa bi cheenile wzenagle dill'ka' cho'a.

⁴⁴ Dii xiwaan nak xale na' chibaile chonle daa chaklalliin. La' kana'te dii xiwaa nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozi dii wxiye' na' nakten xan yel' wxiye'na'.

⁴⁵ Na' nad', daa cho'a dill' lina' aga chajle'le cha'.

⁴⁶ Ni tole bi gak wli'le shi de saaxya cha'. Na' shi cho'a dill' li, ¿berache bi chajle'le cha'?

⁴⁷ Beena' nak xiin Chioza' chzenague' xtilleena'. Na' le', bi chzenaglen daa bi nakle xiine'.

Ba zoakz Crístona' kana' zi' galj dii Abrahamama'

⁴⁸ Na'ch ben' wñabia' che ben' Israelka' che'gake'ne':

—Aga naznto' nanto' nako' ben' Samaria na' yootio' to dii xiw'!

⁴⁹ Na' che' Jesúsza' legake':

—Aga no dii xiw' yo'a, san Xa'nan' chgwaa balaan, per le', chnit chdele nad'.

⁵⁰ Aga chylilj' koo ben' nad' balaan. San zoa beena' cheeni sho'a balaan, na' len' chchogloe' che ben' kon ka nakan.

⁵¹ Dii li nia' le', beena' chon ka nia', ibane' zejli kani.

⁵² Na'ch ben' wñabia' che ben' Israelka' che'gake'ne':

—Naach ba wñezinto' dii xiw'kzan yoo. Dii xozxto'cho Abrahamama' wite' na' lekzka' yog' ben'ka' wdixjee daa goll Chioza' legake' kani'yi. Na' li' naa, nazo': “Beena' chzenag cha' ibane' zejli kani.”

⁵³ ¿Achakilo' zak'cho' aga ka dii xozxto'cho Abrahamama'? Le' wite' na' ka'kzə dii ben'ka' wdixjee daa goll Chioza' legake' kani'yi. ¿Noraka chakzi kwino'?

⁵⁴ Na'ch che' Jesúsza' legake':

—Shel' nadaan chgwaa kwin' balaan aga bi zakiin, shel'ka'. Per Xa'na', beena' nale nake' Chios chele, len' chgwee nad' balaan.

⁵⁵ La'kzi bi nombialene', nad' nombiane'. Shel'ka' nia' bi nombiane', na' nak' ka le' ben' wxiye'. Per nombiane' na' chon' ka ne'.

⁵⁶ Dii xozxto'cho Abrahamama' bibaile' daa wñezile' ile'ile' llaki zoa' yell-lioni. Na' ba ble'ile'n na' bibaile'.

⁵⁷ Na'ch ben'ka' chñabia' ben' Israelka' che'gake'ne':

—Ni shiyon yiz bin' gakilo' na' nazo' zle'ilo' dii Abrahamama'.

⁵⁸ Na'ch che' Jesúsza' legake':

—Dii li nia' le', kana' zi' galjte dii Abrahamama', bakz zoa' nad'.

⁵⁹ Na'ch lii wdoyotegake' yaja' nan wtakwgake'ne'n, per lii bkwash'tie' na' bizee gana' zoa' yoodo'na'. Na' ni bi gokbe'gakile' bidie' ladje'ka' ziyaje'.

9

Biyon Jesúsza' to ben' lchol

¹ Ka zej Jesúsza' na' ble'ile' to ben' byo ben' golje' nchole'.

² Na' ben'ka' nakgake'ne' txen che'gake'ne':

—Maestro, ¿berache golj beeni nchole', lla? ¿Anchole' ni che saaxya che'na', anti ni che saaxya che xaxneekan', lla?

³ Na' che' Jesúsza' legake':

—Aga ni che saaxya che'nan' ni aga ni che saaxya che xaxneekan', san kwenche wli'lawi yel' wak che Chioza' lo yel' mban che'nan' nake' ka'.

⁴ Shlak naa ni de latj, chiyal' goncho xshin beena' bsel' nad'. La' wllin lla kat' kochno bi gak gon.

⁵ Shlak ni zoa' yell-lioni nak' beeni' che ben' yell-lioni.

6 Na' ka biyoll wna Jesúza' ka', na'ch blle' xeneena' lo yona' na' bene' lat' benj kon xeneena', na'ch wdebe'n jalao ben' lchola'.

7 Na' chi'ene':

—Wyaj jadib jalawo'na' cho'a tanga' daa le Siloé —na' Siloé zevin Ben' Nselee.

Na'ch wyaj ben' lchola' jadib jalawe'na', na' ka bizee na', ba chle'ile'.

8 Na'ch ben' wlill che'ka' na' ben'ka' ble'gakile'ne' kana' nchole' che'gake':

—¿Aaga beenin chbi'e chnabe' mecha'?

9 Na' bale' che':

—Awe, len'.

Na' zi bale' che':

—Aga len', per ka'tekzə nake'.

Na' beena' chi'e:

—Nad'kzan'.

10 Na'ch wñabgakile'ne':

—¿Nakra gok ba chle'ilo'?

11 Na' chi'e legake':

—To ben' le Jesús bene' benja' na' wdebe'n jalaw'ki na'ch wne' nad': “Wyaj gana' lliatanga' daa le Siloé na' jadib jalawo'na'.” Na'ch wyaa na' ka biyiba'n, na' gok ble'id'.

12 Na'ch che'gake'ne':

—¿Garañ beena' no' ka'?

Na' chi'e legake':

—Bi nezid'.

Wñabyolli fariseoka' nak gok ble'i ben' lchola'

13 Na'ch jwa'gake' beena' gok ben' lchol lao fariseoka'.

14 Na' llana' wdeb Jesúza' benja' jalao beena' kwenche ble'ile' nakan lla chombaangake'.

15 Na'ch fariseoka' lekzka' wñabgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

16 Na'ch bal fariseoka' che'gake':

—Aga Chiozan' bselee beena', la' chone' daa bi chiyal' goncho llani chombaanchō.

Na' zi bale' che'gake':

—¿Nakra gon to ben' saaxya gone' yel' wak ka diiki chon beeni?

Na'ch gokgake' choplə.

17 Na'ch dii yoblə gollgake' beena' gok ben' lchol:

—¿Shera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to ben' chyixjee daa che' Chioza'ne'.

18 Na' ben'ka' chñabia' ben' Israelka' bi wyajle'gake' shi dii li gok beena' ben' lchol na' naa ba chle'ile'. Na'ch goxgake' xaxneena',

19 na' wñabgakile' legake':

—¿Abeenin xiinlena', beena' nale nchole' ka golje'? Na' ¿nakra gok ba chle'ile' naa, shka'?

20 Na' xaxneena' billiigake' xtilleeka':

—Nezinto' beenin xiinnto'na' na' golje' nchole'.

21 Per aga nezinto' nak gok chle'ile' naa, ni bi nezinto' non biyon le'. Li inabile', la' aga nake' bi'do' inacho bi gak ine' non biyon le'.

22 Goll xaxneena' ka' daa chlebgake' ben'ka' chñabia' ben' Israelka', la' ba bgaangake' dill' nottezə ben' ine' Jesúza' nake' Crístona' bi wlebgake'ne' gana' chdop chllaggake' choe'lwillgake' Chioza'.

23 Daan golltezə xaxneena': “Li inabile', la' aga nake' bi'do' inacho bi gak ine' non biyon le'.”

24 Na'ch dii yoblə goxgake' beena' gok ben' lchol, che'gake'ne':

—Bzoashki Chioza' de taschiw shi leilo' choo dill' li, la' nezinto' beena' biyon li' nake' ben' saaxya.

²⁵ Na'ch golle' legake':

—Bi nezid' shi nak beena' ben' saaxya. Lete dii nezid', golj' nchol' na' naa ba chle'id'.

²⁶ Na'ch che'gake'ne':

—¿Beran benile' li'? ¿Nak bene' kwenche chle'ilo'?

²⁷ Na' chi'e legake':

—Ba wniakz' le', na' bi chzi'le cho'a xtilaana'. ¿Bi che cheenzile inia'n dii yoblə? ¿Anti lekzka' lenle ba cheenile gonlene' txen?

²⁸ Na'ch wnegake'ne' zibia', che'gake'ne':

—Lin' nako' beena' txen, san neto' Moisézan' naknto' txen.

²⁹ Nezinto' Chioza' wnie' Moiséza', san beena', ni bi nezinto' ga zee.

³⁰ Na'ch beena' gok ben' lchol' chi'e legake':

—¿Nakkzan dii yibanicho daa bi nezile ga za' beena' na' ba bene' ka chle'id'!

³¹ Nezkzicho aga chzenag Chioza' che ben' saaxyaka', san chzenague' che ben'ka' choe'la'ogake'ne' na' chongake' daa chazlallee.

³² Dezd ka wxw wzil yell-lioni bin' yenicho shi zoa ben' chak chone' ka chle'i to ben' golje' nchole'.

³³ Shel' beeni bi nake' to ben' bsel' Chioza', ni to yel' wak bi gak gone', shel'ka'.

³⁴ Na'ch che'gake'ne':

—Dezd ka goljo' nako' ben' saaxya. ¿Ana' chakilo' wli' wsedilo' neto'?

Na'ch bibejgake'ne' ladje'ka'.

Ben'ka' nchol' nnti yichjlall'do'eka'

³⁵ Na' wnezi Jesúza' bibej fariseoka' beena' gok ben' lchol' ladje'ka', na' ka billague'ne' na'ch chi'ene':

—¿Achonlilalloo Beena' Bsel' Chioza' Yell-lioni?

³⁶ Na' beena' chi'ene':

—Ben'do', wnashki nad' nora beena' kwenche gonlilallaane'.

³⁷ Na' che' Jesúza'ne':

—Ba ble'kzilo'ne', na' lekzen' chshaljlano' naa.

³⁸ Na'ch lii bchek'te xibe'na' lao Jesúza', na' chi'ene':

—Chonlilallaa li', Xan' —na'ch be'laweene'.

³⁹ Na'ch che' Jesúza':

—Ba bid' yell-lioni kwenche wchogloa' che ben' yell-lioni. Zaa kwenche ben'ka' nak ka ben' lchol' ile'gakile', na' ben'ka' chakgakile' chle'gakile' yiyakgake' ka ben' lchol'.

⁴⁰ Na'ch bal' fariseoka' lle' na', ka bengakile' chi'e ka', che'gake'ne':

—¿Achakilo' lennton' naknto' ben' lchol'?

⁴¹ Na'ch che' Jesúza' legake':

—Shel' nakle ben' lchol', aga bi xtol'le de, shel'ka'. Per daa nale chle'ile, daan de xtol'le.

10

Jempl che leej che xil'ka'

¹ 'Dii li nia' le', beena' bi choo cho'a leej che xil'ka' san chiyiljallee cho'e gan yoblə, beenan' ben' wbanna'.

² San beena' choo cho'a leeja', len' ngoo lall' nee chape' legakb.

³ Na' beena' chap cho'a leej chebka' chsalje'n kwenche cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' legakb loo leej chebka'.

⁴ Na' chde chbeje' yog' xil' che'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'.

⁵ Aga willjanogakb ben' yoblə, san wxonjdogakib le' daa bi nombia'gakb shi'ena'.

⁶ Bzoa Jesúza' jempli kwenche bzajniile' ben'ka'. Per legake' aga wyajni'gakile' bin zeji daa golle' legake'.

Jesúza' chapshi'e cho' ka ben' chapshi'e xil' che'

⁷ Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'.

⁸ Yog' ben'ka' bid kana' bin' yid', nakgake' ka ben' wban. Na' ben'ka' nia' nakgake' xil' cha' bi bzenaggake' chegake'.

⁹ Nad' nak' ka cho'a leej che xil'ka', na' beena' gonlilallee nad' bi kwiajee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

¹⁰ 'Ka nak wban'na', za'ze' kwenche kwane' na' wite' na' wlliajee legake'. San nad', zaa kwenche wi'a to yel' mban shao' chegake', na' soagake' mbalaz.

¹¹ Nad' nak' ka to ben' chapshi'e xil' che'na', beena' axt chzani yel' mban che'na' ni che xil'do'ka' nape'.

¹² San beena' chap xil'ka' ni che mba laxje'na', ka chle'ile' ba za' to ba znia gaob xil'ka', lii chchoonlall'tie'gakb na' chxonje' daa bi nakgakb ba che'. Na'ch chllin ba zñiana' chox'b xil'ka' na' chsheshlesb legakb.

¹³ Beena' chzi' laxje'na' chxonjtezile' xil'ka', la' daa ikaaz laxje'nan' chibaile', na' bi chakile' legakb.

¹⁴ 'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombia'gake' nad'.

¹⁵ Ka chak che Xa'na' nombi'e nad', na' nad' nombi'ane', ka'kzan nad' nombi'a legake', na' chzanid' yel' mban cha'ni ni chegake'.

¹⁶ Na' lekzka' zoach ben' yoblə, ben' zi' gonlilall' nad', na' lekzka' nakgake' ka xil' cha', per bin' gaggake' txen xil' cha'ka'. Na' chiyal' gaxgakee kwenche wzenaggake' cha', na' yog'gake' gaggake' tozə, na' toz nad' gak lall' na'gake'.

¹⁷ 'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii.

¹⁸ Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lekzka' nap' yel' wñabia' kwenche yiban'. La' kan' nllia Xa'na' bia' gon'.

¹⁹ Na'ch dii yoblə ben' Israelka' lle' na' gogkake' choplə ka bengakile' daa wne'.

²⁰ Zane' che'gake':

—¿Bi che chzenagzle che beena'? Dii xiwaan yo'e, na' chaktonte'n.

²¹ Na' zi bale' che'gake':

—Aga choe' beeni dill' ka ben' yoo dii xiw', la' aga bi yel' wak nap dii xiwaa yiyonan to ben' l'chol'.

Ben'ka' chñabia' ben' Israelka' bi bzenaggake' che Jesúza'

²² Na' do kana', gol' lnina' Jerusalenna' daa chisa'lall'gake' llana' bengake' lall' na' Chioza' yoodo'na', na' nak beo' zag.

²³ Na' chda Jesúza' loo koridor che dii Salomónna' daa ze kwit yoodo'na'.

²⁴ Na' ben'ka' chñabia' ben' Israelka' wyechjyobgake'ne', che'gake'ne':

—¿Axt batrakzə yikwaso' yel' chakchoplall' chento'ni? Shi li'kzan Crístona', beena' chbeznto' wsel' Chioza', lla wnatega neto' kwenche inezinto'.

²⁵ Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wñabia' che Xa'na', na' chli'n nan len' bselee nad'.

²⁶ Na' le', bi chajle'le daa bi nakle txen ben'ka' nia' nakgake' xil' cha'.

²⁷ Nombi'a ben'ka' nia' nakgake' xil' cha', na' legake' chzenaggake' xtilaana' na' nogake' nad'.

28 Na' cho'a legake' yel' mban zejli kani, na' bi kwiayi'gake'. Na' ni to kono gak yibej legake' lo ni'a na'ni.

29 Xa'na' ba bene' legake' lall' na' gapshiigakee, na' len' chnabia'che' lao nottez. Na' ni to kono gak yikwas legake' lo ni'a neena'.

30 Ka Xa'na'kz, nad'.

31 Na'ch beñ' Israelka' bizgoyogake' yaja' kwenche nan wtakwgake'n Jesúza'.

32 Na' chi'e legake':

—Dii zan dii wen ba ble'ile chonlen' yel' wak che Xa'na'. Na' ¿nonnan' bi choollall'le daa cheenile' wtakwle nad' yaja'?

33 Na' beñ'ka' chnabia' beñ' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' beñ'zə li'.

34 Na'ch che' Jesúza' legake':

—Ley chelena' nan, Chioza' ne': “Nad' wnia' le' nakle chios.”

35 Cho'a Xtill' Chioza' toshiizi nakan ka wne', na' shi cho'en dill' bsi'e “chios” beñ'ka' wdixjee xtilleena',

36 ¿biche nazle nad' chnia' che Xacho Chioza' daa nia' nak' Xiine', len len' wleje' nad' na' bselee nad' yell-lioni?

37 Shi bi chon' ka chon Xa'na', aga wyajle'le cha'.

38 Na' shi chle'ile chon' ka diika' chon Xa'na', li shajle' che diika' chon', la'kzi bi cheenile shajle'le cha', kwenche inezyen'ile Xa'na' zoalene' nad' na' nad' zoalenee.

39 Na'ch dii yoblə goklall'gake' gox'gake'ne' na' bene' gan bile' lawe'ka'.

40 Na'ch bizyaj Jesúza' dii yoblə shlaa yao Jordánna' jazoe' latja' gana' bchoa Juanna' beñ'ka' nisa' kana'.

41 Na' beñ' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

42 Na' beñ' zan wyajle'gake' che Jesúza' na'.

11

Wit Lázarona'

1 Yell Betániana' wzoa to beñ' bi shao' wlie' Lázaro, na' lezkka' na' wzoa beñ' zane'ka' Maríana' len Mártana'.

2 Maríana', beñ' zan Lázarona', len' bwazje' set zixa' ni'a Xancho Jesúza' na' bisbillile'n yish' yichje'na'.

3 Na' chop bilte beñ' zan Lázarona' bsel'gake' rson lao Jesúza' che'gake'ne':

—Xan', bi shao' beñ' zannto'ni, beeni nllaguilo'.

4 Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lezkka' nad', nak' Xiine', sho'a balaan.

5 La'kzi Jesúza' chakchgaile' Mártana', na' beñ' bile'na' na' Lázarona',

6 ka benile' rson bi shao' Lázarona', wllachile' zi chop lla gana' zoe'.

7 Na' ka wde, chi'e beñ'ka' nakgake'ne' txen:

—Li sho' Judeana' sto shii.

8 Na'ch beñ'ka' nakgake'ne' txen che'gake'ne':

—Maestro, kani batchgana' goklallii beñ' Israelka' lle' na' witgake' li' kon yaja'. ¿Ana' cheenilo' yizajo' na'?

9 Na' che' Jesúza' legake':

—¿Aaga shllin' goran' de beeni'na' shlla? Na' beena' chda tellalə aga willjachewee daa de beeni'na' yell-lioni.

10 San shi chde' wal-lə, willjachewee daa bi nla'.

11 Na'tech golle' legake':

—Ba ches Lázaroná', beena' nllaguicho, na' sha' lljasbanee.

12 Na'ch che' beñ'ka' nakgake'ne' txen:

—Xan', shi ba chese', wiyakshao'lall'kzile'.

13 Jesúza' golle' ka' daa ñezile' ba wit Lázaroná', na' legake' chakgakile' daa cheszen' golle' ka'.

14 Na'ch be'len Jesúza' legake' dill' ka to shajni'gakile', chi'e:

—Ba wit Lázaroná'.

15 Na' chibaid' bi wzoa', la' chyalljch gon' ka shajle'chle cha'. Li sho' shajcho gana' die'.

16 Na'ch Tomáza', beena' che'gake' Dídimó*, chi'e beñ'ka' sto:

—Li sho'lene' kwenche lencho guetlenchone' shi witgake'ne'.

Jesúza' chakyisbane' beñ' wetka'

17 Na' ka bllingake' yella', na' che'gake'ne' ba gok tap lla bgash' Lázaroná'.

18 Na' Betániana' llian gaozə Jerusalénna', ka do shoñ kilómetro ñlaagakan.

19 Na' beñ' zan beñ' Israelka' lle' Jerusalénna' wyajgake' jenxenlall'gake' Mártana' len Maríana' daa wit beñ' zane'ka'.

20 Na' ka wñezi Mártana' ba zoa illin Jesúza', na'ch jatile'ne', per Maríana' bigaane' lille'ka'.

21 Na' ka blline' kwite'na', chi'ene':

—Xan', shel' zo' ni kana' wlen yillwe' che beñ' zan'na' bi wite', shel'ka'.

22 Na' ñaa la'kzi ba wite', ñezid' gon' Chioza' bittezə dii inabilo'ne'.

23 Na' che' Jesúza'ne':

—Wiban beñ' zano'na'.

24 Na'ch che' Mártana':

—Awe, ñezid' wibane' kat' yiban beñ' wetka' llana' te che yell-lioni.

25 Na' che' Jesúza'ne':

—Nad' chon' ka chiban beñ' wetka' na' nap' yel' mban dii bi te cheyin. Beena' chonlilallee nad', la'kzi ba wite', wibanckze'.

26 Na' yog' beñ'ka' mban na' chonlilall'gake' nad' bi guetgake' toshiizi. ¿Achajli'o dga nia' li'?

27 Na' che' Mártana'ne':

—Awe, Xan', chajli'a lin' nako' Crístona', na' lin' Xiin Chioza', beena' llia bia' yid yell-lioni.

Wchell Jesúza' gana' bkwash'gake' Lázaroná'

28 Na' biyoll wna Mártana' ka', na'ch ziyaje' zjanie' beñ' bile' Maríana', na' chi'ene' xochizi:

—Ba bid Maestrona' chnie' li'.

29 Na' kon ka golle' Maríana' ka', lii wzolla'tie' jawie' Jesúza'.

30 Bilan' sho' Jesúza' yella', ni zetie' gana' jatil Mártana'ne'.

31 Na' beñ' Israelka', beñ'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgakile' lljchelle' cho'a banan'.

32 Na' ka bllin Maríana' kwit Jesúza', lii bchek'te xibe'na' lawe'na' chi'ene':

—Xan', shel' zoasho' ni, bi wit beñ' zan'na', shel'ka'.

33 Na' ka ble'i Jesúza' chbell Maríana', na' ka'kzə beñ'ka' zejlengake'ne', na' to dii wal inlebb gokile'.

34 Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

35 Na' wchell Jesúza'.

* 11:16

36 Na'ch che' lĵwell beŋ' Israelka' lle' na':

—Li wwia ka gokchgaile'ne'.

37 Na'ch bale' che'gake':

—Beeni bene' ka ble'i beŋ' lĵhoĵa', ¿Aaga zak bisle' Lázaroná', na' bi wite' sheĵ'ka', lla?

Bisban Jesúza' Lázaroná' ladj beŋ' wetka'

38 Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwasha'n cho'ayinna'.

39 Na'ch che' Jesúza':

—Li yikwas yaja' ka'lə.

Na' Mártana', beŋ' zan beŋ' weta', chi'ene':

—Xan', ba chĵa' beena' zban, ĵa' ba gok tap lla wite'.

40 Na' che' Jesúza'ne':

—¿Aaga ba wnia' li' shi shajĵi'o, na' ile'ilo' yeĵ' wak choo yeĵ' wak xen ĵhe Chioza'?

41 Na'ch bikwasgake' yaja' cho'a bana' gana' die'. Na' blĵis jalao Jesúza' yabana', na' chi'e:

—Xa, choxkeno' ba bzenago' ĵha'.

42 Nezd' toshiiizi chzenago' ĵha', per chĵia' li' kwenĵhe shajĵe' beŋ'ki lle' ni nan lin' bseloo nad'.

43 Na' ka biyoll wne' ka', na'ch wĵie' zillj, chi'e:

—ĵLázaro, bichej na'!

44 Na' lli bichejte Lázaroná' ndob ŋi'a neena' lech'ka', na' cho'alawe'na' ndoban to lech'. Na'ch che' Jesúza' ĵegake':

—Li yizeshe' lechaá na' ĵi yisane' yiyaje'.

Wloogake' xnezin gox'gake' Jesúza'

(Mt 26:1-5; Mr. 14:1-2; Lc 22:1-2)

45 Na' zan beŋ' Israelka', beŋ'ka' jen Maríana' txen daa wit beŋ' zane'na', ble'gakile' ka ben Jesúza' na' benĵilall'gake'ne'.

46 Per bale' wyaj lao fariseoka' na' jellgake' ĵegake' ka ben Jesúza'.

47 Na'ch bĵozka' chĵabia' na' fariseoka' bitopgake' yog' beŋ'ka' chĵabia' beŋ' Israelka', na' che'gake':

—¿Nakraz ka gonchon, lla? ĵa' zan yeĵ' wak chli' beeni.

48 Na' shi inacho jwayi beena', yog'z beŋ' gonĵilall'gake'ne' na'ch yid beŋ' Rómaka' na' williayi'gake' yoodo' ĵechoni len yell ĵechoni.

49 Na' len to beŋ' le' Caifás, nake' bĵoz choo bĵoz xen ka lo yiza'. Na' chi'e ĵegake':

—Bi nezzilen,

50 ni bi chakbe'ile wenlan toz beŋ' guet ni ĵhe beŋ' wlall ĵechoka', aga ka daa kwiayi' doxen lallchoni.

51 Na' aga kon ka wnaz Caifáza' kan', san daa nake' bĵoz choo bĵoz xen lo yizan', ben Chioza' ka bi'e dill' guet Jesúza' ni ĵhe beŋ' Israelka'.

52 Na' aga ni ĵhe toz beŋ' Israelkan' guet Jesúza', san ĵekzka' ni ĵhe yog' beŋ'ka' ba wleje' gakgake' xiine' doxen yell-lionin, kwenĵhe gakgake' toz.

53 Na' daa goll Caifáza' ka', lo llana' wzolo bengake' toz dill' kwenĵhe witgake' Jesúza'.

54 Na' daa wzolo chongake' ka', aga wdatekch Jesúza' ladj beŋ' Israelka', san wzee wyaje' to yell dii le Efraín, daa lliá gaozə latja' gana' bibi chashj chĵeb, na' na'z wzoe' len beŋ'ka' nakgake'ne' txen.

55 Na' ba zoa gao gal' ĵni Paskw ĵhe beŋ' Israelka', na' beŋ' zan beŋ' yell yoblə wyajgake' Jerusalénna' ka zi' gal' ĵnina' kwenĵhe yixi yiyechgake' ka nllia leya' bia'.

56 Na' chdagake' chiyiljgake' Jesúza', na' shlak lle'gake' lesh' chyoodo'na', chĵabi ĵjwelle':

—¿Beraka chakile? ¿Awide' ĵnina', lla?

⁵⁷ Na' b̄xozka' ch̄nabia' len fariseoka' bengake' mandad shi no ̄nezi ga chda Jesúza' do na' lljellgake' legake' ka' kwen̄che gox̄gake'ne'.

12

Bwazj Maríana' set zix̄a' ni'a Jesúza'

(Mt 26:6-13; Mr. 14:3-9)

¹ Zi' xop lla gal' l̄ni Paskwa' wyaj Jesúza' yell Betániana', gana' zoa Lázaroná', beena' bisbane' ladj ben' wetka'.

² Na' ben'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázaroná' wche'lene' Jesúza' cho'a mesa' na' nochl̄a ben'ka' wdaolengake'ne'.

³ Na'ch bex̄ Maríana' ka do gashj litr set zix̄a' daa le nardo, daa le zak'chga, na' bwazje'n ni'a Jesúza', na' tech bisbillile'n yish' yich̄je'na'. Na' doxen loo yoona' wche' shii set zix̄a'.

⁴ Na' len Jud Scariota', beena' nak Jesúza' txen, beena' gone'ne' lo na' ben' malka'. Na' golle':

⁵ —¿Berache bi betee set zix̄a' na' wi'e mecha' gaklenan ben' yesh'ka', lla? Len la' ka che twiz laxj bēnaan zakaan.

⁶ Juda' wne' ka' aga in̄acho daa chiyeshile' ben' yesh'kan', san daa nake' to ben' wbanan. La' len' gok lall' nee xmeche'ka' na' chbane' lat' wejan.

⁷ Na'ch che' Jesúza'ne':

—Bi wllono' gone' ka'. Ba nzoashao'kze' daa kwen̄che wgone'n llin kat'ka' wk-wash'gake' nad'.

⁸ Ka nak ben' yesh'ka', toshiizin soakz ben'ka' ladjleni, san nad', aga toshiizin soalen' le'.

Wloogake' x̄nezin witgake' Lázaroná'

⁹ Na' zan ben' Israelka' w̄nezgakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwen̄che ile'gakile' Lázaroná', beena' bisban Jesúza' ladj ben' wetka'.

¹⁰ Na'ch b̄xozka' ch̄nabia' bengake' toz dill' witgake' len Lázaroná'.

¹¹ La' daa biban Lázaroná' ladj ben' wetka', zan ben' Israelka' ben' l̄ilall'gake' Jesúza' na' bich bzenaggake' che b̄xozka'.

Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

¹² Na' betiyo ben' be ben' zil, ben'ka' lle' yell Jerusalénna' daa chal' l̄ni Paskwa', w̄nezgakile' ba ngoo Jesúza' nez yilline' yella'.

¹³ Na'ch wyajgake' j̄lezgake'ne' nox̄gake' zinka', na' choe'la'ogake'ne', nagake':

—¿Li we'la'o Chioza'! ¿Gon̄leeyshga X̄ancho Chioza' beeni ba bselee in̄abi'e cho' ben' Israel!

¹⁴ Na' blleli Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

¹⁵ Le' ben' yell Jerusalén, bi illeble.

Li wwia, ni ba za' beena' in̄abia' le' na' llie' to burr chbando'.

¹⁶ Na' ben'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj ben' wetka', kana'ch gokbe'gakile' nan Cho'a Xtill' Chioza' daa bzej ben'ka' kani'yi choe'n dill' che', na' che diika' bengakile'ne'.

¹⁷ Na' ben'ka' lle' len Jesúza' kana' bisbane' Lázaroná' ladj ben' wetka', ben'ka' bengakile' binie'ne' kwen̄che bicheje' loo bana', legaken' be'gake' dill' daa bene'.

¹⁸ Daan ben' zan jatilgake' Jesúza' daa bengakile' ka nak yel' waka' bene'.

¹⁹ Na'ch fariseoka' che' ljwellgake':

—Li wwia ka ba chak, bibi de goncho. Li wwia, yog'lolz̄a ben' ba nogake' le'.

Baḷ ben' griegoka' chiyiljgake' Jesúza'

²⁰ Ladj ben'ka' wyaj lḡina' Jerusalenna' je'la'ogake' Chioza' na' len baḷ ben' griego.

²¹ Na' ben'ki jabig'gake' gana' ze Felípena', beena' nak ben' yell Betsaida daa lia yell-lio daa mbani Galileana', na' che'gake'ne':

—Ben'do', cheeninto' we'lennto' Jesúza' dill'.

²² Na' Felípena' jelle' Andréza' ka', na' choptie' wyajgake' jellgake' Jesúza' ka'.

²³ Na'ch che' Jesúza' legake':

—Ba bllin lla, nad', Ben' Bsel' Chioza' Yell-lioni, sho'a balaan xenna'.

²⁴ Dii li nia' le', shi to biḡ che trigona' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyakan dii zan wal.

²⁵ Beena' ze wḡeyi che yel' mban che'na' yell-lioni, len' kwiayee. San beena' chzani yel' mban che'na' bittezə dii gak che', beenan' gat' yel' mban che' zejli kaḡi.

²⁶ Nottezə ben' cheenile' gone' xshin'na' chiyal' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

²⁷ Naatek chakyeshid' dii wal inlleb. ¿Awḡabid' Xa'na' yisle' nad' lawi dga wtil', lla? Bi gak gon' ka', la' ni cheyi dgayen'kzan bid'.

²⁸ Na'ch golle':

—Xa, beshki ka shoo balaan.

Na'ch wḡe Chioza' yabana', chi'e:

—Ba ben' kwenche wyo'a balaan, na' naa gon' ka sho'a balaan sto shii.

²⁹ Na' ben'ka' lle' na' bengakile' shii Chioza', na' bale' wnagake' wziwa'zan wḡe. Na' zi bale' wna to anjlan' ba wḡie' le'.

³⁰ Na'ch Jesúza' chi'e legake':

—Aga ni cha' nadaan wḡe Chioza', san ni che len'.

³¹ Na' ba bllin lla gone' yel' joschis che yog' ben' lle' yell-lioni, na' naa kweje' dii xiwaa daa chḡabia' yell-lioni.

³² Na' kat'ka' wḡisgake' yaga' cha'lə gana' nda'gake' nad', kanan' gat' latj gonlilall' nottezə ben' nad'.

³³ Na' daa wne' ka', bzajniile' legake' nakan guete'.

³⁴ Na' ben'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Crístona', beena' wsel' Chioza' inabi'e, soe' zejli kaḡi. Na' ¿biche nazo' Beena' Bsel' Chioza' Yell-lioni wḡisgake'ne' cha'lə wwia ben' le' lee yaga' gana' dee? ¿Nora Beena' Bsel' Chioza' Yell-lioni no' ka'?

³⁵ Na'ch che' Jesúza' legake':

—Nad' nak' beeni' che ben' yell-lioni, per zi shlollchga soalen' le'. Li sho' lo nez lina' shlak ni de beeni'na' kwenche bi gak chele ka chak che to ben' chalile' kat' ngwee' nez. La' beena' chda' gana' shchoḷ bi nezile' galan zeje'.

³⁶ Li gonlilall' nad' naa shlak ni zoalen' le' kwenche sho' beeni' cha'na' loo yichjlall'do'lena'.

Biyoll wna Jesúza' ka' na'ch bizee jakwashile' legake'.

Ben' zan ben' Israelka' bi wyajle'gake' che Jesúza'

³⁷ La'kzi ben' Israelka' ble'gakile' yel' wak zan daa ben Jesúza', zangake' bi benlilall'gake'ne'.

³⁸ Na' daa bengake' ka', gok ka wna dii Isaíaza', beena' wdixjee daa goll Chioza'ne' kani'yi, daa wne':

Xan' ¿azoa ben' ba wyajli'e dillaa chyixje'nto'?

Na' ¿azoa ben' ba gokbe'ile' bli'o yel' wak cho'na'?

³⁹ Na' bi wyajle'gake', la' Chioza' bene' chegake' ka na sto dii bzej dii Isaíaza':

40 Bene' legake' ka ben' lchol na' lall'do' chech
kwenche bi gakbe'gakile' bi zejin diika' chle'gakile',
ni bi shajni'gakile' diika' chengakile',
kwenche ki yiyaj yilengakile' na' yiyone' legake' ben' wen.

41 Wna Isaíaza' ka' daa ble'ile' ka nak balaan xen wala' nap Jesúza', na' bi'e dill' che'.

42 Na' la'kzi ka', ben' zan ben' Israelka' lente no ben' wnabia' che'ka' ben' lillal'gake' Jesúza'.
Per bi be'gake'n dill' daa bllebgake' bich wleb fariseoka' legake' gana' chdop chllaggake'
choe' lwillgake' Chioza',

43 la' wyoolall' chgake' ina ben' nakgake' ben' wen aga ka daa ina Chioza' nakgake' ben' wen.

Cho'a xtill' Jesúza' nakan dii lialo

44 Na'ch wne Jesúza' zillj chi'e:

—Nottez ben' chon' lillal' nad', aga toz' nadaan chon' lillal'lee, san len beena' bsel' nadaan chon' lillal'lee.

45 Na' nottezə ben' chle'ile' nad', lekzka' chle'ile' beena' bsel' nad'.

46 Zaa yell-lioni kwenche beena' gon' lillal'lee nad' te' lo beeni' cha'na' na' bich soe' lo yel chola'.

47 Na' shi no ben' chenile' cho'a xtilaani na' bi chone' ka nia', aga nadaan wchogloa' che', la' aga zaa kwenche wchogloa' che' ben' yell-lionin, san zaa kwenche yislagakee na' bi kwiayi'gake'.

48 Beena' bi cheenile' gon' lillal'lee nad' na' bi chzenague' cha', de daa gawan xya che'. Cho'a xtilaana' daa ba bi'a, lennan' gawan xya che' kat' illin lla te che yell-lioni.

49 La' dillaa daa ba bi'a aga to bia'lozan' wnia' ka'. Xa'na', beena' bsel' nad', len' nllie' bia' bin chiyal' inia' na' bin chiyal' wli' wsedid' ben'.

50 Na' nezid' dill' daa nllia Xa'na' bia' inia' nsa'n yel' mban zejli' kani. Daan, yog' lol' diika' nia', nakan kon ka wna Xa'na' nad'.

13

Wdib Jesúza' ni'a ben'ka' nakgake'ne' txen

1 Ka ba zoa gal' Ini Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' non' lillal'gake'ne' yell-lioni, na' ka' gokile' legake' axt ga zeelo.

2 Na' ka chaogake' xshe'na', ba wloolə dii xiwaa loo yichjlal'do' Jud Scariota', xiin Simónna', gone' Jesúza' lo na' ben' malka'.

3 Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yoblə.

4 Na' lo zej chaogake' xshe'na', wzolla' Jesúza' na' bkwase' xe' dii toña' ka'lə, na' bchele' to lech' lsineena'.

5 Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa ncheje' lsineena'.

6 Na' ka bidol' chibe' ni'a Simón Pédrone', na'ch che' Pédrone'ne':

—Xan', ¿ali'lə chibzo' ni'ani?

7 Na' che' Jesúza'ne':

—Aga chajniilo' dga chon' naa, per techlə shajniilo'n.

8 Na'ch che' Pédrone'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

9 Na'ch chize' Pédrone'ne':

—Shi kan' nakan, Xan', aga toz' ni'ani chibo' san len yichji na' na'ki.

10 Na'ch che' Jesúza'ne':

—Beena' nosh' nazje', toz ni'enan' chiyał' shech, la' ba nechkz kwerp che'na'. Ka'kzan le', ba nxi nyechle, la'kzi aga yog'le.

¹¹ Daa nezi Jesúza' non gon le' lo na' beñ' malka', daan chi'e legake': "Aga yog'le ba nxi nyech."

¹² Na' ka biyoll wdibe' ni'eka', na'ch biyakwe' xe' dii toña' na' jachi'e cho'a mesa' sto shii. Na' chi'e legake':

—¿Añezile bi zejin dga ba ben'?

¹³ Le' nale nad' Maestro na' Xan', na' lekzile, la' kan' nakan.

¹⁴ Na' shi nad', naktia' Maestro chele na' Xanle, ba wdib' ni'alena', lekzka' le' chiyał' chib ni'a ljwell-le.

¹⁵ Ba ben' dga kwenche bliid' le' kan' chiyał' gon che ljwell-le.

¹⁶ Dii li nia' le', aga zak'chi to mos ka xane'na', na' to beñ' zej mandad aga zak'che' ka beena' bseleene'.

¹⁷ Shi chajniile diiki ba wnia' na' gonlen, na' soale mbalaz.

¹⁸ 'Na' aga yog'len nia' ka'. Nezi' nolen ba wlej' kwenche nonlilall'le nad'. Na' chiyał' gak ka na Cho'a Xtill' Chioza', gana' na: "Beena' chaolentie' nad' txen ba chiyechje' nad' gone' mal cha'."

¹⁹ Naa nia' le' dga zi' gak, kwenche kat' ba chakan shajle'le nak' beena' ba wnia' nak'.

²⁰ Na' dii li nia' le', beena' wlebe' nottezə beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

Wdixjee Jesúza' ka gon Juda' wdie'ne' lo na' beñ' malka'

(Mt 26:20-25; Mr. 14:17-21; Lc 22:21-23)

²¹ Na' biyoll wna Jesúza' ka', le gokyeshii loo yichjlall'do'ena', na' bi'e dill' kwasloł, chi'e: —Dii li nia' le', tole gonle nad' lo na' beñ' malka'.

²² Na'ch beñ'ka' nakgake'ne' txen chwia ljwellgake' chakgakile' nogaken' chi'e ka'.

²³ Na' to beena' nak Jesúza' txen, beena' chakchgaile', chi'e kwite'na'.

²⁴ Na' Simón Pédróna' bene' sen kwenche inabi beena' chi' kwit Jesúza' noen' chi'e ka'.

²⁵ Na'ch jabig'ch beena' gaoch kwit Jesúza' na' wñabile'ne', chi'ene':

—¿Noran gon ka', Xan'?

²⁶ Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleje' lat' yetxtila' na' bi'en Jud Scariota', xiin beena' le Simón.

²⁷ Na' kon ka biyoll be' Jesúza' Juda' yetxtila', lii wyoote Satanáza' loo yichjlall'do'ena'. Na'ch che' Jesúza'ne':

—Daa ba ngoo yichjo' gono', bentegan.

²⁸ Na' ni to beñ'ka' chaolengake'ne' bi wyajni'gakile' biche gollze'ne' ka'.

²⁹ Bale' gokgakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech beñ' yesh'ka'. La' len' nak lall' nee xmeche'ka'.

³⁰ Na' ka wde wdao Juda' yetxtila' daa be' Jesúza'ne', lii wza'tie'. Na' ba goł ka wzee.

Dii koba' daa nllia Chioza' bia'

³¹ Na' ka wde wza' Juda', na'ch che' Jesúza':

—Ba bllin lla sho'a balaan, nad', Beñ' Bsel' Chioza' Yell-lioni, na' lekzka' dga gon', gonan ka sho' Chioza' balaan.

³² Na' daa gon' ka sho' Chioza' balaan, lekzka' kwinn Chioza' gone' kwenche nad', Beñ' Bsel' Chioza' Yell-lioni, sho'a balaan, na' lii gontie'n.

³³ Le' xiindawaa, zi shlollchga zoalen' le'. Na' yiyiljle nad', na' chiznia' le' ka gosh' beñ'ka' chñabia' beñ' Israelka': Gana' yiyaa, bi gak sa'le.

³⁴ Na' to dii kob chllia' bia' gonle naa: Li gaki ljwell-le. Ka chakid' le', kan' chiyał' gaki ljwell-le.

³⁵ Shi gaki ljwell-le, na'ch inezi yog'lołte beñ' nakle nad' txen.

Wdixjee Jesúza' bi wcheb Pédróna' shi nombi'ene'
(Mt. 26:31-35; Mr. 14:27-31; Lc. 22:31-34)

³⁶ Na'ch Simón Pédróna' wñabile' Jesúza', chi'ene':

—Xan', ¿garan yiyajo'?

Na' che' Jesúza'ne':

—Aga wak soo gana' yiyaa naa, per wllin lla soo.

³⁷ Na'ch che' Pédróna'ne':

—Xan', ¿berache bi gak sa'len' li' naa? Ba nchoglallaa guet' ni cho'.

³⁸ Na' Jesúza' chi'ene':

—¿Achakilo' ba nchoglalloo gueto' ni cha'? Dii li nia' li', shon shii bi wchebo' shi nombi'o nad' ka zi' kwell-lə shikwteza'.

14

Jesúza' nake' neza' chillin kwit Xe' Chioza'

¹ Bi gakshejlall'le. Li gonlilall' Chioza' na' lekzka' li gonlilall' nad'.

² Lill xlatj Xa'na' dii xen latj de. Shel' bi nakan ka', ba wnia' le' ka', shel'ka'. Na' naa yiyaa lljayenshawaa gana' yidzoale.

³ Na' kat' ba benshawaan, na'ch yiyed' yidxia' le' kwenche lenle soale gana' zoa'.

⁴ Na' ba nombia'le neza' daa chillin gana' lljazoa'.

⁵ Na'ch Tomáza' chi'ene':

—Xan', bi nezinto' gan yiyajo'. ¿Nakran gonnto' yillelinto' neza'?

⁶ Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a beñ' yel' mban zejli kani. Aga no yillin kwit Xa'na' shi bi gonlilallee nad'.

⁷ Daa ba nombia'le nad', lenkz Xa'nan' ba nombia'le. Na' naa ba nombia'lene' na' ba ble'lene'.

⁸ Na'ch che' Felípena'ne':

—Xan', ben ka ile'into' Xo'na' na' xenlall'nto'.

⁹ Na'ch billii Jesúza' xtilleena', chi'e:

—Felipe, ba wlla zoalen' le', ¿ana' bikzan' gombia'yeno' nad'? Beena' ba ble'ile' nad' lekzka' ba ble'ile' Xa'na'. ¿Berache chñabzo' gon' ka ile'lene'?

¹⁰ ¿Abi chajli'o zoalen Xa'na' nad' na' nad' zoalenee? Diika' nia' le' aga to bia'lozan' chñia'n, san daa cheeni kwin Xa'na', beena' zoalene' nad', lennan' cho'a dill' na' lennan' chon'.

¹¹ Li shajle' daa nia' zoalen Xa'na' nad', na' nad' zoalen' le'. Na' shi bi chajle'le dga nia', la'ch' li shajle' cha' ni che yel' wakki chle'ile' chon'.

¹² Dii li nia' le', nottez beñ' chonlilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit Xa'na'.

¹³ Na' gon' bittez daa inabile Xa'na' daa nakle nad' txen kwenche sho'e balaan ni cha'.

¹⁴ Nad' gon' bittez daa inable daa nakle nad' txen.

Bcheb Jesúza' wselee Espíritu Sántona'

¹⁵ Shi chakile nad', li gon diika' nllia' bia' gonle.

¹⁶ Na' inabid' Xa'na' wselee sto beñ' gaklene' le' na' soalene' le' toshiizi.

¹⁷ Len' Espíritu Sántona', beena' chli' daa nak dii li. Na' beñ' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjlall'do'lena'.

¹⁸ Aga wikwaan' le' ka bi' wizeb, san wiyedch' soalen' le'.

¹⁹ Aga chllach bich ile'i beñ' yell-lioni nad', san le' wle'chkzile nad'. Na' daa mban' toshiizi, lekzka' le' toshiizi ibanle.

²⁰ Kat' illin llana' nia' ka', na' gakbe'ile zoalen' Xa'na', na' le' zoalene' nad' na' nad' zoalen' le'.

21 Nottez ben' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki Xa'na'ne', na' nad' lekzka' gakidee na' gon' kwenche gombia'che' nad'.

22 Na' Júdaza' (beena' sto, aga Jud Scariota,) chi'ene':

—Xan', ¿berache to neto'z gonzo' ka gombia'chnto' li' na' bi len ben' yell-lioki, ben'ka' bi chonlilall'gake' li'?

23 Na' billii Jesúsza' xtilleena':

—Beena' chakile' nad', wzoe' xtillaa, na' Xa'na' gakile'ne', na' nad' kon Xa'na' yidsoalento'ne'.

24 Na' beena' bi chakile' nad', bi chzoe' xtillaa. Na' diika' chli' chsedid' aga dii chyiljallzaan, san Xa'na', beena' bsel' nad', chzajniile'n nad'.

25 'Yog' diiki choe'len' le' dill' naa shlak ni zoalen' le'.

26 Na' kat' bich soa' len le', Espíritu Sántona', beena' wsel' Xa'na', gaklene' le' na' wzajniile' le' yog' dii chiyal' inezile, na' gone' ka lljadinile yog' diika' ba wnia' le'.

27 'Yel' mbalaza' chkwaanlena'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble.

28 Ba benzkzile nia' yiyaa gana' zoa Xa'na' na' lekzka' wiyedchkz' yidzoalen' le'. Na' shi chakile nad', chiyal' yibaile daa yiyaa gana' zoa Xa'na', la' zak'che' aga ka nad'.

29 Na' ba nia' le' diiki zi' gak kwenche kat' gakan shajle'le.

30 'Na' bich bitek dill' we'lench' le' naa, la' ba za' dii xiwaa, daa chnabia' yell-lioni. Per aga wak inabia'n nad'.

31 La' chon' kon ka nllia Xa'na' bia' gon' kwenche inezi ben' yell-lioki chakid' Xa'na'. Li yizolla'. Li yidó.

15

Jesúza' chzaklebi kwine' to yag uva

1 'Nad' nak' ka yag uva daa nak dowalj, na' Xa'na' nake' ka beena' chaz chaanan.

2 Na' yog'lol' xoz' xka'inna' daa bi chbia, chchogue'n. Na' diika' chbia, chonshao'che'n kwenche zizikli kwian.

3 Na' le', nakle ka xoz' xka'inna' daa chbia, daa bzenagle ka nak dill'ka' be'len' le'.

4 Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndil nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

5 'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gakte ka xoz' xka'inna' daa chbiachga. Shi le' bi nakle nad' txen aga bi gak gonle.

6 Beena' bi gone' ka dii le gone' nad' txen, nake' ka xoz' xka'inna' daa ba bhogue' na' ibillan, na' yitope'n wzaleen lo yi'na' kwenche sheyan.

7 'Shi le' soatezi soale gonle nad' txen na' toshiizi chzoale xtillaana', li inab daa cheenile na' gakan.

8 Xa'na' cho'e balaan kat' chonle dii wenna', na' daa chonle ka', chli'lawin dii li nakle nad' txen.

9 Ka chaki Xa'na' nad', ka'kzan chakid' le'. Li soatezi soa gonle nad' txen kwenche gakbe'ile chakid' le'.

10 Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia Xa'na' bia' gon', na' ka' chakbe'id' le chakile' nad'.

11 'Ba wnia' le' ka' kwenche yiba yizaklenile' nad', na' yiyoll yido soale mbalaz.

12 Na' dgan nllia' bia' gonle: Gaki ljwell-le ka chakid' le'.

13 Bich bi yel' chaki dii xench de ka che beena' chzani yel' mban che'na' guete' ni che ben'ka' nllaguile'.

14 Len' nakle beṅ'ka' nllaguid' shi chonle ka nllia' bia' gonle.

15 Bich gon' le' ka mos, la' beena' nak mos aga neṅzile' bin chon xane'na'. San nakle beṅ' nllaguid' la' ba bzajniid' le' yog' diika' wna Xa'na' nad'.

16 Aga len' wleṅle nad', san nadaan wleṅ' le' na' ba bzoa' le' shajle lljenle dii wenna' daa bi te cheyi. Na' Xa'na' gone' yog' daa inabile' daa nakle nad' txen.

17 Na' dgan chllia' bia' gonle: Gaki lṅwell-le ganga.

Beṅ'ka' bi nombia' Chioza' gakzbangakile' beṅ'ka' nak Crístona' txen

18 'Bibi gakile shi beṅ'ka' bi nombia' Chioza' gakzbangakile' le', la' neṅzkile ka'kzan gokzbangakile' nad'.

19 Shel' nakle leṅake' txen na'ch gakkakile' le', shel'ka'. Per daa ba wleṅ' le' kwenche gakle nad' txen, daan chakzbangakile' le'.

20 Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtilaana', leṅzka' wzenaggake' chele.

21 Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

22 'Beṅ'ka' bi nombia' Chioza', aga bi dol' napgake' shel'ka' bi bidye'len' leṅake' xtilleena'. Per daa ba bidye'len' leṅake' xtilleena' bi gak inagake' bi chakbe'gakile' chongake' dii mala'.

23 Beena' chakzbanile' nad' lenkz Xa'nan' chakzbanile'.

24 Aga bi dol' napgake' shel'ka' bi bli'a yel' wakka' daa konon' gon ladjeka'. Na' la'kzi ba ble'gakile' diika' chon', bia'kzə chakzbangakile' nad' na' Xa'na'.

25 Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

26 'Na' wselaa Espíritu che Xa' Chioza', beena' gaklene' le'. Espírituna', beena' chli' daa nak dii li, see gana' zoa Xa' Chioza' na' yidyee xtillaa.

27 Na' leṅzka' lenle we'le cho'a xtilaana', la' ba gokle nad' txen ka wzoloa' chli' chsedid' beṅ'.

16

1 'Ba wnia' le' diiki kwenche bi yidinṅile' daa chonṅilall'le nad'.

2 La' bich wlebgake' le' gana' chdop chllagcho choeṅwillcho Chioza', na' wllin lla axt wit beṅ' le' daa gakile' kan' chazlall' Chioza'.

3 Gongake' ka' daa bi nombia'gake' Xa'na', ni bi nombia'gake' nad'.

4 Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

Daa chon Espíritu Sántona'

5 'Na' naa yiyaa lljazoalen' Xa'na' beena' bsel' nad', na' ni stole bich chṅabile nad' gan yiyaa.

6 Na' daa ba wnia' le' ka' le' chakyesh'zi'le'.

7 Per dii li nia' le', wakch wen chele shi yiyaa. La' shi bi yiyaa, beena' gaklene' le' bi yidsoalene' le'. San shi ba ziyaa, na' wselaaane'.

8 Na' kat' yide', gone' kwenche gakbe'i beṅ' yell-lioki nakgake' beṅ' saaxya daa bi biyombia'gake' beena' nak dowalj beṅ' li beṅ' shao', na' gakbe'gakile' chidol'gake' wchoglo Chioza' chegake' ni che xtoleeka'.

9 Yiyakbe'gakile' napgake' dol' daa bi chonṅilall'gake' nad'.

10 Na' yiyakbe'gakile' nak' beṅ' li beṅ' shao' daa yiyaa gana' zoa Xa'na' na' aga wle'chile nad'.

11 Na' leṅzka' yiyakbe'gakile' Chioza' wi'e yel' zak'zi' che beṅ'ka' bi chzenag cha', la' ba bhogloe' sak'zi' dii xiwaa daa chṅabia' yell-lioni.

12 'Dii zanch de dii inia' le', dii bi shajniile naa.

13 Per kat' ila' Espiritu Sántona', beena' chli' daa nak dii li, len' wzajniile' le' kwaslo' daa nak dii li. La' aga dii chiljall'ze'n ine', san ine' daa che' Xa'na'ne', na' chixje'ile' le' diika' zi' za' gak.

14 Na' gone' ka sho'a balaan, la' wzajniile' le' diika' ba wnia'.

15 La' yog'lolte daa na Xa'na' lennan' cho'a dill'. Daan nia', Espirituna' wzajniile' le' diika' ba wnia'.

Yel' chakyeshiina' yiyakan yel' xaba

16 'Aga chillach bich ile'ile nad', na' lekzka' aga wlla yizle'ile nad'.

17 Na' bal ben'ka' nakgake'ne' txen wnabi ljwelle':

—¿Bera zejin daa ne' aga chillach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'?

18 ¿Bi zejin daa naze' "aga chillach"? Bi chajniicho biche naze' ka'.

19 Na' Jesúza' gokbe'ile' cheengakile' inabgakile'ne' bi zejin daa wne', na'ch chi'e legake':

—¿Achñabi ljwell-le bi zejin daa wnia' le' aga chillach bich ile'ile nad', na' lekzka' aga wlla yizle'ile nad'?

20 Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi gakyeshile, yel' chakyeshii chelena' yiyakan yel' xaba.

21 Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa to bi'do' che' yell-lioni.

22 Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

23 'Na' kana'chan bich bi inabile nad'. Dii li nia' le', bittezə dii inabile Xa'na', gonkze'n, daa nonlilall'le nad'.

24 Axt naa ni to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucrístona' ba bene' gan daa chñabia' yell-lioni

25 'Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen.

26 Na' kat' ba bllin llana', kanan' inabile Xa'na' bittezə dii inabilene' daa nonlilall'le nad', na' bi chonan byen kwin' inabidee gaklene' le',

27 la' kwinkz Xa'na' chakile' le' daa chakile nad' na' daa chajle'le bselee nad'.

28 Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiyaa gana' zoe'.

29 Na'ch che' ben'ka' nakgake'ne' txen:

—Naach ba choo dill' dii najnii, na' bich bi jempl chchino'.

30 Na' chakbe'into' nez nle'ilo' yog'lolte, na' aga chonan byen no bi inabzi li, la' ba nezlilo' bin inabile' li'. Daan chajle'nto' dii li zoo gana' zoa Chioza'.

31 Na' che' Jesúza' legake':

—¿Añaach chajle'le'?

32 Ba zoa illin lla, wa ba bllinkz llana', illeshlesle na' gala ikaa twej twejle, na' yikwaanle toz'. Per aga tozan' yigaana', la' zoalenkz Xa'na' nad'.

33 Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li gondiplall', la' ba ben' gan daa chñabia' yell-lioni.

17

Be'lwil Jesúza' Chioza' che ben'ka' nakgake'ne' txen

1 Na' ka wde wna Jesúza' diika', na' blis jalawe'na' bwie' yabalə, na' golle':

—Xa, ba bllin gor illagloa' daa llia bia' wtil'. Wloo nad' balaan, nad' nak' xiino', kwenche lekzka' nad' kwaa li' balaan.

² La' ba beno' lo na' inabia' lao yog'loḷ ben', kwenche gon' ka gat' yel' mban zejli kani che ben'ka' wlejo' gonlilall'gake' nad'.

³ Na' daa gat' yel' mban zejli kani che ben', zejin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

⁴ Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'.

⁵ Na' naa, Xa, yiyongacho' nad' balaanna' kat' yiyed' kwito'na' ka balaanna' daa wdapkz' kana' wzoalen' li' ka zi' xe sil yell-lioni.

⁶ Ba beno' nad' ben'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'.

⁷ Na' naa ba nezgakile' yog' dill'ka' bi'a nakan dii wno'.

⁸ La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li' wzaa gana' zo' na' ba wyajle'gake' lin' bseloo nad'.

⁹ Chnabid' li' gakleno' legake'. Aga chnab' gakleno' yog' ben' yell-lioki, san chnab' gakleno' ben'ka' wlejo' kwenche gonlilall'gake' nad', la' lall' non' nakgake'.

¹⁰ Na' yog' ben'ka' nak lall' na' lekzka' nakgake' lall' no'. Na' legake' ba wloogake' nad' balaan.

¹¹ Na' naa ba chiza' yell-lioni. Na' legake' yigaangake' ni. Xa, li' nako' dowalj ben' wen ben' shao'. Wdapgach ben'ka' ba beno' nonlilall'gake' nad' kon yel' wak cho'na' kwenche gagake' toz, ka nakcho cho' nakcho toz.

¹² Shlak wzoalen' legake' yell-lioni ba wdap bwia' legake' kon yel' wak cho'na'. Na' ni toe' bi wlliaiyi', letechokzə beena' ba nakan kwiayee, kwenche gak ka na Cho'a Xtilloona'.

¹³ Na' naa ba zizaa gana' zo'. Na' nia' li' diiki shlak ni zoa' yell-lioni kwenche ben'ki gapgake' yel' xaba ka daa nap'.

¹⁴ Nad' ba bzajniid' legake' cho'a xtilloona', na' ben'ka' bi nombia' li' chakzi' chakzban-gakile' legake' daa bi nakgake' legake' txen, ka chon' nad' bi chon' txen ben'ka' bi nombia' li'.

¹⁵ Aga chnabid' li' yikoo ben'ki nonlilall' li' lo yell-lioni, san chnab' wkweejgachgako'ne' kwenche ki chitj seni dii mala' daa chda yell-lioni legake'.

¹⁶ Bi nongake' txen ben'ka' bi nombia' li', ka chon' nad' bi chon' ben'ka' txen.

¹⁷ Bengach kwenche ben'ki nonlilall' nad' gakchgake' ka chazlalloo daa chzenaggake' dill' li' cho'na', la' cho'a xtilloona' nakan dii li'.

¹⁸ Ka beno' bseloo nad' kwenche bidsoa' yell-lioni, ka'kzan chselaa legake' kwenche shajgake' ladj ben' yell-lioki.

¹⁹ Chzanlallaa kwinn' gon' ka no' ni chegake', kwenche lekzka' gongake' ka no' daa ba chzenaggake' dill' li' cho'na'.

²⁰ Aga chnabid' li' gakleno' to lezgake', san lekzka' chnab' gakleno' ben'ka' gonlilall' nad' kat' wzenaggake' cho'a xtilloona' daa we' ben'ki.

²¹ Xa, chnabid' li' gonshgo' ka gak yog'gake' toz, ka nakcho cho' nakcho toz. Lekzka' chnab' gagake' cho' toz kwenche ben'ka' bi nonlilall' li' shajle'gake' lin' bseloo nad'.

²² Ba wlo'a legake' balaan ka daa wloo nad', kwenche gagake' toz ka nakcho cho' nakcho toz.

²³ Nad' nakgakee toz ka nakcho cho' nakcho toz. Bengach ka gagake' toz ka chiyal', kwenche ben'ka' bi nonlilall' li' gakbe'gakile' lin' bseloo nad', na' gakbe'gakile' chakilo' ben'ka' nonlilall' nad' ka chakilo' nad'.

²⁴ Xa, li' ba beno' nad' legake', na' cheenid' soalengake' nad' gana' soa' kwenche ile'gakile' balaan cha'na' daa beno' nad' ka zi' xe silte yell-lioni daa chakilo' nad'.

²⁵ Xa, li' nako' ben' li' ben' shao'. La'kzi ben'ka' bi nonlilall' nad' bi nombia'gake' li', nad' nombi'a li' na' ben'ki nonlilall' nad' nezgakile' lin' bseloo nad'.

²⁶ Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gəgakile' beŋ', na' nad' soalenkzgakēe.

18

Bex'gake' Jesúza'

(Mt. 26:47-56; Mr. 14:43-50; Lc. 22:47-53)

¹ Na' ka biyoll wna Jesúza' ka', wza'lene' beŋ'ka' nakgake'ne' txen wyajgake' shlaa yao Cedrónna', na' wyoolene' legake' to yell-lío ga lle' lla' yag olivo.

² Na' Juda', beena' bene' Jesúza' lo na' beŋ' malka', lekzka' nombi'e latja', la' Jesúza' zan shii wyajlene' legake' na'.

³ Na' bllinlen Juda' beŋ' zan soldad na' zi xonj beŋ'ka' chap yoodo'na', beŋ'ka' bsel' bχozka' chnabia' len fariseoka'. Zejgake' nox'gake' no kandil, no yi' yech, na' dii wniagakile'.

⁴ Na' Jesúza' ba nezczile' yog' daa zi' gak che', na'ch bcheje' jatile' legake', na' chi'e:

—¿Non chiyilje?

⁵ Na' che'gake'ne':

—Jesús, beŋ' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'.

⁶ Na' ka goll Jesúza': “Nadaan”, to biza'zgake' jayetgake' wza'che'la.

⁷ Na'ch wiznabi Jesúza' legake':

—¿Noran chiyilje?

Na' che'gake'ne':

—Jesús, beŋ' Nazaretan'.

⁸ Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyilje, li we' latj yiyaj beŋ'ki.

⁹ Golle' legake' ka' kwenche billinin daa wne': “Xa, ba wdap' beŋ'ka' beno' nad' na' ni toe' bi wlliai'.”

¹⁰ Na' Simón Pédróna' no'e to spad, na'ch wleje'n bchogue' tlaa nag to beŋ' le Malco, de shlina'. Na' Málcona' nake' xmos bχoz choo bχoz xenna'.

¹¹ Na'ch che' Jesúza' Pédróna':

—Bigoo spad cho'na' loo lillinna'. La' chonan byen gak cha' daa ba nllia Xa'na' bia' gak.

Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

¹² Na'ch soldadka' len xane'ka', na' beŋ'ka' chap yoodo' che beŋ' Israelka', bex'gake' Jesúza' na' bchejgake'ne'.

¹³ Na' zigaate jwa'gake'ne' lao Anáza' xtobiin che Caifáza', na' Caifáza' nake' bχoz choo bχoz xen lo yiza'.

¹⁴ Na' Caifáza', len' beena' golle' beŋ'ka' chnabia' beŋ' Israelka' wenchlan witgake' toz Jesúza' aga ka daa kwiai' yog' beŋ' wlall che'ka'.

Bi bcheb Pédróna' shi nombi'e Jesúza'

(Mt 26:69-70; Mr. 14:66-68; Lc 22:55-57)

¹⁵ Na' Simón Pédróna' len sto beŋ' nake' Jesúza' txen janogake'ne'. Na' beena' zejlen Pédróna' txen nombia' bχoz choo bχoz xenna'ne', daan gok wyoolene' Jesúza' lesh' chyoo che bχoz choo bχoz xenna'.

¹⁶ Na' Pédróna' wzie' cho'a leeja'. Na'ch beena' nombia' bχoz choo bχoz xenna', bicheje' jashaljlene' bi' nool wewaa chap cho'a leeja' kwenche be'b' latj wyoo Pédróna'.

¹⁷ Na'ch bi' nool wewaa chap cho'a leeja' che'b' Pédróna':

—¿Aga lenon' nako' beeni txen?

Na' che' Pédrona'b':
—Bi len' nakee txen.

18 Na' moska' len beṇ'ka' chap yoodo'na' wlekgake' yi'na' kwenḅe wbillgake' daa ba chak zag. Na' jselen Pédrona' legake' cho'a yi'na' kwenḅe billa'ile'.

Wṇabyolli Anáza' Jesúza'

(Mt 26:59-66; Mr. 14:55-64; Lc 22:66-71)

19 Na' beena' nak bḅoz choo bḅoz xen wṇabyollile' Jesúza' no beṇ'ka' nakgake'ne' txen na' beran chli' chsedile'.

20 Na' che' Jesúza'ne':

—Ladj lkwe' beṇaan ba bi'a dill'. Ba bli' bsedid' beṇ' lesh' chyoodo'na' na' gachlə chdop chllag beṇ' wlallka' choe'lwillgake' Chioza'. Na' bibi dill' bi'a do ngash'zə.

21 ¿Berache chṇabzilo' nad'? Wṇabi beṇ'ka' ba bli' bsedid' kwenḅe inagake' li' beran ba goshgakee. La' nezgakile' bin ba bli' bsedid' legake'.

22 Na' ka wde wna Jesúza' ka', to beṇ'ka' chap yoodo'na' wdape' xagueena', chi'ene':

—¿Biḅe chilliizo' bḅoz choo bḅoz xenni dill'?

23 Na' che' Jesúza'ne':

—Shi bi dii mal ba wnia', wnashki beran ba wnia'. Na' shi shlikzan ba wnia', ¿berache chitzo' nad'?

24 Na'ch de nchejzi Jesúza' bde Anáza'ne' lao Caifáza', beena' nak bḅoz choo bḅoz xen.

Sto shii bi bḅeb Pédrona' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

25 Na' shlak ze Pédrona' chshee cho'a yi'na', beṇ'ka' lle' na' che'gake'ne':

—¿Aaga lenon' nako' beeni txen?

Na' bi bḅebe', san chi'e:

—Bi nakee txen.

26 Na' to xmos bḅoz choo bḅoz xenna', beena' nak bish' ljwell beena' bḅhog Pédrona' nague'na', chi'ene':

—¿Aaga lenon' ble'lenid' Jesúza' gana' lle' yag olívoka'?

27 Na' stokzə bi bḅeb Pédrona', na' lii wchellte shikwteza'.

Bdegake' Jesúza' lao Pilátona'

(Mt. 27:1-2, 11-14; Mr. 15:1-5; Lc. 23:1-5)

28 Na' cheeni'lesdo' bichejgake' lill Caifáza' na' biḅe'gake' Jesúza' gana' chon Pilátona' yel' joschisa'. Na' beṇ' Israelka' aga wyoolengake' Jesúza' gana' chon Pilátona' yel' joschisa', la' aga wak gaogake' daa chsini'agake' che Paskwa' shi ba wyoogake' loo yoona'.

29 Na'ch bchej Pilátona' chi'e legake':

—¿Bi xyan chaole che beeni?

30 Na' che'gake'ne':

—Shel' bibi dii mal chone' aga widwa'nto'ne' lawo' ni, shel'ka'.

31 Na'ch che' Pilátona' legake':

—Li yichi'e na' li gon yel' joschis che' kon ka na ley chelena'.

Na' beṇ'ka' chṇabia' beṇ' Israelka' che'gake'ne':

—Aga bi lsens chento' de witnto' beṇ'.

32 Na' daa gok ka', billinin ka wna Jesúza' gak kat'ka' guete'.

33 Na'ch biyoo Pilátona' gana' chone' yel' joschisa', na' goxe' Jesúza' chi'ene':

—¿Alin' nako' beṇ' wṇabia' che beṇ' Israelki?

34 Na' che' Jesúza'ne':

—¿Aadi chza'z lalloon no' ka'? ¿Awa beṇ' yoblan ba be'lene' li' xtilaana'?

35 Na'ch che' Pilátona'ne':

—¿Achakilo' beṇ' Israel nad'? Beṇ' wlall cho'kikzan na' bḅozka' chṇabia' le', ba bengake' li' lo na'. ¿Beran beno'?

³⁶ Na'ch che' Jesúza'ne':

—Aga nak yel' wñabia' cha'na' ka che beñ' yell-lioki. Shel' nakan ka', beñ'ka' nak nad' txen wllongake' nad' kwenche bi gox' beñ' wlall cha'ki nad', shel'ka'. Per aga nak yel' wñabia' cha'na' de yell-lioz.

³⁷ Na'ch che' Pilátona'ne':

—¿Ana' beñ' wñabia'kzan nako', shka'?

Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa nak dii li. Na' yog'lol beñ'ka' chzenaggake' dill' lina', chzenaggake' cha'.

³⁸ Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' beñ' wñabia' che beñ' Israelka', na' chi'e legake':

—Ni to dii mal bi chillelid' chon beeni.

³⁹ Na' kon ka yoolole chak yog' yiz chsan' to beñ' de lillyana' kat' chal' lni Paskwi, ¿abi cheenile yisan' beñ' wñabia' cheleni, le' nakle beñ' Israel?

⁴⁰ Na'ch yog'gake' besyaagake' zillj, che'gake'ne':

—¿Aga beenan' yisano'! ¿Barrabázan' bisan!

Na' Barrabáza' nake' to beñ' wban.

19

¹ Na' ka' gok ben Pilátona' mandad bet wdingake' Jesúza'.

² Na' soldadka' bengake' to bxoön de xis yesh' na' bllingake'n yichje'na' ka corona na' bwakwgake'ne' to lech' de morad.

³ Na'ch wbig'gake' lawe'na' chtitjgakile'ne', chongake' ka beñ' chgoo le' balaan, che'gake':

—¿Toshiizi sechgayi che beeni chñabia' beñ' Israelka'!

Na' wdapgabe' xagueena'.

⁴ Na'ch bizchej Pilátona', chi'e beñ' Israelka':

—Li wwia, ni kwejee kwenche inezile ni to dii mal bi chillelid' bene'.

⁵ Na' bchej Jesúza' mbinte bxoön de xis yeshaa yichje'na' na' nakwtie' lech' morada'. Na'ch che' Pilátona' legake':

—Ni ze beeni chaole xya cheyin.

⁶ Na' bxozka' chñabia' na' beñ'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¿Bdee lee yag cruza'! ¿Bdee lee yag cruza'!

Na' che' Pilátona' legake':

—Li yichi'e, shka'. Na' li wdee, le'. La' nad', ni to dii mal bi chillelid' bene'.

⁷ Na' beñ' wñabia' che beñ' Israelka' che'gake'ne':

—De to ley chento' daa na chiya' guete' daa nalze' nake' Xiin Chios.

⁸ Na' ka gollgabe' Pilátona' ka', zizikchli bllibe'.

⁹ Na'ch biyo'e sto shii gana' chone' yel' joschisa' na' chi'e Jesúza':

—¿Gara beñ' li'?

Na' Jesúza' bikzə bi dill' billi'e.

¹⁰ Na'ch che' Pilátona'ne':

—¿Berache ki chilli'o xtillii? ¿Abi nezilo' nap' yel' wñabia' kwenche wdaa li' lee yag cruza' na' naptia' yel' wñabia' kwenche yisan' li'?

¹¹ Na'ch che' Jesúza'ne':

—Aga bi yeḷ' wṇabia' napo' bi gonilo' nad' shel' bi non Chioza'n li'. Daan, beena' bdie' nad' lawo' ni, dol' xench nape' aga ka li'.

¹² Na'ch ka beni Pilátona' wne' ka', biyiljlallee naklə ka gone' kwenche yisane' Jesúza', per beṇ'ka' chṇabia' beṇ' Israelka' axt chosyaayigake', che'gake'ne':

—Shi yisano'ne' bi nako' txen Césara', la' nottez beena' ina nake' beṇ' wṇabia', Césaran' chizoshi'e.

¹³ Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yeḷ' joschisa', gana' le Gábata de dill' hebreo, na' zejin latj ga ntaogake' yaj.

¹⁴ Na' gok dga llana' chsini'agake' che lni Paskwa'. Na' ka do gobill goll Pilátona' beṇ' Israelka':

—Ni ze beṇ' wṇabia' cheleni.

¹⁵ Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag cruza'!

Na'ch che' Pilátona' legake':

—¿Acheenile wi'a lsens wda'gake' beṇ' wṇabia' cheleni lee yag cruza'?

Na' bꝁozka' chṇabia' che'gake'ne':

—Toz Césaran' chṇabi'e neto'. Koch no beṇ' yoblə zoa.

¹⁶ Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch bche'gake'ne'.

Bda'gake' Jesúza' lee yag cruza'

(Mt 27:32-44; Mr. 15:21-32; Lc 23:26-43)

¹⁷ Na'ch bwa'gake' Jesúza' yag cruz che'na', na' bche'gake'ne' gana' le Gólgota de dill' hebreo, na' zejin Latj che llit yichj beṇ' wet.

¹⁸ Na' na' bda'gake' Jesúza' lee yag cruza', na' lekzka' bda'gake' zi twej beṇ' shlaa wej.

¹⁹ Na' Pilátona' bzeje' to dii bda'gake' yichj yag cruz che Jesúza', na' nan ki: “Jesús, beṇ' Nazaret, beṇ' wṇabia' che beṇ' Israelka'.”

²⁰ Na' bzeje'n dill' hebreo, dill' latín na' dill' griego. Na' zan beṇ' Israelka' blabgake' daa da' yichj yag cruza', la' gana' bda'gake' Jesúza' lee yag cruza' chgaanān gaozə yell Jerusalénna'.

²¹ Daan bꝁozka' chṇabia' beṇ' Israelka' gollgake' Pilátona':

—Bi chiyal' inan “Beṇ' wṇabia' che beṇ' Israelka'”; san inan “Beenin nalze' nake' beṇ' wṇabia' che beṇ' Israelka'.”

²² Na' Pilátona' chi'e legake':

—Kon ka ba bzeja'n, ka'kzan igaanan.

²³ Na' biyoll bda' soldadka' Jesúza' lee yag cruza', na'ch beꝁ'gake' xe'na' na' bengake'n taplə kwenche bikaa twej chegake'. Na' lekzka' beꝁ'gake' xe' dii toṇa' daa nak to shwilizə.

²⁴ Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: “Bilaagake' xa'na', na' bengake' to wyitj kwenche got'bia' nogake' wkaan.”

²⁵ Na' kwit yag cruz che Jesúza' ze xṇeena' len beṇ' bile'na', na' len María, xool Cleófaza', na' María beṇ' yell Magdálana'.

²⁶ Na' ka ble'i Jesúza' xṇeena', na' lekzka' ble'ile' gaozə ze to beena' nake'ne' txen, beena' le chakile', na'ch chi'e xṇeena':

—Beenin yiyoni xiino' naa.

²⁷ Na'ch chi'e beena' nake'ne' txen:

—Beenin yiyoni xṇoo naa.

Na' lo llana' biḫi'e xṇa' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

28 Na' ka wde, nezi Jesúza' ba gok yog' daa lliá bia' gakə, na' kwenche yillinin ka na Cho'a Xtill' Chioza', wne':

—Chbilid'.

29 Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis* kwenche bzoagake'n cho'ena'.

30 Na' wde weej Jesúza' daa nak zichj zla', na'ch wne':

—Ba gok yog' daa lliá bia' gak naa.

Na' bchek' yichje'na', na' wite'.

To soldad wllibe' to ya dii nla' lawinna' kwit lee Jesúza'

31 Na' ben'ka' chnabia' ben' Israelka' bi goongakile' yigaan kwerp che ben'ka' lee yag cruzka' llana' chombaangake'. Daan gollgake' Pilátona' gone' mandad lljtishjgake' ni'a ben'ka' da' lee yag cruza' kwenche yob guetgake' na' yiletjgake' kwerp che'ka' lee yag cruzka'.

32 Na'ch bselee soldad che'ka', na' jtishjgake' chop laate ni'a ben' necha' da' kwit Jesúza', na' lekzka' bengake' che beena' sto da' zi shlaa kwite'na'.

33 Na' ka jabig'gake' gana' da' Jesúza' ble'gakile' ba wite', na' bi wdishjgake' ni'ena'.

34 Na' to soldada' wllibe' to ya lo tosh' kwit li'ena' na' lii bchejten chen len nis.

35 Na' beena' choe' dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e.

36 Gok diiki kwenche billinin ka na Cho'a Xtill' Chioza' gana' na: “Ni to llitka' yo'e bi chishjgake'.”

37 Na' gan yoblə lee Cho'a Xtill' Chioza' chiznan: “Wwiagake' beena' wllibgake' yana'.”

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

38 Na' ka wde gok diiki, José ben' yell Arimatéana', wnabile' Pilátona' wi'e latj yikey kwerp che Jesúza'. Joséna' goke' txen Jesúza' do ngash'zə daa bllibe' ben'ka' chnabia' ben' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'.

39 Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chla' zix daa nongake' de mirra na' nchixan daa le áloe.

40 Na'ch btobgake' kwerp che Jesúza' to lech' ton na' blla'gake'n daa chla' zix, kon ka chon ben' Israelka' kat' chkwash'gake' to ben' wet.

41 Na' gaozə gana' bda'gake' Jesúza' lee yag cruza' de to latj ga nazgake' yag dii chbia dii zix, na' na' zoa to blej kob dii bin' koogake' ni tlish' ben' wet.

42 Na' daa chakbyengakile' wsini'agake' che llana' chombaangake', lii wlootegake' kwerp che Jesúza' loo bleja' zoa gaozə na'.

20

Biban Jesúza' ladj ben' wetka'

(Mt. 28:1-10; Mr. 16:1-8; Lc. 24:1-12)

1 Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'.

2 Na'ch bizee ziyajdoe' gana' zoa Simón Pédróna' na' sto beena' nak Jesúza' txen, beena' le gokile', jayelle' legake':

—Ba jalejgake' Xanchóna' loo bana' na' bi nezinto' galə jaloogake'ne'.

3 Na'ch wza' Pédróna' len beena' sto zejgake' cho'a bana'.

4 Choptie' zejdogake', per beena' to bxonjche' aga ka Pédróna' na' zigaate le' blline' cho'a bana'.

5 Na' bchekee bwie' loo bana' na' ble'ile' lech'ka' chi' na', per bi wyo'e.

* 19:29 To lo xis: literalmente en una rama de hisopo.

6 Na' ka bllin Simón Pédróna' na' wyo'e loo bana' na' lekzka' ble'ile' lech'ka' chi' na'.

7 Na' lecha' bdoob yichje'na' aga lenan chi' kwit lech'ka', san ndoban chi'n ka'lə.

8 Na'ch lekzka' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúzan'.

9 La' kana' aga ba wyajni'yen'gakile' Cho'a Xtill' Chioza' gana' cho'en dill' yiban Jesúza' ladj beñ' wetka'.

10 Na'ch beñ'ka' chop non Jesúza' txen biyajgake' gana' zoagake'.

Jali'lao Jesúza' María, beñ' yell Magdálana'

(Mr. 16:9-11)

11 Na' Maríana' bigaane' cho'a bana' chbelle'. Na' lo zej chbelle' bchekee kwenche bwie' loo bana'.

12 Na' ble'ile' chop anjl zoagake' do xtil, chi'gake' loo bana', toe' chi' yichjinna' na' stoe' chi' xni'alin gana' got' kwerp che Jesúza'.

13 Na'ch che'gake' Maríana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na', na' bi nezid' galə jaloogake'ne'.

14 Shingt wne' ka', ka bllii jalawe'na' na' ble'ile' ze Jesúza' kolleena', per bi biyombi'e shi Jesúzan'.

15 Na'ch che' Jesúza'ne':

—¿Berache chbellzo', noolə? ¿Nodaa chiyiljo'?

Na' Maríana' chakile' beena' chap yag zixkan', na' chi'ene':

—Beñ'do', shi ba bibejo'ne', wnagach nad' galə jadixjo'ne' kwenche yichi'ane'.

16 Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejín: beñ' chli' chsedi beñ'.

17 Na' che' Jesúza'ne':

—Bi goxoo nad', la' bin' yiyep' kwit Xa'na'. Lete biyaj, jane beñ'ka' nak nad' txen jayellgake' ba ziyaa kwit Xa'na', beena' lekzka' nak Xale. Lljazoalen' Chios cha'na', beena' lekzka' nak Chios chele.

18 Na'ch biza' María, beñ' yell Magdálana', jayelle' beñ'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

Jali'lao Jesúza' beñ'ka' nakgake'ne' txen

(Mt 28:16-20; Mr. 16:14-18; Lc 24:36-49)

19 Na' ka gol lo llana' bibane', lla nech che xmanna', ba ndop nllag beñ'ka' nak Jesúza' txen na' nsejtegake' yoona' daa chllebgake' beñ'ka' chñabia' beñ' Israelka', ka gokbe'gakile' ba ze Jesúza' ladjeka', na' chi'e legake':

—Soashgale mbalaz.

20 Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' beñ'ka' nakgake'ne' txen le bibagakile' ble'gakile'ne'.

21 Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' llje'le cho'a xtilaana' yell-lioni.

22 Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántona'.

23 Na' beñ'ka' yizi'xenle saaxya che'ka', wiyakxenan. Na' beñ'ka' bi yizi'xenle cheyin, bi yiyakxen chegake'.

Tomáza' bi wyajli'e shi biban Jesúza' ladj beñ' wetka'

²⁴ Tomáza', beena' che'gake' Dídimo nake' txen beṅ'ka' shllin, na' bi lene' ka jali'lao Jesúza' legake'.

²⁵ Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na' wde na'ni kwit li'ena', aga wyajli'a.

²⁶ Na' ka wde xon' lla, dii yoblə bidop beṅ'ka' nongake' Jesúza' txen loo yoona' na' len Tomáza'. Na' la'kzi nsejtegake' yoona', wyoo Jesúza' jsie' ladje'ka'. Na' chi'e legake':

—Soashgale mbalaz.

²⁷ Na'ch chi'e Tomáza':

—Bwia na'ni, na' bne'n xbeno'na'; na' bne' noona' kwit li'ani. Bi gakchoplaloo, san wyajle'.

²⁸ Na'ch che' Tomáza'ne':

—jLin' nako' Xan' na' naktio' Chios cha'!

²⁹ Na' che' Jesúza'ne':

—Galj ble'ilo' nad' na'ch chajli'o. Chakomba beṅ'ka' chajle'gake' la'kzi bin' ile'gakile' nad'.

Bzej Juanna' libri kwenche shajle' beṅ' Jesúza' nake' Xiin Chios

³⁰ Zan yel' wak daa ben Jesúza' lao beṅ'ka' nakgake'ne' txen bi nyojgakan lee libri.

³¹ Per diiki nyojgakan kwenche shajle'le Jesúza' nake' Xiin Chioza' na' len' Crístona', beena' wleje' inabi'e, na' daa gonlilall'lene' gat' yel' mban chele dii bi te cheyin.

21

Jali'lao Jesúza' beṅ'ka' nakgake'ne' txen

¹ Ka wde, Jesúza' jali'lawe' sto shii beṅ'ka' nakgake'ne' txen cho'a Nisdo' che Galileana' daa lekzka' le Nisdo' che Tiberias. Na' ki gok:

² Simón Pédrona' len Tomáza', beena' nsi'gake' Dídimo, na' Natanaela', beṅ' yell Canána' daa llia gana' mbani Galileana', na' chopte xiin Zebedewa' na' zi chop beṅ'ka' nongake' Jesúza' txen lle'gake' Galileana'.

³ Na' Simón Pédrona' chi'e legake':

—Sha'ch' lljxen' bel'a'.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen bel'a', na' ni tlish' kono wxengake' do yel.

⁴ Na' cheeni'lesdo' bllin Jesúza' cho'a nisdo'na', na' beṅ'ka' nakgake'ne' txen aga chakbe'gakile' shi len'.

⁵ Na'ch Jesúza' wnie' legake', chi'e:

—Le' beṅ' bish'dawaa, ¿abin' senle bel'a' gaocho?

Na' che'gake'ne':

—Aga no de.

⁶ Na'ch che' Jesúza' legake':

—Li wza' yixj chelena' shlaa de shli che barkwa' na' idol'gakb.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan bel'ka'.

⁷ Na' beena' le chaki Jesúza'ne', golle' Pédrona':

—jXanchonan'!

Na' kon ka beni Pédrona' golle'ne' ka', lii biyakwte xe'na', na' bxitee loo nisa'.

⁸ Na' beṅ'ka' sto biyajlengake' barkwa' cho'a nisdo'na'lə, zingoyon yixja' daa zinyichachgan bel'ka', la' aga nakchan zit', ka sto guyoa metrzan.

⁹ Na' ka bichejgake' loo barkwa', ble'gakile' ba chi' yi'na' xna na' xoa to bel lawinna', na' dete yetxtil.

¹⁰ Na' che' Jesúza' legake':

—Li yiyox'to belka' zi' wxenle.

¹¹ Na'ch wyoo Simón Pédrone' loo barkwa' kwenche jaselle' yixj belá' na' bigoyoe'n axt cho'a nido'na'. Na' la'kzi tolla'cha nak yixja' daa ziyoon to guiyoa shiinyon bel yelka', bi bcheza'n.

¹² Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxjgakile' ye'gake'ne': “¿Nora li?” La' gokbe'gakile' Xancho Jesúza'kzan'.

¹³ Na'ch wbig' Jesúza' na' bexee yetxtila' len belá' na' bi'e che chegake'.

¹⁴ Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshajlen Jesúza' Simón Pédrone'

¹⁵ Na' ka bidaogake' xsila', na'ch che' Jesúza' Simón Pédrone':

—Simón, xiin Jonás, ¿achakchilo' nad' aga ka to chaki ben'ki nad'?

Na' Pédrone' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

¹⁶ Na' de wchop shii wiznabile'ne', chi'ene':

—Simón, xiin Jonás, ¿achakilo' nad'?

Na' Pédrone' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil' cha'.

¹⁷ Na' de wyon shii wiznabile'ne', chi'ene':

—Simón, xiin Jonás, ¿ana' chakilo' nad'?

Na' gokyeshii Pédrone' daa ba gok shon shii chnab Jesúza' shi chakile'ne', na' chi'ene':

—Xan', nez nle'ilo' yog'lo'lte, na' nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

¹⁸ Dii li nia' li', ka goko' ben' wew', gokw xalaano' to kwanzo' na' wyajo' kon ga wnan cho'. Per kat' ba goxoo, wli nooka' na' yiwakw ben' yoblə xalaano'na', na' wchi'e li' ga bi cheenilo' shajo'.

¹⁹ Na' daa goll Jesúza'ne' ka', bzajniile' legake' ka guet Pédrone', na' daa guete' ka' sho' Chioza' balaan. Na' ka wde golle' Pédrone' ka', chi'ene':

—Btiplaloo benlilall' nad' toshiizi.

Beena' le chaki Jesúza'ne'

²⁰ Na' biyechj Pédrone' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wnabile'ne', chi'ene': “Xan', ¿norakznton' gon li' lo na' ben' malka'?”

²¹ Na' ka ble'i Pédrone'ne', na'ch chi'e Jesúza':

—Xan', ¿shera beeni?

²² Na' che' Jesúza'ne':

—Shi cheenid', ni mbankz beeni kat' yiyed'. Bi sio' beena' wneyi. Lin' btiplaloo benlilall' nad' toshiizi.

²³ Na' daa golle' ka', wze dill' ladj ben'ka' chonlilall' Jesúza' nan aga wet beena'. Per bi goll Jesúza' Pédróna' bi guet beena', san chi'ene': "Shi cheenid', ni mbankze' kat' yiyed'. Bi sio' beena' wneyi."

²⁴ Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' nezinto' dillaa cho'e nakan dii li.

²⁵ Dii zanch dii ben Jesúza' na' bi nyojan. Shel' nyoj yog' diika' bene', chakid' bi gaki yell-lioni ikwa' librka' shel'ka'.

Diika' ben postlka'

Bcheb Jesúza' wselee Espíritu Sántona'

¹ Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsedile' dezd ka wzoloe'

² axt ka bllin lla biyep'e yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'.

³ Na' ka wde wite' na' bibane' ladj beñ' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wñabia' che Chioza'.

⁴ Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'.

⁵ Dii li Juanna' bchoe' beñ' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶ Na' ben'ka' ndop nllag kwit Jesúza', wñabgakile'ne':

—Xan', ¿awibejo' cho' beñ' Israel lo ñi'a na' beñ' zit'ka' ñaa kwenche inabi'o neto'?

⁷ Na' Jesúza' golle' legake':

—Bi chido!le inezile bi lla bi gor gon Xacho Chioza' daa gone', la' toze' len' chñabi'e na' ba bllie' bia' batan gone'n.

⁸ Na' ka yidsoa Espíritu Sántona' loo yichjlall'do'lena' na' gone' le' yel' wak, na' we'le xtillaana' yell Jerusalénna', na' doxen gani mbani Judeani na' lezkza' gana' mbani Samáriana', na' doxen zbii zkaañ yell-lioni.

⁹ Na' ka biyoll golle' ka', wzolo biyep'e yabana' chwiate beñ'ka', na' wze to bej bkwashaan le' na' bich ble'gakile'ne'.

¹⁰ Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil.

¹¹ Na' gollgake':

—Le' beñ' Galilea, ¿beraچه chwiazle yabana'? Kwin Jesúza', beena' ble'ile bichej ladjleni na' biyep'e yabana', kakzan ile'ilene' yiyede'.

Wlejkake' Matíaza' bizoe' lo laz Juda'

¹² Na'ch biyetjkake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'.

¹³ Na' ka billingake' Jerusalénna', biyepgake' yoona' llia shkwiana' cha'lə gana' zoagake'. Na' beñ'kin billin: Pédrona', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas beñ' bish' Jacóbona'.*

¹⁴ Yog' beñ'ki chdopgake' yog' lla kon beñ'ka' nak beñ' bish' Jesúza' kwenche choe'llwillgake' Chioza', na' len Maríana' xna Jesúza' na' zi' bal noolka'.

¹⁵ Na' llaka' wzoagake' na', Pédrona' wzie' ladj beñ'ka' chonlilall'gake' Jesucrístona', nakgake' ka do to guiyoa galjə, na' golle' legake':

¹⁶ —Le' beñ' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e beñ'ka' be'x'gake' Jesúza'.

¹⁷ Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'.

* **1:13** Beñ' bish' Jacóbona': ben'ka' nsed nagake' chiyal' inan xiin Jacóbona'.

18 Na' mecha' daa beḡee che dii mala' daa bene', lennan' biziile' to yell-lio gana' bxope' de gozyichjla na' goshj li'ena' na' bchej yog' xjloe'na'.

19 Na' ka wṇezi beṇ' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zejín Yell-lio Chen.

20 La' lee libr che Sálmoka' nan:

Yidesh yiloashga lill xlatje'na',
na' ni sto kochno soan.

Na' lekzka' nan:

Beṇ' yoblə yiyakshga lo nee daa nan gok lo nee gone'.

21 'Na' chonan byen kwejcho to beṇ'ki bengake' cho' txen toshiizi kana' wzoalen Xancho Jesúza' cho',

22 beṇ'ki nakgake' cho' txen dezd ka bchoa Juanna' Jesúza' nisa' axt ka biyepé' yabana', kwenche gone' cho' txen we'cho dill' nakan gok biban Jesúza' ladj beṇ' wetka'.

23 Na'ch wlejkake' chope': toe' le Matías, na' sto beṇ' yoo shonə leyin, José, Barsabás, na'ch Justo.

24 Na' be'lwillgake' Chioza', che'gake':

—Chios, beṇ' nak Xannto', li' nombi'o yichjlall'do' yog' beṇ'. Bliyi neto' no beṇ'ki chop ba wlejo'

25 kwenche gake' neto' txen naknto' postl, la' Juda' ba bnite' daa ndolee yel' wen dii mal che'na' na' ziyaje' latja' gana' chidolee.

26 Na'ch bengake' to wyitj kwenche wṇezgakile' noran ba wlej Chioza', na' bidol' Matíaza', na' wlene' postlka' shnej.

2

Ka bid Espíritu Sántona'

1 Na' ka bllin lla gol' lni Pentecostéza', yog' beṇ'ka' chonlilall'gake' Jesúza' tozga ndop nllaggake'.

2 Na' tokonganzi bengakile' to sshag ka ga za' to be' wal, za'n yabalə na' wniṇ doxen loo yoonə' gana' lle'gake'.

3 Na'ch ble'gakile' dii nak ka beṇ'yi' chal'ninan, na' yog'ze' zen yichje'ka'.

4 Na' Espíritu Santo che Chioza' wyo'e loo yichjlall'do' to toe', na' wzologake' wṇegake' wde wdeli dill', kon ka goklall' Espíritu Sántona' ine to toe'.

5 Na' lo llana' beṇ' zan beṇ' Israelka' lle' Jerusalénna' choe'la'ogake' Chioza', no beṇ' zaak wde wdeli yell dii lle' yell-lioni.

6 Na' ka bengakile' sshaga' daa chak, na' bdop bllaggake' gana' chak ka'. Na' gokllej gokgāgakile' ka biyombia'gake' xtilleeka' daa chṇe beṇ'ka' lle' na'.

7 Na' le chibangakile', na' che' ljwelle':

—¿Aaga beṇ' Galilea yog' beṇ'ki choe' dill'ki?

8 ¿Nakra chak chakzgake' dill'ka' chṇe to tocho, lla?

9 La' ni zoa beṇ' Partia, beṇ' Media, beṇ' Elam, beṇ' Mesopotamia, beṇ' Judea, beṇ' Capadocia, beṇ' Ponto, beṇ' Asia,

10 beṇ' Frigia na' Panfilia, beṇ' Egipto na' zi bale' beṇ' África, beṇ' zaak gaozə yell Cirénena', na' lekzka' len beṇ' za' Rómana'te. Balcho nakcho beṇ' Israel, na' zi balcho choncho beṇ' Israelki txen.

11 Na' lekzka' zoa beṇ' Creta na' beṇ' Arabia. Na' yog'techo chenicho chṇe beṇ'ki xtill' to tocho, choe'gake' dill' che dii wenka' ba ben Chioza', diika' chonan ka yibanicho.

12 Na' yog' beṇ'ka' bdop bllag na', bibangakile' na' gokllej gokgāgakile'. Na' che' ljwellgake':

—¿Bi zejín dga, lla?

13 Na' bale' wṇelegakile' legake', nagake':

—Zolli beṅ'kin.

Daa goll Pédrona' beṅ'ka' bdop bllag

¹⁴ Na'ch Pédrona' wzechaile' len postlka' zi shnej, na' wṅie' zillj chi'e beṅ'ka' ndop nllag na':

—Le' beṅ' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyeṅ' dga inia' le'.

¹⁵ Beṅ'ki nak' txen aga zollgakilen' ka chza'lall'zle, la' shzilgaz naa.

¹⁶ Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

¹⁷ Kat' ba zoa illin lla te che yell-lioni,

nad' Chios wi'a Espíritu cha'na' soe' loo yichjlall'do' beṅ'ka' lle' zbii zkaan yell-lioni.

Na' gon' kwenche xiinleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib',

na' beṅ' golka' inegakile' yel.

¹⁸ Na' ka'kzə wi'a Espíritu cha'na' yog' beṅ'ka' choe'la'ogake' nad' llana' gak ka', ka beṅ' byo ka noolə,

na' we'gake' dill'ka' wxoa' cho'a lolleeka'.

¹⁹ Na' xan yabana' wli'a dii gonan ka yibani beṅ',

na' ka'kzə lo yell-lioni

wli'gakidee chen, na' yi', na' llen.

²⁰ Wbilla' bich wzeeni'n,

na' bewaa yiyakan xna ka chen

ka zi' illin lla choo lla xen che Xanchona'.

²¹ Na' nottez beṅ' inabile' Xancho Chioza' gaklene'ne', na' yisle'ne' kwenche bi kwiayee.

²² 'Na' le' nakle beṅ' Israel, li wzenag dga inia' le'. Nezkzile Chioza' wleje' Jesús, beṅ' Nazareta', daa bi'ene' yel' wṅabia'na' kwenche bidylene' ladjleni dii zan yel' wak choo yel' wak xen na' bichlə dii benan ka bibani beṅ'.

²³ Na' beeni goke' lall' na'le kon ka bllia Chioza' bia' gak che', na' bəx'lene' bənlene' lo na' beṅ' malka' kwenche betgake'ne' lee yag cruza'.

²⁴ Per Chioza' bisbane'ne' ladj beṅ' wetka', na' bi bi'e latj guete' toshiizi, daa bi gok inabia' yel' wita' le'.

²⁵ Dii Davina' bi'e dill' che Jesúza' kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

²⁶ Daan le chibayi lall'dawaani na' cho'a dill' ka mbalaz zoa'.

Na' beli chen cha'ni nonan lez yibanan,

²⁷ la' aga wsanlalloo nad' toshiizi ladj beṅ' wetka',

ni bi wi'o latj gooll' iteb beli chen cha'ni daa nak' lall' no'.

²⁸ Ba bliilo' nad' nakan nak neza' sho'a kwenche gat'ch yel' mban cha',

na' yiba yizakid' daa soalen' li' toshiizi.

²⁹ 'Le' beṅ' bish', nezkzicho dii xoxzto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'.

³⁰ Na' dii Davina' bi'e dill' diika' goll Chioza' le', na' wnezile' kwin Chioza' bchebe' wzoe' to xiin dia' che' inabi'e.

³¹ Chioza' bliile' dii Davina' diika' zi' gak che Crístona', na' bi'e dill' yibane' ladj beṅ' wetka' ka wne' aga wigaane' ladj beṅ' wetka' na' ni bi gooll' iteb beli chen che'na'.

³² Na' ka' gok, Chioza' bisbane' Jesúza' ladj beṅ' wetka', na' yog'nto' ble'into'ne' na' choe'nto' dill' bibane'.

³³ Na' ka biyoll bigoyoe'ne' yabana' na' wlekwe'ne' kwite' de shlina', bene' lo nee bselee Espíritu Sántona' ladjnto'ni ka bchebe'. Na' Espíritu Sántona' ba bene' yog' dga ba ben ble'ile naa.

³⁴ Bi gakile dii Davinan' biyep'e yabana', la' kwine', wne':
 Xancho Chioza' golle' Xan'na':

“Wche' kwit' de shli ni

³⁵ shlak wzoa' xni'ona' ben'ka' chakzbani li.”

³⁶ 'Na' nia' le', yog'cho cho' ben' Israel chiya'l' inezicho, Jesúza', beena' betle lee yag cruza', Chioza' bzoe'ne' nake' Xancho, na' len' Crístona', beena' wlej Chioza' inabi'e cho'.

³⁷ Na' ben'ka' lle' na' ka bengakile' goll Pédrona' legake' ka', le nyesh'chga gokgakile', na' wñabgakile' Pédrona' na' postlka' sto, che'gake':

—Le' ben' bish', ¿beran chiya'l' gonnto' shka'?

³⁸ Na'ch Pédrona' chi'e legake':

—To tole, li yiyaj yileni na' li choa nisa' shi ba chonlilall'le Jesucrístona', na' yiyakxen xtol'leka' na' yidsoa Espíritu Sántona' loo yichjlall'do'lena'.

³⁹ Chioza' ba bchebe' gone' le Espíritu che'na', na' len xiinleka', na' nottez ben' zit'. La' nchebe' wi'ene' yog' ben' gaxe' kwenche gonlilall'gake'ne'.

⁴⁰ Na' dii zanch dill' be'len Pédrona' legake', got'yoile' legake', chi'e:

—Li yisla kwinle lao yel' zi'na' daa ile'i ben' wen dii malka' bi chajle' che Chioza'.

⁴¹ Na' ben'ka' wyajle' daa goll Pédrona' wchoagake' nisa'; na' lo llana' shona mil ben'ka' wlengake' ben'ka' nonlilall' Jesúza'.

Ka ben ben'ka' benlilall' Jesucrístona' dii nech

⁴² Na' yog'gake' wzegake' wneyi bengake' diika' bli' bsemi postlka' legake', na' xochi wzoagake'. Na' bdop bllaggake' be'llwillgake' Chioza' na' weej wdaogake' txen.

⁴³ Na' yog'ze' bibani daa ble'gakile' yel' wak zanka' ben postlka'.

⁴⁴ Na' yog' ben'ka' chonlilall'gake' Jesúza' gokgake' toz, na' choe' ljjwelle' bi ka dii chyallji to toe'.

⁴⁵ Na' biyit' bidegake' no yell-lío, no yoo chegake' wa bichlæ dii napgake' na' choe' ljjwellgake' ka to dii chyallji to toe'.

⁴⁶ Na' yog' lla bdopgake' lesh' chyoodo'na' choe'llwillgake' Chioza', na' lekzka' bibagakile' weej wdaogake' txen lill ljjwellgake'.

⁴⁷ Na' wzoatezi wzoagake' be'la'ogake' Chioza' na' yog'zæ ben' gokbe'gakile' ka mba chongake'. Na' yog' lla, Xancho Chioza' bene' ka wyanch ben'ka' benlilall' Jesucrístona'.

3

Biyaki to ben' bi chak sa'

¹ To lla do ka chida shonæ shlle'na', ka gora' chdop chllag ben' Israelka' choe'llwillgake' Chioza', Pédrona' len Juanna' wyajgake' yoodo'na'.

² Na' cho'a puert che zeena' daa nechj yoodo'na', puert daa nsi'gake' Puert Xochi, chi' to ben' nxinj ni'ena' ka goljtie'. Na' yog' lla chjlekgake'ne' na' kwenche chñabe' karidá lao ben'ka' chdop chllag yoodo'na'.

³ Na' ka bllin Pédrona' na' Juanna' gana' chi'e, na' wñabile' legake' izangakile' lat' mech we'gake'ne'.

⁴ Na'ch Pédrona' len Juanna' bwiagake'ne', na' Pédrona' golle'ne':

—Bwiakachi neto'.

⁵ Na' beena' bwie' legake', gokile' mechan' we'gake'ne'.

⁶ Na' Pédrona' chi'ene':

—Bibi mech nap' gon' li', lete dii nap' gon' li'. Kon yel' wak che Jesucristo, ben' Nazareta', nia' li' bizolla' na' bigoo nez.

⁷ Na'ch Pédrona' wdoyoe' nee de shlina' na' bisolléene', na' lii biyakteyi ni'ena'.

⁸ Na'ch ka ben' bxit'zæ bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'.

⁹ Na' yog' ben'ka' lle' na' ble'gakile'ne' chde' choe'lawee Chioza',

¹⁰ na' billej bibangakile' daa nombia'gake'ne' chbi'e chñabe' karidá cho'a puert daa nsi'gake' Puert Xochi.

Bzajnií Pédróna' ben'ka' ndop nllag lesh' chyoodo'na'

¹¹ Na' beena' biyaki ni'ena' aga bsane' Pédróna' len Juanna', kon noe' legake'. Na' yog' ben'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor Che dii Salomón gana' zelengake' beena' biyaki.

¹² Na' ka ble'i Pédróna' ben'ka' chdop chllag na', golle' legake':

—Le' ben' Israel, ¿beraḥe chibanzile daa biyaki beeni? ¿Na' beraḥe chwiazle neto'? ¿Achakile kon yel' wak chento'nan' biyaki beeni? ¿Awa chakile daa zoanto' chonnto' ka chiyoollalli Chiozan' biyakile'? Aga daan.

¹³ Chios, beena' be'la'o dii Abrahama', dii Isaaca', dii Jacoba', na' nochlæ dii xozto'choka', len' wlo'e Xiine' Jesúza' balaan xenna', beena' benle lo na' ben'ka' betgake'ne'. Na' ka goklall' Pilátóna' yisane'ne', bi be'le latj.

¹⁴ Lwaa dii nan inable yisane' Jesúza', beena' nak liizelozi ben' li ben' shao', ben' wen xyana'læ wnable bisane'.

¹⁵ Kan' benle betle Jesúza', beena' chon yel' mban daa nak dowalj. Per Chioza' bisbane'ne' ladj ben' wetka', na' neto' choe'nto' dill' daa nezinto' bibane'.

¹⁶ Daa chonlilall'nto' Jesúzan', ba biyaki beeni chwiale na' nombia'le. Dii li, daa nonlilall'nto' Jesúzan' chwiatele ba biyakchaile'.

¹⁷ 'Le' ben' bish', nezid', ka le' na' ka ben'ka' chñabia' le', bi gokbe'ile bin benle ka betle Jesúza'.

¹⁸ Na' Chioza' bi'e latj gok ka' kwenḥe billinin ka wna dii ben'ka' wdixjee xtilleena' kani'yi, daa wngake' Crístóna' biya dii wchi' wsak' ben' le'.

¹⁹ Na' naa, li wzenag che Xancho Chioza', na' li yiyaj yileni dii malka' chonle kwenḥe yizi'xene' chele na' wzoe' le' mbalaz.

²⁰ Na' yiselee Crístóna', beena' wleje' kwenḥe inabi'e, kon ka wdixjee dii ben'ka' kani'yi.

²¹ Chonan byen yigaane' yabana' axt ka illin lla yiyonshao' Chioza' yog'lolte dii de, kon ka goll Chioza' dii ben'ka' wleje' wdixje'gake' cho'a xtilleena' kani'yi.

²² La' dii Moiséza' golle' dii xozxto'choka' dill'ki: “Xancho Chioza' kweje' sto ben' ka nad' ladjleni, ben' chixje'ile' le' bi dill' we'lene'ne'. Na' li wzenag yog' daa ine'.

²³ Na' beena' bi wzenag che', Chioza' kwej yichje'ne' na' bich gak gone' txen ben'ka' nak yell che Chioza'.”

²⁴ 'Na' yog'lol dii ben'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak diiki chak naa.

²⁵ Len', naki chele daa ba bḥeb Chioza' lao dii ben'ka' wdixjee daa golle' legake' kani'yi. Na' lekzka' naki chele dii wenna' daa bḥeb Chioza' gone' che dii xozxto'cho Abrahama', ka golle'ne': “Ni che xiin dia cho'na' gon' dii wen che yog'lol ben' lle' zbii zkaan yell-lioni.”

²⁶ Na' ka bsel' Chioza' Xiine' Jesúza', zigaate bseleene' ladjchoni kwenḥe gak wen checho na' to tocho yiyaj yilenicho dii malka' choncho.

4

Pédróna' len Juanna' gogake' lo na' ben'ka' chñabia' ben' Israelka'

¹ Na' ni choe'lente Pédróna' len Juanna' ben'ka' dill' ka bllin bxoza' len beena' ngoo lo nee ben'ka' chap yoodo'na' na' len zi bal saduceoka'.

² Le chllaagake' daa chli' chsedi Pédróna' len Juanna' ben'ka' lle' na' nakan gok biban Jesúza' ladj ben' wetka'.

³ Na'ch bex'gake' legake', na' daa ba wlle', jloogake' legake' lillyana', axt betiyoch bibejgake' legake'.

⁴ Per beṅ' zan beṅ'ka' bzenaggake' dillaa be' Pédróna' len Juanna' beṅlilall'gake' Jesúza'. Na' ka', wyanch beṅ'ka' beṅlilall'gake'ne', na' gokgake' ka do gayaa mil to beṅ' byoka'zə.

⁵ Na' betiyo bidop billag beṅ'ka' chṅabia' beṅ' Israelka' yell Jerusalénna', len beṅ' golka' chṅabia', na' beṅ'ka' chli' chsedi leya'.

⁶ Na' lekzka' len Anáza', beena' nak bṅoz choo bṅoz xen, na' Caifáza', Juanna', Alejándrona', na' nokchlə beṅ'ka' nak dialla che bṅoz choo bṅoz xenna'.

⁷ Na'ch bzegake' Pédróna' len Juanna' gchole'ka', na' wṅabgakile' legake':

—¿No lsens cheyi na' no bsel' le' chonle diiki?

⁸ Na' Espíritu Santo che Chioza' bzajniile' Pédróna' kwenche golle' legake' ki:

—Le' beṅ' wṅabia', na' le' beṅ' gol chṅabia'le yell Israeli,

⁹ chṅabile neto' ka nak dii wenna' gok che beeni, na' cheenile inezile nakan gok biyakile'.

¹⁰ Cheeninto' yog'lol-le inezile na' yog'lol beṅ' Israelka' inezgakile', beeni chwiale ze laoleni biyakile' kon yel' wak che Jesucristo, beṅ' Nazareta', beena' betle lee yag cruza', per Chioza' bisbane'ne' ladj beṅ' wetka'.

¹¹ Che Jesúzan' choe'n dill' daa nan “yaja' daa bi wyoolall'le le' nakle wen yoo, leyen'lannan' yaja' daa ba nchejcha yooná'.”

¹² Bichga zoa sto beṅ' yoblə gak yisle' cho' kwenche bi kwiayi'cho. La' kochno zoa doxen yell-lioni beṅ' ba wlej Chioza' kwenche yisle' cho'.

¹³ Le bibani beṅ' wṅabia'ka' daa chwiagake' bi blleb Pédróna' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúza' txenan chongake' ka'.

¹⁴ Na' daa ze beena' biyaki ni'ena' kwite'ka', bibi gok ye'gake' legake'.

¹⁵ Na'ch bibejgake' legake' shlak be'len ljwellgake' dill' nak koogake' xnezin.

¹⁶ Che' ljwelle':

—¿Nakra goncho che beṅ'ki? La' yog'zə beṅ' zoa Jerusalénni inezgakile' ba bengake' to yel' wak xen, na' aga wak inacho bi nakan ka'.

¹⁷ Na' kwenche bich ides dill'ka' choe'gake', chiya' kooshebchogake' kwenche kochno we'lengake' dill' che Jesúza'.

¹⁸ Na'ch goxgake' Pédróna' len Juanna' dii yoblə, na' gollgake' legake' bich wli' wsedgakile' beṅ' ni bi we'lengake' legake' xtill' Jesúza'.

¹⁹ Na' Pédróna' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'.

²⁰ Bi gak wsannto' we'nto' dill' daa ben ble'into' che Jesúza'.

²¹ Na'ch beṅ' wṅabia'ka' biya dii gollgake' legake' kwenche nan illebgake', na'ch bisan-choklagake' legake', la' bibi billet-lall'gake' gongake' daa yog'zə beṅ' choe'la'ogake' Chioza' ni che daa gok.

²² Na' beena' biyaki ni'ena' kon yel' wak che Jesúza' ba wdeile' choa yiz.

Wṅabgakile' Chioza' gaklene' legake' we'gake' xtilleena'

²³ Na' ka bisangake' Pédróna' len Juanna', biyajgake' gana' zoa beṅ'ka' nonlengake' txen na' gollgake' legake' yog' daa goll bṅozka' chṅabia' na' beṅ' golka' chṅabia'.

²⁴ Na' ka bengakile' daa gollgake' legake', na'ch gokgake' toz be'lwilgake' Chioza', che'gake':

—Chios, li' nako' beṅ' zeelo chṅabia'. Li' beno' yabana', yell-lioni, na' nido'na', na' yog'te dii de lo yell-lioni.

²⁵ Na' Espíritu Santo cho'na' bṅoe' dill'ki cho'a loll' dii Davina' kana' wne':

¿Berache chllaa chloz beṅ' yell-lioki?

¿Berache toshiizi chgoo beṅ'ki xnezin gongake' daa bi nxe bi nzak'?

26 Ben'ka' chñabia' lo yell-lioni gokgake' toz gokzbangakile' na' biñiatezgake' Xancho Chioza' len Cristona', beena' wleje' kwenche inabi'e.

27 'Dii li yell Jerusalenni Heródeza' na' Poncio Pilátona', len ben' zit'ka' na' ben' Israelka', bdop bllaggake' gokgake' toz goklall'gake' wlliyi'gake' Jesúsza', beena' nak liizelozi ben' li ben' shao', beena' wlejo' kwenche inabi'e.

28 Na' daa bengake' ka', gok ka bllio' bia'.

29 Na' naa Chios, bwia ka ngoosheb ben' wñabia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'.

30 Bli' yel' wak cho'na' kwenche yiyaki ben' bi shao' na' kwenche gonnto' bichlæ dii yibani ben' kon yel' wak che Xiño' Jesúsza', beena' nak liizelozi ben' li ben' shao'.

31 Na' ka biyoll be'llwillgake' Chioza', wxo' wñib latja' gana' ndop nllaggake', na' wñabia'chga Espíritu Sántona' legake' na' bi bllebgake' we'gake' cho'a xtil' Chioza'.

Daa de che to toe' benin che yoguee

32 Na' yog' ben'ka' ba chonlilall' Jesúsza', toz ka gok yichjlall'do'eka'. Na' yog' daa de che to toe', benin che yoguee. Ni toe' bi wna: "Cha' dga."

33 Na' postlka', kon yel' wak xen che Chioza', be'chgake' dill' che Xancho Jesúsza' daa bibane' ladj ben' wetka', na' Chioza' dii xen goklene' yog'lolé'.

34 Na' ni toe' bibi byallji, la' beena' de yell-lío che' wa lille' na' chiyiteen, na' mecha' daa choxee cheyin

35 cho'en postlka' kwenche choe'gake' kon ka'k' wej chyallji to toe'.

36 Na' wzoa to ben' Chipre lie' José. Nake' dia che dii Levína', na' postlka' bsi'gake'ne' Bernabé, na' zejín witip lall' ben'.

37 Na' Joséni biyitee to yell-lío dii nape', na' mecha' bi'en postlka'.

5

Ananíaza' na' Safirana' wxiye'gake'

1 Na' wzoa to ben' wlie' Ananías, na' xoole'na' wlie' Safira, na' biyit'gake' shkwe' yell-lío che'ka'.

2 Na' Ananíaza' len xoole'na' gokgake' toz bkwaangake' lat' mecha' na' bentezgake' ka be' doxenan postlka'.

3 Na'ch Pédróna' gollene':

—Ananías, ¿berache be'zo' latj wñabia' Satanáza' yichjlall'do'na' na' chakilo' siyoo Espíritu Sántona' daa bgaanleno' lat' mecha' daa wdixjgake' che yell-lío cho'na'?

4 Cho' yell-liona' kana' zi' yiyitooon, na' cho' mecha' daa be'xoo cheyin ka biyitooon. ¿Berache wloolzæ yichjlall'do'na' siyoo? Aga ben' yell-lionin chziyoo, san Chiozan' cheenilo' siyoo.

5 Na'ch ka beni Ananíaza' daa goll Pédróna', to ka billeeze' wite'. Na' le blleb yog' ben'ka' wñezi ka gok che'.

6 Na' bllin to chop bi' wew' gana' chtoł Ananíaza', na' bitobgakbee to lech' na' jakwash'gakbee.

7 Na' gok ka do shon gor ka bllin xoole'na', aga ñezile' bin ba gok che ben' che'na'.

8 Na' wñabi Pédróna'ne', chi'ene':

—Wnashki nad', ¿aka to nakz ben' cho'na'n biyit'le yell-lío chelena'?

Na' Safirana' chi'ene':

—Awe, ka't'kzan biyit'nto'n.

9 Na'ch che' Pédróna'ne':

—¿Berache benzle toz dill' kon ben' cho'na' chakile wak siye'le Espíritu che Chioza'? Cho'a yooni ba ziza' bi'ka' jakwash'gakb' dii ben' cho'na', na' naa lljakwash'gakb' li'.

¹⁰ Na' lii billeete Safírana' wite' lao Pédróna'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii beṅ' che'na'.

¹¹ Na' le bllēb beṅ'ka' nonlilall' Jesucrístoná' len yog' beṅ'ka' wṅezi ka gok che dii Ananíaza' na' dii Safírana'.

Postlka' bengake' dii zan yel' wak

¹² Na' postlka' bengake' dii zan yel' wak na' bichlā dii chonan ka yibani beṅ' ladj beṅ'ka' lle' Jerusalénna'. Na' yog' beṅ'ka' chonlilall' Jesúsza' chdop chllaggake' loo koridor che yoodo'na' daa le Koridor che dii Salomón.

¹³ Na' nochlā beṅ'ka' aga biyaxjgakile' gongake' legake' txen, la'kzi le ble'shiigakile' legake'.

¹⁴ Na' beṅ' zan, ka noolā ka beṅ' byo, beṅlilall'gake' Xancho Jesúsza'.

¹⁵ Na' chyixjgake' tnezka' beṅ'ka' bi shao', nxoogake' legake' no lo yagla' na' no lo daa, kwenche kat' te Pédróna' la'ch' bṅen che'na' ten gana' degake' na' yiyakgakile'.

¹⁶ Na' lekzka' zan beṅ' yellka' lliá gaozə Jerusalénna' chajgake' lao postlka' chjwa'gake' beṅ' che'i yillwe' na' beṅ' yoo dii xiw'ka'. Na' yog' lołzgake' chiyaki.

Wloogake' postlka' lillyana'

¹⁷ Na'ch bṅoz choo bṅoz xenna' na' saduceoka', beṅ'ka' nakgake'ne' txen, gokxee gokzbangakile' postlka'.

¹⁸ Na'ch beṅ'gake' postlka' na' wloogake' legake' lillyana'.

¹⁹ Na' wała' bllin to anjl che Xancho Chioza' bsalje' lillyana' na' bibeje' legake', na' golle':

²⁰ —Li yiyaj yoodo'na', na' li wzajni beṅ'ka' chdop chllag na' doxen ka nak yel' mban zejli kaṅi daa we' Chioza' legake'.

²¹ Na'ch ka wyeeni', biyajgake' yoodo'na' ka goll anjla' legake', na' bli' bsedgakile' beṅ'ka'.

Na'ch bṅoz choo bṅoz xenna' na' beṅ'ka' nakgake'ne' txen bitopgake' yog'loł beṅ'ka' chṅabia' yell Israela', na' bsel'gake' beṅ' kwenche nan lljxi'gake' postlka' de lillyana'.

²² Na' ka bllin beṅ'ka' chap yoodo'na' cho'a lillyana', kochno postlka' de na'.

²³ Na'ch jayellgake' beṅ'ka' chṅabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to beṅ' bi yoo lo'inna'.

²⁴ Na' beena' ngoo lo nee beṅ'ka' chap yoodo'na', len bṅozka' chṅabia', ka bengakile' che'gake' ka', na' gokgakile' gate yiyoll yido dga.

²⁵ Na' ni choe'tegake' dill', bllin to beṅ' chi'e legake':

—Beṅ'ka' wloole lillyana' lle'tgake' yoodo'na' chli' chsedgakile' beṅ'ka' lle' na'.

²⁶ Na'ch wyaj beṅ'ka' chap yoodo'na' kon beena' chṅabia' legake' jaxi'gake' postlka' xochi. Bibi bengakile' legake' daa bllēbgake' shi beṅ'ka' chzenag chegake' wliagake' legake' yaj.

²⁷ Na' ka billinlengake' postlka' lao beṅ'ka' chṅabia' yell Israela', na' bṅoz choo bṅoz xenna' chi'e legake':

²⁸ —¿Abi chajle'kzlen nanto' le' bich wli' wsedzile beṅ' xtil' Jesúsza'? Na' li wwia ka ba benle, ba bli' bsedile yog' beṅ' Jerusalénki cho'a xtilleena', na' cheenile wtobile neto' daa betgake'ne'.

²⁹ Na'ch Pédróna' len postlka' sto che'gake':

—Chonchan byen wzenagnto' che Chioza' aga ka che beṅ' yell-lioni.

³⁰ Le' betle Jesúsza' na' bda'lene' lee yag cruza'. Na' Chios, beena' be'la'o dii xoxto'choka', le' bisbane'ne' ladj beṅ' wetka'.

³¹ Na' Chioza' ba mbeke'ne' kwite' de shlina' gana' ba chi'e chṅabi'e, na' nzoe'ne' kwenche yisle' beṅ' lao dii mala', la' cheenile' yog' beṅ' Israelki yiyaj yilēni dii malka' chongake' kwenche yizi'xen Chioza' chegake'.

³² Na' neto' choe'nto' dill' daa ble'into' gok che Jesúza', na' daa betj Espíritu Sántona', beena' ba bzoa Chioza' loo yichjall'do' yog' ben' chzenague' che', lekzka' chli'n nakan ka nannto'.

³³ Na' ka beni ben' wñabia'ka' daa goll postlka', le bllaagake' na' goklall'gake' witgake' legake'.

³⁴ Na' ladj ben'ka' chñabia' len to fariseo, ben' le Gamaliel, ben' chli' chsedi leya', na' yog'z ben' chle'shi'gakile'ne'. Na' wzollee, golle' legake' kweygake' postlka' xtit chyoolə,

³⁵ na' golle' ben' wñabia'ka':

—Le', ben' Israel, li wsak' shi bin gonile ben'ki.

³⁶ Li lljadini kani batz bchej to ben' le Teudas, na' wne' nake' to ben' zakii, na' ka do tap guioa ben' bengake'ne' txen. Na' ka betgake'ne', yog' ben'ka' gokgake'ne' txen biyeslesgake', bich bi bengake'.

³⁷ Na' ka wde gok ka', wizak dii yoblə kana' chlabgake' bal ben' lle' to to yell, na' bizchej Judas ben' Galileana', na' ka'kzə ben' zan bengake'ne' txen. Na' lekzka' betgake'ne' na' biyesles ben'ka' gokgake'ne' txen.

³⁸ Na' naa, nia' le' bibi gonile ben'ki, la' ka nak dga chli' chsedgakile', shi nakan dii chyiljall'zgake' winitlokzan.

³⁹ Na' shi nakan che Chios, aga wak yisol yinitlen. Chiyal' wwiayen'le kwenche bi gakkil-lenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtil' Jesúza'. Na' biyolla' bisangake' legake'.

⁴¹ Na'ch bichej postlka' gana' ndop nllag ben'ka' chñabia', na' le chibagakile' daa be' Chioza' latj bchi' bsak' ben'ka' legake' daa choe'gake' xtil' Jesúza'.

⁴² Na' yog' lla postlka' bli' bsedgakile' xtil' Jesucristona' yoodo'na' na' lill ben'.

6

Wlejkake' gall ben' gak lall' nagake' mandadka'

¹ Na' ka zej chanch ben'ka' chonlilall' Jesúza', ben'ka' chne dill' griegona' wzolo che'gake' aga chaklebi ikaa noolə wizebka' chne dill' griegona' ka to daa chkaa nool wizebka' chne dill' hebrewa' kat' chyisgake' ye' wawa' yog' lla.

² Na'ch postlka' shlin bti'agake' yog' ben'ka' chonlilall' Jesúza', na' che'gake':

—Bi gak wsannto' chixje'nto' cho'a xtil' Chioza' kwenche kooz lo nanto' we'nto' dii yeej gao ben'.

³ Na' le' ben' bish', li kwejk gall ben' ladjleni, ben' chon wen, ben' chajni, na' chñabia' Espíritu Sántona' legake'. Na' gak lall' na'gake' chisgake' ye' wawa'.

⁴ Na' neto' we'l-lall'chnto' we'llwillnto' Chioza' na' wli' wsedchinto' ben' cho'a xtilleena'.

⁵ Na' yog'z ben'ka' biyoolall'gake' ka goll postlka', na' wlejkake' beena' le Esteban, nake' ben' nonlilall'chgue' Chioza' na' chñabia' Espíritu Sántona' le'. Na' lekzka' wlejkake' Felípena', Prócorona', Nicanora', Timónna', Parménaza', na' Nicoláza', ben' Antioquíana', beena' bene' txen ben' Israelka'.

⁶ Na' jwa'gake' legake' gana' lle' postlka', na' postlka' bxoə neeka' yichje'ka' na' wñabgakile' Chioza' gaklene' legake'.

⁷ Na' ben' zanch beni cho'a xtil' Chioza' na' wyanchga ben'ka' benlilall'gake' Jesúza' Jerusalenna', na' zan bxozka' bzenaggake' na' benlilall'gake' Jesúza'.

Bex'gake' Estébanna'

⁸ Na' Estébanna', wzoalenchga ye' wak che Chioza' le', na' dii xen goklene'ne' kwenche bli'e ye' wakka' na' bichlə dii chonan ka yibani ben'.

⁹ Na'ch lle' shkwen beṅ' Israelka' ba biyell bila' lo na' beṅ'ka' wxi' legake', na' non cheləgake' chdop chllaggake' gana' choe'lwillegake' Chioza'. Na' gokgake' toz baḷ beṅ' Cirene, beṅ' Alejandría, beṅ' Cilicia, na'ch beṅ' zaak do Ásiana', gokdil-lengake' Estébanna'.

¹⁰ Na' aga gokgake' yel' sin' che Estébanna', daa chñie' kon ka che' Espíritu che Chioza'ne'.

¹¹ Na' wdixjgake' baḷ beṅ' kwenche wxiye'gake', che'gake': “Ba beninto' Estébanna' chñie' zban che dii Moiséza' na' che Chioza'.”

¹² Na' daa gollgake' ka', bta bñegake' beṅ' zan, len beṅ' golka' chñabia' na' beṅ'ka' chli' chsedi leya' kwenche bex'gake' Estébanna' na' jwa'gake'ne' lao beṅ'ka' chñabia' beṅ' Israelka'.

¹³ Na' wdiljhgake' beṅ'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'.

¹⁴ Na' ba bizeninto' chizne' Jesús, beṅ' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

¹⁵ Na' yog' beṅ'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

7

Estébanna' bi'e dill' lao beṅ' wñabia'ka'

¹ Na'ch bəoz choo bəoz xenna' wñabile' Estébanna', chi'ene':

—¿Alekzi beṅ'ki ka chono'n?

² Na' Estébanna' chi'e legake':

—Le' beṅ' bish' na' le' nakle ka xanto', li wzenag dga inia' le': Chios chechona', beena' liizelozi nak beṅ' choo beṅ' xen, bli'lawe' dii xozxto'cho Abrahamana' kana' zoe' yell-liona' mbani Mesopotámiana', kana' zi' shaje' yell Haránna'.

³ Na' Chioza' golle'ne': “Bkwaan yell cho'ni na' dialla cho'ka', na' wyaj yell-lío gana' wliid' li'.”

⁴ Na'ch dii Abrahamana' bcheje' gana' mbani beṅ' caldeoka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho naa.

⁵ Na' Chioza' bi bene' lo na' dii Abrahamana' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi' che dii Abrahamana' ba zoa ka golle'ne' ka'.

⁶ Na' lekzka' Chioza' chi'ene' xiin dia che'ka' soagake' yell zit' na' inabia' beṅ'ka' legake' wgongake' legake' llinna', na' wsak'zi'gake' legake' tap guiyoa yiz.

⁷ Na' lekzka' Chioza' golle'ne': “Gon' yel' zi' che beṅ'ka' wchi' wsak'gake' legake', na' yiyolla' yiza'gake' lall beṅ'ka' na' yiyedgake' ni, na' we'la'ogake' nad'.”

⁸ Na' ka bcheb Chioza' gone' dii wen che dii Abrahamana', golle'ne' chiya' sho'e senna' daa le circuncisión, le' na' xiin dia che'na'. Daan, dii Abrahamana' wlo'e dii xiine' Isaaca' senna' ka gok xon' lla goljb', na' ka'kzə ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shllin, beṅ'ka' gok dii xozxto'cho, cho' beṅ' Israel.

⁹ Na' beṅ'ka' nak xiin dii Jacoba', gokxe'gakile' dii Joséna', beena' nak beṅ' bish'gake', na' bet'gake'ne' wxi' beṅ' Egíptoka'ne'. Per Chioza' wzoalene' dii Joséna',

¹⁰ na'ch bisle'ne' lao yog'loḷ dii ben ble'ile'. Na' bi'ene' yel' sin' kwenche faraónna', beena' chñabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

¹¹ Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xozxto'choka'.

¹² Na' ka wñezi dii Jacoba' de trígonana' Egíptona', na' bselee bi' che'ka', beṅ'ka' gok dii xozxto'cho, jxi'gake'n.

¹³ Na' ka wyajgake' de wchopi, dii Joséna' golle' legake' nan len' nake' beṅ' bish'gake', na'ch bembia' faraónna' dialla che dii Joséna'.

14 Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'.

15 Kan' gok jsoa dii Jacoba' Egíptona' gana' wite', na' lekzka' na' wit xiine'ka', ben'ka' gok dii xozxto'cho.

16 Na' jakwash'gake' legake' loo bana' daa bizi' dii Abrahama' yell Siquema' che xiin beena' le Hamor.

17 'Na' ka ba zoa gao gon Chioza' daa bchebe' gone' che dii Abrahama', ba wyanchga xiin dia che dii Israela', ben'ka' lle' Egíptona', ben' zan wal ba nakgake'.

18 Na'ch bllin lla wzolo wñabia' sto ben' yoblə yell Egíptona', ben' bi bembie' dii Joséna'.

19 Na' ben' wñabia'na' wxiyee ben' wlall chechoka' na' biya dii bchi' bsakee dii xozxto'choka', na' bene' byen ljchoongake' bdo'do' che'ka' kwenche guetgakk'.

20 Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'.

21 Na' ka bich gok kwkash'gake'b' lille'ka', benan byen jchoongake'b' kwenche nan guetb'. Na'ch noola' nak xiin faraónna' billelile'b' na' bikeeb' na' bisgole'b' ka xiine'.

22 Ka' gok bsd dii Moiséza' yog'lol yel' sin' che ben' Egíptoka' na' bi'e dill' zakii na' leyi bene' dii zakii.

23 'Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wlall che'.

24 Na' ka ble'ile' to ben' Egipto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'.

25 Na' goki dii Moiséza' ben' wlall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'.

26 Na' betiyo ble'ile' chop ben' wlall che', ben' Israel, chdilgake'. Na' gokile' yizoe' legake' wen, na' chi'e legake': "¿Berache chdil-lenzə ljwell-le?, aga ne' ben' bishee til-lene'."

27 Na'ch beena' chit chiyine' ben' wlall che'na' blliguae dii Moiséza' na' chi'ene': "¿No bzoa li' inabi'o neto' na' koo xnezi chento'ni?"

28 ¿Alezkza' cheenilo' wito' nad' ka beto' ben' Egíptona' daa neji?"

29 Na' daa goll beeni ka', dii Moiséza' bxonje' na' jsoe' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

30 'Ba gok choa yiz zoe' na', ka bli'lao to anjl le' to lo yag yesh' dii chal'nin, zoan gana' bibi chashj chleb gaoz Yaa Sinaína'.

31 Na' le bibani dii Moiséza' daa ble'ile' daa, na' wbiguae kwenche bwiayenee kwaslol. Na'ch benile' shii Xancho Chioza', chi'ene':

32 "Nadaan nak' Chios, beena' be'la'o dii xozxto'ka', Abrahama', Isaaca' na' Jacoba'." Na'ch dii Moiséza' le bllebe' axt chxiztite', na' aga biyaxjchile' wwie'.

33 Na'ch Xancho Chioza' golle' dii Moiséza': "Blechj xelo'na', la' nad' zoa' latji gani zio', na' aga ka nla'z no se ni.

34 Nad' ba ble'id' yel' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidoloo yiselaa Egíptona'."

35 'Na' Chioza' bseleene' kwenche yisle' ben' wlall che'ka' lo na' ben' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'nin.

36 Na' dii Moiséza' bene' zan yel' wak diika' ben ka bibani ben' Egíptoka' kana' bibeje' dii xozxto'choka' lalle'ka'. Na' bene' yel' wak loo niso'da' le Nisdo' Xna, na' lekzka' latja' gana' bibi chashj chleb gana' wdagake' choa yiz.

37 Na' golle' dii xozxto'choka': "Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'."

³⁸ Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.

³⁹ Na' dii xozxto'choka' aga goongakile' wzenaggake' che dii Moiséza', bzoatezgake'ne' ka'lə na' goklall'gake' yiyajgake' Egíptona'.

⁴⁰ Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'."

⁴¹ Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'.

⁴² Na'ch Chioza' wlej yichje' legake' na' bi'e latj be'la'ogake' beljka' lia xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan:

Le', ben' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

⁴³ Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele,

na' be'la'ole belj che chios chele Refánna',
diika' benlilall'le.

Na' ni cheyi diikin kwej' le' lall-leni, na' wselaa le' zit' walch aga ka yell Babilóniana'.

⁴⁴ Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'.

⁴⁵ Dii xozxto'choka' bigaanlengake' yoodo' de lechaa, na' bia'gake'n ka wyajlengake' dii Josuéna' jtíl-lengake' yellka' ben Chioza' lall' na'gake', na' bgaan lallchoni axt ka bllin lla wñabia' dii Davina'.

⁴⁶ Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wñabile'ne' wi'e latj gone' to lill xlatje'.

⁴⁷ Per Salomónna'lə, beena' nak xiine', bene'n

⁴⁸ La'kzi Chioza', beena' nak liizelozi ben' choo ben' xen, bi zoe' to loo yoo dii chon ben' yell-lioni. La' ka wna dii beena' wdixjee daa goll Chioza'ne' kani'yi:

⁴⁹ Yabana' nakan gana' chi'a chñabi'a,
na' lo yell-liona' nzoa' ni'ani.

¿Nakran chakile gonle yoona' gana' soa'?, na Xanchona'.

¿Achakile chyallj ga yizi'lallaa?

⁵⁰ ¿Abi chwiale nadaan ben' yog'lol dii de?

⁵¹ Na'ch Estébanna' chi'e ben'ka' lle' na':

—Le ben' yichjlall'do' wal nakle. Bi chzenagle che Chioza' na' chonle ka ben' bi nombia' Chioza'. Nakle ben' widenag ka gok dii xozxto'choka'. Bikzə chzenagle che Espíritu Sántona'.

⁵² Dii xozxto'choka' bchi' bsak'gake' yog' dii ben'ka' wdixjee daa goll Chioza' legake' kani'yi. Betgake' ben'ka' be' dill' nan Chioza' wselee beena' zeelo nak ben' li ben' shao'. Na' ka bide na' bénlene' lo na' ben'ka' betgake'ne'.

⁵³ La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴ Ka beni ben'ka' daa goll Estébanna' legake', le bllaagake' axt chaoyaaxaxj leye'ka'.

⁵⁵ Na' Estébanna', chñabia'chga Espíritu Sántona' le', na' blis lawe'na' yabana' ble'ile' yel' chey cheeni' che Chioza', na' ble'teile' ze Jesúsza' kwit de shli che Chioza'.

⁵⁶ Na'ch golle' legake':

—ǰLi wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shlina'.

⁵⁷ Na' ben'ka' lle' na' bsej nague'ka' kwenche bi bengakile' xtilleena', na' de chosyaadi-azgake' bex'gake'ne'.

⁵⁸ Na' wlejgake'ne' yell Jerusalénna' jalliagake'ne' yaja'. Na' ben'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan.

⁵⁹ Na' ka chlliagake'ne' yaja', be'lwille' Jesúza', chi'ene':

—Jesús, li' nako' Xan', bizi' bikaagach nad'.

⁶⁰ Na' biyoll wne' ka', na' bchek' xibe'na' na' wnie' zillj, wne':

—Xan', wxi'xen che ben'ki dga chongakile' nad'.

Na' biyoll wne' ka' wite'.

8

Sáulona' bchi' bsakee ben'ka' choe'la'o Jesúza'

¹ Na' Sáulona' goke' toz ben'ka' betgake' Estébanna'.

Na' lo llana'tez wzolo bchi' bsak'gake' yog' ben'ka' nonlilall' Jesúza' Jerusalénna'. Na' wislesgake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'.

² Na' to chop ben' nonlilall' Jesúza' jakwash'gake' dii Estébanna' na' le wchellgakile'ne'.

³ Na' Sáulona' bchi' bsakee ben'ka' nonlilall' Jesúza', chaje' lill che chegake' chjtoyoe' ka nool ka ben' byo kwenche chgwee legake' lillyana'.

Be'gake' dill' wen dill' kob che Crístona' gana' mbani Samáriana'

⁴ Na' ben'ka' bllesh Jerusalénna' be'gake' dill' wen dill' kob che Crístona' gatteza wyajgake'.

⁵ Na' beena' le Felipe, wyaje' to yell xen che Samáriana' na' be'lene' ben'ka' dill' che Crístona'.

⁶ Na' bdop bllag ben', na' yog'lolgake' bzenagyen'gake' dill' daa be' Felípena', daa ble'gakile' yel' wakka' chone'.

⁷ Na' ben' zan bichej dii xiwaa, na' ka bichejgakan chosyaadiagakan. Na' lekzka' biyone' zan ben' net ni'a nee, na' ben' bi chak sa' wen.

⁸ Na' daa gok ka', le biba bizaki ben'ka' lle' yella'.

⁹ Na' lekzka' yella' wzoa to ben' willa' lie' Simón, na' kon yel' willa'na' chone' chziyee ben' doxen gana' mbani Samáriana', na' ben kwine' ben' choo ben' xen.

¹⁰ Yog' ben' lle' na' chzenaggake' xtilleena', ka bi' xkwid' ka ben' gol, na' nagake':

—Beenin nsi'gake' Yel' Wak Choo Yel' Wak Xen che Chios.

¹¹ Na' le wyajle'gake' che', la' zan yiz ba gok chziyee legake' kon yel' willa'na' daa chone'.

¹² Na' ka bzajnii Felípena' legake' dill' wen dill' kob che yel' wñabia' che Chioza' na' che Jesucrístona', na' ben' zan wyajle'gake' xtilleena' na' wchoagake' nisa', ka noolə ka ben' byo.

¹³ Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yel' wakka' daa chon Felípena'.

¹⁴ Na' ka wñezi postlka' lle' Jerusalénna' ba chajle' ben' Samáriaka' cho'a xtill' Chioza', na' bsel'gake' Pédrona' len Juanna' Samáriana'.

¹⁵ Na' ka bllingake', be'llwillgake' Chioza' wñabgakile'ne' soa loo yichjlall'do' ben' Samáriaka' Espíritu Sántona'.

¹⁶ La' bin' soa' Espíritu Sántona' loo yichjlall'do'eka'. Tochga ba wchoagake' nisa' daa chajle'gake' che Xancho Jesúza'.

¹⁷ Na'ch Pédrona' len Juanna' bxoə neeka' yichj ben'ka', na' jsoa Espíritu Sántona' loo yichjlall'do'eka'.

18 Na' ka gokbe'i Simónna' jsoa Espíritu Sántona' loo yichjall'do' ben'ka' biyoll bxõa na' postlka' yichje'ka', na' bshabile' legake' mech,

19 chi'e:

—Li gon̄ nad' yel' waki kwenche nottez ben' ka wxõa' na'ki yichje'ka' soa Espíritu Sántona' loo yichjall'do'eka'.

20 Na'ch Pédrona' golle'ne':

—Kwiayi'lenshgo' xmecho'na', daa chakilo' wak si'leno'n daa choñ Chioza' ka'z.

21 Bikz ga gak gono' ka nak dga chonnto', la' bi nak yichjall'do'na' ka cheeni Chioza'.

22 Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'.

23 La' nakbia'cha bin nxe bin nzak' nak loo yichjall'do'na', na' lennan' ntakw nchejan li'.

24 Na'ch che' Simónna' legake':

—Li we'lwillgach Chioza' ni cha' kwenche bi gak daa ba wnale gak cha'.

25 Na' ka biyoll be' Pédrona' na' Juanna' cho'a xtill' Chioza', na' biza'gake' ziyajgake' Jerusalénna'. Na' ka zingogake' nez, be'gake' dill' wen dill' kob che Jesucrístona' zan yellka' gana' mbani Samáriana'.

Felípena' na' ben' Etiopíana'

26 Na'ch to anjl che Xancho Chioza' wñie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

27 Na' wza' Felípena' zeje', na' tneza' billague' to ben' Etiopía wyaje' Jerusalénna' je'lawee Chioza'. Na' nake' to eunuco,* ben' zakii, na' nak lall' nee mech che noolə wñabia' che Etiopíana' beena' le Candace. 28 Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi.

29 Na'ch Espíritu che Chioza' chi'e Felípena':

—Jabig' kwit karreta'.

30 Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

31 Na'ch ben' Etiopíana' chi'e:

—¿Nakra gon' shajniida'n?, la' bi zoa no wzajni nad'.

Na' golle' Felípena':

—Wyepgach na' wche' kwitii.

32 Na' Cho'a Xtill' Chioza' gana' chlabe' nan:

Betgake'ne' ka chite' to xil'do';

na' ka to xil'do', ba bi chosyaa kat' chshibe'b,

ka'kz le', ni shcho'a dill' bi wñie'.

33 Na' bsi'gake'ne' yel' zto', na' aga no goklen le' gone' yel' joschis che'.

Na' kono xiin dia che wzoa,

la' bsol bnitgake' yel' mban che'na'.

34 Na'ch ben' Etiopíana' chi'e Felípena':

—Ben goklen wna nad', ¿nora cheyin wna dii Isaíaza' ka'? ¿Ache kwinen' cho'e dill', anti che ben' yoblan?

35 Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúza'.

36 Na' ka bllingake' to ga lliia nis, na' che' ben' Etiopíana' Felípena':

—Ni lliia nis, ¿ade daa wsej wllonan choa' nisa'?

* 8:27 Eunuco: zejin ben' wlelgake' xshitin wa ben' bibi nsee ka chaljtie'. Bwia glosáriona'.

³⁷ Na' che' Felípena'ne':

—Shi chajli' o do yichj do lalloo, wak wchoa' li' nisa'.

Na' che' ben' Etiopíana':

—Chajli' a Jesucrístona' nake' Xiin Chioza'.

³⁸ Na' ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'.

³⁹ Na' ka bichejgake' loo nisa', Espíritu che Xancho Chioza' bichi'e Felípena' gan yoblə, na' aga ble'chi ben' Etiopíana' le', per chiba chizakile' ziyaje'.

⁴⁰ Na' Felípena' billine' yella' le Azoto, na' bidie' to to yell chyise' dill' wen dill' kob che Jesúza' axt billintie' Cesareana'.

9

Bisha' Chioza' yichjlall'do' Sáulona'

(Hch. 22:6-16; 26:12-18)

¹ Na' Sáulona' kon chde' chwall chshebe' ben'ka' nonlilall' Xancho Jesucrístona'. Chiy-
iljlallee nak gone' kwenche wite' legake'. Daan wyaje' Jerusalénna' jawie' bxoꝝ choo bxoꝝ
xenna'

² na' wnable'ne' wzeje' twej yish che to to gana' chdop chllag ben' wlall che'ka'
choe'lwllgake' Chioza' yell Damáscona', na' we'n lsens yiyilje' ben'ka' ba wyoo lo nez li
nez shao' che Jesucrístona' na' goxee legake' kwenche yichi'e legake' pres Jerusalénna', ka
noolə ka ben' byo.

³ Ka ni ngwee nez, na' ba zoa illine' yell Damáscona', tokonganzi wyeçhj to beeni' xen
wal le' dii za' yabalə.

⁴ Na' Sáulona' jchaze' lo yona' na' benile' to shii ben', chi'ene':

—Saulo, Saulo, ¿biche chchi' chsak'zo' nad'?

⁵ Na' ch Sáulona' chi'e:

—¿Nora li', ben'?

Na' ch billii beenan', chi'e:

—Nadaan Jesúza', beena' chchi' chsakoo. Na' daa chono' ka', zi' che kwinzon' chono'
na' chak cho' ka chak che goona' chilibb xisa' daa chbibe'b kwenche sa'b.

⁶ Na' ch Sáulona' axt chxiztite' daa chllebe', na' golle'ne':

—Xan', ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiyal' gono'.

⁷ Na' ben'ka' zejlengake' Sáulona' txen legatega wzegake' bibangakile' na' bllebake', daa
bengakile' chak xne, per ni to kono ble'gakile'.

⁸ Na' ch biyas Sáulona' lo yona'. Na' ka bixa' jalawe'na' aga ble'chile'. Na' ben'ka' zejlene'
txen be'gake' neena' kwenche bche'gake'ne' yell Damáscona'.

⁹ Na' shon lla bi gok ile'ile', ni bi weej wdawe'.

¹⁰ Na' Damáscona' zoa to ben' chonlilallee Jesúza' na' lie' Ananías, na' ben Xancho Jesúza'
ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

¹¹ Na' Xanchona' chi'ene':

—Wyaj, na' wyoo neza' daa le Shlichə, na' lill Júdaza' inabo' to ben' Tarso, ben' le Saulo.
Ba choe'lwille' nad',

¹² na' ba ble'do'ile' li' choo gana' zoe' na' chxoə noona'ne' kwenche yile'ile'.

¹³ Ka beni Ananíaza' chi'ene' ka', na' golle'ne':

—Xan', ze xtill' beena' chsak'zi'e ben'ka' nonlilall' li' Jerusalénna'.

14 Na' naa ba blee ni noxee yish daa bzej bxooska' chnabia' daa cho'en lsens goxee yog'lolnto', neto' choe'lwilnto' li', na' yichi'e neto' pres Jerusalenna'.

15 Na' Xancho Jesúsza' golle'ne':

—Wyaj, la' ba wlej' Sáulona' kwenche wi'e xtillaana' lao ben'ka' bi nak ben' Israel, na' lao ben' wñabia' che'ka', na' lekzka' laole le' nakle ben' Israel.

16 Nad' wliidee ka chiyal' si' sakee ni cha'.

17 Na'ch Ananíaza' wyaje' gana' zoa Sáulona' na' wyo'e loo yoona', na' bxooska' neena'ne'. Na' chi'ene':

—Saulo, ben' bish', Xancho Jesúsza', beena' wñie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjall'do'na'.

18 Na' ka bxooska' neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'.

19 Na' ka wdawe', biyakshao'lallee, na' bigaanlene' ben'ka' nonlilall' Jesúsza' yell Damáscona' zan lla.

Be' Sáulona' xtill' Chioza' yell Damáscona'

20 Na' lii wzolote Sáulona' cho'e xtill' Crístona' to to gana' chdop chllag ben' Israelka' choe'lwilgake' Chioza' yell Damáscona', na' chi'e ben'ka' Jesúsza' nake' Xiin Chioza'.

21 Na' yog' ben'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúsza' Jerusalenna'? Na' ¿aaga ni cheyinnan' bide' ni kwenche yichi'e yog'lolgake' pres lljasane' legake' lao bxooska' chnabia'?

22 Na' btipch lall' Sáulona' kwenche zizikchli bi'e dill' nan Jesúsza' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sáulona' lo na' ben' Israelka'

23 Ka ba gok zan lla choe' Sáulona' xtill' Jesúsza' yell Damáscona', na' ben' Israelka' lle' na' bshag ljwellgake' nan witgake'ne'.

24 Na' gokbe'i Sáulona' ba chinogake'ne'. Ka wal ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'.

25 Na'ch ben'ka' nonlene' txen, wal-lə wloogake'ne' to loo llom na' biletjgake'ne' lee zeena' nechj yella' kwenche bile'.

Billin Sáulona' Jerusalenna'

26 Ka billin Sáulona' Jerusalenna', gokile' lene' ben'ka' nonlilall' Jesúsza', per yog'lolle' bblebgake'ne', bi wyajle'gake' shi dii li ba chonlilallee Jesúsza'.

27 Na' Bernabéna' bchi'e Sáulona' gana' lle' postlka'. Na' golle' legake' nan Sáulona' ble'ile' Xancho Jesúsza' tneza' ka zeje' yell Damáscona', na' Jesúsza' be'lene'ne' dill'. Na' lekzka' golle' legake' bi bblebe' bi'e xtill' Jesúsza' yell Damáscona'.

28 Na' ka' gok bigaane' Jerusalenna' goke' txen ben'ka' nonlilall' Jesúsza', na' wal inlleb goke' bi'e xtill' Xancho Jesúsza'.

29 Na' be'lene' dill' ben' Israelka' chne dill' griegona' kwenche shajle'gake' che Jesúsza', per legake' goklall'ligake' witgake'ne'.

30 Na' ka wñezi ben'ka' nonlilall' Jesúsza' ba chinogake' Sáulona' kwenche witgake'ne', bche'gake'ne' Cesareana'lə. Na' ka bllingake' na', na' bisel'gake'ne' Társona'lə gana' nak lalle'.

31 Na'ch ben'ka' nonlilall' Jesúsza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

³² Do kana', chda Pédróna' chjawie' beṅ'ka' nonlilall' Jesúza' to to yell, na' lekzka' jawie' beṅ'ka' lle' yell Lídana'.

³³ Na' yell Lídana' jti'e to beṅ' le' Eneas. Ba gok xon' yiz die' bi chak chase' daa net ṅi'a neena'.

³⁴ Na' Pédróna' golle'ne':

—Eneas, Jesucristóna' yiyone' li'. Biyas na' bitob daa cho'na'.

Na' lii biyaste Enéaza'.

³⁵ Na' yog' beṅ'ka' lle' yell Lídana' na' yell Sarónna', ble'gakile' biyaki beena' na' benlilall'gake' Xancho Jesúza'.

Biban Dorcaza' ladj beṅ' wetka'

³⁶ Na' lekzka' yell Jópéna' wzoa to noolə benlilallee Jesúza', na' wlie' Tabita,* na' dill' griegona' che'gake'ne' Dorcas. Na' nooli, shlak wbane' toshiizi bzani ṅi'a neena' goklene' beṅ', na' biyesh'lallile' beṅ'ka' bibi de cheyin.

³⁷ Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliá shkwiana' cha'lə.

³⁸ Na' Jópéna' llian gaozə yell Lídana', na' beṅ'ka' wnezgakile' zoa Pédróna' yell Lídana', na'ch bsel'gake' chop beṅ' jellgake'ne':

—Sho'gach Jópéna' naate.

³⁹ Na'ch Pédróna' wzee zejlene' beṅ'ka' Jópéna'. Na' ka blline', na' jwa'gake'ne' loo yooná gana' de beṅ' weta', na' yog' nool wizebka' wyechjgake' Pédróna' chbellgake', na' bli'gakile'ne' xe'ka' daa ben dii Dorcaza' shlak wbane'.

⁴⁰ Na' Pédróna' bibeje' yog'lole' chyoolə, na' bchek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bixá'te jalao Dorcaza' chwie' Pédróna'. Na'ch biyase' bibi'e.

⁴¹ Na' Pédróna' bexee neena' na' bisolléene'. Na'ch biṅie' nool wizebka' na' nochlə beṅ'ka' nonlilall' Jesúza' kwenche bizoe'ne' shi'a shbane' lawe'ka'.

⁴² Na' wze dill' doxen yell Jópéna' ka gok che Dorcaza', na' beṅ' zan benlilall'gake' Xancho Jesúza'.

⁴³ Na' Pédróna' bigaane' Jópéna' zan lla lill Simónna, beena' chkoll yidxa bayix'ka'.

10

Pédróna' na' Cornéliona'

¹ Na' yell Cesareana' wzoa to beṅ' wlie' Cornelio, na' nak lall' nee zan soldadka', na' beṅ'ka' nak lall' nee wlegake' Ben' Italia.

² Na' Cornéliona' len beṅ'ka' nakgake' toz loo yoo lille'na' choe'la'ogake' Chioza' na' chall chllébgake'ne'. Na' zoatezi zoe' choe'lwille' Chioza' na' cho'e mech xen kwenche chaklene' beṅ' Israelka', beṅ'ka' chyallj chchinin.

³ To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴ Na' Cornéliona' chwiayenee anjla' do chllébbe', na' golle'ne':

—¿Beran cheenilo' beṅ'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' beṅ' yesh'ka'.

⁵ Na' naa bsel' beṅ' shajgake' yell Jópéna' kwenche lljxi'gake' beena' le Simón Pedro.

⁶ Zoe' lill to beṅ' le Simón, beena' chkoll yid, na' lille'na' zoan gaoz cho'a nido'na'. Na' Simón Pédróna' ine' li' daa chiya' gono'.

⁷ Na' ka biza' anjla' bshaljlen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez.

* 9:36 Tabita: dillii nakan dill' arameo.

8 Na' golle' legake' yog' daa goll anjla', na'ch bselee legake' Jópena'.

9 Na' betiyo do ka gobill ba zoa illin ben'ka' bsel' Cornéliona' yell Jópena'. Na' ka lo gora', Pédrona' wyepe' koll' yoona' gana' zoe' kwenche we'lwille' Chioza'.

10 Na' wdone', na' goklallee gawe' shel'ka'. Na' shlak chongake' daa gawe', ble'do'ile'

11 byalj yabana', na' to dii nak ka to lech' xen dii nchej tap yichjten chetjan lo yona'.

12 Na' loo lechaa lle' biya bayix', no ba llia tap ni'a na'in, na' no ba chxobi leeb lo yona' na' no ba zoa xilin.

13 Na'ch benile' shii to ben', chi'ene':

—Wzolla' Pedro. Bet baka', na' wdao.

14 Na'ch Pédrona' golle'ne':

—Bi gaw' baka', Xan'; ni shlin bin' gaw' baki bi nak ba xilall'.

15 Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

16 Shon shii golle' ka', na'ch biyep lechaa yabana'.

17 Na' chibani Pédrona' chakile' bera zejín daa ble'do'ile', ka bllin ben'ka' bsel' Cornéliona' cho'a yoona' gana' zoe', daa ba wñabgake' gan zoa lill beena' le' Simón, beena' chkoll' yid xa bayix'ka'.

18 Na' ka bllingake', na' wñegake' zillj wñabgake' shi nan' zoa to ben' le Simón Pedro.

19 Na' Pédrona' zie' wñeyi cheyi daa ble'do'ile', kat' wne Espíritu Sántona', chi'ene':

—Bwiakachi, na' lle' shon ben' chiyiljgake' li'.

20 Bizolla' na' biyetj, na' wyajlengake'. Bi gakchopilo', la' nadaan bselaa legake'.

21 Na'ch biyetj Pédrona' gana' lle' ben'ka' bsel' Cornéliona'. Na' chi'e legake':

—Nadaan beena' chiyiljle. ¿Beran chak chele zidwiale nad'?

22 Na'ch che' ben'ka' Pédrona':

—To ben' wñabia' che soldadka' lie' Cornelio bselee neto'. Nake' to ben' zej shli lao Chioza' na' ngooshosh yichje'ne', na' yog' ben' Israelka' nezgakile' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajniilo'ne' na' wzenague' dill'ka' we'lono'ne'.

23 Na'ch Pédrona' wlo'e legake' loo yoolə gana' zoe', na' bigaangake' shyel. Na' betiyo wyajlen Pédrona' legake' na' len to chop ben' Jope, ben' nonlilall' Jesúsza'.

24 Na' llana' sto bllingake' Cesareana'. Na' Cornéliona' ba btopen' yog'lo' dialla che'na' na' ben'ka' nllaguile', na' ba lle'gake' lille'na' chbezgake' illin Pédrona'.

25 Na' ka bllin Pédrona' lill Cornéliona', lii bchejte Cornéliona' bchek' xibe'na' lawe'na' choe'laweene'.

26 Na' Pédrona' bisolléene', chi'ene':

—Bizolla', bi wchekz' xibo' lawii, la' lekzka' ben'za nad'.

27 Na'ch shlak chshaljgake' wyoogake' loo yoona', na' ble'i Pédrona' ben' zan ba lle'.

28 Na'ch golle' legake':

—Le' nezile ka na ley chento'na', neto' ben' Israel bi chiya' gonnto' txen le' bi nakle ben' Israel, na' ni bi chiya' sho'nto' loo yoo lill-le. Per Chioza' ba bzajniile' nad' bi chiya' gacid' zban nottez ben'.

29 Daan ka bla' ben'ki chnegake' nad', lii za'tia' bi bchia' dill'. Na' naa cheenid' inezid' biche bseloo ben'ki bidxi'gake' nad'.

30 Na'ch Cornéliona' chi'ene':

—Ba gok tap lla, do ka naayen', chida shon, choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'.

31 Na' wne' nad': “Cornelio, Chioza' ba bzenague' daa choe'lwillo'ne', na' lekzka' chle'ile' ka chakleno' ben' yesh'ka'.

32 Na' bsel' ben' shajgake' yell Jópena' lljxi'gake' Simón Pédrona' kwenche yide' we'lene' li' dill'. Zoe' lill to ben' le Simón, ben' chkoll' yid, na' lill beeni zoan gaoz cho'a nido'na'.”

³³ Daan lii bentia' wneyi bidxi'gake' li', na' choxkeno' ba bido'. Na' nezki Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédrona' dill' lill Cornéliona'

³⁴ Na'ch wzolo Pédrona' bi'e dill', chi'e:

—Chakbe'id' naa, dii li Chioza' aga nakzi ben' chakile',

³⁵ san chle'shiile' yog' ben' lle' gattez yell kon shi chall chllebgake'ne' na' chongake' daa nak shli.

³⁶ Chioza' bselee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bselee Jesucristona', beena' nak Xan yog'lolcho.

³⁷ Nezkzile kwaslol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis.

³⁸ Nezile Chioza' bi'e Jesús, ben' Nazareta', yel' wak na' Espíritu Sántona', na' wda Jesúza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'.

³⁹ Neto' choe'nto' dill' che yog'te diika' ben' Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'.

⁴⁰ Per Chioza' bisbane'ne' ladj ben' wetka' biyon llana', na' bidli'lawe' neto'.

⁴¹ Aga yog' ben' bli'lao Jesúza' ka bibane' ladj ben' wetka', san bli'lawe' toz neto', neto' naknto' ben' ba wlej Chioza' kwenche we'nto' xtilleena'. Na' neto' weej wdaolennto'ne' ka wde bibane' ladj ben' wetka'.

⁴² Na' Jesúza' bselee neto' chixje'into' ben' nan Chioza' nzoe'ne' kwenche gone' yel' joschis che yog'lol ben', ka ben' mban na' ka ben' ba wit.

⁴³ Na' lekzka' kani'yi yog' dii ben'ka' wdixjee daa goll Chioza' legake' be'gake' xtill' Jesúza', wnagake' Chioza' yizi'xene' saaxya che nottezə ben' gonlilallee Jesúza'.

Wyoo Espíritu Sántona' loo yichjlall'do' ben'ka' bi nak ben' Israel

⁴⁴ Na' ni chshaljte Pédrona', kat' Espíritu Sántona' wyo'e loo yichjlall'do' yog' ben'ka' chzenaggake' xtilleena'.

⁴⁵ Na' ben' Israelka' nonlilall' Jesúza', ben'ka' bllinlen Pédrona' lill Cornéliona', bibangakile' daa wyoo Espíritu Sántona' loo yichjlall'do' ben'ka' bi nak ben' Israel.

⁴⁶ Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'.

⁴⁷ Na' Pédrona' golle' ben' Israelka' lle' na':

—Aga no gak wllon wchoa ben'ki nisa', la' ba yoo Espíritu Sántona' loo yichjlall'do'eka' ka ba yo'e cho'.

⁴⁸ Na' ben Pédrona' mandad wchoagake' nisa' daa chonlilall'gake' Xancho Jesucristona'. Na' biyolla' wnabgakile' Pédrona' kwenche bigaanlene' legake' chop shon lla.

11

Pédrona' golle' ben' Jerusalénka' ka gok

¹ Na' postlka' na' nochlə ben'ka' nonlilall' Jesúza' Judeana' bengakile' nan ben'ka' bi nak ben' Israel lekzka' chajle'gake' cho'a xtill' Chioza'.

² Na' ka billin Pédrona' Jerusalénna' gokdil-len xonj ben' le', ben'ka' che' chonan byen sho' ben' byoka' nonlilall' Chioza' sen daa le circuncisión la'kzi bi nakgake' ben' Israel.

³ Na' gollgake'ne':

—¿Bi'che wyoozo' loo yoo lill ben'ka' bi nak ben' Israel na' weej wdaolenzgako'ne'?

⁴ Na'ch Pédrona' golle' legake' yog' ka gok, chi'e:

⁵ —Kana' ni zoa yell Jópəna', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'.

⁶ Na' ka bwiayənaa diika' lia loo lechaa, na' ble'id' lle' bayix' ba zoa tap ni'a na'b, na' no ba znia, no ba chxobi le'in lo yona', na' ba zoa xilin.

⁷ Na' benid' shii to beṇ' ne' nad': "Wzolla' Pedro, bet baka' na' wdao."

⁸ Na' goshee: "Bi, Xan', ni tshii bin' gaw' baki bi nak ba xilall'."

⁹ Na' sto shii benid' shii beena' ne' nad': "Daa ba wna Chioza' wak gawo' bich inazo' bi nakan xilall'."

¹⁰ Gokte shon shii wne ka', na'tech biyep lech' xenna' yabana'.

¹¹ Na' shintg ble'do'id' diika' kat' bidse shonə beṇ' cho'a yoona' gana' zoa', zaake' yell Cesareana' ziddiljgake' nad'.

¹² Na' Espíritu che Chioza' wne' nad' bi gonchoplallaa sha'len' legake'. Na' lenkz beṇ' bish'choki xop wza'lengake' nad', na' yog'tento' wyoonto' lill Cornéliona'.

¹³ Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': "Bsel' to chop beṇ' yell Jópena' kwenche lljxi'gake' beena' le Simón Pedro.

¹⁴ Na' le' ine' li' nakan gono' kwenche yilaleno' beṇ'ka' lle' loo yoo lillo'na' bi kwiayi'le."

¹⁵ Na' ka wzoloa' choe'lengakee dill', betj Espíritu Sántona' wyo'e loo yichjlall'do'eka', ka bidsoe' loo yichjlall'do'choki.

¹⁶ Na'ch jadinid' daa wna Xancho Jesúza' kana' wne': "Dii li Juanna' bchoe' beṇ' nis, san le', dii zak'chi gak chele, daa yidsoa Espíritu Sántona' loo yichjlall'do'lena'."

¹⁷ La' Chioza' bene' ka zoa Espíritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucristona'. Na' ¿nora nak' nad' wllon' gon Chioza' daa cheenile' gone'?

¹⁸ Na'ch ka biyoll bzenag beṇ' Jerusalénka' nonlilall' Jesúza' dillaa be' Pédrona', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len beṇ'ka' bi nak beṇ' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kani.

Ben'ka' nonlilall' Jesúza' Antioquíana'

¹⁹ Na' beṇ' Israelka' nonlilall' Jesúza', beṇ'ka' bsheshlesgake' ka wde wit dii Estébanna', bale' wyaj zit' axt Feníciana', na' zi bale' bllin Chíprena' na' zibale' bllin yell Antioquíana'. Na' gana' bllin to toe' be'lengake' to beṇ' wlall' che'ka'z xtill' Jesúza'.

²⁰ Per bal beṇ'ka' nak beṇ' Chipre na' beṇ' Cirene, ka bllingake' yell Antioquíana', wzologake' be'lengake' beṇ' bi nak beṇ' Israel dill' wen dill' kob che Xancho Jesúza'.

²¹ Na' yel' wak che Xanchona' wzoalenan legake', na' beṇ' zan wlej yichjgake' diika' nxenilall'gake' na' benlilall'gake' Xancho Jesúza'.

²² Na' beṇ'ka' nonlilall' Jesúza' Jerusalénna', ka wnezgakile' ba nonlilall' beṇ' Antioquíaka' Jesúza', na' bsel'gake' Bernabéna' jawie' legake'.

²³ Na' ka blline' Antioquíana', ble'ile' ba goklenchga Chioza' legake' na' le bibaile'. Na' btipche' lall' beṇ'ka' kwenche soachechgake' gonlilall'gake' Xancho Jesúza' do yichj do lall'gake'.

²⁴ Na' beṇ' zanch benlilall'gake' Xancho Jesúza', la' Bernabéna' nake' to beṇ' wen, na' chnabia' Espíritu Sántona' le', na' le benlilallee Chioza'.

²⁵ Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'.

²⁶ Na' wzoalengake' beṇ'ka' nonlilall' Jesúza' Antioquíana' twiz, na' bli' bsedgakile' beṇ' zan. Na' Antioquíana' dii nechdo' bsi'gake' beṇ'ka' nonlilall' Jesucristona' "Cristianos".

²⁷ Na' do kana'kzə, bal beṇ'ka' chyixjee daa che' Chioza' legake' wza'gake' Jerusalénna' bllingake' Antioquíana'.

²⁸ Na' wzolla' toe', beena' le Ágabo, na' bi'e dill' ka ba bzajnii Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chnabia' beena' le Claudio gana' mbani Rómána'.

²⁹ Na' beṇ' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' beṇ'ka' nonlilall' Jesúza' gana' mbani Judeana', gana' chi' wbinna'.

³⁰ Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao ben'ka' ngoo lall' na' ben'ka' nonlilall' Jesúza' Judeana'.

12

Betgake' Jacóbona' na' wloogake' Pédróna' lillyana'

¹ Na' do kana'kzə ben' wñabia' Heródeza' bexee bal ben'ka' nonlilall' Jesúza' kwenche wchi' wsakee legake'.

² Na' bchogloe' gueti Jacóbona' yesya, beena' nak ben' bish' Juanna'.

³ Na' ka gokbe'ile' bibayi ben'ka' chñabia' ben' Israelka' daa bene'ka', na'ch lekzka' bexee Pédróna' lo lñi Paskwa' kana' chaogake' yetxtila' daa bi nchix levadúrana'.

⁴ Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibeji ljwellgake' wdapgake'ne'. Na' gokile' yiyoll lñi Paskwa' kweje'ne' lao ben' yellka' na' wchogloe' che' guete'.

⁵ Shlak nej Pédróna' lillyana', ben'ka' nonlilall' Jesúza' toshiizi be'lwillgake' Chioza' ni che'.

Chioza' bibeje' Pédróna' lillyana'

⁶ Na' lle'na' ka wxezə kwej Heródeza'ne' kwenche wchogloe' che' guete', Pédróna' die' chese' ladj chop soldadka', na' nchejgake'ne' chop gden, na' zi chop soldadka' chapgake' cho'a lillyana'.

⁷ Na' tokonganzi bllin to anjl che Xancho Chioza' gana' de Pédróna' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'.

⁸ Na'ch che' anjla'ne':

—Bikaacha li'ona' na' bilej xelo'na'.

Na' ben Pédróna' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

⁹ Na'ch zjano Pédróna' anjla', ni bi nezile' shi ka chakkzan, kon gokile' chle'do'zilen'.

¹⁰ Na' bidegake' gana' lle' soldadka' shkwen, na' bidetegake' gana' lle' ben'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédróna'. ¹¹ Kana'ch gokbe'i Pédróna', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non ben' Israelki lez gak cha'.

¹² Na' ka gokbe'ile' ba bicheje' lillyana', na' ziyaje' lill Maríana' xña' Juanna', beena' nsi'gake' Marcos. Na' lill Maríana' ndop nllag ben' zan choe'lwillgake' Chioza'.

¹³ Ka blline', na' wñie' cho'a leeja', na' bchej to bi' noolə le Rode, jawiab' no beena' chñe.

¹⁴ Na' ka biyombia'b' shii Pédróna' chibachgaib', na' daa le chibaib' bikz bsalj'. Zigaate jayellb' ben'ka' lle' loo yoona' ba ze Pédróna' cho'a leeja'.

¹⁵ Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'na'ljan.

¹⁶ Na' Pédróna' ni zie' chñie' cho'a leeja'. Na' ka bsaljgake' ble'gakile'ne', bibanchgagak-ile'.

¹⁷ Na'ch Pédróna' bene' to señ kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' ben' bish'choka' ka ba ben Xanchona' cha'.

Na'ch bizee ziyaje' gan yoblə.

18 Na' ka wyeeni', wche' to yeḷ' wban xen ladj soldadka' daa bi gokbe'gakile' nak gok bichej Pédróna'.

19 Na'ch Heródeza' bta bñie' beṅ'ka' biyiljgake'ne', na' bi billelgakile'ne'. Na'ch wñabile' soldadka' chap lillyana' nak gok bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

Ka wit Heródeza'

20 Heródeza' chllée beṅ' Tíroka' na' beṅ' Sidónka'. Na' beṅ'ki gokgake' toz bshaljlengake' Blástóna', to wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gaogake' gana' chñabia' Heródeza'. Na' Blástóna' bshaljlene' Heródeza' kwenche wxi'xene' che beṅ' Tíroka' na' beṅ' Sidónka' na' yizoalene' legake' wen sto shii.

21 Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' beṅ'. Na'ch jshie' gana' chchogloe' che beṅ', na' bi'e dill' lao beṅ'ka' ndop nllag na'.

22 Na' shlak cho'e dill', na' besyaa beṅ'ka' che'gake':

—To chioza'n chñe, aga kontele beṅaan.

23 Na' anj che Xancho Chioza' lii be'tie' Heródeza' to yillwe' wal benan ka chyin chlall' bel bzog'ka' loo li'ena' na' wite', daa bi'e latj wloo beṅ'ka' le' balaan daa chidol' toz beena' nak dowalj Chios.

24 Na' dill' wen che Chioza' zej chlliljchan doxen.

25 Na' Bernabéna' len Sáulóna' ka wde bengake' daa chiyaḷ' gongake' Jerusalénna', biza'gake' biyajgake' Antioquíana', na' bche'gake' Juanna', beena' lekzka' nsi'gake' Marcos.

13

Bernabéna' na' Sáulóna' je'gake' cho'a xtill' Chioza' yell zit'ka'

1 Na' ladj beṅ'ka' nonlilall' Jesús'a yell Antioquíana' lengake' beṅ' chyixjee daa che Chioza' na' beṅ' chli' chsedi cho'a xtill' Chioza'. Na' legake' beṅ'ki: Bernabéna', Simónna', beena' che'gake' beṅ' gasj, Lúcióna' beṅ' Cirénena', Sáulóna' na' Manaénna', beena' bgol-len Heródeza' beena' wñabia' gana' mbani Galileana'.

2 Na' to shii ka zoagake' wbasaa na' choe'la'ogake' Chioza' wñe Espíritu Sántóna' legake', chi'e:

—Li wzoa Bernabéna' na' Sáulóna' kwenche gongake' xshin'na', la' ni cheyinnan' ba wlej' legake'.

3 Na' ka wyeelo be'llwillgake' Chioza' na' biyoll wzoagake' wbasaa, na' bxoá neeka' yichj beṅ'ka' chop, na'ch bsel'gake' legake' gana' lljengake' xshin Chioza'.

Páblóna' na' Bernabéna' be'gake' cho'a xtill' Chioza' gana' le Chipre

4 Na'ch Espíritu Sántóna' bselee Bernabéna' na' Sáulóna' yell Seleúciana' gana' wyoogake' barkwa' kwenche jwaan legake' yell-lio Chíprena' daa llia lo nisdóna'.

5 Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtill' Chioza' to to gana' chdop chllag beṅ' Israelka' choe'llwillgake' Chioza'. Na' nche'gake' sto beṅ' le Juan kwenche gaklene' legake'.

6 Na' wdegake' to to yellka' llia Chíprena'. Na' ka bllingake' yell Páfoza', na' jadi'gake' to beṅ' Israel, beena' le Barjesús. Nake' to beṅ' willa', na' chziyee beṅ' chi'e nake' to beṅ' chyixjee daa che' Chioza' le'.

7 Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulóna' nake' to beṅ' chajni, na' goxe' Bernabéna' len Sáulóna' kwenche wza-jni'gakile'ne' cho'a xtill' Chioza'.

8 Na' beṅ' willa'na', nsi'gake'ne' Elimas (na' zejin beṅ' willa'), goklallee gone' ka bi shajle' beṅ' wñabia'na' che cho'a xtill' Chioza'.

9 Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiayenee Elímaza',

10 na' golle'ne':

—¿Li' ben' wxiye', ben' wen dii mal, xiin dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'?

11 Na' naa Chioza' wselee yel' zi' cho', gone' ka icholo' na' shloll wen bich ile'ilo' beeni' che wbillá'.

Na' kate golle'ne' ka' lii wchołtie', na' chgan chtobzile' chñabe' no yiyox' neena' daa bich chle'ile'.

12 Na' ka ble'i ben' wñabia'na' daa gok, na' wyajli'e, na' le bibanile' ka nak cho'a xtilł' Xancho Jesúza' daa chli' chsedgakile'ne'.

Páblona' na' Bernabéna' wyajgake' yell Antioquíana' daa llia gana' mbani Pisídiana'

13 Na'ch Páblona' na' ben'ka' chdalene' wyoogake' barkwa' yell Páfoza' na' wyajgake' yell Pérgena' daa llia gana' mbani Panfíliana', na' Juan Márcona' bixonje' ziyaje' Jerusalénna'.

14 Na' Páblona' len ben'ka' chdalene' na', biza'gake' yell Pérgena' na' wyajgake' yell Antioquíana' daa llia gana' mbani Pisídiana'. Na' ka bllin lla sabda', llana' chombaañ ben' Israelka', wyajgake' gana' chdop chllaggake' choe'łwillgake' Chioza', na' jche'lengake' ben'ka'.

15 Na' ka biyoll blabgake' lat' ley che Chioza' na' zi lat' daa bzej dii ben'ka' wdixjee daa goll Chioza' legake', na'ch ben'ka' chgoo xñezi cheyi diika' chongake' gana' chdop chllaggake' bsel'gake' to ben' gana' chi' Páblona' len Bernabéna' na' golle' legake':

—Le' ben' bish', shi bi dill' de we'lenle ben'ki kwenche wtipch lall'gake', wak we'len naa.

16 Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia':

17 Chios, beena' nonlilall'cho cho' ben' Israel, wleje' dii xozxto'choka' na' bene' ka wyangake' shlak wzoagake' Egíptona'. Na' bllin lla bibeje' legake' kon yel' wak che'na'.

18 Na' wdape' yel' chxenlall' che yel' widenag che'ka' lo choa yiza' wzoagake' latja' gana' bibi chashj chleb.

19 Na' blliyee yellka' gall kwen lle' gana' mbani Canaánna' kwenche bi'e dii xozxto'choka' yell-lío che'ka'.

20 Kan' gok lawi tap guiyoa yoo gashj yiz. Na'tech, bzoa' Chioza' ben'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'.

21 Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'.

22 Na' ka bikwas Chioza' yel' wñabia' che dii Saúla', bizoe' dii Davina' inabi'e na' bi'e dill' che', wne': “Davina', xiin Isáina', nake' to ben' chon ka chazlallaa, na' nezid' gone' yog' daa cheenid' gone'.”

23 Na' lo dia che dii Davina' golj Jesucrístona', beena' wlej Chioza' kwenche yisle' cho' ben' Israel lawi dii mala' kon ka bchebe' gone'.

24 Na' ka zi' solo Jesúza' wli' wsedile' ben', dii Juanna' golle' yog' ben' Israelka' chiyal' yiyaj yilengakile' xtóleeka' na' choagake' nisa'.

25 Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': “Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmose' kwenche wlechj' xe'le'na'.”

26 'Le' ben' bish', le' nakle xiin dia che dii Abrahama', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' laochoni daa cho'en dill' yisle' ben' kwenche bi kwiayi'gake'.

27 Ben' Jerusalénka' na' ben' wñabia' che'ka' bi gokbe'gakile' bsel' Chioza' Jesúza'. Ni bi wyajni'gakile' diika' bzej dii ben'ka' wdixjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'lwillgake'ne'. Na' daa wnagake' chiyal' guet Jesúza', billinin daa bzej dii ben'ka' be' dill' daa goll Chioza' legake'.

28 La'kzi bibi dii mal billelgakile' ben Jesúza' dii gonan ka wchoglogake' witgake'ne', wnabgakile' Pilátóna' gone' mandad witgake'ne'.

29 Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biletjgake'ne' lee yag cruza' na' jakwash'gake'ne'.

30 Na' Chioza' bilise'ne' ladj ben' wetka'.

31 Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna'. Na' legaken' choe'lengakee ben' wlall chechoka' xtilleena' ñaa.

32 'Na' chyixje'into' le' dill' wen dill' kob che Jesúza' daa bcheb Chioza' lao dii xoxzto'choka'.

33 Na' ñaa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúza' ladj ben' wetka'. Gok ka nyoj Salmo de wchopina', gana' nan: "Lin' nako' Xiin', na' ñaa, daa solo inabi'o na' inezi ben' nadaan nak' Xo'."

34 Chioza' ba bi'e dill' yilise'ne' ladj ben' wetka' na' bichga guete', na' wne': "Dii li gaken' le' dii xen wal ka bcheb' lao dii Davina'."

35 Na' lekzka' sto Salmo nan: "Bi wi'o latj gooll' iteb beli chen cha'ni, daa nak' lall' no'."

36 Na' nezicho dii Davina' goklene' dii xoxzto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xoxztoe'ka', na' gooll' bteb beli chen che'na'.

37 Per kwerp che Jesúza', beena' bisban Chioza' ladj ben' wetka', bi wllia'ni.

38 Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúza'.

39 Nottez ben' gonlilalleene' yiyake' ben' li ben' shao' lao Chioza'. Aga no yiyak ben' li ben' shao' lao Chioza' daa chone' daa na ley che dii Moiséza'.

40 Na' li wsak' kwenche ki gak chele ka bzej dii ben'ka' be' dill' daa goll Chioza' legake' kani'yi, gana' nan:

41 Li wwia, le' ben' wenle. Li yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki gak.

42 Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch ben'ka' bi nak ben' Israel wnabgakile'ne' we'lene' legake' cho'a xtill' Chioza' lla sabda' sto.

43 Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiyal' soachehgake' gonlilall'gake' Chioza' daa le chakile' legake'.

44 Na' ka bizoa xmanna' sto, llana' chombaañ ben' Israelka', zi lat'z ki biya ben'ka' lle' yella' bdop kwenche wzenaggake' cho'a xtill' Chioza'.

45 Na' ka ble'i ben' Israelka' ben' zan ndop nllag, na' gokxe'gakile' Páblona' na' wnegake' zban che dillaa cho'e, na' biya dii wnagake' che'.

46 Na'ch Páblona' len Bernabéna' aga blleb'gake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzena-glen, chli'le bi chido'le gon Chioza' ye' mban chele zejli kani, na' solochoklanto' ñaa wzajniinto'n ben'ka' bi nak ben' Israel.

47 La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' ben'ka' bi nak ben' Israel. Na' yoo ben'ka' lle' doxen yell-lioni ka gongake' kwenche yilagake' na' bi kwiayi'gake'.

48 Na' ben'ka' bi nak ben' Israel, ka bengakile' daa wna Páblona' len Bernabéna', le bibagakile' na' wnagake' le mba nak cho'a xtill' Chioza'. Na' yog' ben'ka' ba wlej Chioza' kwenche gat' yel' mban chegake' zejli kani benlilall'gake' Jesúza'.

49 Ka' gok bllilj cho'a xtill' Xancho Jesúza' doxen na'.

50 Na' ben' Israelka', ben'ka' bi wyajle'gake' che Jesúza', wlooyel'gake' bal noolə wnia'ka', ben'ka' choe'la'o Chioza', na' ben' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'.

51 Na'ch Páblona' len Bernabéna' ka biza'gake' wllib ni'eka' bishte che yella' daa bi goklall' ben'ka' lle' na' wzenaggake' che Chioza'. Na' wyajgake' yell Icóniona'.

52 Na' ben'ka' nonlilall' Jesúza' wzoachgagake' mbalaz, na' Espíritu Sántona' wnabi'e loo yichjall'do'eka'.

14

Bllin Páblona' len Bernabéna' Icóniona'

1 Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'lwillgake' Chioza'. Na' Chioza' goklene' legake' ka be'gake' cho'a xtilleena' kwenche ben' zan benlilall'gake' Jesúza', ka ben' Israel na' ka ben' bi nak ben' Israel.

2 Na' ben' Israelka', ben'ka' bi goni shajle' che Jesúza', wlooyel'gake' bal ben'ka' bi nak ben' Israel kwenche gokzbangakile' ben'ka' nonlilall' Jesúza'.

3 Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllibgake', la' nxenilall'gake' zoalen Xancho Chioza' legake'. Na' Xanchona' goklene' legake' bli'gake' yel' wak che'na' kwenche gokbe'i ben' nan choe'gake' dill' li.

4 Na' ben' Icónioka' gokgake' choplə, bale' wda'gake' ben' Israelka' na' zi bale' wda'gake' Páblona' len Bernabéna'.

5 Na'ch ben' Israelka' bengake' txen ben'ka' bi nak ben' Israel na' gokgake' toz len ben' wnabia'ka', goklall'gake' yiya dii gongakile' Páblona' len Bernabéna' na' wlligake' legake' yaj.

6 Na' ka wnezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' llia gana' mbani Licaóniana'.

7 Na' lekzka' be'gake' dill' wen dill' kob che Jesúza' na'.

Blligake' Páblona' yaj yell Lístrana'

8 Na' Lístrana' jadi'gake' to ben' nxinj ni'ena' ka goljtie'. Na' bi chak see daa bi chzoa chech ni'ena'.

9 Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see.

10 Na'ch golle'ne' zillj:

—Wzolla'.

Na' lii wzolla'tie' na' gok wzee.

11 Ka ble'i ben' Lístraka' daa ben Páblona', wzolo chosyaagake' chnegake' xtilleeka' daa nak dill' Licaonia che'gake':

—jBa betj chios chechoka' gani zoacho na' chle'gakichone' ka benech!

12 Na' wnagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa.

13 Na' bxoz che yoodo' che Júpitera', daa zoa katez choogake' yella', jwee goonka' na' nwalee legakb bga de yej, na' le', na' ben'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'.

14 Na' ka gokbe'i Bernabéna' len Páblona' bin gon ben'ka', na' wzologake' bchez' xe'ka', la' chakgakile' dii mal nllaban chon ben'ka'. Na' jsedogake' ladje'ka', na' wnegake' zillj, che'gake':

15 —Le' ben'do', ¿berache chonzle ka? Lekzka' ben' yell-lioz neto', ka le', na' ba bidnto' kwenche wzajniinto' le' chiya! kwejyichjle diiki bibi zak' na' gonlilall'le Chios, ben' yaa ben' banna', beena' ben yabana', yell-lioni, na' nisdona', na' yog' dii de xan yabana', lo yell-lioni, na' loo nisdona'.

16 Kani'yi Chioza' bwialoze' che benecha' bengake' kon daa nazan chegake'.

17 Na' la'kzi bwialoze' ka bengake', bliile' legake' yel' wak che'na' kwenche ka' gake'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

18 Na' la'kzi Páblona' len Bernabéna' gollgake' ka', kani goongakile' bi witgake' goonka' daa nan we'la'ogake' legake'.

19 Na' bllin bal ben' Israelka' zaak Antioquíana' na' Icóniona', na' wlooyel'gake' ben' Lístraka' kwenche bliagake' Páblona' yaja'. Na' daa gokgakile' ba witen', na'ch bxobgake'ne' jadixjgake'ne' cho'a yella'te.

20 Na' ben'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

21 Na' lekzka' wdixjeegake' dill' wen dill' kob che Jesúza' yell Dérbena', na' ben' zan benlilall'gake' Jesúza'. Na'tech, biza'gake' bidegake' yell Lístrana', Icóniona' na'ch Antioquíana'.

22 Na' to to yellka' gana' bidegake' btipgake' lall' ben'ka' ba chajle' che Jesúza' kwenche soachehgake' gonlilall'chgake'ne'. Na' gollgake' chiya! yizo yizakicho bittez dii yen ile'icho kwenche gak lljazoalencho Chioza' gana' chnabi'e.

23 Na' to to yellka' wlejgake' to chop ben' koo lall' na'gake' ben'ka' ba nonlilall'gake' Jesúza'. Na' wzoagake' wbas' be'llwillgake' Chioza', na'ch bengake' legake' lall' na' Xancho Jesúza', beena' nonlilall'gake'.

Páblona' len Bernabéna' biyajgake' yell Antioquíana' daa llia gana' mbani Síriana'

24 Na' wde Páblona' len Bernabéna' gana' mbani Pisídiana' na' bllingake' gana' mbani Panfílina'.

25 Na' be'gake' cho'a xtil' Chioza' yell Pérgena'. Na'ch biza'gake' ziyajgake' yell Atáliana'.

26 Na' yell Atáliana' biyoogake' to loo barkw na' billingake' yell Antioquíana' gana' lle' ben'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'.

27 Na' ka billingake' yell Antioquíana', btopgake' ben'ka' nonlilall' Jesúza', na' gollgake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che ben'ka' bi nak ben' Israel kwenche benlilall'gake' Jesúza'.

28 Na' Páblona' len Bernabéna' bigaangake' ssha yell Antioquíana' len ben'ka' nonlilall' Jesúza'.

15

Bidopgake' Jerusalénna' na' be'gake' dill'

1 Shlak zoa Páblona' len Bernabéna' yell Antioquíana', bllin bal ben' za' Judeana' na' wzologake' bli' bsedgakile' ben'ka' nonlilall' Jesúza' nan chiya! gongake' ka na ley che dii Moiséza' na' sho'gake' sen daa le circuncisión kwenche Chioza' wi'e yel' mban chegake' zejli kani.

2 Na' Páblona' len Bernabéna' gokdil'lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche llje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

3 Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka'

nonlilall' Jesúza' ka ba wyanchga beṅ'ka' bi nak beṅ' Israel ba yoogake' lo xñez Chioza'. Na' ka beni beṅ'ki dga, le bibagakile'.

⁴ Ka bllin beṅ'ki Jerusalénna', beṅ'ka' nonlilall' Jesúza' len beṅ'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'.

⁵ Na' baḷ fariseoka' nonlilall' Jesúza' wzolla'gake' na' wnagake':

—Beṅ'ka' bi nak beṅ' Israel chonan byen sho'gake' seṅ daa le circuncióón ka solo gonlilall'gake' Jesúza', na' chiyaḷ' gongake' ka na ley che dii Moiséza'.

⁶ Na' bdop bllag postlka' len beṅ'ka' ngoo lall' na'gake' beṅ'ka' nonlilall' Jesúza' kwenche wwiagake' naklæ ka sho' xñezi dga.

⁷ Ba gok ssha chdil cho'a xtilleeka' ka wzolla' Pédróna' na' golle' legake':

—Le', beṅ' bishaa, ba nezkzile kana' wlej Chioza' nad' ladjleni kwenche llji'a dill' wen dill' kob che Jesúza' lao beṅ'ka' bi nak beṅ' Israel kwenche gonlilall'gake'ne'.

⁸ Chioza', beena' nombi'e yichjlall'do' yog' beṅ', bli'e nan chlebe' beṅ'ka' bi nak beṅ' Israel daa bselee Espíritu Sántona' zoe' loo yichjlall'do'eka' kon ka bene' checho.

⁹ Toz ka ba ben Chioza' checho na' che beṅ'ka', la' lekzka' ba biyib bixise' loo yichjlall'do'eka' daa ba nonlilall'gake' Jesúza'.

¹⁰ Na' ¿berache bi chajle'le daa ba ben Chioza'?, na' ¿biçe cheenile gon beṅ'ka' bi nak beṅ' Israel diiki? La' ni cho' ni dii xozxto'choka' biṅ' sakicho gonchon.

¹¹ Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹² Na' yoguee wzoagake' llizæ bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yeḷ' wakka' ladj beṅ'ka' bi nak beṅ' Israel.

¹³ Na' ka biyoll be' Páblona' len Bernabéna' dill', na'ch wñe Jacóbona', golle':

—Le' beṅ' bish', cheenid' wzenagle dga inia' le':

¹⁴ Simón Pédróni ba bi'e dill' ka wzolo Chioza' wleje' beṅ' ladj beṅ'ka' bi nak beṅ' Israel kwenche gaggake' lall' nee.

¹⁵ Na' dga gok ka' chidil-lebin daa bzej dii beṅ'ka' wdixjee daa goll Chioza' legake' kani'yi, gana' nan:

¹⁶ Ka te dga, yiyed'

na' wzoa' to xiin dia che dii Davina' inabi'e.

La'kzi yeḷ' wñabia' che'na' nakan ka to yoo dii ba biyinj, wllin lla yichisa'n.

¹⁷ Gon' dga kwenche yog' beṅ'ka' biṅ' gonlilall'gake' nad' yiyiljgake' nad', lente yog'lol beṅ'ka' bi nak beṅ' Israel, beṅ'ka' ba nak lall' na'.

¹⁸ Kan' wna Xancho Chioza', beena' bzajniile' beṅ'ka' diiki kani'teyi.

¹⁹ Na'chan nia' le', bi chiyaḷ' ye'cho beṅ'ka' bi nak beṅ' Israel, beṅ'ka' ba nonlilall'gake' Chioza', gongake' dii bi chonan byen.

²⁰ Kon wzejcho to yish ye'chogake' bich gaogake' yeḷ' wawa' daa chllia beṅ' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool beṅ'.

²¹ La' kani'teyi zoakzæ beṅ' to to yell chzajni'gakile' beṅ' ley che dii Moiséza', na' lënnan' ni chlabgake' naa gana' chdop chllaggake' choe'llwillgake' Chioza' yog' lla sabd.

Yisha' daa bsel'gake' lao beṅ'ka' bi nak beṅ' Israel

²² Na'ch postlka', na' yog' beṅ'ka' nonlilall' Jesúza' len beṅ'ka' ngoo lall' na' legake' bengake' toz dill' wlejgake' to chop beṅ' ladj'e'ka' kwenche shajlengake' Páblona' len Bernabéna' Antioquíana'. Na' wlejgake' Judas, beena' lekzka' lie' Barsabás, na' Sílaza', nakgake' beṅ' mbejlawin ladj beṅ'ka' nonlilall' Jesúza'.

²³ Na' bsel'lengake' beṅ'ki to yish dii bzejgake', na' ki choe'n dill':

“Le' ben' bish' na' le' ben' zannto', le' bi nakle ben' Israel na' zoale yell Antioquíana', na' doxen gana' mbani Síriana' na' Cilíciana', neto' postl na' ben'ki ngoo lall' na' ben'ka' nonlilall' Jesúza' Jerusalénni, na' yog' ben' bish'choki lle' ni, chwapnto' le' chiox.

²⁴ Ba wnezinto' ba bchej to chop ben' ladjnto'ni bidgake' to bia'lall'zgake' gana' zoale, na' benllejgakile' le' daa wnagake' chiyal' sho'le sen daa le circuncisión, na' chiyal' gonle doxen ka na leya'.

²⁵ Daan, ba bennto' toz dill' wlejnto' ben'ki chop ladjnto'ni zidwiagake' le'. Na' chsel'lennto' legake' Pábloni na' Bernabéni, ben' bish'choki le chakicho,

²⁶ ben'ki chzoa dii nxoll yel' mban che'ka' daa chongake' xshin Xancho Jesucristona'.

²⁷ Na' chsel'nto' ben'ki le Judas na' Silas, na' legake' wzajni'gakile' le' dga chzejnto' le'.

²⁸ Na' wyazlall'nto' ka bzajnii Espíritu Sántona' neto' bi wzoanto' le' gonle dii bi yizoile. Diikizə chakinto' chonan byen bi gonle:

²⁹ Bi gaole yel' wawa' daa chllia ben' lao lwaa lsak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool ben'. Shi wzenagle diiki nannto' le', wenkzan chonle. Ka'tz nak dill'ki chzejnto' le'.”

³⁰ Na'ch ka bllin ben'ka' bsel'gake' Antioquíana', na' btopgake' yog' ben'ka' nonlilall' Jesúza', na' be'gake' legake' yisha' daa nox'gake'.

³¹ Na' ka blabgake'n le bibagakile' ka dillaa choe'n.

³² Na' ka nak Júdaza' na' Sílaza', daa lekzka' nakgake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'.

³³ Na' biyoll wzoalengake' legake' shloll wen, na'ch ben'ka' nonlilall' Jesúza' Antioquíana' mbalaz bilaagake' legake' dill' na' biyajgake' kwit ben'ka' bsel' legake'.

³⁴ Na' Sílaza' wyazlallee igaane' na'z.

³⁵ Páblona' na' Bernabéna' bigaangake' Antioquíana'. Na' len zan ben' yoblə bli' bsedchgakile' ben' cho'a xtil' Xancho Jesúza'.

Sto shii wyaj Páblona' yellka' gana' ba ji'e cho'a xtil' Chioza'

³⁶ Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtil' Xancho Jesúza' kwenche lljawia-cho nak chak che ben'ka' ba wyajle'.

³⁷ Na' Bernabéna' goklallee wche'gake' Juan, beena' lekzka' nsi'gake' Marcos.

³⁸ Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfiliana', na' bich jenlene' legake' xshin Chioza'.

³⁹ Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'.

⁴⁰ Na' Páblona' wzee bchi'e Sílaza'. Na' ben'ka' lle' Antioquíana', ben'ka' nonlilall' Jesúza', wnabgakile' Xancho Chioza' gaklene' legake' gattezə shajgake'.

⁴¹ Na' Páblona' len Sílaza' wdegake' gana' mbani Síriana' na' Cilíciana' kwenche goklen-gake' ben'ka' nonlilall' Jesúza' wzoatip wzoashoshchgake'.

16

Timotewa' bene' txen Páblona' len Sílaza'

¹ Na'ch Páblona' len Sílaza' bllingake' yell Dərbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakb' xiin to noolə Israel, na' nooli nonlilallee Jesúza', per xabaa nake' ben' griego.

² Na' ben' Lístraka' len ben' Icónioka' nonlilall' Jesúza' be'gake' dill' le wen nsa' cheb'.

³ Na' Páblona' wnabile'b' shajlem' legake', na' wlo'eb' sen daa le circuncisión kwenche bi gakzbani ben' Israelka' leb', la' nezgakile' xabaa bi nake' ben' Israel.

⁴ Na' yog' yellka' gana' wdegake' be'lengake' beŋ'ka' nonlilall' Jesúza' dill' che diika' chiyal' gongake', diika' be' postlka' dill' kon beŋ'ka' ngoo lall' na'gake' beŋ'ka' nonlilall' Jesúza' yell Jerusalénna'.

⁵ Na'ch beŋ'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to beŋ' Macedonia chñabile'ne' shaje' lalle'na'

⁶ Páblona' len Sílaža' na' Timotewa' to wdegake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani Ásiana'.

⁷ Na' ka bllingake' gaoz yell-lío gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'.

⁸ Na'ch wdegake' yell-lío che Mísiana' bllintegake' yell Tróaza' daa lla cho'a niso'dna'.

⁹ Na' lo yela' Chioza' bene' ka ble'do'i Páblona' to beŋ' byo, beŋ' Macedonia, zie' chat'yoile'ne', chi'ene': "Dagach Macedóniani kwenche gakleno' neto'."

¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' llje'lennto' beŋ'ka' lle' na' dill' wen dill' kob che Jesúza'.

Páblona' na' Sílaža' wyajgake' Filípoza'

¹¹ Na' yell Tróaza' wyoonto' barkwa' na' wyajnto' shlichá gana' lla to yell-lío lo niso'dna' daa le Samotracia. Na' betiyo bllinnto' to yell dii le Neápolis.

¹² Na' wza'nto' Neápoliza' wyajnto' yell Filípoza'. Nakan to yell ga lle' beŋ' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shoŋ lla.

¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'llwillgake' Chioza'. Na' jche'nto' na', be'lennto' dill' noolka' bdop bllag.

¹⁴ Na' ladj noolka' len to beŋ' le Lidia. Nake' beŋ' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'.

¹⁵ Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesúza', li sho' na' yigaanle lillaa.

Na' bene' byen jagaannto' lille'na'.

¹⁶ Na' to shii ka zejnto' gana' choe'llwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chñeyaab'. Na' nakb' to bi' ndoo lla yel chom' xshin beŋ', na' dii xen chon xama' gan daa chñeyaab'.

¹⁷ Na'ch bi'ni wnob' Páblona' shlak zejlennto'ne', chosyaab' zillj, nab':

—Beŋ'kin chongake' xshin Chioza', beena' nak beŋ' choo beŋ' xen, na' chzajni'gakile' beŋ' nez li che Chioza' gana' sho'cho kwenche bi kwiayi'cho.

¹⁸ Na'ch kon ka' wnaab' yog' lla, na' gokzedi Páblona', na'ch biyechej', golle' dii xiwaa yoob':

—Kon yel' wñabia' che Jesucrístona' nia' li' bichej.

Na' lii bichejte dii xiwaa.

¹⁹ Na' ka gokbe'i xam'ka' bich bi mech gongake' gan, na'ch beŋ'gake' Páblona' len Sílaža' na' jwa'gake' legake' lao joschiska'.

²⁰ Na' ka bllinlengake' legake' lao joschiska', na' che'gake':

—Beŋ' Israelki chta chñegake' beŋ', lallchoni.

²¹ Na' chli' chsedgakile' beŋ' dii bi chiyal' goncho ni bi chiyal' wlebcho, cho' nakcho beŋ' Roma.

²² Na' beŋ' zan bdi'a na' wñegake' zban che Páblona' len Sílaža'. Na'ch joschiska' bchogbia'gake' wdingake' xe'ka' na' bet wdingake' legake'.

²³ Na' ka wde bet wdinchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'.

²⁴ Na' daa gollgake' beeni ka', wlo'e legake' bill' xyoote na' bñi'e yen ñi'eka' to lee kwag' dii nyidjgake'.

²⁵ Na' do ka chel Páblona' len Síłaza' choe'lwillgake' Chioza' na' cholgake' choe'la'ogake'ne', na' beñ'ka' sto de lillyana' chzenaggake' ka chongake'.

²⁶ Na' tokonganzi wde to bedxo' xen wal na' bñiban doxen lillyana'. Na' lii byaljten, na' gdenka' diika' nchejgake' beñ'ka' de lillyana' tolazzin biyellgakan.

²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' beñ'ka' de lillyana' ba billeshgake'.

²⁸ Na' Páblona' besyee, golle'ne':

—¡Bibi goni kwino'! Nikz lle' yog'nto'.

²⁹ Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Síłaza', na' lii bçhek'te xibe'na' lawe'ka' do chxizze' daa le bllbe'.

³⁰ Na' lii bibejtie' legake' lillyana', na' chi'e:

—¿Le', beñ'do', beran chiyal' gon' kwençhe bi kwiayaa?

³¹ Na' gollgake'ne':

—Benlilalloo Xancho Jesucristona', li' na' do xiin xoolo', kwençhe yisle' le' na' bi kwiayi'le.

³² Na' be'lengake' le' na' beñ'ka' zoa lille'na' cho'a xtill' Xancho Jesúsza'.

³³ Na'ch beena' chap lillyana' wdibe' we'na' lliagake', la'kzi nakan wal' chel. Na' lekzka' yog'lołtie' lii wchoategake' nisa'.

³⁴ Na' bichi'e Páblona' len Síłaza' lille'na' na' bweej bwawe' legake'. Na' le chibayi beeni do xiin xoolo' daa ba nonlilall'gake' Chioza'.

³⁵ Na' ka wyeeni', josçhiska' bsel'gake' beñ' jellgake' beena' chap lillyana' yisane' legake' kwençhe yiyajgake'.

³⁶ Na' beena' chap lillyana' golle' Páblona':

—Ba bsel' josçhiska' beñ'ki, na' nagake' ba de lsens yisan' le'. Na' wak yiyajle ñaa, kochno bi goni le'.

³⁷ Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' beñ' na' wdixjzgake' neto' lillyani. ¿Ana' ñaa cheenzgakile' yisangake' neto' do ngash'zə? Yidch kwingake' yibejgake' neto'.

³⁸ Na' jayellgake' josçhiska' daa goll Páblona' legake', na' josçhiska' le bllbgake' ka wñezgakile' Páblona' len Síłaza' ndegake' kwent ka beñ' Roma.

³⁹ Na'ch wyaj josçhiska' jaye'xengake' Páblona' len Síłaza' na' bibejgake' legake' lillyana', na' got'yogakile' legake' bich yigaangake' yella'.

⁴⁰ Na' ka bichej Páblona' len Síłaza' lillyana', na' biyajgake' lill Lídiana' jawiagake' beñ'ka' ba nonlilall' Jesúsza' na' btipchgake' lall'gake', na'tech biza'gake'.

17

Bta bñe beñ' malka' beñ' Tesalónicaka'

¹ Na' ka biza' Páblona' len Síłaza', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yoona' gana' chdop chllag beñ' Israelka' choe'lwillgake' Chioza'.

² Na' lo shon xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioza',

³ bzajniile' legake' Crístona', beena' wlej Chioza' inabi'e, benan byen biya dii wxak'zi'e na' wite', na' bibane' ladj beñ' wetka'. Na' chi'e legake':

—Jesúza', beena' choe'len' le' xtilleena' ñaa, len' Crístona', beena' wlej Chioza' inabi'e.

⁴ Na' ba_l be_n' Israelka' wyaj_le'gake' na' bengake' txen Páblona' len Sílaza', na' lekzka' zan be_n' griegoka', be_n'ka' ba choe'la'ogake' Chioza', wyaj_le'gake' che Jesúza', na' lekzka' zan noolka' zakii.

⁵ Na' be_n' Israelka' bi wyaj_le', gokxe'gakile' Páblona' len Sílaza', na' btopgake' be_n' wdallagka' nak be_n' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaza' kwenche gongake' legake' lo na' be_n' yellka'.

⁶ Na' daa bi zoa Páblona' len Sílaza' na', na'ch wdoyogake' Jasónna' na' zi to chop be_n'ka' non_lilall' Jesúza' na' jwa'gake' legake' lao joschiska'. Na' wnegake' zillj che'gake':

—Be_n'ka' chda chbekgake' dii zed doxen yell-lioni ba bla'gake' yell chechoni.

⁷ Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto be_n' wñabia' le Jesús.

⁸ Na' be_n' yellka' len joschis che'ka' bllaagake' na' gokllesh'gakile'.

⁹ Na' wxenlall' joschiska' bllia Jasónna' mech len be_n'ka' nakgake'ne' txen, na'ch bisangake' legake'.

Páblona' len Sílaza' wyajgake' Bereana'

¹⁰ Na' kon ka go_l, be_n'ka' non_lilall' Jesúza' bisa'dogake' Páblona' len Sílaza' kwenche yiyajgake' yell Bereana'. Na' ka bllingake' yella', lii wyajtegake' gana' chdop chllag be_n' Israelka' choe'lwillgake' Chioza'.

¹¹ Na' be_n' Bereaka' nakchgake' be_n' wench aga ka be_n' Tesalónicaka', na' bibagakile' bzenaggake' daa bzajnii Páblona' len Sílaza' legake'. Na' yog' lla biyiljgake' lee Cho'a Xtill' Chioza' shi nakan ka daa chli' chsedgakile' legake'.

¹² Na' zan be_n' Israelka' zoa na' be_nlilall'gake' Jesúza' na' ka'kzə zan be_n' griegoka', ka be_n' byoka' na' ka noolka' zakii.

¹³ Na'ch be_n' Israelka' lle' Tesalónicana', be_n'ka' bi be_nlilall' Jesúza', ka wnezgakile' Páblona' choe'lene' be_n' Bereaka' xtill' Chioza', na'ch wyajgake' jata janegake' be_n' yellka'.

¹⁴ Na' be_n'ka' non_lilall' Jesúza' lii bsel'tegake' Páblona' cho'a nisdona'lə, na' Sílaza' len Timotewa' bigaangake' Bereana'zə.

¹⁵ Na' be_n'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Sílaza' len Timotewa' wtalall'gake' shajgake' gana' zoe'.

Páblona' zoe' yell Aténaza'

¹⁶ Na' shlak chbez Páblona' Sílaza' len Timotewa' yell Aténaza', le bllaa yichje' daa ble'ile' to ni to na' nzoa be_n' Aténaska' diika' choe'la'ogake'.

¹⁷ Ni cheyi daan bzajniile' be_n' Israelka' gana' chdop chllaggake' choe'lwillgake' Chioza', na' len zi xonj be_n' griego. Na' lekzka' yog' lla wyaje' gana' chak yaana' gana' lle' lla' be_n' na' be'lene' legake' dill'.

¹⁸ Na' ba_l epicúreoka', be_n'ka' chsedgake' daa bli' bsemi beena' wle Epicúreo, len ba_l estóicoka', wzologake' wdi_l xtilleeka' len Páblona'. Na' ba_le' che':

—¿Beran naz beeni chshaljchgue'?

Na' zi ba_le' nagake':

—¿Aaga beenin zidye'lene' cho' dillaa daa nan chiya_l' we'la'ocho sto chios yoblə?

Wnagake' ka' daa chyixje'i Páblona' legake' dill' wen dill' kob che Jesúza', chi'e legake' bibane' ladj be_n' wetka'.

¹⁹ Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' inezinto' bi dii koban chli' chsedilo'. ²⁰ La' ndantekzi nak dill'ki choo, na' cheeninto' inezinto' bi zejín.

²¹ La' yog' be_n' Aténaska' na' lekzka' be_n' zit'ka' zoa na', bichkzə bilə chongake', to chinozgake' bi dill' kob wzenaggake' na' to xtillii daazə choe'gake' yog' lla.

22 Na'ch Páblona' wzie' ladje'ka' gana' nzi' Areópago, na' golle' legake':

—Le' ben' Atenas, chakbe'id' le chibaile choe'la'ole diika' noni chios chele.

23 La' ba ble'id' yell cheleni to to latj gana' chgoole diika' balaan, na' ble'id' to ga da' to dill' dii na: “Che Chios, beena' kono nombia'.” Na' beena' chgoole balaan la'kzi bi nombia'lene', dill' che'nan' zidye'len' le' naa.

24 'Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ni'a na' ben'.

25 Na' aga bi chyallji Chioza' dii inacho gak gon ben' yell-liona' che'. La' len' none' yel' mban che yog'lolcho, na' none' bishbe checho, na' yog' bi dii de checho.

26 'Len' bxe bsile' to ben' yell-lio, na' yog'lolcho cho' nakcho xiin dia che beena' bxe bsile', na' le'kze' ba nllie' bia' bal yiz soacho yell-lioni na' gana' soa to tocho.

27 Na' bzoe' cho' yell-lioni kwenche yiyilcho nakan goncho gombia'chone'. Na' dii li gal' gllin zelen Chioza' to tocho,

28 la' len' chone' ka mbancho na' ka chzo chdacho. Kan' bzej bal ben' sin' cheleka', ben'ka' w nagake': “Nakcho xiin Chioza'.”

29 Na' daa nakcho xiin Chioza', bi chiya' gakicho nake' to ben' de or, de plat, de yaj, de yag, ka chaljlall' ben'ka' chongake' diiki.

30 Kana'teyi Chioza' bwialoze' ben ben'ka' daa nazan chegake' yel' bi chajni che'ka', per naanlla chone' byen yog'lol ben' lle' doxen yell-lioni yiyaj yilengakile'.

31 La' Chioza' ba bllie' bia' to lla gone' yel' joschis che to to ben' lle' yell-lioni, na' gone' che to toe' kon ka chidolee. Na' ba bliile' cho' beena' wleje' gon yel' joschisa' daa bilise'ne' ladj ben' wetka'.

32 Na' ka bengakile' wna Páblona' Chioza' chisbane' ben' ladj ben' wetka', bale' bxillgake', na' zi bale' gollgake'ne':

—Sto llagalə wzenagnto' cho' cheyi dga choo dill'.

33 Na' biza' Páblona' gana' lle' ben'ka'.

34 Na' bal ben' bengake'ne' txen na' ben'liilall'gake' Jesúza'. Na' ladje'ka' len to ben' lie' Dionisio, beena' len ben'ka' zakii chdop latja' nzi' Areópago, na' lezkza' sto noolə lie' Dámaris, na' sto chop ben' yoblə.

18

Biyaj Páblona' yell Coríntona'

1 Ka wde biza' Páblona' yell Aténaza', na' biyaje' yell Coríntona'.

2 Na' ka billine' Coríntona' billague' to ben' Israel lie' Aquila. Na' beeni nake' ben' yell Ponto na' nool che'na' lie' Priscila. Zi' bllinzgake' Coríntona' biza'gake' gana' mbani Itáliana', la' Claudiona', ben' wñabia'na', bisheshe' yog' ben' Israelka' Rómana' gana' zoe'. Na' Páblona' jawie' legake',

3 na' daa nlangake' toz ka llin, bigaanlene' legake', na' wdiagake' yid xa bayix'ka' daa chchingake' lwaa yoo.

4 Na' yog' lla sabd, Páblona' chaje' gana' chdop chllag ben' Israelka' choe'lwllgake' Chioza', na' chzajniile' ben'ka' lle' na' xtill' Jesúza', ka ben' Israel na' ka ben' bi nak ben' Israel.

5 Na' Síla' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' ben' Israelka' nan Jesúza' nake' Crístona', beena' wlej Chioza' inabi'e.

6 Per wzololəgake' chakdil-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkan wlliyi' kwinle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

⁷ Na'ch bizee kwite'ka' na' biyaje' lill to beṅ' le Justo, beena' choe'la'o Chioza', na' zoa lille'na' gao gana' chdop chllag beṅ' Israelka' choe'lwillgake' Chioza'.

⁸ Na' to beṅ' le Crispo ngoo lall' nee chgwee xṅezi cheyi diika' chon beṅ' Israelka' gana' chdop chllaggake', na' do xiiṅ xoole' wyajle'gake' che Xancho Jesúza'. Na' beṅ' zanch beṅ' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'.

⁹ Na'ch to lle' bli'lao Xancho Jesúza' Páblona', na' golle'ne':

—Bi illebo'. Be'ch xtillaana' lao beṅ'ki na' bi so' llizə.

¹⁰ Nad' zoalen' li', na' bi wi'a latj no bi goni li', la' beṅ' zan zi' gombia'gake' nad' yelli.

¹¹ Na' bigaan Páblona' Coríntona' twiz yoo gashj bli' bsedile' beṅ' cho'a xtill' Chioza'.

¹² Na' kana' chṅabia' beena' le Galión gana' mbani Acáyana', beṅ' Israelka' gogkake' toz beṅ'gake' Páblona' na' bche'gake'ne' gana' chon Galiónna' yel' joschisa'.

¹³ Na' che'gake' Galiónna':

—Beeni chde' chgooyeḷee beṅ' kwenche we'la'ogake' Chioza' nlla'lə aga ka na ley che Rómana' daa chṅabia' cho'.

¹⁴ Ka nan ine Páblona', lii wṅete Galiónna' beṅ' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'.

¹⁵ San shi chaole xya che dill' daa cho'e, na' daa chzetje' le beṅ', na' che ley chelena', bi nakan ka dii gon' yel' joschis cheyin. Le'zə, li' wwia naklə gonlen.

¹⁶ Na' bibeje' legake' gana' chone' yel' joschisa'.

¹⁷ Na'ch yog' beṅ' griegoka' beṅ'gake' Sósteneza', beena' chgoo xṅezin cheyi diika' chon beṅ' Israelka' gana' chdop chllaggake' choe'lwillgake' Chioza', bsetsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' beṅ'ka' nonlilall' Jesúza' na' bizee kwenche shaje' gana' mbani Síriana'. Na' Priscílana' len Aquílana' zejlengake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'.

¹⁹ Ka bllingake' yell Éfesona', Páblona' bikwaanze' Priscílana' len Aquílana', na' wzee wyaje' gana' chdop chllag beṅ' Israelka' choe'lwillgake' Chioza' na' be'lene' beṅ'ka' dill'.

²⁰ Na' beṅ'ka' ndop nllag na', wṅabgakile' Páblona' yigaaṅlenche' legake', na' Páblona' bi goonile'.

²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw.

²² Na' ka betje' barkwa' Cesareana', wyaje' Jerusalénna' jawape' chiox beṅ'ka' nonlilall' Jesúza'. Na' bizee biyaje' Antioquíana'.

²³ Na' bigaanē shloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' beṅ'ka' nonlilall' Jesúza'.

Apóloza' bi'e xtill' Chioza' Éfesona'

²⁴ Na' do kana' bllin to beṅ' Israel Éfesona' lie' Apolos, beṅ' golj yell Alejandríana'. Na' chak cho'e dill' lao lkwe' beṅ', na' le nsede' Cho'a Xtill' Chioza'.

²⁵ Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bseḷi Juanna' che daa chchoa beṅ' nisa'.

²⁶ Na' Apóloza' bi bllibe' bi'e dill' che Jesúza' gana' chdop chllag beṅ' Israelka' choe'lwillgake' Chioza'. Na' ka beni Priscílana' len Aquílana' ka chli' chsedí Apóloza', na'ch biche'gake'ne' kwenche bzajni'chgakile'ne' kwaslöl ka nak xṅez Chioza'.

²⁷ Ka goki Apóloza' shaje' gana' mbani Acáyana', ben'ka' nonlilall' Jesúza' btipgake' lallee na' bzejgake' to yish dii bexee che ben'ka' nonlilall' Jesúza' na', kwenche wlebgake'ne'. Na' ka blline', le goklene' ben'ka' ba biyesh'lallii Chioza' kwenche nonlilall'gake' Jesúza'.

²⁸ Na' bli' bsedile' ben' nan klelan chajni ben' Israelka' che Jesúza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na Jesúza' nake' Crístona', beena' wsel' Chioza' inabi'e.

19

Ka wzoa Páblona' Éfesona'

¹ Na' shlak wzoa Apóloza' Coríntona', Páblona' wdie' to to yellka' llia ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e bal ben' ba nonlilall' Jesúza'.

² Na' wñabile' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonlilall'le Jesúza'?

Na' ben'ka' gollgake'ne':

—Ni bi nezinto' shi zoa Espíritu Sántona' beena' no' ka'.

³ Na'ch Páblona' wizñabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴ Na'ch goll Páblona' legake':

—Dii Juanna' bzajniile' ben' chiya' choagake' nisa' daa wli'n ba biyaj bilengakile' na' lekzka' golle' legake' chiya' gonlilall'gake' beena' zi' yid, na' len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'.

⁶ Na' ka bxoá na' Páblona' yichje'ka', Espíritu Sántona' wyo'e loo yichjlall'do'eka' na' wnegake' wde wdeli dill' na' lekzka' wdixje'gake' dill' daa goll Chioza' legake'.

⁷ Na' ben'ki gok cheyin ka' nakgake' ka do shllin.

⁸ Na' wzoa Páblona' Éfesona' shon beo' bli' bsedile' ben' Israelka' gana' chdop chllaggake' choe'llwillgake' Chioza' na' bi bllibe'. Na' be'lenche' ben'ka' dill' kwenche wyajni'gakile' ka chñabia' Chioza' loo yichjlall'do' ben'ka' nonlilall'gake'ne'.

⁹ Na' bal ben'ka' nak ben' lall'do' wal aga goongakile' shajle'gake', na' biya dii wnagake' lao lkwe' ben' che nez li nez shao' che Jesucrístona'. Na'ch biza' Páblona' kwite'ka', na' bichi'e ben'ka' ba nonlilall' Jesúza', wyajlene' legake' lill to ben' le Tirano dii nak ka yoo skwel gana' chdi'a ben', na' bli' bsdchile' legake' yog' lla.

¹⁰ Gokte chop yiz bli' bsedile' legake', na' yog'lol ben'ka' lle' doxen Ásiana' bengakile' xtill' Xancho Jesúza', ka ben' Israel ka ben' griego.

¹¹ Na' Chioza' bchine' Páblona' kwenche bene' yel' wak xen dii benan ka bibanchgayi ben'.

¹² Na' axt no bachyichj, no lech' chjatigake'ne' na' chiyo'gake'n ga de ben' bi shao' na' chiyakgakile', na' lekzka' chichej dii xiwaa yoo ben'.

¹³ Na' bal ben' Israelka' chdagake' to to yell chibejgake' dii xiw'ka' yoo ben', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴ Ka' ben gall xiin to ben' Israel le Esceva, beena' nak to wñabia' che bxozka'.

¹⁵ Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi nezid' no le'.

¹⁶ Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'.

17 Na' yog' beṇ'ka' zoa Éfesona', ka beṇ' Israel ka beṇ' bi nak beṇ' Israel, wṇezgakile' ka gok che beṇ'ka', na' le bllebgage' na' wloochgage' Xancho Jesúza' balaan.

18 Na' zan beṇ'ka' ba nonlilall'gake' Jesúza' jaxoadol'gake' lao lkwe' beṇ' ka nak dii malka' ba bengake'.

19 Na' zan beṇ'ka' blan yel' willa'na' jwa'gake' libr che'ka' daa bsedgake' na' bzeygake'n lao yog' beṇ'ka'. Na' bengake' kwent ka'k' zak' librka' bzeygake', na' bllinan ka do shiyona mil mech plat.

20 Ka' gok blliljch xtill' Xancho Jesúza' na' beṇ' zanch beṇlilall'gake'ne' daa gokbe'gakile' xtill' Chioza' nsa'n yel' wak xen.

21 Na' ka wde gok yog' diiki, Páblona' bchoglallee shaje' lljawie' beṇ'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiya! shaa Rómana'."

22 Na'ch bselee Timotewa' na' Erástona' Macedóniana', beṇ'ki chop chaklengake'ne', na' le' bigaane' Ásiana' zi shloll wen.

Bta bṇe Demétriona' beṇ' Éfesoka'

23 Na' got' to dii zed wal Éfesona' daa chli' chsedi Páblona' che nez li nez shao' che Jesucrístona'.

24 Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len beṇ'ka' chonlengake'ne' llinna'.

25 Na' btope' beṇ'ka' chonlene' llinna' na' yog' beṇ'ka' nlangake' llin ka daa, golle' legake':
—Nezile llin dga nlancho dii xen chkwaanān checho.

26 Na' ba chen chle'ile ka chon beena' le Pablo, chde' chzajniile' beṇ' wlall chechoki na' doxen gani mbani Ásiani, chi'e aga bi zakii lwaa lsak' dii chon beṇ' kwenche we'la'ozgake'n. Na' beṇ' zan ba chzenaggake' che'.

27 Na' nxoll bich too diiki choncho, na' lekzka' nxoll bich seyi che yoodo' gana' zoa xnax Diana chechona', beena' nak beṇ' choo beṇ' xen. Na' beeni choe'la'o yog'zə beṇ' lle' gani mbani Ásiani na' beṇ' lle' doxen yell-lioni, gongakile'ne' ka to beṇ' bibi zakii.

28 Ka goll Demétriona' legake' ka', le bllaagake' na' besyaagake', nagake':

—¡Beṇ' choo beṇ' xen nak xnax Diana chechona', cho' beṇ' Éfeso!

29 Na' yog'lole' gokgake' toz, wlekgake' dii lchix wal yella', na' beṇ'gake' chop beṇ' Macedonia, toe' le Gayo, na' stoe' le Aristarco, beṇ'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'.

30 Na' Páblona' gokile' sho'e ladj beṇ'ka' ndop nllag na' kwenche nan we'lene' legake' dill', per beṇ'ka' nonlilall' Jesúza' aga be'gake' latj sho'e.

31 Na' lekzka' ladj joschis che beṇ' Ásiaka' len beṇ' nllagui Páblona', na' bsel'gake' rson, che'gake'ne':

—Ben goklen, bi shoo gana' lle' beṇ'ka'.

32 Na' beṇ'ka' ndop nllag na' chosyaagake', wde wdeli dii na to toe'. Na' zan beṇ'ka' len ladje'ka' ni bi nezgakile' biche lle'zgake' na'.

33 Na' bal beṇ' Israelka' bllig'gake' Alejándrona' lao beṇ'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'.

34 Na' ka ble'gakile'ne' na' gokbe'gakile' nan beṇ' Israelan, na'ch bizologake' chosyaa-gake', nagake':

—¡Beṇ' choo beṇ' xen nak xnax Diana chechona', cho' beṇ' Éfeso!

Ka do chop gor besyaagake' che'gake' ka'.

35 Na'ch beena' nak sikriban che yella' bzoe' legake' llizə. Na'ch golle' legake':

—Le' ben' wlall, yog' ben' yell-lio nezgakile' cho' ben' Éfeso chidol'cho gap wwiacho yoodo' che xnax Diana chechona', beena' nak ben' choo ben' xen. Na' nezgakile' lwaa lsakeena' za'n yabalə,

³⁶ na' ni to kono gak ina aga kan' nakan. Na' li soa llizə kwenche bi gonle to dii bi chiya' gonle.

³⁷ Ka nak ben'ki ba bidwa'le ni, bi inacho ba wlangake' bi de loo yoodo' chechona', ni bi inacho ba wnegake' zban che xnax Diana chechona'.

³⁸ Na' shi Demétrioni na' ben'ka' chonlengake'ne' llinna' de dii chak chegake' kon nottezə ben', daan chi' ben'ka' chhoglogake' che ben' na' wak shajgake' lawe'ka' kwenche gongake' yel' joschis che'ka'.

³⁹ Na' shi bichlə dii cheenile gak, chiya' yitopcho yog'lol ben' yell na' we'chon dill'.

⁴⁰ La' ka nak dga gok naa, nxoll ina ben' to cho'zan chta chnecho ben' yell, na' zbera inacho shi ba chnabgakile' cho' che dga ba gok naa?

⁴¹ Ka wde golle legake' ka', na' bisheshe' legake'.

20

Biyaj Páblona' Macedóniana' na' Gréciana'

¹ Na' ka bibe'lli daa ben ben' Éfesoka', na'ch gox Páblona' ben'ka' nonlilall' Jesúza' na' be'lene' legake' to chop dill' dii gaklenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'.

² Na' bidie' to to yellka' llia Macedóniana' na' be'lene' ben'ka' nonlilall' Jesúza' zan dill' dii btipan lall'gake'. Na' biyolla' billine' Gréciana',

³ na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchoglallee bigwee nez kon ni'aze ziyaje' Macedóniana'lə.

⁴ Na' ben' zan zejlengake' Páblona' Ásiana'. Ladge'ka' len Sópatera' xiin Pírrona', ben' Bereana'; na' Aristárcona' len Segúndona', ben' Tesalónicaka'; na' Gáyona', ben' Dərbena'; Timotewa', na'ch Tíquicono' len Trófimona', ben' Ásiaka'.

⁵ Na' yog' ben'ki wllialogake' laonto'na', na' wlezgake' neto' yell Tróaza'.

⁶ Na' ka wde lni Paskwa' kat' chaogake' yetxtila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez ben'ka' neto'. Na' wzoanto' na' gall lla.

Billin Páblona' yell Tróaza'

⁷ Na' ka bllin lla dmiwa', lla nech che xmanna', bdop bllagnto' weej wdaonto' txen len ben'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, axt chelch wyeelo be'lene' legake' dill'.

⁸ Na' ndop nllagnto' to loo yoo dii llia shkwia cha'lə, na' nakan bido yi'zi.

⁹ Na' to bi' wew' lliab' cho'a ventanna', na' leb' Eutico. Na' daa bshaljlen Páblona' ben'ka' ssha, be'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'.

¹⁰ Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' ben'ka':

—Bi illeble; mbankzba'n.

¹¹ Na'ch biyep Páblona' dii yoblə, bxoxje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee.

¹² Na' ka billesh ben'ka', chibagakile' biche'gake' bi' wewaa shi'a shbam'.

Biza' Páblona' Tróaza'

¹³ Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'.

14 Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene.

15 Na'ch biza'nto' Mitilénena', na' betiyo bidento' gaozə yell-lío Quíona' daa lliá lo nisdona'. Na' gok lillj billinnto' yell-lío Sámoza' daa lliá lo nisdona', na' llana' sto wyajchnto' yell Milétona'.

16 Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' lni Pentecostéza'.

Billag Páblona' ben'ka' ngoo lo na'gake' ben'ka' nonlilall' Jesúza' Éfesona'

17 Na' ka zoanto' Milétona', Páblona' bselee rson na' goxe' ben'ka' ngoo lo na'gake' ben'ka' nonlilall' Jesúza' Éfesona'.

18 Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani.

19 Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' ben' Israelka' nad'.

20 Na' aga ni che ka' bsan' bich wnia' le' daa chiya' inezile, san bli' bsdchkzid' le' gana' chdop chllagle na' ka'kzə lill to tole.

21 Ka ben' Israel ka ben' bi nak ben' Israel, be'lengakee dill' nan chiya' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'.

22 Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'.

23 Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'.

24 Na' aga bi chakid' cheyi diika' gak cha', la' aga llialo yel' mban cha'ni, san lliarote yiyoll gon' yog'lol' daa ben Xancho Jesúza' lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

25 'Na' ba bzajniid' le' ka chon Chioza' chnabi'e loo yichjlall'do' ben' chonlilalleene', na' naa ni stole le' bich ile'ile nad' yell-lioni.

26 Daan nia' le' naa, aga bi dol' nap' shi nole kwiayi'.

27 La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'.

28 Na' li wsak', li gap wwia ben'ka' nakle txen, la' Espíritu Sántona' wleje' le' kwenche gap wwiale ben'ka' nonlilall' Xancho Jesúza', ben'ka' biya'o bizi'lene' xchene'na' daa blalje' lee yag cruzá'.

29 La' nezid' kat' bich soalen' le' na' yid ben' gonllejgakile' le' kwenche kwej yichjle daa nonlilall'le Jesúza'. Gongake' ka ba znia, ba chjatao xil'do' che ben'.

30 Na' ladjlena' ichej ben' wli' wsedile' le' daa bi nak shli kwenche gonlene' txen.

31 Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

32 'Na' naa, chon' le' lo na' Chioza' len cho'a xtilleena' daa na le chakile' cho'. La' linnan' napan yel' wak kwenche gaklenen le' soachechle gonlilall'lene'. Na' ka' lljazoalenlene' txen len yog' ben' nakgake' lall' nee.

33 Nezkzile bibin' selallaa chele, ni xmechle, ni xalaanle, ni bichlə dii naple.

34 Na' nezkzile ni'a na'ni benlen' llin kwenche bllelid' bi dii byalljlenid' ben'ki chonlen-gake' nad' xshin Chioza'.

35 Ben' llinna' kwenche bliid' le' ka chiya' gaklencho ben' kat' bi chyalljgakile'. La' chiya' lljadinicho xtill' Xancho Jesúza' kana' wne': "Mbalazch soacho shi we'cho ben' bi we'chone', aga ka daa ikaacho bi dii gone' cho'."

36 Na' ka biyoll be'len Páblona' legake' dill', na'ch bchek' xibe'ka' be'llwillgake' Chioza'.

37 Na' yog'gake' wchell, na' wdel'gake' Páblona' na' bnopgake'ne'.

³⁸ Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

21

Biyaj Páblona' Jerusalénna'

¹ Na' ka bilaanto' beñ' Éfesoka', na'ch biyoonto' loo barkwa' ziyajnto' shlichá yell-lio Coza' daa lliá lo nisdona', na' betiyo billinnto' yell-lio Ródaza' daa lliá lo nisdona', na' biza'nto' billinnto' yell Pátarana'.

² Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n.

³ Na' ka zejnto' loo barkwa' ble'into' yell-lio Chíprena' daa lliá lo nisdona' na' to wdeznto' shlaana'lə zejnto' yell Tírona' daa lliá gana' mbani Síriana'. Na' ka billin barkwa' Tírona', biletjgake' yoa'na' noa'n na' biyetjnto'.

⁴ Na' jadjijnto' beñ'ka' nonlilall' Jesúza' na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'.

⁵ Na' ka gok to xman biza'nto'. Na' yog' beñ'ka' ba nonlilall' Jesúza' yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a nisdona', bchek' xibnto' be'lwillnto' Chioza'.

⁶ Na'ch bilaa ljwellnto' dill', na' biyoonto' loo barkwa', na' beñ'ka' biyajgake' lill che chegake'.

⁷ Na' biza'nto' Tírona' billinnto' yell Tolemáidana', na' bwapnto' chiox beñ'ka' nonlilall' Jesúza' na', na' bigaanlennto' legake' shlla.

⁸ Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen beñ'ka' gall chaklengake' postlka', na' bigaannto' lille'na'.

⁹ Na' zoa tap bi' nool wew' che', na' chyixje'gakb' daa che' Chioza' legakb'.

¹⁰ Na' ka ba gok shon tap lla zoanto' lille'na', na' bla' to beñ' Judea lie' Ágabo, beñ' chyixjee daa che' Chioza' le'.

¹¹ Bidwie' neto' na' wñabe' xpachlee Páblona' na' biçhej ni'a na' kwine', na' chi'e:

—Ba bzajni Espíritu Sántona' nad' ne' beñ' wlalka' lle' Jerusalénna' wchejgake' ni'a na' xan bachleeni ka ba nchej' ni'a na'ni, na' gongake'ne' lo na' beñ'ka' bi nak beñ' Israel.

¹² Na' ka beninto' wna Ágabona' ka', neto' len beñ' Cesareaka' got'yointo' Páblona' bi yiyaje' Jerusalénna'.

¹³ Na' Páblona' wne' neto':

—Bi kwell-le cha', bi gonle ka gakyeshid'. Zoakz' wtil' diika', aga toz daa wchejgake' nad', san wakte witgake' nad' daa nonlilallaa Xancho Jesucrístona'.

¹⁴ Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesúza'.

¹⁵ Na' ka wde, bisini'a çhento' kwenche biza'nto' ziyajnto' Jerusalénna'.

¹⁶ Na' bal beñ' Cesareaka' nonlilall' Jesúza' wza'lengake' neto'. Na' bche'gake' neto' lill to beñ' le Mnasón, gana' yigaañnto'. Beeni nake' beñ' Chipre na' ssha ba gok nonlilallee Jesúza'.

Páblona' jawie' Jacóbona' Jerusalénna'

¹⁷ Na' ka billinnto' Jerusalénna', le chibayi beñ'ka' naknto' txen nonlilall'nto' Jesúza'.

¹⁸ Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' beñ'ka' ngoo lo na'gake' beñ'ka' nonlilall' Jesúza' Jerusalénna'.

¹⁹ Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj beñ'ka' bi nak beñ' Israel.

20 Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':
—Li', beñ' bish', ñezkzilo' beñ' zan wal inleeb beñ' Israelka' ba nonlilall'gake' Jesúza', na' yoguee nagake' chonan byen goncho daa na leya'.

21 Na' ba bengakile' rson ka chono', na' nagake' chzajniilo' yog' beñ' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sen daa le circuncisión, na' bich gongake' daa yoolocho choncho.

22 ¿Nakra gonchon, lla? La' lii idop illagte beñ' kat' inezgakile' ba biyedo'.

23 Wاكلja gono'n ki: Ladjnto'ni zoa tap beñ' nchebe' to dii nchebe' lao Chioza', na' chonan byen wdelazgake' daa nchebgake'.

24 Chiyal' wchi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gak wshib yichje'ka' ka nllia leya' bia'. Na' shi gono' ka', yog' beñ' inezgakile' bi nakan ka nagake' cho', na' gakbe'gakile' lezkza' chzenago' daa na leya'.

25 Na' ka nak beñ'ka' bi nak beñ' Israel na' ba nonlilall'gake' Jesúza', ba bzejnto' legake' bi kwe' yichjgake' diika' zejlencho cho' beñ' Israel. Na' gollnto'gake' daa chiyal' gongake': bi gaogake' yel' wao daa ba bllia beñ' lao lwaa lsak' daa choe'la'ogake', na' bi gaogake' xchen bayixaa, ni xpel' bana' bi wlalj xchema', na' bi inelenzgake' xiin xool beñ'.

Bex'gake' Páblona' yoodo'na'

26 Na' betiyo ka bixi biyech Páblona' len beñ'ka' zi tap, na' wyajgake' yoodo'na' kwenche wzenile' bxozka' bi llan sheelo daa ba nchebgake' kwenche ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

27 Na' ba zoa iza' gall lla chongake' daa chiyal' gongake' kwenche yixi yiyechgake', na' bal beñ' Israelka', beñ'ka' zaak Ásiana', ble'gakile' Páblona' loo yoodo'na'. Na'ch bta bnegake' beñ'ka' lle' na', kwenche bex'gake' Páblona'.

28 Na' wnegake' zilljə che'gake':

—Le', beñ' Israel, li' gaklen neto'. Beeni chde' doxen chli' chsedile' beñ' kwenche gakzbangakile' cho' beñ' Israel, len ley chechona' na' yoodo' chechoni. Na' naa sto dii zban wal ba bizone', ba wlo'e to chop beñ' griego yoodo' chechoni, la' bi de lsens sho' beñ'ki lill xlatj Chios chechona'.

29 Wnagake' ka' daa ba ble'gakile' Trófimona', to beñ' yell Éfeso, chdalene' Páblona' txen Jerusalénna', na' gogkakile' lezkza' bche' Páblona'ne' yoodo'na'.

30 Yog'z beñ' lle' yella' bllesh bcheengake' zejdogake'. Na'ch bigoyogake' Páblona' axt de xneze' bibejgake'ne' yoodo'na', na' lii bsejtegake' puertka'.

31 Na' ba llagdia'gake' Páblona' cheengakile' wittekzgake'ne' ka bllin dillaa lao beñ' wnabia' che soldadka' nan chak dane nleeb doxen yell Jerusalénna'.

32 Na' lii btoptie' soldadka' na' beñ'ka' ngoo lall' na' legake' na' wyajdogake' gana' lle' beñ'ka'. Na' beñ'ka' chit Páblona' ka ble'gakile' beñ' wnabia'na' len soldad che'ka', na'ch bsangake' bich bet wdingake'ne'.

33 Na'ch jabig' beñ' wnabia'na', na' bexee Páblona' na' bene' mandad bchejgake'ne' chop gden. Na'ch wnabile' beñ'ka' no beena' na' bin bene'.

34 Na' beñ'ka' kon chosyaagake' na' chiya dii na to toe', na' bi wyajinii beñ' wnabia'na' daa zi'te chongake' sshag. Na'ch bene' mandad biche' soldadka' Páblona' gana' zoagake'.

35 Na' ka bllingake' cho'a shkwiaka' lle' cho'a lill soldadka' benan byen bñen soldadka' Páblona' daa zej beñ' Israelka' cheengakile' wnizgake'ne'.

36 Na' beñ' zan nogake'ne' chosyaagake', che'gake':

—¡Lii wittegue'!

Páblona' cho'e dill' lao beñ' Israelka'

37 Na' ka ba zoa lljloogake' Páblona' gana' zoa lill soldadka', na'ch golle' beñ' wnabia'na':

—¿Awak we'len' li' to chop cho'a dill'?

Na' beñ' wnabia'na' golle'ne':

—¿Achako' dill' griegona'?

³⁸ ¿Aaga lin' beṇ' Egíptoná' beena' wzoshiyi' beṇ' wṇabia'ka' kani batzə, na' b̄chi'e tapa mil beṇ' wen xyaka' latja' gana' bibi chashj ch̄leb'?

³⁹ Na'ch goll Páblona'ne':

—Aga le' nad'. Nad' nak' to beṇ' Israel, beṇ' yell Tarso dii nak' to yell xen gana' mbani Cilíciana'. Ben goklen be' latj we'len' beṇ'ki dill'.

⁴⁰ Na' beṇ' wṇabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwenche soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak' xtill'gake', chi'e:

22

¹ —Le' beṇ' bish', na' le' beṇ' gol, li wzenag dill' cha'ni wi'a.

² Na' beṇ'ka', ka bengakile' ch̄ne Páblona' dill' hebrewa' na' wlle'gake' llizə. Na' Páblona' chi'e legake':

³ —Nad' nak' beṇ' Israel na' golj' yell Társona' gana' mbani Cilíciana', per bgol' Jerusalénni, na' bli' b̄sedi maestro Gamaliela' nad' kwas̄l̄ol̄ ka na' ley che dii x̄ozxto'choka', na' toshiizi choe'l̄-lallaa chon' ka chazlall' Chioza' do yichj do lallaa, ka chonkzle le' ṇaanlla.

⁴ Na' b̄chi' bsakaa beṇ'ka' ba wyoo lo nez li nez shao' che Jesucristona' na' goklallaa guetgake'. Na' beṇ'ka' ka nool ka beṇ' byo, na' wlo'a legake' lillyana'.

⁵ Beena' nak' b̄x̄oz choo b̄x̄oz xen na' yog' beṇ' golka' ch̄n̄abia' beṇ' Israelka' nezgakile' ka beṇ'. Na' legake' bengake' nad' yish daa beṇ'ka' ka wzaa zyaa yell Damáscona', gokid' lljex̄aa yog'lōl̄ beṇ'ka' nogake' xtill' Jesucristona' na' yiche'gakee Jerusalénni kwenche sak'zi'gake'.

Be' Páblona' dill' ka gok ben̄l̄ilallee Jesúza'

(Hch. 9:1-19; 26:12-18)

⁶ Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa.

⁷ Na' to wzoatishz' lo yona'. Na'ch benid' shii to beṇ' wne' nad': “Saulo, Saulo, ¿berache ch̄chi' chsak'zo' nad'?”

⁸ Na' wṇabidee, chepee: “¿No li', beṇ'?” Na' wne': “Nadaan Jesús, beṇ' Nazareta', beena' ch̄chi' chsakoo.”

⁹ Na' beṇ'ka' zyaalen' txen ble'gakile' yi'na' daa wyalj na' b̄l̄lebgake', per aga bengakile' daa wna beena' nad'.

¹⁰ Na'ch goshee: “¿Beran chiya'l' gon', X̄an'?” Na' wne' nad': “Biyas na' wyaj Damáscona', na' na' in̄agake' li' yog' daa chiya'l' gono'.”

¹¹ Na' beeni' wala' b̄cholan' nad', na' beṇ'ka' zyaalen' txen biyoṅ'gake' na'na' na' b̄che'gake' nad' Damáscona'.

¹² Na' Damáscona' zoa to beṇ' le Ananíás, na' zoe' chone' yog' daa na' leya', na' yog' beṇ' Israelka' zoa Damáscona' nagake' che' nake' to beṇ' chon dii wen.

¹³ Na' Ananíaza' bide' bidwie' nad', na' ka blee, wne' nad': “Saulo, beṇ' bish', ṇaa yile'ilo' sto shii.” Na' kate wne' ka', lii bile'teid', na'ch gok ble'idee.

¹⁴ Na'ch wne' nad': “Chioza', beena' be'la'o dii x̄ozxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak' liizelozí beṇ' wen, na' benteilo' kwine'n ba bshaljlene' li'.

¹⁵ Na' li' wi'o xtilleena' doxen yell-lioni, na' we'leno' beṇ' dill' yog'lōl̄ diika' ba ben ble'ilo'.

¹⁶ Na' ṇaa, bibi wsej wllonan choatego' nisa' na' wṇabi X̄ancho Jesúza' yisol yin̄ite' saaxya cho'ka'.”

¹⁷ Na' ka biyed' Jerusalénni, wyaa yoodo'na' je'l̄will' Chioza', na' Chioza' bene' ka ble'do'id'.

18 Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtillaana' daa we'lengako'ne'."

19 Na'ch chepee: "Xan', legake' nezgakile' ka wya' to to gana' chdop chllagnto' choe'lwillnto' Chioza' jexaa beŋ'ka' nonlilall' li', na' bet wdingakee na' biĉhe'gakee ni, bsejgakee lillyana'.

20 Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa beŋ'ka' bet le'."

21 Na' Jesúza', beena' nak Xan', wne' nad': "Wloo nez, wyaj yell zit'ka' na' je'len beŋ'ka' bi nak beŋ' Israel xtillaana'."

Páblona' goke' lo na' beŋ' wŋabia' ĉhe soldadka'

22 Zeelo diika'z bzenaggake' ĉhe Páblona', na'ch wzolo chosyaagake' che'gake':

—jBisol biŋittegue' yell-lioni! jAga chiyal' soach ka le'!

23 Na' bikzə bsangake' chosyaagake' daa le chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə.

24 Na' beŋ' wŋabia' ĉhe soldadka' bene' mandad wloogake' Páblona' gana' zoa lill soldadka' na' wit ĉhingake'ne' kwenĉhe wi'e dill' bin bene' daa zi'te chllaa beŋ'ka' le'.

25 Na' ka ba nĉhejgake'ne' kwenĉhe wit ĉhingake'ne', Páblona' golle' xan soldadka':

—jAde lsens wit ĉhinle to beŋ' nde kwent Rómana' la'kzi biŋ' yiyiljyoll-le bin bene'?

26 Na' ka goll Páblona' xan soldadka' ka', na'ch jelle' beŋ' wŋabia' ĉhe'ka':

—Wsak'shkilo', nde beeni kwent yell Rómana', na.

27 Na' beŋ' wŋabia' ĉhe soldadka' wyaje' kwit Páblona' na' wŋabile'ne', chi'ene':

—jAlin ndio' kwent yell Rómana'?

Na' Páblona' chi'ene':

—Awe.

28 Na'ch beŋ' wŋabia' ĉhe soldadka' chi'e Páblona':

—Nad' mech xen wxakidaan kwenĉhe ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

29 Na' daa goll Páblona' ka', beŋ'ka' nan wit ĉhingake'ne' lii bikwastegake' kwite'na'. Na' axt beena' ĉhŋabia' soldadka', ka gokbe'ile' Páblona' ndie' kwent yell Rómana', le bllibe' daa bene' mandad bĉhejgake'ne' gdenka'.

Bzegake' Páblona' lao beŋ'ka' ĉhŋabia' beŋ' Israelka'

30 Na' betiyo, beŋ' wŋabia' ĉhe soldadka' btope' bĉozka' ĉhŋabia' na' yog'lol beŋ'ka' ĉhŋabia' beŋ' Israelka'. Na' bselle' gdenka' daa nĉhej ŋi'a na' Páblona', na' wleje'ne' bzie'ne' lao beŋ'ka' daa cheenile' inezile' biĉhe chao beŋ' Israelka' xya ĉhe'.

23

1 Na'ch Páblona' bwie' beŋ'ka' ĉhŋabia' beŋ' Israelka' na' golle' legake':

—Le' beŋ' bish', nezi yiĉhlall'dawaani axt naa chon' daa chazlall' Chioza'.

2 Na'ch Ananíaza', beena' nak bĉoz choo bĉoz xen, golle' beŋ'ka' ze kwit Páblona' kwall'gake' cho'ena'.

3 Na' Páblona' golle'ne':

—jChioza' wit ĉhine' li', wxiye'! Li' chi'oni kwenĉhe yiya yiyiljo' nad' kon ka na leya', per chyishjo' daa na leya' daa beno' mandad wlall'gake' cho'ani.

4 Na'ch beŋ'ka' lle' na', che'gake' Páblona':

—jNaktekara chiyaxjilo' chilliizo' dill' beena' nak bĉoz choo bĉen ĉhe Chioza'?

5 Na'ch Páblona' golle' legake':

—Le' beŋ' bish', bi nezd' shi len' bĉoz choo bĉoz xenna'. Shel'ka' nezd', aga goshee ka', la' Cho'a Xtill' Chioza' nan: "Bi inio' zban to beŋ' wŋabia' ĉhe yell ĉho'na'."

⁶ Na' Páblona' gokbe'ile' beṇ'ka' chṇabia' nakgake' chop kwenlə. Baḷe' nak txen saduceoka' na' baḷe' nak txen fariseoka'. Na'ch wṇie' zillj chi'e:

—Le' beṇ' bish', nad' nak' fariseo na' naktia' xiin fariseo. Na' chaole xya cha' daa non' lez yiban beṇ' wetka'.

⁷ Ka goll Páblona' ka' na' gok to wishesh wal ladj fariseoka' len saduceoka'. Na' gokgake' choplə.

⁸ La' saduceoka' nagake' aga wibanch beṇ' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban beṇ' wetka'.

⁹ Na' yog'gake' besyaagake' choe'gake' wde wdeli dill'. Na'ch wzolla' baḷ beṇ'ka' chli' chsedí leya' nakgake' txen fariseoka', na' che'gake':

—Ni to dii mal biṇ' gon beeni. Shera shi to beṇ' bi' gak ile'icho wa to anjlan' ba wṇie' le'. Bi' chiyal' soshi'cho Chioza'.

¹⁰ Na' daa zi'telə gokdil'-len ljwell beṇ'ka', bxolli beṇ' wṇabia' che soldadka' wxoxj wtingake' Páblona'. Na'ch wṇie' soldadka' yibejgake' Páblona' ladjeka' na' lljaloogake'ne' dii yoblə gana' zoa lille'ka'.

¹¹ Na' llana' sto ka gol, bli'lao Xancho Jesúsza' Páblona' na' golle'ne':

—Bendiplaloo Pablo, ka ba be'kzo' xtilaana' Jerusalénni, ka'kzan chonan byen lljeno' Rómána'.

Chgoogake' xṇezin witgake' Páblona'

¹² Na' betiyo baḷ beṇ' Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak biṇ' witgake'ne'.

¹³ Wdeli choa beṇ'ka' wloo cho'agake' witgake' Páblona'.

¹⁴ Na'ch wyajgake' lao bxozka' chṇabia' na' lao beṇ' gol che'ka' chṇabia' beṇ' Israelka' na' jellgake':

—Ba bchebnto' wsak'zi' Chioza' neto' shi yeej gaoznto' na' biṇ' witnto' Páblona'.

¹⁵ Na' le' nakle beṇ' wṇabia' chento', li' gak toz na' li' inabi beṇ' wṇabia' che soldadka' kweje'ne' wxē na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

¹⁶ Na' bi' che beṇ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'.

¹⁷ Na' Páblona' wṇie' to beṇ' nak xan to guioa soldadka', golle'ne':

—Jwa'gach bi'ni lao beṇ' wṇabia' che soldadka', la' de to dii ye'b' le'.

¹⁸ Na' xan soldadka' jweeb' lao beṇ' wṇabia' che yog' soldadka', na' golle'ne':

—Páblona', beena' nej lillyana', wṇabile' nad' yidwa' bi'ni lawo'ni, la' de to dii inab' li' na.

¹⁹ Na' beṇ' wṇabia' che yog' soldadka' beṇee na' bi'na', na' bchi'eb' ga kono lle'. Na'ch wṇabile'b':

—¿Beran cheenilo' ino' nad'?

²⁰ Na' bi' xkwidaa gollb' le':

—Beṇ' Israelka' ba gokgake' toz kwenche inabgakile' li' kwejo' Páblona' wxē na' wseloone' lao beṇ'ka' chṇabia' legake', na' wda'tezgakile'n yiyiljyollgake' berakzan bene'.

²¹ Na' bi' shajli'o chegake', la' wdeli choa beṇ'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgake' na' biṇ' guete'. Na' ba chbezgake' gono' ka cheengakile'.

²² Na'ch beṇ' wṇabia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

Bsel'gake' Páblona' lao beṇ' wṇabia'na' le Félix

²³ Na'ch beṇ' wṇabia' che soldadka' wṇie' chop xan soldad che'ka' na' bene' mandad wzengakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyoagake' shajgake' ni'azgake', na' giyonshigake' kwiagake' kabay na' zi chop guiyoagake' gox'gake' lanza.

²⁴ Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix', beena' chṇabia'.

²⁵ Na'ch bgoxee legake' to yish dii na ki:

²⁶ “Si'xengacho' beṇ' wṇabia' Félix, nad' Claudio Lisias chzej' li', na' chwap' li' chiox.

²⁷ Ka nak beeni chselaa lawo'na', beṇ' Israelka' bex'gake'ne' na' ba zoa witgake'ne' shel' ki nad' jasla'ne' len soldad cha'ka', la' wṇezid' ndie' kwent yell Rómana'.

²⁸ Na' daa goklallid' inezid' berache chaogake' xya che', jwaane' lao beṇ'ka' chṇabia' beṇ' Israelka'.

²⁹ Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya.

³⁰ Na' ka wṇezid' beṇ' Israelka' ba ngoogake' xṇezin witgake'ne', bchoglallaa wselaaane' lawo'na'. Na' ba gosh' beṇ'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

³¹ Na'ch soldadka' lle' na' bche'gake' Páblona' zejlengake'ne', bllinlentegake'ne' yella' le Antípatris kon ka goll beṇ' wṇabia' che'ka' legake'.

³² Na' betiyo, soldadka' zej ni'azgake' bibiigake' ziyajgake' Jerusalénna'. Na' beṇ'ka' llia kabayka' zejlengchake' Páblona'.

³³ Na' ka bllingake' Cesareana', be'gake' beṇ' wṇabia'na' yisha' nox'gake' na' bengake' Páblona' lo nee.

³⁴ Na' ka wde blab beṇ' wṇabia'na' yisha', na'ch wṇabile' Páblona' ga beṇaan. Na' ka wṇezile' Páblona' nake' beṇ' yell Tarso, daa llia gana' mbani Cilíciana',

³⁵ na'ch golle'ne':

—Na' wzenagshkid' bin ino' kat' yid beṇ'ka' chao xya cho'.

Na'ch bene' mandad lljasejgake'ne' yooná' beṇ' dii Heródeza', gana' chzoa beṇ' wṇabia'ka'.

24

Be' Páblona' dill' lao Félix'

¹ Gok gay' lla zoa Páblona' Cesareana' ka bllin bxoz choo bxoz xenna', beena' le Ananías, na' nchi'e bal beṇ' golka' chṇabia' na' kon to beṇ' wide dill', beṇ' le Tértulo. Na' bllingake' lao beena' chṇabia' kwenche gaogake' xya che Páblona'.

² Na'ch bdegake' Páblona' lao beṇ' wṇabia'na' le Félix na' wzolo Tértulona' chawe' xya che', chi'e:

—Choṇkeno' li', beṇ' wṇabia', zoanto' mbalaz na' chak wen chento' lallnto'ni daa chak koo xṇezi yog'lolte kon ye'l' sin' cho'na'.

³ Na' daan, gattez zoanto' toshiizi nanto' li' choṇkeno' dii zan las, li' beṇ' wṇabia'.

⁴ Na' kwenche bich wshayinto' li', chṇabinto' li' gono' goklen wzenago' to chop ka nak dga inanto' li'.

⁵ Ka nak beeni ze lawo'ni, ṇezinto' nake' to beṇ' chbek dii zed, na' chdaze' doxen yell-lioni chta chṇie' beṇ' kwenche neto' beṇ' Israel gaknto' chopla, na' ngoo lo nee xonj beṇ' chonlilall' to beṇ' Nazaret.

⁶ Ga biyollin, goklallee kwee loo yoodo'na' beṇ' bi nak beṇ' Israel. Daan bex'nto'ne'.

⁷ Na' wyaz beṇ' wṇabia' che soldadka', beena' le Lisias, na' bigoyoe'ne' lo na'nto'na'.

⁸ Na' wne' neto' chiyal' yidnto' lawo'ni kwenche gaonto' xya che'. Na' kwino' naa, wak inabilo' Pábloni kwenche inezilo' biche chaonto' xya che'.

⁹ Na' beṇ' Israelka' lle'lengake' na', bischopgake' dillaa che'gake': “Ka nakannan'.”

¹⁰ Na'ch beṇ' wṇabia'na' bene' seṇ lao Páblona' kwenḅe wi'e dill', na'ch wzolo Páblona' chi'e:

—Nezid' ba gok zan yiz chono' yeḷ' josḅhis ḅe beṇ'ki lle' gani mbanilo'. Daan chibaid' wi'a dill' daa chak ḅa' lawo'ni.

¹¹ Zi' gok shllin' lla billin' Jerusalénna' jaye'lawaa Chioza', na' shi cheenilo' gakliyilo'n, wak inabo' kwenḅe xenlalloo ka nakannan'.

¹² Na' kono ble'i nad' chakdil'-len' beṇ' wa chbekw' wdil' wishesh ladj beṇ', ni loo yoodo'na' ni gan yoblə ga chdop chllagnto' choe'lwilnto' Chioza' ni gachli yella'.

¹³ Na' ka nak diiki na beṇ'ki ḅa', ni ton bi gongake' gan inagake' ka nakannan'.

¹⁴ Lete to dii wḅeb' lawo'ni choe'lawaa Chioza', beena' be'la'o dii xoxto'nto'ka', kon ka nak nez li nez shao' ḅe Jesucristona' daa yo'a, daa na beṇ'ki bi zejan shli. Per chajli'a yog' daa na ley ḅe Chioza' na' diika' bzej dii beṇ'ka' wdixjee daa golle' legake'.

¹⁵ Na' ka beṇ'ki chao xya ḅa' na' ka nad', toz ka nonnto' lez yisban Chioza' beṇ' wetka', ka beṇ' wen ka beṇ' mal.

¹⁶ Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao beṇ' yell-lioni.

¹⁷ Ba gok zan yiz chda' yell zit'ka', na' billin' Jerusalénna' kwenḅe wi'a mech dii gaklenan beṇ' wlall ḅa'ka' na' lekzka' wi'a bi dii wi'a yoodo'na'.

¹⁸ Na' diikin chon' ka biyoll bixi biyech' kon ka na leya', kat' to ḅhop beṇ' Israel, beṇ' zaak Ásiana', ble'gakile' nad' yoodo'na'. Aga no beṇ' ntop nshag' na' ni to wdil' wishesh bi mbek'.

¹⁹ Legaken' chiyal' yidgake' ni gaogake' xya ḅa' shi bin ble'gakile' chon'.

²⁰ Wa beṇ'ki zoa ni, inashkigake' shi bi dii mal billelgakile' ḅa' kana' jwa'gake' nad' lao beṇ' wṇabia' ḅhento'ka'.

²¹ ¿Awa shi daa besyaa goshgakee: “Chaozle xya ḅa' daa chajli'a wllin lla yiban beṇ' wetka'”?

²² Na' ka biyoll beni Félix'a wna Páblona' ka', na' bsane' bich bene' yeḷ' josḅhis ḅe'na', la' ba wṇezile' nakan nak diika' chajle' beṇ'ka' yoo lo nez li nez shao' ḅe Jesucristona'. Na' golle' beṇ'ka':

—Kat' yid Lísiaza', beena' chṇabia' soldadka', kana' ineyzen'id' nakran nak dga chak ḅhele.

²³ Na'ch Félix'a golle' xan soldadka' wseje' Páblona', per bi wllone' sho' beṇ'ka' nombia' le' na' llje'gake'ne' bi dii chyalljile'.

²⁴ Na' ka wde ḅhop shon' lla, bizllinlen Félix'a' xooole'na' le Drusila, to nool Israel. Na'ch ben Félix'a' mandad bllin Páblona' lawe'ka' kwenḅe wzenaggake' dillaa daa cho'e daa ne' chiyal' gonlilall'cho Jesucristona'.

²⁵ Na'ch be' Páblona' dill' chi'e chiyal' goncho byen goncho wen na' bi goncho daa nazan ḅhecho, la' wllin lla yizi' Chioza' kwent ḅe to tocho. Na' ka beni Félix'a' xtilleena', le bllibe'. Na'ch golle' Páblona':

—Ba gokz to ka't', na' kat' gat' latj ḅa'na' inia' li' dii yoblə.

²⁶ Félix'a' lekzka' goklallee we' Páblona' le' mech kwenḅe yisane'ne'. Daan zekizezi wnie'ne' kwenḅe be'lene'ne' dill'.

²⁷ Ka'z wde ḅhop yiz, na' ka bichej Félix'a' bich wṇabi'e na' wyoo to beṇ' yoblə lie' Porcio Festo. Na' kwenḅe ile'shii beṇ' Israelka' Félix'a', bi bisane' Páblona'.

25

Páblona' bi'e dill' lao Féstona'

¹ Na'ch ka bllin Féstona' Cesareana' kwenḅe inabi'e, na' wzoe' shon' lla. Na'tech wzee wyaje' Jerusalénna'.

² Na' bḅozka' chṇabia' na' nochlə beṇ'ka' chṇabia' beṇ' Israelka' ka wṇezgakile' ba blline' Jerusalénna', na'ch jtaogake' xya ḅe Páblona' lawe'na'.

³ Na' wṇabgakile'ne' gone' to goklen yiselee Páblona' Jerusalénna' kwenche gak yel' joschis che'na'. Gollgake'ne' ka' daa goklall'gake' witgake'ne' tneza'.

⁴ Per goll Féstona' legake':

—Cesareana'zکزə yigaan Páblona', na' aga chllach yiyaa na'lə.

⁵ Na' golle' legake':

—Ben'ka' chṇabia' le' chiyal' sa'lengake' nad' Cesareana' kwenche gaole xya shi bi dii malan bene'.

⁶ Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yel' joschisa' na' bene' mandad jxi'gake' Páblona'.

⁷ Na' ka wyoo Páblona' gana' chi' Féstona' lii wbig'te ben' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'.

⁸ Na'ch Páblona' bzoa rson che', chi'e legake':

—Nad' ni tlish' dii mal bin' gon', ni bin' chishj' ley chento'na' neto' ben' Israel, ni bin' wnit' balaan che yoodo' chento'na', ni bigan' inia' zban che César'a' beena' chṇabia'.

⁹ Na' daa goklall' Féstona' ile'shii ben' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' yel' joschis cho'na' na'lə?

¹⁰ Na' Páblona' chi'ene':

—Ba zia' lawo'ni, na' ben' wṇabia' César'a' ba nzoe' li' ni kwenche gono' yel' joschis, na' nin chiyal' gak yel' joschis cha'na'. Nezkzilo' aga bi ben' che ben' wlall' cha'ki.

¹¹ Shi ba ben' dii chon ka chidoḷaa guet', wakkzə guet'. Per shi bibi ben' che ben'ki chao xya cha', kono gak gon nad' lo na'gake'. Na' chṇab' wdio' nad' lao ben' wṇabia' César'a' kwenche kwine' gone' yel' joschis cha'na'.

¹² Na'ch Féstona', ka wde be'lene' dill' ben'ka' chaklen le' chone' yel' joschisa', na'ch chi'e Páblona':

—Ba wṇabo' tio' lao ben' wṇabia' César'a' kwenche gone' yel' joschis cho'na', na' wselaa li' lawe'na'.

Páblona' bi'e dill' lao ben' wṇabia' Agrípana'

¹³ Na' gok chop shon lla na'ch bllin ben' wṇabia' Agrípana' len Berenícena' yell Cesareana' jawapgake' Féstona' chiox.

¹⁴ Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to ben' bi ben' Félix'a' yel' joschis che'na'.

¹⁵ Ka wya' Jerusalénna', ben' wṇabia' che bṇozka' na' ben' golka' chṇabia' ben' Israelka' wdaogake' xya che' lawa'na', goklall'gake' wchogbi'a guete'.

¹⁶ Na' gosh'gakee ka choncho cho' ben' Roma, aga lii wchogbia'tezcho guet to ben' shi bi sie' wzoa rson che' lao ben'ka' chao xya che'.

¹⁷ Daan, ka bid ben'ka' bidtao xya che', bi bshe'ida'n, san betiyo'z lii bentia' wneyi jxi'gake'ne' kwenche gon' yel' joschis che'na'.

¹⁸ Na' ben'ka' bidtao xya che', ni tlish' diika' wza'lallaa bene' bi wnagake'.

¹⁹ Daa zeelo nagake' che', nlla'lə chajli'e che Chioza' na' chde' cho'e dill' che to ben' wle Jesús, beena' ba wit, na' le' ne' mbankze'.

²⁰ Na' daa bi nezid' nak gon' yel' joschis che ben'ki, wṇabid' le' shi cheenile' yiza'lene' nad' Jerusalénna' kwenche gak yel' joschis che'na' na'.

²¹ Per Páblona' wṇabe' tie' lao César Augústona' kwenche gone' yel' joschis che'na', na' ben' mandad shejze' axt kat'ch gak wselaa'ne' Rómána'.

²² Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

²³ Na' betiyo bllin Agrípana' lega ben' zakii, len Berenícena' na' len bal ben'ka' chñabia'gake' soldadka', na' ben'ka' mbejlawin yella'. Na'ch Féstona' bselee ben' jxi'gake' Páblona'.

²⁴ Na' wñe Féstona', chi'e:

—Li' ben' wñabia' Agripa, na' yog'le le' lle'le ni, ka nak beeni ze ni, yog' ben' Israelka', ka ben' lle' Jerusalénna' na' ka ben' lle' Cesareani, chaogake' xya che', na' chongake' byen chogbi'a guete'.

²⁵ Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wñabe' tie' lao César Augústona' kwenche gone' yel' joschis che'na', na' ba bcheb' wdia'ne' na'lə.

²⁶ Per bi chillelid' bin ben Pábloni kwenche wzej' Césara' yepée bin bene'. Daan ba nzia'ne' laoleni na' lawo'niyen'kzə li', ben' wñabia' Agripa, kwenche inabyollichone' bin bene', na' ka' wllia' lee yisha'.

²⁷ La' chakid' bi nakan wen wselaa to ben' lawe'na' kwenche wchogloe' che' na' bi nzej' bin bene'.

26

Páblona' bzoe' rson che' lao Agrípana'

¹ Na' Agrípana' golle' Páblona':

—Bzoashki rson cho'na' naa.

Na'ch Páblona' blis neena' na' wzoloe' bi'e dillaa, chi'e:

² —Li' ben' wñabia' Agripa, mbalaz wal chakid' daa gak wzoa rson cha'ni lawo'ni che yog' diika' chao ben' Israelka' xya cha'.

³ La' nezkzilo' ka yoolo neto' ben' Israel chonnto', na' lekzka' che dil chix chento'ka'. Daan chñab' gapgacho' yel' chxenlall' na' wzenaggacho' ka nak dga inia' li' naa.

⁴ 'Yog'lol' ben' Israelka' nezgakile' ka bsa' cha' ladje'ka', ka yell cha'na' gana' bgol' na' ka Jerusalénna'.

⁵ Na' lekzka' nezgakile' toshiizi nak' toz fariseoka', ben'ka' chzenagchgake' che ley che dii Moiséza' aga ka nochlə ben' yoblə. Na' wak yizi' cho'agake'n shi gueengakile'.

⁶ Na' naa chaogake' xya cha' daa non' lez wllin lla gon Chioza' ka bchebe' lao dii xoxto'nto'ka'.

⁷ Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la'onto' Chioza' ka tella ka wal. Na' daa non' lez gak daa bcheb' Chioza', daan chao ben' Israelki xya cha', li' ben' wñabia'.

⁸ ¿Berache bi chajle'le wak yisban Chioza' ben' wetka'?

Páblona' bi'e dill' ka bsak'zi'e ben'ka' nonlilall' Jesúza'

⁹ 'Lekzka' nad' gokid' chiyal' wsak'zi'a ben'ka' nonlilall' Jesús, ben' Nazareta'.

¹⁰ Na' ka' ben' Jerusalénna'. Na' bñozka' chñabia' bengake' lsens wlo'a lillyana' ben'ka' nonlilall' Jesúza', na' ka betgake' legake' lekzka' len' chakid' kan' chiyal' gak.

¹¹ Zan shii wya' gana' chdop chllagnto' choe'lwillnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', axt yell zit'ka' wya' jasak'zi'gakee.

Sto shii be' Páblona' dill' ka gok blla' yichjlall' do'ena'

(Hch. 9:1-19; 22:6-16)

¹² 'Na' lekzka' nan ljenid' ben'ka' nonlilall' Jesúza' yell Damáscona', na' bñozka' chñabia' bsel'gake' nad' na' bengake' lsens ljasak'zi'gakee.

¹³ Na' ki gok cha', li' ben' wñabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbillā, na' wyechjan nad' len ben'ka' zyaalen'.

14 Yog'tento' wzoatishnto' lo yona', na'ch nad' benid' shii to ben' wnie' nad' dill' hebreo, ne': "Saulo, Saulo, ¿berache chchi' chsak'zo' nad'? Daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b."

15 Na'ch wnia', chepee: "¿Nora li', ben'?" Na' wne': "Nadaan Jesúza', beena' chchi' chsakoo."

16 Na' naa biyas. Ba bli'law' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'.

17 Na' wselaa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'.

18 Na' wselaa li' kwenche lljali' lljasedilo' legake' kwenche sho' beeni' cha'na' loo yichjlall'do'eka' na' bich tagake' lo yel cho'la'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' ben'ka' nak lall' nee."

19 'Kan' gok cha', li' ben' wñabia' Agripa, na'chan bzenag' daa wna Jesúza' ka bli'lawe' nad'.

20 Na' zigaate ben' Damáscoka' bli' bsedid' cho'a xtill' Jesucristona', na'tech ben' Jerusalénka', na' ben' lle' doxen yell-lio Judeana', na' lezkza' ben'ka' bi nak ben' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i ben' nan ba biyaj bilengakile'.

21 Na' ni cheyi diikin, be' ben' wlall' cha'ka' nad' yoodo'na' na' nan witgake' nad'.

22 Per Chioza' chaklene' nad' kwenche choe'ch' xtilleena' lao ben' axt naanlla, ka lao ben' zakii na' ka lao ben' bi zakii. Na' kon ka wnakz dii Moiséza' gak na' ka wnakzə dii ben'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'.

23 La' legake' wñagake' Chioza' nllie' bia' Cristona', beena' wselee, yiya dii yen ile'ile' na' witgake'ne', na' len' gake' ben' necha' yibane' ladj ben' wetka', na' chixje'ile' ben' Israelka' na' ben'ka' bi nak ben' Israel nakan chiyal' gongake' kwenche sho' beeni' che'na' loo yichjlall'do'eka'.

Páblona' goklallee gonlilall' Agrípana' Jesúza'

24 Na' shlak Páblona' chzoa rson che'na', besyaa Féstona', chi'ene':

—¿Chaktonto'n, Pablo! Daa zi'telə chsedo' ba chontontin li'.

25 Na' Páblona' chi'ene':

—Aga chaktonta'n, ben'do', san dill' lin cho'a, na' nakan dii shajle'cho.

26 Na' ben' wñabia' Agrípani nezile' che yog' diiki nia' le', daan chiyaxjid' cho'a dill' lawe'ni. Aga inacho bi nezile' diika' gok, la' ga lle' lla' beñaan gokan.

27 Na' li', ben' wñabia' Agripa, ¿achajli'o cho'a xtill' Chioza' daa bzej dii ben'ka' wdixjee daa golle' legake' kani'yi? Nad' nezid' chajli'o.

28 Na'ch Agrípana' chi'e Páblona':

—¿Achakilo' xtitz wshaljlano' nad' cho'a xtill' Jesúza' na' gonlilallaane'?

29 Na'ch Páblona' chi'ene':

—La' xtitzə wa la' ssha wshaljlen' li', Chioza' wi'e latj aga tozo' li' shajli'o san yog' ben'ki lle' ni chengakile' dillii cho'a shajle'gake' ka ba wyajli'a nad', per aga nia' wchejgake' legake' gden ka nchejgake' nad'.

30 Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' ben'ka' wche'lengake'.

31 Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiyal' gatee lillyana'.

32 Na'ch Agrípana' golle' Féstona':

—Wak yislacho beeni shel'ka' ki ba wñabe' tie' lao ben' wñabia' Césara' kwenche gone' yel' joschis che'na'.

27

Bsel'gake' Páblona' yell Rómana'

¹ Na'ch ka bchoglall'gake' wsel'gake' neto' Itálicana' loo barkwla, bengake' Páblona' kon sto chop pres yoblə lo na' beena' le Julio, nake' xan to guioa soldadka' beŋ'ka' nzi' soldad che beena' chŋabia' Rómana'.

² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to beŋ' le Aristarco neto'. Nake' beŋ' Tesalónica, daa llia gana' mbani Macedóniana'.

³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' beŋ'ka' nombi'e yella' kwenche be'gake'ne' bi dii byalljile'.

⁴ Na' ka biza'nto' Sidonna' na' wdeteznto' yichjla yell-lio Chíprena' daa llia lo nido'na' kwenche bkweejan neto' daa le ze be'na'.

⁵ Na' wdetento' lo nido'na' daa de tcho'a yell-lio gana' mbani Cilíciana' na' Panfílina', na' bllinnto' cho'a yell Mírana', daa llia gana' mbani Líciana'.

⁶ Na' yell Mírana' xan soldadka' bllelile' to barkw dii za' Alejandríana' na' zejan Itálicana', na' bidie' neto' lo'inna'.

⁷ Na' zan lla wyajlennto' barkwa' sho'lall'zə, na' kaŋi bllinnto' cho'a yell Gnídona'. Na' daa ze be'na' klelə, na' wyechjnto' yell-lio Crétana' daa llia lo nido'na', wdeteznto' cho'a yell Salmónna'.

⁸ Na' kaŋi gok zejnto' tcho'a nido'na' axt ni bllintento' gana' le Buenos Puertos, gaozə yell Laseana'.

⁹ Zan llate ba wllainto' na' ba chonan dii nxoll shajchnto' lo nido'na' daa ba zoa yilen dii zaga'. Na' goll Páblona' legake':

¹⁰ —Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹ Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'.

¹² Na' daa bi nak latja' wen yigaannto' na'z shlak chi' dii zaga', zangake' bchoglall'gake' shajchnto' kwenche illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nido'na'

¹³ Na'ch wzolo ze to be'les dii za' lli'lə, na' beŋ'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lio che Crétana' daa llia lo nido'na'.

¹⁴ Ka gok shloll, wzolo to be' wal dii za' cha'lə.

¹⁵ Na'ch wzolon chlligaan barkwa' na' bikzə bi gok gonnto', na' bsanlall'choklento'n nllig' be'na' len.

¹⁶ Na' ka wdento' gaozə to yell-liodo' le Clauda daa llia lo nido'na', na' bich zetek be'na'. Na'ch barkwdo'na' ngoyo barkw xenna' bilepnto'n loo barkw xenna', per kaŋi gokan.

¹⁷ Na' ka biyoll bilepnto'n, na'ch bchejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len.

¹⁸ Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bzal'gake'n loo nido'na' kwenche bichtek gok barkwa' zii.

¹⁹ Na' ka gok shon lla, axt len xshinlaz barkwa' bzal'nto' loo nido'na'.

²⁰ Na' zan lla bi bli'lao wbillā' ni beljka', na' daa zechga be'na', bich bennto' lez yilanto'.

²¹ Na' ka ba gok zan lla biŋ' gaonto', na'ch Páblona' wzie' ladj beŋ'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'.

²² Na' ŋaa bikzə gonchoplall'zle, la' ni tole bi guet. Toz barkwi kwiayi'.

²³ La' daa nle'yi Chios cha'na' beena' chonlilallaa bselee to anjl bli'lawe' nad'.

²⁴ Na' anjla' wne' nad': "Bi illebo' Pablo. Chonan byen illino' lao ben' wnabia' Césara', na' ni cho' li' yiyesh'lallii Chioza' yog' ben'ka' zejlino' txen loo barkwi na' bi guetgake'."

²⁵ Na' naa, li wtiplall'le, la' nxenilallaa Chioza' na' nezyenid' kon ka wna anjla' nad' kayen'nan gak.

²⁶ Per chonan byen wwiacho naklə goncho kwenche yichoonan cho' to lo yell-liodo' dii lia lo nido'ni.

²⁷ Na' ba gok shda' wbill ka bllinnto' gana' de Nido' Adriáticono', na' ni chllig' be'na' barkwa' to ki to ka'lə lo nido'na'. Na' ka bllin chel, ben'ka' chsa' barkwa' gokbe'gakile' ba chllinnto' gana' de yo billa'.

²⁸ Na'ch bletjgake' to ya kwenche bchixgake' ka'k' zitj nisa', na' ka bchixgake'n zitjan shin'toyichoa metr. Na'ch ka wza'n zilat' na'ch bizchixgake'n dii yoblə na' zitjan gallichoa metr.

²⁹ Na' daa bllebgake' lljsho' barkwa' lee yajka', bletjgake' tap ya xen dii lia xoziiin kwenche kwe' barkwa' tozga, shel' wxegakile' lii sheeni'te.

³⁰ Na' ben'ka' chsa' barkwa' gokgakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'.

³¹ Na'ch Páblona' golle' xan soldadka' na' soldad che'ka':

—Shi ben'ki bich yigaangake' loo barkwi, aga wilalat'le shi naa.

³² Na'ch soldadka' bchoggake' rietka' daa nchej barkwdo'na' na' bxopan loo nisa'.

³³ Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble.

³⁴ Na' nia' chonan byen gaolat'le kwenche yiyakshao'lall'le, la' ni tole bi kwiayi'.

³⁵ Na' ka biyoll wna Páblona' ka', na' bexee to yetxtil na' bi'e Chioza' yel' choxken lao ben'ka' lene' na' bxoxje'n na' wzoloe' chawe'.

³⁶ Na' ka ble'gakile' chawe', na'ch yoguee bendiplall'gake' wdaogake'.

³⁷ Yog'lol'neto' yoonto' loo barkwa' naknto' chop guiyoa guiyonshin'to.

³⁸ Na' ka beljgakile', na'ch bzal'gake' trigona' daa nsa' barkwa' loo nisa' kwenche bich goktek barkwa' zii.

Wche' barkwa' yel

³⁹ Na' ka wyeeni', ben'ka' chsa' barkwa' aga biyombia'gake' yell-liona', per ble'gakile' to ladj lchi ga choo xoz' nisa' gana' gokgakile' wak sho' barkw che'ka'. Na' bchoglall'gake' lljlekkgake'n lo yoxa'.

⁴⁰ Na' bchoggake' riet che ya xenka' daa chzagaan barkwa' na' wchoonlall'gake'n loo nisa'. Na'ch bisellgake' yaga' daa chaklenan chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabigaan cho'a nisa'.

⁴¹ Na' jshia xin' barkwa' to ga zoayaa yoxa' loo nido'na' na' gogaan, na' aga gokch yichejan. Na'ch bli che nido'na' wzolon bxoxj btinan xan barkwa'.

⁴² Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'.

⁴³ Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate ben'ka' chak xoa yela' wxit'gake' loo nisa' kwenche yillingake' lo yo billa',

⁴⁴ na' ben'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lol'nto' billinnto' shi'a shao' lo yo billa'.

28

Páblona' wzoe' Máltana'

¹ Na' ka biyoll billin yog'nto' shi'a shao' lo yo billa', na' wnezinto' yell-liona' len Malta.

² Na' beṅ'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'.

³ Na'ch Páblona' btope' xonj xis bill, na' ka bzaleen lo yi'na' bichej to bel ladjinna' na' wdinyaab neena'.

⁴ Na' ka ble'i beṅ' Máltaka' na' bel' na' Páblona', na'ch che' ljwelle':

—Beṅ' wen xyalja beeni. La'kzi bile' lo nisdona', Chioza' aga wi'e latj ibane'.

⁵ Na'ch Páblona' wllib neena' kwenche bxop bel' lo yi'na', na' aga bi gokile'.

⁶ Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷ Na' gaozə gana' bllinnto' de yell-lío che beena' chnabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'.

⁸ Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoə neena' yichje'na' na' biyakile'.

⁹ Na' ka wnezi beṅ' Máltaka' daa ben Páblona', na'ch wyaj yog' beṅ'ka' bi shao' lawe'na' na' biyakgake'.

¹⁰ Na' beṅ'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómana'

¹¹ Shon beo' wzoanto' Máltana'. Na' ka biza'nto' biyoonto' to loo barkw dii bchej Alejandriana' daa lekzka' bigaanān Máltana' shlak wde dii zaga'. Na' xin' barkwa' da' chop lwaa lsak' chios che beṅ' griegoka', beṅ'ka' le Cástor na' Pólux.

¹² Na' ka bllinnto' yell Siracúsana', na' wzoanto' shonə lla.

¹³ Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chno', na' bichop lla bllinnto' yell Puteólina' gana' bichejnto' loo barkwa'.

¹⁴ Na' Puteólina' billagnto' bal beṅ'ka' nak neto' txen chonlilall'nto' Jesúza', na' wṅabigake' neto' yigaanlennto' legake' to xman. Na' ka wde xmanna', na'ch biza'nto' zejnto' Rómana'.

¹⁵ Na' beṅ' Rómaka' nonlilall' Jesúza', ka wnezagakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shon Yoo Ga Chigaaṅ Beṅ'. Na' ka ble'i Páblona' legake', bi'e yel' choxken Chioza' na' biyondiplatee'.

¹⁶ Na' ka bllinnto' Rómana', xan soldadka' bene' preska' lall' na' beena' chnabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

Páblona' bi'e xtill' Jesúza' Rómana'

¹⁷ Na' ka gok shon lla zoa Páblona' na', na'ch goxe' beṅ' Israelka' zakii, beṅ'ka' lle' Rómana'. Na' ka bdopgake' na' golle' legake':

—Le' beṅ' bish', shlak wzoa' Jerusalénna' beṅ' wlall chechoka' lle' na' bex'gake' nad' na' bengake' nad' lo na' beṅ' Rómaki la'kzi aga bi ben' chegake' na' bin' chishj' diika' wna dii xoxcto'choka' chiyal' goncho.

¹⁸ Na' biyoll wṅabyollgakile' nad' bin beṅ', beṅ' wṅabia'ka' goklall'gake' wsangake' nad', la' aga bi ben' kwenche wchogbia'gake' guet'.

¹⁹ Per beṅ' wlall chechoka' lle' Jerusalénna' aga be'gake' latj yisangake' nad'. Na' benan byen wṅab' tia' lao beṅ' wṅabia' Césara' kwenche gone' yel' joschis cha'na'. Per aga gaw' xya daa ben beṅ' wlall chechoka' cha'.

²⁰ Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' beṅ' Israelan, nchejgake' nad' gdenki.

²¹ Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to beṅ' wlall chechoka' bin' ila' biz gon inagake' cho'.

²² Na' cheeninto' wzenagnto' bi dillaan wi'o, la' nezinto' doxenz chnegake' zban che beŋ'ka' nakgake' txen dii koba' chliile.

²³ Na'ch bzoagake' to lla kwenche idopgake'. Na' ka bllin llana' blligake' bia', beŋ' zan bdop gana' zoa Páblona'. Na' be'lene' legake' dill' do lla, bzajniile' legake' che yeŋ' wŋabia' che Chioza'. Na' bene' to dii byen kwenche shajle' beŋ'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii beŋ'ka' wdixjee daa goll Chioza' legake'.

²⁴ Na' bale' wyajle'gake' diika' goll Páblona' legake', na' zi bale' bi wyajle'.

²⁵ Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xozxto'choka' chi'e legake':

²⁶ Wyaj na' jellsha beŋ' Israelka':

La'kzi wzenagle bi shajni'kzile

Na' la'kzi chle'teile bi gakbe'kzile bin zevin.

²⁷ Bikzə bi rson chazle, daa naklikzle lall'do' wal,

na' chonle ka kwell lchol,

ni bi cheenile wzenagle,

ni bi cheenile ile'ile,

na' ni bi cheenile shajniile

kwenche yiyaj yilenile

na' gon' ka yiyakshao' yichjlall'do'lena'.

²⁸ Chiyal' inezile Chioza' ba ngwee xnezi yisle' beŋ'ka' bi nak beŋ' Israel kwenche bi kwiayi'gake', na' lelgake' wlebgake' cho'a xtilleena'.

²⁹ Ka biyoll goll Páblona' legake' ka', na'ch ziyajgake' chakdil-len ljwellgake'.

³⁰ Chop yizyen' bigaan Páblona' yoonā' gana' wdixje', na' blebe' nottezə beŋ' jawia le'.

³¹ Na' aga no bsej bllon bzajni Páblona' beŋ'ka' nakan nak yeŋ' wŋabia' che Chioza' na' bli' bsedile' beŋ' cho'a xtill' Xancho Jesucristona'.

Kart daa bzej Páblona' na' bseleēn lao beŋ'ka' nonlilall' Jesucrístona' yell Rómana'

¹ Nad' Pablo, nak' wen llin che Cristo Jesúsá'. Chioza' gox wñabe' nad' gak' postl che', na' bene' lall' na' wi'a dill' wen dill' kob che'na'

² cheyi daa bchebe' gone', na' dii beŋ'ka' wdixjee daa golle' legake' kani'yi bzejgake'n lee Cho'a Xtilleena'.

³⁻⁴ Na' cho'en dill' che Xiine' Jesucrístona', beena' nak Xancho, daa goke' benech, na' goke' xiin dia che dii rey Davina'. Na' Espíritu Sántona' bli'e nan nake' Xiin Chioza', beena' nak beŋ' yel' wak choo yel' wak xen daa bibane' ladj beŋ' wetka'.

⁵ Na' daa nonlilall'nto' Jesucrístona', Chioza' ba goklene' neto', na' nzoe' neto' naknto' postl che Jesucrístona', na' bene' lall' na'nto' ljtixje'nto' xtilleena' kwenche doxen yell-lioni soa beŋ' gonlilall'gake'ne' na' wzenaggake' che', na' sho'e balaan.

⁶ Na' lenle ba gox wñab Chioza' kwenche gakle lall' na' Jesucrístona'.

⁷ Chzej' yog'lol-le, le' lle'le yell Rómana', le' ba gox wñab Chioza' nakle lall' nee na' chakile' le'. Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁸ Zigaate nia' le', ni cheyi daa ben Jesucrístonan' chak wi'a Chioza' yel' choxken che yog'loltele, la' doxen choe' beŋ' dill' ba nonlilall'le Jesucrístona'.

⁹ Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' tizi chñabidee gaklene' le' kat' choe'lwillee.

¹⁰ Na' toshiizi chñabidee wi'e latj yidwia' le', na' shi cheenile' yid', lekze' kwee xnezin.

¹¹ Le chzelallaa yidwia' le' na' we'len' le' dill' daa gaklenan le' soachechhle gonlilall'chle Jesucrístona'.

¹² La' cheenid' wtipch lall' ljwellcho daa nonlilall'chone'.

¹³ Le' beŋ' bish' na' le' beŋ' zan', cheenid' inezile zan shii ba goklallaa yidwia' le' per axt naa bikzan' gakan. Cheenid' yidwia' le' kwenche gakchachle gonlilall'le Jesucrístona' na' soach beŋ' gonlilall'gake'ne' ladjlena', ka ba gok che beŋ'ka' bi nak beŋ' Israel yellka' gana' ba wyaa.

¹⁴ Nezid' chonan byen we'len' yog' beŋ' xtill' Crístona', ka beŋ' griego na' ka beŋ' bi nak beŋ' griego, ka beŋ' sin' na' ka beŋ' bi nteyi.

¹⁵ Daan, cheenid' lekzka' chixje'id' le' dill' wen dill' kob che'na', le' zoale Rómana'.

¹⁶ Bi chiyi chido'id' wi'a dill' wen dill' kob che Jesucrístona', la' nsa'n yel' wak che Chioza' kwenche yislan nottez beŋ' gonlilalleene', zigaate beŋ' Israelka', na' lekzka' beŋ'ka' bi nak beŋ' Israel.

¹⁷ Na' dill' wen dill' kob che'na' chliin cho' nakan goncho yiyakcho beŋ' li beŋ' shao' lao Chioza'. Na' chzajniin cho' chiya' gonlilall'chone' na' bich bi de sto dii gaklenan cho'. Kon ka na Cho'a Xtilleena': "Beena' nak beŋ' li beŋ' shao' daa nonlilallee nad', beenan' ibane'."

¹⁸ Yel' zak'zi che Chioza' za'n yabana' ni che beŋ'ka' bi chzenag che' na' chongake' chiya dii mal, diika' chsej chllongakan gombia'gake' daa nak dii li.

¹⁹ Daa cheeni Chioza' inezgakile' che', ba nezkzgakile'n, la' Chioza'kzan ba bliile'n legake'.

²⁰ La'kzi bi chle'icho Chioza', chle'icho diika' bene' na' chakbe'icho ka nake'. Daa bxe bsile' yell-lioni nakbia'cha nake' Chios na' yel' wak che'na' biga te cheyin. Na' bibi de dii wda'i beŋ' inagake' bi nezkakile' shi zoe'.

²¹ La' la'kzi nezkakile' zoa Chioza', bi choe'la'ogake'ne' ni bi choe'gake'ne' yel' choxken. San yoolə yichjgake' diika' bi zakii na' nchol nnti yichjlall'do'eka' daa bi ntegakile'.

²² La'kzi nazgake' nakgake' beŋ' sin', daa chongake' chli'n nakgake' beŋ' bi nteyi.

²³ Lwaa dii nan koogake' Chioza' balaan, beena' biga te cheyin, lwaa lsak' benecha'la, ben'ka' chde cheyin, wloogake' balaan, na' axt no lwaa lsak' ba ze xan yabana', na' lwaa lsak' ba zoa tap ni'a na'yin, na' lwaa lsak' ba chxob le'in.

²⁴ Na' daa chongake' ka', Chioza' ba wchoonlallee legake' kwenche gonchgage' dii zbanka' cheeni beli chen che'ka', na' benlen ljwellgake' diika' nak zban.

²⁵ Lwaa dii nan shajle'gake' daa nak dii li che Chioza', wyazlall'chgage' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

²⁶ Daan, Chioza' ba wchoonlallee legake' kwenche gonchgage' dii zbanka' cheeni beli chen che'ka', na' axt noolka' chiyat'len ljwell noolgake' na' chongake' daa bi noe' Chioza' latj gongake'.

²⁷ Na' ka'kzə ben' byoka', lwaa dii nan soalengake' noolə, chibalgakile' chiyat'len ljwell ben' byogake', na' chonlen ljwellgake' daa nak dii zban. Na' chzak'zi'len beli chen che'ka' yel' zak'zi'na' daa chidol'gake' daa chongake' dii malka'.

²⁸ Na' daa bi goklall'gake' wzenaggake' che Chioza', wlej yichje' legake' kwenche gontegagake' dii mala' kon ka nan loo yichjlall'do'eka' daa nxinj.

²⁹ Shgal' dii bi yejni'alallii chongake', choe'gake' cho'a xbayi beli chen che'ka', chze-lall'gake' gat' kwe'gakile', chibagakile' gongake' dii malka'. Nakgake' ben' xe' ben' xga', ben' wen xya, ben' wishagdila, ben' wxiye', ben' chibayi gon mal che ben', ben' wichitj dill',

³⁰ ben' chyilj chzan xtill' ben', ben' chakzbani Chioza', ben' bibi nalli, ben' cha'siba na' ben' chshalj chshon. Chiyiljlall'gake' bi dii mal gongake', bi chzenaggake' che xaxna'gake',

³¹ bi ntegakile', bi chongake' daa chchebgake', bi chakgakile' ben', ni bi chiyesh'gakile' ben'.

³² La'kzi nezgakile' ba bchoglo Chioza' chiyal' guet ben'ka' chon ka', zizikchli chongake'n, na' axt chiba chizak'gakile' kat' chon ben' yoblan.

2

¹ Na' li' naa, nottezə nako', kat' chchoglo' che ben' nape' dol' lao Chioza', lekzka' che kwinton' chnio', la' lenkzo' chono' diika' chongake', na' bibi de wda'ilo'n ino' bibi xto'loo de.

² Na' nezicho Chioza' chone' kon ka chiyal' gone' kat' chchogloe' sak'zi' ben'ka' chon dii malka' nak ka'.

³ Na' li' no' che ben'ka' chon dii malka' napgake' dol', bi gakzilo' wilo' lo yel' zak'zi' che Chioza', la' ka'kzan chono'.

⁴ ¿Achakzilo' bi wsak'zi' Chioza' li' ni che daa chono'? ¿Abi chakbe'ilo' ni che yel' ben' wen che'nan' chiyesh'lallile' cho' na' chape' yel' chxenlall' checho, daa cheenile' yiyaj yilenicho che dii malka' choncho?

⁵ Per daa nako' yichjlall'do' chech na' bi cheenilo' yiyaj yilenilo', kwintezo' chkwa' chti'azo' yel' zak'zi'ka' illaglo' kat' illin lla wchoglo Chioza' che ben' kon ka chiyal' gone'.

⁶ La' Chioza' gone' ka gak che to to ben' kon ka chidolee.

⁷ Ben'ka' zoatezi zoagake' chongake' daa nak wen kwenche sho'gake' balaan, wi'e yel' mban chegake' zejli kani na' biga lia ile'gakile' yel' wita'.

⁸ Na' ben' yaalall'ka', ben'ka' chzoagake' ka'la daa nak dii li na' nogake' diika' bi yejni'alallii, wsak'zi'e legake' daa le chlllee legake'.

⁹ Yel' zak'zi' wal yen ile'i yog' ben'ka' chon dii mala', zigaate ben' Israelka' na'tech ben'ka' bi nak ben' Israel.

¹⁰ Per ben'ka' chon dii wenna', sho'gake' balaan na' soagake' mbalaz, zigaate ben' Israelka' na'tech ben'ka' bi nak ben' Israel.

¹¹ La' Chioza', tlap chone' yel' joschis, aga nakzi ben' chakile'.

¹² Yog' ben'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi bi nezgakile' daa nan. Na' yog' ben'ka' ben dii mala' na' neztegakile' daa na leya', choglo chegake' kon ka na leya' gak chegake'.

¹³ La' kono yiyak ben' li ben' shao' lao Chioza' daa nombia'ze' leya', san beena' chon kon ka nan, len' yiyake' ben' li ben' shao' lawe'na'.

¹⁴ Ka nak ben'ka' bi nak ben' Israel na' bi nezgakile' bin na ley che dii Moiséza', shi tobialozgake' chongake' ka na leya', nakbia' yoo to ley loo yichjlall'do'eka'.

¹⁵ Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'.

¹⁶ Kan' gak llana' gon Chioza' lo na' Jesucristona' wchogloe' che diika' yoo loo yichjlall'do' ben' yell-lioni, kon ka na dill' wen dill' kob che'na' daa cho'a dill'.

¹⁷ Na' li' nako' ben' Israel, chakilo' nako' ben' wen lao Chioza' daa nezilo' daa na ley che dii Moiséza' na' chep cha'lalloo daa nombi'o Chioza'.

¹⁸ Chakilo' nezilo' daa cheeni Chioza' gono' daa chli' chsedil leya' li' gono' daa nakch wen.

¹⁹ Chakilo' wak koo ben' lo nez li che Chioza' na' gaktio' ka beeni' lao ben'ka' chda lo yel chol'a'.

²⁰ Na' chakilo' wak wzajniilo' ben' bi nteyi na' wakte wli' wsedilo' ben'ka' bin' shajni'yenii daa nombi'o leya' daa nsa' do ka nak yel' chajni na' daa nak dii li.

²¹ Na' shi li' chli' chsedilo' ben' yoblə, ¿berache bi chli' chsedil kwino'? Na' shi chsedilo' ben' bi kwane', ¿berache li'lə chbanzo'?

²² Na' li' chsedilo' ben' bi chiya'l' soalene' nool bi nak nool che', wa ben' byo ben' bi nak ben' che', ¿berache li'lə chonzo' ka'? Na' li' chwiilo' lwaa lsak' diika' choe'la'o ben', ¿berache chzi' chbanzo' bi de loo lill xlatjinka'?

²³ Chshalj chshono' daa nombi'o leya', per chnit chdio' Chioza' daa bi chono' ka nan.

²⁴ Dii liyen'nan na Cho'a Xtill' Chioza': "Ben'ka' bi nak ben' Israel chnegake' zban che Chioza' ni chele daa chonle mal."

²⁵ Dii li sen' daa le circuncisión daa yoo kwerp cho'na' zak'kzin shi chzenago' daa na leya', per shi bi chzenago'n bibi zjanayi daa yoo sen'na'.

²⁶ Na' shi beena' bi yoo sen'na' chone' ka na leya', lao Chioza' nake' ka ben' yoo sen'.

²⁷ Na' beena' chon ka na leya' la'kzi bi yo'e sen'na', yili'e lawo' napo' dol' daa bi chono' ka na leya' la'kzi nombi'on na' yootio' sen'na'.

²⁸ Bi gakzilo' nako' dowalj ben' Israel daa chono' yog' diika' yoolocho choncho cho' ben' Israel, ni daa yoo kwerp cho'na' sen'na'.

²⁹ San dowalj ben' Israel nak beena' nonlilall' Chioza' do yichj do lallee, na' daa ba bikob Espíritu che'na' yichjlall'do'ena' nakan ka sen'na' daa chli'n nake' lall' na' Chioza'. Na' che beenin we' Chioza' xtillee chone' wen, aga ben' yell-lionin.

3

¹ Na' ¿bera yel' goklen che ben' Israelka' de? Na' ¿bera banez si'gake' daa yoogake' sen daa le circuncisión?

² Dii xen wal banez chegake' de. La' zigaate, legaken' be' Chioza' Cho'a Xtilleena'.

³ ¿Anti chakile ni cheyi daa bi chajle' bal' ben' Israelka' che', ba wlej yichje' legake'?

⁴ ¿Bi nakan ka! Chioza' toshiizi chone' ka ba bchebe' gone' la'kzi yog' ben' yell-lioki nakgake' ben' wxiye'. Cho'a Xtilleena' nan:

Daa nchogbi'o gak che ben' saaxyana' nakbia'chan zejan shli, na' gakbe'gakile' chono' yel' joschis kon ka chiya'l' gakan.

⁵ Na' shi dii mala' choncho chli'n Chioza' nake' ben' li ben' shao', ¿bera inacho, lla? ¿Ainacho Chioza' bi nake' ben' wen daa chsak'zi'e ben'ka' chon mal? (Nia' ka' daa chaki ben' yell-lioki ka'.)

⁶ Per ĵibi nakan ka! Ľa', shel'ka' Chioza' bi nake' beŋ' li beŋ' shao', aga wak gone' yel' joschis che beŋ' yell-lioni.

⁷ Na' zoa beŋ' nagake', shi yel' wxiye' chechona' chli'n yel' li che Chioza' na' chisgolan balaan che'na', ĵbiĉhe naze' nakcho beŋ' saaxya, shka'?

⁸ Na' daa chakgakile' ka', wnaljagake': "Goncho dii mala' kwenche sho'che' balaan." Zoa beŋ' nagake' kan' chli' chsedinto', per bi nakan ka'. Na' beŋ'ka' naz ka' chidoĴ'gake' yel' zak'zi' che Chioza'.

⁹ ĴNakra lla? ĴAnakchnto' neto' beŋ' Israel beŋ' wench aga ka beŋ' yoblə, lla? ĵBi nakan ka! Ľa' ba wniakz' yog'cho, ka neto' beŋ' Israel na' ka'kzə beŋ'ka' bi nak beŋ' Israel, toz ka napcho doĴ' lao Chioza' daa ba bencho dii mala'.

¹⁰ Ľa' Cho'a Xtill' Chioza' nan: Kono beŋ' li beŋ' shao' zoa, ni tlišee.

¹¹ Ni to beŋ' bi chajniile' daa nak dii li, ni kono zoa beŋ' chiyilj Chioza'.

¹² Yog'z beŋ' ba wlaagake' lo nez Ĵina', na' yog'zgake' nxinj yichjlall'do'eka'.

Ni togagake' bi chon dii wen.

Ni tliš' beŋ' chon wen bi zoa.

¹³ Ka zban chĴa' to loo ba che beŋ' wet dii nyalj, kan' nak dill' zbanka' chchej cho'a lolleeka'. Kon cho'a lolleeka' chziye'gake'.

Na' ka yierb che bel' nak dill'ka' choe'gake'.

¹⁴ Lillinzə chyishjgake' bia' blag' che beŋ' na' choe'gake' dill' zi'bia'.

¹⁵ Bi nallgakile' chittezgake' beŋ'.

¹⁶ Gattezə zejgake' chlliyi' chlliadegake' na' chgoogake' yel' zi' yel' yesh'.

¹⁷ Bi nombia'gake' bi daa ne' soalengake' beŋ' mbalaz.

¹⁸ Bi chall chllebgake' gon Chioza' xya chegake'.

¹⁹ Na' nezicho beŋ'ka' nagake' chongake' daa na ley che Chioza' chiyal' gongake' doxen ka nan. Na' daa kono gok gonan, ba bĉhoglo Chioza' che yog'lolcho, cho' beŋ' yell-lio, ka neto' beŋ' Israel na' ka beŋ' bi nak beŋ' Israel, napcho doĴ', na' ni to kono gak ina: "Bibi doĴ' nap'."

²⁰ Daan, ni to beŋ' bi gak ine' nake' beŋ' li beŋ' shao' lao Chioza' daa chone' ka na leya'. Ľa' leya' chonan ka chakbe'icho nakcho beŋ' saaxya.

²¹ Na' naa Chioza' ba bliile' cho' nakan goncho kwenche yiyakcho beŋ' li beŋ' shao' lawe'na', na' aga daa goncho ka na leyan'. Ľa' ka leya', na' ka diika' bzej dii beŋ'ka' wdixjee daa goll Chioza' legake', toz ka choe'gakan dill' cheyin.

²² Chioza' ne' yog'lol beŋ' gonĴilallee Jesucristona' yiyake' beŋ' li beŋ' shao' lawe'na', nottezə nake'.

²³ Ľa' yog'lolzə beŋ' bĉxinj blengake' na' ni to kono nak dowalj beŋ' wen ka nak Chioza'.

²⁴ Per daa nak Chioza' beŋ' wen, chiyone' beŋ' beŋ' li beŋ' shao' daa wdixj Cristo Jesúza' saaxya che'ka', na' bibi zak'gakile'n.

²⁵ Chioza' bselee Crístona' blalj xĉhene'na' na' wite' ni che saaxyaka' bencho. Na' ni che xĉhene'na', nottezə beŋ' gonĴilalleene', Chioza' yizi'xene' saaxya che'na'. Na' ka' chli'e nan nake' beŋ' chon daa nak shĴi. Ľa' daa nape' yel' chxenlall', bene' ka'z saaxyaka' ben beŋ' kana' bin' wselee Crístona'.

²⁶ Na' naa, daa bselee Jesucristona' chli'e nake' beŋ' chon daa nak shĴi daa ne' nottezə beŋ' gonĴilallee Jesúza' nake' beŋ' li beŋ' shao' lawe'na'.

²⁷ Kono gak wshalj wshon ine' nake' beŋ' li beŋ' shao' lao Chioza' ni che ba bene' ka na leya'. Ľa' aga no chon doxen ka nan, san Chioza' ne' nottezə beŋ' gonĴilallee Crístona' nake' beŋ' li beŋ' shao' lawe'na'.

²⁸ Na' ba nezicho chiyakcho beŋ' li beŋ' shao' lao Chioza' daa chonĴilall'cho Jesucristona' na' aga daa choncho daa na leyan'.

²⁹ ¿Achakile Chioza' nake' Chios che to ben' Israelka'zə? ¡Bi nakan ka! Lekzka' nake' Chios che ben'ka' bi nak ben' Israel.

³⁰ La' toz Chiozan' zoa, beena' chiyone' ben' li ben' shao' ben'ka' chonlilall' Crístona'. Na' toz ka chone' che nottezə ben' chonlilalleene', ka ben' Israel, ben'ka' yoo sen daa le circuncisión, na' ka ben' bi nak ben' Israel.

³¹ ¿Achakile daa chonlilall'cho Jesúza' chzoacho leya' ka'lə? ¡Bi nakan ka! La' nezicho nakan to dii zakii.

4

¹ ¿Bera ka inacho che dii xozxto'cho Abrahama'? Nak gok biyake' ben' li ben' shao' lao Chioza'.

² Shel'ka' biyak dii Abrahama' ben' li ben' shao' lao Chioza' ni cheyi diika' bene', zaklja bshalj bshone' lao ben' yell-lioni, per aga lao Chioza'.

³ La' Cho'a Xtill' Chioza' nan: “Dii Abrahama' wyajli'e che Chioza', na' Chioza' wne' nake' ben' li ben' shao' lawe'na'.”

⁴ Kat' to wen llin chkaa laxje', bi nakan to dii chzani ben' cho'ene', san nakan dii chiyal'kz wi'ene'.

⁵ Per shi to ben' shajli'e che Chios, beena' chiyon ben' saaxyana' ben' li ben' shao', Chioza' ile'ile'ne' ben' li ben' shao' daa gonlilalleene', la'kzi bibi bene' kwenche idolee yel' goklen che Chioza'.

⁶ Dii Davina' bi'e dill' che yel' mbalaz che beena' na Chioza' nake' ben' li ben' shao' la'kzi bibi bene' kwenche bdolile'n.

⁷ Ki wna dii Davina':
Chakomba beena' ba biyakxen xtoleena',
na' ba biyol binit saaxya che'na'.

⁸ Chakomba beena' bi yizi' Xancho Chioza'ne' kwent.

⁹ ¿Achakile to ben'ka' yoozgake' sen daa le circuncisión wak soagake' mbalaz? Bi nakan ka', san lekzka' ben'ka' bi yoo senna' wak soagake' mbalaz. La' ba wniakz' Chioza' wne' dii Abrahama' goke' ben' li ben' shao' lawe'na' daa wyajli'e che'.

¹⁰ Na' ¿batran wna Chioza' ka'? ¿Aba wyoo dii Abrahama' senna' kana' wna Chioza' nake' ben' li ben' shao'? ¿Awa bin' sho'en? Chioza' wne' ka' kana' bin' sho'en.

¹¹ Na'techlə wloo kwine' sen daa le circuncisión na' senna' bli'n ba nake' ben' li ben' shao' lao Chioza' daa benlilalleene'. Daan, dii Abrahama' nake' xozxto' yog' ben' nak ben' li ben' shao' lao Chioza' daa nonlilall'gake'ne', la'kzi bi yoogake' senna'.

¹² Na' dii Abrahama' lekzka' nake' xozxto' neto' yoonto' sen daa le circuncisión. Per aga daa yoonto' senna'zan, san daa nonlilall'nto' Chioza', beena' ba nonlilall' dii Abrahama' kana' zi' sho'e senna'.

¹³ Chioza' bchebe' gaki che dii Abrahama' len xiin dia che'ka' doxen yell-lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abrahama' Chiozan', wna Chioza' nake' ben' li ben' shao' lawe'na'.

¹⁴ La' shel' to ben'ka' chonz ka na leyan' gaki chegake' daa bcheb Chioza' wi'e dii Abrahama', bibi zjanayin gonlilall'cho Chioza' na' aga bi zakii daa bchebe' gone', shel'ka'.

¹⁵ Leya' nsa'n yel' zak'zi' che ben'ka' bi chon ka nan. Per shi bibi ley de, aga bi de dii inan napgake' dol'.

¹⁶ Ka nak daa bcheb Chioza' gone' che dii Abrahama', nakan to goklen daa chone' che nottez ben' nonlilalleene' kwenche yog'zə xiin dia che'ka' ikaagake' daa we' Chioza' legake'. Bi nakan che to ben'ka' chonz ka na leya', san lekzka' nakan che nottezə ben' chonlilall' Chioza' ka benlilall' dii Abrahama' le'. La' dii Abrahama' nake' xozxto' yog'cho cho' nonlilall'chone'.

¹⁷ Ka na Cho'a Xtill' Chioza': “Ba nzoa' li' kwenche gako' xaxna' ben' zan inleeb.” Na' Chioza', beena' benlilall' dii Abrahama', nape' yel' wak yisbane' ben' wetka' na' wxə wsile' diika' bin' gak.

18 Kana' bich non dii Abrahama' lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xoxzto' beṅ' zan inleeb, kon ka goll Chioza'ne', chi'e: "Kan' shesh shan xiin dia cho'ka'."

19 Biga gokchoplallee che Chioza', la'kzi chakbe'ile' ba nake' beṅ' golə par soa xiine', la' ba zoa gakile' to guioa yizan. Na' ni bi gokchoplallee la'kzi gok dii Sárana' nool will.

20 Bi gokchoplallee, san zizikli benlilallee gak daa bcheb Chioza' gone' na' be'laweene'.

21 La' wnezile' kwasloḷ Chioza' nape' yel' wak kwenche gone' yog' diika' chchebe'.

22 Daan ble'i Chioza'ne' beṅ' li beṅ' shao' daa wyajli'e che'.

23 Na' daa nan "Chioza' ble'ile'ne' beṅ' li beṅ' shao'", aga che tozen' nan ka',

24 san lekzka' cho'en dill' checho cho' nonlilall'cho Chioza', beena' bisbane' Xancho Jesucristona' ladj beṅ' wetka', la' lenchon chle'i Chioza' beṅ' li beṅ' shao' daa nonlilall'chone'.

25 Bzani Chioza' Xancho Jesucristona' wite' ni che saaxya chechoka' na' bisbane'ne' ladj beṅ' wetka' kwenche biyakcho beṅ' li beṅ' shao' lawe'na'.

5

1 Chioza' ba biyone' cho' beṅ' li beṅ' shao' daa ba nonlilall'chone', na' ba bizoalenchone' wen daa wit Xancho Jesucristona' ni checho.

2 Na' daa ba nonlilall'cho Crístoná', Chioza' toshiizi chonile' cho' wen na' chibaicho daa noncho lez lljazoalenchone'.

3 Na' aga to dgazan yibaicho, san lekzka' yibaicho yel' zak'zi'ka' chle'icho yell-lioni, daa nezicho chongakan ka soachechcho gonlilall'chone'.

4 Na' shi zoachechcho chonlilall'chone' shlak chllaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'.

5 Na' ka nak daa noncho lez, bi te bi la ki gakan, la' Chioza' ba bliile' cho' yel' chaki che'na' daa ba nzoe' Espíritu Santo che'na' loo yichjall'do'choni.

6 Kana' ni nakcho beṅ' wen dii mal na' aga bi gok goncho kwenche bi kwiayi'cho, kana'yen' bid Crístoná' wite' ni checho cho' nakcho beṅ' saaxya.

7 Aga ga zoa to beṅ' lii izanteyi kwine' guete' ni che to beṅ' nak beṅ' li beṅ' shao'. Kayaadia shi yiyaxji to beṅ' izani kwine' guete' lwaa to beṅ' wen.

8 San Chioza' bli'e ka chakile' cho' daa bzani' Crístoná' wite' ni checho kana' ni nakcho beṅ' saaxya.

9 Daa blalj xchen Crístoná' wite' ni checho, ba biyon Chioza' cho' beṅ' li beṅ' shao' lawe'na'. Na' daa wite' ni checho, ¿alechlin ki yisle' cho' lao yel' zak'zi'na' kat' illin lla wchoglo Chioza' che yog'loḷ beṅ'?

10 Shi kana' chakzbanicho Chioza', bselee Xiine'na' wite' ni checho kwenche bizoalenchone' wen, ¿alechlin naa ba bisbane'ne' ladj beṅ' wetka' ki yisle' cho' daa ba zoalenchone' wen?

11 Na' aga diika'z chibaicho, san lekzka' daa nombia'cho Chioza', la' ni che Xancho Jesucristonan' bizoalenchcho Chioza' wen.

12 Ni che yel' widenag che toz beṅ'aan golj wxe saaxyana' yell-lioni, na' ni che saaxyana' wyoo yel' wita'. Ka' gok wzolo chet yog' beṅ', la' yog'zə beṅ' chongake' dii mala'.

13 Kana' zi' we' Chioza' dii Moiséza' ley che'na', ba chonkzə beṅ' yell-lioni dii mala'. Per shi bibi ley de, aga bi de dii gawan xya chegake'.

14 La'kzi aga bi ley got' dii gawan xya chegake', yel' wita' wṅabia'n lao yog'loḷ beṅ'ka' ben dii mala' wzololenzan dii Adánna' bllinten kana' wban dii Moiséza', la'kzi bi wdishgake' cho'a xtill' Chioza' ka ben dii Adánna'. Ni che dii Adánna' wyoo yel' wita' yell-lioni, san Jesucristona', beena' wloo Chioza' xnezin wselee kani'teyi, bxie' yel' mban zejli kani'.

15 Per ka nak dii mala' ben dii Adánna', bi gak wsaklebichon ka dii wenna' ben Chioza' checho, dii xen wal nlla'n. Daa bxinj bḷen dii Adánna' yog'zə beṅ' chet, san daa bsel' Chioza' Jesucristona' kwenche wite' ni checho, bene' to dii wen inleeb che yog' beṅ' gonlilalleene'.

16 Bi gak wsaklebicho daa ben dii Adánna' kon yel' goklen daa ben Chioza' checho. La' wchogbia' che yog'loł ben' guetgake' ni che toz dii mala' daa ben dii Adánna'; san yel' goklen che Chioza' daa chone' checho chiyone' cho' ben' li ben' shao' lawe'na', la'kzi nakcho ben' saaxya nleb.

17 Shi yel' wita' wñabia'n daa bxinj bñen dii Adánna', ¿alechlin ki inabia' ben'ka' ba biyon Chioza' ben' li ben' shao' daa nake' ben' wen inleb, ni che Jesucristona', beena' be' to yel' mban kob chegake'?

18 Dii mala' ben dii Adánna' benan ka bchoglo Chioza' che yog' ben' guetgake', na' ka'kzə dii wenna' daa ben Jesucristona' benan ka yog' ben'ka' gonlilall'gake'ne' yiyakgake' ben' li ben' shao' na' gat' yel' mban chegake' daa bi te cheyin.

19 Daa gok dii Adánna' widenag, wchoglo che yog' ben' nakgake' ben' saaxya, per daa gok Crístona' ben' wizoa dill', ben' zan yiyak ben' li ben' shao'.

20 Chioza' bi'e ley che'na' kwenche wyanch xtol' ben' yell-lioni daa bi bzenaggake' cheyin. Per la'kzi wyanch xtoleeka', Chioza' bli'che' yel' chiyesh'lallii che'na'.

21 Na' daa chet yog' ben', chli'n saaxyana' napan yel' wak wsi wchogan cho'. Per lekzka' yel' chiyesh'lallii che Chioza' chli'n napan yel' wak yiyonan cho' ben' li ben' shao' na' gonan yel' mban checho zejli kan' ni che Jesucristona', beena' nak Xancho.

6

1 ¿Beran inacho ñaa, lla? ¿Agonchcho saaxyana' kwenche wli'ch Chioza' yel' chiyesh'lallii che'na'?

2 ¿Aga kan' goncho! La' cho' ba nakcho ka ben' ba wit lao saaxyana' daa bich chñabi'an cho'. Daan, bich chiyal' gonchon txen.

3 ¿Abi ñezile ka wchoacho nisa' daa nakcho Cristo Jesús'a' txen, lekzka' zejin witlenchonen'?

4 Daa wchoacho nisa' zejin witlenchone' na' bgash'lenchone' kwenche gat' to yel' mban kob checho ka gok che Crístona' kana' bisban Xacho Chioza' le' kon yel' wak xen che'na'.

5 Na' daa ba witlenchone', ka'kzan yibancho ka bibane' ladj ben' wetka'.

6 Ñezicho yel' mbanna' nsa'cho kana', wlliyi'n ka wit Crístona' lee yag cruza' kwenche bich we'cho cho'a xbayi beli chenna' na' bich inabia' dii mala' cho'.

7 La' kat' to ben' ba wite', bich chñabia' dii mala' le'.

8 Na' shi ba witlencho Crístona', ba nxenlall'cho lekzka' ibanlenchone'.

9 Ñezicho biban Crístona' ladj ben' wetka' na' bich guete' dii yoblə, la' bich so saki yel' wita' le'.

10 Na' ka wit Crístona', shlin shlaxjzan bsol bnite' yel' wak che saaxyana'. Na' daa mbane' ñaa, zoe' chone' ka cheeni Chioza'.

11 Na' ka'kzə le', chiyal' gakbe'ile ba nakle ka ben' ba wit lao saaxyana' daa bich chñabia'n le', per mbanle lao Chioza' na' zoale chonle ka cheenile' daa nakle Xancho Cristo Jesús'a' txen.

12 Daan bi chiyal' we'le latj inabia' dii mala' le' kwenche we'zle cho'a xbayi beli chen chelena' daa ile'i yel' wita'.

13 Bi chiyal' gon kwerp chelena' lall' na' saaxyana' kwenche gonle dii mala', san chiyal' gon kwinle do ka nakle lall' na' Chioza' kwenche gonle ka cheenile'. La' wak inacho Chioza' ba bisbane' le' ladj ben' wetka' daa ba bene' le' to yel' mban kob.

14 Bich chiyal' inabia' dii mala' le', la' bich zoale xñi'a leya', san daa biyesh'lallii Chioza' le', ba zoalenle yel' goklen che'na'.

15 ¿Nakrazə, lla? Ñaa ba biyesh'lallii Chioza' cho', na' bich zoacho xñi'a leya', ¿agonchcho dii mala'? ¿Bi chiyal' goncho ka'!

16 Nezkzile shi ba ben kwincho lo na' ben' kwenche goncho bittez daa ne', choe'cho latj chnabi'e chon'. Ka'kzan, shi chzenagcho che dii mala', na' inabia'n cho' na' wlliyi'n cho'. Na' shi we'cho latj inabia' Chioza' cho', wiyone' cho' ben' li ben' shao'.

17 Per choxken Chioza', la'kzi kana' wñabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'.

18 Naa ba biyell bila'le lao dii mala', na' ba biyakle lall' na' Chioza' kwenche gonle ka cheenile'.

19 Ba bi'a dill' che daa chak checho cho' benech kwenche shajniile dga nia' le'. Kana' ben kwinle lall' na' saaxyana' len dii zbanka' cheeni beli chen chelena' kwenche benle dii malka'. Na' naa, li gon kwinle lall' na' Chioza' kwenche soale gonle ka cheenile'.

20 Shlak be'le latj wñabia' dii mala' le', aga bzenagle che Chioza' na' bi benle ka cheenile'.

21 Na' aga bi banez wxi'le che dii mala' benle na' naa chiyii chido'lenile'n, la' yel' witchokzan nsa'n.

22 San naa ba bisell bila' Chioza' le' lo ni'a na' dii mala' na' ba chonle ka cheenile', de banez cheyin daa zejch chonle daa nak wen, na' gat' yel' mban chele zejli kani.

23 Laxj beena' chon saaxyana' nakan yel' wit, san daa chzani Chioza' wi'e beena' gonlilallee Xancho Cristo Jesús'a nakan to yel' mban zejli kani.

7

1 Le' ben' bish' na' le' ben' zan', nombia'le leya' na' nezile leya' chnabi'an ben' shlak mbane'.

2 Na' ka nak leya', cho'en dill' nan noola' nshagna' chiyal' soalene' ben' che'na' shlak mbane', per shi guet ben' che'na', wak yikee ben' yoblə.

3 Shi lljsoalene' ben' yoblə shlak ni mban ben' che'na', nakan xya. Per shi ba wit ben' che'na', leya' nan wak yikee ben' yoblə, na' bi nakan xya.

4 Na' ka'kzan chele le', nakcho txen nonlilall'cho Crístona', le' ben' bish'dawaa na' le' ben' zandawaa. Daa nonlilall'le Crístona', beena' wit ni checho, zejín lekzka' ba nakle ka ben' ba wit lao leya' na' bich chnabi'an le'. Na' naa ba biyakle lall' na' ben' yoblə, beena' wite' na' bibane' ladj ben' wetka', kwenche goncho ka cheeni Chioza'.

5 Kana' wzoacho be'cho cho'a xbayi beli chenna', leya' wloochan ltip beli chen chechoka' na' benchcho dii mala', na' saaxyana' daa bencho bsa'n yel' wit.

6 Per naa, ba nakcho ka ben' ba wit lao leya' daa btakw bchejan cho', na' ba biyell bila'cho kwenche goncho ka cheeni Chioza' daa ba bikob Espíritu Sántona' yichjlall'do'choni, na' bich chñabia' leya' cho'.

7 Bi chiyal' inacho leya' nakan dii mal. La' lennan' bzajniin nad' nan malan' chon'. Aga nezid' shi nakan mal selallaa bi de che ben' shel'ka' ki leya' nan: "Bi selalloo bi de che ben'."

8 Per dii mala' yoo loo yichjlall'dawaani bchinan dga bllia Chioza' bia' kwenche wloochan ltip beli chen cha'ni na' chiya dii wzelallaa. La' shel' bibi leya' got', bibi de daa inan nakcho ben' wixinj wilen, shel'ka'.

9 Kana' bin' inezid' daa na leya', gokid' le wen nsa' cha', per ka wnezid' daa nllia leya' bia', zizikli benz' dii mala' daa wlliyi' nad'.

10 Daa bllia Chioza' bia' goncho kwenche gaklenan cho' gat' yel' mban checho, bchoglolan cha' nan chiyal' guet'.

11 La' dii mala' yoo loo yichjlall'dawaani bchinan leya' na' wxiye'n nad' kwenche blliyi'n nad'.

12 Leya' dii licha nakan che Chioza', na' yog' daa nllian bia' nakan dii wna Chioza', nakan dii li dii shao' na' dii wen.

13 Leya' nakan wen na' aga lennan' benan ka kwiayaa. San dii mala' yoo loo yichjlall'dawa'nin bchinan leya' daa nak dii wen kwenche bliiyi'n nad'. Na' daa nakan ka', ni che leya' bli'lao saaxyana' nakan dii mal inleeb.

14 Nezicho leya' nakan che Chioza', san nad', lega ben' de beli chen chon', na' chnabia' dii mala' nad' daa chon' ka nan.

15 Bi chajniid' ka chon', la' bi chon' dii wenna' daa cheenid' gon', san dii mala' daa chakzbanid', lelan chonz'.

16 Na' kat' chon' daa bi cheenid' gon', chakbe'id' leya' nakan wen.

17 Na' aga inacho nadaan chon' ka', san dii mala' daa daa yoo loo yichjlall'dawaanin chlligaan nad' kwenche chon' dii mala'.

18 Nad' nezid' aga bi dii wen cheeni beli chenni gonan. Na' la'kzi le lialallaa gon' dii wenna', bi chak gona'n.

19 Bi chizoid' gon' dii wenna' daa cheenid' gon', san dii mala' daa bi cheenid' gon', lelan chonz'.

20 Na' daa chon' daa bi cheenid' gon', zej in aga nadaan chona'n, san dii mala' daa chnabia' loo yichjlall'dawaanin chonan daa.

21 Chakbe'yenid' la'kzi cheenid' gon' daa nak wen, dii malalə chon'.

22 La'kzi chibayi loo yichjlall'dawaanin ley che Chioza',

23 chakbe'id' de daa chsej chllonan gon' daa nezid' nak wen, la' dii mala' daa chnabia' nad' chtakw chchejan nad' kwenche gon' daa bi nak wen.

24 Le nyesh' chak cha'! ¿Notgui yisell yila' nad' lao beli chenni dga ba nchogbia' kwiayi'?

25 Cho'a Chioza' yel' choxken daa wit Xancho Jesucristona' na' bisle' nad' lo na' dii mala'. Na' kin chajniida'n: chibaid' gon' ka na ley che Chioza', per beli chen cha'ni chlligaan nad' kwenche gon' dii mala'.

8

1 Na' naa, bich bi yel' zak'zi' che Chioza' yen ile'i ben'ka' nak Cristo Jesús'a' txen, ben'ka' bich chongake' ka na beli chen che'ka', san ba chongake' ka cheeni Espiritu che Chioza'.

2 La' daa nonjilall'cho Cristo Jesús'a', Espiritu che Chioza' ba bene' yel' mban kob checho, na' daa chnabia' Espirituna' cho', bich chnabia' saaxyana' cho' daa nsa' yel' wita'.

3 Ley daa bzej dii Moiséza' bi gok yislan cho' lao saaxyana' daa choncho ka na beli chenna'. Daan Chioza' bselee Xiine'na' goke' ben' de beli chen ka cho' per bi goke' ben' saaxya, na' wdixje' saaxya chechoka' ka wite' kwenche bich inabia'n cho'.

4 Chioza' bselee Crístona' ni checho kwenche so sakicho goncho wen lawe'na' ka na ley che'na'. Na' bich soacho goncho ka cheeni beli chenna' san soacho goncho ka cheeni Espiritu che Chioza'.

5 Ben'ka' ni chzenag che dii mala' yoo loo yichjlall'do'eka', toz len zegake' wneyi chongake'; san ben'ka' chzenag che Espiritu che Chioza', zegake' wneyi gongake' daa cheenile'.

6 Ben'ka' yoo yichjgake' gongake' dii mala', kwiayi'gake'; san ben'ka' yoo yichjgake' gongake' ka na Espiritu che Chioza', gat' yel' mban chegake' zejli kani na' soagake' mbalaz.

7 Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan.

8 Ben'ka' ni chibayi chon dii mala', Chioza' bi chazlallee ka chongake'.

9 Per le', bich chzenagle che dii mala' san chzenagle che Espiritu che Chioza', shi ba zoe' loo yichjlall'do'lena'. Na' shi no bi zoa Espiritu che Crístona' loo yichjlall'do'ena', bi nake' lall' na' Crístona'.

10 La'kzi ba nakan guet kwerp chelena' daa nakle ben' saaxya, per shi nakle Crístona' toz, Espiritu che'na' zoe' loo yichjlall'do'lena' na' dekzə yel' mban kob chele daa ba biyakle ben' li ben' shao' lao Chioza'.

11 Na' shi Espíritu che Chioza', beena' bisbane' Jesúza' ladj ben' wetka', zoe' loo yichjlall'do'lena', Chioza' lekzka' gone' to yel' mban kob che kwerp chelena' daa guet, daa zoa Espíritu che'na' loo yichjlall'do'lena'.

12 Daan, le' ben' bish' na' le' ben' zan', chonan byen goncho ka cheeni Chioza' na' bi goncho kon daa nazan che beli chenni.

13 La' shi we'chcho cho'a xbayi beli chenni, na' guetcho; san shi we'cho latj gaklen Espíritu che Chioza' cho' kwenche kwej yichjcho dii mala' daa nan goncho, na' gat' yel' mban checho zejli kani.

14 Yog' ben'ka' chzenaggake' che Espíritu che Chioza' na' chongake' ka cheenile', legaken' nakgake' xiin Chios.

15 Cho' ba zoa Espíritu che Chioza' loo yichjlall'do'choni, bich chak checho ka chak che beena' zoa ben' chnabi'ene' na' chall chllebe'ne', san daa zoa Espíritu che'na' loo yichjlall'do'chonan', zejín ba wkaa Chioza' cho' ka xiine'. Na' daa zoalen Espírituna' chon', chak che'chone': "Xadawaa."

16 Na' Espíritu che'na' lekzka' chzajniile' cho' kwenche chnezicho nakcho xiin Chios.

17 Na' daa nakcho xiin Chioza', lekzka' wllin lla ikaalencho Crístona' daa gone', la' shi goncho banez yel' zak'zi'ka' ka diika' ben ble'i Crístona', na' gakchone' txen sho'lenchone' balaan.

18 Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'.

19 Na' yog' diika' bxe bsil Chioza' chbezgakan yob illin lla wli'lao ba nakcho xiin Chioza'.

20 La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gaggakan ka', la' Chiozan' bllie' bia' gaggakan ka', per lekzka' bene' kwenche chbezgakan yiyakshao'gakan.

21 La' wllin lla kat' yog' diika' bxe bsile' bich gaggakan dii kwiayi', san yiyakgakan mbalaz inleeb ka gak checho, cho' nakcho xiine'.

22 Na' nezicho axt naanlla yog' diika' bxe bsile' chak chegakin ka chak che to nool chllagloe' sane' bi'do' che'na'.

23 Na' aga toz diika' ben Chiozan' chak chegakin ka', ka'kzan chak checho, cho' ba yoocho Espíritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiine'.

24 Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez.

25 Per shi ni noncho lez ile'icho daa zi' gak, chiya' gapcho yel' chxenlall' shlak ni chbezcho gakan.

26 Na' lekzka' Espíritu che Chioza' chaklene' cho' choncho daa bi chak goncho. La' aga nezicho nakan chiya'yen' we'llwillcho Chioza', per kwin Espíritu che'na' chbellyeshee chnabe' checho lawe'na'. Na' la'kzi' aga bi dill' chchine',

27 Chioza', beena' nombi'e yichjlall'do' yog'cho, nezile' bin chnab Espíritu che'na' checho. La' daa chaklall' Chiozan' chnabe' checho, cho' nakcho lall' nee.

28 Na' nezicho Chioza' chchine' yog' diika' chen chle'icho kwenche gakkengakan cho', cho' ba chakichone', cho' ba wleje' kwenche gakcho lall' nee kon ka goklallee.

29 Kana' bin' soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiine' Jesucristona', kwenche Jesucristona' gake' ben' llialo ladjchoni, cho' nakcho ben' bishee na' ben' zane'.

30 Chioza' wleje' cho' kani'teyi, na' lekzka' gox wnabe' cho' kwenche gokcho lall' nee, na' biyone' cho' ben' li ben' shao' lawe'na'. Na' cho' ba biyone' ben' li ben' shao', ba nakan sho'cho to balaan xen.

³¹ ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gak bi goni cho'?

³² Shi Chioza' axt ni Xiine'na' bi biyeshile' san bzanile'ne' wite' ni checho, ¿alechlin ki gone' cho' yog'lol diika' bchebe'?

³³ Aga no gak gao xya checho lao Chioza', la' len' ba wleje' cho' na' biyone' cho' ben' li ben' shao'.

³⁴ Na' aga no gak wchoglo checho guetcho. La' Cristo Jesús'a wite' ni checho, na' bibantie' ladj ben' wetka'. Na' chi'e kwit de shli che Chioza', chnabe' gaklene' cho'.

³⁵ Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbil chdoncho, ni daa bi de xalaancho, ni daa zoacho dii nxoll, wa shi wit ben' cho'.

³⁶ Chak ka na Cho'a Xtill' Chioza' daa na:
Daa chzoanto' xtilloona' toshiizi de dii nxoll chento' witgake' neto'.
Chongakile' neto' ka xil'do'ka', baka' nzoagake' witgake'.

³⁷ Per Crístona', beena' chakile' cho', chaklene' cho' kwenche goncho gan lao yog'lolte diika' chen chle'icho.

³⁸ Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anljka', ni dii xiw'ka', ni daa chak naa, ni daa zi' gakə,

³⁹ ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxe bsil Chioza' bi gak gonan ka bich gakile' cho', la' ba bli'e le chakile' cho' daa wit Xancho Cristo Jesús'a ni checho.

9

¹ Daa nonlilallaa Crístona' cho'a dill' li, na' bi chziyaa. Na' lekzka' Espíritu Sántona' chzajniile' nad' kwenche nezi yichjlall'dawaani dga nia' nakan dii li.

² Le nyesh' zoa' na' toshiizi le chjeli lall'dawaani,

³ na' axt shel' wxe'id' bich gaklen Crístona' nad' na' kwiayaa kwenche shicholə gaklenan ben' Israelka' ben'ka' nak ben' wlall cha' na' ben' bishaa.

⁴ Chioza' wleje' dii xozxto'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gagkake' yell che', na' bi'e legake' ley che'na'. Na' bzajniile' legake' ka chiya' we'la'ogake'ne', na' dii zan dii bchebe' gone' chegake'.

⁵ Neto' ben' Israel naknto' dia che dii Abrahama', dii Isaaca' na' dii Jacoba', na' Crístona' lekzka' golje' lo dia chento'na' ka bide' yell-lioni. Na' chiya' we'la'ochone' zejli kani, la' len' nake' Chios na' chnabi'e lao yog'lolte dii de. Kan' nakan.

⁶ Na' bi inacho Chioza' bi bene' ka bchebe' gone' chento', san daa gok, aga yog' ben'ka' golj lo dia che dii Israela' nakgake' dowalj ben' Israel.

⁷ Aga yog' ben' goljgake' lo dia che dii Abrahama' nakgake' dowalj xiin dia che'. Chioza' golle'ne': "Xiino' Isaaki gakb' xaxna' yog'lol xiin dia cho'ka' zi' zaak."

⁸ Dga chzajniin cho' nan aga ni che nakgake' xiin dia che dii Abrahama' nakgake' xiin Chios, san ben'ka' chajle' gone' ka bchebe' gone', legaken' noni xiine'.

⁹ Ki nak daa bcheb Chioza' gone' che dii Abrahama', chi'e: "Zi twiz ka naa zaa dii yoblə, na' Sárana' sane' to xiino' bi' byo."

¹⁰ Na' aga dgazan. Lekzka' Rebécana' wxane' chop bi'do' che dii xozxto'nto' Isaaca'.

¹¹⁻¹² Na' kana' zi' galj bi' kweshka', na' ni bin' gongakb' dii wen ni dii mal, Chioza' bshaljlene' Rebécana', golle'ne': "Bi'na' galjə nech wlexj yichjb' lao bi'na' galjə koll'baa." Golle'ne' ka' kwenche chakbe'icho Chioza' chbeje' beena' gak xiine' kon ka ba blie' bia' gak, na' chaxe' ben'ka' cheenile' gak xiine', ni bi chone' kwent shi bi ba bengake'.

¹³ Nakan kon ka na Cho'a Xtill' Chioza' daa na: "Gokid' Jacoba', na' bwiyyid' Esaúna'."

¹⁴ ¿Bera ka inacho, naa? ¿Awak inacho Chioza' bi chone' wen? ¿Bi nakan ka'!

¹⁵ La' Chioza' golle' dii Moiséza': "Beena' cheenid' yiyesh'lallid' na' yiyesh'lallidee, na' beena' cheenid' gaklen' na' gaklenee."

¹⁶ Daan, nezicho aga daa le cheeni ben' gake' xiin Chiozan' kwej Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'.

¹⁷ La' Cho'a Xtill' Chioza' cho'en dill' ka golle' faraónna', beena' wñabia' Egíptona': "Bzoa' li' chñabi'o kwenche gon' ka ile'i ben' yel' wak cha'na' na' kwenche gakbe'i yog' ben' lle' doxen yell-lioni nad' nak' Chios."

¹⁸ Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech yichjall'do' ben'ka' cheenile' gaggake' ben' widenag.

¹⁹ Na' wnaljo': "Shi choncho kon ka ba nllia Chioza' bia' goncho, bi gak ine' napcho dol' lawe'na', la' aga wakə wsej wlloncho gak ka cheenile'."

²⁰ Na' shi ka' chakilo', ¿nora nako' wsheshlenzo' Chioza'? Aga wak ine' to yes' yo yeen beena' benan: "¿Bi che benzo' nad' ki?"

²¹ La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga lliarote, na' sto dii wchine' che bittez.

²² Na' ka'kzə ba ben Chioza'. Ni che dii mala' chon ben' yell-lioni goklallee wliile' legake' yel' chllaa che'na' na' gone' ka wli'lao yel' wak che'na', per wzoile' wdape' yel' chxenlall' che ben'ka' chidol' yel' zak'zi'na', ben'ka' ba nakan kwiayi'.

²³ Na' lekzka', ba bli'e ka liizelozi ben' wen inleeb nake' daa ba biyesh'lallile' cho' na' bizi'xene' checho, na' biyone' cho' ben' li ben' shao' kwenche idol'cho balaan ka yillincho lawe'na'.

²⁴ Na' ba gox wñab Chioza' cho', aga balz neto' naknto' ben' Israelan', san len bal-le bi nakle ben' Israel.

²⁵ Chak ka wna Chioza' daa bzej dii Oseaza', daa na:

Ben'ka' bi nak yell cha', yepgakee: "Nakle yell cha'."

Na' ben'ka' bi gokid', yepgakee: "Chakid' le'."

²⁶ Na' latja' gana' golle' legake' bi nakgake' yell che', wsi' ben' legake' xiin Chios yaa Chios ban.

²⁷ Ki wna dii Isaíaza' che ben' Israelka': "La'kzi shesh shan ben' Israelka' axt gaggake' ben' zan ka yox daa chi' cho'a nido'na', balchokzgaken' yilagake' kwenche bi kwiayi'gake'."

²⁸ La' Xancho Chioza' lobe' wchogbi'e ka gak che yog' ben' lle' yell-lioni."

²⁹ Ka bzej dii Isaíaza', kana' wne':

Shel' Xancho Chioza', beena' nak liizelozi ben' yel' wak choo yel' wak xen, bi bkwaane' sto chop dia chechoka',

ba biyol binitcho ka gok che ben' yell Sodómaka' na' ben' yell Gomórraka', shel'ka'.

³⁰ ¿Nakra inacho, naa lla? Ben'ka' bi nak ben' Israel bi wzegake' wñeyi kwenche yiyakgake' ben' wen lao Chioza', per daa benlilall'gake'ne', ba biyakgake' ben' li ben' shao' lawe'na'.

³¹ San ben' Israelka', la'kzi goklall'gake' yiyakgake' ben' wen lao Chioza' daa zejlengake' ley che'na', bi wxakgakile'n.

³² Na' ¿bi che bi biyakgake' ben' li ben' shao' lawe'na'? Daa bi benlilall'gake'nen'. Kon gokgakile' ina Chioza' nakgake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj,

³³ yaja' daa chzetj Cho'a Xtill' Chioza', daa na:

Wselaa to ben' yell Siónna',

na' sakleBILE' ka to yaj daa chjachew' ben', na' ka to yaj dii lljsho'gake' na' ibixgake'.

Na' beena' wxenilalleene', biga yiyajile' daa nxenilalleene'.

10

¹ Na' le' ben' bish' na' le' ben' zan', daa lliallalaa na' daa chñab' kat' choe'llwill' Chioza' chñabidee yisle' ben' wlall cha'ka', ben'ka' nak ben' Israel, kwenche bi kwiayi'gake'.

² Nez nle'id' chegake' zechgagake' wñeyi gongake' ka cheeni Chioza', toz daa bi nezgakile' nakyen'an cheenile' gongake'.

³ Daa bi chajni'gakile' toz Chiozan' chiyone' beṅ' beṅ' li beṅ' shao', chaklall'gake' yiyon kwingake' beṅ' wen, na' bi cheengakile' gonlilall'gake' Crístona' kwenche yiyakgake' beṅ' li beṅ' shao' lawe'na'.

⁴ La' daa bid Crístona', bene' daa bi gok gon leya', na' yog' beṅ'ka' gonlilall'gake'ne' yiyakgake' beṅ' li beṅ' shao' lao Chioza'. Na' bich goncho lez daa goncho ka na leyan' yiyakcho beṅ' wen lawe'na'.

⁵ Dii Moiséza' bzeje' ka chiyal' gon beṅ'ka' zoa xni'a leya' kwenche yiyakgake' beṅ' wen lao Chioza', na' nan: “Nottezə beṅ' chon doxen ka na leya' si'e banez yeṅ' mban che'na'.”

⁶ Na' che beṅ'ka' nak beṅ' li beṅ' shao' lao Chioza' daa nonlilall'gake'ne', wne': “Bi sa'lall'zle, inale: ¿Nora gak shaj yabana'?”, (kwenche gone' ka yetj Crístona' yell-lioni).

⁷ “Ni bi inale: ¿Nora gak yetj gana' lle' beṅ' wetka'?”, (kwenche lljaleje' Crístona' ladje'ka').

⁸ Ki chizna daa bzej dii Moiséza': “Dillaa daa ba wna Chioza' zoalenan le' na' ba yoon cho'a loll'lana' na' loo yichjall'do'lana'”, na' lennan' daa choe'lennto' le', nanto' chiyal' gonlilall'le Crístona'.

⁹ Shi wi'o dill' Jesúsza' nake' Xancho na' shajli'o do yichj do lalloo nan Chioza' bis-bane'ne' ladj beṅ' wetka', na' yisla Chioza' li' kwenche bi kwiayoo.

¹⁰ La' daa shajle'cho do yichj do lall'chon, yiyakcho beṅ' li beṅ' shao' lao Chioza', na' lekzka' daa choe'cho dill' nan Crístona' nake' Xancho, yisle' cho' kwenche bi kwiayi'cho.

¹¹ Cho'a Xtill' Chioza' nan: “Nottez beṅ' gonlilalleene', biga yiyajile' daa benlilalleene'.”

¹² Laa nakcho beṅ' Israel, laa bi nakcho beṅ' Israel, Crístona' nake' Xancho, na' chaklene' yog'cho cho' chṅabcho yeṅ' goklen lawe'na'.

¹³ La' nottezə beṅ' inabe' gaklen Xancho Crístona' le', na' yisle'ne' kwenche bi kwiayee.

¹⁴ Per ¿nakra gon beṅ' inabgake' gaklene' legake' shi bin' gonlilall'gake'ne'? Na' ¿nakra gongake' gonlilall'gake'ne' shi bin' yengakile' xtilleena'? Na' ¿nakra gak yengakile' xtilleena' shi kono zoa chixje'ile'n legake'?

¹⁵ Na' ¿nakra gak soa beṅ' chixjee xtilleena' shi kono wsel' legake'? Ka na Cho'a Xtill' Chioza': “Mbalaz inleeb kat' ila' beṅ'ka' zidtxje'gake' dill' wen dill' kob che Chioza'.”

¹⁶ Per aga yog' beṅ' Israelka' chzenaggake' dill' wen dill' kob che Chioza'. Chak ka bzej dii Isaíaza', gana' na: “Xan', kono chajle' dillaa daa chyixje'nto'.”

¹⁷ Daan, kwenche gonlilall' beṅ' Crístona' chiyal' yengakile' xtilleena'.

¹⁸ Na' nia': ¿Abin' yengakile' cho'a xtilleenan', lla? ¿Yog'ze' ba bengakile'n! La' cho'a xtill' Chioza' nan:

Cho'a xtilleeka' chllinan doxen yell-lioni

axt gana' zeelo chiyoll chidon.

¹⁹ Na' chiznia', ¿anti neto' beṅ' Israelan bi wyajniinto'n, lla? Zajniinto'n. La' dii Moiséza' wdixji'e daa goll Chioza'ne' che beṅ' Israelka' kana' wne':

Nad' Chios gon' wen che beṅ'ka' bi nakgake' yell cha' kwenche gaklall'le gon' chele ka chon' chegake'.

Na' gon' kwenche illaale daa chon' wen che beṅ' zit'ka' beṅ'ka' bi napgake' yeṅ' chajni.

²⁰ Na'tech dii Isaíaza' biyaxjile' wne':

Beṅ'ka' bi wze wṅeyi gombia'gake' nad', ben' ka bembia'gake' nad'.

Na' ben' kwenche beṅ'ka' bi wyoo yichjgake' nad' bembia'gake' nad'.

²¹ Na' dii Isaíaza' lekzka' wdixji'e daa goll Chioza'ne' che beṅ' Israelka' kana' wne': “Toshiizi goklallaa gaklen beṅ' widenagka', beṅ'ka' bi chzoa xtillaana'.”

11

¹ Na' nia' ¿aba wlej yichj Chioza' yell che'na' toshiizin, lla? ¿Bi nakan ka! La' lekzka' nad' nak' beṅ' Israel. Golj' lo dia che dii Abrahama' na' nak' xiin dia che dii Benjamína'.

² Kani'teyi wlej Chioza' neto' beṅ' Israel kwenche naknto' yell che', na' aga ba wlej yichje' neto'. ¿Abi chjtinile ka na Cho'a Xtill' Chioza' che Elíaza'? nan ka be'lwille' Chioza' wdawe' xya che beṅ' Israelka', chi'e:

³ “Xan', beṅ' wlall cha'ka' ba betgake' beṅ'ka' wdixjee daa gollo' legake' na' ba blliaiyi'gake' gana' chzeynto' bayix'ka' chonnto' li'. Stochga nad' chgaana', na' lekzka' cheengakile' witgake' nad'.”

⁴ Na'ch Chioza' golle'ne': “Ni nzoa' galla mil beṅ' Israel, beṅ' chzenag cha' na' biṅ' wchek' xibe'ka' lao Baala'.”

⁵ Na' ka'kzan chak naanlla, zi xonjchga neto' beṅ' Israel chzenagnto' che'. Na' yel' beṅ' wen che'na' wleje' neto' gaknto' lall' nee daa nake' beṅ' chiyesh'lallii.

⁶ Na' shi yel' beṅ' wen che'nan' wleje' neto', zevin aga wleje' neto' ni che shi bi dii wennan chonnto'. La' shel' wleje' neto' ni che dii wenna' chonnto', bi nakan to goklen daa bene' chento', shel'ka'.

⁷ Beṅ' Israelka' goklall'gake' yiyakgake' beṅ' wen lao Chioza' tobiall'zgake', na' bi gokan, san beṅ'ka' ba wlej Chiozan' bdo' bllongakile'n. Na' beṅ'ka' sto, zizikchli gokchgake' beṅ' widenag.

⁸ Gok ka na Cho'a Xtill' Chioza' daa na: “Chioza' bcho' bnitile' legake' kwenche bi shajni'gakile'. Na' axt naanlla nakgake' ka to beṅ' bi chen chle'i.”

⁹ Ki wna dii Davina':
“Yiyakshga lni che'ka' ka to yalj dii wzapan legake',
na' ka to dii chgoo chchew'gake', na' sak'zi'gake'.

¹⁰ Gakshgagake' ka beṅ' lcho';
na' toshiizi gak chegake' ka to beṅ' noa' to dii zii wal.”

¹¹ Na'ch nia': ¿Aada bi bzenag beṅ' Israelka' che Chiozan' wchoonlallee legake' toshiizi, lla? ¿Bi nakan ka! San daa bi bzoagake' xtilleenan', na'chan bisle' beṅ'ka' bi nakla beṅ' Israel kwenche beṅ' Israelka' lekzka' gaktall'gake' yisle' legake'.

¹² Shi yel' widenag che beṅ' Israelkan' benan ka gok wen che beṅ'ka' bi nak beṅ' Israel, ¿alechlə ki gakch wen chegake' kat' beṅ' Israelka' yiyonilall'gake'ne'?

¹³ De to dii cheenid' we'len' le' dill', le' bi nakle beṅ' Israel. Chioza' ba wleje' nad' na' bselee nad' laolena'. Na' do yichj do lallaa chon' dga bene' lall' na' gon',

¹⁴ kwenche shi bal' beṅ' wlall cha'ka' gaktall'gake' gak chegake' ka ba chwiagake' chak chele, na' yilagake' bi kwiayi'gake'.

¹⁵ La' shi daa bzoa Chioza' beṅ' Israelka' ka'lə, bene' ka beṅ'ka' bi nak beṅ' Israel bizoalengake'ne' wen, le mbalaz kat' illin lla yilebe' beṅ' Israelka' sto shii. La' gak chegake' ka to beṅ' biban ladj beṅ' wetka'.

¹⁶ Na' shi lee kwana' chbejcho daa chonicho yetxtil necha' daa choe'cho Chioza', zevin doxente kwana' nakan che'. Na' shi lo yaga' nakan che Chioza', lekzka' xoziiinka' nakgakan che'.

¹⁷ Beṅ' Israelka' zaklebgakile' yag olivo wenna' daa bchogue' bal' xoziiinka', na' le' bi nakle beṅ' Israel zaklebile' yag olivo yixaa daa bidee lee yag wenna'. Na' yag wenna' noxaan xozii yag olivo yixaa diika' bidee le'inna' na' cho'en yel' mban chegakan.

¹⁸ Per bi gakile nakchle beṅ' wench aga ka beṅ' Israelka', beṅ'ka' zaklebi xoz' yaga' diika' bchogue'. Bi shep sha'lall'le, la' aga xoz' yagan' cho'en yel' mban cheyin san loinnan' choe'n yel' mban che xoziiinka'.

¹⁹ Na' wnaljale: “Bchogue' xoziiinka' kwenche bidee neto' le'inna'.”

²⁰ Lekzile kan' nakan, la' daa bi benilall'gake' Chiozan', bzoe' legake' ka'lə, na' biyakle lall' nee daa nonilall'lene'. Daan, bi shep sha'lall'le, san li gall illeb Chioza'.

²¹ La' shi Chioza' bi biyeshile' xoz' yaga' diika' nak dowalj, lekzka' gone' chele shi naa.

²² Li gakbe'i ka beṅ' wen beṅ' shao' nak Chioza' na' lekzka' nake' beṅ' chsak'zi'. La' bsak'zi'e beṅ'ka' bi beṅ'liḷall'gake'ne', na' ba chone' wen chele. Na' gonche' wen chele shi gonle ka dii le gon'liḷall'lene', san shi bich gon'liḷall'lene' lekzka' wzoe' le' ka'lə.

²³ Na' shi beṅ' Israelka' gon'liḷall'gake'ne', na' yidee legake' sto shii lee yaga', la' Chioza' wak gone'n.

²⁴ Na' le' bi nakle beṅ' Israel, wak inacho nakle ka xoz' yag olivo yixaa diika' bidee lee yag olivo wenna', la'kzi bi nakan dowalj xoziiin. ¿Alechlin diika' nak dowalj xoziiin ki yideen sto shii? Beṅ' Israelka' nakgake' ka xoziiin daa nak dowalj, na' aga bi lallj nakan yileb Chioza' legake' dii yoblə.

²⁵ Le' beṅ' bish' na' le' beṅ' zan', de to dii bin' inezile daa bzajni Chioza' nad', na' cheenid' inezilen kwenche bi gakzle beṅ' cha'sib na' gakzile zak'chle ka neto' beṅ' Israel. La' aga toshiizin gak beṅ' Israelka' beṅ' widenag, san kat'ka' ba bza' beṅ'ka' bi nak beṅ' Israel gon'liḷall'gake' Crístonan', bich gak beṅ' Israelka' widenag.

²⁶ Na' ka illin lla gak ka', na'ch yog' beṅ' Israelka' yiyakgake' lall' na' Chioza'. Na' gak ka na Cho'a Xtilleena' daa na:

Yell Jerusalénna' ichej to beṅ'

yisell yilee beṅ'ka' nak xiin dia che dii Jacoba' lao dii mala'.

²⁷ Na' dgan chcheb' gon' chegake',

yizi'xen' saaxya che'ka'.

²⁸ Na' daa bi bzenag beṅ' Israelka' dill' wen dill' kob che Crístonan', bllaa Chioza' legake'. Na' daa gok ka' got' latj beṅ'liḷall'lene', le' bi nakle beṅ' Israel. Per Chioza' ni chakile' neto' beṅ' Israel daa wleje' dii xozxto'nto'ka' kwenche gake' beṅ' yell che'.

²⁹ Na' daa chon Chioza', aga wikwase'n na' bi chiyajile' daa chax chnabe' cho'.

³⁰ Kana', le' bi nakle beṅ' Israel, bi bzenagle che Chioza'. Per naa, daa gok beṅ' wllall cha'ka' beṅ' widenag lao Chioza', ba biyesh'lallile' le'.

³¹ Na' daa bi chzenaggake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake' ka chiyesh'lallile' le'.

³² La' Chioza' bi'e latj yog'lol beṅ' gokgake' beṅ' widenag kwenche yog'lolgake' yiyesh'lallile'.

³³ ¡Dii xen inleeb nak yel' sin' na' yel' chajni che Chioza'! ¡Ni to kono chajni daa nllie' bia' gak wa daa nllie' bia' gone'!

³⁴ La' "ni to kono nezi daa chza'lall' Xancho Chioza', na' ni to kono gak wzajniile'ne' nakan chiyal' gone'.

³⁵ Biga zoa beṅ' ba bi'e Chioza' dii naki che' kwenche gone' lez yigoo Chioza' wzon che'."

³⁶ La' len' bxe bsile' yog'lolte dii de na' bllie' bia' chongakan ka chaklallee, na' yog'lol dii de nakan che'. ¡Le' chidolee koochone' balaan zejli kañi! Kan' nakan.

12

¹ Na' le' beṅ' bish' na' le' beṅ' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gake' dowalj beṅ' wen ka chazlallee, la' kan' chiyal' we'la'ochone'.

² Na' bi gonle txen diika' de lo yell-lioni, san li we' latj yikob Chioza' yichjlall'do'lena' kwenche yilla' yel' mban chelena'. Na' ka' gakbe'ile daa cheenile' gonle. Na' daa cheenile' goncho nakan dowalj dii wen, daa chazlallee.

³ Daa nzoa Chioza' nad' gon' xshine'na', nia' le': Ni tole bi gakile ba nakle to beṅ' zakii. San li gakbe'i nak nakle lao Chioza' kon ka zej chaklene' le' chon'liḷall'lene'.

⁴ Ka nak che kwerp chechoni, dii zan dii nsa'n na' aga toz ka dii chongakan.

⁵ Ka'kzan cho', la'kzi nak zanchi, tozan nakcho daa non'liḷall'cho Crístonan', na' ndil nllagcho ka ndil nllag diika' nsa' to kwerp.

⁶ Chioza' ba bene' cho' wde wdeli daa gak goncho kon ka chazlallee gon to tocho. Daan, beena' naki che' chixje'ile' ben' daa che' Chioza'ne', chiya' wxenilalleene' gaklene' le' gone'n.

⁷ Na' beena' naki che' gaklene' ben', chiya' gone'n do yichj do lallee. Na' beena' naki che' wli' wsedile' ben' yoblə, chiya' wli' wsedile' legake'.

⁸ Na' beena' naki che' wtipe' lall' ben', chiya' wtipe' lall'gake'. Na' beena' naki che' izanile' bi wi'e ben', chiya' wi'en do yichj do lallee. Na' beena' naki che' gak kwee xnezi dii chak che ben', chiya' gone'n xochi ga zeelo gake'. Na' beena' naki che' yiyeshile' ben', chiya' yibaile' gaklene' ben'.

⁹ Li gaki ljwell-le do yichj do lall'le. Li gakzbani dii mala' na' li soa gonle dii wenna'.

¹⁰ Li gaki ljwell-le ka bish' goljle, na' ganga goni ljwell-le ka ben' zak'chi ka le'.

¹¹ Bi wshe'lall'le gonle daa cheeni Xanchona', san li gon ka dii le gonle daa chazlallee axt ga zeelo soile.

¹² Li yiba yizaki daa nonle lez lljazoalenle Chioza', li gap yel' chxenlall' kat' zaak yel' zak'zi'ka', na' li we'llwill Chioza' toshiizi.

¹³ Le' nakle lall' na' Chioza', li gaken ljwell-le shi bi dii chyaljile. Na' li we' ben' ga yigaangake' loo yoo lill-le.

¹⁴ Chiya' inabile Chioza' gak wen che ben'ka' chsak'zi' le'. Li inab gak wen chegake' na' bi chishjle bia' blag' chegake'.

¹⁵ Li yiba yizakleni ben'ka' chiba chizaki na' li kwell-len ben'ka' chbell.

¹⁶ Li soalen ljwell-le wen. Bi gake ben' cha'sib, san li gon txen ben' yesh'do'ka'. Na' bi gon kwinle ka to ben' sin'.

¹⁷ Shi ga zoa ben' chone' mal chele, bi yizi'le wzonna'. Chiya' sho' yichjle gonle wen lao yog' ben'.

¹⁸ Chiya' gonle axt ga zeelo gake kwenche soalenle yog' ben' mbalaz.

¹⁹ Le' ben' bish' na' le' ben' zan', bi chiya' yizi'le wzon che ben' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che ben'ka' chon dii mala'. Na' nad' wsak'zi'gakee."

²⁰ Na' lekzka' nan: "Shi chbil' chdon beena' chakzbani li', be' dii yeej gawe'. Na' daa gono' ka', yiyi yido'ile'."

²¹ Bi we'le latj inabia' dii mala' le', san li gon wen kwenche gonle gan dii mala'.

13

¹ Yog'cho chiya' wzenagcho che ben'ka' chnabia', la' aga bi yel' wnabia' de dii bi nak che Chioza'. Na' Chioza' nzoe' ben'ka' kwenche inabia'gake'.

² Na' beena' chizoshi' ben'ka' chnabia', daa nllia Chioza' bia' gonchon chizoshi'e. Na' ben'ka' chon ka', choglo chegake' sak'zi'gake'.

³ Ben'ka' chnabia', aga zoagake' kwenche wwall wshebgake' ben'ka' chon wenan, san ben'ka' chon malan chiya' gall illebgake' legake'. Shi chall chllebo' ben'ka' chnabia', ben wen, na' inegake' wen cho'.

⁴ La' Chioza' nzoe' ben'ka' chnabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə ben'ka' chnabia'n, san Chiozan' nzoe' legake' kwenche wsak'zi'gake' ka chiya' beena' bi chon wen.

⁵ Daan, chonan byen wzenagcho che ben'ka' chnabia', aga kwenchezə bi wsak'zi'gake' chon', san daa nezicho chiya' goncho wenan.

⁶ Na' lekzka' chiya' we'cho daa chido'cho chixjcho, la' Chioza' nzoe' legake' kwenche chnabia'gake', na' lennan' noni xshingake'.

⁷ Na' chiya' yiyixjcho che yog' ben' shi bi chbag'cho chegake'. Shi chal'cho daa chchixj ben'ka' chnabia' cho', chiya' chixjchon. Na' beena' chiya' idap balaan, chiya' gapchone' balaan. Na' beena' chido' sho'e balaan, chiya' koochone' balaan.

⁸ Bi chiyal' ibag'cho che ben', san daa chiyal' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'.

⁹ Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selaloo bi de che ben'." Yog'kzə diikin ba choncho lente yog' diika' sto nllia leya' bia' shi ba choncho dga na: "Chiyal' gaki bish' ljwello'na' ka chaki kwino'."

¹⁰ Shi ba chakicho bish' ljwellchona', bibi dii mal gonichone'. Daan, ba choncho doxen ka nllia leya' bia' shi ba chaki ljwellcho.

¹¹ Li gakbe'i ka nak llaki zoacho naa. Ba gol' goncho ka dii le na' bich gonzcho ka ben' ches, la' gaoch ba zoa yisla Chioza' cho' lao dii mala' aga ka kana' zi' wyajle'cho cho'a xtilleena'.

¹² Ba zoa gao te che yell-lioni gani chnabia' dii mala' daa zaklebi yel cho'la', na' ba zoa gao ile'icho beeni' che Chioza'. Daan, chiyal' kwej yichjcho dii mala' na' soacho goncho dii wenna' lega ben' yoo beeni' che Chioza'.

¹³ Chiyal' wsa' checho wen, ka ben' chda tella. Bi chiyal' goncho txen ga cheej chao ben' na' chzoll chnitgakile', ni bi chiyal' talencho xiin xool ben' wa xiin xyo ben', ni bi chiyal' goncho bichlə daa nak zban. Na' bi chiyal' gakkil-lencho ben', ni bi chiyal' gackcho ben' xe'.

¹⁴ San chiyal' gon kwincho lall' na' Xancho Jesucristona' na' koo yichjcho wsa' checho ka chazlallee na' bich secho wneyi we'cho cho'a xbayi beli chenni.

14

¹ Li gap yel' chxenlall' che beena' bin' gackcha, na' bi gakkil-lenlene' ni che diika' bi nak dii llialo.

² La' bal' ben' chakgakile' nakkzan wen gaogake' bittezə yel' wao, na' zi bal' chakgakile' chiyal' gaogake' shgal' yix' kwan.

³ Beena' cheej chao bittezə, bi chiyal' gonile' nakzi beena' bi cheej chao yog'lol. Na' beena' bi cheej chao yog'lol, bi chiyal' gakile' beena' cheej chao bittezə bi chone' wen. La' Chioza' ba noni xiine' choptegake'.

⁴ ¿Nora nako' li' wwia wyizo' nak chon wen llin che ben' yoblə? Toz xane'nan' nezile' shi chone' wen wa bi chone' wen. Na' wzakkzile' gone' ka chiyal', la' Xanchona' nape' yel' wak kwenche gone' ka soachech xiine'ka' gongake' ka cheenile'.

⁵ Na' nit' ben' chakgakile' zoa lla nakchan lla choo lla xench aga ka lla yoblə. Na' lekzka' zoa ben' chakgakile' toz ka nak yog'te llaka'. To to ben' chiyal' soe' do yichj do lallee gone' ka chakile' nakan wen.

⁶ Na' beena' chaki zoa lla nakan lla choo lla xench aga ka lla yoblə, chbeje'n kwenche kwee Xancho Crístona' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'lol, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

⁷ Ni tocho bi chiyal' secho wneyi che kwinzcho. Shi mbancho wa shi guetcho chiyal' secho wneyi daa cheeni Crístona'.

⁸ Shi mbancho na' goncho ka sho' Xancho Jesucristona' balaan, na' shi guetcho na' guetcho ka sho'e balaan. La', laa mbancho wa ba witcho, lall' na' Xanchona'kzan nakcho.

⁹ Crístona' wite' na' bibane' ladj ben' wetka' kwenche gake' Xan yog'lol ben', ka ben' mban na' ka ben' ba wit.

¹⁰ Bi chiyal' yiya yiyiljcho bish' ljwellchona', ni bi chiyal' gonichone' nakzi. La' yog'lolcho lljazecho lao Chioza' kwenche wchogloe' che to tocho.

¹¹ Cho'a Xtill' Chioza' nan: Xancho Chioza' ne', dii li zoakz' nad', na' dii li yog' ben' wchek' xibe'ka' lawa'ni, na' yoguee we'gake' dill' nan nad' nak' Chios.

¹² Na'chan to tocho yidecho kwent lao Chioza' che diika' bencho.

13 Daan, bich chiyal' yiya yiyilj ljwellcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakchoplallee.

14 Daa bzajonii Xancho Jesúsza' nad', nezid' aga bi yel' wao de dii chxinj chlenan cho', lete shi to ben' chakile' de yel' wao dii chxinj chlenan yichjlall'do'ena', bi nakan wen gawe'n shi naa.

15 Na' shi daa cheej chawo' chonan ka chakchoplall' bish' ljwello'na', aga chakilo'nen' shi ni cheej chaozo'n. Bi chiyal' yeej gawo' daa gonan ka kwiayi' beena' wit Crístona' ni che'.

16 La'kzi chonle bittezə dii chakile nakan wen, bi chiyal' gonchlen shi chonan ka ina ben' yoblə aga wenan chonle.

17 La' shi ba chnabia' Chioza' cho', diika' cheej chaocho bi nakan dii lialo, san dii lialo yiyakcho ben' li ben' shao' na' soalen ljwellcho mbalaz, na' soacho yiba yizakicho daa zoalen Espíritu Sántona' cho'.

18 Na' shi zoacho choncho diiki chazlall' Crístona', na' yibayi Chioza' ka choncho na' lekzka' ben' yell-lioni inagake' choncho wen.

19 Daan, chiyal' goncho to dii byen soalen ljwellcho mbalaz na' gakchachcho ganga.

20 Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen, san bi nakan wen yeej gaocho to dii chonan ka gakchoplall' ben' yoblə.

21 Wentelan bi gaocho belaa ni bi yeejcho vinona', ni bi gonzcho bittezə dii gonan ka gakchoplall' bish' ljwellchoka'.

22 Chiyal' inezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa nezile' nak wen.

23 Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

15

1 Na' cho' ba zoachechcho chonlilall'cho Chioza', chiyal' gapcho yel' chxenlall' che ben'ka' bin' gakcha, na' bi chiyal' gonzcho daa cheenzicho goncho.

2 To tocho chiyal' goncho dii gaklenan bish' ljwellchoka' kwenche gakchagake'.

3 La' Crístona' aga bene' daa wyazlall' to kwinze', san gok che' ka na Cho'a Xtill' Chioza', daa na: "Daa wchell wne ben' cho' bzoazi'yaagakan nad'."

4 Na' yog' diika' na Cho'a Xtill' Chioza' bzejgake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho.

5 Chioza', beena' chon cho' yel' chxenlall' na' chtipe' lall'cho, gaklenshgue' le' soalen ljwell-le wen kon ka bli'yi Cristo Jesúsza' cho',

6 kwenche yog'le gakle toz we'la'ole Chioza', beena' nak Xa Xancho Jesucrístona'.

7 Daan, li wleb ljwell-le, ka ben Crístona' blebe' le' bénlene' txen, kwenche koole Chioza' balaan.

8 Na' nia' le', Crístona' bide' kwenche gaklene' neto' ben' Israel, kon ka bcheb Chioza' lao dii xozxto'nto'ka' kwenche inezinto' chone' kon ka chchebe'.

9 Na' lekzka' bide' kwenche ben'ka' bi nak ben' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na:

Daan, we'lawaa li' ladj ben'ka' bi nak ben' Israel, na' gol' inia' we'lawaa li'.

10 Na' gan yoblə chiznan:

Le' bi nakle ben' Israel, li yibaleni neto' naknto' yell che'.

11 Na' lekzka' gan yoblə chiznan:

Yog'le le' bi nakle ben' Israel, li we'la'o Xancho Chioza'.

Le' lle'le' yog'te yell, li gol' inie'.

12 Na' lekzka' dii Isaíaza' bzeje' daa na:

Ka to yag dii chigaa, ka' yiyak xiin dia che dii Isaína',
daa galj to ben' inabi'e ben'ka' bi nak ben' Israel,
na' gongake' lez gaklene' legake'.

13 Chios, beena' noncho lez gone' wen checho, gonshgue' ka yibaile na' soale mbalaz
daa nonlilall'lene, kwenche zizikli gonchlene' lez daa zoalen yel' wak che Espíritu Santo
che'na' le'.

14 Le' ben' bish'dawaa na' le' ben' zandawaa, nezyenid' le ben' wen nakle na' le ba
chajniile, na' ba chak wzajniij ljwell-le.

15 Na' lee yishi ba biyaxjid' bzej' le' che bal diika' bi chiyal' guetlall'le, la' chaklen Chioza'
nad' kwenche

16 chon' xshin Jesucrístona' ladj ben'ka' bi nak ben' Israel. Na' llinni chon' nakan ka
xshin bxoz, beena' chjwa' lao Chioza' diika' bibi nda' nchen. La' daa choe'len' legake'
dill' wen dill' kob che'na' kwenche gonlilall'gake' Crístona', na' yixis yiyib Espíritu Sántona'
yichjlall'do'eka', na' gakgake' lall' na' Chioza', wak inacho nakgake' ka to dii bibi nda'
nchen daa chzanid' wi'ane'.

17 Daa chaklen Cristo Jesúsza' nad', chibaid' cho'a dill' chon' xshin Chioza' daa bene' lall'
na'.

18 Aga wiyaxjid' wi'a dill' che bichla dii ba ben', san cho'a dill' ka ba bchin Crístona' nad'
kwenche zan ben'ka' bi nak ben' Israel chzenaggake' che'. Bchine' diika' wnia' na' diika'
ben'

19 kon yel' wak che Espíritu che'na' kwenche gok diika' ben ble'i ben' na' wyajle'gake'.
Wzolož' Jerusalénna' na' wya' ax̄t doxen gana' mbani Ilíriconá' be'len' yog' ben' dill' wen
dill' kob che Crístona'.

20 Na' ben' byen jtixji'a dill' wen dill' kob che'na' gana' konon' inezin, kwenche bi
jachish' jalan' xshin ben' yoblá.

21 San kon ka na Cho'a Xtil' Chioza', gana' nan:
Ben'ka' bin' gombia'gake' xtilleena', gombia'gake'n,
na' ben'ka' bin' yengakile' xtilleena', shajni'gakile'n.

22 Na' ni che llin dga chon' bin' gak yid' gana' zoale, la'kzi zan shii ba goklallaa yidwia'
le'.

23 Per naa ba biyoll ben' xshin Chioza' doxen gani chda', na' chakid' wak yidwia' le', la'
kana'te chaklallaa yid'.

24 Cheenid' tia' gana' zoale kat' sha' Españána', la' cheenid' ile'id' le', la'ch' shloll,
kwenche soacho mbalaz. Na' chbez' gakenle nad' kwenche gak kooch' nez.

25 Per naa, yiyaa Jerusalénna' lljasan' dii chyallji ben' bish'choka' lle' na'.

26 La' ben'ka' choe'la'ogake' Crístona' Macedóniana' na' Acáyani do yichj do lall'gake'
ba btopgake' mech dii wsel'gake' che ben' yesh'do'ka' len ladj ben'ka' nonlilall' Crístona'
Jerusalénna'.

27 Do yichj do lall'gake' chaklall'gake' gaklengake' legake', na' dii li nakan to dii chiyal'
gongake', la' lengake' ba naki chegake' dii wenka' ba bcheb Chioza' che neto' ben' Israel,
na' chiyal' yigoogake' wzon che ben' Israelka' we'gake' daa chyalljgakile'.

28 Na' ka yiyoll lljasan' mech dga bengake' lo na', na' kwaa nez sha' Españána' na' tia'
yidwia' le'.

29 Na' nezid' kat' yidwia' le', dii xen inleeb gaken Crístona' cho'.

30 Le' ben' bish' na' le' ben' zan', daa nonlilall'cho Xancho Jesucrístona' na' daa chon
Espíritu Sántona' ka chaki ljwellcho, chat'yoid' le' gake nad' txen inabgachile Chioza'
gaklene' nad' lawi diika' chdil' chllag'.

31 Li inabi Chioza' yisle' nad' lo na' ben'ka' bi chonlilall'gake' Crístona', ben'ka' lle' gana'
mbani Judeana', na' lekzka' li inabile' sho'lall' bish' ljwellchoka' lle' Jerusalénna' dga
lljasan' chegake',

³² kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen.

³³ Na' Chioza', beena' chon ka zoacho mbalaz, soalenshgue' yog'le. Ka' gakan.

16

¹ Cheenid' gombia'le ben' zanchona' le Febe, beena' zoa chaklene' bish' ljwellchoka' nonlilall' Jesucristona' yell Cencreana'.

² Daa nonlilallee Xancho Jesucristona', wlebgachlene' do yichj do lall'le kat' yide' gana' zoale, la' kan' chiyal' goncho, cho' nakcho lall' na' Chioza'. Na' gакlenlene' shi bi dii chyalljile', la' len' ba goklene' zan bish' ljwellchoka' na' lentia' ba goklene'.

³ Li wwapgach chiox Priscilana' len ben' che', Aquilana', ben'ka' chonlengake' nad' xshin Cristo Jesús'a.

⁴ Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' ben'ka' bi nak ben' Israel, ben'ka' ba nonlilall' Crístona' to to yell gana' jtixji'a xtilleena'.

⁵ Na' lekzka' li wwapgach chiox ben'ka' chdop chllag choe'la'ogake' Crístona' lille'ka'. Na' wwapgachle chiox Epenétona', beena' le chakid', beena' gok ben' nech benlilallee Crístona' gana' mbani Ásiana'.

⁶ Li wwapgach Maríana' chiox, la' le ba bilal bizodile' kwenche goklene' le'.

⁷ Li wwapgach chiox ben' wlall cha'ka' Andróniconna' na' Júniaza', ben'ka' wyoolen' txen lillyana'. Nechgake' benlilall'gake' Crístona' ka nad', na' mbejlaogake' ladj ben'ka' chjtixjee xtilleena'.

⁸ Li wwapgach chiox Ampliaza'. Le chakidee daa nake' Xancho Jesucristona' txen.

⁹ Li wwapgach chiox Urbánona', beena' chonlene' neto' xshin Cristo Jesús'a, na' Estáquiza', beena' le chakid'.

¹⁰ Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' ben'ka' nake' txen loo yoo lille'na'.

¹¹ Li wwapgach chiox Herodiónna', beena' nak ben' wlall cha'. Na' lekzka' li wwapgach chiox Narcísona' na' ben'ka' nake' txen loo yoo lille'na', ben'ka' nonlilall' Xancho Jesucristona'.

¹² Li wwapgach chiox Trifénana' na' Trifósana', noolka' chon xshin Xancho Jesucristona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'.

¹³ Li wwapgach chiox Rúfona' beena' le zoacheche' chonlilallee Xancho Jesucristona', na' lekzka' xneena', beena' chonile' nad' ka xiine'.

¹⁴ Li wwapgach chiox Asíncritona', Flegóntena', Hérnaza', Patróbaza', Hérmeza' na' ben' bish'choka' na' ben' zanchoka' zoalen legake'.

¹⁵ Li wwapgach chiox Filólogona' na' Júliana', na' Nerewa' len ben' zane'na', na' Olímpaza' na' yog' ben'ka' zoalen legake', ben'ka' nak lall' na' Chioza'.

¹⁶ Li wwapgach chiox ljwell-le lega ben' chaki ljwellin daa nakle Chioza' txen. Yog' ben'ka' nonlilall' Crístona' yellka' gana' ba wya' chwapgake' le' chiox.

¹⁷ Le' ben' bish' na' le' ben' zan', li wsak' bi wzenagle che ben'ka' chon ka chak ben' chopla, na' gongake' ka gакllejile che dill' lina' ba nsedle. Bi gonle legake' txen.

¹⁸ Ben'ka' chon ka' aga chongake' ka cheeni Xancho Jesucristona', san chongake' daa nazan chegake'. Na' choe'la'o choe' dill'gake' na' choe'gake' dill' goll-lall' kwenche chonlej chongangakile' ben'ka' chajle'daz.

¹⁹ Yog'te ben' ba nezgakile' nakle ben' wizo a dill', na' le chiba chizakid' ka chonle. Na' cheenid' gакle ben' sin' kwenche gonchle diika' nak wen na' bibi dii mal gonle.

²⁰ Na' Chioza', beena' chon ka soacho mbalaz, lii wlliyi'tie' yel' wak che Satanáza' na' gone' ka wlej wshoshjen. Xancho Jesucristona' gакlenshgue' le'.

²¹ Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosípateri, ben'ki nak ben' wlall cha'.

²² Nad', Tercio, chzej' dga na Pábloni, na' lekzka' chwap' le' chiox daa nakcho Xancho Jesucrístona' txen.

²³ Na' Gáyoni chwape' le' chiox, beeni none' lille'ni zoanto', na' lekzka' lille'ni no'en kwenche chdop chllag ben'ki choe'la'ogake' Crístona'. Na' Erástoni, beeni ngoo lo nee mech che yelli, chwape' le' chiox, na' lekzka' bish' ljwellchoni le Cuarto.

²⁴ Xancho Jesucrístona' gaklenshgue' yog'loltele. Kan' gakan.

²⁵ Chiyal' we'la'ocho Chioza', beena' wak gone' ka soachechle gonlilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucrístona'. Nakan daa kono wnezi kani'teyi,

²⁶ per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii ben'ka' wdixjee daa golle' legake' kani'yi kwenche yog' ben' lle' doxen yellioni shajle'gake'n na' wzenaggake' cheyin.

²⁷ Toz Chioza' zeelo nake' ben' sin'. Na' chiyal' koochone' balaan zejli kani daa bselee Jesucrístona'. Kan' nakan.

Kart nech daa bzej Páblona' na' bseleen lao beñ'ka' nonlilall' Jesucrístona' yell Coríntona'

¹ Nad' Pablo nak' beñ' gox wñab Cristo Jesúza' kwenche gak' postl che' kon ka chaklall' Chioza'. Nad', len beñ' bish'cho Sóstenezi, chwapnto' le' chiox.

² Chzej' le', le' chdop chllagle choe'la'ole Chioza' yell Coríntona', na' nakle lall' nee daa ba nonlilall'le Jesucrístona'. Chioza' gox wñabe' le' kwenche gakle lall' nee len yog' beñ'ka' choe'la'ogake' Xancho Jesucrístona' gattezə, la' Xancho Jesucrístona' lekzka' nake' Xangake'.

³ Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

⁴ Toshiizi cho'a Chioza' yel' choxken ka wen ba bene' chele daa nonlilall'le Cristo Jesúza'.

⁵ La' daa ba naklene' txen, Chioza' chaklene' le' kwenche chak gonle yog' diika' cheenile', ka choe'le xtilleena' na' leyi chajniilen.

⁶ Na' ka', ba nakbia'cha dii li ba wyajle'le xtill' Crístona' daa be'lennto' le'.

⁷ Na' daa ba non Chioza' le' daa chak gon to tole, ba chak chonle yog' daa cheenile gonle shlak chbezle yiyed Xancho Jesucrístona'.

⁸ Na' gaklene' le' soachechle gonlilall'lene' axt llana' yiyede', kwenche bibi xtol'le gat' lawe'na'.

⁹ Chios, beena' gox wñab le' kwenche nakle txen Xiine' Jesucrístona', beena' nak Xancho, toshiizi chone' ka chchebe'.

¹⁰ Le' beñ' bish' na' le' beñ' zan', chat'yoid' le' kon yel' wñabia' che Xancho Jesucrístona', li gak toz lao yog'lolte na' bi gonza che chele, san toz ka li se wñeyi na' li gon toz dill' lao bittezə dii gonle.

¹¹ Nia' ka', le' beñ' bish'dawaa na' le' beñ' zandawaa, la' beñ'ka' lle' lill Cloéna' ba wñagake' nad' ka chakdil'-len ljwell-le.

¹² Nia' ka', daa bal'-le nale: "Nad' chon' txen Páblona'", na' bal'-le nale: "Nad' chon' txen Apóloza'." Na' bal'-le nale: "Nad' chon' txen Céfaza'."* Na' zi bal'-le nale: "Nad' nak' txen Crístona'."

¹³ ¿Achakile' Crístona' nake' chop shon kwenlə? ¿Awa chakile nadaan wit' lee yag cruza' ni chele'? ¿Anti lia'na' bzetjgake' ka wchoale nisa'? Nezkzile bi nakan ka'.

¹⁴ Choxken Chioza' ni tole bi bchoa' nisa', lete Críspona' na' Gáyona',

¹⁵ kwenche kono inazə daa chone' nad' txenan wchoe' nis.

¹⁶ Lekzka' bchoanis' beñ'ka' lle' loo yoo lill Estéfanaza', na' bi chjadinid' shi nochlə beñ' yoblə bchoanis'.

¹⁷ La' aga bsel' Crístona' nad' wchoa' beñ' nis, san kwenche chixje'id' legake' dill' wen dill' kob che'nan'. Na' ka chyixji'an, bi chpaa dill'ka' cho'a kwenche ki gaki beñ' dill'ka' cho'a nakchan dii zak'chi aga ka daa wit Crístona' lee yag cruza'.

¹⁸ Kat' no cho'e dill' che daa wit Crístona' lee yag cruza', beñ'ka' kwiayi' chakgakile' bizan chon chnan. San cho' yisla Chioza' kwenche bi kwiayi'cho, nezicho nakan dill' zakii dii nsa' yel' wak che'na'.

¹⁹ La' Cho'a Xtill' Chioza' nan: Yinitloa' yel' sin' che beñ' sin'ka'.

Na' gonlejid' beñ'ka' chaki le chajni.

²⁰ ¿Bitgui gak gon beñ' sin'ka' na' beñ'ka' le nsed ley che Chioza', na' beñ'ka' choe' dill' dii chaki beñ' nakan dill' sin'? La' Chioza' ba bli'e bibi zakii yel' sin' che beñ' yell'-lioni.

* **1:12** Céfás: kan' le Pédrona' de dill' arameo, daa gok xtill' Jesúza'.

21 Lo yel' sin' che'na', ba bene' kwenche aga yel' sin' che ben' yell-lioki gaklenen legake' gombia'gake' le'. La' wyazlallee yisle' ben' kwenche bi kwiayi'gake' daa shajle'gake' xtill' Crístona' daa chyixje'i ben' legake', la'kzi chaki ben' bizan chon chnan.

22 Ka nak ben' Israelka', legake' chnabgake' ile'gakile' yel' wak kwenche shajle'gake', na' ben' griegoka' chiyiljgake' daa chakgakile' nak yel' sin'.

23 San neto' chyixje'into' ben' daa wit Crístona' lee yag cruza', na' ben' Israelka' chakzbangakile' daa nanto' ka', na' ben'ka' bi nak ben' Israel chakgakile' biz dill' daa choe'nto'.

24 San cho' ba gox wñab Chioza' kwenche nakcho lall' nee, ka neto' naknto' ben' Israel na' ka le' nakle ben' griego, nezicho Chioza' bli'e yel' wak na' yel' sin' che'na' daa bselee Crístona' wite' ni checho.

25 Na' dga ben Chioza' daa chaki ben' yell-lioni bizan chon chnan, leyen'lannan' nakchan to yel' sin' xench aga ka bittezə yel' sin' che ben' yell-lioni. Na' daa chaki ben' yell-lioni chli'n bi nap Chioza' yel' wak, leyen'lannan' napchan yel' wak aga ka bittezə yel' wak dii nap ben' yell-lioni.

26 Le' ben' bish', li se wñeyi ka nak daa gox wñab Chioza' le' kwenche nakle lall' nee la'kzi aga zanle nable yel' sin'na' de yell-lioni, ni aga zanle nakle ben' zakii, ni aga zanle goljle lo dia che ben' zakii.

27 La' Chioza' ba wleje' ben' bi nake' ben' sin' yell-lioni kwenche wsi'e ben' sin'ka' yel' zto', na' wleje' ben' bibi zakii yell-lioni kwenche wsi'e ben'ka' zakii yel' zto'.

28 Chioza' ba wleje' ben' bibi zakii, na' ben' choni ben' legake' nakzi, na' ben'ka' kono nakgake' yell-lioni, kwenche chli'e bibi zakii yel' zakii daa de yell-lioni.

29 Na' ka', kono gak gon kwini ben' choo ben' xen lawe'na'.

30 La' kwinkzen' ba bene' ka gokcho Jesucrístona' txen. Na' daa ba nakcho Crístona' txen, Chioza' ba none' cho' yel' sin' che'na', na' ba biyone' cho' ben' li ben' shao' lawe'na', na' ba bixis biyibe' yichjlall'do'chona' na' ba bisell bilee cho' lo ni'a na' dii mala'.

31 Na' kon ka na Cho'a Xtill' Chioza': "Shi no cheeni wshalj wshon, chiya! wshalj wshone' che yog' diika' ba ben Xanchona' che'."

2

1 Na' le' ben' bish' na' le' ben' zan', ka bidtixje'id' le' xtill' Chioza', aga bpaa dill'ka' be'len' le', ni bi bchin' dill' sin' che ben' yell-lioni.

2 Kana' wzoa ladjlena', ben' to dii byen be'len' le' toz xtill' Jesucrístona' na' ka nak daa wite' lee yag cruza', na' bich bi dill' yoblə be'len' le'.

3 Na' ka wzoalen' le', blleb' daa gokid' shi bi gak' wi'a xtill' Jesucrístona' ka chiya!.

4 Na' ka bshaljlen' le' na' ka wdixje'id' le' xtill' Crístona', aga bi'a dill' dii chaki ben' nakan dill' sin' kwenche kooyelaa le' shajle'le. San daa bi'a xtilleena' kon yel' wak che Espíritu che Chiozan' wyajle'le.

5 La' aga goklallaa shajle'le ni che yel' sin' che ben' yell-lioni, san daa yenile' dill'ka' nsa' yel' wak che Chiozan'.

6 Dii li de to yel' sin' daa choe'lennto' ben'ka' ba nakcha nonlilall'gake' Crístona'. Per bi nakan yel' sin' che yell-lioni, ni bi nakan yel' sin' che ben'ka' chñabia'gake' lo yell-lioni, la' wllin lla te che ben'ka'.

7 San chzajniinto' le' yel' sin' che Chioza' daa ngash' kani'teyi, daa wlo'e xnezin kana' zi' wxə wsile' yell-lioni. La' kana'te wlo'e xnezin yid Crístona' chixje' xtol'choka' kwenche soacho mbalaz.

8 Ni tlish' ben' wñabia'ka' zoa yell-lioni bi wyajni'gakile' yel' sin' che Chioza', la' shel'ka' wyajni'gakile'n, bi betgake' Xancho Crístona' lee yag cruza', beena' liizelozi nak ben' choo ben' xen.

9 Per ka na cho'a xtill' Chioza':
Daa konon' ile'i na' konon' yeni, ni konon' sa'lall' shi gakan,

lennan' wloo Chioza' x̄nezin gone' che ben'ka' chakgakile'ne'.

¹⁰ Na' Chioza' ba bene' kwenche Espíritu che'na' ba bzajniile' cho' cheyi diika'. Na' Espíritu che'na' nez n̄le'ile' yog'lol, na' chajniile' kwaslol yog' daa nak che Chioza'.

¹¹ La' cho' ben' yell-lío shinchozə nezicho dii yoo loo yichjall'do' kwincho, na' bi nezicho bi yoo loo yichjall'do' ben' yoblə. Ka'kzan, toz Espíritu che Chioza' nez n̄le'ile' daa ngoo Chioza' x̄nezin.

¹² Na' cho' aga yel' sin' daa de yell-lionin chchincho, san Chioza' ba bene' cho' Espíritu che'na' kwenche chajniicho ka nak dii wenna' daa ba nonə' cho'.

¹³ Na' neto', kat' choe'nto' xtill' Crístona', aga chchinnto' yel' sin'na' de yell-lionizə, san chzajniinto' diika' chzajni Espíritu che Chioza' neto', na' chchinnto' dill' daa chzajniile' neto'.

¹⁴ Na' beena' bi yoo Espíritu che Chioza' loo yichjall'do'ena', bi chajli'e dill' daa chzajni Espíritu che Chioza', daa chakile' bizan chon chnan. Na' bi chajniile'n daa chyalljin gaklen Espírituna'ne' kwenche shajniile'n.

¹⁵ San beena' yoo Espíritu che Chioza' loo yichjall'do'ena' chajniile' che bittezə daa cheeni Chioza' inezile', na' kono gak bi ina che'.

¹⁶ Cho'a Xtill' Chioza' nan: “Ni to kono nezi daa cheeni X̄ancho Chioza' gone', na' ni to kono gak wzajniile'ne' nakan chiyal' gone'.” San cho' ba yoo Espíritu che Chioza' loo yichjall'do'choni, ba chajniicho daa cheeni Crístona' gone'.

3

¹ Le' ben' bish' na' le' ben' zan', bi gok we'len' le' ka dill'ka' choe'len' ben'ka' ba nakcha lo x̄nez Chioza', daa ni chonle ka nazan chele, na' ni nakle ka bi'do' daa bin' shajni'yen'ile che Crístona'.

² Na' ka chon ben' kon bdo' cheenna' cho'eb' nillaa daa bin' gak gaob' yel' wawa', kan' ben' chele, bi be'len' le' dill' dii nak lallj, la' bin' gak shajniilen. Na' ni naa bin' shajni'kzilen.

³ Nia' ka', daa ni chonle daa nazan chele. Daa chakxe'i ljwell-le, na' chakdil-len ljwell-le, chli'n ni chonle ka nazan chele na' chonle ka ben' bi nombia' Chioza'.

⁴ Daa na bal-le: “Nad' nak' txen Páblona’”, na' zi bal-le nale: “Nad' nak' txen Apóloza’”, ¿abi chakbe'ile ka ben' bi nombia' Chiozan' chonle?

⁵ ¿No nak Apóloza'? Na' ¿no nak' nad'? Zeelochoz naknto' wen llin che X̄ancho Crístona', na' le' bene' ka ben'ilall'lene' ka be'lennto' le' xtilleena'. To to neto' bennto' kon ka wlo'e x̄nezin gonnto'.

⁶ Nad' nak' ka beena' goz daa wdis' xtill' Crístona' ladjlena', na' Apóloza' nake' ka beena' wdil, daa bli' bsdchile' le'. Per Chioza' bene' ka wyajle'le daa bli' bsdinto' le'.

⁷ Na' aga no nak beena' chaz ni beena' chyil, la' toz Chiozan' chone' ka chgol daa ba byaz.

⁸ Toz ka zak' beena' chaz na' beena' chyil. Na' Chioza' gone' kwenche to toe' si'e banez kon ka nak llinna' daa bene'.

⁹ Neto' naknto' txen chonnto' xshin Chioza' ladjlena', na' naknto' ka ben' goz goon che', na' le' nakle ka yell-lío che' gana' chonnto' llinna'. Na' lekzka' nakle ka to yoo che' dii chonnto'.

¹⁰ Chioza' ba goklene' nad' chon' xshine'na' ladjlena', na' daa ben' ladjlena' nakan ka ben' wlek to len yoo, na' ben' yoblə chlise' zeeka'. Na' to to wen llin chiyal' wsakee shi chone' llinna' ka chiyal' gakan.

¹¹ Na' kono gak wx̄e sto len yoblin, la' Jesucrístonan' zaklebile' len yoona' ba chi'.

¹² Na' lo len yooni, zoa ben' wx̄eile'n or wa plat, wa yaj dii zakii, na' zoa ben' wx̄eile'n yagla', wa yeje, wa yix.

13 Na' llinna' daa gon to toe' wli'lawin shi nakan dii zakii. La' kat' illin lla gon Chioza' yel' joschis che ben' yell-lioni, yi' che'na' wzeyan daa bi zakii, na' gakbia' nak nak llinna' ben to toe'.

14 Na' shi no ben to dii bi shey, na' si'e banez che xshine'na'.

15 Per shi daa bene' sheyan, na' bibi banez si'e cheyin. Na' kayaadia yile' bi kwiayee lo yi'na'.

16 ¿Abi chakbe'ile nan le' chdop chllagle choe'la'ole Crístona' nakle ka lill xlatj Chioza', na' Espíritu che'na' zoe' ladjlena'?

17 Na' shi no wlliyi' lill xlatje'na', Chioza' wlliyee beena' gon ka', na' len' nakle ka lill xlatj Chioza' daa nakle lall' nee.

18 Bi siye' kwinle. Shi nole chakile nakle ben' sin' daa naple yel' sin' che yell-lioni, chiyal' yiyakle ka to ben' bibi chajni lao ben' yell-lioni kwenche Chioza' gone' le' dowalj yel' sin'na'.

19 La' yel' sin' che ben' yell-lioni aga bi zakaan lao Chioza'. Cho'a Xtill' Chioza' nan: "Chioza' chone' kwenche ben' sin'ka' chakchixgakile' lo yel' sin' che'ka'."

20 Na' lekzka' nan: "Xancho Chioza' nombi'e yog'lol' daa chza'lall' ben' yell-lioni, na' nezile' nakan dii bibi zakii."

21 Daan, ni tole bi chiyal' gakle ben' cha'sib daa shi non nakle txen, la' yog' ben' na' yog' dii de nakan chele kwenche si'le banez cheyin:

22 laa nad' Pablo, laa Apóloza', laa Céfaza', laa yell-lioni, laa yel' mbanna', laa yel' wita', laa daa chak naa, laa daa zi' gak. Yog'nto' len yog' diika' nakgakan chele kwenche si'le banez cheyin.

23 Na' le' nakle lall' na' Crístona', na' Crístona' nake' lall' na' Chioza'.

4

1 Chiyal' gakbe'ile neto' naknto' wen llin che Crístona', na' nak lo na'nto' chzajniinto' ben' daa kono wnezi daa wloo Chioza' xnezin.

2 Na' chonan byen gonnto' kon ka ba none' lall' na'nto' gonnto'.

3 Na' aga bitek wneyi zia' shi le' wa laa xonj ben' chi'e nad' kwent wneyi shi chak gon' xshin Chioza' ka chiyal'. Ni nad' biga chbi'a kwent wneyi che kwin' shi chon' ka chiyal'.

4 Na' la'kzi bibi de dii chao chdian nad', aga ni che ka' bibi dol' cha' de. Toz Xancho Crístona' nez nle'ile' shi chon' ka chiyal' gon'.

5 Na' daan, bi chiyal' sele kwent wneyi ben', san li kwez axt kat'ka' yila' Xancho Crístona' na' wli'e lawi daa ngash' naa na' daa yoo loo yichjlall'do' yog' ben'. Kana'chan gon Chioza' ka sho'cho balaan shi bencho ka cheenile'.

6 Le' ben' bish' na' le' ben' zan', choe'len' le' dill'ki kwenche gak wen chele, na' cho'a dill' che kwin' len xtill' Apóloza' kwenche inezile ka chonnto' na' wsedle bi tele lawi daa na Cho'a Xtill' Chioza'. Na'ch bi gakle ben' cha'sib na' soazle che bal' ben' na' gonzile zi bale' nakzi.

7 ¿Achakile nakchle ben' zak'chi aga ka ben' yoblə? La' Chioza' bene' diika' ba naple. Na' daa ben' Chioza'gakan, ¿berache chshalj chshonzle cheyin ka inacho tobialozlen bllelilen?

8 Le' chakile bich bi chyalljile. Chakile ba nakle ka ben' wni'a daa non Chioza' diika' gak gon to tole. Chakile ba chnabia'lenle Crístona' na' bich chyalljile neto'. Le mba shel' dii li ba chnabia'le, kwenche len neto' inabia'lennto' le', shel'ka'.

9 Chakid' Chioza' ba none' kwenche neto' postl naknto' ka ben' liizelozi bibi zakii, na' ka ben' nchogbia' guet. Na' yog'te ben' yell-lioki na' len anjlka' chibangakile' chwiagake' ka chak chento'.

10 Ben' zan chakgakile' naknto' ben' bi nteyi daa chonnto' xshin Crístona', san le', chon kwinle ka ben' le chajni daa nonlilall'le Crístona'. Neto' chakbe'into' bibi chak gonnto', san le' chakile chak gonle bitteza. Chle'shii ben' le', san neto', chle'zbani ben' neto'.

11 Axt naanlla zoa kat' chbil chdonnto', chyallj xalaannto', chsak'zi' ben' neto', na' aga bi lill xlatjnto' de.

12 Na' chisto yichj chisto lall'nto' chonnto' llin kon ni'a na'nto'ki kwenche gat' dii yeej gaonto'. Zoa ben' chyishjgake' bia' blag' chento', na' neto' chnablnto' gaken Chioza' legake'. Chchi chsak'gake' neto' na' chzo chzakinto' daa chongakile' neto'.

13 Chiya dii nagake' chento', na' neto' choe'lento' legake' dill' xochi. Na' chongakile' neto' ka ben' zeelo bibi zakii, ka to dii ba wchoon ben'. Axt naanlla ni chongakile' neto' ka'.

14 Aga chzej' dga kwenche wsi'a le' yel' zto', san kwenche wzajniid' le', daa chakid' le' ka xiin'.

15 Na' la'kzi zoa shi mil ben' wzajniile' le' che Crístona', toz beena' nak ka xalen zoa. La' nadaan nak' ka xale daa wlo'a le' lo xnez Cristo Jesúsza' ka be'len' le' dill' wen dill' kob che'na'.

16 Daan chat'yoid' le', li gon ka chon'.

17 Na' daan, ba bselaa Timotewa' gana' zoale. Chakidee ka dowalj xiin' na' chone' xshin Crístona' ka chiyal' gone'. Le' yisee lall'le ka nsa' cha' lo xnez Crístona', na' ka chzajniid' ben'ka' chdop chllag choe'la'ogake' Crístona' doxen gana' chda'.

18 Bal-le ba chep cha'lall'le daa chakile' bich yidwia' le'.

19 Per shi Xanchona' wi'e latj, yob yidwia' le' na' ile'id' shi ben'ka' chep cha'lall' dii li chak gongake' ka nagake' wa shi chshaljzgaken'.

20 Aga de dill'zan inacho ba chnabia' Chioza' cho', san daa gapcho yel' wak che'nan' na'chan gak goncho ka cheenile'.

21 ¿Nakra cheenile gon' kat' yidwia' le'? ¿Acheenile gonid' le' znia?, anti ¿we'len' le' dill' xochi daa le chakid' le'?

5

1 Ba benid' dill' nagake' nan len to ben' ladjlena' zoalene' xna'zi'ena' ka xoole'. Daa chon beena' nakan to dii zban inleeb; ni ben'ka' bi nombia' Chioza' bi chongake' ka'.

2 Na' la'kzi chak ka' ladjlena', ni chep cha'lall'zle daa chakile ba chonle ka cheeni Chioza'. Chiyal'la gakyeshilen na' yibejle beena' chon ka'.

3 La'kzi naa bi zoa' gana' zoale, le chi' yichj' ka nsa' chele. Na' kon li gaktezi na'kzan zoalen' le', na' li gon ka ba bchogloa' gak che beena' ben ka'.

4 Na' kat' ndi'a nllagle choe'la'ole Xancho Jesúsza', li gaktezi na'kzan zoa' ladjlena', na' daa zoalen yel' wak che Xancho Jesúsza' le',

5 li yibej beena' na' li gone' lall' na' Satanáza' kwenche shi yiyakbe'ile' na' yiyaj yilenile' na' yile' lo yel' zi'na' daa za' llana' wchoglo Xanchona' che ben'.

6 Bi nakan wen chep cha'lall'le. Ba nezczile dillaa de nan: "Lat'z levadúrana' chisgolan doxen kwa che yetxtila'."

7 Dii mal daa ben beena' ladjlena' nakan ka levadúrana'. Na' ka neto' ben' Israel bi choe'nto' latj yigaan ni lat' levadúrana' loo yoo lillnto' kat' cha' lni Paskwa', ka'kzə le' chiyal' kwejle beena' chon zban ladjlena' kwenche gake ka kwa kob daa bi nchix levadúrana', kon ka ba nakkzle. La' Crístona', beena' zaklebi xil'do'na' chitgake' Paskwa', ba wite' ni checho.

8 Na' ka chon ben'ka' chon lni Paskwa' chbejgake' yog'lol' daa nchix levadúrana', ka'kzə cho' chiyal' soa kwezcho bich goncho saaxyana' na' bi dii mal daa bencho kani'yi, san soacho do yichj do lall'cho shajlencho daa nak dii li.

9 Ba bzejcz' le' to shii wnia' le' bi gonlenle txen ben'ka' chdalen ljwellin.

10 Daa wnia' bi chiyal' gonle txen ben'ka' chdalen ljwellgake', wa chzelall'gake' gat' kwe'gakile' dii de yell-lioni, wa chbangake', wa choe'la'ogake' no yaj yag, aga che ben'ka' bi nombia' Chiozan' nia' ka', la' shel' bi gak lencho ladje'ka' chiyal' ichejteczcho lo yell-lioni, shel'ka'.

11 San daa wnia' ka' zejın bi gak lencho nottezə beŋ' ne' nake' cho' txen nonlilall'cho Crístona' na' chdalene' xiın xool beŋ', wa chzelallile' gat' kwe'ile' dii de yell-lioni, wa choe'la'owe' no yaj yag, wa chbell chñie' che beŋ', wa nake' weezo, wa nake' beŋ' wban. Yog' beŋ'ka' chon ka', ni bi yeej gaolenle legake'.

12 Bi nak lall' na'cho kwe'cho kwent wneyi beŋ'ka' bi nonlilall' Crístona'. San beŋ'ka' nakcho txen nonlilall'cho Crístona', legaken' chiyal' kwe'cho kwent wneyi.

13 Chioza' yizi'e kwent beŋ'ka' bi nonlilall' Crístona'. Na' le', li yibej beena' chon dii mala' ladjlena'.

6

1 Kat' tole de to dii zed chele kon sto beena' nakle txen nonlilall'le Crístona', bi chiyal' shajle lao beŋ'ka' bi nonlilall' Crístona' kwenche gongake' yel' joschis chelena', san li shaj lao beŋ'ka' nak lall' na' Chioza' kwenche gongake' yel' joschis chelena'.

2 ¿Abi nezile wllin lla le' nakle lall' na' Chioza' gonle yel' joschis che beŋ' yell-lioki? Na' shi len' gonle yel' joschis che'ka', lekzka' wak gonle yel' joschis che bizə diido'ka' chak naa.

3 ¿Abi nezile ax̄t anjlka' goncho yel' joschis che'ka'? Na' shi goncho yel' joschis che anjlka', ¿abi gak goncho yel' joschis che diiki chak naa zoacho yell-lioni?

4 Na' shi le' chakdil-len ljwell-le ni che biz diika' chak chele, ¿berache chajzle lao joschiska' beŋ'ka' bi nonlilall'gake' Crístona', beŋ'ka' bibi zakii ladjlena'?

5 Nia' le' ka' kwenche yido'latile. ¿Aniga tlish'le bi nteyi kwenche gak gonle yel' joschis che beŋ'ka' nonlilall'lenle Crístona'?

6 Latjin dii gonlen ladjle na'z, ba zejzle zjtaole xya che ljwell-le lao joschiska' bi nonlilall' Crístona'.

7 Na' daa chao xya che ljwell-le chli'n bi nsa' chele wen. ¿Biche ki chonxenlall'le yog' dii choni beŋ' le', wa ki chonle ka'z kat' no chzi' chban bi de chele?

8 Per le'lə, lwaa dii gonle ka', dii zan dii choni ljwell-le na' chizi' chibantezle che ljwell-le.

9 ¿Abi nezile beŋ'ka' bi chon wen aga willingake' gana' zoa Chioza' chñabi'e? Bi siye'z kwınle, la' ka' nak beŋ'ka' chdalen ljwellin, beŋ'ka' choe'la'o yaj yagka', beŋ'ka' bi chon banez xoolin wa noolka' bi chon banez beŋ' cheyin, beŋ' xejka',

10 beŋ' wbanka', beŋ'ka' chzelallii gat' kwe'gakile' daa de yell-lioni, beŋ' weezoka', beŋ'ka' chbell chñe che beŋ', wa beŋ'ka' chyiljall' naklə si' kwangake' bi de che beŋ', ni to beŋ'ka' chon diiki bi yillingake' gana' zoa Chioza' chñabi'e.

11 Na' bal-le gokle ka' beŋ' malki kana'. Per naa Chioza' ba bixis biyibe' le', ba none' le' yell che', na' ba biyone' le' beŋ' li beŋ' shao' lawe'na' daa ba nonlilall'le Xancho Jesucrístona' na' daa chon Espíritu che'na' llin lo yel' mban chelena'.

12 Dill' de, nan: “De latj goncho bittezə.” Likzan, per aga yog' daa goncho nakan wen. Na' la'kzi de latj goncho bittezə, bi chiyal' we'cho latj inabia'n cho'.

13 Nezicho yel' wawa' nakan che leechoni, na' leechoni none'n kwenche shoon yel' wawa'. Per Chioza' gone' ka' te che chopte diiki. Na' kwerp chechoni aga none'n kwenche nottez gat'lencho, san kwenche goncho daa cheeni Xancho Crístona', na' Xanchona' nak lall' nee kwerp chechoni.

14 Na' ka' bisban Chioza' Xancho Jesucrístona' ladj beŋ' wetka' kon yel' wak che'na', ka'kzan yisbane' cho' ladj beŋ' wetka'.

15 Nezile yog'cho nonlilall'cho Crístona' chzaklebicho tkwen wej kwerp che'na'. Na' biga chiyal' wchincho kwerp chechoki nak ka' tkwen wej kwerp che Crístona' kwenche gat'lencho noolə wdana'.

16 ¿Abi nezile nottezə beŋ' gat'lene' to noolə wda, chake'ne' toz? La' Cho'a Xtill' Chioza' nan: “Beŋ'ka' chop gagake' toz kwerp.”

17 Per beena' chon kwine' lall' na' Xancho Crístona', chake'ne' toz daa yoo Espíritu che'na' loo yichjall'do'ena'.

18 Bi wchinle kwerp chelena' gat'lenzle nottez ben', li ikwas lao dii mala' nak ka'. La' lennan' chxinj chlenchan kwerp chechona' aga ka bichla dii mal yoblə. Beena' gon to dii mal yoblə, aga bi nonan che kwerp che'na', san daa chon beena' chchin kwerp che'na' chat'lene' nottez, chxinj chlenan do ka nake'.

19 ¿Abi nezile kwerp chechoni nakan lill xlatj Espiritu Sántona', beena' bzoa Chioza' loo yichjlall'do'choni? Na' bi gak goncho daa nazan checho;

20 La' Crístona' ba biya'o bizi'e cho' daa blalj xchene'na' na' wite' ni checho kwenche nakcho lall' na' Chioza'. Daan yog' daa gonlen kwerp chechoni chiyal' gonchon ka sho' Chioza' balaan.

7

1 Ka nak diika' wnable nad' ka bzejle nad', nad' nia' nakan wen shi bi ikaa che ben' byona'.

2 Per daa zoale dii nxoll gat'lenle nottez ka chon ben' yell-lioni, daan to to ben' byo chiyal' soa nool che', na' lekzka' to to noolə chiyal' soa ben' che'.

3 Na' ben'ka' nshagna', ka ben' byo ka nool, bi chiyal' wlloni ljwellgake' kwerp che'ka'.

4 La' noola' aga nak kwerp che'na' che toze', san nakan len che ben' che'na'. Na' ka'kzə ben' che'na' bi nak kwerp che'na' che toze', san nakan len che xoolə'na'.

5 Na' daan bi wlloni ljwell-le kwerp cheleka', per shi choptele ba be'le dill' bi gat'len ljwell-le to tiemp kwenche we'llwill-le Chioza', aga bi nonan. Na' tena' chiyal' yiyell ljwell-le dii yoblə kwenche bi soale dii nxoll gon dii xiwaa le' gan na' we'le cho'a xbayi beli chenna' talenle ben' yoblə.

6 Nia' le' ka' kwenche inezile wak wshagna' ben' byona' na' noola', per bi chonan byen shi bi cheengakile'.

7 Nad' chakid' nakan wen shel'ka' yog' ben' byo soe' toze' ka zoa' nad', per wde wdeli nak daa non Chioza' gon to tocho.

8 Na' le' bin' wshagna'le, na' lekzka' le' ba wit ben' cheleka', nia' le' naklan wen soa tozle, ka zoa' nad'.

9 Per shi bi yizoilen, wenchoklə ikaa chele kwenche bi sho' shejlall'le selall'le nool wa ben' byo daa chonan lallj inabia' kwinle.

10 Na' le' nshagna'le, nia' le' kon ka non Xancho Crístona' mandad gonle, aga nakan dii nia' nad': Noola' bi chiyal' yilee ben' che'na'.

11 Na' shi noola' yilee ben' che'na', bi chiyal' yikee ben' yoblə, san wenlan yiyoe'xene' ben' che'na' na' yikeene' dii yoblə. Na' ka'kzə ben' byona' bi chiyal' yilee xoolə'na'.

12 Ka le' nshagna'le na' bi nonlilall'le Crístona' choptele, nia' le' dga, per bi nakan daa nllia Xanchona' bia' gonle: shi to ben' byo nshagna'lene' to noolə bi nonlilall' Crístona', na' noola' none' lez gaḡ'she'lene'ne', bi chiyal' yilaa ben' che'na' le'.

13 Na' shi to noolə nshagna'lene' to ben' byo bi nonlilall' Crístona', na' ben' che'na' none' lez gaḡ'she'lene'ne', bi chiyal' yilaa xoolə'na' le'.

14 Ben' byona', beena' bi nonlilallee Crístona' shi nshagnee to noolə ben' ba nonlilalleene', Chioza' chle'shiile'ne' ni che nool che'na'. Na' noola', beena' bi nonlilallee Crístona', shi nshagnee to ben' byo ben' ba nonlilalleene', Chioza' chle'shiilene' ni che ben' che'na'. Shel' bi nakan ka', bi chle'shii Chioza' xiine'ka', shel'ka'. San daa nonlilall' togake' Crístona', Chioza' chle'shiile' xiine'ka'.

15 Per shi xoolə'na' wa ben' cho'na', beena' bi nonlilallee Crístona', bich cheenile' soalene' li', be' latj yiyaje'. Bi chonan byen soayaadialenzo'ne', la' Chioza' ba gox wñabe' cho' kwenche soacho mbalaz.

16 Na' li' nonlilalloo Crístona', bi nezilo' shi wak gono' kwenche ben' cho'na' wa xoolə'na' gonlilallee Crístona' na' yile' bi kwiayi'e.

17 To tocho, ka beṅ' nshagna' ka beṅ' zoa toze', chiyal' soacho kon ka non Xanchona' checho ka gox wṅab Chioza' cho'. Ka'kzə chon' byen gon yog' kwen beṅ'ka' chdop chllag choe'la'ogake' Crístona'.

18 Shi nole yoole seṅ daa le circunciación ka gox wṅab Chioza' le', bi gonle ka yinit seṅna'. Na' shi bi yoole seṅna' ka gox wṅab Chioza' le', bi koo kwinle seṅ.

19 Aga bi nonan shi yoocho seṅna' wa shi bi yoochon, san daa llialote goncho ka nllia' Chioza' bia'.

20 To tocho chiyal' soacho kon ka nakcho ka gox wṅab Chioza' cho'.

21 Shi ba nzi' beṅ' li' kwenche gonon' xshine'na' ka gox wṅab Chioza' li', bibi gakilo'. Per shi sho'ilo' xnezin yisane' li', ben to dii byen.

22 La' beena' ndoo chon xshin beṅ' ka gox wṅab Chioza'ne', Crístona' ba bisell bileene' lao dii mala'. Na' beena' chon xshinkze' ka gox wṅab Chioza' le', ba nak Crístona' Xane' daa ba biya'o bizi'ene' lao dii mala'.

23 Daa wit Crístona' biya'o bizi'e cho' lo ṅi'a na' dii mala'. Daan chiyal' wzenagchcho che' aga ka che nottez beṅ'.

24 Na' le' beṅ' bish' na' le' beṅ' zan', kon ka zoacho ka gox wṅab Chioza' cho', ka'kzan soa kwezcho lawe'na'.

25 Na' ka le' ni zoale tozle, bi nllia Xancho Crístona' bia' nak gonle, per nad' inia' ka chakid' chiyal' gonle. Na' daa ba biyesh'lallii Xanchona' nad', zak'kzi xtilaana' wzenaglen.

26 Nad' chakid' nakan wen soale kon ka zoale ṅaa, la' llaki zoacho nakgakan dii lallj.

27 Shi zoa nool chele bi yilaalene'. Na' shi kono nool chele zoa, bi gonle byen ikaa chele.

28 Shi wshagna'le, bi nakan mal; na' shi to nool wew' wshagna'b' lekzka' aga bi mal nakan. Per dii zan dii zed chen chle'i beṅ'ka' nshagna', na' chaklallaa bi gak chele ka'.

29 Na' le' beṅ' bish' na' le' beṅ' zan', cheenid' inia' le' dga: Zi' lat'chga latj checho de. Daan, le' nshagna'le, bi we'le latj wsej wllon nool chelena' gonle ka cheeni Chioza'.

30 Na' shi nole zoale nyesh' bi we'le latj wsej wllonan gonle ka cheeni Chioza'. Na' shi nole zoale mbalaz, bi we'le latj wsej wllonan gonle ka cheeni Chioza'. Na' shi nole cha'o chzi'le bittezə, bi we'le latj wsej wllonan gonle ka cheeni Chioza'.

31 Na' shi nole chzi'le banez dii de yell-lioni, bi we'le latj wsej wllonan gonle ka cheeni Chioza'; la' yell-lioni dga nombia'cho nakan dii te cheyin.

32 Nad' chaklallaa bibi sele wṅeyi cheyin, shel'ka'. La' beṅ' byona' bi nshagna' chzeche' wṅeyi daa nak che Xanchona' kwenche gone' ka yiyoollalee.

33 San beena' nshagna' chzeche' wṅeyi cheyi daa de yell-lioni na' nak gone' kwenche yiyoollalii nool che'na' daa chone',

34 na' choplə nak diika' chzie' wṅeyi cheyin. Na' nool tona' na' ka'kzə nool wewaa zechgake' wṅeyi che daa nak che Xanchona', na' do ka nakgake' chon kwingake' lall' nee kwenche gongake' daa cheenile'. San noola' nshagna' chzeche' wṅeyi cheyi daa de yell-lioni na' nak gone' kwenche yiyoollalii beṅ' che'na' daa chone'.

35 Nia' le' ka' aga daa cheenid' wsej wllon' bi gonle, san daa cheenid' gaklen' le' gonle ka chiyali, kwenche bibi wllonan gon kwinle lall' na' Xancho Crístona' do ka nakle na' gonle ka cheenile'.

36 Shi to bi' wew' ba nakan ikaab' to nool wew' bi' ba nzag'b', na' chakib' wenan ikaab' leb' daa ba goḷb', wshagna'chb', aga bi mal chom'.

37 Per shi zoa bi' wew' chakib' bi chonan byen ikaab' noolə na' wzoib' beli chen chebaa kwenche bi wxinj wlem', wenan gom' bi wshagna'b'.

38 Na' bi'na' wshagna' wenkzan chom', per bi'na' bi wshagna'b' chontechb' wen.

39 Na' noola' nshagna', chonan byen soalene' toz beṅ' che'na',shlak mbane'; per shi guet beṅ' che'na', wak yikee beṅ' yoblə, kon shi nake' beṅ' nonlilall' Xancho Crístona'.

⁴⁰ Per nad' chakid' wzoache' mbalazch shi bich yikaa che'. Na' dga ba wnia', chakid' Espiritu che Chioza' yoo loo yichjlall'dawa'nin na ka'.

8

¹ Na' ka nak che yel' wawa' daa chllia ben' lao lwaa lsak' chios che'ka', yog'cho nezicho cheyi dga. Per nxoll gakcho ben' cha'sib daa chakicho le nezicho. San shi napcho yel' chakina', wzecho wneyi gaklen ljwellcho gakchachcho.

² Na' beena' chaki le nezile', chiya' gakbe'ile' bi nezile' ka chiya'.

³ Per beena' le chakile' Chioza', Chioza' nombi'ene'.

⁴ Na' ka nak yel' wawa' daa chllia ben' lao lwaa lsak' chios che'ka', nezicho lwaa lsak' chios che'ka' bibi zak'gakan, san toz Chiozan' zoa.

⁵ Dii li de dii zan daa na ben' nakgakan chios chegake'. Per la'kzi nagake' zoa chios chegake' na xangake' yabana' wa lo yell-lioni,

⁶ cho' nezicho toz Chiozan' zoa, beena' nak Xacho. Len' bxe bsil yog'lolte dii de, na' zoacho kwenche we'la'ochone'. Na' lekzka' zoa toz beena' nak Xancho, na' len' Jesucristona', beena' bxe bsile' yog'lolte dii de, na' ni chen' mbancho.

⁷ Per aga yog' ben' nezgakile' dga. Bal' ben' wyoologake' be'la'ogake' lwaa lsak' chios che'ka', na' kat' cheej chaogake' yel' wawa' daa ba bllia ben' lawinka' chakgakile' txenan chonlengake'n. Na' daa bin' gakbe'gakile' bibi zakii diika', chakgakile' malan' chongake' kat' cheej chaogake' yel' wawa'.

⁸ Per aga ni che daa cheej chaochon ile'shi'chi Chioza' cho' wa gonile' cho' nakzi; la' aga bi chon daa gaocho wa daa bi gaocho.

⁹ Per cho', la'kzi chakbe'icho aga bi zakii lwaa lsak' chios che'ka' na' nezicho aga bi nonan shi yeej gaocho diika' bliagake' lawinka', chiya' wsak'cho kwenche ki wchixcho beena' bin' gakcha lo xnez Chioza' gone' daa chakile' nakan mal.

¹⁰ La' shi nezile' aga bi zakii lwaa lsak' chios che'ka' na' cheej chaole gana' choe'la'ogake' legakan, na' ile'i to bish' ljwell-le le', ben' bin' gakcha lo xnez Chioza', na' nxoll wchoglallee yeej gawe'n, la'kzi chakile' nakan mal.

¹¹ Na' daa chonle daa nezile' bi nakan mal, nxoll wlaale lo xnez Chioza' bish' ljwell-lena' beena' bin' gakcha, beena' lekzka' wit Cristona' ni che'.

¹² Na' daa chonle ka gon bish' ljwell-lena' to dii na yichjlall'do'ena' bi chiya' gone', lao Cristona'kzan chxinj chlenle.

¹³ Daan shi daa cheej chaw' gonan ka wxinj wlen bish' ljwellaa, naklan wen bichga gaw' belaa, kwenche bi gon' ka wxinj wlene'.

9

¹ De lsens gon' daa chakid' nakan wen. Nad' nak' postl che Xancho Jesucristona'. Nad' ble'idee, na' le' ba nonlilall'lene' daa bzajniid' le' xtilleena'.

² Na' la'kzi zoa ben' bi chajle'gake' nak' postl che Jesucristona', le' nezile' nak' postl che'. Na' daa ba nonlilall'lene' chli'n kan' nakan.

³ Na' ki chilli'a xtill' ben'ka' na bi nak' dowalj postl:

⁴ Nezile' wak inabnto' gon ben' dii yeej gaonto' shel'ka'.

⁵ Na' lekzka' wak ikaanto' to noolə nonlilallee Cristona' na' wche'nto'ne' gana' gonnto' xshin Chioza', ka chon postlka' sto, na' ben'ka' nak ben' bish' Xancho Cristona', na' lekzka' Céfaza'.

⁶ ¿Achakile' zeelo Bernabéna' len nad' chiya' gonnto' llinna' kon ni'a na'nto'ki kwenche yeej gaonto'?

⁷ Aga ga zoa soldad chyixj gaxt che kwine'. Na' biga zoa ben' gaze' yag uvana' na' bi yeeje' daa chbian. Ni biga zoa ben' gape' no shib wa no xil' na' bi yeeje' xill'bka' kat' chsie'n.

* 9:5

⁸ Bi gakile nad'zan nia' ka', la' lekzka' na leya' bzej dii Moiséza'.

⁹ La' leya' nan: "Bi willino' yixja' cho'a goonka' kat' chlej chshoshjgakb trígona'." Na' aga toz che goonkan' ze Chioza' wneyi.

¹⁰ San daa zie' wneyi chechon wne' ka'. La' leya' byojan kwenche gaklenan cho'. Ka beena' chwaan goonna', na' ka beena' chonshao' trígona', nongake' lez lengake' ikaagake' daa chizi' chilapgake'. ¹¹ Na' shi neto' naknto' ka ben' goz daa ba bzajniinto' le' cho'a xtill' Chioza', ¿achakile zi'telan gonnto' inabinto' le' shi bi chyalljinto'?

¹² Shi ben'ka' sto chli' chsedi le' choe'le daa chyallj chchingakile', ¿alechla neto'?

Per chonnto' banez bibi chnabinto' le' kwenche bibi gombeg wzenagle dill' wen dill' kob che Crístona'.

¹³ Nezkzile ben'ka' chon llin loo lill xlatj Chioza' cheej chaogake' daa chjwa' ben'ka' lao Chioza'. Na' bxoza' chit bayix'ka' lao Chioza' de lsens gaogake' xpel' bayix'ka' chitgake'.

¹⁴ Na' ka'kzə Xancho Crístona' bllie' bia' che ben'ka' chyixjee dill' wen dill' kob che'na', lekzan ibangakile'.

¹⁵ Per nad' ni tshii bin' inabid' le' gonle dii chyalljid', ni bi chzej' dga kwenche gonlen. Wenchlan guet' aga ka daa ina ben' cha' chon' xshin Crístona' daa naxjid'. La' chibaid' inia' bibi chchixj' chon' xshine'na'.

¹⁶ Na' nad' bi gak wshalj wshon' daa chyixji'a dill' wen dill' kob che Crístona', la' chonan byen gon' daa none' lall' na'. ¿Na' nyesh'laz gak cha' shi bi wi'a dill' wen dill' kob che'na'!

¹⁷ Na' shel'ka' chyixji'an daa goljan loo yichjlall'dawaani, na' chidol' sia' laxj', shel'ka'. Per aga chyixji'an daa goljan loo yichjlall'dawaanin, san zeelo chon' daa ben Crístona' lall' na' gon'.

¹⁸ Na' dgan baneza' chizi'a: daa le chibaid' chyixji'a dill' wen dill' kob che Crístona' na' bibi inabid' ben' wzenague'n, la' bi cheenid' ibanid' dill' wen dill' kob che'na', la'kzi wak gon ka', shel'ka'.

¹⁹ La'kzi kono ben' chnabi'e nad', chon kwin' ka ben' ndoo lla yel lao yog'lol ben' daa choe'lengakee xtill' Crístona', kwenche shanch ben'ka' gonlilall'gake'ne'.

²⁰ Kat' zoa' ladj ben' Israelka', ben'ka' nak ben' wllal' cha', na' chsa' cha' ka nsa' chegake' kwenche gonlilall'gake' Crístona'. Na' chon' daa na leya' bzej dii Moiséza' daa nogake' la'kzi nezid' bich chnabi'an nad'.

²¹ Na' kat' zoa' ladj ben'ka' bi nombia' ley daa bzej dii Moiséza', na' chsa' cha' ka nsa' chegake' kwenche gonlilall'gake' Crístona'. Per bi inacho chzoa' ka'lə daa nllia Chioza' bia', la' chzenag' che leya' daa bzoa Crístona' loo yichjlall'dawaani.

²² Na' kat' zoa' ladj ben'ka' chaki dii zan dii bi de lsens gongake', na' chsa' cha' ka nsa' chegake' kwenche wzajni'chgakidee che Crístona'. Ba bsa' cha' ka nsa' che yog'lolgake' kwenche gon' gan yisla' balgake' na' bi kwiayi'gake'.

²³ Chon' yog' diiki kwenche wzenag ben' dill' wen dill' kob che Crístona' na' yizi'lengakee banez cheyin.

²⁴ Nezkzile ka nak che ben'ka' chxonj, zangake' chxonjgake', per tochokzen' gone' gan na' ikee daa chidolee. Na' ka chon beena' chxonj kwenche gone' gan, kan' chiya' gonle, li gon ka dii le gonle ka cheeni Chioza' kwenche gone' daa si'le banez.

²⁵ Ben' wyitjka' chsed, chbej yichjgake' daa chzoazi'yaa kwerp che'ka'. Na' chongake' ka' kwenche idol' illongakile' daa yibagakile' xtit shloll na' te cheyin. San cho' choncho to dii byen kwenche idol' illonicho to dii biga llia te cheyin.

²⁶ Daan, nad' bi chon' ka beena' kon chxonj ni bi nezile' gan illine', ni bi chon' ka beena' chdil' na' bi chzakile' kwalle' beena' chdil'-lene'.

²⁷ San chnabi'a kwin' kwenche chon' daa chiya' gon' kwenche ki, ka yiyoll wli' wsedid' ben' nakan chiya' gone', nad'lə bi sho'lall'zi Chioza' ka nsa' cha'.

10

1 Le' beṇ' bish' na' le' beṇ' zan', bi cheenid' gal-lall'le daa gok che dii xozxto'choka', yog'gake' wloogake' nez xan beja' daa bze Chioza' na' yog'gake' bidegake' lo neza' bsalj' loo niso'da'.

2 Na' yog'gake' nakgake' ka beṇ' wchoa nis daa gokgake' dii Moiséza' txen biyajlen-gake'ne' xan beja' na' daa bidelengake'ne' lo neza' daa byalj loo niso'da'.

3 Na' yog'lóle' wdaogake' toz yel' wao daa be' Chioza' legake'.

4 Na' yog'lolgake' weejgake' toz nis daa bi'e legake', nisa' daa gol lee yaja', yaja' daa zaklebi Crístona', beena' wzoalene' legake'.

5 La'kzi yog'lolgake' wxi'gake' banez diika', zangake' bi biyoolallii Chioza' ka bengake', na' witgake' gana' bibi chashj chleb.

6 Na' yog' diika' gok chegake' chzajniin cho' bi chiya' selall'cho goncho dii mala' ka bengake'.

7 Bi chiya' we'la'ole diika' non beṇ' lwaa lsak' chios che'ka' ka ben balgake', la' Cho'a Xtill' Chioza' nan: "Wche'gake' weej wdaogake' na' biyolla' bengake' kon daa nazan che beli chen che'ka'."

8 Na' bi chiya' gat'lencho nottez beṇ', ka ben balgake', na' daa bengake' ka', shllaz wit shonichoa milgake'.

9 Na' bi chiya' wzoacho Chioza' gone' daa nazan checho, ka ben balgake', na' daa bengake' ka' wdiṇyaa belka' legake' na' witgake'.

10 Ni bibi gon inazle che Chioza' ka ben balgake' na' ni cheyin bselee anjl che'na' beena' bete' legake'.

11 Na' yog' diiki gok chegake' nakan to dii chzajniin cho' bi goncho ka bengake', na' lliagakan lee Cho'a Xtill' Chioza' kwenche chsi'nin cho' mbancho llaki zeelo.

12 Daan, nottezcho shi chakicho zoachecho nonlilall'cho Crístona', chiya' wsak'cho kwenche bi ibixcho goncho dii mala'.

13 Yog' dii malka' chdil chllagle nakgakan ka diika' chdil chllag nottez beṇ'. Na' wak wxenilall'le Chioza' gaklene' le', la' len' bi wi'e latj idil illagle daa bi so sakile, san kat' idil illaglen, lekzen' gaklene' le' kwenche so sakile yichejle lawinna'.

14 Daan, le' beṇ' bish'dawaa na' le' beṇ' zandawaa, bi we'la'ole diika' non beṇ' lwaa lsak' chios che'ka'.

15 Chshaljlen' le' ba nteile, na' kwinkzle gakbe'ile shi dga chzajniid' le' nakan shli.

16 Kat' chisa'lall'cho daa wit Crístona' ni checho, na' cheejcho lat' wej vinona' na' choe'cho Chioza' yel' choxken, zejin nakcho Crístona' txen daa blalj xchene'na' ni checho. Na' kat' chxoxjcho yetxtila' na' chaochon, zejin nakchone' txen daa bzani kwerp che'na' wite' ni checho.

17 Na' la'kzi nakcho beṇ' zan, toz yetxtilan' chaocho, na' zejin nakcho ka toz kwerp.

18 Na' li wwia ka chon beṇ' Israelka'. Yog' beṇ'ka' chaogake' xpel' bayix'ka' chitgake' lao Chioza' nakgake' toz choe'la'ogake'ne'.

19 Na' bi gakile nia' lwaa lsak' daa non beṇ' chios che'ka' nakgakan dii zakii, ni bi gakile' bel' che bayix'ka' chitgake' lawinka' zak'chgakan ka bittezə bel'.

20 San ki zejin daa nia' ka': kat' beṇ'ka' bi nonlilall'gake' Chioza' chitgake' bayix'ka' chlligake'n lao lwaa lsak' chios che'ka', dii xiw'ka'lan choe'gake'n, na' aga Chiozan'. Na' bi cheenid' we'la'olenle legake' dii xiw'ka'.

21 Bi gak yeej gaocho daa cheej chaocho kat' chisa'lall'cho daa wit Xancho Crístona', na' lekzka' yeej gaotezcho daa cheej chao beṇ'ka' choe'la'o dii xiw'ka'.

22 Bi chiya' wshaacho Chioza', la' aga wzo wzakichone'.

23 Dez dill', nagake': "Wak goncho bittez dii cheenicho." Dii likzan, per aga yog' daa gak goncho nakan wen. La'kzi de latj goncho bittezə, aga yog' daa goncho gaklenen bish' ljwellchoka' gakchachgake' lao Chioza'.

24 Ni tocho bi chiyal' goncho ka gak wen che tozcho, san chiyal' gaklencho ben' yoblə kwenche gak wen che'.

25 Bittezə bel' dii chit'gake' lao yaana' wakə si'len. Na' bi inable shi nakan dii blligake' lao lwaa lsak' chios che'ka' kwenche bi gakchoplall'le cheyin.

26 La' doxen yell-lioni na' yog'te daa de lawinna' nakan che Xancho Chioza'.

27 Shi to ben' bi nonlilallee Crístona' chaxe' le' lljtaole lille'na', na' cheenile' shajle, li yeej li gao daa gone', na' bi inabile' shi nakan dii blie' lao lwaa lsak' chios che'na' kwenche bi gakchoplall'le cheyin.

28 San shi no ina le': "Beli nakan dii wllia lao lwaa lsak' chios cha'ka'", na' bi gaolen ni che beena' wna le' ka'. La' beena' wna ka' wakte gakile' malan chonle shi gaolen.

29 Bi gakile nia' malan gonle gaolen, san nia' ka' ni che beena' gakile' malan chonle shi gaolen.

La'kzi neqid' aga bi nonan gaw' bittezə, bi cheenid' gon' ka sa'lall' ben' yoblə nan malan' chon'.

30 Na' shi cho'a Chioza' yel' choxken cheyi daa gaw', ¿berache inaz ben' malan chon' daa chaw' to dii ba bi'a Chioza' yel' choxken cheyin?

31 Na' bittezə dii chonle, shi cheej chaole wa shi bichlə dii yoblə chonle, chiyal' gonlen ka sho' Chioza' balaan.

32 Bi gonle ka ixop ben' yoblə gone' to dii mal, laa nake' ben' Israel, laa bi nake' ben' Israel, laa nake' ben' nakcho txen nonlilall'cho Chioza'.

33 Li gon ka nad', la' chon' to dii byen toshiizi chon' ka yiyoolallii yog' ben'. Aga chon' kwenche to nad'zə gak wen cha', san chon' ka gak wen che ben' yoblə kwenche yilagake' bi kwiayi'gake'.

11

1 Li wsa' to chele ka nsa' cha', la' nad' nsa' cha' ka bsa' che Crístona'.

2 Le wen chonle daa toshiizi chjadinile nad' na' ni zejlenle diika' bli' bsedid' le'.

3 Per cheenid' shajniile dga: Chioza' chnabi'e Crístona', na' Crístona' chnabi'e yog'lol ben' byo, na' ben' byoka' chnabi'gake' nool che'ka'.

4 Na' nottezə ben' byo shi nkwash' yichje'na' shlak choe'lwille' Chioza' wa shlak chyixji'e daa che' Chioza'ne', bi chgwee Crístona' balaan.

5 San shi nottez nool bi wkwash' yichje'na' shlak choe'lwille' Chioza' wa shlak chyixji'e daa che' Chioza'ne', na' chnite' balaan che ben' che'na'. Na' shi ka' chone', na' nake' ka to noolə ben' nshib axt lo yej.

6 Na' shi to noolə bi wkwash' yichje'na', wenlan wshibteguen' axt lo yej. Na' shi chido'ile' wshiben', chiyal' wkwasheen.

7 Na' ben' byona' bi chiyal' wkwash' yichje'na' daa nake' lwaa lsak' Chioza' na' chli'e balaan che'na'. Na' noola' chli'e balaan che ben' che'na'.

8 La' aga kwit lee noolan' wlej Chioza' ben' byona', san noolan' wleje'ne' kwit lee ben' byona'.

9 Na' ni bi bxie' ben' byona' kwenche gaklene' noola', san bxie' noola' kwenche gaklene' ben' byona'.

10 Ni cheyi daan, na' ni che anjlka' len ladjchoka', chiyal' wkwash' yichje'ka' kwenche nakbia' chapgake' balaan ben' che'ka'.

11 Per cho' nakcho Xancho Crístona' txen, nezicho noolka' chyalljgakile' cho' ben' byo, na' cho' ben' byo chyalljicho noolka'.

12 La' ka nak daa bchej noola' kwit lee ben' byona', lekzka' ben' byona', noolan' chzane' le'; per Chiozan' bxe bsile' yog'lol.

13 Na' le'zə, li wwiakachi shi nakan wen we'llwill noolka' Chioza' gal' yichjzgakile'.

14 Kon ka yoolocho choncho, chakbe'icho nakan yel' zto' we'z ben' byona' latj igol yish' yichje'na'.

15 San nakan wen we' noola' latj igol yish' yichje'na' na' nakan to balaan che'. La' Chioza' none'n kwenche wkwasha'n yichje'na'.

16 Na' shi nole bi chazlall'le dga ba wnia', chiyal' inezile ka neto' na' ka yog' kwen ben'ka' chdop chllag choe'la'ogake' Chioza', toz ka yoolonto' chonnto'.

17 Na' ka nak dga inia' le', bi gak inia' le' wen chonle. La' kat' chdop chllagle choe'la'ole Chioza' lwaayin dii nan gaklenan le', chzoazi'yaalan le'.

18 Zigaate cheenid' inia' le' daa ba benid' nagake' chele nan kat' chdop chllagle choe'la'ole Chioza' nonzə che chel-le. Na' chajli'a dii liljakz ka chonlen.

19 Na' chakljayile chiyal' gake chop shon kwenə kwenche wli'lawin nolen chazlalli Chioza' ka chonle.

20 Na' kat' chdop chllagle na' cheej chaolen ljwell-le txen kwenche chisa'lall'le daa wit Xancho Jesucristona', bi chonlen ka bllie' bia'.

21 La' kat' yeej gaole, bi chbez ljwell-le kwenche yeej gaole txen, san to tole lii cheej chaotele yel' wao cheleka'. Na' bal-le bibi de gaole na' zi bal-le axt chzollile.

22 ¿Abi zoa lill-le ga yeej gaole? ¿Berache chonzile nakzi ben'ka' nakcho txen choe'la'ocho Chioza' na' chsi'zle yel' zto' ben'ka' bibi de yeej gaogake'? ¿Bitgui iniale, lla? ¿Achakile inia' le' le' wen chonle? Bi inia' le' ka', la' aga wenan chonle.

(Mt. 26:26-29; Mr. 14:22-25; Lc. 22:14-20)

23 Dga ba bli' bsedid' le' nakan daa bli' bsemi Xancho Jesucristona' nad'. Lle'na' ben Júda'ne' lo na' ben' malka', Xancho Jesús'a bexee yetxtila',

24 na' biyoll bi'e Chioza' yel' choxken, na'ch bcoxje'n na' chi'e: "Dgan kwerp cha'ni daa chzanid' ni chele. Li gox' lat' wejan gaolen. Li gon dga kwenche lljadinile nad'."

25 Na' lekzka' biyoll wdaogake' xshe'na', bexee kopa' daa yoll vinona', na' chi'e: "Dga yollə loo kopi zevin xchen'na' daa laljə daa gon ka gakti dii koba' bcheb Chioza' gone'. Li gon dga, na' to to ka yeejlen li lljadini nad'."

26 Na' to to ka gaole yetxtila' na' yeejle vinona' axt llana' yiyed Xancho Crístona' zevin chyixje'ile ben' ka nak daa wite' ni checho.

27 Nottezə ben' gawe' yetxtila' wa yeeje' vinona' daa chonan ka lljadinicho Xanchona', na' bi chape' balaan ka nak daa chone', toz ka nak xtoleena' ka che ben'ka' betgake' Xanchona' na' blaljake' xchene'na'.

28 Daan, to tocho chiyal' yiya yiyilj kwincho kat' zi' gaocho yetxtila' na' kat' zi' yeejcho vinona'.

29 La' Chioza' wsak'zi'e nottez ben' kontele yeej gawe'n na' bi gone'n ka kwee Xancho Crístona' balaan daa bzani kwerp che'na' ni checho.

30 Daan, zanle bi shao'le wa zoazi'yaale, na' bal ben'ka' nakle txen ba witgake'.

31 Per shi yiya yiyilj kwincho, Xancho Chioza' bi wsak'zi'e cho'.

32 Na' shi chsak'zi'e cho', chone'n kwenche yigooshlilall'cho na' bi wlliyi'lene' cho' ben'ka' bi nonlilall'gake'ne'.

33 Na' le' ben' bish' na' le' ben' zan', kat' chdop chllagle kwenche yeej gaole, li kwez ljwell-le.

34 Na' shi nole chbil chdonle, chiyal' yeej gaole loo yoo lill-le kwenche bi gonle ka gonan byen tele yel' zak'zi' daa bi chonle wen kat' chdop chllagle. Dech diika' cheenid' wzajniid' le', na' kwaa xnezin kat' yidwia' le'.

12

1 Le' ben' bish' na' le' ben' zan', cheenid' inezile che diika' non Espíritu che Chioza' gak gon to tocho.

2 Nezkzile kana' bin' gonlilall'le Xancho Jesús'a, bentezle txen ben'ka' choe'la'o lwaal sak' chioska' diika' ni bi chak ine.

³ Daan, cheenid' inezile ni to ben' bi ine': "Aga bi zakii Jesúza" shi zoalen Espíritu che Chioza' le'. Na' lekzka' ni to ben' bi gak ine': "Jesúza' nake' Xancho" shi bi zoalen Espíritu Santo che Chioza' le'.

⁴ Wde wdeli daa chon Espíritu che Chioza' to tocho, per lekzen' chone' yog'tegakan.

⁵ Wde wdeli nak xshin Xancho Crístona' goncho, per toze' len' nak Xancho.

⁶ Na' wde wdeli nak daa none' lall' na'cho gon to tocho, per toz Chiozan' chaklene' cho' kwenche chak chonchon.

⁷ Chioza' chli'e zoalen Espíritu che'na' cho' daa none' to tocho diika' chak choncho kwenche chaklenenan yog'cho.

⁸ Na' ba bene' kwenche Espíritu che'na' chaklene' balcho chole'lencho ben' dill' kon yel' sin' che'na', na' zi balcho, chone' ka chajniicho daa nak che Chios na' chak chzajniichon ben' yoblə.

⁹ Na' zi balcho, chon Espíritu che'na' ka chajle'chacho gone' daa inabichone'; na' zi balcho, chone' ka gak yioncho ben'.

¹⁰ Na' zi balcho, chchine' kwenche choncho yel' wak; zi balcho, chone' ka chak chyixje'cho daa na Chioza' cho'; zi balcho, chone' ka chakbe'icho shi dillaa chole' ben' dii li nakan che Chioza' wa shi nakan che dii xiwaa. Zi balcho, chone' ka chak chnecho wde wdeli dill' dii bi nsedcho; na' zi balcho, chone' ka chak chizajniicho bin wna beena' chne dillaa.

¹¹ Na' toz Espíritu che Chioza' chgwee xnezin goncho yog' diika', na' le' chgone' daa gon to tocho.

¹² Na' ka kwerp chechona' nakan toz la'kzi zan diika' ndil nllagan, ka'kzə cho' nonlilall'cho Crístona' nakchone' toz la'kzi nakcho ben' zan.

¹³ Na' yog'lolcho cho', ka ben' Israel, ka ben' griego, ka ben' ndoo lla yel chone' xshin ben', na' ka ben' chon xshinkze', Espíritu che Chioza' ba bene' kwenche nakcho ka toz kwerp. Na' toz len' yo'e loo yichjlall'do' to tocho.

¹⁴ Na' ka nak kwerp chechona', zan diika' ndil nllagan.

¹⁵ Na' shi ni'achona' inan: "Daa bi nak' neena', bi ndil nllag' kwerpa'." La'kzi shi inan ka', ndil nllagkzan kwerpa'.

¹⁶ Na' shi nagchona' inan: "Daa bi nak' jalawe'na', bi ndil nllag' kwerpa'." La'kzi shi inan ka', ndil nllagkzan kwerpa'.

¹⁷ Na' shel'ka' doxen kwerp chechona' nakan jalaocho, ¿nakra goncho kwenche yenicho? Na' shi doxen kwerp chechona' nakan nagcho, ¿nakra goncho kwenche ila'icho?

¹⁸ Na' Chioza' bzoe' to to diika' ndil nllag kwerp chechona' kon gana' chakile' nakan wen soa to ton.

¹⁹ La' shel' toz ka nak yog'te daa ndil nllagan, bi nakan to kwerp shel'ka'.

²⁰ Na' la'kzi zan diika' ndil nllaggakan kwerp chechona', tozkz kwerman nakan.

²¹ Na' jalaochoka' bi gak ye'gakan na'choka': "Bi chyalljid' le'." Ni bi gak ye' yichjchona' ni'achoka': "Bi chyalljid' le'."

²² Na' diika' ndil nllag kwerp chechona' daa chakicho bi nakan wal, lelagakannan' lliarote.

²³ Na' diika' ndil nllag kwerp chechona' daa chakicho bitek bi zaka'n, lelagakannan' chapshiicho. Na' diika' bi cheenicho ile'i ben' chkwashi'chon xachona'.

²⁴ Na' diika' ndil nllag kwerp chechona' na' bi chonan ka yiyii yido'icho ile'i ben' legakan, bi chonan byen wkwash'chon. Na' ka' ben Chioza' kwerp chechona' kwenche nkwash'cho diika' chonan ka yiyii yido'icho ile'i ben' legakan.

²⁵ Na' yog' diika' ndil nllag kwerpa' chaklen ljwellin daa nakgakan toz.

²⁶ Daan shi gayi kwerp chechona' chey chla, doxen kwerpa' bi shao'. Na' shi gayi kwerp chechona' chonichon wen, doxenan chibayi.

²⁷ Na' le' nakle ka kwerp che Crístona' daa naklene' toz, na' to tole nakle ka tkwen wej kwerp che'na'.

²⁸ Na' ladjchona', cho' chdop chllagcho choe'la'ocho Crístona', Chioza' lliarote bzoe' neto' naknto' postl, na'ch bzoe' ben' chyixji'e daa chi'ene', na' de wyoni bzoe' ben' wli' wsedile' ben' cho'a xtilleena'. Na'ch bzoe' ben' wli'e yel' wak che'na', na' ben' yiyone' ben', na' ben' gaklen bish' ljwellchoka', na' ben' chgoo xnezin che xshine'na', na' ben' chne wde wdeli dill' dii bi nsede'.

²⁹ Nezicho aga yog'cho nakcho postl. Aga yog'cho chak chixje'cho daa na Chioza' cho'. Aga yog'cho chak wli' wsedicho cho'a xtilleena'. Na' aga yog'cho chak goncho yel' wak.

³⁰ Aga yog'cho chak yioncho ben'. Aga yog'cho chak inecho wde wdeli dill' dii bi nsecho. Na' aga yog'cho chak yizajniicho bi zeji dill'ka'.

³¹ Na' le', li selall' gaklen Espíritu che Chioza' le' kwenche gak gonle diika' zak'chi. Na' naa wsedid' le' to dii llialaotech.

13

¹ Shi nad' chak' wde wdeli dill' dii chne ben' yell-lioni na' axt len xtill' anjlka' chak', per bi chakid' ben', aga bi zjanayin chak' diika', na' nak' ka to dii nak de ya dii chon dane wa ka platiy dii chon sshag.

² Na' la'kzi shi chak chixji'a daa na Chioza' nad', na' nezid' yog'lol daa nak che Chioza' axt daa kochnon' inezi, na' la'kzi shi le chajli'a che Chioza' axt chon' ka illa' xishna' yaaka', shi bi chakid' ben', aga bi zjanayin chak gon' diika'.

³ Na' la'kzi shi wi'a ben' yesh'do'ka' yog' dii de cha', wa izanid' kwerp cha'ni kwenche wzeygake'n, shi bi chakid' ben', aga bi gaklenan nad' lao Chioza'.

⁴ Shi chakicho ben', gapcho yel' chxenlall' chegake', gonicho legake' wen, bi gakxe'icho legake', bi wshalj wshoncho lawe'ka', bi gakcho ben' cha'siba,

⁵ bi gonichogake' zban, bi chiljcho daa nak to banez chezcho, bi gakcho zgaal zyil, ni bi koolall'cho.

⁶ Ni bi yibaicho kat' no chon mal, san yibaicho kat' no chon wen.

⁷ Shi chakicho ben', bi goncho dii choo dii xen bittez dii chonile' cho', na' bi sa'lall'cho mal che', san toshiizi goncho lez gone' wen, na' so sakicho bitteza.

⁸ Yel' chakina' aga wiyoll widon. San ka nak daa chyixjee ben' daa che' Chioza'ne', na' daa ine ben' wde wdeli dill' dii bi nsede', wllin lla bich iyalljan, na' ni bich bi iyalljicho inezicho.

⁹ La' lat'chga daa nezicho naa, na' lat'chga daa na Chioza' cho' kwenche chyixje'ichon ben',

¹⁰ per kat' illin lla Chioza' gone' ka gombia'chone' kwaslol, na' te cheyi diika' chzajniin cho' lat' wej naa.

¹¹ Kana' nak' bi'do', bshalj' lega bi'do', ben' pensar ka bi'do', na' wyajniid' lega bi'do'. Per ka bgol' bich bsa' cha' ka che bi'do'.

¹² Ka'kzan chak checho kon daa nak che Chioza' naa. Nakcho ka to ben' chwia to lo wan dii bi nla'yen'. Per wllin lla kat' ile'yen'ichone' ka chle'i cho'alao ljwellcho. Bin' gombia'yen'cho Chioza' naa, per wllin lla kat' gombia'chone' kwaslol ka nombi'e cho'.

¹³ Na' naa diiki shonə nakgakan dii lliarote goncho: gonlilall'cho Chioza', gonchone' lez, na' gapcho yel' chakina'. Na' daa lliarote lawi diiki shon, lennan' yel' chakina'.

14

¹ Li gon byen gakile' bish' ljwell-leka' na' lekzka' li selall' gon Espíritu che Chioza' le' to dii gak gonle, na' daa llialach selall'le gone' ka gak chixje'le daa ina Chioza' le'.

² La' beena' chne dill' daa kono chajni, Chiozan' chshaljlene', aga ben' yell-lionin. La' Espíritu che Chiozan' chone' ka cho'e dill' daa kono chajni.

³ San beena' chyixjee daa che' Chioza' le', chone' ka gakchach ben' lao Chioza', na' chtipe' lall'gake' na' chiyonxenlallee legake'.

4 Beena' chne dill' daa kono chajonii, to le'zen' chaklanan, san beena' chyixjee daa che' Chioza'ne' chaklene' yog' ben'ka' chdop chllag choe'la'ogake' Crístona' kwenche gakchagake' lo xneze'na'.

5 Nad' cheenid' shel'ka' yog'lol-le gak inele dill'ka' daa kono chajonii, per wibachid' shel'ka' gak chixje'le daa ina Chioza' le'. La' dii zak'chi daa chyixjee ben' daa na Chioza' aga ka daa inie' dill' daa kono chajonii, lete shi yizajniile' ben'ka' bin zeji dill'ka' chnie' kwenche gakchachgake' lao Chioza'.

6 Na' le' ben' bish' na' le' ben' zan', shi nad' yidwia' le' na' inia' dill' daa kono chajonii, bi gaklanan le'. Lete waklanan le' shi wzajniid' le' to dii ba bli' bsemi Chioza' nad', wa to dii chiya' inezile che', wa chixje'id' le' bi ine' nad', wa wli' wsedid' le' cho'a xtilleena'.

7 Kachaka' blleja' wa no dii llia kwerd cheyin, kono shajonii bin chkwelgake' shi bi chllaa shiinka'.

8 Na' kat' chak to wdil, shi beena' chkwel clarinna' bi wkwelle'n kwaslol, aga no idop illag kwenche shajgake' lo wdila'.

9 Na' ka'kzan chak chele, shi inele dill' daa bi chajonii ben', nakra gone' shajniile' bin nale. Na' bibi zakii dill'ka' chnele shi naa.

10 Nezicho zan kwen xtil' ben' de yell-lioni na' to togakan chajonii ben'ka' chnegake'n.

11 Na' shi bi chajniid' dillaa we'len to ben' nad', nak' ka ben' zit' par le', na' lekzka' le' nake' ka ben' zit' par nad'.

12 Na' daa ba chzelall'le gon Espíritu che Chioza' daa gak gonle, li gon ka dii le inable daa gaklanan bish' ljwell-leka' chdop chllag choe'la'ogake' Crístona' kwenche gakchachgake' lawe'na'.

13 Daan, beena' chne dill' daa kono chajonii, chiya' inabile' Chioza' gaklene'ne' kwenche gak yizajniile' ben' bin zeji dillaa chnie'.

14 La' shi chshaljen' Chioza' dill' daa bi chajniid', yichjlall'dawaani nezin chshaljen' Chioza', per bi chajniid' bin chepee.

15 ¿Beran chiya' gon', lla? Chiya' we'lwill' Chioza' kon dill' daa na Espíritu che'na', na' lekzka' we'lwillee kon dill' daa chajniid'. Na' lekzka' chiya' gol' kon dill' daa na Espíritu che'na', na' gol' kon dill' daa chajniid'.

16 La' shi we'la'ole Chioza' kon dill' daa kono chajonii, la'kzi nakan che Espíritu che Chioza', ben'ka' yengakile' dill'ka' chnele aga gongake' le' txen we'le yel' choxken Chioza' la' bi chajni'gakile' bin nale.

17 La'kzi choe'le Chioza' yel' choxken do yichj do lall'le, bi chaklanan ben' yoblə daa bi chajni'gakile' bin nale.

18 Cho'a Chioza' yel' choxken daa chnech' dill' daa kono chajonii aga ka yog'tele.

19 Per kat' ndop nllagcho choe'la'ocho Chioza' txen, wenchlan inia' gay'zə dill' daa chajniicho kwenche wzajniid' ben' yoblə, aga ka daa inia' ga shi mil dill' daa kono chajonii.

20 Na' le' ben' bish' na' le' ben' zan', bi gonzle pensar ka bi'do' bin' shajonii, san li gon pensar ka ben' golə, ben' ba chajonii. Per ka nak che dii mala', li gak ka to bi'do' bin' sho' yichjin dii mala'.

21 Cho'a Xtil' Chioza' nan: “Wchin' ben' zit', ben' chne dill' yoblə, kwenche wzajniid' ben' Israelki, per ni ka' bi wzenaggake' cha', na Xancho Chioza'.”

22 Daan, kat' chnecho dill' daa kono chajonii chonan kwenche ben'ka' bi chonlilall'gake' Chioza' gakbe'gakile' zoalene' cho' per bibi chzajniin cho' ba nonlilall'chone'. San daa chixje'cho daa na Chioza' cho', chaklanan cho' ba nonlilall'chone' per bi chaklanan ben'ka' bi chonlilall'gake'ne'.

23 Na' kat'ka' ndop nllagle choe'la'ole Crístona', shi yog'zle choe'le dill' daa kono chajonii, na' sho' ben' bi chajniile' bin chonle wa ben' bin' gonlilall' Crístona', wak gakile' bi nza'n chelenan'.

²⁴ San shi yog'le chyixje'le daa na Chioza' le', na' sho' to ben' bin' gonlilall' Crístona' wa to ben' bi chajnni bin chonle, na' yiyakbe'ile' nake' ben' saaxya na' yiyaj yilenile' dii malka' chone' ka yenile' dill'ka' chyixje'le.

²⁵ Na'ch gonan ka wli'lawi daa yoo loo yichjlall'do'ena', na' wchek' xibe' we'lawee Chioza', na' gakbe'ile' dii licha Chioza' zoalene' le'.

²⁶ Na' le' ben' bish' na' le' ben' zan', kat' chdop chllagle de latj kwenche bal-le gol-le dii koon Chioza' balaan, na' zi bal-le wli' wsedile, zi bal-le chixje'le daa na Chioza' le', na' zi' bal-le inele dill' daa kono chajnni, na' zi bal-le yizajniile dillaa kono chajnni. Yog' diiki chiyal' wchinlen kwenche gaklenan soachechle lo xnez Chioza'.

²⁷ Na' kat' inele dill' daa kono chajnni, chopzle wa shonzle inelen, na' yizoayile inele, na' chiyal' soa to ben' yizajniile' bin wnale.

²⁸ Na' shi kono zoa ben' chak yizajniile' bin inale, bi chiyal' inelen gana' ndop nllagle choe'la'ole Crístona', san wak inelenlen Chioza' de loo yichjlall'do'lenezə.

²⁹ Na' lekzka' chop shonzlen chixje'le daa na Chioza' le', na' yizoayile inele. Na' ben'ka' chzenag, chiyal' wzenagyen'gake' shi dii li nakan daa na Chioza'.

³⁰ Shi shlak to ben' chyixji'e dillaa daa che' Chioza'ne', na' ine Chioza' sto ben' chi'e ladjlena', chiyal' kwez beena' chne kwenche chixjee beena' sto daa che' Chioza'ne'.

³¹ To tole yizoayile chixje'le daa na Chioza' kwenche yog'le shajni'chile diika' na Chioza' na' wtipch lall'le.

³² Na' beena' chyixjee daa che' Chioza'ne' chiyal' inabia' kwine' kwenche wi'e latj ine ben' yoblə, shi naa.

³³ La' Chioza' cheenile' gonle xochi yog' daa chonle kat' choe'la'olene' na' bi gonle kon daa nazan chele.

Ka yoolo ben'ka' choe'la'o Crístona' yog'te gana' chdop chllaggake',

³⁴ noolka' chiyal' soagake' llizə gana' chdop chllagle, la' bi de lsens inegake'. San chiyal' wchek' yichj wchek' laogake' lao ben'ka' chnabia' legake', kon ka na ley daa bzej dii Moiséza'.

³⁵ Na' shi de daa cheengakile' inezgakile', chiyal' inabgakile' ben' che'ka' loo yoo lillgake', la' bi nakan wen inegake' kat' ndop nllagle.

³⁶ Bi gakile zigaate ladjlanan' golj wxe cho'a xtill' Chioza', ni bi gakile le'chgan ba bleblen.

³⁷ Shi nole chakile nakle ben' chyixjee daa na Chioza', wa chakile Espíritu che Chioza' chzajniile' le', chiyal' gakbe'ile' dga chzej' le' nakan dii chon Xancho Crístona' mandad.

³⁸ Na' shi no bi chzenag cheyi dga chzej' le', lekzka' kono wzenag che'.

³⁹ Na' le' ben' bish'dawaa na' le' ben' zandawaa, li selall' gak chixjeele daa na Chioza' le', na' bi wllonle ine ben' dill' daa kono chajnni.

⁴⁰ Per bittezə dii gonle, li gonan kon ka chiyali na' xochi li gonan.

15

¹ Na' le' ben' bish' na' le' ben' zan', cheenid' yisaa lall'le dill' wen dill' koba' wdixje'id' le' daa ba bleble na' zoachechle chajle'le cheyin.

² La' lennan' yislan le' kwenche bi kwiayi'le shi toshiizi soachechle shajle'le daa ba wdixje'id' le'. Na' shi bi soachechle toshiizi aga bi zjanayin daa nale ba wyajle'le cheyin.

³ Bli' bsedid' le' dga bzajnni Chioza' nad' daa nakan dii llialote: nan Crístona' wite' ni checho daa nakcho ben' saaxya, kon ka na Cho'a Xtill' Chioza'.

⁴ Na' bkwash'gake'ne' na' biyon lla bibane' ladj ben' wetka', kon ka na Cho'a Xtill' Chioza'.

⁵ Na' bli'lawe' Céfaza', * na'tech bli'lawe' postlka' sto.

* 15:5 Céfás: kan' le Pédróna' de dill' arameo, daa gok xtill' Jesúza'.

6 Na'tech bli'lawe' wdeli gay' guioa ben' bish'choka' na' ben' zanchoka' nonlilall'gake'ne'. Na' zan ben'ka' ni mban lla naanlla, na' balgake' ba wit.

7 Na'tech bli'lawe' Jacóbona', na' wdena' bli'lawe' yog' postlka'.

8 Na' zeeloteyi bli'lawe' nad', la'kzi nak' ben' bibi zakii.

9 Nad' nak' liizelozi ben' bibi zakii ladj ben'ka' wlej Crístona' gongake' xshine'na', na' bi chidolaa ina ben' nad' "postl", daa bsak'zi'a ben'ka' chonlilall'gake'ne'.

10 Per daa nak Chioza' ben' chiyesh'lallii, wleje' nad' wi'a xtill' Crístona'. Na' daa biyeshlallile' nad' bi gokdadzan, la' ba bench' xshine'na' aga ka yog' postlka' sto. Per aga tobia'lozan' bena'n, san len' ba goklene' nad' kwenche bena'n.

11 Na' la'kzi nad' wa postlka' sto choe'lennto' ben' xtilleena', toz ka dill' choe'nto', na' lennan' ba wyajle'le.

12 Na' daa chyixje'nto' biban Crístona' ladj ben' wetka', ¿berache nazə bal-le bi yiban ben' wetka'?

13 La' shel' bi yiban ben' wetka', lekzka' aga biban Crístona' shel'ka'.

14 Na' shel' Crístona' bi bibane' ladj ben' wetka', aga bi zakii daa chyixje'nto' cho'a xtilleena', ni aga bi zakii daa nonlilall'lene', shel'ka'.

15 Na' shel' bi yiban ben' wetka', aga dill' li che Chiozan' be'lennto' le' daa wnanto' Chioza' bisbane' Crístona' ladj ben' wetka', shel'ka'.

16 La' shel' bi yiban ben' wetka', aga biban Crístona', shel'ka'.

17 Na' shel' Crístona' bi bibane' ladj ben' wetka', aga bi zjanayin nonlilall'lene', na' ni napkzle dol' che saaxya cheleka', shel'ka'.

18 Na' shel' nakan ka', ben'ka' benlilall'gake' Crístona' na' ba witgake', wlliyi'chokzgaken', shel'ka'.

19 Na' shel' to lo yell-lionizan noncho lez gaklen Crístona' cho', nyesh'lazch nakan checho aga ka che yog' ben' yoblə, shel'ka'.

20 Per dii li Crístona' bibane' ladj ben' wetka', na' daa bibane' neche' ladj ben' wetka' zakleBILE' dii necha' chizi' chilap ben'.

21 Daa bxinj blen toz ben', wyoo yel' wita' yell-lioni, na' lekzka' toz ben' bxie' daa yiban ben' wetka'.

22 Ka chet yog' ben' ni che daa bxinj blen dii Adánna', ka'kzan yiban beena' nak Crístona' txen.

23 Per to to ben' yibane' ladj ben' wetka' kat' illin llana' nllia Chioza' bia' yibangake'. Zigaate Crístona' bibane' ladj ben' wetka', na' kat' yiyed Crístona', lekzka' yiban yog' ben'ka' nak lall' nee.

24 Na' te che yell-lioni kat'ka' wlliyi' Crístona' yog'lol yel' wak na' yel' wñabia' yoblə, na' yiyo'e yel' wñabia' che'na' Xacho Chioza'.

25 La' Crístonan' chiyal' inabi'e axt ki yiyoll yido wzoe' xni'ena' yog' ben'ka' chakzi' chakzbani le' na' yog' dii xiw'ka'.

26 Na' yiyollin, wlliyee yel' wita'.

27 Cho'a xtill' Chioza' nan Chioza' bzoe' xni'a Crístona' yog'lolte dii de. Na' daa nan yog'lolte zoa xni'a Crístona', aga len Chiozan' zoe' xni'ena', la' len' bzoe' xni'a Crístona' yog'lolte dii de.

28 Na' kat'ka' yog'lolte dii de ba zoan xni'a Crístona', na'ch kwin Crístona', beena' nak Xiin Chioza', wzexj yichje' lao Chioza', beena' bzoa yog'te dii de xni'ena'. Na'ch gakbia' nan Chioza' nake' liizelozi ben' zakii lao yog'lolte dii de.

29 Na' chiznia' sto, ¿bera zejin daa chchoa bal ben' nisa' lwaa ben' wetka'? Shi chakgakile' bi yiban ben' wetka', ¿berache chchoazgake' nisa' lwaagake'?

30 Na' shel'ka' bi yiban ben' wetka' ¿berache zoaznto' dii nxoll gak dii gak chento' do lla do yel'?

31 Dii li, le' ben' bish' na' le' ben' zan', yog' lla zoa' dii nxoll guet'. Na' lekzka' dii licha le chiba chizakid' chele daa ba nonlilall'le Xancho Jesucrístona'.

32 Yell Éfesoná' wdil-len' ben'ka' nak ka ba zñia nleeb, ¿beratgui gon' gan wdil-lengakee shel'ka' bi yiban ben' wetka'? Gonchokljacho ka dillaa de daa na: “Yeej gaotezcho la' wetcho wx̄e willj.”

33 Bi we'le latj no siye' le'. La' dill' de, nan: “Shi goncho txen ben' malka' na' solo goncho ka chongake'.”

34 Li yiyeeni kwaslōl na' bich gonle dii mala', la' bal-le ni bi nombia'le Chioza'. Nia' le' ka' kwenche yido'latile.

35 Wnalja bal-le: “¿Nakra gak yiban ben' wetka'? Na' ¿Nakra yiyak kwerp che'ka'?”

36 Shi ka' nale, nakle ka ben' bi nteyi. Kat' chazcho biñna', bi chila' yagdo'na' shi bi chbiayi' biñna'.

37 Kat' chazcho, aga yagdo'nan' chazcho, san biñ cheyinnan' chazcho, na' chila' yagdo'na'. Na' kan' chak che bittezə dii chazcho, shi no trigo wa bichlā.

38 Na' Chioza' chgwee xnez xlatjin chakan ka cheenile', na' to to biñ chak xyaguinna' kon ka chiyal' gak che to ton.

39 Aga toz ka nak kwerpka'. Nlla'lə nak kwerp che benecha' len che bayix'ka'. Na' nlla'lə nak che baka' chzo xan yabana' na' che belka' lle' loo nisa'.

40 Lekzka' nak cheyi diika' lle' xan yabana' na' diika' chle'icho lo yell-lioni. Nlla'lə yel' xochi cheyi diika' chle'icho xan yabana' len yel' xochi cheyi diiki chle'icho lo yell-lioni.

41 Nlla'lə yel' chey cheeni' che wbillā' len che beo'do'na' na' len che beljka'. Na' ladj beljdo'ka' nlla'lə nak yel' chey cheeni' che to togakan.

42 Na' ka'kzan gak che ben'ka' yiban ladj ben' wetka'. Kwerpa' daa chgash' loo bana' nakan dii gooll' iteb, san kwerp daa yiyas kat' yibancho ladj ben' wetka' bi nakan dii gooll' iteb.

43 Kwerpa' daa chgash' loo bana' nakan dii bichbi zakii, san daa yiyas ladj ben' wetka' gakan to dii zakii nleeb. Kwerpa' daa chgash' loo bana' nak blan'zan, san daa yiyas ladj ben' wetka' gakchechan.

44 Kwerpa' daa chgash' loo bana' nakan de beli chenzə dii chon llin yell-lioni, san kwerp daa yiyas ladj ben' wetka' gakan to dii kob daa gon Chioza'. Na' daa nezicho kwerp chechoni nakan de beli chenzə, lekzka' chiyal' inezicho wat' to kwerp kob checho daa gon Chioza'.

45 Cho'a Xtill' Chioza' nan: “Adánna', beena' gok ben' nech, goke' to ben' yaa ben' ban.” Na' lekzka' Crístona' goke' ben' yell-lío, per le' chone' yel' mban zejli kañi.

46 Zigaate chbanlencho kwerp de beli chenni, na'techlan ibanlencho dii koba' daa gon Chioza'.

47 Ben' necha' ben Chioza' de bishte yo, goke' ben' yell-lío. Na' ben' wchopina', beena' nak Xancho, len' wzee yabana'.

48 Kwerp chechona' nakan ka kwerp che ben' necha' bxe bsil Chioza' de bishte yona'. Na' ka nak kwerp che Crístona', beena' zoa yabana' ñaa, ka'kzan yiyak kwerp chechona' kwenche lljazoacho yabana'.

49 Ñaa nakcho ka beena' ben Chioza' de bishte yo, na' wllin lla yiyakcho ka Crístona', beena' zoa yabana'.

50 Na' le' ben' bish' na' le' ben' zan', cheenid' inia' le': Aga wak yillinlencho kwerp de beli chenni gana' zoa Chioza' chñabi'e. Na' kwerpi dga gooll' iteb bi gak gonan txen kwerp daa bi gooll' iteb.

51 Ni inia' le' to dii kono wnezi: aga yog'cho guetcho, per yog'cho yiyakcho nlla'lə.

52 Tokonganzi, to ka chshod' chxa'z jalaochoki, kat' kwell trompet che Chioza', yiyakcho nlla'lə. La' ka kwell trompeta', ben' wetka' yibangake' kon to kwerp dii bi gooll' iteb. Na' cho' ni mbancho, lekzka' yilla' kwerp chechoki.

53 La' kwerp chechoni dga gooll' iteb, yiyakan to dii bi gooll' iteb. Na' beli chen chechoni dga ile'i yel' wita', yiyakan to dii bichga guet.

⁵⁴ Kat'ka' kwerp chechoni dga gooll' iteb ba biyakan to dii bi gooll' iteb, na' beli chen chechoni dga ile'i yel' wita' ba biyakan to dii bichga guet, na' gak ka na Cho'a Xtill' Chioza' daa na: "Xanchona' ba bene' gan bsol bnite' yel' wita' toshiizi."

⁵⁵ Na' lekzka' nan: "Yel' wit, li' chsi chchogo' yel' mban che ben', ¿gan yel' wak cho'na' naa?"

⁵⁶ Daa bi choncho diika' bllia Chioza' bia' goncho chli'n nakcho ben' saaxya, na' daa nakcho ben' saaxya, yel' wita' napan yel' wak kwenche wsol wnitán cho'.

⁵⁷ Per choxken Chioza' bselee Xancho Jesucristona' ni checho kwenche bi saki yel' wita' si' ikaan cho' zejli kani.

⁵⁸ Daan, le' ben' bish'dawaa na' le' ben' zandawaa, li soachech lo xnez Chioza' toshiizi. Na' zizikli li gon xshin Xancho Jesucristona', la' nezczile xshine'na' aga nakan to llin dii chondadzle.

16

¹ Na' ka nak mech daa wtople daa we'le ben'ka' nak lall' na' Chioza', li gon ka ben' mandad gon ben'ka' chdop chllag choe'la'ogake' Crístona' to to yell daa llia gana' mbani Galáciana'.

² Yog' lla nech che xmanka', to tole chiyal' kwejle lat' wej daa benle gan lo xmanna' na' kooshao'len kwenche bibi wtople kat' yid'.

³ Na' kat' yid' gana' zoale, wselaa ben'ka' kwejle lljwa'gake' Jerusalénna' mecha' daa btople, na' wgox'gakee yish daa wzej' kwenche ben' Jerusalénka' wlebgake' legake'.

⁴ Na' shi chonan byen shaa, na' sha'len' legake'.

⁵ Chonan byen tia' gana' mbani Macedóniana', na' ka tia', yidwia' le'.

⁶ Na' waklja yigaanlen' le' shloll wa soalen' le' axt ka yiyollch te dii zaga'. Na' kat' yigwaa nez yiyaa gan yoblə wak gaklenle nad' gonle daa iyallj ichinid'.

⁷ Aga shlollzan cheenid' yidwia' le', san non lez yigaanlen' le' ssha, shi Xancho Chioza' wi'e latj.

⁸ Na' naa cheenid' yigaana' yell Éfesoni axt ka gal' lni Pentecostéza',

⁹ la' ben' zan lle' ni, ben' cheeni wzenag xtill' Jesucristona', la'kzi ben' zan chllaagake' daa choe'len' ben' xtilleena'.

¹⁰ Na' shi ba za' Timotewa' gana' zoale, li gonile wen, la' lekzka' lene' chone' xshin Xancho Jesucristona' ka chon' nad'.

¹¹ Na' ni tole bi gonilene' nakzi, san li gaklene' yigwee neza' mbalaz kwenche yidwie' nad', la' chbeztia'ne' kon ben' bish'choka' sto.

¹² Na' ka nak ben' bish'cho Apólozi, le got'yoidee yidlene' ben' bish'choki yidwiagake' le', per bi goonile' yide' naa, per widkze' kat' gat' latj che'na'.

¹³ Li se kwas na' li soachech gonlilall'chle Crístona'. Li gakcha lo xneze'na' na' bi illeble.

¹⁴ Na' bitteza dii gonle, li gonan lega ben' chaki ljwellin.

¹⁵ Na' le' ben' bish' na' le' ben' zan', nezile ben'ka' lle' lill Estéfanazi gokgake' ben' nech ben' benlilall'gake' Crístona' gana' mbani Acáyana', na' zoatekzgake' chli' chsedgakile' ben'ka' nak lall' na' Chioza'.

¹⁶ Chat'yoid' le', li wzenaggach che ben'ka' chon ka legake', na' li wzenag che yog' ben'ka' chaklen chongake' xshin Chioza'.

¹⁷ Le chibaid' daa ba bid Estéfanazi len Fortunátoni na' Acaíconi gani zoa', la' daa zoalengake' nad' ni, bich chakyeshid' daa bin' gak yidwia' le'.

¹⁸ Ba biyongake' nad' to yel' chxenlall' ka daa chongake' le'. Ka ben'ki na' ka ben'ka' chon ka legake', chidol'gake' gaple legake' balaan.

¹⁹ Ben'ki chdop chllag choe'la'ogake' Crístona' to to yell gani mbani Ásiani chwapgake' le' chiox. Na' Aquílani len Priscílani, len ben'ka' chdop chllag lille'ka' chwapgake' le' chiox do yichj do lall'gake' daa nakle Xancho Crístona' txen.

²⁰ Na' yog' beṇ' bish'choka' lle' ni chwappake' le' chiox. Na' li wwap ljwell-le chiox lega beṇ' chaki ljwellin daa nakle lall' na' Chioza'.

²¹ Nad', Pablo, kwin' chzej'* gani chwap' le' chiox.

²² Nottezə beṇ' bi chakile' Xancho Jesucristona', wsak'zi'shga Chioza'ne'. ¡Bidagach Xan'!

²³ Xancho Jesucristona' soalenshgue' le' na' gaklenshgue' le'.

²⁴ Le chakid' yog'le daa nakcho Jesucristona' txen.

* **16:21** Kwin' chzej': Páblona' bchine' beṇ' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart wchopi daa bzej Páblona' na' bseleen lao beñ'ka' nonlilall' Jesucrístona' yell Coríntona'

¹ Nad' Pablo nak' postl che Jesucrístona' kon ka chaklall' Chioza', na' len beñ' bish'cho Timotewi chwapnto' le' chiox, le' chdop chillagle choe'la'ole Chioza' yell Coríntona'. Na' lekzka' chwapnto' chiox yog'lol bish' ljjwellchoka' lle' gana' mbani Acáyana', beñ'ka' nak lall' na' Chioza'.

² Na' chñabinto' Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

³ Chiyal' we'la'ocho Chioza', Xa Xancho Jesucrístona', la' len' Xachona', beena' chiyesh'lallile' cho' na' chiyonxenlallee cho' lao bittezə dii chak checho.

⁴ Chiyonxenlallee cho' lao yog'lol diika' chzak'zi'cho kwenche ka chone' checho, ka'kzan goncho yiyonxenlall'cho beñ' yoblə kat' chzak'zi'gake'.

⁵ Daa lennto' chzak'zi'nto' ka wxak'zi' Crístona', Chioza' chtipche' lall'nto' daa nonnto' Crístona' txen.

⁶ Na' shi neto' chzak'zi'nto', chak chento' ka' kwenche gondiplall'chle na' yilale bi kwiayi'le. Na' shi Chioza' chtipe' lall'nto', chone' ka' kwenche lekzka' le' gondiplall'le na' so sakile' ka yel' zak'zi'ki chen chle'into'.

⁷ Nonyen'nto' lez bi gakchoplall'le lao diika' chen chle'ile, la' nezinto' daa lenle chtil'le yel' zak'zi'ka', lekzka' lenle wtip Chioza' lall'le.

⁸ Le' beñ' bish' na' le' beñ' zan', cheeninto' inezile' ka'k'tek dii lalljka' btilnto' gana' mbani Ásiana'. Gokan to dii lallj wal dii bich nan so sakinto', na' bich bennto' lez yel' mbanna'.

⁹ Goktekzinto' ni bllin lla guetnto' naa. Gok chento' ka' kwenche gokbe'into' bi gak wxenilall' kwinnto', san chiyal' wxenilall'nto' Chioza', beena' chisban beñ' wetka'.

¹⁰ Na' Chioza' bisle' neto' na' wislachkze' neto' lao dii nxollka' nsa' yel' wit. Na' nxenilall'nto'ne' toshiizi wislachkze' neto'.

¹¹ shi gaklenle inabilene' gaklene' neto'. Na' shi beñ' zan inabe' chento', lekzka' beñ' zan we'gake' Chioza' yel' choxken kat' ba goklene' neto'.

¹² De to dii chakyiblennto': daa nezyen'into' do yichj do lallnto' nsa' chento' wen ladj beñ' yell-lioni, ka chazlall' Chioza', na' chonnto' to dii byen chonchnto' wen ladjlena'. Na' aga yel' sin' che beñ' yell-lionin chaklenen neto' chonnto' ka', san Chiozan' chaklene' neto'.

¹³⁻¹⁴ Diiki chzejnto' le' nakan dii shajniile ka wlablen. La'kzi naa bin' shajni'yen'ile biche nsa' chento' ka', chbez' illin lla shajniilen kwaslol, kwenche kat'ka' yila' Xancho Jesúsza', yibaile' daa nonle neto' txen, ka chibainto' nonto' le' txen.

¹⁵ Daa nxenlallaa wyajniile dga na' wleble nad', goklallaa tegaxj' yidwia' le', la' gokid' le yiba yizakile yidwia' le' chop shii.

¹⁶ Gokid' tia' wwia' le' ka shaa Macedóniana', na' yidia' wwia' le' sto shii ka zizaa. Na' zak goklenle nad' kwenche yigwaa nez yiyaa Judeana', shel' gokan.

¹⁷ Bi gakile aga do yichj do lallaan wnia' yidwia' le'. ¿Anti chakile chon' ka chon nottezə beñ' yell-lioki chongake' to “wak” to “bi gaka”?

¹⁸ Chioza' nez nle'ile' biga chonnto' to “wak” to “bi gaka” laolena'.

¹⁹ Nad' Pablo, len Timotewi na' Silvónoni be'nto' ladjlena' cho'a xtil' Cristo Jesúsza', beena' nak Xiin Chioza'. Na' Jesucrístona' ba bli'e toshiizi chon Chioza' kon ka ba wne' gone'.

²⁰ Na' ni che Crístona' chak yog'lol dii chcheb Chioza', na' nacho “kan' nakan” kwenche chgoocho Chioza' balaan.

²¹ Na' Chioza'kzan chone' kwenche soatip soashoshcho gonlilall'cho Crístona', ka chone' chento' na' ka chone' chele. Na' wleje' cho' kwenche nakcho lall' nee,

²² na' Espíritu Santo che'na' nake' ka to sey daa ba ngweene' loo yichjlall'do'chona' kwenche chakliyicho ba nakcho xiine', na' kwenche nezicho wllin lla gone' yog' dii wenna' daa ba bchebe' gone'.

²³ Chioza' nezile' bin' yid' Coríntona' yidwia' le' daa chap' yel' chxenlall' chele, na' bi cheenid' wsheshlen' le'.

²⁴ Aga cheeninto' gonnto' byen kon daa inaznton' gonle daa nakle Crístona' txen, la' ba zoachechkzle nonlilall'lene'. San cheenlinto' gaklennto' le' kwenche gapchle yel' chiba chizakina'.

2

¹ Daan, bchoglallaa bi bidwia' le' kwenche bi yidzoaz' le' nyesh' sto shii.

² ¿Nora gon ka yiba yizakid' shi ba bidyenyesh'zid' le'?

³ Na' bzejchokla' le' daa bi goklallid' yid' na' gonyeshile nad', la' cheenlid' gonle ka yiba yizakid'. Na' nxenlallaa lenle yiba yizaklenile nad'.

⁴ Bzej' le' daa wzechga' wneyi nleb na' gokyesh'chgaid' axt wchellchga'. Na' aga bzeja'n kwenche gonyeshid' le' san kwenche inezile le' chakid' len'.

⁵ Na' beena' benyeshile' nad', aga toz nadaan benile' ka', san lenkzlen benyeshile' lat'. Nia' "lat'", kwenche bi inia' zi'tegala ben beena' checho.

⁶ Yel' zak'zi'na' daa ba benle che' ba gokkzə to ka't'.

⁷ Na' naa chiya' yizi'xenle che' na' gaklenlene' kwenche ki gakshejlallee lo yel' chakyeshii che'na'.

⁸ Daan, chat'yoid' le', li wli' ni chakkzilene'.

⁹ Ba bzej' le' kana' che ka nak dga kwenche wli'shkilaole shi leile gonle yog'te diika' nia' le'.

¹⁰ Na' beena' yizi'xenle che', lekzka' nad' wizi'xenkz' che'. Na' shi de dii yiyakxen che', Crístona' nezile' wizi'xenkz' che' beena' ni chele,

¹¹ kwenche bi we'cho cho'a xbayi Satanáza'. La' nezczicho ka nak yel' wxiye' cheyinna'.

¹² Ka billin' yell Troaza' kwenche wi'a dill' wen dill' kob che Crístona', got'chga latj cha' kwenche gon' llin che Xanchona', shel'ka'.

¹³ Per daa bi billag' ben' bish'cho Títona', na'ch gokshejlall'chga'. Daan, bilaa ben'ka' dill' na' biyaa Macedóniana'.

¹⁴ Cho'ken Chioza' chone' kwenche toshiizi chonnto' gan lao diika' chlis chta dii xiwaa daa naknto' Crístona' toz. Na' ngoonto' nez choe'nto' xtilleena' kwenche doxen zbii zkaan yell-lioni illiljan, ka chlilj shii xla' to dii chla' zix sia, na' gombia' ben' le'.

¹⁵ Ka bibayi Chioza' shii xla' llen yala' daa chla' zix sia, ka'kzan chibaile' daa nzoa Crístona' neto' choe'nto' xtilleena' ladj ben'ka' yila na' ladj ben'ka' kwiayi'.

¹⁶ Ben'ka' kwiayi', bi chibagakile' dillii choe'nto' daa chla'gakile'n zyel' wit. Na' ben'ka' yila, chibagakile'n daa chla'gakile'n zix sia daa nsa'n yel' mban chegake'. ¿Notgui gak gone' dga?

¹⁷ Ben' zan lialallee yibeje' cho'a xtil' Chioza' mech. San neto' aga kan' chonnto'. Nez nle'i Chioza' do yichj do lall'nto' choe'nto' xtilleena' lega ben' bselee, daa naknto' Crístona' toz.

3

¹ Ka choe'lennto' le' dill'ki, ¿achakile ba wizzolonto' chshalj chshon che kwinnton'? ¿Awa chakile chiya' gonnto' ka chon bal'ben', gonnto' yish, wa inabinto'n le', gana' cho'en dill' nan chonnto' wen?

² Le'kzan nakle ka yish daa cho'en dill' chonnto' wen, la' daa nonlilall'le Crístona' chakbe'i yog' ben' choe'nto' dill' li. Na' toshiizi yoole loo yichjlall'do'nto'ki.

³ Na' daa ile'i ben' ba bikob Crístona' yichjlall'do'lena' daa be'lennto' le' cho'a xtilleena', nakle ka to yish dii bzej kwín Crístona' nan chonnto' wen. Na' bi nakan to dii nyoj lee yish wa dii nyoj lee yaj taa, san daa ba bsel' Crístona' Espíritu che Chios yaa Chios banna' loo yichjlall'do'lena' zevin bzeje'n lee lall'do'lena'.

⁴ Daa chaklen Crístona' neto', chiyaxjid' nia' chonnto' xshine'na' ka chazlall' Chioza'.

⁵ Aga daa le napnto' yel' sin'nan' chonnto' diiki, san Chiozan' chaklene' neto' chonnto'n.

⁶ Chioza' ba bli' bsdile' neto' kwenche gak we'nto' dill' che dii koba' daa ba bchebe' gone' checho. Na' dga bi nakan ka ley che dii Moiséza' daa chlliayi'n ben', san dga nakan che Espíritu che Chioza', na' len' cho'e yel' mban che ben'.

⁷ Ka nak leya' be' Chioza' dii Moiséza', daa byoj lee yaj taana', nchogbia'n gat' yel' wit checho, gokan to dii zakii nleb na' bsa'n yel' chey cheeni' xen axt ni bi gok wwia ben' Israelka' cho'alao dii Moiséza' daa le chey cheeni'n la'kzi gokan dii yinit. Na' shi leya' daa nchogbi'a gat' yel' wit checho gokan to dii zakii nleb,

⁸ ¿alechlə nak yel' zakii che dii koba' daa bxe Espírituna'?

⁹ Shi leya' daa nchogbi'a guetcho gokan to dii zakii nleb, na' daa chon Chioza' checho chizi'xene' xtol'choka', naktechan dii zakii nlebch.

¹⁰ Ka nak yel' zakii che leya', bi bllinan ka nak yel' zak' xen inleb cheyi dga ba bxie' sto.

¹¹ Na' shi leya' daa ben llin shlollz gokan to dii zakii, dii zak'techi nak dga gon llin toshiizi.

¹² Daa ba de dga nonnto' lez na'chan choe'nto' dill' kon ka nakan.

¹³ Na' bi chonnto' ka ben dii Moiséza' kana' bkwash' cho'alawe'na' kon to lech' kwenche ben' Israelka' bi ile'gakile' ka chinit yel' chey cheeni'na' cho'alawe'na'.

¹⁴ Na' yel' chajni' che'ka' bi benkzan llin, la' axt naanlla kat' chlabgake' leya' bi chajni'kzgakile'n na' nakan ka to dii ngash'. San ben'ka' gonlilall'gake' Crístona', legaken' shajni'gakile'n, la' len' wsalje' yichjllalldoe'ka'.

¹⁵ Axt naa, kat' chlabgake' daa bzej dii Moiséza', de to dii chsej chllonan shajni'gakile'n.

¹⁶ Per kat' to ben' yiyaj yilenile' na' gonlilallee Xancho Crístona', na' yikwas daa chsej chllonan shajniile'n.

¹⁷ La' Xanchona', lekzen' Espírituna', na' beena' zoalen Espíritu che Xanchona'ne', bich bi ntakw nchejan le'.

¹⁸ Daan, yog'lolcho cho' bich bi de wsej wllonan gombia'chone', na' ba nakcho ka to wan gana' chli'lao balaan che Xanchona'. Na' Espíritu che'na' zejch chiyonshawe' cho' kwenche yiyakcho ka Xanchona'.

4

¹ Daa ba biyesh'lallii Chioza' neto', ba bzoe' neto' chonnto' xshine'na', na' bi chidinjinto'.

² Neto', ni to dii nak yel' zto' bi chonnto', ka diika' chon ben' do ngash'za. Na' bi chziye'nto', ni bi chshok chlewnto' cho'a xtil' Chioza', san choe'nto' dill' li che'na' kon ka nakan. Na' yog' ben' wzenague'n, gakbe'i loo yichjlall'do'ena' ka nakan, na' lekzka' Chioza' nezile' ka chonnto'.

³ Per ben'ka' kwiayi', bi chajni'gakile' dill' wen che Crístona' choe'nto', daa ngashaan lawe'ka'.

⁴ La' dii xiwaa daa chnabia' yell-lioni, ba bchol bñitin yichjlall'do'eka' kwenche bi sho'n beeni' che dill' wen dill' kob che Crístona', beena' bli' ka nakyen' Chioza'.

⁵ Aga xtil'nton' choe'nto', san choe'nto' dill' che Jesucrístona', nanto' len' nake' Xancho. Na' daa chakinto' Crístona', chonnto' bittez dii gak gonnto' kwenche gaklennto' le'.

⁶ La' Chioza', beena' wna: "Wzeeni' beeni'na' lo yel cholá", lekzka' ba wlo'e beeni' che'na' loo yichjlall'do'nto'na' kwenche gombia'nto' Jesucrístona', na' kan' gakbe'into' ka nak yel' zakii che Chioza'.

⁷ Na' beeni' che dill' wen che Crístona' nakan to dii zakii inleeb. Na' ba nzoa Chioza'n loo lall'do'nto'ni, neto' naknto' beñ' bibi zakii, kwenche ka we'nto' xtilleena', gakbe'i beñ' yel' wak xenna' nsa'n nakan che Chios, aga nakan chento'.

⁸ La'kzi chiya dii chak chento', bi nakgakan dii bi yichej yilalennto'. La'kzi de dii nzen neto' wneyi, bi chakshejlall'nto'.

⁹ La'kzi chino beñ' neto', aga chchoonlall' Chioza' neto'. La'kzi chchix chlolgake' neto', bin' wlliyi'gake' neto'.

¹⁰ Gattezə chajnto', chsak'zi'gake' neto' na' cheengakile' witgake' neto' ka betgake' Jesúza'. Chak chento' ka' kwenche nakbia' Jesúza' zoe' chaklene' neto'.

¹¹ La' shlak mbannto', toshiizi zelennto' yel' wit daa naknto' Jesúza' txen. Chak chento' ka' kwenche nakbia' zoa Jesucrístona' chaklene' neto' lao diika' chllaglo beli chen chento'ni dga guet.

¹² Daa choe'nto' cho'a xtil' Crístona' zelennto' yel' wit, kwenche le' gat' yel' mban chele.

¹³ Cho'a Xtil' Chioza' nan: "Daa benlilallaa Chioza', na'chan bi'a dill'." Na' kakzan neto', daa chonlilall'nto'ne'n, na'chan choe'nto' cho'a xtilleena'.

¹⁴ Na' nezicho Chioza', beena' bisbane' Xancho Jesúza' ladj beñ' wetka', lekzen' yisbane' cho' ka bisbane' le'. Na' ka neto' ka le', yichi'e cho' gana' zoe'.

¹⁵ Yel' zi' dga chllaglonto' naa, chllaglonto'n kwenche gak wen chele. Na' ka zej chanch beñ' gombia' dill' wen che Crístona', lekzka' beñ' zanch wi'e Chioza' yel' choxken daa nake' beñ' wen, na' sho'e balaan xen.

¹⁶ Daan bi chidinjinto'. La'kzi beli chen chento'ni zej chde cheyin, yichjlall'do'nto'ni chikob Chioza'n lla kon lla.

¹⁷ Diiki chtilnto' naa, nakan dii te toldezə, na' bibi chaktekinto'. La' nezinto' daa chak chento' ki, Chioza' gone' to dii wen inleeb chento' dii bi te cheyin.

¹⁸ Aga zento' wneyi che diiki chle'icho yell-lioni, san diika' bi nla'n zento' wneyi. La' yog'te diiki chle'icho yell-lioni, de toldezə che ka diika', na' diika' bi chle'icho naa, nakan dii bi te cheyin.

5

¹ Kwerp chechoni nakan ka to yoo dii te cheyin. Na' nezicho shi ba wlliyi'n, Chioza' yiyone' sto dii kob dii bi te cheyin yabana'. Na' aga nakan dii beni ni'a na' beñ'.

² Chibanngaicho naa zoacho yell-lioni, na' ba cheenngaicho yobzə lljazoalencho Chioza' yabana' gana' gone' sto kwerp kob checho.

³ Ka chak che beena' chishaa xe'na' daa ba biyi na' chiyakwe' to dii kob, kakzan gak checho daa yishaa Chioza' kwerp chechoni dga kwiayi'.

⁴ Shlak ni zoacho lo kwerpi, chibanicho na' chakyeshicho. Aga inacho chibachgaicho guetchon, san daa cheenicho yobzə ile'icho kwerp kob chechona' daa bi te cheyin na' ibanlenchon zejli kani.

⁵ Na' kwin Chioza' ba none' checho ile'icho dga, na' ba bselee Espíritu che'na' zoe' loo yichjlall'do'chona' kwenche chakliyicho gone' yog' daa ba bchebe'.

⁶ Na' daa nezicho dga, toshiizi nxenilall'cho Chioza'. Na' nezicho kwerpi mbanlencho, bi yillinlenchon gana' zoa Chioza'.

⁷ Chajle'cho dga, la'kzi bin' ile'ichon.

⁸ Na' cheenicho yobzə yiza'cho yell-lioni na' yigaan kwerp chechoni, la' nxenlall'cho kat' yiza'cho ni, na' lljazoalencho Xanchona'.

⁹ Na' daan, choncho to dii byen choncho ka chazlall' Chioza' naa mbancho wa la'kzi ba witocho.

¹⁰ La' chonan byen yog'lolcho lljazecho lao Crístona' gana' wchogloe' checho, kwenche to tocho ikaacho daa chidol'cho kon ka bencho shlak wbancho, shi bencho wen wa bencho mal.

11 Na' daa nezinto' yog'cho techo lao Xanchona', na'chan chonnto' to dii byen choe'lennto' ben' xtilleena' kwenche gonlilall'gake'ne'. Chioza' nezile' do yichj do lall'nto' chonnto' xshine'na', na' non' lez nezki yichjlall'do'leka' ka chonnto'.

12 Aga cheeninto' chibzə kwinto' laolenan', san nia' le' ka' kwenche yibaile ka chonnto' na' gak yilliile xtill' ben'ka' chonz ka le chontegalə na' nagake' legaken' zeelo chongake' dii wenna' per bi chongake'n do yichj do lall'gake'.

13 Shi bal-le chakile chaktontnto'n, Chioza' nezile' xshine'nan' chonnto'. Na' shi chakile aga chaktontnto'n, banez chekzle llinna' chonnto'.

14 Daa nezinto' le chaki Crístona' cho', na'chan chonnto' to dii byen choe'nto' xtilleena'. Na' chajle'nto' daa wite' ni checho, zejin yog'cho witcho.

15 Wite' ni che yog'lolcho kwenche bich goncho kon daa nazan checho, san goncho ka chazlall' beena' wit na' bibane' ni checho.

16 Ni cheyi daan, bich choninto' nottez ben' nakzi, shi zakee wa bibi zakee. La' kana' gokinto' bibi zakii Crístona', na' naa ba nezinto' bi nakan ka'.

17 Beena' ba nake' Crístona' txen, ba bikob Chioza' yel' mban che'na'. Ba wchoonlallee yel' mban gol che'na', na' ba zoe' to lo yel' mban kob.

18 Yog'lolte diiki nakan che Chioza', beena' ba ben ka bizoalenchone' wen daa bselee Crístona' wite' ni checho. Na' bene' lall' nanto' we'lennto' ben' dill' nak gongake' yizoalengake' Chioza' wen.

19 Kwin Chioza' bene' ka cho' ben' yell-lío chizoalenchone' wen daa bselee Crístona' wite' kwenche binítloe' saaxya chechoka'. Na' ba bene' lall' na'nto' we'lennto' ben' cho'a xtilleena' kwenche inezgakile' nak gongake' yizoalengake'ne' wen.

20 Daa bzoa Crístona' neto' choe'lennto' le' xtilleena', li gaktezi kwinkz Chiozan' chat'yoile' le' daa nanto' le': "Li yizoalen Chioza' wen."

21 Crístona' ni to dii mal bi bene'. Per ni checho chon', Chioza' benile'ne' ka ben' saaxya, kwenche daa gonlilall'cho Crístona' yiyakcho ben' li ben' shao' lawe'na'.

6

1 Neto' chonnto' xshin Chioza', chat'yointo' le' gonle ka chiyoollallee daa ba bene' to dii wen chele.

2 La' Cho'a Xtill' Chioza' nan:
Ka byalljilo' wzenag' cho', nad' bzenag'.
Ka byalljilo' yisla' li' na' goklen' li'.

Na' nia' le', naan' ba bllin lla bllin gor gaklen Chioza' le'. Naan' nakan llana' yisle' le'.

3 Na' neto' bi chonnto' bittez dii gon ka ine ben' zban che xshin Chioza' dga chonnto'.

4 San toshiizi chonnto' to dii byen chonnto' xshin Chioza' ka chiyali. Daan, chonnto' banez laa lo yel' zi', laa chyallj chchininto', laa de dii lallj,

5 laa chit chyingake' neto', laa chyixjgake' neto' lillya, laa lliadia' ben' neto', laa chonnto' llin dii nak zii zshab, laa tento' bishgal zi' bishgal ya', laa chbil chdonnto'.

6 Na' lekzka' chli'nto' chonnto' xshin Chioza' ka chiyali daa zoanto' do yichj do lall'nto', daa ba nezinto' daa nak dii li, daa napnto' yel' chxenlall' che ben' na' chonnto' wen chegake', daa zoalen Espíritu Sántona' neto', daa chakinto' ben' do lall'nto',

7 daa choe'nto' cho'a xtill' Chioza' daa nak dii li, na' daa zoalen yel' wak che Chioza' neto'. Na' dii li dii shao'ka' chonnto' nakgakan ka dii chniayinto' kwenche chdil-lennto' dii mala'.

8 Zoa ben' chle'shi'gakile' neto', na' zoate ben' chle'zbangakile' neto'. Zoa ben' chnegake' wen chento', na' zoate ben' chnit chdegake' neto'. Zoa ben' chongakile' neto' ka to ben' wxiye', la'kzi dill' lin choe'nto'.

9 Zoa ben' chongake' ka bi nombia' neto', la'kzi nombia'kzgake' neto'. La'kzi chtilnto' yel' wita', ni mbankznto'. Na' la'kzi chit chyingake' neto', bin' gongake' gan guetnto'.

¹⁰ La'kzi de dii zan dii cheenin gonyeshiin neto', toshiizi zoanto' mbalaz. La'kzi naknto' beṅ' yesh', beṅ' zan chonnto' ka beṅ' wni'a daa choe'lennto' legake' cho'a xtill' Chioza'. La'kzi bibi napnto' ni, nezinto' dii xench nak chento'na' de.

¹¹ Le' beṅ' bish' na' le' beṅ' zan', le' lle'le yell Coríntona', ba be'lento' le' dill' kon ka nakan na' ba bli'nto' chakinto' le' do yichj do lall'nto'.

¹² Neto' chli'nto' chakinto' le' do yichj do lall'nto', per le', bi chli'le shi chakile neto'.

¹³ Chat'yoid' le', le' nakle ka xiin cha', gonle ka chon neto' na' li gaki neto' do yichj do lall'le.

¹⁴ Bi gonle txen beṅ'ka' bi nonlilall' Crístona'. La' aga widili daa nak dii li dii shao' kon dii mala', na' aga wdili beeni'na' kon daa nak yel chol.

¹⁵ La' ba nezczile bi chidili Crístona' dii xiwaa. Na' lekzka' beena' ba chonlilallee Crístona' bi chidilile' beena' bi chonlilalleene'.

¹⁶ Na' bi gak soa daa nak lwaa lsak', diika' choe'la'o beṅ', loo yoodo' che Chioza'. La' cho' nakcho ka yoodo' che Chios yaa Chios banna'. Ka wna Chioza' che beṅ' Israelka': Soa' ladje'ka', na' nad' gak Chios chegake' na' legake' gakgake' yell cha'.

¹⁷ Na' daan goll Chioza' legake':
Li yichej ladj beṅ'ka', bi gonle legake' txen.

Bi gox'le daa ba wnia' bi nxi nyech.

Na' ka' wleb' le',

¹⁸ na' gak' Xale,

na' le' gakte xiin cha'.

Kan' na Xancho Chioza', beena' zeelo nap yel' wak choo yel' wak xen.

7

¹ Kan' nak daa ba bcheb Chioza' checho, le' beṅ' bish'dawaa na' le' beṅ' zandawaa. Daan, chiyal' goncho to dii byen gakcho beṅ' nxi nyech lawe'na' kwenche bibi dii mal ta' ichen kwerp chechoni na' yichjlall'do'choni. Na' daa chall chllebcho Chioza' goncho ka dii le gakcho dowalj ka cheenile'.

² Li gaki neto' do lall'le. La' ni to kono biṅ' goninto', na' ni to konon' wsak'zi'nto', na' ni to konon' siye'nto'.

³ Aga chsheshlen' len' nia' le' ka'. Ba wnia'kz' ka chakchgaid' le' axt ni guetid'.

⁴ Nxenlallaa chonle wen, na' cho'a dill' chele ka wen ba chonle. Ladj dii zi' dii ya'ka' ni chtiplallaa na' le chiba chizakid'.

⁵ Kon ka bla'nto' gani mbani Macedóniani, bibi yel' wixi'lall' chento' got'. Doxenzæ chdil chllagnto' dii zed, chakdil-len beṅ' neto', na' za' dii chwall chsheban neto'.

⁶ Per Chioza', beena' chiyonxenlall' beṅ'ka' zoa nyesh', biyonxenlallee neto' ka bla' Títona'.

⁷ Aga to daa bla'ze'n, san daa choe'yenee xtill'le ba chonle wen. Na' be'lene' neto' dill' ka zelall'le ile'ile neto' na' ka chakyeshile daa zele wneyi cha'. Na' daa benid' dga zizikli chibaid'.

⁸ La'kzi yisha' bselaa benyeshiin le', bibi chaktekid'. La'kzi gokyeshid' ka bwia' benyeshiin le' shloll,

⁹ naa chibaid', aga daa gokyeshile, san daa goklenan le' biyaj bilenile ka cheeni Chioza'. Na' aga bi gok chele ni che daa bzej' le'.

¹⁰ Chioza' chone' ka gakyeshicho kwenche yiyaj yilenicho na' gat' yel' mban checho zejli kani, na' bich chakyeshicho daa gok checho ka'. Per yel' chakyeshii daa nsa' dii mala' choncho chliayi'n cho'.

¹¹ Yel' chakyeshiina' daa be' Chioza' latj got' ladjlena' benan ka gokbalile' daa ben beena', na' wda'le nad'. Benan ka bllaale na' wyoosheble, na'tech wzelall'le yidwiach' le', na' bsak'zi'le beena' wdap dolaa. Na' yog' diiki chli'n bi nonle txen dii mala' bene'.

12 Na' ka bzej' le', aga bzej' ni che beena' ben dii mala', ni aga ni che beena' benile' zi'bia', san bena'n kwenche Chioza' gaklene' le' gakte'ile dii likzan zele wneyi chento'.

13 Diiki chaklenenan neto' chiyakshao'lall'nto'.

Na' zizikchli bibainto' ka ble'into zoa Títona' mbalaz daa btiple lallee.

14 Ba be'len' Títona' dill' chele, goshee le chibaid' ka chonle, na' bi chido'id' daa goshee ka'. Na' ka dill' daa be'lennto' le' nakan dii li, lekzka' gokbe'i Títona' xtill'lena' daa bi'a lawe'na' nakan kon ka goshee.

15 Na' zizikchli chakile' le' kat' chjadinile' ka bleblene' na' bzenagle che' lega ben' chiyal' gall illeble.

16 Chiba chizakid' daa ba nxenlallaa dii likzə chzenagle.

8

1 Na' naa, le' ben' bish' na' le' ben' zan', cheeninto' inanto' le' ka mba ba ben Chioza' goklene' ben'ka' chdop chllag choe'la'ogake' Crístona' gani mbani Macedóniani.

2 La'kzi biya dii ba gok chegake', mbalaz inleeb zoagake'. Na' la'kzi chak yel' zi' yel' yesh' chegake', do yichj do lall'gake' bzangakile' bi de chegake' kwenche gaklengake' ben' yoblə.

3 Nad' nezyen'id' do yichj do lall'gake' be'gake' mecha' bzangakile', na' bengake' axt ga zeelo gokgake'.

4 Na' legake' got'yochgagakile' neto' kwenche we'nto' latj lengake' gaklengake' bish' ljwellchoka' nak lall' na' Chioza'.

5 Bentechl'gake' aga ka to daa nonnto' lez gongake'. Zigaate ben kwingake' lall' na' Xancho Crístona' kwenche gongake' ka cheenile', na'tech bzenaggake' chento' daa nezgakile' nan kan' cheeni Chioza' gongake'.

6 Ni cheyinnan' ba got'yointo' Títona' kwenche yisyolle' wtope' daa chzanile we'le ben'ka' chyallj chchini.

7 Na' ka mbejlaole chonle yog' dii nak wen: daa nonlilall' chgale Crístona', daa chak we'le dill' mbalaz, daa le chajniile, daa cheenchgaile gonle dii wenna', na' daa le chakile' neto', lekzka' li gon byen kwejlaole gakenle ben' we'le daa chzanile.

8 Aga chontek' byen gonle ka nia', san daa cheenzid' inezile ka chibachgayi ben' bish'choka' gaklengake' ben', na' kan' cheenid' gonle, kwenche wli'le shi lekzilen chaki ljwell-le do yichj do lall'le.

9 Ba nezgzile dii wenna' ben Xancho Jesucristona'. La'kzi nake' ben' choo ben' xen, ben kwine' ka ben' bibi zakii kwenche gak wen chele.

10 Daa godwizi wzolole btiple mech kwenche gakenle ben'. Na' aga no got'yoi le' btopen, san benlen do yichj do lall'le. Na' naa inia' ka nak daa gonle:

11 Li yisyoll daa wzolole chonle dii nech do yichj do lall'le. Ka bibaile kana' wzolole, ka'kzə li yibayi yisyoll-len. Li we' ka to daa gak we'le.

12 La' shi izanilen do yichj do lall'le, na' ixin' lao Chioza', la'kzi lat'zan. Chioza' bi chnabe' dii bi napcho.

13 Aga ni che nia' le' gakenle ben' na' le'lə yigaan yesh'le, san gat' dii iyalljile ganga.

14 Naa le' nape daa chyalljgakile'. Na' shi wxə willj ba napgake' bi dii iyalljile, na' yiyaklengake' le'. Na' bibi iyalljile ganga.

15 Na' gak ka na Cho'a Xtill' Chioza': "Beena' bitop dii zan, aga bi bichoonan, na' beena' bitop lat'zan, aga bi byalljile'."

16 Choχken Chioza' bzie' Títona' wneyi ka wneyi daa zia' chele.

17 Na' le bibaile' bchebe' yidwie' le', daa lekzka' chaklallee ile'ile' le'.

18 Na' chsel'lennto'ne' sto ben' bish'cho, ben' le wen zeyi che' lao yog'lol ben'ka' nonlilall' Crístona' to to gana' chdop chllaggake', daa le cho'e dill' wen dill' kob che Crístona'.

19 Na' aga daazə, san lekzka' beŋ'ka' chdop chllag choe'la'ogake' Crístona' ni, wlej-gake'ne' sa'lene' neto' lljasannto' mecha' bdop. Na' chonnto' dga kwenche sho'ch Chioza' balaan na' kwenche wli'n nan cheeninto' gakennto' beŋ'.

20 Bi cheeninto' bi gon inaz beŋ' chento' ni che mech xenni ngoo lo nanto'.

21 Na' chonnto' to dii byen gonnto'n ka chiyali, aga toz lao Xancho Chioza' san lenkz lao beŋ'.

22 Lekzka' chsel'lennto' legake' sto beŋ' bish'cho, beena' zan shii ba ble'into' chone' wen, na' naa cheenchlile' gaklene' daa nxenlallee gonle ka cheeni Chioza'.

23 Na' ka nak Títona', nake' nad' txen chone' xshin Chioza' ladjlana'. Na' beŋ' bish'choka' zi chop wlej beŋ'ka' chdop chllag choe'la'ogake' Crístona' ni, chongake' ka choo Crístona' balaan.

24 Kwenche inezi beŋ'ka' nonlilall' Crístona' gan yoblə, li wliyi beŋ'ki chselaa nan dii li ba chakile beŋ', na' li wli' chonle wen kon ka choe'nto' xtill'le.

9

1 Bich chonan byen wzej' le' inia' chiyal' gakenle beŋ' bish'choka' nak lall' na' Chioza'.

2 La' ba nezid' ka cheenile gakenle beŋ', na' ba bi'a xtill'le lao beŋ' Macedóniaki, chepgakee godwizteyi le' lle'le Acáyana' cheenile gakenle. Na' ka wnezi beŋ' Macedóniaki ka cheenile gonle, zangake' ba chaklall'gake' gaklengake'.

3 La'kzi nakan ka', chselaa beŋ' bish'choki kwenche inezgakile' nan choe'nto' dill' li daa che'nto'gake' nan chonle wen. Nia' le' ka' kwenche gonchle ka dii le wtoplen.

4 La' shi za'len no beŋ' Macedonia nad' ka yidwia' le', na' ile'gakile' bi chonle ka dillaa choe'nto' chele, na' gakan yel' zto' chento' daa nxenlall'nto' chonle wen. Na' le' si'techlale yel' zto'.

5 Ni cheyinnan' chakid' chonan byen wselaa beŋ' bish'choki yidwiagake' le' zigaate, kwenche gaklengake' le' yiyoll wtople daa ba bcheble. Na' kat' yid', ba xoashawan lega dii chzanile, na' aga inacho do ki do lall'len choe'len.

6 Li lljadini cheyi dga: Beena' gaz lat'zə, lat'chokzə yizi' yilape'; na' beena' gaz dii xen, lekzka' dii xen yizi' yilape'.

7 To tole we'le ka to daa chzanile. Bi gonlen do ki do lall'le, la' aga no chon byen we'len. La' Chioza' chakchgaile' beena' chibayi we'n do yichj do lallee.

8 Chioza' wak gone' ka gakchga wen chele kwenche toshiizi gat'ch yog'loł dii chyalj chchinile na' gakteyin gakenle yog'loł beŋ' bibi de che'.

9 Cho'a Xtill' Chioza' nan:

Cho'e beŋ' yesh'do'ka' daa chyalj chchingakile',

na' dii wenna' daa chone' biga llia te cheyin.

10 Chioza', beena' chon bi dii chaz chbekcho na' dii cheej chaocho, lekze'n gone' bittezə dii chyaljile, na' gone' ka shesh shanch bi de chele kwenche gonchle dii wenna'.

11 Na' ka', gapchle dii xench kwenche gak we'chle dii xench gakenle beŋ'. Na' kat' lljasannto' mecha' daa ba btople lao beŋ'ka' chyaljin, na' we'gake' Chioza' yel' choxken.

12 Ka nak mecha' daa we'le beŋ'ka' nak lall' na' Chioza', aga to gakenzan legaken', san lekzka' gonan ka we'chgagake' Chioza' yel' choxken.

13 Na' ka ikaagake'n, we'la'ogake' Chioza' daa chonle ka na dill' wen dill' kob che Crístona' daa ba chajle'le. Na' lekzka' we'la'ogake' Chioza' daa btople mech xen be'len legake' na' nochlə beŋ' yoblə.

14 Na' daa chwiagake' chaklenchga Chioza' le', na' inabgakile'ne' gakenche' le'.

15 Choxken Chioza', daa ba bene' to dii wen inlleb checho. Bichkzə bi dill' chillel we'cho ka to ba bene' checho.

10

¹ Nad' Pablo, chat'yoid' le', na' choe'len' le' dill' goll-lall' ka be' Crístona' dill' daa nape' yel' chxenlall', la'kzi nagake' cha' bi chiyaxjid' wsheshlen' le' kat' zoa' ladjlena', na' galjə zoa' zit' chiyaxjid' chñia' le' zi'bia' lee yishka' chzej'.

² Na' chat'yoid' le', li gongach wen kwenche kat' yidwia' le' bi lenle wsheshlen' ka wsheshlen' ben'ka' naz chon' lega ben' yell-lío.

³ La'kzi naknto' ben' de beli chen, bi chdil'nto' ka chdil' ben' yell-lioki.

⁴ Neto', kat' chdil'-lennto' dii mala' bi chchinnto' yesya ka daa chchin' ben' yell-lioki, san daa chchinnto' nsa'n yel' wak che Chioza' kwenche chlliaiy'nto' yel' wak che dii xiwaa.

⁵ Na' chlliaiy'nto' daa yoo loo yichjlall'do' ben' daa chsej chllonan gombia'gake' Chioza'. Na' chonnto' kwenche wzexj yichjgake' wzenaggake' che Crístona'.

⁶ Na' kat' ba nakbia' chzenagle kwaslol, na' wwianto' nak gonnto' che beena' bi chzenagkz.

⁷ Li wwia ka chonnto'. Na' shi chakile nonle Crístona' txen, chiyal' gakbe'ile lekzka' neto' naknto'ne' txen.

⁸ Aga chido'id' chshalj chshon' daa nia' kwin Crístona' bene' lall' na'nto' we'nto' xtilleena' kwenche gaklennto' le' gake wal, aga kwenche wlliaiy'nto' len'.

⁹ Bi cheenid' gakzile chzej' yishki kwenche wsheb' le'.

¹⁰ Zoa' ben' ne' yishka' chzej' le' le zñia chñen, per kat' zoalen' le' ni bi nak' ka ben' illeble, na' ni dill' bi chak wi'a.

¹¹ Na' ben'ka' naz ka', chiyal' inezgakile' kon ka chzejnto' naa zoanto' zit', ka'kzə gonnto' kat' soanto' ladjlena'.

¹² Bi cheeninto' gaklebinto' ben'ka' chyibz kwingake'. Daa chakgakile' le' wen chon-gake' na' daa chsaklebi ljwelle' nochgake' chonch, chli'gake' bi ntegakile'.

¹³ Neto', aga wshalj wshonnto' che to dii bin' gonnto'. San cheyi daa ben Chioza' lall' na'nto' gonnto'n choe'nto' dill', na' le' bselee neto' lall-lena'.

¹⁴ Neto' bidye'lennto' le' dill' wen dill' kob che Crístona' dii nech, na' bi chixoa chento' inanto': "ki bennto'".

¹⁵ Bi chshalj chshonlenznto' xshin ben' yoblə, san nonnto' lez gonlilall'chle Crístona' kwenche gonchnto' xshin Chioza' daa nak lall' na'nto' gonnto' gana' zoale.

¹⁶ Lekzka' nonnto' lez we'nto' dill' wen dill' kob che Crístona' kon ga bin' illin xtilleena', kwenche bi wshalj wshonlenznto' xshin ben' yoblə.

¹⁷ Beena' chshalj chshon kat' bin chone', che Chiozan' chiyal' wshalj wshone'.

¹⁸ Beena' chshalj chshon che kwine', bibi zakee, san beena' ina Chioza' le' wen chone', beenan' zak'.

11

¹ La'kzi chakile biz dill' diika' cho'a, li wzenagan.

² Dga chaktek cha' chele za'n che Chioza'. Nad' ba non' le' lo na' Crístona', ka chak che to ben' zoa to nool wew' che', bi' napshii kwim', na' chone'b' lo na' beena' gak ben' cheb'. Na' kan' cheenid' gake lao Crístona', ka to nool wew', bi' napshii kwinin.

³ Per chxollid' gak chele ka gok che dii Évana' kana' wxiye' belə' le' daa bzenague' cheb. Na' chakid' shi ka' gonzle wzenagle bi dill' wxiye' dii gonllejin le', na' bich gonlilall'le Crístona' do yichj do lall'le.

⁴ Shi chla' ben' choe'lene' le' dill' nlla'lə aga ka daa ba bsedinto' le' che Jesúsza', wa chsedtegakile' le' nlla'lə che Espíritu che Chioza', beena' zoa loo yichjlall'do'chona', wa che dill' wen dill' kob che Crístona' daa wyajle'le dii nech, na' chajle'tezle chegake'.

⁵ La'kzi chakile chajni'chi ben'ka' nale nakgake' postl' chele aga ka nad', nad' nezid' bi nakan ka'.

⁶ Leljaile bi chakyenaa wi'a dill', per chajni'chid' aga ka legake'. Na' dgan ba bliinto' le' toshiizi lao yog'lolte dii chonnto'.

⁷ ¿Achakile malan ben' bentez' ka ben' bibi zakii na' aga bi laxj' wñabid' le' kana' be'len' le' dill' wen dill' kob che Chioza'? Goktgui gake ben' zakii lawe'na'.

⁸ Bex'shaz' mecha' daa ben' ben'ka' chdop chllag choe'la'ogake' Crístona' yell yoblə kwenche bibi byalljid' shlak bli' bseidid' le'.

⁹ Na' kana' wzoa' ladjlena' na' byallj bchinid', ni tole bi benid' zed. Ben' bish'choka' lle' yell Macedóniana' bidwa'gake' daa byalljid'. Na' ka' bibi zed benid' le', na' biga gonkzid' le' zed.

¹⁰ Dill' li che Crístonan' cho'a, na' nia' ni to ben' lle' gana' mbani Acáyana' bi wsej wllone' wshalj wshon' ka to dga chon'.

¹¹ ¿Anezile biche nia' ka'? ¿Achakile bi chakid' len'? Chioza' nezile' le chakid' le'.

¹² Per gonchkz' ka chon' kwenche bi wi'a latj che ben'ka' cheeni wshalj wshongake' inazgake' chongake' ka chonnto'.

¹³ Ben'ki bi nakgake' dowalj postl, na' chdagake' chziye'gake', nazgake' nakgake' postl che Crístona'.

¹⁴ Na' daa chongake' ka' bi nakan ka dii yibanicho, la' nezicho dii xiwaa chonz kwinin ka anjl che Chios.

¹⁵ Daan, bi nakan ka dii yibanicho ben'ka' chon xshininna' nagake' chsedgakile' ben' nakan gongake' yiyakgake' ben' wen lao Chioza'. Na' daa chongake' ka', len wlliyi'n legake'.

¹⁶ Sto shii nia' le', bi gakile bizə dillaan choe'len' le'. Wa shi ka' chakile, li gakshazi ka', per li we' latj wi'a dill' kwenche wshalj wshonlataa.

¹⁷ Na' daa chshalj chshon' che kwin', chon' ka ben' bi nteyi, la' aga kan' cheeni Xanchona'.

¹⁸ Daa le chshalj chshon ben' zan shi no nakgake', lezkza' nad' wshalj wshon' non nak'.

¹⁹ Le' nale nakle ben' sin' na' chibazile chleble ben'ka' bizə chon chna lat' wej.

²⁰ Chonzle banez shi bi chgongake' le' gonle, shi chzi' chkaagake' bi de chele, shi kon daa nazan chegake' chongakile' le', wa shi chgap' chball'gake' xag'lena'.

²¹ ¿Achakile bi chiyaxjid' gon' ka chon ben'kin? Nezganz bi gaklebid' legake' gon' ka'.

Lete shi legake' chiyaxgakile' chshalj chshongake', lezkza' nad' wiyaxjid' wshalj wshon', ka chon to ben' bi nteyi.

²² Shi nagake' nakgake' ben' hebreo, lezkza' ben' hebreo nad'. Shi nagake' nakgake' ben' Israel, lezkza' ben' Israel nad'. Shi nagake' nakgake' xiin dia che dii Abrahama', lezkza' xiin dia che' nad'.

²³ Shi nagake' chongake' xshin Crístona', nad' nia' chontechla'n ka legake'. (Daa nia' ka' chon' ka ben' bi nteyi.) Nad' choe'l-lall'ch' chon' xshin Crístona' aga ka legake'. Lech ba wyaa lillya ka legake', ba bet wdinch ben' nad' aga ka legake', na' dii zan shii ba bila' lo yel' wita'.

²⁴ Gay' shii ba bet wdini ben' Israelka' nad' yid sota' twaljichoa wej,

²⁵ shon shii bet wdingakile' nad' yaga', na' zi shlin blligake' nad' yaja'. Lezkza' shonə shii ka yo'a loo barkwa' wche'lenan nad' yel, na' zi shlla shyel bgaana' lo niso'na'.

²⁶ Shlak chda' ngwaa nez dii zan dii ba ben'ble'id'. Ba wzoa' dii nxoll wa' no yao nad', no che ben' wban, no che ben' wlall cha'ka', no che ben' bi nak ben' Israel. Ba wzoa' dii nxoll ka wdia' yell xenka', na' ka wdia' lyix', na' ka wdia' lo niso'na'. Na' lezkza' ba wzoa' dii nxoll che ben' wxiye'ka' nazgake' ba chajle'gake' che Crístona'.

²⁷ Ba benchga' llinna' ax̄t ba chjxakchgaid', zan shii ba wlej' bishgal, ba wbił wdonchga' na' ben banez bi weej wdaw', ba bllagloa' no dii zag na' byallj xalaana'.

²⁸ Na' ka chllagloa' yog'lol diiki, ka'kzan chllagloa' daa zia' wneyi lla kon lla che yog' ben'ka' nonlilall' Crístona' to to yell.

²⁹ La' kat' to ben' bich chone' ka dii le, kon chakid' nad'kzan chak cha' ka'; wa shi ga zoa ben' biz che' chone' na' chchixe' ben' yoblə lo xnez Chioza', na' chllaa yichj'.

³⁰ Shi de dii chonzan ka wshalj wshon', we'tochl' dill' cheyi daa chli'n bibi gak gon' tobia'loz'.

³¹ Chios, beena' nak Xa Xancho Jesús'a, beena' chgoocho balaan toshiizi, nezile' cho'a dill' li.

³² Na' ka wzoa' yell Damáscona', beena' nzoa rey Arétaza' ngoo lall' nee yella' bzoe' ben' wdapgake' cho'a yella' kwenche nan gox'gake' nad'.

³³ Na' ben'ka' zoa gana' bllin', bigoogake' nad' to loo llom, biletjgake' nad' to cho'a ventan dii zoa lee zee daa nechj yella', na' bi be'gake' nad'.

12

¹ Chonkzan byen wshalj wshon' la'kzi bibi gon' gan. Na' we'toch' dill' cheyi daa ble'do'id' na' cheyi daa bli'yi Xanchona' nad' daa konon' yen ile'kzi.

² Nombi'a to ben'* nake' Crístona' txen. Ba gok shda' yiz Crístona' bchi'ene' yabana' axt gana' lliate Chioza'. Bi nezid' shi wyaje' do beli chen che'na', wa shi to bishbe che'na'zan wyaj. Toz Chioza' nezile'

³ shi wyaje' do beli chen che'na' wa shi to bishbe che'na'zan wyaj, per nezid'

⁴ bche Chioza'ne' yabana' gana' nak mbalaz inleeb. Na' benile' dill' dii konon' yenkzi, dii bi de lsens no wshaljan.

⁵ Che beena' gok cheyin kan' wshalj wshon', san ka nak nad', aga bi de wshalj wshon' lete wak wshalj wshon' cheyi diika' chli'n bibi gak gon' tobia'loz'.

⁶ Shel' cheenid' wshalj wshon', aga inacho chon' ka ben' bi nteyin, la' dill' lin cho'a. Per bi gon' ka', kwenche kono ile'i nad' ben' le zakii daa ba ble'id' diika'. La' diika' chon' na' dill'ka' cho'a, lekzgakannan' wli'gakan nakan nak'.

⁷ Kwenche bi gak' ben' choo ben' xen lao yel' mba yel' shao' inleebka' ba bli'yi Crístona' nad', bi'e latj bla' to dii chzak'zi' nad', to dii bsel' Satanáza' daa chzoazi'yaan nad', na' chak' ka ben' chad' chbibe' yesh'.

⁸ Dga chak cha', shon lin ba wñabid' Xanchona' yikwase'n.

⁹ Na' wne' nad': "Chaklā cho' zoalenkz' li' na' gaklen' li'. Daazan chyalljilo'. La' yel' wak cha'na' chli'ch lawin kat' de daa chli'n bibi gak gono' tobia'lozo'." Daan, chibachid' wi'a dill' cheyi diika' chli'n bibi gak gon' tobia'loz', kwenche yel' wak che Crístona' soalenchan nad'.

¹⁰ Na' daa chakid' Crístona', chibaid' kat' za' daa chli'n bibi chak gon' tobia'loz', kat' choni ben' nad' zban, kat' chyallj chchinid', kat' chsak'zi' ben' nad', na' kat' de to dii lallj cha'. La' kat' za' daa chli'n bibi chak gon' tobia'loz', kana'lan chakbe'id' zoalench yel' wak che Crístona' nad'.

¹¹ Ba ben' ka ben' bi nteyi daa chshalj chshon' che kwin' ni chele, la' le'lan nan we'le dill' nan chon' wen. La'kzi bibi zaka, aga chonch ben'ka' nale nak postl chele ka nad', ben'ka' nale chajni'chgayi.

¹² Daa wzoatezi wzoa' ben' daa yoo lo na' gon' lao yog' diika' btil' na' daa ben' yel' wakka' ladjlana', chli'n nak' dowalj postl.

¹³ Bi gakile' benid' le' nakzi aga ka ben'ka' nonlilall' Crístona' yell yoblā daa bi benid' le' zed bibi wkaa chele. Bi nakan ka'. Na' li si'xen cha' shi bi ben' wen ben' ka'.

¹⁴ Ba chon' wñeyi yidwia' le' de wyon shii, na' lekzka' bi cheenid' gonid' le' zed. La' aga chzelallaa bi de chele, san len' chzelallaa yidwia'. Ka chak che ben' nape' bi'do', aga legakban' wweej wwaogakb' legake', san xaxna'b'kan' segake' wñeyi wweej wwaogake' legakb'. Kan' chak cha' chele.

¹⁵ Do yichj do lallaa izanid' bi de cha', axt yel' mban cha'ni izanid', kwenche gak wen chele. La'kzi nad' axt ga zeelo gakid' le', widezile zizikchli gonile nad' kazli.

¹⁶ Nezkzile aga bi zed benid' le', per bal-le chakile' biyiljlall'zan' kwenche wxiyaa le'.

* 12:2 Nombi'a to ben': daa nan ki, Páblona' cho'e dill' che kwine', la' kwinkzen' bche' Crístona' yabana'.

17 Wa li inashki shi no ben'ka' ba bselaa ba wxi' wkaagake' bi de chele.

18 Gosh' Títóna' yidwie' le', na' bsel'lenee sto ben' nakcho txen. Li inashkilja shi bi wxi' wkaa Títóna' chele. Nezile bi nakan ka'. La' toz ka nsa' chento' na' toz ka cheeninto' gaklennto' le'.

19 Shi chakile' choe'nto' dill'ki kwenche bibi sa'lall'le chento', aga kan' nakan. Choe'nto' dill' lao Chioza' daa naknto' Crístona' txen. Le' ben' bish'dawaa na' le' ben' zandawaa, yog'lol diiki chonnto' nakan dii gaken le' kwenche gachale lo xnez Chioza'.

20 Chxollid' kat' yidwia' le' bi chonle ka cheenid' gonle. Na' le', aga wyazlall'le ka gon' chele ka yid' gana' zoale shi naa. Chxollid' shi ka yid' ba chdil chsheshlenz ljwell-le, ba chakxe'zi ljwell-le, ba chllaaz ljwell-le, ba chonz che chezle, bizə ba chon chnaz che ljwell-le, ba chchitjzle dill' che ljwell-le, ba chep cha'lall'zle, na' bichkzə nkaani'a xnezi daa chonle.

21 Lekzka' chxollid' shi kat' yidwia' le' sto shii, si'a yel' zto' lao Chios cha'na' ni chele, na' kwell' ni chele. La' zantele chonle dii mala', na' bin' yiyaj yilenile diika' ba benlenle beli chen chelena' kon ka nazan chele.

13

1 Dga gak shon shii yidwia' le'. Naach yidyen' ka na cho'a xtill' Chioza': Shi zoa ben' chawe' xya che to ben', na' bibi gak gone' shi bi zoa chop shon ben' inagake' kan' nakan.

2 Kana' bidwia' le' de wchop shiyi, gosh' ben'ka' chongake' dii mala' bich wwialoz' chegake'. Na' naa zoa' zit', ba nia' le' ka' sto shii, bich si'xen' kat' yid' dii yoblə.

3 Gon' ka' ni cheyi daa cheenile ile'ile shi lekzidaan cho'a dill' kon ka cheeni Crístona'. La' Crístona' bi nake' ka ben' bibi gak gon ladjlena', san nape' yel' wak kwenche yigwee shli lall'le.

4 Dii likzə Crístona' blexj yichje' wdee lee yag cruza' ka ben' bi nap yel' wak, per naa zoalene' yel' wak che Chioza'. Na' lekzka' neto' lennto' Crístona' naknto' ka ben' bi nap yel' wak, per daa naknto'ne' txen lekzka' zoalennto' yel' wak che Chioza' kwenche gonnto' xshine'na' ladjlena'.

5 Li yiya yiyilj kwinle shi dii li ba nonlilall'le Jesucristona'. Na' li gakbe'yenii shi zoalenkze' le', wa shi bi nonlilall'kzlene'.

6 Na' nonto' lez gakbe'ile zoalenkze' neto'.

7 Chnabinto' Chioza' gaklene' le' bibi dii mal gonle. Aga chnabinto'ne' dga kwenchezə wli' wzez chento' le wen bennto' xshine'na' ladjlena', san cheeninto' gonle dii wenna' daa chiyal' gonle la'kzi ina ben' bi chak gonnto' xshin Chioza'.

8 Bi gak bi inanto' cheyi daa nak dii li, san zeelo chaklennto' kwenche wli'chlwin.

9 Chibainto' shi le' nakchale na' bi chonan byen wchinnto' yel' wnabia'na' nak lall' na'nto', la'kzi zoa ben' chle'ile' neto' ka ben' bi nap yel' wnabia'. Na' inabchinto' Chioza' gaklene' le' gake doxen ka cheenile'.

10 Chzej' le' naa kwenche kat' yid' bi inetek' le' znia. La' Xanchona' none' nad' yel' wnabia' kwenche gaken' le' gachale lo xnez Chioza', aga bene'n kwenche wliayaa le'.

11 Dga zeelo nia' le', le' ben' bish' na' le' ben' zan', lialallaa soale mbalaz na' we'l-lall'le gake doxen ka cheeni Chioza'. Li wtip lall'le, li gak toz na' soalen ljwell-le mbalaz. Na' Chioza', beena' chakile' cho' na' chzoe' cho' mbalaz, soalene' le'.

12 Na' li wwap ljwell-le chiox lega ben' chaki ljwellin daa nakle lall' na' Chioza'.

13 Na' yog'lol ben'ki ba bixi biyech lao Chioza' chwapgake' le' chiox.

14 Xancho Jesucristona' gaklenshgue' le', na' yel' chaki che Chioza' soalenan le', na' Espíritu Santo che'na' gone' ka gakbe'ile zoalene' le'. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' gana' mbani Galáciana'

¹ Nad' Pablo, nak' postl che Jesucrístona', na' aga no ben' yell-lío wleje' nad' na' bselee nad' wi'a xtilleena', san kwín Jesucrístona' na' Xacho Chioza', beena' bisbane'ne' ladj ben' wetka', bsel'gake' nad'.

² Nad' na' yog' bish' ljwellchoki chwapnto' le' chiox, ka le nonlilall'le Crístona' to to yellka' lle' gana' mbani Galáciana'.

³ Chnabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁴ Jesucrístona' bzani kwine' wite' ni checho daa nakcho ben' saaxya, kwenche bisle' cho' lao dii mala' de yell-lioni, kon ka goklall' Xacho Chioza' gone',

⁵ beena' chidol' sho' balaan zejli kaní. Kan' nakan.

⁶ Le chibanid' chele daa ba bilaala'odozle Chioza', beena' gox wñab le' na' bliile' le' yej' chiyesh'lalli che'na' daa bselee Crístona' wite' ni checho, na' ba zjanozle to dii yoblə daa bi nak dill' wen dill' kob che'.

⁷ Aga inacho de sto dill' wen dill' kob yoblan, san zoaz bal ben' cheengakile' gonllej gongangakile' len', na' chsha'zgake' dill' wen dill' kob che Crístona'.

⁸ Shi ga za' ben' yishee dill' wen dill' kob che Crístona' daa ba wdixje'into' le', Chioza' wsak'zi'shgue' zejli kaní nottezə beena' gon ka', laa neto' wa no anjl ben' za' yabana'.

⁹ Ba wñiakzə' le' ka', na' naa chiznia'n sto shii: shi no chsha' dill' wen dill' kob che Crístona' daa ba wdixje'into' le', Chioza' wsak'zi'shgue'ne' zejli kaní.

¹⁰ Aga cheenid' ile'shii ben' nad' daa nia' ka', san cheenid' gon' daa chazlall' Chioza'. Shi cheenid' gon' ka' chazlall' ben', aga wen llin che Crístona'chan nak'.

¹¹ Cheenid' inezile dga, le' ben' bish' na' le' ben' zan', dill' wen dill' kob che Crístona' daa wdixje'id' le' bi nakan dii wdiljlall' ben' yell-lioni.

¹² Ni to ben' yell-lío bi bli' bsedile'n nad', san kwín Jesucrístona' bli' bsedile'n nad'.

¹³ Ba benzkile' ka bsa' cha' kana' ni noa' ley chento'na', neto' ben' Israel. Na' bsak'zi'a ben'ka' nak lall' na' Chioza' daa nonlilall'gake' Crístona', goklallaa yislngakee.

¹⁴ Kana' ni noa' ley chento'na', wlejlaw' ladj ben'ka' nak ljwell' daa ben' to dii byen wnoa' yog' diika' bkwaanlen dii xozxto'nto'ka' neto'.

¹⁵ Per Chioza', kana' zi' galjtia', ba ngwee xnez xlatjin yiyesh'lallile' nad', na' wleje' nad' kwenche gon' xshine'na'. Na' ka bllin llana' nllie' bia',

¹⁶ bene' ka bembia' Xiine'na' kwenche lli'a xtilleena' lao ben'ka' bi nak ben' Israel. Na' ka gox wñab Chioza' nad', ni tlish' ben' yell-lío bi wñabid' wzajniile' nad' daa chiya' gon'.

¹⁷ Ni bi biyaa Jerusalenna' lljawia' ben'ka' wlej Crístona' nakgake' postl che' kana' zi' kweje' nad'. San lii wyaatia' gana' mbani Arábiana', na'tech biyaa Damáscona' sto shii.

¹⁸ Na' ka wde shon yiz, biyaa Jerusalenna' kwenche bembia' Pédrona', na' bigaanlenee shda' wbill.

¹⁹ Lekzka' ble'id' Jacóbona', beena' nak ben' bish' Xanchona', na' kochno postl yoblə ble'id'.

²⁰ Chioza' nezile' dga chzej' le' bi nakan de wxiye'.

²¹ Na'tech wyaa gana' mbani Síriana' na'ch Cilíciana'.

²² Per ben'ka' nonlilall' Crístona' Judéana' bin' gombia'gake' nad'.

²³ Zeelo ba bengakile' nagake': "Beena' bsak'zi'e cho' kana', ba chde' choe' dill' wen dill' kob che Crístona' daa goklallee yisol yiníte' kana'."

²⁴ Na' be'la'ogake' Chioza' daa ba chyixji'a xtil' Crístona'.

2

¹ Wde shda' yiz biyaa Jerusalénna' sto shii, na' wza'len Bernabéna' nad' na' lekzka' bchi'a Títóna',

² la' Chioza' bene' ka wnezid' nan chiyał' sha'. Na' jashaljlen' ben'ka' chñabia' lao ben'ka' nonlilall' Crístóna', na' to nad' to legake' bzajniid'gake' ka nak dill' wen dill' kob che Crístóna' daa choe'len' ben'ka' bi nak ben' Israel. La' goklallaa inezgakile' bin chli' chsedid' kwenche bi inagake' daa ba ben' na' daa ni chon' nakan dii bibi zakii.

³ Na' ni Títóna', beena' zyaalen', naktie' ben' griego, bi bengake' byen sho'e sen daa le circuncisión,

⁴ la'kzi wzoa ben' aga do lall'gake' lengake' neto' nxenilall'nto' Cristo Jesúsza' san bidwia bidyizgake' shi ni chonnto' ka na ley daa bzej dii Moisésza'. La' goklall'gake' toshiizi idakw ichejnto' gonnto' doxen ka na leya'.

⁵ Na' neto', biga bennto' ka goklall'gake', daa cheeninto' inezile bich chonan byen gonle daa na leya', san chiyał' gonle daa na dill' wen dill' kob che Crístóna' daa nak dii li.

⁶ Ka nak ben'ka' chñabia' lao ben'ka' nonlilall' Crístóna' yell Jerusalénna', la'kzi nakgake' ben' mbejlawin bitek zia' wneyi shi no nakgake', la' yog'cho toz ka zak'cho lao Chioza'. Bi wnagake' chonan byen yishaa diika' chli' chsedid' che Crístóna'.

⁷ San gokbe'gakile' Chioza' ba bene' lall' na' wi'a dill' wen dill' kob che Crístóna' lao ben'ka' bi nak ben' Israel, ka bene' che Pédróna' bene' lall' nee chixje'ile'n ben' Israelka'.

⁸ La' Chioza', beena' wleje' Pédróna' kwenche nake' postl che' na' chixje'ile' cho'a xtilleena' ben' Israelka', lekzen' wleje' nad' nak' postl che' kwenche chixje'id' cho'a xtilleena' ben'ka' bi nak ben' Israel.

⁹ Jacóbona', Pédróna', na'ch Juanna', ben'kin mbejlaogake' lao ben'ka' nonlilall' Crístóna', ka gokbe'gakile' chaklen Chioza' nad' kwenche chon' xshine'na', na' bli'gake'n chongake' nad' na' Bernabéna' txen daa beḡ'gake' na'nto'ka'. La' gokgakile' wenan gonnto' xshin Chioza' lao ben'ka' bi nak ben' Israel shlak chli' chsedgakile' ben' Israelka'.

¹⁰ Toz dii wnagake' neto' nan chiyał' yiyesh'lallinto' ben' yesh'ka', na' leyeñ'kzannan' ba yookzə yichj' gon' do yichj' do lallaa.

¹¹ Na' ka bid Pédróna' Antioquíana', bsheshlenee, la' daa bene' bi nakan wen.

¹² Dii nech weej wdaolene' ben'ka' bi nak ben' Israel, per ka bid ben'ka' bsel' Jacóbona', bsane' bich weej wdaolene' legake' daa bllbe' ben'ka' na chiyał' sho'cho sen daa le circuncisión na' goncho doxen ka na leya'.

¹³ Na' ben' Israelka' lle' na', ben'ka' ba nonlilall' Crístóna' goklebgakile' Pédróna' bich weej wdaolengake' ben'ka' bi nak ben' Israel. Na' axt lenzə Bernabéna' gokleBILE' legake'.

¹⁴ Na' ka gokbe'id' bi chongake' ka na dill' wen dill' kob che Crístóna', na' gosh' Pédróna' lao yog' ben'ka' lle' na': "Len naktio' ben' Israel, na' ba wlej yichjo' ley chechona' na' ba wzolozo' chono' txen ben'ka' bi nak ben' Israel. ¿Bi che cheenzilo' gono' byen gon ben'ki daa yoolocho choncho, cho' nakcho ben' Israel?"

¹⁵ Cho' nakcho ben' Israel ka goljtecho chakicho bi nakcho ben' saaxya ka ben' yellka' sto,

¹⁶ per nezicho ni tlish' ben' bi nake' ben' li ben' shao' lao Chioza' daa chone' yog' daa na ley che'na'. San beena' gonlilallee Jesucristonan' yiyake' ben' li ben' shao' lawe'na'. Na' lekzka' cho' ba benlilall'cho Jesucristóna' kwenche yiyakcho ben' li ben' shao' lao Chioza', na' aga daa goncho daa na leyan'. La' aga no yiyak ben' li ben' shao' lao Chioza' daa chone' daa na leya'.

¹⁷ Daa cheenicho gakcho ben' li ben' shao' lao Chioza' daa wit Crístóna' ni checho, chakbe'icho lenkzcho cho' ben' Israelan nakcho ben' saaxya. Na' daa chakbe'icho nakcho ben' saaxya, ¿azejin Crístóna' none' cho' ben' saaxya? ¿Bi nakan ka'!

¹⁸ Shi ba wlej yichj' leya', na' sto shii yiyonza'n lez yiyonan nad' ben' wen, na' gap' dol' lao Chioza'.

19 Nad' nak' ka ben' ba wit lao leya' daa bich chon' ka nan, kwenche gak soa' gon' ka cheeni Chioza'.

20 Nad' nak' ka ben' witlen Crístona' txen kana' wite' lee yag cruza'. Daan, bich chon' daa nazan cha' san Crístona' zoe' lo yel' mban cha'ni. Na' daa chonlilallaane', shlak mban' chon' daa cheeni Xiin Chioza', beena' gokile' nad' na' bzani kwine' wite' ni cha'.

21 Bi chzoa' ka'lə yel' chiyesh'lalli che Chioza' daa bselee Crístona'. La' shel' leya' bizoyin biyonan cho' ben' li ben' shao', bi benan byen wit Crístona' lee yag cruza', shel'ka'.

3

1 Le' ben' Galacia, ben' bi chajni, ¿no wxiye'z le'? Kwasloj bli' bsedinto' le' nanto' Crístona' wxak'zi'e lee yag cruza' ni checho.

2 Toz dii cheenid' inabid' le': ¿Ani che daa chonle daa na leyan' bidsoa' Espíritu che Chioza' loo yichjlall'do'lena'? ¿Anti daa wyajle'le che xtill' Crístona' daa bli' bsedid' len', lla?

3 ¿Ni lat' bi chajniile! Espíritu che Chioza' wyo'e loo yichjlall'do'lena' ka wzolo chonlilall'le Crístona'. Na' naa chakile yiyakle ben' li ben' shao' daa chonle ka na leya'.

4 ¿Ana' bibi zjanayin yog' yel' zak'zi'ka' ba ben ble'ile daa benlilall'le Crístona'? Non' lez bi gakan ka'z.

5 Chioza' bzoe' Espíritu che'na' loo yichjlall'do'lena' na' bliile' le' yel' wak che'na', aga ni che daa chonle ka na leyan', san daa wyajle'le xtill' Crístonan'.

6 Ka ben dii Abrahama', wyajli'e che Chioza', na' daa wyajli'e, Chioza' wne' goke' ben' li ben' shao' lawe'na'.

7 Chiyal' inezile dga: ben'ka' chajle' che Chioza', legaken' nakgake' dowalj xiin dia che dii Abrahama'.

8 Cho'a Xtill' Chioza' nan bllie' bia' che ben'ka' bi nak ben' Israel lengake' yiyakgake' ben' li ben' shao' lawe'na' shi gonlilall'gake'ne'. Na' bi'e dill' wen dill' koba' kana' golle' dii Abrahama': "Ni cho' li' gak wen che yog' ben' lle' zbii zkaan yell-lioni."

9 Na' Chioza' chonleeye' ben'ka' chonlilall' le', ka bene' che dii Abrahama' daa benlilallee le'.

10 Ben'ka' non lez gakgake' ben' wen daa chongake' daa na leya', ba mbiayi'gake'. La' Cho'a Xtill' Chioza' nan: "Ba nakten kwiayi' beena' bi saki gone' yog'lojte daa nllia leya' bia'."

11 Na' nakbia'cha aga no nak ben' li ben' shao' lao Chioza' daa chone' daa na leya'. Cho'a Xtill' Chioza' nan: "Beena' nak ben' li ben' shao' daa nonlilallee nad', beenan' ibane'."

12 Na' aga na leya' chiyal' gonlilall'cho Chioza', san nan: "Nottezə ben' chon doxen ka na leya' si'e banez yel' mban che'na'."

13 Crístona' wxak'zi'e lee yag cruza' ka to ben' mal ni checho kwenche bi kwiayi'cho daa bi choncho daa na leya'. La' Cho'a Xtill' Chioza' nan: "Ba mbiayi' beena' wwal'gake' to lo yag."

14 Gok ka' kwenche ka le' bi nakle ben' Israel lenle gonlilall'lene', na' Chioza' gone' wen chele ka bchebe' gone' che dii Abrahama'. Na' shi gonlilall'cho Cristo Jesús'a, Espíritu che Chioza' soalene' cho', kon ka bchebe' gone' checho.

15 Le' ben' bish' na' le' ben' zan', cheenid' wshaljlen' le' ka choncho cho' ben' yell-lion: Kat' to ben' gone' to yish dii zakii na' ba nakchan, aga no gak ina bibi zakaan ni bich gak wzanche' cho'a dill'ka' le'inna'.

16 Na' kan' nak daa bcheb Chioza' gone' che dii Abrahama' len xiin dia che'na'. Cho'a Xtill' Chioza' bi nan: "xiin dia che'ka'", san nan: "xiin dia che'na'". Bi choe'n dill' che ben'ka' shesh shan lo dia che'na', san che toz Crístona', beena' golj lo dia che'nan' cho'en dill'.

17 Dga nia' naa zejín Chioza' bi bzoe' ka'lə daa bchebe' gone' che dii Abrahama' ka bi'e dii Moiséza' ley che'na' wde tap guiyoa shichoa yiz. La'kzi Chioza' bi'e leya', bi wlej yichje' daa bchebe' gone' che dii Abrahama'.

18 Na' shi chonan byen goncho daa na leya' goktgui ikaacho daa b̄cheb Chioza' gone', bich nakan daa b̄chebe' gone' cho' ka'zə, shi ̄naa. Per Chioza' b̄chebe' wi'en dii Abrahamama' ka'zə.

19 Shi ka' nakan, ¿berāche be' Chioza' leya'? Bi'e leya' kwen̄che gakbe'i ben' bi chongake' ka cheenile'. Na' bllie' bia' gonan llin shlak bin' yid Crístona', beena' b̄cheb Chioza' galjə lo dia che dii Abrahamama'. Chioza' b̄chine' anjlka' be'gake' ley che'na' dii Moiséza', na' b̄chine' dii Moiséza' bzajniile' ben'ka' ka nan.

20 Na' Chioza' bi byalljile' ben' yoblə wzajniile' dii Abrahamama' daa b̄chebe' gone' che', san kwinkze' bzajniile'ne'.

21 ¿Achakile Chioza' bititjile' xtilleena' daa b̄chebe' gone' che dii Abrahamama' ka bi'e ley che'na'? Bi nakan ka'. La' shel' leya' gak gonan yel' mban checho, ba biyakcho ben' li ben' shao' daa choncho ka nan, shel'ka'.

22 Cho'a Xtill' Chioza' nan yog'lol ben' ndakw nchejgake' lao saaxyana', na' ben'ka' gonlilall' Jesucrístona' gaki chegake' daa ba b̄cheb Chioza'.

23 Kana' zi' yid beena' gonlilall'cho, na' ntakw n̄chej leya' neto' ben' Israel, axt ki Chioza' bliile' neto' Crístonan' yisle' ben'ka' gonlilall'gake'ne'.

24 Na' leya' goklenan neto', gokan ka to ben' nak lall' nee chap chwie' xiin ben', axt ki bid Crístona' benlilall'nto'ne' na' biyaknto' ben' li ben' shao' lao Chioza'.

25 Na' ̄naa daa ba bla' beena' nonlilall'cho, bich ch̄nabia' leya' neto'.

26 Daa ba nonlilall'le Cristo Jesúsza', ba nakle xiin Chioza'.

27 Yog'lol-le, le' ba wchoale nisa' daa nonlilall'le Crístona', ba billa'le na' ba nsa' chele ka nsa' che' daa naklene' toz.

28 Na' cho' nakcho Crístona' txen, laa ben' Israel, laa ben' bi nak ben' Israel, laa ben' ndoo lla yel chone' xshin ben', laa ben' chon xshinkze', laa noolə, laa ben' byo, ba nakcho toz.

29 Na' shi nakcho lall' na' Crístona', dii l̄icha nakcho xiin dia che dii Abrahamama', na' lencho chidol'cho daa b̄cheb Chioza' gone' che'.

4

1 Kin cheenid' inia' le': bi'na' gak lall' na'b' daa de che x̄abaa, shlak ni nesh'b' toz ka zaklebib' wen llinka' nap x̄abaa, la'kzi leban' gaki cheb' yog'lolte dii de che'.

2 Na' nzoa x̄abaa ben' chap chwiagake' leb' na' chgoogake' x̄nezi yog'te dii gom' axt ki illinch llana' bllia x̄abaa bia' bich soab' x̄ni'a ben'ka'.

3 Ka'kzan gok checho kana' bin' shajniicho, na' wnocho diika' na ben' yell-lioki chonan byen goncho.

4 Na' ka bllin lla, Chioza' bselee Xiine'na', wxan to nool le', na' wzoe' x̄ni'a ley che dii Moiséza'

5 kwen̄che yisle' nottezə ben' zoa x̄ni'a leya' na' yiyake' xiin Chioza'.

6 Na' daa ba nakcho xiine', bselee Espíritu che Xiine' Jesucrístona' loo yichjlall'do'choni, na' Espírituna' chone' kwen̄che che'cho Chioza': “X̄adawaa.”

7 Na' ̄naa, bich nakle ka ben' ndoo lla yel chone' xshin ben', san ba nakle xiin Chioza'. Na' daa ba nakle xiine', ba nonle lez ikaale daa chidol' ben'ka' nak xiine'.

8 Kana' bin' gombia'le Chioza', na' wzoale x̄ni'a diika' benlilall'le, diika' bi nak dowalj chios.

9 Per ̄naa ba nombia'le Chioza', wa wench in̄acho ba nombia' Chioza' le', ¿berāche sto shii wzoazle xtillii diika' na ben' yell-lioki chonan byen gonle, diika' bibi zakii? ¿Acheenile yizoale x̄ni'a diika' sto shiin?

10 Na' lenzle chaple balaan llaka', beo'ka', na' kat' chibii lla yelka', na'ch yizka', diika' chakile nakgakan dii llialo.

11 Le chxollid' shi gaktadz xshin Chioza' daa ba ben' ladjlena'.

12 Le' ben' bish'dawaa na' le' ben' zandawaa, chat'yoid' le' gonle ka chon', la' nad' ba ben' kwin' ka le' bi nole leya' na' bich zoa' xni'ayinna'. Aga chllaan nia' le' ka', la' bigan' bi gonile nad'.

13 Le'kzə nezile ni che to yillwe' dii beḡ' nad' bgaan' lall-lena', na' kan' gok be'len' le' dill' wen dill' kob che Crístona' dii nech.

14 Na' bi benile nad' nakzi ni bi bzoale nad' ka'lə ni che yillwe'na' gok', la'kzi gokan to dii zed chele. San bleble nad' ka to anjl che Chioza' wa ka kwin Cristo Jesús'a'.

15 ¿Garaḡ yel' chiba chizaki chelena' nape kana' wzoalen' le'? Neziḡ shel' wx'e'ile kweḡ jalaolena' gonlen nad' kana'.

16 Na' naa, ¿achllaaale nad' daa ba wnia' le' dill' liki?

17 Ben'ka' bidli' bidsedi le', aga do lall'gaken' bli' bsdgakile' le'. San daa cheenzgakile' yilaale neton' na' gonle legake' txen.

18 Nakkzan wen toshiizi soa ben' wli' wsedile' le' kon shi gongake'n do yichj do lallgake', kwenche aga to kat' yidwiaz' le' wli' wsedid' le'.

19 Le' xiindawaa, sto shii chak cha' ka chak che noola' chllagloe' sane' bi'do' che'na' daa chi' yichjlikz' gake ka chazlall' Crístona'.

20 Shel' wx'e'id' naate soalen' le' we'len' le' dill' goll-lall', la' bi chajniid' biḡhe chonzle ka'.

21 Ka le' cheenile gonle daa na leya', li inashki nad': ¿abin' yenile ka na leya'?

22 Cho'en dill' wzoa chop xiin dii Abrahama': tob' gok xiin noola' wxi'gake' bene' llin che'ka', na' stob' gok xiin beena' gok nool che' dowalj, beena' biga gok wen llin che ben'.

23 Xiin nool wen llin che'ka' wzoab' daa wzoalen ljwellgake'. San noola', beena' biga gok wen llin che ben', wzoa xiine' daa bḡheb Chioza' wi'e to bi' chegake'.

24 Daa gok che noolka' chop, chzajniin cho' che chop daa be' Chioza' ben' Israelka'. Dii Agara' zaklebile' leya' daa be' Chioza' lo yaa Sinaína'. Na' len' goke' xna' beena' wdoo lla yel bene' xshin ben'.

25 Na' zaklebile' yaa Sinaína' daa zoa Arábiana', na' nake' ka yell Jerusalénna' daa zoa naa. La' yog' ben'ka' chesh chalj yella' nakgake' ka ben' ndoo lla yel chone' xshin ben' daa zoagake' chongake' daa na leya'.

26 San cho' lljazoacho Jerusalénna' daa zoa yabana' gana' zoa Chioza', bi nakcho ka ben' ndoo lla yel chone' xshin ben', la' bi zoacho xni'a leya'.

27 La' Cho'a Xtill' Chioza' nan:

Li' nool will, ben' kono xiinin zoa, biba bizaki.

Li' bin' tio' lo yel' zak'zi' che yel' san bi'do', besyaa yel' chiba chizaki cho'na'.

La' noola', beena' wchoonlall' ben' che'na'ne',

soach xiine' aga ka beena' zoalen ben' che'na'.

28 Na' le' ben' bish'dawaa na' le' ben' zandawaa, nakle ka dii Isaaca', beena' bḡheb Chioza' wi'e dii Abrahama'.

29 Na' ka gok kana', bi'na' golj daa wzoalen ljwellgake', biya dii benib' bi'na' golj kon yel' wak che Espíritu che Chioza', kakzan chak naa.

30 Na' Cho'a Xtill' Chioza' nan: "Bilag noola' chon xshino'na' len xiine'na'. La' bi lem' ikaab' daa chidol' xiin beena' biga gok wen llin che ben'."

31 Na' naa, le' ben' bish'dawaa na' le' ben' zandawaa, aga nakchcho ka xiin beena' wdoo lla yel bene' xshin ben', san nakcho ka xiin beena' biga gok wen llin che ben'.

5

1 Crístona' ba bisell bilee cho'. Na' chiya' soacheḡhe kwenche bich soale xni'a daa wtakw wḡhejan le' dii yoblə.

2 Nad' Pablo chnabid' le' wzenagle dga nia' le'. Shi le' we'le latj koogake' le' sen daa le circuncisión, bibi zjanayin nale nonlilall'le Crístona', shi naa.

³ Sto shii nia' le', nottezə ben' wi'e latj koogake'ne' sen daa le circuncisión chonan byen gone' yog'lol daa na leya'.

⁴ Le' chonle ka na leya' daa chakile yiyonan le' ben' li ben' shao', Crístonan' ba bīlaala'ole daa chakile ka', na' ba bzoale ka'lə yel' goklenna' ben Chioza' chele.

⁵ San neto', daa zoalen Espíritu che Chioza' neto', nonnto' lez yiyaknto' ben' li ben' shao' lawe'na' daa nonlilall'nto' Crístona'.

⁶ Na' shi nonlilall'cho Cristo Jesúza', aga bi zakii lawe'na' sho'cho sen daa le circuncisión wa bi sho'chon. Daa zakii lawe'na' gonlilall'chone' na' gakicho ben'.

⁷ Zejkzle wen lo nez lina' daa ba yoole, shel'ka'. ¿No benlejj benganzi le' kwenche bich chzenagle dill' lina'?

⁸ Aga nak dga che Chios, beena' gox wñab le'.

⁹ Dezə dill' nan “lat'zə levadúrana' chisgolan doxen kwa che yetxtila”.

¹⁰ Nxenilallaa Xanchona' gaklene' le' kwenche bi shajle'le che daa bi nak dill' li. Na' Chioza' wsak'zi'e nottezə beena' gonllej gonganile' le'.

¹¹ Ka nak nad', le' ben' bish'dawaa na' le' ben' zandawaa, shel' ni nia' chiyal' sho' ben' sen daa le circuncisión, aga wsak'zi' ben' Israelka' nad', shel'ka'. La' shel' ni chon' byen gongake'n, bi gakzbangakile' xtill' Crístona' daa nia' wite' lee yag cruza' ni checho kwenche gakcho ben' wen lao Chioza', shel'ka'.

¹² Ka nak ben'ka' chdazə chongake' byen sho' ben' sen daa le circuncisión, jwentelə shel' wchogtega kwingake' dololte gana' chgwee senna'!

¹³ Le' ben' bish'dawaa na' le' ben' zandawaa, Chioza' gox wñabe' le' kwenche yiyell yila'le lao dii mala'. Na' aga ni che biyell bila'le na' gonzle kon daa nazə beli chen chelena'. San li gaklen ljwell-le na' li gaki ljwell-le ganga.

¹⁴ La' doxen daa na leyan' choncho shi choncho daa bllia Chioza' bia' daa na: “Chiyal' gakilo' bish' ljwello'na' ka chaki kwino'.”

¹⁵ Li wsak' bi til wsheshle kwenche ki wzoazi'yaa ljwell-le na' wlliayi' ljwell-le.

¹⁶ Ki nia' le' naa: li gon ka cheeni Espíritu che Chioza', na' bich gonle daa na beli chen chelena'.

¹⁷ La' daa chzelall' beli chenna' bi nllaguin Espíritu che Chioza', na' daa cheeni Espíritu che Chioza' bi nllaguin daa chzelall' beli chenna'. Na' ni to diiki bi nllagui ljwellin, na' daan bi choe'gakan latj gonle daa chaklall'le.

¹⁸ Per shi chzenagcho daa na Espíritu che Chioza', bich zoacho xñi'a leya'.

¹⁹ Nakbia'cha diikin chon ben'ka' chzenaggake' daa che' beli chen che'ka': chdalen-gake' xiin xool ben' wa xiin xyo ben', chongake' daa nak dii zban, chibagakile' gongake' yog' daa na beli chen che'ka',

²⁰ choe'la'ogake' yaj yag, chlangake' yel' willa'na', chakzbangakile' ben', chakdil-lengake' ben', chakxe'gakile' ben', chllaa chlokgake', chibagakile' to lezgake' gak wen chegake', chibagakile' kwegkake' dil chix na' gonte cheləgake'.

²¹ Nakgake' ben' xe', nakgake' wen xya, nakgake' ben' weezo, chajgake' ga chal' lni na' chzoll chnitgakile' na' chjeej chjtaogake' ka nla' ka nte, na' chongake' bichlə dii bi yejni'a. Na' nia' le' sto shii, ka dillaa ba be'len' le', ben'ka' chon ka' aga wak yillingake' gana' chñabia' Chioza'.

²² San ben'ka' chzenaggake' daa na Espíritu che Chioza' chakgakile' bish' ljwellgake', chiba chizak'gakile', zoagake' mbalaz, napgake' yel' chxenlall', chle'shi'gakile' ben', chongake' wen che ben', chongake' daa chchebgake',

²³ nakgake' ben' gaxjlall', na' chñabia' kwingake'. Na' ben'ka' chon diiki aga bi ley de dii inan bi chongake' wen.

²⁴ Na' ben'ka' ba nak lall' na' Cristo Jesúza' bich choe'gake' latj inabia' beli chenna' legake' daa nakgake' ka ben' ba wit lawi daa chzelall' beli chen che'ka'.

²⁵ Shi ba yoo Espíritu che Chioza' loo yichjlall'do'chona', chiyal' we'cho latj inabi'e cho'.

26 Bi chiyal' gakcho beṅ' cha'sib, ni bi chiyal' wshagdilzə ljwellcho, ni bi gakxe'i ljwellcho.

6

1 Le' beṅ' bish'dawaa na' le' beṅ' zandawaa, shi inezile to beena' nakle txen chone' dii mala', ka le' chzenagle che Espíritu che Chioza' chiyal' gaklenlene' kwenche yigooshlilallee, na' bi gonilene' zi'bia'. Na' li se wneyi che kwinle kwenche ki lenle yixople lao dii mala'.

2 Li gaklen ljwell-le bittezə dii chak chele, la' kan' cheeni Crístona' gonle.

3 Shi zoa beṅ' chon kwine' beṅ' choo beṅ' xen, chziye'z kwinen'.

4 To tole chiyal' yiya yiyiljle nak nsa' chele. Na' shi ba chizoile chonle dii wenna', li yiba yizaki, na' bi inazle chonchle ka beṅ' yoblə.

5 La' to tocho chiyal' sho' yichjcho goncho daa naki checho.

6 Beṅ'ka' chzenag cho'a xtill' Chioza' chiyal' we'gake' bi de chegake' beena' chli' chsedi legake'.

7 Bi gakzile wak siye'le Chioza'. Daa gaz kwekle lekzannan' yizi' yilaple.

8 Beena' choe' cho'a xbayi beli chenna', kwiayee daa chzenague' cheyin. San beena' chon ka cheeni Espíritu che Chioza', yizi'e banez yel' mban zejli kani daa chzenague' che'.

9 Bi chiyal' lljxakicho goncho dii wenna', la' wllin lla yizi'chon banez kon shi bi yidinjicho.

10 Na' daan, kat' de xlatjin, chiyal' gonicho wen yog' beṅ', na' lliarote beṅ'ka' nakcho toz nonlilall'cho Crístona'.

11 Kwin' chisyoll' chzej' yishi.* Li wwiakachi ka nak letr yel' cha'ki.

12 Beṅ'ka' chonzə byen sho'le seṅ' daa le circuncisión, chongake'n kwenchzə kono bi ina chegake', na' kono wsak'zi' legake' daa choe'gake' xtill' Crístona', beena' wit lee yag cruza'.

13 La' ni beṅ'ka' yoo seṅna' bi chizogakile' gongake' doxen ka na leya'. San cheenzgakile' sho'le seṅna' kwenche wshalj wshongake' ba bengake' gan yoolen.

14 Ka nak nad', biga cheenid' wshalj wshon' che kwin', san wshalj wshon' che daa ben Xancho Jesucrístona'. La' daa wite' lee yag cruza' bich bi wneyi zia' shi bi ina beṅ' cha', na' ka'kzə beṅ' yell-lioka' bich ndegake' nad' kwent.

15 Bibi zjanayin sho'cho seṅna' wa bi sho'chon, san daa ba bikob Chioza' yichjlall'do'chonon', lennan' zakii.

16 Yiyesh'lall'shgayi Chioza' yog'lol beṅ'ka' chon ka ba wnia', na' gone' ka soagake' mbalaz, la' legaken' nakgake' dowalj beṅ' Israel, beṅ'ka' nak yell che'.

17 Na' naa, bich cheenid' no kwekw nad' dii zed, la' kwerp cha'ni nsa'n yill che yog' diika' ba wxak'zi'a daa chon xshin Xancho Jesús'a'.

18 Le' beṅ' bish'dawaa na' le' beṅ' zandawaa, Xancho Jesucrístona' soalenshgue' yog'loltele na' gaklenshgue' le'. Kan' gakan.

* 6:11 Kwin' chisyoll' chzej' yishi: Páblona' bchine' beṅ' bzeje' dillaa bi'e, per kwine' bzeje' to chop cho'a dill' gana' chiyoll' yisha' kwenche gokbe'gakile' len' bseleen.

Kart daa bzej Páblona' na' bseleen lao ben'ka' nonlilall' Jesucrístona' yell Éfesona'

¹ Nad' Pablo nak' postl che Jesucrístona' kon ka chaklall' Chioza'. Chwap' le' chiox, le' lle'le yell Éfesona', na' nakle lall' na' Chioza' daa nakle Cristo Jesúsza' toz, beena' chonlilall'le.

² Chnabid' Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

³ Chiyał' we'la'ocho beena' nak Chios che Xancho Jesucrístona', beena' nak Xe'. La' ba benleeye' cho' na' ba naki checho yog' dii wenna' de yabana', daa nakcho Crístona' toz.

⁴ Chioza' wleje' cho' gakcho Crístona' toz kana' zi' xe silte yell-lioni kwenche gakcho ben' nxi nych na' bibi xtol'cho gat' lawe'na'. Daa le chakile' cho',

⁵ wlo'e xnezin kana' zi' xe silte yell-lioni gakcho xiine' kon ka wyazlallee gone' checho, daan bselee Jesucrístona' ni checho.

⁶ Na' daan, toshiizi we'la'ocho Chioza' daa bene' to dii wen inleeb checho daa ba nakcho Xiine'na' toz, beena' le chakile'.

⁷ Ba nakchone' toz daa wdixje' xtol'choka' kana' blalj xchene'na' ni checho kwenche Chioza' bizi'xene' saaxya chechoka' daa naklikze' ben' wen inleeb.

⁸ Na' dii xen wal chaklen Chioza' cho' daa none' cho' yel' sin'na' len yel' chajniina'.

⁹ Na' ba bliile' cho' daa goklallee gone' daa kono wnezi kani'yi, daa bliie' bia' gon Crístona'.

¹⁰ Na' bliie' bia' illin lla gak ka wyazlallee na'ch yiyone' toz yog'lol dii bxe bsile', ka diika' lle' yabana' na' ka diika' lle' lo yell-lioni, kwenche Crístona' inabi'e lao yog'lolan.

¹¹ Chios, beena' chon yog'lol daa chaklallee kon ka chgwee xnezin gak, wleje' cho' kana' zi' soatecho kwenche gaki checho dii wenna' wi'e ben'ka' nak Crístona' toz.

¹² Na' goklallee zigaate neto' naknto' ben' Israel wxenilall'nto' Crístona' kwenche shajlawee daa nake' ben' choo ben' xen.

¹³ Na' lekzka' le', wyajle'le che Crístona' na' bénlene' txen ka benile dill' wen dill' kob che'na' daa nak dii licha daa choe' dill' yisle' cho' kwenche bi kwiayi'cho. Na' ka wyajle'le, Chioza' bli'e ba nakle lall' nee daa bzoe' Espíritu Santo che'na' loo yichjlall'do'lena' kon ka bchebe' gone'. Na' daa bene' ka', wak inacho wlo'e le' to sen daa chli'n nakle lall' nee.

¹⁴ Na' daa zoa Espíritu che'na' loo yichjlall'do'chona', nezicho gak lo na'cho yog' diika' nchebe' gone' cho' kat' illin lla yizi' yikee cho' nakcho lall' nee, kwenche koochone' balaan daa nake' ben' choo ben' xen.

¹⁵ Na' daan, ka wnezid' nonlilall'le Xancho Jesúsza' na' le chakile' yog' ben'ka' nak lall' na' Chioza',

¹⁶ bi chsanlallaa wi'a Chioza' yel' choxken ni chele na' chnab' gaklene' le' kat' choe'lwillee.

¹⁷ Choe'lwil' Chios che Xancho Jesucrístona', beena' nak Xacho, beena' liizelozi chidolee sho'e balaan xen, chnabidee gon Espíritu che'na' le' yel' sin' che'na' na' wzajniile' le' kwenche gombia'chlene'.

¹⁸ Na' chnabidee wzoe' beeni' che'na' loo yichjlall'do'lena' kwenche inezile bin nonle lez daa ba gox wñabe' le', na' ka mbalaz inleeb nak daa wi'e ben'ka' ba nak lall' nee,

¹⁹ na' kwenche gakbe'ile ka nak yel' wak choo yel' xen che'na' daa bi chiyoll chido daa chaklenan cho' nonlilall'chone'. Lennan' yel' wak choo yel' wak xen

²⁰ daa bli'e kana' bisbane' Crístona' ladj ben' wetka' na' wlekwe'ne' shlaa de shli che'na' yabana',

²¹ gana' nzoe'ne' chñabia'che' aga ka yog'lol anjlka' na' dii xiw'ka' nap yel' wak na' yel' wnabia'. Na' zeyi che' kochno zoa, ni kochno soa, beñ' gakch beñ' zak'chi ka le'.

²² Na' bzoe' xni'a Crístona' yog'lolte dii de, na' nzoe'ne' chñabi'e lao yog'lolcho cho' nakchone' toz, ka chon yichjchona' chñabi'an doxen kwerp chechona'.

²³ La' cho' nakchone' toz, zaklebicho kwerp che'na'. Na' toshiizi zoalene' cho' na' chñabi'e cho', la' len' chñabi'e yog'lolte dii de doxen yell-lioni na' yabana'.

2

¹ Kana' bin' gonlilall'le Crístona', gokle ka beñ' net lao Chioza' daa wzoale bxinj bñenle.

² Na' wdale benle kon ka nazan chele, ka chon nottezə beñ' yell-lío, beñ' bi nombi'e Chioza'. Na' bzenagle cheyi daa chñabia' dii xiw'ka' ze lo llazə, daa chñabia' yichjlall'do' beñ'ka' bi chzenag che Chioza'.

³ Ka'kzan ben yog'lolcho kana', bencho kon daa nazan checho, be'cho cho'a xbayi beli chen chechoni na' yog'lol diika' wza'lall' loo yichjlall'do'choni. Na' daa bencho ka', chidol'cho yel' zak'zi' che Chioza' kon ka chidol' gak che beñ'ka' bi chzenag che'.

⁴ Per daa nak Chioza' beñ' lall'do' xen inleeb na' le chakile' cho',

⁵ bene' yel' mban checho zejli kani ka benlilall'cho Crístona', beena' biban ladj beñ' wetka', la'kzi gokcho ka beñ' net daa choncho saaxyaka'. Na' daa nak Chioza' beñ' wen inleeban, bisle' cho' kwenche bi kwiayi'cho.

⁶ Na' daa nakcho Cristo Jesús'a toz, ka bisban Chioza'ne' ladj beñ' wetka', lenkzchon bisbane' daa bene' cho' to yel' mban kob. Na' ba nakten lljanabia'lenchone' yabana'.

⁷ Chioza' bene' ka' kwenche llaka' zi' za' wli'lawin nake' beñ' wen inleeb daa bene' to yel' goklen xen checho daa bselee Crístona' ni checho.

⁸ La' yel' beñ' wen che'nan' bisle' cho' kwenche bi kwiayi'cho daa ba nonlilall'cho Crístona'. Aga inacho daa nakcho beñ' wena' bisle' cho', san nakan to goklen daa bene' checho ka'zə.

⁹ Na' bi gak gakzcho cha'sib, la' aga daa choncho dii wennan' bisle' cho'.

¹⁰ La' Chioza' bikobe' yel' mban chechona' ka bene' cho' lall' na' Crístona' kwenche soacho goncho dii wenna' ba wlo'e xnezin goncho.

¹¹ Ka le' bi nakle beñ' Israel, beñ' Israelka' nsi'gake' le' Beñ' bi yoo señ daa le circuncisión, na' legake' nsi' kwingake' Beñ' yoo señ daa le circuncisión. Li lljadini ka gokle kana'.

¹² La' kana' bin' gombia'le Crístona', gokle ka beñ' zit' laonto'na', neto' wlej Chioza' kwenche naknto' yell che', na' Chioza' aga bchebe' gaklene' le' ka bchebe' gaklene' neto' beñ' Israel. Na' wzoale yell-lioni bi bembia'le Chioza' ni bi benle lez gak wen chele.

¹³ Kana', gokle ka beñ' zit' laonto'na'. San naa, ba nakcho toz daa nonlilall'le Cristo Jesús'a, beena' blalj xchene'na' wite' ni checho.

¹⁴ Crístona' bene' ka bizoalen ljwellcho wen. Kana', bi ble'shii ljwellcho, san naa, ba biyone' cho' toz daa bsol bñite' daa benan ka bwiyi ljwellcho.

¹⁵ Daa bzani kwín Crístona' wite' ni checho, bchogue' daa wna ley chento'na' chiyal' gonnto'. Bene' ka' kwenche neto' beñ' Israel na' le' bi nakle beñ' wlall' chento' biyakcho toz lawe'na'. Na' ba bizoe' cho' wen.

¹⁶ Na' daa wite' ni checho lee yag cruza', bizoe' cho' wen kon Chioza', ka le' na' ka neto', na' biyakcho toz na' bich chakzbani ljwellcho.

¹⁷ Crístona' bidtixji'e dill' wen dill' koba' daa na yog'cho wak soalencho Chioza' wen, ka le' nakle beñ' zit' na' ka neto' naknto' beñ' yell che'.

¹⁸ La' daa nonlilall'cho Crístona', ka le' na' ka neto', wak ibig'cho lao Xacho Chioza' daa ba bene' cho' Espiritu che'na'.

¹⁹ Na' le' bi nakle beñ' Israel bich nakle ka beñ' zit', san ba lenle beñ'ka' nak yell che Chioza', na' Chioza' ba none' le' ka beñ' loo yoo.

²⁰ Le' nakle ka to yoo, na' neto' postl na' ben'ka' chyixjee daa che' Chioza' legake' naknto' ka len yooná, na' kwín Jesucrístona' nake' ben' lliálaote ka yaja' daa mbejláwi, yaja' daa ba nchejcha yooná'.

²¹ Na' Jesucrístona' chone' kwenche yog'cho cho' nakchone' txen gakcho toz na' gakcho ka to yoodo' gana' zoa Chioza'.

²² Na' lekzka' Jesucrístona' chone' kwenche yog'cho, ka neto' na' ka le', gakcho ka to yoo gana' zoa Chioza' daa zoalen Espíritu che'na' cho'.

3

¹ Nad' Pablo dia' lillyani daa chyixje'id' le' xtill' Crístona', le' bi nakle ben' Israel.

² Ba nezkzile' dii wenna' ben Chioza' daa bene' lall' na' wi'a xtilleena' laolena'.

³ Ba bzajniile' nad' daa kono wnezi, kon ka ba bzej' le' to chop cho'a.

⁴ Na' kat' wlable yishi, gakbe'ile ba bzajniile' nad' daa kono wnezi che Crístona'.

⁵ Diaka' ba wde bi wnezgakile' dga ba bzajni Espíritu che'na' neto' postl che' len ben'ka' wdixjee daa goll Chioza' legake'.

⁶ Na' dga kono wnezi nan: yog'cho cho' chajle'cho dill' wen dill' kob che Cristo Jesúsá, ka le' bi nakle ben' Israel na' ka neto' ben' Israel, nakcho toz na' txen ikaacho dii wenna' bcheb Chioza' gone' checho.

⁷ Yel' ben' wen che Chiozan' wleje' nad' na' bzoe' nad' gon xshine'na', na' chaklentie' nad' kon yel' wak che'na' kwenche choe'len' ben' dill' wen dill' kob che Crístona'.

⁸ Nad' chakid' shlas aga no nak' lao yog' ben' nak lall' na' Chioza'. Per la'kzi aga bi zakaá, Chioza' wleje' nad' kwenche we'len' ben'ka' bi nak ben' Israel dill' wen dill' kob che Crístona' daa le zak'chga na' bich bi de dii wsaklebichon.

⁹ Chioza', beena' bxe bsil yog'lofte dii de, kani'yi wlo'e xnezin gone' to dii gone', na' ni to kono golle' ka nak daa gone'. Na' naa ba bene'n lall' na' wzajniida'n ben'

¹⁰ kwenche ni checho, cho' nakcho toz nonlilall'cho Crístona', gakbe'i anjlka' lle' yabana' na' dii xiw'ka' doxen ka nak yel' sin' che Chioza'.

¹¹ Na' daa bselee Xancho Cristo Jesúsá, ba bene' ka wlo'e xnezin gone' kana' zi' wxesiltie' yell-lioni.

¹² Na' daa nonlilall'cho Crístona' na' nakchone' txen, de latj checho we'llwillcho Xacho Chioza' na' nezicho wzenague' checho.

¹³ Na' nia' le', li gon goklen bi yidinjile ni che dga chllagloa' daa be'len' le' xtill' Crístona', san li yibayi daa chzak'zi'a ni chele.

¹⁴ Daan, chchek' xib' choe'llwill' Xacho Chioza', beena' nak Xa Xancho Jesucrístona',

¹⁵ beena' ben kwenche yog'cho cho' nakcho xiine' nakcho toz, ka ben' lle' yell-lioni ka ben' lle' yabana'.

¹⁶ Na' daa nape' doxen yel' waka', chnabidee kwenche Espíritu che'na', beena' yoo loo yichjlall'do'lena', gone' ka gakchachle

¹⁷ na' soachle gonlilall'le Crístona' kwenche toshiizi soalene' le', na' yel' chakina' wde loyin lo yel' mban chelena' kwenche soatezi soale gakilene' na' gaki ljwell-le,

¹⁸ na' gakbe'ile, le' na' yog' ben'ka' nak lall' na' Crístona', ka chakchgaile' cho', na' biga yiyoll yido yel' chaki che'na'.

¹⁹ Cheenid' gombia'le yel' chaki che'na' daa nak liizelozi dii xen inleeb, daa kono illin shajni kwaslol, kwenche yiyoll yido gakle doxen ka cheeni Chioza'.

²⁰ Chioza' chidolee sho'e balaan daa chak chone' dii xench aga ka daa chnabichone' wa daa chakicho gone' checho ni che yel' wak che'na' daa zoalen cho'.

²¹ Cho' nonli'lall'cho Cristo Jesúsá' chiya' koocho Chioza' balaan toshiizi na' zejli kani ni cheyi daa bselee Crístona' ni checho. Kan' nakan.

4

¹ Nad' dia' lillyani daa chyixji'a xtill' Xancho Jesucristona'. Na' chat'yoid' le' soale gonle wen kon ka chiyał' goncho cho' ba gox wñab Chioza'.

² Li gak beñ' gaxjlall', li ile'shii beñ', li gap yel' chxenlall' chele ganga na' li gaki ljwell-le.

³ Espíritu Sántona' bene' ka yog'cho biyakcho toz, na' li gon byen soalen ljwell-le wen kwenche toshiizi gakcho toz.

⁴ Yog'cho, cho' nonlilall'cho Crístona', zaklebicho to kwerp daa nakcho toz; na' toz Espíritu yoo loo yichjlall'do'chona'; na' toz ka noncho lez gon Chioza' checho daa ba gox wñabe' cho'.

⁵ Tozə beena' nak Xancho, na' toze'n nonlilall'cho, na' toz ka zeji daa chchoacho nisa'.

⁶ Tozə Chioza' zoa, beena' nak Xa yog'lołcho. Na' len' chñabi'e lao yog'lołcho; na' chchine' yog'cho kwenche chak daa cheenile' gak, na' zoalene' yog'cho.

⁷ Per to tocho non Crístona' dii gak goncho kon ka goklallee.

⁸ Daan, cho'a xtill' Chioza' nan:

Ka biyep'e yabana', zinchi'e pres che'ka',
na' bi'e dii wen che'na' beñ' yell-lioki.

⁹ Na' ka nak daa nan "biyep'e", zejín zigaate betje' bide' yell-lioni.

¹⁰ Na' beena' bid yell-lioni, lekzen' biyep'e yabana' gana' zoe' chñabi'e lao yog'lołte dii de.

¹¹ Na' len' bzoe' beñ' nak postl che', na' beñ' chyixjee daa chi'ene', na' beñ' chyixjee dill' wen dill' kob che'na', na' beñ' chap chwie' beñ'ka' ba nonlilall' le', na' beñ' chli' chsedi cho'a xtilleena',

¹² kwenche beñ'ka' nak lall' nee gak gongake' xshine'na', na' yiyoll yido gakcha yog' beñ'ka' nak Crístona' txen,

¹³ ax̄t ki yog'cho gakcho toz gonlilall'cho Xiin Chioza' na' gombia'chchone'. Na' gakyen'cho ka chiyał' gakcho, na' yiyoll yido gakcho dowalj beñ' wen doxen ka nak Crístona'.

¹⁴ Na' bich gakzcho ka bi'do' na' shajle'tezcho bittezə daa chyiljlall' beñ', na' ni bi gak gon beñ' wxiye'ka' gan siye'gake' cho' kwenche shajle'cho daa bi nak dii li.

¹⁵ San shajlencho dill' li che Chioza' na' gapcho yel' chaki che'na', na' ka' zej gakchcho beñ' wen ka nak Crístona', beena' chñabi'e cho', ka chon yichjchoni chñabia'n kwerp chechoni.

¹⁶ Ka nak kwerp chechoni, tkwen tkwen wejan nox' ljwellin na' chaklen ljwellin bittezə llin gonan. Ka'kzan cho' nakcho Crístona' txen nakcho ka toz kwerp kwenche to tocho goncho daa non'e' cho', na' yog'cho zejch chakchacho na' zejch chakchi ljwellcho.

¹⁷ Nia' le' dga kon yel' wñabia' che Xancho Crístona': bich soale gonle ka chon beñ'ka' bi chonlilall'gake' Chioza', beñ'ka' kon chyiljlall'gake' daa bibi zakii,

¹⁸ na' nchol nñiti yichjlall'do'eka' na' bi ntegakile', na' bi napgake' yel' mban daa non Chioza' cho', ni bi nombia'gake' daa nak che Chioza', daa nakgake' beñ' lall'do' wal.

¹⁹ Bichkzə bi yel' zto' nombia'gake', na' biga chjshyagakile' chongake' yog' diika' nak zban.

²⁰ San le', nezile aga kan' cheeni Crístona' goncho,

²¹ shi dii likzə ba benile xtill' Jesúsza' na' ba nzedile soale gonle ka cheenile' kon ka nak dii li che'na'.

²² Na' chiyał' wsanle bich gonle dii malka' benle, na' kwej yichjle yel' mban gol chelena', la' daa wxiye' beli chenna' len', bxinj bñenan le'.

²³ Chiyał' yikob yichjlall'do'leka' na' bich bi dii mal sa'lall'le.

²⁴ Na' chiyał' yikob yel' mban chelena' kwenche yiyakle dowalj beñ' li beñ' shao' lega beñ' nak xiin Chios.

²⁵ Daan, bich chiyał' siye'le, san to tole chiyał' we'len ljwell-le dill' li, la' yog'cho ba nakcho toz, ka kwerp chechona' nakan toz, la'kzi zan diika' ndil nllagan.

26 Kat' illaale, bi wxinj wlenle ni bi koolall'zle,

27 kwenche bi we'le latj che dii xiwaa.

28 Na' beena' chzi' chban, bich gone' ka', san wchine' ni'a neena' gone' llin kwenche gape' dii wi'e ben'ka' bibi de cheyin.

29 Na' bi chiyal' we'le dill' zban, san chiyal' we'le dill' wen dill' shao' dii gonan ka soatip soashoshch ben'ka' chzenag bin nale na' gaklenan legake'.

30 Na' bi gonle ka soayesh' Espiritu Santo che Chioza', beena' ba nzoe' loo yichjlall'do'chona' kwenche chakbe'icho ba nakcho lall' na' Chioza' shlak illin lla yikee cho', cho' ba biya'o bizi'e.

31 Chiyal' kwey yichjle yog'lol dii malki: bich koolall'le, bich illaa ilokle, bi koole ben' bel ban, bibi gon inale che ben' na' ni sto dii malka' bich gonle.

32 Li gak ben' wen ben' shao' na' ben' chiyesh'lalli bish' ljwellin. Chiyal' yizi'xen che ljwell-le, ka ben Chioza' bizi'xene' chele daa nonlilall'le Crístona'.

5

1 Daa ba nakle xiin Chios na' chakile' le', li wsed gonle wen ka chone'.

2 Chiyal' soale gakile ben', ka chaki Crístona' cho'. Daa chakile' cho', bzani kwine' wite' ni checho, na' bibayi Chioza' daa bene' ka', ka bibaile' shii xla' bayix'do'ka' bzeygake' lawe'na' kana'.

3 Bi chiyal' selall'le inelen ljwell-le wa gonle bichlā dii zban, ni bi selall'le gat' kwe'ile dii xen wal. Ni to diiki bi chiyal' gak ladjlena' daa ba nakle lall' na' Chioza'.

4 Bi we'le dill' zban, ni dill' dii bi zakii ni dill' dii bi yejni'alallii, la' aga dill' ka diikin chiyal' we'le, san chiyal' we'le Chioza' yel' choxken.

5 La' ba nezkzile ni to ben' chnelen ljwellin, wa ben' chon bichlā dii zban, wa ben' chzelall' gat' kwe'ile' dii xen, bi yilline' yabana' gana' chnabia' Crístona' len Chioza'. Beena' chzelallii gat' kwe'ile' dii xen, toz ka chone' ka beena' choe'la'o daa nak yaj yag.

6 Bi we'le latj no siye' le' we'lenze' le' dill' dii bi zakii, la' ben'ka' chon chiya dii malki, ile'gakile' yel' zak'zi' xen che Chioza' daa bi chzenaggake' che'.

7 Daan, bi chiyal' lenle ben'ka' chon ka'.

8 Kanan', nchol' nnti yichjlall'do'lena', san naa daa ba nakle Xancho Jesucrístona' txen, ba yoo beeni' che'na' loo yichjlall'do'lena', na' chiyal' soale gonle lega ben' ba yoo beeni' che'na'.

9 La' beeni' che'na' chaklenan cho' gakcho ben' wen, na' ben' li ben' shao', na' ben' choe' dill' li.

10 Li se wneyi kwenche inezile bi daa chazlalli Xanchona' gonle.

11 Bi gonle txen diika' chon ben'ka' nchol' nnti yichjlall'do'eka', la' bibi zakii daa chongake', san li gon ka yiyakbe'gakile' bi chongake' wen.

12 La' ax̄t chiyii chido'icho we'cho dill' cheyi diika' chongake' do ngash'zə.

13 Per yog'lol diika' choncho, chli'laogakin lo beeni' che Chioza' nak nakgakan.

14 La' beeni' che'na' chili'n lao yog'te diika' choncho. Daakzan ne':

Li yiban, le' nakle ka ben' ches;

na' li yiyas ladj ben' wetka'.

Na' Crístona' kwee beeni' che'na' loo yichjlall'do'lena'.

15 Na' li se wneyi wsa' chele wen, na' bi gonle ka ben' bi nteyi, san li gakte ka ben' sin'.

16 Li gon ka dii le gonle dii wenna' kat' de xlatjin, la' llaki zoacho le ba chi'chga dii mala'.

17 Daan, bi chiyal' gonle ka ben' bi nteyi, san chiyal' shajniile daa cheeni Xancho Jesucrístona' goncho.

18 Bi soll nitile, la' beena' chzoll chniti chone' chiya dii bi yejni'alallii. San li we' latj soa Espiritu Sántoná' inabi'e loo yichjlall'do'lena'.

19 Chiyal' we'len ljwell-le dill' che sálmoka', na' gol-le dii koon Xanchona' balaan na' bichlā dii ina Espíritu che Chioza' gol-le. Na' li gol ine we'la'ole Xancho Crístonā' do yichj do lall'le.

20 Na' daa nakcho Xancho Jesucrístonā' txen, toshiizi chiyal' we'le Xacho Chioza' yel' choxken daa chaklene' cho' lao yog'lolte.

21 Chiyal' wzexj yichjle wzenag che ljwell-le, daa chaple Crístonā' balaan.

22 Na' ka le' noolā zoa beñ' chele, chiyal' wzexj yichjle wzenagle chegake', ka chonle chzenagle che Xancho Crístonā'.

23 La' beñ' byonan' chñabi'e nool che'na', ka chon Crístonā' chñabi'e cho' nonlilall'chone', cho' ba bisle' kwenche bi kwiayi'cho. Chñabi'e cho', cho' zaklebicho kwerp che'na', ka chon yichjchoni chñabi'an kwerp chechoni.

24 Na' ka cho' nonlilall'cho Crístonā' na' chzexj yichjcho lawe'na', ka'kzan chiyal' gon noolka' wzexj yichje'ka' lao yog'lol daa ina beñ' che'ka'.

25 Na' ka le' beñ' byo zoa nool chele, li gaki nool cheleka', ka chon Crístonā' chakile' cho' nonlilall'chone' na' bzani kwine' wite' ni checho

26 kwenche biyakcho beñ' nxi nyech lawe'na'. Bixis biyibe' yichjlall'do'chona' ka wyajle'cho xtilleena'

27 kwenche yibaile' cho' nakcho lall' nee kat' yillincho lawe'na' na' bibi nda' nchen yichjlall'do'chona', san gakcho beñ' nxi nyech, beñ' bibi xtolin de.

28 Na' ka'kzə le' beñ' byo, le' zoa nool chele, chiyal' gapshiile nool cheleka' ka chapshii kwintle. Beena' chakile' nool che'na', kwinkzen' chakile'.

29 Biga zoa beñ' chwiile' kwerp che'na', san chweej chwawe'n na' chapshi'en, ka chon Crístonā' chapshi'e cho' nakchone' txen,

30 la' to tocho nakcho ka tkwen wej kwerp che'na'.

31 “Daan, wlaa beñ' byona' xaxneena' kat' ikaa che', na' soalene' xooole'na' gaggake' toz.”

32 Dill'ki ba wnia' chzajniin le' to dii zak'chgayi daa bin' inezile', la' chzajniin cho' ka chon Crístonā' daa chakile' cho' ba nakchone' toz.

33 Na' ka le' beñ' byo, to tole chiyal' gaki'le' nool cheleka' ka chaki kwintle. Na' le' noolā, chiyal' gaple balaan beñ' cheleka'.

6

1 Na' le' bi'do', li wzenag che xaxna'leka' lega bi' chzenag che Xancho Crístonā', la' kan' chiyal' gonle.

2 Dga bllia Chioza' bia' goncho gokan dii nech daa nsa' to dii bchebe' gone' checho shi goncho ka ne', na' nan: “Li gap balaan xaxna'leka',

3 kwenche gak wen chele na' ibanle ssha lo yell-lioni.”

4 Na' le' zoa xiinle, bi gonle ka gakshejlall'b', san li yisgolgakb' xochi na' li wzajni'gakib' kwenche wzenaggakb' che Xancho Crístonā'.

5 Na' le' ndoo lla yel-le chonle xshin beñ', li gon daa na beñ'ka' nak xanle yell-lioni. Li gaggake' balaan, li illebgake' na' li gon xshine'ka' do yichj do lall'le. Li gaktezi che Crístonā'kzan chzenagle.

6 Aga kat' chwiazə xanlena' yilal yizodile' kwenche ile'shi'gakile' le', san li gonan do yichj do lall'le lega beñ' nak wen llin che Crístonā', la' kan' cheeni Chioza' goncho.

7 Chiyal' gonle llinna' do yichj do lall'le, na' li gaktezi xshin Crístonā' chonle, aga che beñ' yell-lion.

8 La' nezkzile nottezə nakcho, laa beñ' ndoo lla yele' chone' xshin beñ' wa beñ' chon xshinkze', Xanchona' gone' ka yizi'cho banez che dii wenna' ba bencho.

9 Na' le' nzi'le beñ'ka' chon xshinlena', lekzka' li gonigake' wen. Bi wwall wsheble legake', la' nezkzile, ka le' na' ka legake', yabana' zoa to beñ' nak Xanle, na' le' aga nakzi beñ' chakile'.

¹⁰ Na' lekzka' nia' le' beṇ' bish'dawaa na' le' beṇ' zandawaa, li gak wal kon yel' wak choo yel' wak xen che Xanchona'.

¹¹ Li wchin yog' diika' non Chioza' gaklenan cho' kwenche gakchale na' so sakile gonle gan dii xiwaa kat' za'lanan yel' wxiye' cheyinna'.

¹² La' aga beṇ' de beli chenzan chdil-lencho, san chdil-lencho dii xiw'ka' bi chle'icho, diika' ze lo llazə na' napgakan yel' wak na' yel' wnabia', diika' chnabia' lo yell-lioni gani dechga dii mala'.

¹³ Na' daan, li goni chele yog' daa non Chioza' gaklenan le' kwenche so sakile dii mala' lla'na' wtil-len, na' ka yiyoll wtil-len ni zechechkzle.

¹⁴ Li soachech na' li we' daa nak dill' li, la' lannan' gaklenan le' gonan ka bachleena' daa chchel leelena'. Na' li soa li gon daa nak dii licha, la' lannan' gaklenan le' gonan ka daa chbin soldadka' chkweejan lcho'eka'.

¹⁵ Na' li se kwas we'lenle beṇ' xtill' Crístona' daa wzoan legake' mbalaz, ka chon to soldad ze' kwase' nlej xele'na' kwenche shaje' lo wdila'.

¹⁶ Na' daa lliarote lawi diiki, li soachech gonlilall'le Chioza' kwenche gaklenan le' na' wsol wnitán yog'lol de wxiye' che dii xiwaa, na' gonan llin ka daa nox' soldada' chkweejan le' kwenche bi chchele' daa chzal' beena' chdil-lene'.

¹⁷ Na' li wzoa yichjle daa bisla Chioza' le' lao dii mala', na' gonan llin ka lap' ya che soldadka' daa chkweej yichje'ka'. Na' Cho'a Xtill' Chioza' gakan ka to yesya daa chon Espíritu Sántona' le' kwenche til-lenle dii mala'.

¹⁸ Toshiizi li we'llwill Chioza', na' inabilene' kon ka chzajni Espíritu che'na' le'. Na' toshiizi li se wneyi, na' bi lljxakile inabilene' che yog' beṇ'ka' ba nak lall' nee.

¹⁹ Na' lekzka' li inabi Chioza' kwenche wxoe' cho'a lollaani dill'ka' we'len' beṇ', na' bi illeb' wzajniid' beṇ' ka nak dill' wen dill' kob che Crístona' daa kono wyajni kani'yi.

²⁰ La' Chioza' nselee nad' lo laze' kwenche we'len' beṇ' cho'a xtilleena', na' ni cheyinnan' dia' lillyani. Li inabi Chioza' gaklene' nad' kwenche bi gall illeb' wi'a cho'a xtilleena'.

²¹ Tíquiconi, beṇ' bish'choni le' chakid', nake' to beṇ' toshiizi chaklene' lo xshin Chioza', na' yidzajniile' le' yog'lol ka chak cha' na' daa chon'.

²² Chselaane' yide' laolena' kwenche inezile ka chak chento', na' kwenche wtipe' lall'le.

²³ Le' beṇ' bish' na' le' beṇ' zan', chnabid' Xacho Chioza' na' Xancho Jesucristona' gongake' ka soale mbalaz, na' gonlilall'chle legake', na' gaki ljwell-le.

²⁴ Chioza' gaklenshgue' yog'lol-le, le' zoale chakchgaile' Xancho Jesucristona'. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Filípoza'

¹ Nad' Pablo na'ch Timotewi naknto' wen llin che Jesucrístona', chwapnto' chiox yog'le, le' lle'le yell Filípoza', le' nakle lall' na' Chioza' daa nonlilall'le Cristo Jesúsza'. Na' lekzka' chwapnto' chiox ben'ka' chgoo xnezi xshin Chioza' ladjlena' na' ben'ka' chaklen legake'.

² Chios, beena' nak Xacho len Xancho Jesucrístona' gaklenshgagake' le' na' wzoagake' le' mbalaz.

³ Ka ka chjadinid' le' cho'a Chios cha'na' yel' choxken.

⁴ Na' toshiizi choe'lwillee kon yel' xaba kat' chnabidee gaklene' yog'le,

⁵ daa lenle chonle nad' txen, dezd ka wyajle'le axt naa, kwenche ides dill' wen dill' kob che Jesucrístona'.

⁶ Nezyen'id' Chios, beena' wzolo chone' to dii wen loo yichjlall'do'lena', gone' kwenche yiyoll yido yiyakle ka chazlallee kat' illin lla yila' Jesucrístona'.

⁷ Na' chiya'kz yibaid' ka chjadinid' le', la' toshiizi yoole loo yichjlall'dawaani. Na' la'kzi dia' lillyani wa choe'len' ben' dill' wen dill' kob che Jesucrístona' kwenche gakbe'gakile' nakan dill' li na' shajle'gake' cheyin, nezid' toshiizi chaklenle nad' lo llinna' daa ben Chioza' lall' na' gon' yel' ben' wen che'na'.

⁸ Chioza' nez nle'ile' ka chakid' yog'le kon ka chaki Cristo Jesúsza' le'.

⁹ Kat' choe'lwil' Chioza', chnabidee zizikli yisgolche' yel' chaki chelena', na' gonche' le' yel' sin'na' len yel' chajniina'

¹⁰ kwenche gakbe'ile daa nakch wen na' ka' soale do yichj do lall'le na' bibi dol' gaple kat' yiyed Crístona'.

¹¹ Na' Jesucrístona' gaklene' le' gonle lega ben' li ben' shao' kwenche sho' Chioza' balaan na' we'la'o ben' le'.

¹² Le' ben' bish' na' le' ben' zan', cheenid' inezile diiki ba gok cha' goklenlan kwenche bdesch dill' wen dill' kob che Jesucrístona', na' bi bizogakin wsej wllongakan.

¹³ La' naa yog'lo' soldadka' lle' ni na' nochla ben' yobla lle' do ni nezgakile' dia' lillyani daa chonlilallaa Crístona'.

¹⁴ Na' daa dia' lillyani, zan ben' bish'choka' ba wloolall'gake' chongake' lall'chog choe'gake' xtill' Chioza' na' bi chllebgake'.

¹⁵ Dii li balgake' choe'gake' xtill' Crístona' daa chakxe'zgakile' nad' na' daa cheenzgakile' gonchgake' ka nad'. Per zoakz ben' chone'n do yichj do lallee.

¹⁶ Ben'kin chongake'n daa chakgakile' nad' na' daa nezgakile' Chioza' ba nzoe' nad' kwenche wi'a dill' wen dill' kob che Jesucrístona'.

¹⁷ Na' ben'ka' zi shkwen choe'gake' xtill' Crístona' daa cheenzgakile' gonchgake' ka nad', na' aga chongake'n do lall'gake'. Na' chakzgakile' daa chongake' ka' gakyeshid' daa nej' lillyani.

¹⁸ Per aga bi chon daa cha' shi do lall'gaken' chongake'n wa aga do lall'gaken'; kon daa choe'lgake' xtill' Crístona', daalan chibaid'.

Na' zizikli yibachid'

¹⁹ daa nezid' wichej' wen lao yog' diiki chak cha' daa chnable cha' lao Chioza' na' daa chaklen Espíritu che Jesucrístona' nad'.

²⁰ Na' toshiizi non' lez Chioza' gaklene' nad' kwenche bi sia' yel' zto', san naa na' toshiizi gon' kwenche sho' Crístona' balaan, laa ibanch' wa laa guet'.

²¹ La' shi ibanch', gonchgz' daa cheeni Crístona'; na' shi guet', de to banez cha'.

²² Shi dech yel' mban cha', gonchgz' xshin Crístona' kwenche ben' zanch gom-bia'gake'ne'. Na' bi nezid' non nakch wen.

²³ Chonan lallj inia' non nakch wen: to cheenid' guet' kwenche lljazoalen' Crístona', na' naktechlan wen.

²⁴ Per chonchan byen ibanch' ni chele.

²⁵ Chakid' nakchan wen ibanch' kwenche gaklench' le' gakchachle gonlilall'le Crístona' na' yiba yizakchile daa nonlilall'lene'.

²⁶ Na' kat' ile'ile nad' ladjlena' sto shii, le yiba yizakile we'la'ole Cristo Jesúza'.

²⁷ Naktez gak, li se wneyi wsa'to chele wen lega ben' chajle' che dill' wen dill' kob che Crístona' kwenche laa yidwia' le' wa laa yenzid' xtill'le, inezid' ni zoachechle nxenilall'le Crístona' na' nakle toz chonle ga zeelo chakle kwenche shajle' ben' dill' wen dill' kob che'na',

²⁸ na' bi gall illebzle ben'ka' chakzi' chakzbani le'. Na' daa gonle ka', wli'n kwiayi'chokzgaken', na' le' yilale, la' Chioza' bi wi'e latj kwiayi'le.

²⁹ La' Chioza' goklene' le' kwenche benlilall'le Crístona', na' lekzka' chaklene' le' lo yel' zak'zi'ka' chen chle'ile daa nonlilall'lene'.

³⁰ Ba chsak'zi'gake' le' ka ble'ile bsak'zi'gake' nad' daa chyixji'a xtill' Crístona', na' nezczile ka'kzə ni chak cha'.

2

¹ Daa nakle Crístona' toz, yel' goklen che'na' chtipan lall'le, na' yel' chaki che'na' chonan ka soale mbalaz, na' Espíritu che'na' zoalenkze' le', na' lall'do'lena' nakan lall'do' yesh'.

² Daan, li gak toz, li gaki ljwell-le ganga, na' toz ka dii sele wneyi, na' toz ka dii selall'le, kwenche yiba yizakchid' ni chele.

³ Bibi sele wneyi che tozle wa kwenche gon kwinele ben' choo ben' xen, san li gonan kon yel' gaxjlall', li goni ben' ka ben' zak'chi ka le'.

⁴ Ni tole bi chiyal' chiljzle dii nak to banez chezle, san lekzka' li gon ka si' ben' yoblə banez.

⁵ Li se wneyi gonle ka ben Crístona'.

⁶ La'kzi nake' Chios, bzani'le yel' wñabia' che'na' na' balaan che'na' daa naplene' Xe' Chioza',

⁷ na' bzoe' ka'lə daa naki che', na' ben kwine' ka to ben' bi zakii, na' golje' goke' to ben' de beli chen.

⁸ Na' ka ba nake' ben' yell-lío, blexj yichje' bene' kon ka wna Chioza' ax̄t bi'e latj betgake'ne' lee yag cruza'.

⁹ Daan, Chioza' wlo'ene' to balaan xen inleeb daa liizelozi zak'chi, na' bzoe'ne' nake' xan yog'lołte dii de,

¹⁰ kwenche yog' ben' lle' yabana', na' lo yell-lioni, na' xan yell-lioni kat' yengakile' le Jesúza' wchek' xibe'ka' lawe'na'.

¹¹ Na' yog'loł ben' we'gake' dill' nan Jesucrístona' nake' Xancho na' daa gongake' ka' sho' Xacho Chioza' balaan.

¹² Daan, le' ben' bish'dawaa na' le' ben' zandawaa, kon ka ba benkzle toshiizi bzoale dill' kana' wzoalen' le', li we'l-lall'ch gakchle ben' wizoal dill' naa bich zoa' ladjlena'. Li gall illeeb Chioza', beena' bisla le', na' li gon ka dii le gonle daa cheenile'.

¹³ La' Chioza'kzan chone' kwenche chalj loo yichjlall'do'lena' gonle dii wenna' daa chaklallee gonle, na' lekzka' chaklene' le' kwenche chonlen.

¹⁴ Na' yog'loł daa gonle, li gonan do yichj do lall'le, na' bi gakkleshile ni bi gakkuedzle,

¹⁵ kwenche ben' malka' lle' yell-lioni, ben'ka' nxinj yichjlall'do'eka', gakbe'gakile' bibi dii mal chonle, na' kono bi gak ina chele. Na' gaktole ben' bibi dol' cheyin de, lega ben' nak dowalj xiin Chios. Na' gakle to beeni' lawe'ka', ka beljdo'ka' chey cheeni',

¹⁶ daa chzoachechle chzenagle che cho'a xtil' Chioza' daa nsa' yel' mban. Na' shi ka' gonle, kat'ka' yila' Crístona' de dii gonan ka yibaid' daa bi bendadz' xshin Chioza' ladjlena'.

¹⁷ Daa chzani kwinle sak'zi'le kwenche gonle daa cheeni Chioza' naa nonlilall'le Crístona', zaklebin daa chzani ben' choe' Chioza' kwenche choe'laweene'. Na' daa chzanid' kwin' witgake' nad' daa chon' xshin Crístona', zaklebin ka daa chlalgake' lao daa chzani ben' choe' Chioza'. Na' la'kzi axt witgake' nad', chiba chizakid' na' cheenid' yiba yizaklenile nad'.

¹⁸ Li yiba yizakleni nad', na' li soa mbalaz ka zoa'.

¹⁹ Non' lez Xancho Jesús'a wi'e latj yobzə wselaa Timotewa' gana' zoale, kwenche yibaid' ka yiyede' ine' chak wen chele.

²⁰ Kochno zoa sto cha' ka le', la' tochga len' zelene' nad' wneyi do yichj do lallee gak wen chele.

²¹ La' ben'ki sto zoalen nad', che kwinzgake' zegake' wneyi na' bi zegake' wneyi daa cheeni Jesucristona'.

²² Per ba nezkzile ka wen nsa' che Timotewa' na' ka ba goklene' nad' ba be'nto' dill' wen dill' kob che Crístona'. Ba goklene' nad' ka ben' chaklen xayin.

²³ Daan, kat' ba nezid' nakan gak cha', lii wsel'tia'ne' gana' zoale.

²⁴ Na' nxenlallaa Xanchona' lezkza' yob yidwia' le' kwinkz'.

²⁵ Na' naa chakid' chonan byen yiselaa ben' bish'cho Epafrodítoni, beeni nonlene' nad' txen chdil-lennto' dii mala' daa chonnto' xshin Chioza', beeni bsel'le kwenche gaklene' nad' lao dii chyallj chchinid'.

²⁶ Cheenchgaile' ile'ile' le', na' le chakyeshile' daa wnezile we'ile'.

²⁷ Na' dii licha zi lat'zə ki wite', per Chioza' biyesh'lallile'ne' biyakile'. Na' aga tozen' biyesh'lallile', san lenan' kwenche bi gakyesh'chid'.

²⁸ Daan chiselaane' laolena' dopiyenzə kwenche yibaile' daa yile'ilene' sto shii, na' nad' bich gakyesh'tekid' chele.

²⁹ Li yilebgache' kon yel' chiba chizaki daa nake' cho' txen nonlilall'cho Xanchona'. Na' li gap balaan yog'lol ben'ka' chon ka chone'.

³⁰ La' zi lat'zə ki wite' daa chone' xshin Crístona'. Bzoe' dii nxoll yel' mban che'na' goktgui bidyaklene' nad' bidyene' diika' bi gok gonle.

3

¹ Na' naa, le' ben' bish'dawaa na' le' ben' zandawaa, li yiba yizaki daa ba nonlilall'le Xanchona'. Nad' bi chak zedid' wzej' le' dii yoblə diika' ba wniakz' le' daa nezid' waklenan le'.

² Li wsak' bi wzenagle che ben' malka', ben'ka' nazə chonan byen wchogtekzə kwerp chechona' sho'cho sen daa le circuncisión.

³ La' cho'yen'lan nakcho dowalj ben'ka' yoo sen, cho' choe'la'ocho Chioza' daa yoo Espíritu che'na' loo yichjlall'do'chona' na' chiba chizakicho daa nakcho Cristo Jesús'a' txen. Na' bi noncho lez daa goni kwerp chechoni gaklenan gakcho ben' wen lao Chioza'.

⁴ Nia' ka' la'kzi de dii zan dii gak wxenilallaa che kwin' daa gonan ka ile'shii Chioza' nad'. Shi no chakzi de dii gak wxenilallee che kwine' daa gonan ka ile'shii Chioza'ne', ¿alechlin nad'?

⁵ Ka gokid' xon' lla, wloogake' kwerp cha'ni sen daa le circuncisión. Nak' ben' Israel, na' golj' lo dia che dii Benjamína', na' nak' dowalj ben' hebreo ka xaxna'ka', na' bsedyenaa ley chento'na' na' bzenag' cheyin, na' benlen' fariseoka' txen.

⁶ Daa le wzechga' wneyi ley che Chioza', axt gokid' chon' ka cheeni Chioza' daa bchi' bsakaa ben'ka' chonlilall'gake' Jesús'a'. Na' ben' kon ka na leya', na' aga no gok ina bi ben' ka nan.

⁷ Kana'n gokid' le zak'chgayi yog' diika', per naa, daa ba nonlilallaa Crístona', chakbe'id' bibi zak'gakan.

⁸ Na' dii li nezid' bibi de dii zak'chi ka daa ba nombia' Cristo Jesúsza', beena' nak Xan'. Na' daa le chakidee, bich nxenilallaa yog' diika' gokid' le zak'chga, san ba nongaka'n ka beb kwenche gombia'ch' Crístona'

⁹ na' gakee txen. Aga daa chon' daa na leyan' nak' ben' li ben' shao' lao Chioza', san daa nonlilallaa Crístonan', la' ben'ka' chonlilall'gake' Crístona', Chioza' chiyone' legake' ben' li ben' shao'.

¹⁰ Cheenid' gombia' Crístona' na' yel' wak che'na' ka daa bli'e kana' bibane' ladj ben' wetka', na' cheenid' izanid' kwin' gak cha' ka gok che' daa wdie' yel' zak'zi'ka' na' wite'.

¹¹ Na' ka', non' lez idolaa yisban Chioza' nad' ladj ben' wetka'.

¹² Bi nia' ba nombiane' kwaslol wa ba chon' kwaslol ka chazlallee. Per ni chon' ka dii le kwenche gak gona'n, la' ni che lennan' gox wñab Cristo Jesúsza' nad'.

¹³ Le' ben' bish' na' le' ben' zan', bi nia' ba chon' kwaslol ka chazlallee. Per de to dii chon', bich zia' wñeyi che diika' ba wde, san chon' to dii byen kwenche idolid' dii wenna' zi' za'.

¹⁴ Ni chon' ka dii le kwenche yillin' gana' ikaa daa gon Chioza' nad'. La' ni cheyinnan' gox wñabe' nad' kwenche nak' Crístona' txen.

¹⁵ Na' kan' chiyal' secho wñeyi yog'lolcho, cho' ba nakchacho chonlilall'chone'. Na' shi bi zelen wñeyi Chioza'kzə wzajniile'n le'.

¹⁶ Na' daa lialote chiyal' soatezi soacho goncho kon ka ba bzajni Chioza' cho'.

¹⁷ Le' ben' bish' na' le' ben' zan', li wsa'to chele ka nsa' cha', na' ka nsa' che ben'ka' chon kon ka ba bliinto' le' gonle.

¹⁸ Zan shii ba wnia' le', na' naa axt chakyeshid' nia' le' dga sto shii, zan ben' chongake' ka bibi zakii daa wit Crístona' lee yag cruza' daa bi nsa' chegake' wen.

¹⁹ Wlin lla kwiayi' ben'ki daa choe'la'ogake' toz daa chñab beli chen che'ka', na' chep cha'lall'gake' cheyi daa chongake' lwaayi dii nan yido'gakile'. Kon lillinzi daa de yellioni zegake' wñeyi.

²⁰ San cho', yabanan' nak lallcho. Na' nan' ziza' Xancho Jesucrístonan', beena' chbezcho yisle' cho' kwenche bi kwiayi'cho.

²¹ Len' yishee kwerp chechoki, diiki gooll' iteb, kwenche yiyakan ka kwerp che'na' daa le zakii. Na' gone'n kon yel' wak che'na' daa chñabia'lene' lao yog'lolte dii de.

4

¹ Le' ben' bish'dawaa na' le' ben' zandawaa, le chakid' le', na' chzelall'chgaid' ile'id' le', na' chiba chizakid' daa nonlilall'le Crístona', na' ni chele le' de to dii yizi'a banez. Li soachech gonlilall'le Xanchona'.

² Chat'yoid' Evódiana' len Síntiquena' yizoagake' wen daa nakgake' Xanchona' txen.

³ Na' li' nako' nad' txen do yichj do lalloo choncho xshin Chioza', chat'yoid' li', gaklengacho' ben' zanchoki. La' le ba bllaglogaken' goklengake' nad' be'nto' dill' wen dill' kob che Jesucrístonan', len Cleméntena' na' ben'ka' sto benlench nad' xshin Chioza'. Ba da' lie'ka' lee libr che Chioza' gana' da' le ben'ka' napgake' yel' mban zejli kanj.

⁴ Li yiba yizaki toshiizi daa nakle Xancho Crístona' txen. Na' sto shii nia' le': ¡li yiba yizaki!

⁵ Li wsa' chele xochi kwenche yog' ben' gakbe'gakile' nakle ben' wen. Ba zoa gao yiyed Xanchona'.

⁶ Bi kwekzə yichjle bittez dii chak chele, san li we'llwill Chioza' na' li gonan lall' nee, na' li wi'e yel' choxken.

⁷ Na' gone' ka soale mbalaz axt kono shajniikzi biche zoale ka'. Na' yel' zoa mbalaza' wsol wñitan dii zeda' de loo yichjlall'do'leka' daa nakle Cristo Jesúsza' txen.

⁸ Na' le' ben' bish' na' le' ben' zan', daa zeelote naa, li se wneyi cheyi daa nak dii li, che yog'lo_lte dii chido_l' gapcho balaan, che yog'lo_l daa nak dii li dii shao', che yog'lo_l dii bibi dii mal nsa'n, che yog' dii wenka' chon ka yibaicho, na' che yog'lo_l dii zeyi cheyin nakan wen. Li se wneyi che yog'lo_l diiki nak wen, diiki chido_l' we'cho xtiliin.

⁹ Li gon daa ba bli' bsedid' le' na' daa benile wnia', na' daa ble'ile chon'. Lennan' li gon, na' Chios, beena' chon ka soacho mbalaz, soalene' le'.

¹⁰ Chiba chizakchgaid' lao Xancho Jesucristona' daa bachga chizele wneyi cha' dii yoblə. Bi nia' ba go_l-lall'le nad', san bi got' xlatjinnan' gaklentole nad'.

¹¹ Aga daa chyallj chchinida'n nia' ka', la' ba nzedid' gon' banez ka'k' dii de cha'.

¹² Ba nezid' bi daa ne' soe' lo yel' yesh', na' lekzka' ba nezid' bi daa ne' soe' lo yel' wnia'. Ba nzedid' gon' banez bittez dii chak cha', shi nelj nlla'id' wa shi chbi_l chdon', shi dechga daa chyallj chchinid' wa shi shlas bibi dekzə.

¹³ Chzoid' yog'lo_lte dii chtil' daa chaklen Crístona' nad'.

¹⁴ Per le wen benle daa goklenle nad' lo dii lalljki chtil'.

¹⁵ Na' nezczile kana' bizaa Macedóniana' na' wzoloa' cho'a dill' wen dill' kob che Crístona', totgui le' lle'le Filipoza' benle daa byalljid' kwenche ji'a cho'a xtill' Chioza'. La' ni to ben'ka' ba nonlilall' Crístona' yellka' sto bi goklengake' nad'.

¹⁶ Na' kana' wzoa' yell Tesalónicana', zan shii bsel'le dii byalljid'.

¹⁷ Aga inacho chyilj' bi gonle nad', san cheenlid' gat'ch yel' shao' chele yabana'.

¹⁸ Epafrodítóni ba bene' nad' daa bsel'lenlene', na' naa ba nap' yog'te daa chyalljid' axt ba chichoonlan. Na' chibayi Chioza' daa bsel'len, ka chibaile' diika' chzani ben' choe'gake'ne', diika' chla'ile' zix sia kat' chzeygake'n lawe'na'.

¹⁹ Chios cha'na', beena' nap' yog'lo_lte dii wen dii shao'ka', gone' le' yog'lo_l daa chyalljile daa nakle Cristo Jesús'a' txen.

²⁰ Toshiizi chiya_l' koocho Xacho Chioza' balaan. Kan' nakan.

²¹ Li wwapsha chiox yog'lo_l ben'ka' nak lall' na' Chioza' daa nongake' Cristo Jesús'a' txen. Na' lekzka' ben' bish'choki zoalen nad' ni, chwapgake' le' chiox.

²² Na' yog'lo_lte ben'ka' nak lall' na' Chioza' ni chwapgake' le' chiox, na' ben'ka' chon xshin ben' wnabia' Césara', leyen'gake' chwapgake' le' chiox.

²³ Xancho Jesucristona' soalenshgue' le' na' gaklene' yog'lo_ltele. Kan' gakan.

Kart daa bzej Páblona' na' bseleen lao ben'ka' nonlilall' Jesucrístona' yell Colósaza'

¹ Nad' Pablo nak' postl che Jesucrístona' kon ka goklall' Chioza'. Na' len ben' bish'cho Timotewi

² chwapnto' le' chiox, ka le nakle lall' na' Chioza', le' zoale yell Colósaza', na' nakle bish' ljwellnto' daa nonlilall'le Crístona' do yichj do lall'le. Xacho Chioza' len Xancho Jesucrístona' gaklenshgagake' le' na' wzoagake' le' mbalaz.

³ Toshiizi ka chñabnto' chele, choe'nto' Chioza' yel' choxken, beena' nak Xa Xancho Jesucrístona'.

⁴ La' ba beninto' dill' ba nonlilall'le Cristo Jesúsza' na' ba chakile yog'lol ben'ka' nak lall' na' Chioza'.

⁵ Ba nsa' chele ka' daa nonle lez lljazoale yabana' gana' zoa Chioza'. Na' wzolo benlen lez ka wzolo bzenagle dill' wen dill' kob che Crístona' daa nak dill' li che Chioza'.

⁶ Na' dill' wen dill' kobi daa ba bzenagle ba bliljan doxen yell-lioni na' ba chon xshinin loo yichjlall'do' ben', kon ka benan loo yichjlall'do'lena' ka benilen na' wyajniile nan dii li Chioza' chakile' cho'.

⁷ Dgan blii Epáfraza' le', beena' chonlene' neto' xshin Crístona' na' le chakinto'ne', na' zoatezi zoe' chone' xshin Crístona' ladjlena'.

⁸ Na' Epáfraza' wne' neto' ka ba chaki ljwell-le daa zoa Espíritu che Chioza' loo yichjlall'do'leka'.

⁹ Na' daan, ka wnezinto' ka ba chonle, toshiizi chñabinto' Chioza' gaklenche' le'. Na' chñabinto'ne' gone' le' do ka nak yel' sin' che'na' na' yel' chajni che'na' kwenche shajniile kwaslol daa chaklallee gonle,

¹⁰ na' gak wsa' chele lega ben' nonlilall' Xanchona', na' toshiizi gonle daa chazlallee, na' gak gonle yog'lolte daa nak wen, na' zejch gombia'chle Chioza',

¹¹ na' gakchachle kon yel' wak che'na' daa zeelo nak yel' wak choo yel' wak xen kwenche ka' gaple yel' chxenlall' na' so sakile lao bitteza dii chak chele, na' yibaile

¹² we'tezi we'le Xacho Chioza' yel' choxken. La' len' bene' kwenche lljazoalenle yog' ben'ka' nak lall' nee yabana' gana' chñabi'e, gana' de beeni' che'na'.

¹³ Chioza' bibeje' cho' lo yel' chola' gana' chñabia' dii xiwaa na' ba bizoe' cho' lo na' Xiine'na', beena' le chakile', kwenche inabi'e cho'.

¹⁴ La' len' bisle' cho' lao yel' zak'zi'na' chidol'cho daa blalj xchene'na' wite' ni checho kwenche biyakxen saaxya chechoka'.

¹⁵ Crístona' bli'e ka nak Xe Chioza', beena' kono chle'i, na' Crístona' ba chñabia'kze' kana' zi' xe silte yog'lol dii de.

¹⁶ La' len' bxe bsile' yog'lolte dii de: diika' de yabana' na' diika' de yell-lioni. Bene' dii chle'icho na' bentie' dii bi chle'icho, ka no anjlka' na' len anjlka' biyak dii xiw' diika' chñabia' lo yell-lioni. Bene' yog'lolte dii de, na' bene'n kwenche sho'e balaan.

¹⁷ Ba zoakz Crístona' kana' zi' xe sil yog'lolte dii de, na' le' chone' ka chongakan daa blie' bia' gongakan.

¹⁸ Na' len' chñabi'e cho' nakcho lall' nee, daa nakchone' txen. Len' bxie' yel' mban daa nak zejli kani daa nake' ben' nech ben' biban toshiizi ladj ben' wet'ka'. Daan, nake' liizelozi ben' choo ben' xen na' chñabi'e lao yog'lolte dii de.

¹⁹ La' Chioza' wyazlallee gap Crístona' doxen yel' wñabia', yel' wak na' yog' ka diika' nape',

²⁰ na' bene' ka yog'lolte dii bxe bsile' yabana' len yell-lioni bizoalengakan le' wen daa wit Crístona', blalj xchene'na' lee yag cruza'.

21 Na' le', kanan' nlaala'ole Chioza' ni che dii malka' chonle na' gokzi' gokzbanilene'.

22 San naa, ba bene' kwenche bizoalene' wen daa bselee Crístona' wite' lee yag cruza' kwenche gakle ben' nxi nyech, ben' bibi nda' nchen na' ben' bibi xtolin de lawe'na'.

23 Per chonan byen toshiizi soachehle gonlilall'le Crístona', beena' ba wyajle'le che', na' bi gakchoplall'le cheyi daa benle lez gaki chele ka bzenagle dill' wen dill' kob che'na'. Na' dga ba benile, ba choe'gake'n dill' doxen yell-lioni, na' nad' Pablo, chaklen' cho'an dill'.

24 Na' naa chiba chizakid' daa chllagloa' yog' yel' zak'zi'ki ni chele. La' daa chak cha' ki, chen chle'id' ka yel' zak'zi'ka' ben ble'i Crístona' ni checho, cho' ba nonlilall'chone' na' zaklebicho ka kwerp che'na'.

25 Chioza' bzoe' nad' gak lo na' gaklen' le' ba chonlilall'lene' na' wliid' le' kwaslol cho'a xtilleena'.

26 Kani'teyi kono wnezi daa wlo'e xnezin gone', per naa ba bliile'n ben'ka' nak lall' nee.

27 Chioza' chaklallee inezi ben'ka' nak lall' nee dga kono wnezi kana', na' nakan to dii zakii nleb nan Crístona' zoalene' le' bi nakle ben' Israel, le' chonlilall'lene', na' nonle lez lljazoalene Chioza' gana' de balaan xen che'na'.

28 Neto' chyixje'into' ben' xtil' Crístona', na' chat'yointo' yog' ben' wzenaggake'n. Na' chchinnto' do ka nak yel' sin'na' daa ba ngwee neto' ka chli' chsedinto' legake' kwenche yog' ben'ka' gak Crístona' txen yiyakgake' kwaslol ka cheeni Chioza'.

29 Daan, choe'l-lalaa chyixji'a cho'a xtilleena' kon ga zeelo chizoid', na' Crístona' chaklene' nad' kon yel' wak che'na'.

2

1 Cheenid' inezile' dii xen dii chen chle'id' ni chele na' ni che ben' bish'choka' lle' Laodiceana', na' ni che yog'lol ben' bish'choka' bin' gombia' nad',

2 kwenche yog'le wtip' lall'le na' gakle toz gaki ljwell-le, na' shajniile kwaslol daa wloo Chioza' xnezin daa kono wnezi kani'yi. Na' lennan' daa bidyen Crístona',

3 beena' blii cho' doxen ka nak yel' sin' na' yel' chajni che Chioza', diika' nak dii zakii nleb.

4 Nia' le' ka' kwenche kono siye' le' we'lenze' le' dill' xochi na' gakile nakan dill' li.

5 La'kzi bi zoalen' le', chi' yichjkz' le' na' chiba chizakid' daa nezid' nsa' chele wen na' zoachehle chonlilall'le Crístona'.

6 Na' daa ba nonle Jesucristona' Xanle, chiyal' wsa' chele lega ben' ba nake'ne' txen.

7 Ka zoacheh to yag dii ba nde loinna' zitj, ka'kzan le', li soacheh gonlilall'le Crístona', kon ka ba bli' bsedinto' le', na' toshiizi li we' Chioza' yel' choxken.

8 Li wsak', bi we'zle latj no siye' le' kon yel' sin' daa chaljlall' ben' yell-lioni daa bibi zakii. La' aga xtil' Crístonan' chli' chsedgakile' san che diika' chnabia' lo yell-lionin.

9 Crístona', beena' golje' goke' ben' de beli chen, nape' doxen yel' wñabia', yel' wak na' yog' ka diika' nap Chioza'.

10 Na' le', daa nakle Crístona' txen, yel' wak che'na' ba chonan llin lo yel' mban chelena', la' Crístona' napche' yel' wñabia' na' yel' wak aga ka yog' anjlka' wa dii xiw'ka' chnabia'.

11 Na' lekzka' daa naklene' txen wak inacho yoo to sen loo yichjlall'do'lena' daa chli'n nakle lall' na' Chioza', per bi nakan ka senna' daa chgoo ben' kwerp che'ka' daa le circuncisión, san senna' chgoo Crístona' nakan daa chikobe' yichjlall'do'chona' kwenche dii mala' daa chzelalii beli chenna' bich inabia'n cho'.

12 Ka wchoale nisa' wak inacho witlenle Crístona', na' bgash'lenlene' ka bgashee, na' lekzka' bibanle ka bibane' ladj ben' wetka' daa wyajle'le Chioza' bisbane' Crístona' kon yel' wak che'na'.

13 Na' le', gokle ka ben' net lao Chioza' ni che saaxya cheleka' daa bin' choonlall'le daa cheeni beli chen chelena'. San naa, Chioza' ba bene' to yel' mban kob chele daa nakle Crístona' txen, na' bizi'xene' yog' saaxya cheleka'.

14 Chioza' bikwase' daa wdao xya checho, na' bsol bnite'n kana' wda' Jesucristona' lee yag cruza'.

15 Na' bikwase' yel' wak che dii xiw'ka', diika' chnabia' ben' yell-lioki, kana' wit Cristona' lee yag cruza'. Na' daa bli'e bene' legakan gan, bsi'e legakan yel' zto' lao lkwe' ben'.

16 Daan, bi wzenagle che ben'ka' nagake' bi gak yeej gaole bittez yel' wao, wa nagake' chonan byen gonle lnika', na' koole balaan llana' chize beo' cheena', na' gombaanle lla sabdka'.

17 Yog'lol diiki nakan daa wzajniin cho' lat' che daa zi' gon Chioza' na' benan llin kana' zi' wselee Cristona', na' naa daa bide' bich chongakan llin.

18 Bi we'le latj no siye' le' kwenche bi wnitle daa ba nonle lez ikaale. Bi wzenagle che ben'ka' chonzə ka le chzexj yichjin lao Chioza', na' choe'la'ogake' anjlka', na' nazgake' chle'dogakile' na' chep cha'lall'lengake' daa chyiljall'zgake'.

19 Ben'ka' chon ka' bi nakgake' Cristona' txen, beena' zaklebi yichjchona' daa chnabi'e cho' nonlilall'chone'. Na' cho' nakchone' txen, chakchacho ka cheeni Chioza', ka chak che tkwen wej kwerp chechoni ndil nllagan bechj bnia'ka' nox' ljwellin kwenche ka' chgolgakan txen.

20 Daa ba nakcho Cristona' txen daa wite' lee yag cruza', wak inacho ba netcho lao diika' chyiljall' ben' yell-lioni na' bich chiya' inabia'n cho'. Na' zberache ni chonzle txen diika' chyiljall' ben' yell-lioni,

21 kachaka' daa nagake': "Bi wchino' dga, bi gawo' dga, na' bi goxoo dga"?

22 Yog'lol diiki chwal' ben' yell-lioni nakchozgakan dii chibill chido na' dii chde cheyin ka zej chchinchogakan.

23 Dii li, diika' nagake' chontekzgakan ka dii le zakii, la' kat' chongake'n chontekzgake' ka ben' le chapshii daa nak che Chios, na' ka ben' le chzexj yichjin lao Chioza', na' ka ben' le chdezi' beli chen cheyin, per yog' diika' chongake' bi gak yikwasgakan daa chibayi beli chenna'.

3

1 Daa ba nakle txen Cristona' na' nakle ka ben' bibanlene' txen ka bibane' ladj ben' wetka', chiya' kwe' yichjle cheyi daa nak che yabana', gana' llia Cristona' shlaa de shli che Chioza'.

2 Li se wneyi daa nak che yabana', na' bich kooz yichjle daa nak che yell-lioni.

3 La' ba nakle ka ben' ba wit daa nakle Cristona' txen, na' yel' mban chelena' ba nakan toz kon Cristona' lao Chioza'.

4 Na' ka yiyed Cristona', beena' none' le' yel' mban daa nak zejli kani, lekzka' sho'lenlene' balaan xen daa chidolee.

5 Daan, chiya' kwej yichjle yog'lol dii mala' daa chiba chizaki beli chen chelena': bi inelenzle xiin xool ben' wa xiin xyo ben', bi gonle bichla dii zban, bich we'le cho'a xbayi beli chen chelena', bich sa'lall'zle gonle dii mala', ni bi selall'le bi gat' kwe' chele. La' beena' chzelall' gat' kwe'ile' dii xen, toz kan chonlene' beena' choe'la'o daa nak yaj yag.

6 Chioza' wsak'zi'e ben'ka' chon diika' daa bi chzenaggake' che'.

7 Na' le', lekzka' benle diika' kana' bin' wzenagle che Chioza'.

8 Per naa, chiya' kwej yichjle yog'lol diiki: yel' chllaa chlok, yel' wen dii mal, yel' chyilj chzan xtill' ben', na' yel' chbell chne ka nla' ka nte.

9 Bich siye' ljwell-le, la' ba wlej yichjle yel' mban gol chelena' na' bich gonle dii malka' benle kana'.

10 Ba biyakle ben' kob, na' Chios, beena' bxe bsil le', chone' ka gombia'chlene' na' gakchle dowalj ka cheenile'.

11 Aga bi zakii shi nakcho ben' Israel wa shi bi nakcho, shi yoocho sen daa le circuncisión wa shi bi yoochon, shi nakcho ben' nsed wa ben' bi nsed, shi nakcho ben'

ndoo lla yel chone' xshin ben' wa nakcho ben' chon xshinkzin. Daa lliyaloten, gakcho Crístona' txen, la' nottezə nakcho lekzen' zoalene' cho'.

¹² Chioza' le chakile' le' na' ba wleje' le' kwenche gakle lall' nee. Na' daan, chiya' yiyesh'lallile ben' na' gonile legake' wen, na' bi gakle ben' cha'sib, san gakle ben' gaxjall', na' gaple yel' chxenlall'.

¹³ Chiya' gonle banez ljwell-le, na' chiya' si'xen che ljwell-le shi no bi chon chele. Ka ben Crístona' wxi'xene' chele, lekzka' le' chiya' si'xenle che ben'.

¹⁴ Na' daa lliyalote chiya' gaki ljwell-le, la' shi chaki ljwell-le, lennan' gonan ka gonle yog' diiki.

¹⁵ Li we' latj inabia' yel' mbalaz che Crístona' loo yichjall'do'lena', la' kwenche soalen ljwell-le mbalazan ba gox wñabe' le' gakle toz. Na' tlizi chiya' we'lene' yel' choxken.

¹⁶ Li kooshao' do ka nak xtill' Crístona' loo yichjall'do'lena'. Li wli' wsedi ljwell-le na' li wtip lall' ljwell-le, li wchin do ka nak yel' sin'na' daa ba bene' le'. Li gol' no salmo, no himno, na' bichlə daa na Espíritu che Chioza' gol'-le, na' li we' Chioza' yel' choxken ka gol'-le.

¹⁷ Na' yog'lol' daa gonle wa daa inale, chiya' gonlen lega ben' nak Xancho Jesúsza' txen na' we'le Xacho Chioza' yel' choxken daa ba nonlilall'le Jesucrístona'.

¹⁸ Le' noolə, li wzenag che ben' chelena', la' kan' chiya' gonle daa ba nxenilall'le Xanchona'.

¹⁹ Na' le' ben' byo, li gaki xool-lena' na' bi gonile legake' zid' zña.

²⁰ Na' le' bi'do', li wzenag yog'lol' daa na xaxña'leka', la' kan' chazlall' Xanchona'.

²¹ Na' le' chisgol chischoole, bi wsheshlenle xiñleka' kontele, kwenche bi gakyesh'gakib'.

²² Na' le' ndoo lla yel-le chonle xshin ben', li wzoa dill', li gon yog'lol' daa na ben'ka' nak xanle lo yell-lioni. Aga kat'ka' chwiazgake' gonle ka chilali kwenche ile'shi'gakile' le', san do yichj do lall'le li gonan daa ba chall chlleble Xancho Crístona'.

²³ Yog'lol' daa gonle, li gonan do yichj do lall'le na' li gaktezi xshin Xancho Crístonan' chonle na' aga che ben' yell-lion.

²⁴ La' nezkzile Xancho Crístona', beena' nak dowalj Xanle, gone' ka yizi'le banez che dii wenna' chonle.

²⁵ San beena' chon mal, lekze' ikee laxji dii mala' chone', nottezə nake'.

4

¹ Le' nzi'le ben'ka' chon xshinlena', li gongakile' wen. Li lljadini lekzka' le' zoa to Xanle yabana'.

² Li we'l-lall' we'lwill-le Chioza', na' li se kwas we'lwill-lene' na' we'lene' yel' choxken.

³ Na' kat' we'lwill-lene', inabgachile'ne' gaklene' neto' kwenche wsaljche' xneznto' llje'chnto' xtill' Crístona' daa kono wñezi kana', la' ni cheyinnan' dia' lillyani.

⁴ Li inabi Chioza' gaklene' nad' kwenche gak wi'a dill' kwaslol', ka chiya' wi'an.

⁵ Li wsak' li gon wen ladj ben'ka' bi nombia' Crístona', la' naayen'nan de latj wli'le non nakle txen.

⁶ Dill'ka' choe'le chiya' gakan sia mbalaz toshiizi, na' lekzka' gak yilliile xochi xtill' ben' kat' no bi inabi le'.

⁷ Ben' bish'cho Tíquiconi, beeni le chakicho, we'lene' le' dill' ka nak yog'lol' diika' chak cha'. Len' do yichj do lallee chonlene' nad' xshin Xancho Crístona'.

⁸ Daan, chselaaane' laolena' kwenche wi'e dill' nakan chak chento' na' wtipe' lall'le.

⁹ Na' lekzka' ben' wlall' chele Onésimoni ziza'lene'ne', beeni le chakinto' na' nake' dowalj bish' ljwellcho. Legake' we'gake' dill' che yog'lol' daa chak cha' ni.

¹⁰ Aristárconi, beeni nak' txen dento' lillyani, chwape' le' chiox; na' lekzka' Márcona', ben' bish' Bernabéna'. Ba wniakz' le' shi yidwia Márcona' le', li gonshaile' wen.

¹¹ Ka'kzə Jesúzi, beeni che'gake' Justo, chwape' le' chiox. Ladj yog' beṅ' Israelka' nonlilall' Crístona', beṅ'kichgan chaklengake' nad' chonnto' xshin Chioza', na' le ba btipgake' lallaa.

¹² Beṅ' wlall chele, Epáfrazi, lekzka' chwape' le' chiox. Nake' to beṅ' chon xshin Crístona', na' toshiizi choe'lwille' Chioza' ni chele kwenche gakchale lo xneze'na', na' soachechele we'l-lall'le gonle ka cheeni Chioza'.

¹³ Neziid' ka wneyi nlebzie' chele na' che beṅ'ka' lle' yell Laodicéana' na' yell Hierápoliza'.

¹⁴ Lúcazi, beeni chon rmech, beeni le chakid', chwape' le' chiox, na' lekzka' Démazi.

¹⁵ Li wwap chiox bish' ljwellchoka' lle' yell Laodicéana', na' lekzka' Nínfana' na' beṅ'ka' chdop chllag lille'na' choe'la'ogake' Crístona'.

¹⁶ Ka yiyoll wlable yishi bzej', li wselaan lao beṅ'ka' nonlilall' Crístona' yell Laodicéana' kwenche lekzka' lengake' wlabgake'n, na' legake' gonngake' le' yisha' daa bselaa lawe'ka' kwenche wlablen.

¹⁷ Li ye' Arquípona' gone' to dii byen gone' kwasloj daa ba non Chioza' lall' nee gone'.

¹⁸ Nad', Pablo, kwini chzej'* gani chwape' le' chiox. Li lljadini lillyan dia'. Chioza' gaklenshgue' le'.

* **4:18** Kwini chzej': Páblona' bchine' beṅ' bzej' dillaa bi'e, per kwine' bzej' to chop cho'a dill' gana' chiyoll yisha' kwenche gokbe'gakile' len' bseleen.

Kart nech daa bzej Páblona' na' bseleen lao ben'ka' nonlilall' Jesucrístona' yell Tesalónicaana'

¹ Nad' Pablo na' Silvánoni len Timotewi chwapnto' le' chiox, le' chdop chllagle choe'la'ole Jesucrístona' Tesalónicaana', le' nakle lall' na' Xacho Chioza' len Xancho Jesucrístona'. Chnabinto' legake' gonshgagake' ka gak wen chele, na' wzoagake' le' mbalaz.

² Toshiizi choe'nto' Chioza' yel' choxken che yog'lol-le kat' choe'lwillnto'ne'.

³ Toshiizi ka choe'lwillnto' Chioza', beena' nak Xacho, chjadininto' ka choe'l-lall'le chonle dii wenna' daa nonlilall'lene' na' chakile'ne', na' daa zoachechele nonle lez Xancho Jesucrístona'.

⁴ Na' le' ben' bish' na' le' ben' zan', le' nakle ben' chaki Chioza', nezinto' ba wleje' le'.

⁵ La' ka be'lennto' le' dill' wen dill' kob che Jesucrístona', aga de cho'a dill'zan be'lennto'n le', san kon yel' wak che Chioza' na' che Espíritu Sánto che'nan' be'nto' dill' do yichj do lall'nto'. Na' nezkzile ka wen bsa' chento' ladjlena' kwenche goklennto' le'.

⁶ Na' le' bsedle chonle ka neto' na' ka ben Xancho Jesucrístona', la' Espíritu Sántonan' bene' ka bibaile bleble Cho'a xtill Chioza' la'kzi dii zan yel' zak'zi'ka' ben ble'ile.

⁷ Na' daa bizo bizakile yel' zak'zi'ka', bliile ben'ka' nonlilall' Crístona' yellka' mbani Macedóniana' na' Acáyana' ka chiya' gongake'.

⁸ Na' daa benle ka', Cho'a xtill' Chioza' ba wislesan aga to Macedóniana'zə, ni aga to Acáyana'zə, san doxente. Na' lekzka' ba bengakile ka nonlilall'le Crístona', na' bi chonan byen we'nto' dill' chele.

⁹ La' kwingake' choe'gake' dill' ka wen benle bleble neto', na' bsanle bich be'la'ole lwaa lsak' diika' bi nak chios kwenche benlilall'le beena' nak dowalj Chios yaa Chios ban,

¹⁰ na' chbezle yiyetj Xiine' Jesúza' yabana', beena' bisbane' ladj ben' wetka'. Na' Jesúza' yisle' cho' lao yel' zak'zi'na' ziza' daa we' Chioza' ben'ka' bi bzenag che'.

2

¹ Le' ben' bish' na' le' ben' zan', nezkzile daa bidwianto' le' bi biddadznto'.

² Na' lekzka' nezile le wxak'zi'nto' yell Filípoza' na' biya dii wnagake' neto', per Chioza' goklene' neto' na' bi bllbnto' wdixje'into' le' dill' wen dill' kob che Jesucrístona' la'kzi biya dii btilnto'.

³ Na' ka wdixje'into'n le', do yichj do lall'nto' be'lennto' le' daa nak dill' li, na' kono wxiye'nto'.

⁴ La' Chioza' wleje' neto' na' bzoe' neto' we'nto' dill' wen dill' kob che'na'. Na' aga chonnto'n kwenche chazlall' beñaan, san kwenche chazlall' Chiozan', beena' nombia' yichjlall'do'nto'ni.

⁵ Nezkzile, na' Chioza' nez nle'ile', ni shlin bigan' we'la'o we' dill'nto' le' daa chzelall'nto' bi de chele.

⁶ Bi cheeninto' no koo neto' balaan, ni le' ni ben' yoblə. Daa naknto' postl che Crístona', zak' wnabinto' le' gonle daa chyallj chchininto' shel'ka', per bibi wnanto' le'.

⁷ San kana' wzoalennto' le' bennto' chele ka chon to noolə chap chwie' bi'do' che'ka' xochi.

⁸ Na' daa le chakinto' le', aga to daa be'lenznto' le' dill' wen dill' kob che Crístonan' bibainto', san lekzka' bennto' axt ga zeelo bizointo' goklennto' le'. La' le chakinto' le'.

⁹ Le' ben' bish' na' le' ben' zan', chjadinkzile ka bdezi' kwinnnto' shlak wzoalennto' le' kana' be'lennto' le' dill' wen dill' kob che Crístona'. Ka tella ka wal bennto' llinna' kwenche ni tole bi beninto' zed.

10 Chioza' nez nle'ile', na' lekzka' le' nonlilall'le Crístona', nezile do yichj do lall'nto' wzoanto' ladjlena', na' bennto' daa nak shli na' bsa' chento' wen kwenche kono biz gon ine chento'.

11 Lekzka' nezile beninto' to tole ka choni to ben' xiine'ka'

12 daa btipnto' lall'le, na' bennto' le' yel' chxenlall', na' ba be'lennto' le' dill' ka chiya' wsa' chele, le' nonlilall'le Chioza', beena' gox le' kwenche inabi'e le' na' lljazoalenlene' gana' ile'ile ka nak balaan xen che'na'.

13 Na' lekzka' toshiizi choe'nto' Chioza' yel' choxken daa bleble cho'a xtilleena' be'lennto' le', la' gokbe'ile' nakan cho'a xtill' Chioza' na' aga cho'a xtill' ben' yell-lionizan. Na' dii li nakan cho'a xtill' Chioza' daa chisha'n yichjlall'do'chona', cho' chonlilall'chone'.

14 Na' le' ben' bish' na' le' ben' zan', kana' bsak'zi' ben' wlall' cheleka' le', gok chele ka gok che ben' Judeaka', ben'ka' chdop chllag choe'la'ogake' Crístona', la' ben' wlall' che'ka', ben' Israelka', bsak'zi'gake' legake' daa nonlilall'gake' Crístona'.

15 Lekzgaken' betgake' Xancho Jesúsza' na' betgake' dii ben'ka' wdixjee daa goll Chioza' legake' kani'yi, na' lekzka' blaggake' neto'. Bi chongake' ka chazlall' Chioza' na' chle'zbangakile' yog'lol ben',

16 la' chsej chllongake' chixje'into' ben'ka' bi nak ben' Israel cho'a xtill' Chioza' kwenche yilagake' na' bi kwiayi'gake'. Na' daa chongake' ka', chzanchgake' saaxya che'ka', na' daan, ba nakten ile'gakile' yel' zak'zi' wala' we' Chioza'.

17 Le' ben' bish' na' le' ben' zan', kana' bi wzoalennto' le' shloll, la'kzi bi ble'into' le', toshiizi jadininto' le' na' le' goklall'nto' yidwianto' le'.

18 Dii li goklall'nto' yidwianto' le', na' nad'yen' zan shii goklallaa yidwia' le', per Satanáza' bsej bllonan yid'.

19 Daa chonlilall'le Xancho Jesúsza' na' zoale chonle wen daa be'lento' le' xtilleena', nonnto' lez gonle ka yibainto' lawe'na' kat' yiyede'.

20 Dii li, chibainto' ka chonle na' zoanto' mbalaz ni chele.

3

1 Na' ka bich bi rson chele de, bi wzoanto' wen na' be'nto' dill' yigaannto' to neto'za Aténaza'

2 na' bsel'nto' ben' bish'cho Timotewa', beena' chonlene' neto' xshin Chioza' daa chyixje'nto' dill' wen dill' kob che Crístona'. Bsel'nto'ne' kwenche yidtype' lall'le na' gone' ka soachechle gonlilall'le Crístona',

3 kwenche ni tole bi gakklejile ni che yel' zak'zi'ka' chen chle'ile. La' nezkzile kan' lliabia' gak checho.

4 Na' kana' ni zoalennto' le', bsi'ninto' le' nan wle'icho yel' zak'zi'ka', na' nezile ba gok ka wnanto' le'.

5 Na' daa le' gokshejlallaa ni chele, bsel'aa Timotewa' kwenche inezid' shi ni nonlilall'kzle Jesucristona', la' gokid' dii xiwaa gonan ka gonchoplall'le na' gaktadz xshin Chioza' daa bennto' ladjlena'.

6 Per naa ba bila' Timotewi gani zoanto' na' cho'e dill' ni nonlilall'kzle Jesucristona' na' chaki ljwell-le. Lekzka' cho'e dill' toshiizi chjadinile neto' daa le' chakile neto', na' le' cheenile ile'ile neto'. Na' ka'kz neto', le' cheeninto' ile'into' le'.

7 Daan, le' ben' bish' na' le' ben' zan', la'kzi chiya dii chen chle'into', axt bixenlall'nto' ka wnezinto' ni zoachechle nonlilall'le Crístona'.

8 Daa ba nezinto' ni zoachechle chonlilall'le Xanchona', axt biyakshao'lall'nto'.

9 Na' bichkz bi dill' chillelinto' kwenche we'nto' Chioza' yel' choxken che yel' xabana' daa napnto' ni chele.

10 Ka tella ka wal chnabinto' Chioza' wi'e latj yidwianto' le' dii yoblə kwenche yiyoll yido wzajniinto' le' daa ni chyalljile shajniile kwenche gonlilall'chlene'.

11 Na' chñabid' Xacho Chioza' na' Xancho Jesúsza' gaklengake' neto' kwenche bibi wsej willonan yidwianto' le'.

12 Na' Xanchona' gonshgue' ka zizikli gakchi ljwell-le na' gakile yog'lol ben', ka chakinto' le'.

13 Na' gonshgue' ka gakchach yichjlall'do'lena' kwenche gake ben' nxi nyech na' bibi xtol'le gat' lao Chioza', beena' nak Xacho, kat'ka' Xancho Jesucristona' ziza'lene' ben'ka' nak lall' nee.

4

1 Le' ben' bish' na' le' ben' zan', kon yel' wñabia' che Xancho Jesucristona', chat'yointo' le' soatezi soale gonchle ka chazlall' Chioza', kon ka bsdinto' le' gonle na' kon ka ba chonkzle.

2 Ba nezkzile diika' wnanto' le' gonle, na' nakgakan diika' bllia Xancho Jesúsza' bia' goncho.

3 Chioza' cheenile' soale gonle daa chazlallee. Na' bi inelenzle xiin xool ben',

4 san to tole chiyal' gaple balaan xool-lena' lega ben' nak lall' na' Chioza',

5 na' bi' we'zle cho'a xbayi beli chen chelena', ka chon ben'ka' bin' gombia'gake' Chioza'.

6 Na' ni tole bi gonle'ile xool ljwell-le la' ba bsi'nkzinto' le' Xanchona' wsak'zi'e yog' ben'ka' chon ka'.

7 Chioza' aga gox wñabe' cho' kwenche goncho dii zbanki, san gox wñabe' cho' kwenche gakcho ben' nxi nyech.

8 Daan, beena' bi chzenague' diiki chli' chsedinto' aga chento'n bi chzenague', san che Chiozan', beena' bene' le' Espíritu Santo che'na'.

9 Na' ka nak cheyi daa chaki ljwellcho, bi chonan byen wzajni'chinto'n le', la' kwin Chioza' ba bsdile' le' gaki ljwell-le.

10 Na' chakile yog'lol ben'ka' nonlilall' Crístona', ben'ka' zoa doxente Macedóniana'. Na' chat'yointo' le' ben' bish' na' le' ben' zan', zizikchli gakchi ljwell-le.

11 Li gon to dii byen soalen ljwell-le wen, na' li se wñeyi che loo yoo lill-lena', na' li gon llin kon ni'a na'leka' ka ba wnakznto' le'

12 kwenche ben'ka' bi nonlilall' Crístona' inagake' le' wen nsa' chele, na' lekzka' bibi zed lljenle lill ben'.

13 Na' le' ben' bish' na' le' ben' zan', cheeninto' inezile nak gak che ben'ka' ba wit kwenche bi gakyeshile ka chakyeshii ben'ka' bi nongake' lez lljazoalengake' Chioza'.

14 Daa chajle'cho wit Jesúsza' na' bibane' ladj ben' wetka', lekzka' chajle'cho Chioza' yisbane' ben'ka' nonlilall'gake'ne' ka witgake'.

15 Na' daan, nanto' le' kon ka wna Xancho Jesúsza': Cho' ni mbancho kat' zizee, aga chon' yibialocho lao ben'ka' ba wit.

16 La' kwin Xancho Jesúsza' zizee yabana', na' inie' zillj gone' mandad yiban ben' wetka', na' anjla' chñabia' inie' na' yenicho kwell trompet che Chioza', na' ben'ka' benlilall' Crístona' yibangake' nech.

17 Na'tech, ka cho' ni mbancho, yigoyo Chioza' cho' yiyakchogake' txen ladj bejka' kwenche lljatil'cho Xanchona', na' soalenchone' zejli kaní.

18 Na' daan, li wtip lall' ljwell-le kon dill'ki.

5

1 Na' le' ben' bish' na' le' ben' zan', bi chyalljin wzejnto' le' inanto' bi lla bi goran' gak diiki.

2 La' ba nezkzile kwaslol llana' ziza' Xanchona' tokonganzi zizee, ka chon to wban kat' lljlane' wal'chel.

³ Kat'ka' beṅ' yell-liona' ine': "Asi ṅaa zoachgacho mbalaz. Bikzbi chak checho", kana'lan tokonganzi kwiayi'gake' na' aga wilalat'gake'. Gak chegake' ka chak che noola' tokonganṅə chzolo chaz bes che'na' kat' sane'.

⁴ San le' beṅ' bish' na' le' beṅ' zan', ba ṅezile diiki kwenche ki sha chel-lə chon llana' zizee tokonganṅə.

⁵ Yog'le ba nombia'le Chioza' ba chdale lo beeni' che'na', na' bich chdale lo yel choḷa' daa chzaklebi dii mala'.

⁶ Daan, li se kwas na' li gakto beṅ' nyeen nyeeniya na' bi gonle ka chon beṅ'ka' bi nombia'gake' Chioza'.

⁷ Beṅ'ka' chda lo yel choḷa' bi nombia'gake' Chioza', nakgake' ka beṅ' ches wa ka beṅ' chzoll chniti na' bi chakbe'gakile' bin chak.

⁸ Per cho', lo beeni'nan' chdacho. Daan, chiyal' gakcho beṅ' nyeen nyeeniya, na' gonlilall'chcho Chioza', na' gakicho yog'loḷ beṅ' na' goncho lez lljazoalencho Chioza'. Shi goncho yog' diika', na' gakcho ka to soldad beena' nyaz diika' chkweejan le' lo wdila'.

⁹ La' aga gox wṅab Chioza' cho' kwenche techo lo yel' zak'zi'na' zizan', san gox wṅabe' cho' kwenche gat' yel' mban checho zejli kaṅi daa wit Xancho Jesucristona'.

¹⁰ Wite' ni checho kwenche la'kzi shi ni mbancho wa shi ba witcho, lljazoalenchone'.

¹¹ Na' daan, li wtip lall' ljwell-le na' li gaklen ljwell-le soachechchle wzenagle che Chioza' kon ka ba chonkzle.

¹² Le' beṅ' bish' na' le' beṅ' zan', chṅabinto' le' gaple balaan beṅ'ka' chilali chongake' xshin Xanchona' ladjlena', beṅ'ka' ngoo lall' na' le' na' chli' chsedgakile' le' nakan chiyal' gonle.

¹³ Li gapgake' balaan na' li gaki legake' ni che llinna' daa chongake'. Na' li soalen ljwell-le mbalaz.

¹⁴ Lekzka' chat'yointo' le' beṅ' bish' na' le' beṅ' zan', li we'lensha beṅ' liaka' dill' kwenche gongake' llin. Na' li wtipsha lall' beṅ'ka' chidinji, na' li gaklen beṅ'ka' biṅ' gakcha lo xnez Chioza', na' li gap yel' chxenlall' che yog'loḷ beṅ'.

¹⁵ Wsak'gale ni tole bi yizi'zle wzon che beṅ' shi bi gone' chele, san li gon ka dii le gonle dii wenna', aga to ladjle na'zə, san kon yog'loḷte beṅ'.

¹⁶ Toshiizi li yibayi.

¹⁷ Li soatezi soa we'llwill-le Chioza'.

¹⁸ Li we' Chioza' yel' choxken lao bittezə dii chak, la' kan' cheenile' goncho cho' nonlilall'cho Cristo Jesúsza'.

¹⁹ Bi wsej wllonle daa cheeni Espíritu Sántona' gone'.

²⁰ Bi gonzile nakzi xtill' beena' ina: "Ki ba wna Chioza' nad'."

²¹ San li wsedyen'an shi dii li nakan daa goll Chioza' le' na' li ikaa dii wenna'.

²² Bi gonle txen bittez dii mal.

²³ Na' Chioza'kzə, beena' chzoe' cho' mbalaz, gone' ka yiyoll yido gake ka chazlallee. Na' gap wwie' do ka nakle kwenche bibi dol' naple kat' ziza' Xancho Jesucristona'.

²⁴ Chioza', beena' gox wṅabe' le', toshiizi chone' daa ba wne' gone', na' len' gone' dga.

²⁵ Na' le' beṅ' bish' na' le' beṅ' zan', li inabshayi Chioza' gaklene' neto'.

²⁶ Li wwapgach chiox yog'loḷ beṅ' bish'choka' na' beṅ' zanchoka' lega beṅ' chaki ljwellin daa nakle lall' na' Chioza'.

²⁷ Na' nia' le' kon yel' wṅabia' che Xanchona' wlabshale dga lao yog'loḷ beṅ' bish'choka' na' beṅ' zanchoka'.

²⁸ Xancho Jesucristona' gaklensgue' le'.

Kart wchopi daa bzej Páblona' na' bseleen lao ben'ka' nonlilall' Jesucrístona' yell Tesalónicana'

¹ Nad' Pablo, na' Silvónoni len Timotewi chwapnto' le' chiox, ka le' chdop chllagle choe'la'ole Xacho Chioza' na' Xancho Jesucrístona' Tesalónicana'.

² Na' chnabinto' legake' gonshgagake' ka gak wen chele na' wzoagake' le' mbalaz.

³ Dii licha toshiizi chiyal' we'nto' Chioza' yel' choxken ni chele, le' ben' bish' na' le' ben' zan', daa zejch chonlilall'le Jesucrístona' na' daa to tole zejch chakile ben'.

⁴ Daan, choe'nto' xtill'le lao ben'ka' nonlilall' Crístona' to to gana' chdop chllaggake' choe'la'ogake' Chioza' ka nak daa zoachechle toshiizi nonlilall'le Crístona' la'kzi chen chle'ile yel' zak'zi'ka'.

⁵ Na' yog'lol dga chli'n ka wen ben Chioza' wleje' le' gake lall' nee, na' chli'n dii li nakle ben' chidoj' lljzoa gana' chnabi'e, la' ni cheyinnan' chzak'zi'le.

⁶ Na' Chioza', beena' chchoglo che ben' ka chiyal', wsak'zi'e ben'ka' chsak'zi'gake' le'.

⁷ Na' le' chzak'zi'le naa, Chioza' gone' ka soale mbalaz, na' ka'kz gone' chento' kat'ka' ziza' Xancho Jesús'a yabana' ladj bel' yi'na' kon anjl che'ka', ben'ka' nap yel' wak xen,

⁸ kwenche wsak'zi'e ben'ka' bi bembia'gake' Chioza' ni bi bzenaggake' dill' wen dill' kob che Xancho Jesús'a.

⁹ Ben'kin sakzi'gake' zejli kani na' bi yillingake' gana' chnabia' Xanchona' kon yel' wak choo yel' wak xen che'na'.

¹⁰ Ka' gak chegake' kat' yila' Xancho Jesucrístona' kwenche ben'ka' nak lall' nee koogake'ne' balaan na' yibachgayi yog' ben'ka' wyajle' che', na' lenle, daa wyajle'le xtilleena' be'lento' le'.

¹¹ Daan, toshiizi chnabnto' chele kwenche Chioza' ile'shiile' le' lega ben' gox wnabe', na' gaklene' le' kon yel' wak che'na' kwenche yiyoll gonle yog' dii wenna' ba yoo yichjle na' bichlæ dii wenka' cheenile' gonle daa nonlilall'lene'

¹² kwenche Xancho Jesús'a sho'e balaan ni che daa chonle, na' lekzka' kwee le' balaan. Na' Chios chechona' na' Xancho Jesucrístona' gaklengake' le' gak ka'.

2

¹ Na' naa, le' ben' bish' na' le' ben' zan', ka nak daa ziza' Xancho Jesucrístona' na' daa yidi'a yillagcho yiyakchone' txen, chnabinto' le'

² bi gakklejile ni bi illeble kat' yenile inagake' ba bila'læ Xanchona'. Axt inatelzgage': "Ki ba wna Chioza'", wa inazgage': "Ki wna Páblona'", wa, "Ki bene'n yish nan ba bila'læ Xanchona'."

³ Bi we'le latj no siye'zæ le' ka nak diiki. La' aga wiyedzie' shi ben'ka' chwiyi Chioza' bin' yizoshi'gake'ne', na' shi bin' ichej beena' nak ben' mal wal,* beena' ba nakten kwiayee.

⁴ Beenin gon kwine' liizelozi ben' choo ben' xen na' wsej willone' we'la'o ben' Chioza' wa bittezæ dii nonlilall'gake'. Na' lljchi'e loo yoodo' che Chioza' gon kwine' ka Chios.

⁵ ¿Abi chjadinile bshaljen' le' cheyi dga kana' zoalen' le'?

⁶ Naa ba nezile non ni nkwez beeni kwenche bi yobile' wli'lawe'.

⁷ Do ngash'zæ ba wzolokzæ chak dii mala' daa ba yoo xnezin gakæ. Stozæ chyallj ikwas beena' ni nzague'n kwenche wli'lawin.

⁸ Na'ch wli'lao ben' mal wala', na' wit Xancho Jesús'a'ne' kon bishbe che'na' na' wlliaeyene' ka ziza'lene' yel' chey cheeni' che'na'.

* 2:3 Beena' nak ben' mal wal: xtila' nagake' el hombre de pecado wa el hombre malvado. Bwia 1 Jn. 2:18.

⁹ Ka nak ben' mal wala', dii xiwaan gaklenen le' gone' biya yel' wak diika' gon ka yibani ben' kwenche siyee legake'.

¹⁰ Na' wchine' yog' de wxiye' kwenche siyee ben'ka' ba nakan kwiayi' daa bi gok-lall'gake' wlebgake' daa nak dii li kwenche yilagake'.

¹¹ Daan, Chioza'kzə cho'e latj shajle'gake' che de wxiye'ka',

¹² kwenche kwiayi' yog'lolte ben'ka' bi wyajle'gake' che daa nak dii li, san bibachgakile' daa nak dii mal.

¹³ Na' neto' naa, toshiizi chiya' we'nto' Chioza' yel' choxken ni chele, le' ben' bish' na' le' ben' zan', ben' chaki Chioza'. La' dii nechte Chioza' wleje' le' kwenche yilale bi kwiayi'le daa ba bixis biyib Espiritu Santo che'na' le' na' daa chajle'le dill' li che'na'.

¹⁴ Ni cheyi dgan, gox wñab Chioza' le' ka be'lennto' le' dill' wen dill' kob che'na', kwenche idol'le sho'lenle Xancho Jesucristona' balaan.

¹⁵ Na' le' ben' bish' na' le' ben' zan', li soachech na' li kooshao' diika' bli' bsedinto' le' ka be'lennto' le' dill' na' ka bzejnto' le'.

¹⁶ Na' kwin Xancho Jesucristona' na' Xacho Chioza', beena' ba gokile' cho' na' lo yel' ben' wen che'na' ba bene' cho' yel' chxenlall' zejli kani na' to dii wen dii shao' dii goncho lez,

¹⁷ wtipshgagake' lall'le na' wzoachechgake' le' kwenche toshiizi gonle wen na' we'le dill' wen dill' shao'.

3

¹ Dii zeelo nanto' le', ben' bish' na' le', ben' zan', li inabshayi Xanchona' chento' kwenche cho'a xtilleena' choe'lennto' ben' illiljan tolbe'zə na' wlebgake'n lega dii zakii, kon ka benle le',

² na' kwenche yisle' neto' lo ni'a na' ben' malka', ben'ka' chon dii bi yejni'alallii. La' aga yog' ben' chajle'gake' che Xanchona'.

³ Per nezicho Xanchona' chone' ka ne', na' gone' ka soachechchle na' gap wwie' le' lao dii mala'.

⁴ Na' nxenlall'nto' Xanchona' chaklene' le' chonle ka ba wnanto', na' toshiizi gonlen.

⁵ Na' Xanchona' gaklene' le' gakile' ben', ka chon Chioza' chakile' cho', na' so sakile gaple yel' chxenlall' lao yog' daa yen ile'ile ka ben Cristona'.

⁶ Le' ben' bish' na' le' ben' zan', kon yel' wñabia' che Xancho Jesucristona' nanto' le' bi gonle txen nottezə ben' bish'choka' chdaliazə, la' aga kan' bsedinto' le'.

⁷ La' nezczile ka chonnto', na' kan' chiya' gonle. Neto' biga wzoaznto' ka ben' lia ladjlena'.

⁸ Ni biga wdaoaznto' yel' wao che ben' na' bi wdixjnto'n, san ka tella ka wal bilal bizodinto' bennto' llinna' kwenche ni tole bi beninto' zed.

⁹ Na' dii licha, zak'kzə wñabnto' yel' goklen chelena', shel'ka', per bennto' llin kwenche ble'ile, na' kan' gonle.

¹⁰ Kana' zoalennto' le' wnanto': "Beena' bi cheenile' gone' llin, lekzka' bi gawe'."

¹¹ Na' ba beninto' bal-le kon chdale to ni to na', ni bi chonle llin, na' chlalltezi chele ga bi chiya'.

¹² Na' ben'ki chon ka', chñabinto' legake' kon yel' wñabia' che Xancho Jesucristona' bich tazgake' ka'z, san gongake' llin kwenche yeej gaogake'.

¹³ Na' le' naa ben' bish', na' le' ben' zan', bi lljxakile gonle dii wenna'.

¹⁴ Shi no bi chzoa dill' ka nanto' lee yishi, li wwia no beena' na' bi gonlene' txen kwenche yido'ile'.

¹⁵ Bi nia' gakzbanilene', san wzajniile'ne' ka ben' bish'le.

¹⁶ Na' kwin Xanchona', beena' chzoa cho' mbalaz, gone' ka soale mbalaz toshiizi bittezə dii chak chele. Xanchona' soalenshgue' yog'lolte.

¹⁷ Nad' Pablo, kwin' chzej'* to chop cho'a lee yishi chwap' le' chiox, kan' chzej' lee yog' yishka' chselaa laolena' kwenche inezile nad'kzan chselaan.

¹⁸ Xancho Jesucristona' gklenshgue' yog'loltele.

* **3:17** Kwin' chzej': Páblona' bchine' ben' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

Kart nech daa bzej Páblona' na' bseleen lao Timotewa'

¹ Nad' Pablo, nak' postl che Jesucristona' kwenche wi'a xtilleena', la' Chioza', beena' bisla cho' kwenche bi kwiayi'cho, len Cristo Jesúsza', beena' noncho lez gone' wen checho, bzoagake' nad'.

² Chzej' li', Timoteo, nako' ka dowalj bi' cha' daa nakcho txen chonlilall'cho Jesucristona'. Xacho Chioza' len Xancho Cristo Jesúsza' gaklenshgagake' li', na' yiyesh'lall'gakile' li', na' gongake' ka so' mbalaz.

³ Kana' ba zoa shaa Macedóniana', wñabid' li' yigaano' Éfesona' kwenche yoo ben'ka' chli' chsedi daa bi nak dii li' bi gongake' ka',

⁴ na' bi segake' wñeyi che dill' golka' wdiljlall' ben' na' che diika' ben dii xozxtoe'ka' daa bi chiyoll chido. La' dill'ka' chonan ka chakgued ben' na' bi chaklenan gombia'gake' daa cheeni Chioza' goncho daa nonlilall'chone'.

⁵ Ye'gako'ne' ka' kwenche gapgake' yel' chaki ka daa chalj loo yichjlall'do' beena' ba bixi biyech na' bibi de chao chdian le' daa nezile' chone' ka chazlall' Chioza' na' nonlilalleene' do lallee.

⁶ Balgake' lwaa segake' wñeyi cheyi diiki, ba lenzgake' choe'gake' dill' cheyi diika' bi zakii.

⁷ Cheenzgakile' gagake' ben' wli' wsedi ley che Chioza', per ni lekzgake' bi chajni'gakile' daa chli' chsedgakile' la'kzi nazgake' kayen'nan nakan.

⁸ Nezicho ley che Chioza' nakan wen, shi wchinchon ka chiyali.

⁹ La' nezicho aga ben Chioza' leya' ni che ben'ka' chon wen, san ni che ben'ka' chyishj xtilleena' len ben'ka' bi chzenag, ben'ka' bi chall chlleb Chioza', ben' saaxyaka', ben'ka' chiyit xaxna'yin, yog' ben'ka' nak wen xya,

¹⁰ ben'ka' chñelen xiin xool ben', ben'ka' nak ben' xej, ben'ka' chit' chde ben', ben'ka' chziye', ben'ka' axt choagake' Chioza' de taschiw kat' chziye'gake', na' nottez ben' bi chone' daa na cho'a xtil' Chioza'

¹¹ kon ka chzajni dill' wen dill' kob che'na' daa nak dii zakii nleeb. Na' Chioza', beena' chido! we'la'ocho, ba bene'n lall' na' wi'an dill'.

¹² Cho'a Xancho Cristo Jesúsza' yel' choxken chone' nad' wal, na' nñenlallee nad' wak gon xshine'na', na' bzoe' nad' gona'n.

¹³ La'kzi biya dii ben wñia' che', na' bchi' bsakaa ben'ka' benlilall'gake'ne' na' bshagdil' legake', Chioza' biyesh'lallile' nad' daa bi wñezid' bin chon' kana' bin' shajli'a che Jesúsza'.

¹⁴ Na' dii xen goklene' nad', bene' ka chonlilall'chee na' bene' nad' yel' chakina' daa nak' txen Cristo Jesúsza'.

¹⁵ Dillii nakan dii wñenlall'cho, na' yog'lol ben' chiyal' shajli'en: Cristo Jesúsza' bide' yell-lioni kwenche yisle' ben' saaxyaka', na' nad'yen' goklikz' ben' saaxya wal.

¹⁶ Per Chioza' biyesh'lallile' nad' kwenche wli' Jesucristona' do ka nak yel' chxenlall' xen che'na' na' ile'i ben'ka' zi' shajle' che' na' gapgake' yel' mban zejli kani.

¹⁷ Toshiizi shajla'oshga beena' chñabia' zejli kani, beena' biga lli'a te che', beena' zoakz la'kzi bi chle'ichone', na' sho'shgue' balaan. Zeelo len' nake' Chios. Kan' gakshgan.

¹⁸ Timoteo, xiindawaa, nia' li' chiyal' gono' ka wdixje'i ben'ka' li' daa goll Chioza' legake' cho' dii nechte, kwenche daa wnagake' cho' gaklenan li' gono' ga zeelo yizoilo' gono' xshin Chioza' daa nak lall' no'.

¹⁹ Toshiizi so' gonlilalloo Jesucristona' na' tlizi gono' wen kwenche bibi gao idian li' daa nezilo' chono' ka chazlallee. La' bal ben' dii shao'tekzə chongake' daa bi chiyal' gongake' na' bich chonlilall'gake'ne'.

²⁰ Ka gok che Himenewa' len Alejándrona', na' wñabid' Chioza' gagake' lall' na' Satanáza' kwenche wsedgake' bich bi gon inazgake' che Chioza'.

2

¹ Naa nia' li' daa lliälote gonle: chiyal' we'lwill-le Chioza' na' inabilene' daa chyallj chchinile na' daa chyallj chchini ben' yoblə, na' gat'yoile'ne' gaklene' yog'lolte ben', na' we'lene' yel' choxken ka nak daa chone' che yog'lol ben' yell-lioni.

² Chiyal' inabicho Chioza' gaklene' ben' wnabia'ka' na' yog'lolte ben' nak joschis, kwenche soacho mbalaz na' kono wsej wllon we'la'ocho Chioza' na' goncho daa cheenile'.

³ La' dgan nakan wen na' chazlalli Chiozan', beena' bisla cho' kwenche bi kwiayi'cho,

⁴ na' cheenile' yog'lolte ben' yell-lioki yilagake' na' gombia'gake' daa nak dii li.

⁵ La' toz Chiozan' zoa, na' toz beena' chizoa ben' yell-lioni wen kon Chioza', len' Cristo Jesúza',

⁶ beena' bzani kwine' wite' kwenche wdixje' xtol' yog'lol ben' yell-lioni. Na' dga gokə, gokan llana' bliia Chioza' bia', na' bli'e cheenile' yisle' cho'.

⁷ Na' kwenche inezi yog' ben' dga, bzoe' nad' nak' postl che' na' bene' lall' na' chyixji'a xtilleena'. Na' bene' lall' na' wli' wsedid' ben'ka' bi nak ben' Israel, kwenche shajle'gake' dill' li che'na'. Na' dga cho'a dill' nakan dii li, na' bi chziyaa.

⁸ Cheenid' yog'lol ben' byoka' we'lwillgake' Chioza' gattezə zoagake', na' chiyal' gakgake' ben' lall'do' nxi nyech, ben' bi yoo daa nak yel' chllaa yel' chlok na' yel' wishagdil' kat' wlis neeka' lawe'na' we'lwillgake'ne'.

⁹ Na' ka nak noolka', chiyal' wsak'gake' gawk xagake', na' bi tezgake' lawin yiy-iljall'gake' naklə yipaa yichje'ka', ni bi wchingake' no or wa lech' zakii inleeb.

¹⁰ San gonlagake' to dii byen seyi chegake' chongake' wen lega ben' choe'la'o Chios.

¹¹ Chiyal' kwe' noolka' llizə wzenaggake' che ben'ka' chli' chsedi cho'a xtil' Chioza' na' wzoagake' xtilleeka'.

¹² Bi cho'a latj wli' wsedzi noolka' ben' byoka', ni bi inabia'zgake' legake', san chiyal' kwe'gake' llizə wzenaggake'.

¹³ La' Chioza' bene' zigaate Adánna', na'techlə bene' Évana'.

¹⁴ Na' aga Adánna' wxiye' dii xiwaa, san noolan' wxiye'n na' bxope' lao saaxyana'.

¹⁵ Na' noolka' chzoa xiinin, bi tegake' lao yel' zi'na' shi toshiizi nxenilall'gake' Chioza', na' segake' wneyi gakkakile' ben', na' soagake' gongake' ka cheeni Chioza' lega ben' nyeen nyeeniyi.

3

¹ Dillii nakan dii wxenlall'cho: shi no cheeni koo lall' nee gap wwie' ben'ka' nonlilall' Crístona' na' wli' wsedile' legake', llin wen inleeban lliälalle gone'.

² To ben' ngoo loo nee chli' chsedile' ben', chiyal' gake' ben' zoa do yichj do lallee, ben' bibi cho'a xtillee de. Chiyal' soa toz xoolə, na' gake' ben' nsa' cheyin wen, na' gake' ben' nyeen nyeeniyi, na' ben' chidolee gap ben' le' balaan. Na' chiyal' yiyeshile ben' wi'e ga yigaane', na' gakte wli' wsedile' ben'.

³ Bi chiyal' gake' ben' weezo, ni bi gake' ben' wishagdil, ni bi selall'chgaile' mech, san gake' ben' wen, ben' gaxjall'.

⁴ Chiyal' gak kwee xnez xlatji dii chak loo yoo lille', na' gone' byen wzenag xiine'ka' che' na' soagakb' gongakb' daa nak wen.

⁵ La' shi to ben' bi chak kwee xnez xlatji dii chak loo yoo lille', ¿nakra gone' kwee xnezi che ben'ka' nxenilall' Chioza'?

⁶ To ben' shinzə wzolo chonlilallee Crístona' bi chiyal' gak lall' nee gap wwie' ben'ka' nonlilall' Crístona', kwenche ki gakze' ben' chep cha'lall' na' wchoglo Chioza' che' ka ba nchogloe' che dii xiwaa.

⁷ Lekzka' chiyal' seyi che' chone' wen lao ben'ka' bi nonlilall' Crístona' kwenche kono biz gon ina che' na' gonzə dii xiwaa gan wchixan le'.

⁸ Lekzka' ben'ka' gak lo na'gake' gaklengake' wwiagake' bin chyallj chchini ben'ka' nakgake' txen nonlill'gake' Crístona', chiyal' gaggake' ben' chidol' gap ben' legake' balaan, ben' chda do lallee, na' bi sollgakile', ni bi gakkzake' ben' wzalall'.

⁹ Chiyal' soachehgake' shajle'gake' dii li daa ba bzajni Chioza' cho' daa kono wnezi kana'. Na' chiyal' soagake' do yichj do lall'gake' na' bibi de gao idian yichjlall'do'eka' daa nezgakile' chongake' ka cheeni Chioza'.

¹⁰ Na' lekzka' kat' kwejle ben'ki, chiyal' wwiayen'le nak nsa' chegake'. Na' shi bibi de dii chao xya chegake', wak gak lo na'gake' wwiagake' bin chyallj chchini ben'ka' nakgake' txen nonlill'gake' Crístona'.

¹¹ Na' noolka' lekzka' chiyal' gaggake' ben' chidol' gap ben' legake' balaan, na' bi gaggake' ben' wichitj dill', san gaggake' ben' nsa' cheyin wen, na' gaggake' ben' gak wxenall'cho toshiizi gongake' wen.

¹² To ben' gak lo nee wwie' bin chyallj chchini ben'ka' nake' txen nonlill'gake' Crístona' chiyal' soa toz xoole', na' chiyal' gap wwie' xiine'ka' kwenche gongakb' wen, na' kwe' xnez xlatji dii chak loo yoo lille'.

¹³ Ben'ka' chak chgoogake' xnezi che diika' chyallj chchini ben'ka' nakgake' txen nonlill'gake' Crístona' chidol'gake' to balaan, na' soachgagake' mbalaz daa nonlilall'gake' Cristo Jesúza'.

¹⁴ La'kzi ba non' lez yobza yidwia' li, chzej' dga

¹⁵ kwenche shi bi chyobzid' yid', na' ba nezilo' nakan chiyal' soa ben'ka' nak xiin Chioza', la' cho' chdop chllagcho choe'la'ochone' nakcho xiin Chios yaa Chios banna'. Na' nak lo na'cho goncho ka gombia' ben' dill' li che'na'.

¹⁶ Dii li dga chzajniin cho' che Crístona' daa kono wnezi nakan dii zakii nleb, na' nan: Bide' golje' ka cho' ben' yell-lio, na' Espiritu che Chioza' bli'e nan nake' ben' li ben' shao'. Na' ble'i anjlka' le', na' wda ben' be'gake' cho'a xtilleena' lao ben' yell-lioki, na' benlilall'gake'ne'. Na' biyep'e yabana' gana' yo'e to balaan xen.

4

¹ Espiritu che Chioza' cho'e dill' kwaslol, ne' kat' ba zoa te che yell-lioni, bal ben'ka' ba nonlilall'gake' Crístona' bich gonlilall'gake'ne', na' wzenaggake' che dii xiw'ka' na' diika' chli' chsedi ben' chegakin.

² Na' wzenaggake' che ben' wxiye'ka', ben'ka' bichbi chao chdian legake' daa ba nlantekzgake' yel' wxiye'na'.

³ Na' chllongake' wshagna' ben', na' chllontegake' yeej gaogake' bal yel' wao la'kzi Chioza' wlo'e yel' waoka' kwenche cho' nonli'lall'chone' na' nombia'cho dill' li che'na' gaochon na' we'chone' yel' choxken.

⁴ La' yog'lol daa bxe bsil Chioza' nakan wen, na' bibi de dii inacho bi gak gaochon kon shi we'chone' yel' choxken kat' yeej gaochon.

⁵ La' daa chajle'cho cho'a xtil' Chioza' na' daa choe'lwillchone', chonleeye' yel' wao chechona'.

⁶ Shi dga wli' wsedilo' bish' ljwellchoka', na' gako' to wen llin wen che Jesucristona', na' tolla' ba nono' cho'a xtil' Chioza' loo yichjlall'do'na' len dii wenna' daa bsedo' na' zej chono'n.

⁷ Na' bi wzenago' bizə dill' gol dii chsees' ben', diika' wdiljlall'gake' daa bi nak ka dii shajle'cho, san bsed gono' ka cheeni Chioza'.

⁸ Nezicho kat' chchitj ni'a na'choki chaklenan kwerp chechoni. Per daa choncho ka cheeni Chioza', dii xentechlə chaklenan cho' naa zoacho yell-lioni na' lekzka' kat' illin lla lljazoalenchone'.

⁹ Dillii nakan dii w_xenlall'cho, na' yog' ben' chiyal' shajli'en.

¹⁰ Na' ni cheyinnan' chonnto' to dii byen chilalinto' chonnto' xshin Chioza' daa ba nonnto' lez Chios yaa Chios banna', beena' cheeni yisle' yog'lo_l ben', na' ben'ka' chonlilall'yen' len' yisle'.

¹¹ Diikin chiyal' yoo ben' gongake' na' wli' wsedilo' legake'.

¹² Bi weezo' latj no ile'zi li' nakzi daa nako' bi' wew', san ben wen lao ben'ka' nonli'lall' Crístona', ka de cho'a dill', na' yel' nsa' cheyin wen, na' yel' chaki ben', na' yel' nonlilallii Crístona', ni bibi dii mal sa'lalloo, kwenche lengake' gongake' ka'.

¹³ Shlak yid', ben ka dii le blab Cho'a Xtill' Chioza' lao ben'ka' chdop chllag, bli' bsedgakile', na' btip lall'gake'.

¹⁴ Bi guetlalloo daa ben Chioza' lall' no' kana' ben'ka' ngoo lall' na'gake' ben'ka' nonlilall' Crístona' b_xoa neeka' yichjo'na' bengake' li' lall' na' Chioza', na' bchej beena' wdixjee nan Chioza' ba wleje' li' gono' xshine'na'.

¹⁵ Ben to dii byen ben diiki wloo Chioza' lo no' gono', na' benyenaan kwaslo_l kwenche gakbe'i yog'lo_l ben' ba zejch chono' wen.

¹⁶ Wze wneyi che kwino' na' cheyi daa chli' chsedilo' ben', na' toshiizi wno'n. Na' shi gono' ka nan, na' yisla kwino' len ben'ka' chzenaggake' daa chli' chsedilo'.

5

¹ Bi inezo' zibia' ben' golka', san be'lengake' dill' xochi ka ben' chshaljlen xayin. Na' goni ben' bishoo ben' xkwid'ka'.

² Na' goni x_noo noolka' ba ngolch ka li', na' goni ben' zano' nool xkwid'ka', na' bibi dii mal sa'lalloo.

³ Goklen nool wizebka', ben'ka' kono zoa chegake'.

⁴ Per shi zoa xiin xsoagake', chonan byen inezgakib' chiyal' gap wwiagakb' le', la' len' bisgole' legakb'. La' kan' chazlall' Chioza' goncho.

⁵ Nool wizeba', beena' kono zoakz cheyin, beena' bgaan tlish' tyaj, chxenilallee Chioza' na' ka tella ka wal' choe'lwille'ne' na' chat'yoile'ne' gaklene'ne'.

⁶ Per nool wizeba', beena' choe' cho'a xbayi beli chen che'na', nake' ka ben' net lao Chioza' la'kzi mbane'.

⁷ Bzajni'gakile' dga kwenche bibi gon inaz ben' chegake'.

⁸ La' beena' bibi wneyi ze che no dialla che' na' che ben'ka' nakyenee txen loo yoo lille'na', ba wlej yichje' daa nak che Chios, shi ka' chone', na' ba nxinjtechl_e yichjlall'do'ena' aga ka beena' bin' shajle' che Chioza'.

⁹ Lee yisha' gana' da' le nool wizebka' chiyal' ta' le ben'ka' ba wdeli guiyon yiz, ben'ka' ben banez kochno bikaagake'.

¹⁰ Chiyal' seyi chegake' chongake' wen: daa gok bisgol xiine'ka', daa chiyesh'lall'gakile' ben' choe'gake' ga yigaangake', daa chongake' bittez dii gaklenen ben'ka' nonlilall' Chioza', axt chyibgake' ni'eka', na' daa chaklengake' ben'ka' chzak'zi', na' daa chongake' ka dii le chongake' yog' daa nak wen.

¹¹ Na' bi wdoo le nool wizebka' lee yisha' shi bin' gaggakile' guiyon yiz. La' zoa kat' we'gake' cho'a xbayi beli chen che'ka' na' yikaa chegake' na' bich gongake' kwaslo_l xshin Crístona',

¹² na' gapgake' dol' lao Chioza' daa bi sakgakile' gongake' ka ba bchebgake'.

¹³ Na' leyi chiyakgake' nool_e lia na' chdagake' to to yoo. Na' aga toz daa, san lekzka' chchitjgake' dill', na' chjalaalli chegake' dii chak che ben' yobl_e, na' choe'gake' dill' dii bi chiyal' we'gake'.

¹⁴ Daan nool wizebka' ni zoa xlatjin, cheenid' yikaa chegake' na' yizoa xiingake', na' koogake' xnezi dii chak loo yoo lillgake', kwenche bi wxa'gake' cho'alao ben'ka' bi chonlilall' Chioza'.

¹⁵ La' bal' nool wizebka' ba bichejgake' lo xnez Chioza' na' ba zjanogake' Satanáza'la_e.

16 Shi to ben' nonlilall' Chioza' zoa to dialla che' nool wizeb, chiyał' gaklene'ne' kwenche bi gake' to dii zii dii zshab che ben'ka' nonlilall' Crístona', na' gak we'gake' daa chyallj chchini nool wizebka' kono zoa chegake'.

17 Ka nak ben'ka' ngoo lall' na'gake' ben'ka' nonlilall' Crístona', na' chak chgoogake' xnezin wen, chidol'gake' balaan xen. Na' ben'ka' noni xshingake' choe'gake' cho'a xtill' Chioza' na' chli' chsedgakile', balaan xentechlə chidol'gake'.

18 La' Cho'a Xtill' Chioza' nan: “Ka nak goona' bana' chilali chlej chshoshjb trígona' kwenche ichej xayinna', bi wllinle yixja' cho'aba' kwenche gak koyob to chop cho'a.” Na' lekzka' nan: “Beena' chon llinna' chidolee ikaa laxje’.”

19 Shi no chao xya che to ben' ngoo lall' na' ben'ka' nonlilall' Crístona', bi wzenago'n shi bi zoa chop shon ben' yizi' cho'agake'n.

20 Na' shi ga zoa ben'ka' bi chsankzgake' dii mala', chiyał' wsheshleno' legake' kat' ndop nllagle kwenche yog'lol ben'ka' nakle txen illebgake' na' bi gongake' ka'.

21 Chat'yoid' li' lao Chioza', na' lao Jesucrístona' na' lao anjl che'ka', toshiizi gono' diiki ba wnia'. Na' toz ka gonilo' yog'lol ben', aga balze' gakilo'.

22 Bi wxoazə noona' yichj beena' cheeni gon xshin Chioza' shi bi nezilo' nak nsa' che', kwenche ki gako'ne' txen shi chone' dii mala'. Wdapshii kwino' kwenche ki ta' icheno' dii mala'.

23 Daa chak li'ona' na' daa zekizezi bi shawoo, bich yeejteko' toz nisa', san weej lat'do' wej vinona'.

24 Bal dii malka' chon ben' chli'lawin ka zi' gaolə ben' xya chegake'. Na' zi balan, zi' chila' chinezli beanaan.

25 Na' ka'kzə, dii wenna' daa chon ben' nla'xejgakan, na' la'kzi de dii wenna' daa ngash', wllin lla wli'lawin.

6

1 Yog'lol ben'ka' ndoo lla yel chongake' xshin ben' na' ba chonlilall'gake' Crístona', chiyał' sho' yichjgake' gapgake' xane'ka' balaan kwenche bibi gon inaz ben' che Chioza' na' cheyi daa chli' chsedicho.

2 Na' shi xane'ka' nonlill'gake' Crístona', la'kzi ba nakgake' ben' bish'gake' daa chonlilall'gake' Crístona', chiyał'kz gapgake' legake' balaan, na' chiyał' gonchlagake' xshine'ka' do yichj do lall'gake' daa chakgakile' legake' na' nezgakile' ben'ka' si' banez xshine'ka' nakgake' ben' nonlilall' Crístona'. Dgan chiyał' wli' wsedilo' legake' na' ye'gako'ne' gongake'n.

3 Shi no chli' chsedi dii nak nlla'lə na' bi chidilin daa bli' bsemi Xancho Jesucrístona', na' bi chidiltein daa chsedi cho' goncho ka cheeni Chioza',

4 beena' chon ka' nake' ben' chep cha'lall', ben' bibi nezi. Na' daa le chibaile' gakkil-lene' ben', chxie' daa nak yel' xe', yel' wishagdil, yel' chbell chne che ben', na' yel' chza'lall' mal che ben'.

5 Na' biga yiyoll yido gakkil-lene' ben' daa ba nxinj yichlall'do'ena', na' bi nombi'e daa nak dii li. Na' chakile' daa chonze' ka chli' chsedi che Chioza' gatile' mech xen.

6 Dii li, le mbalaz soacho shi goncho ka cheeni Chioza' na' goncho banez ka'k' to dii de checho.

7 La' to ka cha'zchon goljcho yell-lioni, na' to ka cha'zchon yiza'cho.

8 Shi de dii cheej chaocho na' de xalaancho, chiyał' goncho banez.

9 Na' ben'ka' cheeni gak ben' wni'a, chxopgake' lawi daa nak yel' wzelall' na' lliall'gake' biya dii bi yejni'alallii daa chxinj chlenan legake', na' chtakw chchejan legake' na' chbiayi'lengake'n.

10 Lo yel' wzelall' mecha' chalj chxe biya dii bi yejni'alallii. Bal ben', yel' wzelall' che'ka', ba bilaagake' lo xnez Chioza' na' ba chile'gakile' zan yel' zi'.

¹¹ Per li' chono' xshin Chioza', biga gono' ka chon ben'ka', san ben daa nak dii licha, ben ka cheeni Chioza', wzoatezi wzoa benlilallee, wdap yel' chaki, gok wal lao yog'lol dii idil illago', na' gok ben' gaxjlall'.

¹² Btiplaloo na' ben to dii byen gono' daa cheeni Chioza', beena' nonlilaloo. Na' be'l-lall' beni cho' daa nak yel' mban zejli kani. La' ni cheyinnan' gox wñab Chioza' li' na' bi'o dill' lao ben' zan nan nonlilaloo Crístona'.

¹³ Na' ñaa, lao Chioza', beena' choe' yel' mban che yog'te dii de yell-lioni, na' lao Jesucrístona', beena' be' dill' kon ka nakan lao Poncio Pilátona', chon' byen

¹⁴ wzo' dill' dga nia' li', na' seyi cho' chono' wen na' bibi dii mal ta' icheno' ax̄t ni ka yila' X̄ancho Jesucrístona'.

¹⁵ La' wllin lla yiyede' ka bllia Chioza' bia', Chios, beena' chidoł' we'la'ocho, beena' zeelo chñabia'. Zeelo len' nake' X̄an yog'lol ben', na' chñabi'e lao yog'lol ben'.

¹⁶ Toze' len' biga llia te che', na' zoe' lo beeni' xen wala' daa kono chzoi wwia. Ni tlish' benech biñ' ile'ile'ne' ni bi gak ile'gakile'ne'. Len' chidolee sho'e balaan zejli kani na' biga llia te yel' wñabia' che'na'. Kan' nakan.

¹⁷ Ben'ka' chle'i yel' wni'ana' yell-lioni, gollgake' bi gake' ben' cha'sibə, ni bi gongake' lez yel' wni'a che'ka'. La' yel' wni'ana' bi nakan lez. San chiyal' gongake' lez Chios yaa Chios banna'. Len' chone' zoayaa zoallin yog'lol daa chyallj chchinicho kwenche si'chon banez.

¹⁸ Gollgake' gongake' wen, na' koo yichjgake' wzanchgake' dii wenka' chongake', na' segake' wñeyi izangakile' we'gake' ben' dii de chegake'.

¹⁹ Na' daa gongake' ka', na'chan saki gongake' lez daa zi' za', na' idoloł'gakile' yel' mban daa nak dowalj.

²⁰ Timoteo, wlooshosh yichjo' dga ba wnia' li'. Bi wzenago' dill'ka' bi yejni'alallii na' bibi zakaan, ni bi wzenago' xtill' ben'ka' chonzə ka nap yel' sin'.

²¹ Bal' ben' ba wyajle'gake' cho'a xtilleeka' na' ba bilaagake' lo xñez Chioza'. Chioza' gaklenshgue' le' na' gone' ka gak wen chele.

Kart wchopi daa bzej Páblona' na' bseleen lao Timotewa'

¹ Nad' Pablo nak' postl che Jesucristona' kon ka chaklall' Chioza', kwenche wi'a dill' nan ba bchebe' wi'e yel' mban zejli kani che nottezə ben'ka' nak Cristona' txen.

² Chzej' li', Timoteo, nako' ka dowalj bi' cha'. Xacho Chioza' na' Xancho Jesucristona' gaklenshgagake' li', na' yiyesh'lall'gakile' li', na' gongake' ka so' mbalaz.

³ Tlizi choe'llwill' Chioza', beena' chonlilallaa do yichj do lallaa, ka ben dii ben' gol cha'ka'. Ka tella ka wal chnab' gaklene' li' na' cho'ane' yel' choxken ni cho'.

⁴ Chjadinid' ka wchello' kana' zeelo bshaljcho, na' cheenid' ile'id' li' kwenche yiba yizakid'.

⁵ Chjadinid' ka nonlilalloo Chioza' do yichj do lalloo, ka ben xna'golo' Lóidana' na' xnoo, Eunícena'. Na' nezyenid' lekzka' li' nonlilalloone' do yichj do lalloo.

⁶ Na' daan, chisa'lalloo chiyal' we'l-lall'cho gono' xshin Chioza' kon ka nak yel' waka' daa bene' lall' no' kana' bxo'a' na'na' yichjo'na'.

⁷ La' Chioza' bene' cho' Espíritu che'na', na' Espíritu che'na' chaklene' cho' kwenche bi gall illebcho, na' chone' cho' yel' wak len yel' chaki, na' chaklene' cho' gakcho ben' nyeen nyeenyi.

⁸ Daan, bi yiyii yido'ilo' wi'o cho'a xtill' Xanchona', ni bi yido'ilo' ni cha' daa dia' lillyani daa chon' xshin Chioza'. San chiyal' gono' nad' txen illaglocho yel' zak'zi'ka' ni che cho'a xtill' Cristona', la' Chioza' chaklene' cho' len yel' wak che'na'.

⁹ Chioza' bisle' cho' na' gox wñabe' cho' kwenche gakcho lall' nee, aga yel' chon wen chechonan', san kon ka goklallile' gone'n daa nake' ben' wen. Na' daa biyesh'lallile' cho' wlo'e xnezin wselee Jesucristona' kana' zi' wxe wsiltie' yell-lioni.

¹⁰ Na' naa, ba bli'lawi yel' chiyesh'lallii che'na' daa bid Jesucristona', beena' bisla cho', na' bliiayee yel' wak che yel' wita', na' dill' wen dill' kob che'na' chzajniin cho' nan de to yel' mban daa bi te cheyin.

¹¹ Chioza' bzoe' nad' nak' postl na' bene' lall' na' chyixji'a dill' wen dill' kobi na' chli' chsedida'n ben'.

¹² Na' ni cheyinnan' chzak'zi'a lao dga chak cha' naa. Per bi chiyii chido'id', la' nezid' ka nak beena' ba nxenilallaa. Na' nezid' nape' yel' wak gapshi'e dill' li' che'na' daa bene' lall' na', kwenche toshiizi gakan dowalj axt kat' illin lla te che yell-lioni.

¹³ Dill' lika' ba bli' bsedid' li', bli' bsemi'n ben' kon ka nakan. Na' daa ba nako' txen Cristo Jesús'a, soachecho' gonlilalloone' na' gakteilo' ben'.

¹⁴ Espíritu Sántona', beena' zoa loo yichjlall'do'chona', gaklene' li' kwenche toshiizi wli' wsedilo' ben' dill' lina' daa ba bsedid' li' na' bi wi'o latj shi ga za'zə ben' cheenile' yisheen.

¹⁵ Nezkzilo' yog' ben' Ásiaka' wchoonlall'gake' nad', na' lentez Figélon'a' na'ch Hermógeneza'.

¹⁶ Chnabid' Chioza' yiyesh'lallile' Onesíforona' len xiin xoole'na', la' zan shii bidtipe' lallaa na' bi bido'ile' bidwie' nad' loo lillyani.

¹⁷ To ka bidze' Rómani, lii biyiljdotie' nad' axt ki billelile' nad'.

¹⁸ Chnabid' Xanchona' yiyesh'lallile'ne' kat' illin llana' wchogloe' che ben'. Nezkzilo' dii xen goklene' cho' Éfesona'.

2

¹ Na' li', naa, xiindawaa, gok wal daa chaklen Cristo Jesús'a li'.

² Daa ba benilo' bli' bsedid' ben', bzajniin ben'ka' nxenlalloo, ben'ka' nezteilo' wak wli' wsedgakile'n ben' yoblə kon ka nakan.

³ Wzoachech btil yel' zak'zi'ka' chllaglo' lega ben' chon xshin Cristo Jesús'a, ka chon' nad'.

⁴ Ni to ben' zeje' lo wdila' aga dii yoblə zeze' wneyi, san chiyal' kwej yichje' yog'lolte kwenche gone' daa yiyoollalii beena' wleje' le' gake' soldad.

⁵ Lekzka' beena' chxonj, bibi gone' gan shi bi chzoe' dill' gone' yog'lolte daa lia bia' gone'.

⁶ Na' beena' cheeni yizi' yilape' chiyal' wwa'gaxje' llin cheyin.

⁷ Wze wneyi dga nia' li', na' Xanchona' wzajni'chile'n li' kwaslol.

⁸ Jadini Jesucristona', beena' biban ladj ben' wetka', beena' nak xiin dia che dii Davina', kon ka na dill' wen dill' kob che'na' daa chli' chsedid'.

⁹ Na' ni cheyinnan' chzak'zi'a, axt ba wdxigake' nad' lillyani ka to ben' wen dii mal. Per aga len cho'a xtilleenan' nej lillyani, san zejchlə chlliljan.

¹⁰ Daan chzo chzakid' yog' yel' zak'zi' dii chak cha', kwenche ben'ka' ba wlej Chioza' gagake' lall' nee gonlilall'gake' Jesucristona' na' yilagake' kwenche bi kwiayi'gake', na' ljazoalengake'ne' zejli kani.

¹¹ Dillii nakan dii wxenlall'cho:

Shi ba witlencho Crístona', lekzka' wbanlenchone'.

¹² Na' shi so sakicho lao bittezə yel' zi' yen ile'icho daa nakchone' txen, lekzka' inabia'lenchone'.

Shi cho' bi wchebcho nakchone' txen, ka'kzə le' ine' bi nake' cho' txen.

¹³ La'kzi cho' bi choncho daa chchebcho, le' chone' ka ba bchebe', la' toshiizi chone' kon ka chchebe' gone'.

¹⁴ Bi guetlalloo yisoo dga lall' ben'ka' chli' chsedilo'. Na' kon yel' wñabia' che Chioza' daa ba bene' li' bsi'ngakile' bi chiyal' gaguedlenzə ljwellgake' ni cheyi diika' bibi zakii. La' bi chaklenan ben', san chlliaiyi'lan ben'ka' chzenagan.

¹⁵ Ben to dii byen gono' ka chazlall' Chioza' kwenche bibi wsi'n li' yel' zto' lo xshine'na', na' bli' bsemi dill' li che'na' kon ka nakan.

¹⁶ Bi wzenago' dill'ka' bi yejni'alallii na' bite bi zakgakan, la' ben'ka' choe' dill' ka diika' zizikli chongake' daa bi choollall' Chioza'.

¹⁷ La' daa chli' chsedgakile' nakan ka to yillwe' dii nak lech na' chlliaiyi'n ben'. Ka' ben Himenewa' len Filétona',

¹⁸ bilaaala'ogake' dill' li che Chioza' na' nazgake' ba bisbanle' ben' wetka'. Na' chonllej-gakile' ben'ka' ba nonlilall'gake' Crístona'.

¹⁹ San dill' li che Chioza' nakan ka to len yoo dii zoachech. Na' dill' li che'na' nan ki: "Xanchona' nombi'e ben'ka' nak lall' nee." Na' lekzka' nan: "Nottezə beena' na nake' Crístona' txen, chiyal' yikwase' lawi dii mala'."

²⁰ To loo yoo lill ben' wni'a aga chchine' shgal' dii nak de or wa de plat, san nchixgakan de yag len de yo. Balan naki gana' chchine'n, na' balan chonan llin gattez.

²¹ Ka'kzan beena' chon daa chazlall' Chioza', saklebile' diika' nak de or wa de plat, na' zakee wchin Chioza'ne' gone' dii zan dii wen.

²² Bi gono' txen ni to dii malka' cheeni beli chenna' kat' zoan lo yel' wewaa. Na' ben to dii byen gako' ben' li ben' shao', na' gonlilalloo Crístona', na' gakilo' ben', na' soaleno' bish' ljwello'ka' mbalaz, ka chon yog' ben'ka' nxi nyech yichjlalldoe'ka', ben'ka' choe'ljwillgake' Xanchona'.

²³ Bi wzenago' dill'ka' biz chon chna, dill'ka' bibi zak', la' ba nezkzilo' chxegakan wdil.

²⁴ To ben' nlane' chone' xshin Xanchona' bi chiyal' wshagdile' ben', san chiyal' gonile' yog'lol ben' wen. Na' chonan byen gak wli' wsedile' ben', na' chiyal' gape' yel' chxenlall'.

²⁵ Na' chiyal' we'lene' dill' xochi ben'ka' chzoshi' daa nak dill' li daa chli' chsedile', na' gone' lez shicholə Chioza' gaklene' legake' kwenche yiyaj yilengakile' na' gombia'gake' daa nak dii li,

²⁶ na' yiyeen yiyeenigakile' na' yilagake' lo ni'a na' dii xiwaa daa ntakw nchejan legake' daa chongake' ka cheenin.

3

¹ Lekzka' chiyal' inezilo' dga: kat' ba zoa te che yell-lioni, dii zan dii nxoll gat'.

² La' ben' zan che to kwinzgake' segake' wneyi, na' lillinzi selall'gake' gat' kwe'gakile' mech, na' gaggake' ben' llalj na' ben' chep cha'lall'. Biz gon inagake' che Chioza', na' bi wzoagake' xtill' xaxneeka', ni bi we'gake' yel' choxken ben' gaklen legake', na' ni bi yoo yichjgake' gongake' ka cheeni Chioza'.

³ Na' bi yiyesh'lall'gakile' ben', ni bi si'xen che bish' ljwellgake', na' le chilj sangake' dill' che ben'. Na' bi sakgakile' inabia' kwingake', na' le yibagakile' wchi' wsak'gake' ben', na' gakzbangakile' yog'lolte daa nak wen.

⁴ Gaggake' ben' chop cho'a dill', na' ben' bibi nalli, na' gon kwingake' ben' choo ben' xen. Na' le yibachgakile' gongake' kon ka chzelall'gake' latjin dii nan gongake' ka cheeni Chioza'.

⁵ La'kzi gonzgake' ka ben' le nxenilall' Chios, na' to kwinzgake' wli' wze chegake' nan bin' we'gake' latj wshaa Chioza' yichjlall'do'eka'.

Na' li' naa, bi chiyal' gono' ni to ben'ki txen.

⁶ La' kan' nak ben' wxiye'ka' chda to to yoo, na' chziye'gake' noolka' bi nteyi, ben'ka' lall' lao saaxyana' na' chongake' biya dii mal.

⁷ Noolki tlizi chzenaggake' daa chli' chsedi notteza ben' legake' na' biga lia chombia'gake' daa nak dii li.

⁸ Ka ben ben'ka' le Janes na'ch Jambres, wzoshiyigake' dii Moiséza', kan' chon ben'ki chsej chllongake' cheyi daa nak dii li daa nxinj nlen yichjlall'do'eka'. Na' bi nde ben'ki kwent lao Chioza' la'kzi nazgake' nonlilall'gake'ne'.

⁹ Na' aga wgol daa chongake', la' yog' ben' gakbe'i nakgake' ben' bi yejni'alallii, ka gok che ben'ka' chop, ben'ka' wzoshiy' dii Moiséza'.

¹⁰ Na' li', naa lla, ba nezki' ka nak daa chli' chsedid', ka nsa' cha', ka nak daa lialallaa gon', ka nonlilallaa Chioza', na' ka nak yel' chxenlallaa na' yel' chakina' nap', na' ka chtip lallaa kwenche chzo chzakid' yel' zak'zi'ki chtil'.

¹¹ Na' nezilo' ka nak yel' zak'zi'ka' diika' ba bllagloa', ka diika' btil' Antioquíana', na' Icóniona', na'ch Lístrana'. La'kzi dii zan dii ba bllagloa', Xanchona' ba bisle' nad' lao yog'lolten.

¹² Dii li, yog'lol ben'ka' cheengakile' gongake' ka cheeni Chioza' daa nakgake' txen Cristo Jesúsza', wsak'zi' ben' legake'.

¹³ Na' ben' wen dii malka' len ben' wxiye'ka', zizikli gongake' mal, na' gaklelagakile' siye'chgake' ben' na' ax't kwingake' ba chiyajle'gake' che yel' wxiye' che'ka'.

¹⁴ Na' li', naa, wzoachech lawi daa ba nsedo' na' ba wyajli'o. La' nombia'kzo' ben'ka' bli' bsemi li'.

¹⁵ Jadini kana' naktio' bi'do' nombi'o Cho'a Xtill' Chioza', na' lennan' gonan li' yel' sin'na' daa chsedin li' gonlilalloo Cristo Jesúsza' kwenche yilo' na' bi kwiayoo.

¹⁶ Kwin Chioza' bzajniile' dii ben'ka' bzej doxen Cho'a Xtilleena', na' zakaan wli' wsedin ben', wsheshlenen ben' bi chon wen, yigoon shli lall' ben' nakleji, na' wzajniin ben' kwenche gake' ben' li ben' shao',

¹⁷ kwenche beena' chon ka cheeni Chioza' zizikli gakchache' na' gak gone' yog' diika' nak wen.

4

¹ Lao Chioza' na' lao Cristo Jesúsza', beena' yiyede' inabi'e na' wchogloe' che to to ben', ka ben' ni mban na' ka ben' ba wit, chon dga lo no':

² Be'len beṅ' Cho'a Xtill' Chioza', na' toshiizi benan kat' de xlatjin gono'n, laa cheengakile' wzenaggake'n laa bi cheengakile'. Ben ka yiyakbe'i beṅ' nan ba bxiṅj blene', bsheshlen beena' bi zej shli, na' btip lall'gake' gongake' wen, na' wdap yel' chxenlall' chgake' na' bli' bsemi legake'.

³ La' wllin lla kat' beṅ' yell-lioki bich gaklall'gake' wzenaggake' daa nak dii licha. Na' daa cheengakile' gongake' kon ka nan yichjlall'do'eka', yiyiljgake' wde wdeli beṅ'ka' chli' chsemi daa chiyoollall'gake' wzenaggake'.

⁴ Na' yilaala'ogake' daa nak dii li na' wzenaggake' bizə dill' gol.

⁵ Per li', gokto lega beṅ' nyeeṅ nyeeniyi lao yog'lolte dii chak, na' so sakilo' wtiloo yel' zak'zi'ka'. Ben ka dii le be' dill' wen dill' kob che Crístona', na' ben xshin Chioza' daa ba nak lall' no'.

⁶ La' ba zoa witgake' nad' daa chon' xshin Crístona', na' ba zoa gaoshosh lljazoalenee.

⁷ Ba beṅ' ga zeelo bizoid', na' ba biyoll beṅ' daa ben Chioza' lo na' gon', na' toshiizi wzoachech' benlilallaane'.

⁸ Na' naa ba chbez' llana' ikaa daa chidolaa daa ba beṅ' dii wenna'. Na' Xanchona', beena' chchoglo che beṅ' kon ka nakan, gone'n nad', na' aga toz nad', san len yog' beṅ'ka' do yichj do lall'gake' nongake' lez llana' yiyede' sto shii.

⁹ Ben to dii byen lii yidwiatezo' nad',

¹⁰ la' Démaza', daa ngoo yichje' daa de yell-lioni, ba wchoonlallee nad' na' ba ziyaje' Tesalónicana'. Na' Crescéntena' zeje' zji'e cho'a xtill' Chioza' Galáciana', na' Títona' zeje' Dalmáciana'.

¹¹ Tochga Lúcazi zoalene' nad'. Jadilj Márcona' na' dalene' ni kwenche gaklene' nad' lo xshin Crístona'.

¹² Ba bselaa Tíquicono' Éfesona'.

¹³ Kat'ka' tio' Tróaza' ikaasho' xachela' chdob' daa bkwaan' lill Cárpona'; na' lezkka' bex' librka', na' dii llialote goxoo libr de yidka'.

¹⁴ Alejandro, beṅ' wichekw yana', le michian bene' cha', na' Xanchona' wi'ene' daa chidolee.

¹⁵ Lekzka' li', wsako' ki gone' cho' ka', la' le chakzbanile' daa chli' chsedicho.

¹⁶ Dii nech ka bdegake' nad' lao beṅ'ka' chnabia' ni, ni to beṅ' bish'choka' bi goklengake' nad'; yog'zgake' wchoonlall'gake' nad'. Chnabid' Chioza' si'xene' chgake'.

¹⁷ Per Xanchona' goklene' nad' gok' wal kwenche bia' cho'a xtilleena' lao beṅ'ka' biṅ' gonlilall'gake'ne', na' bisle' nad' lao yel' wita'.

¹⁸ Na' Xanchona' yisle' nad' lao yog'lol dii mal, na' lljazoalenee yabana' gana' chnabi'e. Len' chidolee sho'e balaan zejli kani. Kan' nakan.

¹⁹ Bwapsha nad' chiox Príscana' len Aquílana', na' yog' beṅ' lle' loo yoo lill Onesíforona'.

²⁰ Erástona' bigaane' Coríntona', na' bkwaan' Trófimona' Milétona' daa bi shawee.

²¹ Btalaloo yido' ka zi' yizolo' dii zaga'. Eubúloni, Pudénteni, Línoni, Cláudiani, na' yog'lol beṅ'ki nakcho txen nonlilall'cho Jesucrístona', chwapgake' li' chiox.

²² Xancho Jesucrístona' soalenshgue' li'. Na' gone' ka gak wen che yog'le.

Kart daa bzej Páblona' na' bseleen lao Títóna'

¹ Nad' Pablo chzej' li', nak' wen llin che Chioza' na' nak' postl che Jesucristona', na' bselee nad' kwenche gaklen' ben'ka' ba wlej Chioza' gonlilall'gake'ne' na' gombia'gake' daa nak dii li daa chzajniin cho' goncho ka cheenile'.

² Na' zoacho noncho lez to yel' mban zejli kaní. Kana' zi' wx̄e wsiltie' yell-lioni, Chios, beena' biga chziye', bchebe' gone'n cho'.

³ Na' naa ba bllin lla, Chioza', beena' chisla cho' kwenche bi kwiayi'cho, chzenile' yog' ben' cho'a xtilleena' daa bene' lall' na' chyixji'a, kon ka wne' gon'.

⁴ Chzej' li', Tito, nako' ka dowalj xiin' daa nakcho toz chonlilall'cho Jesucristona'. Xacho Chioza' na' Jesucristona', beena' bisla cho' lao saaxya chechoka' kwenche bi kwiayi'cho, gaklenshgagake' li' na' gongake' ka so' mbalaz.

⁵ Bkwaana' li' Crétana' kwenche wzeelo' koo x̄nezi daa bi biyollichó, na'ch kwejo' ben' koo lo na'gake' ben'ka' nakgake' txen nonlilall'gake' Crístona' to to yell, kon ka ba wnia' li' gono'.

⁶ Beena' gak lall' nee ben'ka' nonlilall' Crístona' chiyał' wsa' che' wen kwenche bibi de ina ben' che', na' gake' ben' zoa toz xoolin, na' gonlilall' xiine'ka' Crístona', na' bi gagakb' bi' mal ni bi' widenag kwenche bi wx̄a'gakb' cho' alao ben'.

⁷ Daa ngoo lall' nee xshin Chioza', chiyał' gake' dowalj ben' wen, ben' bibi de ina ben' che', na' bi gake' ben' chep cha'lall', ni bi gake' ben' lok, ni weezo, ni wishagdil, ni ben' wzelall'.

⁸ San chiyał' wi'e ga yigaan ben', na' yibaile' gone' dii wen, na' gake' ben' nyeen nyeeniyi, na' ben' nxi nyech, na' ben' chn̄abia' kwiniin.

⁹ Chiyał' gonlene' xtill' Chioza' daa nak dii li daa ba nsede', kwenche wtipe' lall' ben' yoblə daa wli' wsedile' legake' daa nak dii li, na' gone' ka shajle' ben'ka' nagake' aga kan' nakan.

¹⁰ La' ben' zan inleeb ben' widenag zoa, ben' bizə chon chna, na' ben' chziye', na' zangake' nakgake' ben' Israel, ben'ka' na' yog'lolte ben' byoka' chonlilall'gake' Crístona' chiyał' sho'gake' sen' daa le circunciación.

¹¹ Ben'kan' bi chiyał' we'cho latj wli' wsedgakile' ben', la' daa chzelall'gake' gongake' gan mechan' chdagake' to to yoo chli' chsedgakile' daa bi nak shli, na' chonllejgakile' do bxoontegake'.

¹² To ben' Creta, ben' chneyaa, wne' che ben' wlall' che'ka': "Ben' Cretaki nakgake' ben' wxiye', ben' mal ga zeelo, ben' cheej chao ka nla' ka nte, na' ben' lia."

¹³ Na' dii likzə ka nakannan'. Daan, bsheshlengake' ka chiyałi kwenche shajni'gakile' daa nak dii li daa ba wyajle'gake',

¹⁴ na' bich wzenaggake' che dill' golka' daa wdiljlall' ben' Israelka', ni bi wzenaggake' daa nazə ben'ka' chzoa ka'lə daa nak dii li.

¹⁵ Ben'ka' ba nxi nyech yichjlall'do'eka' lao Chioza', ni daa cheej chaogake' ni daa chox'gake' bi chsej chllonan gak yichjlall'do'eka' dii nxi nyech. San ben'ka' nxiñj yichjlall'do'eka' na' bi chajle'gake' che Crístona', bibi dii nxi nyech de lawe'ka', la' yichjlall'do'eka'ten lle' lla' dii mala', na' ni bi chao chdian legake' kat' chxiñj chlēngake'.

¹⁶ Nazgake' nombia'gake' Chioza', per diika' chongake' chili'n laogake' bi nombia'gake'ne'. La' nakgake' ben' mal ga wdelawin, na' nakgake' ben' bi chzoa dill', na' biga gakkzə gongake' daa nak dii wen.

2

¹ Na' li' naa, bli' bseedi ben' daa nak dii li.

² Bzajonii ben' golka' gakgake' ben' nsa' cheyin wen, ben' chidol' gap ben' legake' balaan, ben' nyeen nyeeniyi, na' soachehgake' gonlilall'gake' Crístona', na' gakgakile' ben', na' so sakgakile' bittez dii yen ile'gakile'.

³ Lekzka' nool golka' chiya' gall illebgake' Chioza', na' bi gakzgake' ben' wichitj dill', ni bi we'gake' latj gonzə yel' weezona' legake' gan, san chiya' gongake' wen kwenche ile'i ben' ka chiya' gongake'.

⁴ Na' wli' wsedgakile' nool xkwid'ka' gaki ben' che'ka' na' gaki xiine'ka',

⁵ na' gakgake' ben' nyeen nyeeniyi, ben' bi nda' nchen dii mal, na' gap wwia loo yoo lillgake', gakgake' ben' chiyesh'lallii, na' wlexj yichjgake' lao ben' che'ka' kwenche kono ine zban che xtill' Chioza' ni chegake'.

⁶ Na' lekzka' goll bi' wew'ka' gakgakb' bi' nyeen nyeeniyi.

⁷ Li'yen'an chiya' wli'o chono' wen lao yog'lolte daa chono'. Na' wsa' cho' bash bal kat' wli' wsedilo' ben' na' benan do yichj do lalloo,

⁸ na' wsako' wi'o dill' kwenche bibi de ina ben' cheyin. Na' yido'i ben'ka' chakzbani cho' daa bibi de gon inagake' checho.

⁹ Bzajonii ben'ka' yoo xanin wlexj yichjgake' lao xane'ka', na' gongake' ka yiyoolall'gake', na' bi yillizgake' legake' dill'.

¹⁰ Na' bibi si' kwangake' che xane'ka', san soa do lall'gake' kwenche wli'gake' lao yog'lol daa chongake' nan le wen nak cho'a xtill' Chioza', beena' bisla cho' kwenche bi kwiayi'cho.

¹¹ Chioza' ba bliile' yog'lol ben' yel' goklen che'na' kwenche yilagake' na' bi kwiayi'gake'.

¹² Na' yel' goklenna' daa bene' checho chli' chsedin cho' kwej yichjcho daa bi nak wen na' diika' chzelall' beli chenna', na' soacho yell-lioni nyeen nyeeniyicho, goncho ka chiyoollall' Chioza', na' gall illebhone',

¹³ shlak noncho lez illin lla choo lla xenna' yila' Jesucristona', beena' nak ben' choo ben' xen, na' nake' Chios checho na' bisle' cho.

¹⁴ Len' bzani yel' mban che'na' ni checho kwenche bisell bilee cho' lao yog'lol dii mala', na' bixis biyibe' cho' kwenche gakcho lall' nee na' selall'cho goncho daa nak wen.

¹⁵ Dgan chiya' wli' wsedilo' ben', na' wtipo' lall'gake' gongake' ka cheeni Chioza', na' wsheshleno' ben'ka' bi chon wen, na' benan lega ben' nzoa Chioza'. Na' kono chiya' gonzi li' nakzi.

3

¹ Bisa'lall'gake' wlexj yichjgake' lao ben'ka' chnabia', na' gakgake' ben' wizoa dill', na' segake' wneyi gongake' daa nak wen.

² Bibi gon inazgake' che ben', san soalengake' ben' mbalaz na' gongakile' legake' wen, na' gakgake' ben' gaxjlall' lao yog'lol ben'.

³ Lekzka' cho', kana' gokcho ben' bi nteyi na' ben' bi bzoa dill', na' gosh' wllall'cho lao dii mala', na' btakw bchej biya diika' bibayi beli chen chechona' cho', na' gokcho ben' xe'. Gokzbani ben' cho' na' gokzbani ljwellcho ganga.

⁴ Na' Chioza', beena' bisla cho' kwenche bi kwiayi'cho, bliile' cho' yel' ben' wen che'na' len yel' chaki che'na'.

⁵ Aga inacho daa bencho dii wennan' bisle' cho', san daa biyesh'lall'lile' cho'n. Na' bixis biyibe' yichjlall'do'chona' kwenche biyakcho ben' wen, na' Espíritu Santo che'na' bikobe' yel' mban chechona'.

⁶ Na' daa wit Jesucristona', beena' bisla cho', Chioza' bzoe' Espíritu Santo che'na' loo yichjlall'do'choki.

⁷ Na' daa biyesh'lallile' cho', biyone' cho' ben' li ben' shao' kwenche goncho lez ikaacho yel' mbanna' nak zejli kani.

⁸ Dillii nakan dii w_xenlall'cho. Na' cheenid' gono' to dii byen wli' wsedilo'n be_n'ka' chaj_le' che Chioza' kwenche segake' w_neyi gongake' wen. Diikin nakgakan wen na' gaklenan yog' be_n'.

⁹ Bi g_akguedlenzo' be_n' ni che cho'a dill'ka' chyiljall'gake', ni daa nazgake' ben dii xozxtoe'ka' daa bi chiyoll chido, ni bi g_aklebilo' be_n'ka' chakguedz ni che leya' daa bzej dii Moiséza'. La' bi chaklengakan be_n' na' bibi zak'gakan.

¹⁰ Na' shi no chgoo be_n'ka' dill' kwenche g_akgake' chop_la, chiyal' we'leno'ne' dill' bich gone' ka', na' shi ba gollo'ne' ka' to chop shii na' bi chzenagkze', bkwaschokle' ka'lə.

¹¹ La' nezicho to kwinzen' chlliyi' kwine' daa nxinj yichjlall'do'ena' na' chontie' dii mala'.

¹² Kat' wselaa Artémaza' wa Tíquiconá' gana' zo', ben to dii byen yidwio' nad' yell Nicópoliza', la' na' ba nchoglallaa lljsoa' shlak te beo'ka' chbe' dii zaga'.

¹³ Goklengach ga zeelo gako' Zénaza', beena' nsed ley che Rómana', na'ch Apóloza'. Be'gake' daa chyallj chchingakile' kwenche koochgake' nez na' bibi iyalljgakile'.

¹⁴ Na' lekzka' be_n'ka' nakcho toz chiyal' sho'logake' gongake' daa nak wen na' gaklen-gake' be_n' shi bi chyallj chchingakile' kwenche ka' wgongake' llin daa ba nsedgake'.

¹⁵ Yog'lol be_n'ki zoalen nad' ni chwapgake' li' chiox. Bwapgach chiox yog'lol be_n'ka' lle' na', be_n'ka' chakgakile' cho' daa nakcho txen chon_lilall'cho Crístona'. Chioza' gaklen-shgue' yog'lol-le. Ka' gakan.

Kart daa bzej Páblona' na' bseleen lao Filemónna'

¹ Nad' Pablo, dia' lillyani daa chyixji'a xtill' Cristo Jesúsza', chzej' li' Filemón. Na' len ben' bish'cho Timotewi chwapnto' li' chiox, daa le chakinto' li', na' daa nakcho txen choncho xshin Chioza'.

² Na' lekzka' chwapnto' chiox ben' zanchó Ápiána', na' ben' bish'cho Arquípona', beena' nakcho txen chdil-lencho dii mala' daa choncho xshin Chioza', na' ben'ka' chdop chllag lillo'na' choe'la'ole Crístona'.

³ Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

⁴ Toshiizi kat' choe'lwill' Chioza' chjadinid' li' na' cho'ane' yel' choxken ni cho',

⁵ la' ba nezid' ka nonlilalloo Xancho Jesucrístona' na' chakilo' yog' ben'ka' nak lall' na' Chioza'.

⁶ Chnabid' Chioza' gaklene' li' gono' ka dii le we'leno' ben' cho'a xtilleena' daa ba wyajli'o kwenche shajni'chilo' kwasloj ka nak dii wenka' naki checho daa nakcho Crístona' txen.

⁷ Ben' bish', chiba chizakid' daa chakilo' bish' ljwello'ka', na' dii xen chtipan lallaa, la' nezid' chtipo' lall' ben'ka' nak lall' na' Chioza'.

⁸ Na' daan, la'kzi nap' yel' wnabia'na' ben' Crístona', na' wak gon' byen inia' li' daa chiyal' gono', shel'ka',

⁹ chakid' wenlan gat'yoid' li' gono' daa cheenid' daa chaki ljwellcho. Nad' Pablo ba nak' ben' gol na' dia' lillyani daa chyixji'a xtill' Cristo Jesúsza',

¹⁰ chnabid' li' to goklen che Onésimoni, beeni nak ka xiin' daa be'lenee xtill' Crístona' shlak dia' lillyani.

¹¹ Kana' wzoalene' li' bi bene' ka dii le gone' xshino'na', san naa wak gaklene' li' ka chaklene' nad'.

¹² Na' chiselaane' lawo'na', la'kzi le chakyeshii lall'dawaani yizee daa chakchgaidee. Na' li' naa, bilebshe', kon gakilo' nad'kzan' chilebo'.

¹³ Goklallaa wkwaana'ne' gaklene' nad' lo xlatjo' shlak dia' lillyani ni che dill' wen dill' kob che Crístona'.

¹⁴ Per bi goklallaa wkwaana'ne' shi bi wchebgaxjo', kwenche yel' goklen daa gono' cha' bi gonyaadiazo'n, san gono'n do yichj do lalloo.

¹⁵ Shi bizee lillo'na' shloll kwenche naa gake' lall' no' toshiizi.

¹⁶ Na' bich gake' to ben' ndoo la yel chone' xshin ben' san gake' ben' bishoo, ben' gakilo'. Nad' le chakidee, na' li' chiyal' gakchilo'ne' aga ka bish' ljwellzo', san ka dowalj ben' bishoo daa nakle toz nonlilall'le Xancho Jesucrístona'.

¹⁷ Na' shi nako' nad' txen lo xshin Crístona', bilebshe', kon gakilo' nad'kzan' chlebo'.

¹⁸ Na' shi bi bene' cho' wa shi bi chbaguee cho', na' wchixjo'n nad'.

¹⁹ Kwin nad', Pablo chzej' dga, na' nia' li': Nad' chixjaan. Na' bi nia' li' lekzka' chbagoo cha' daa ba napo' yel' mban zejli kani.

²⁰ Ben' bish', chnabid' li' yel' goklenni daa chakicho Xancho Jesucrístona'. Ben ka soa' mbalaz daa nakcho toz nxenilall'cho Crístona'.

²¹ Chzej' li' daa nezid' nako' ben' wizoa dill', na' nezid' axt dii xenchlə gono' aga ka daa chnabid' li'.

²² Na' lekzka' nia' li', benshao'sha gana' soa', la' daa choe'lwill-le Chioza' ni cha', non' lez yichej' ni na' wi'e latj yidwia' le'.

²³ Chwap Epáfrazi li' chiox, beeni nak' txen dento' lillyani ni che xtill' Cristo Jesúsza'.

²⁴ Na' lekzka' Márconi, Aristárconi, Démazi, na'ch Lúcazi, ben'ki chaklen nad' lo xshin Chioza', chwagake' li' chiox.

²⁵ Xancho Jesucrístona' soalenshgue' le' na' gaklene' le'.

Kart daa bse_l' to be_n' lao be_n' hebreoka', be_n'ka' non_lilall' Jesucristona'

¹ Kani'yi zan shii Chioza' b_{ch}ine' dii be_n'ka' wdixjee daa golle' legake' na' aga toz ka b_{ch}ine' to toe' kwenche be'lene' dii xoxxto'choka' dill'.

² Na' naa ba zoa te che yell-lioni, Chioza' bse_lee Xiine'na' be'lene' cho' cho'a xtilleena', na' len' nzoe' gak lall' nee yog'te dii de, na' lekzen' bene' yabana' len yell-lioni, diika' bllia Chioza' bia' gak.

³ Len' chli'e ka be_n' choo be_n' xen inleeb nak Chioza', na' chli'e ka nakyen' Xe' Chioza'. Na' len' chone' kwenche yabana' len yell-lioni na' yog'lol diika' lle' lla' lawinka' chongakan kon ka bllie' bia' gongakan daa nape' ye_l' wak kwenche chak kon ka ne'. Na' len' bixis biyibe' yichjlall'do'chona' ka bikwase' saaxya chechoka', na' biyolla' biyep'e yabana' gana' chi'e sh_laa de sh_li che Xe' Chioza', beena' nak be_n' choo be_n' xen, na' ch_nabia'lene'ne'.

⁴ Na' daa bene' dga, bli'e nake' be_n' zak'chi aga ka anjlka', na' lekzka' daa goll Chioza'ne' "Xiin'", nakbia' nake' be_n' zak'chi aga ka legake'.

⁵ La' Chioza' biga golle' ni to anjlka' ka dga golle' Xiine'na':

Li' nako' Xiin',

na' naa daa solo inabi'o inezi be_n' nadaan nak' Xo'.

Na' ni to anjlka' bi' golle':

Nad' gak' Xo',

na' li' gako' Xiin'.

⁶ Na' lekzka' ka bse_l' Chioza' Xiine'na', beena' nak tlish' tyaj, lo yell-lioni, wne':

We'la'oshga yog'lol anjl cha'ka' le'.

⁷ Na' Cho'a Xtill' Chioza' cho'en dill' che anjlka', nan:

Chone' anjl che'ka' be_n'ka' chon xshine'na',

ka be' na' ka be_l'yi'.

⁸ San che Xiin' Chioza' nan:

Li' nako' Chios na' inabi'o zejli ka_ni.

Na' ye_l' w_nabia' cho'na' nakan dii zej sh_li.

⁹ Chibailo' ye_l' li' ye_l' shawaa na' chwiilo' daa nak mal.

Daan Chioza', beena' nak Chios cho', ba bzoe' li' kwenche inabi'o,

na' ba bene' ka soacho' mbalaztech aga ka be_n'ka' nako' txen.

¹⁰ Na' lekzka' nan:

Lin' nako' Chios, na' lin' b_xe bsilo' yell-lioni ka wzolon,

na' li'kzan b_xe bsilo' yabana'.

¹¹ Yog' diika' te chegakin, san li' zoakzo' zejli ka_ni.

Na' yog' diika' yiyigakan ka chiya to xalaan be_n'.

¹² Na' yikwasgako'n,

na' yikobgako'n ka to be_n' chikob xalaane'.

San li', toz ka zo' zejli ka_ni;

biga llia te cho'.

¹³ Ni shlin bin' ye' Chioza' ni to anjl che'ka':

Wche' kwit' de sh_li ni, shlak wzoa' x_ni'ona' be_n'ka' chakzbani li'.

¹⁴ San yog' anjlka' nakgake' wen llin che Chioza', na' chse_lee legake' chaklengake' cho' nakcho be_n' yisle' kwenche bi' kwiayi'cho.

2

¹ Daan, chonan byen wzenagchcho do yichj do lall'cho dill' wen dill' koba' daa ba benicho kwenche bi laacho lo xneze'na'.

² La' diika' bllia Chioza' bia' goncho, diika' wdixjee anjlka', gokgakan to dii zakii, na' yog' ben'ka' wdishjgake' cho'a xtilleena' na' bi bzenaggake'n wxak'zi'gake' kon ka chiya!gak chegake'.

³ Alechlə naa aga wilacho lao yel' zak'zi'na' shi gonicho nakzi daa nak to dii zakii nllab daa ba ben Chioza' checho kwenche yisle' cho' na' bi kwiayi'cho? Zigaate Xancho Jesúza' wdixji'e daa yisle' cho', na'tech ben'ka' bzenag che' bizchopgake' dillaa bi'e.

⁴ Na' lekzka' Chioza' bli'e nan nakan dii li daa bene' ka ben ben'ka' dii zan yel' wak na' dii chon ka chibanicho, na' bselee Espíritu Santo che'na' bene' wde wdeli dii gak gon to tocho kon ka chaklall' Chioza'.

⁵ Aga bllia Chioza' bia' inabia' anjlka' lo yell-lío koba' daa ba ngwee xnezin gone', dga cho'a dill' cheyin naa.

⁶ San nakan ka wna to ben' bzej Cho'a Xtill' Chioza' kani'yi daa na:

¿Nora naknto', neto' ben' yell-lío, chi' yichjzo' neto',
na' zezo' wneyi che neto' naknto' xiin benech?

⁷ Zi lat'zə ki beno' neto' ka anjl cho'ka',
na' nono' neto' to balaan xen wal.

Na' bzo' neto' inabia'nto' lao yog'te diika' beno'.

⁸ Na' beno' yog'lolten lall' na'nto'.

Na' daa bene' lall' na' ben' yell-lioni yog'lol dii de, zevin aga bi de dii bi gak lall' na'cho, la'kzi naa bin' ile'icho gak yog'lol dii de lall' na'cho.

⁹ Per nezicho Jesúza' ba yo'e to balaan xen wal, la'kzi bi bllin sakee ka anjlka' shlak wde' lo yell-lioni goke' benech kwenche wxak'zi'e na' wite' ni checho. La' daa nak Chioza' ben' wenan, bzanile'ne' ble'ile' yel' wita' lo laz yog'lol ben'.

¹⁰ Dii li, Chioza', beena' bxe bsil yog'lolte dii de na' nakgakan che', cheenile' ben' be ben' zil gaggake' xiine' kwenche yichi'e legake' gana' de balaan xen che'na'. Daan, benan byen bzanile' Jesúza' wxak'zi'e na' wite' kwenche bisle' cho'. Na' ka', biyoll bido bene' yog'lol daa nllia Chioza' bia' gone'.

¹¹ Jesúza', beena' ba bixis biyibe' cho', na' cho' ba bixi biyechcho, toz Xachon nak. Daan, bi chiyiyi Jesucristona' ine' nakcho bish' ljwelle'.

¹² Na' chi'e Chioza':

Wi'a dill' cho' lao bish' ljwell'ka',
na' gol inia' li' ladj ben'ka' chdop chllag choe'la'ogake' li'.

¹³ Na' wizne':

Nad' wxenilallaa Chioza'.

Na' sto shii chi'e:

Ni zoalen' ben'ki nak xiin Chioza', ben'ki bene' lall' na'.

¹⁴ Na' daa nak xiine'ka' ben' de beli chen, lekzka' Jesúza' golje' goke' ben' de beli chen kwenche wite' ni checho. Na' ka wite', bsol bnite' yel' wñabia' che dii xiwaa daa gok lall' na'yin wlliai'n ben'.

¹⁵ Na' bisle' cho' ben' yell-lío, cho' nakcho ka ben' ndoo lao yel' wita' shlak mbancho daa chllebcho guetcho.

¹⁶ La' dii li, aga bid Jesúza' kwenche gaklene' anjlkan', san kwenche gaklene' xiin dia che dii Abrahaman'.

¹⁷ Daan, benan byen goke' ben' de beli chen doxen ka nakcho, cho' bish' ljwelle', kwenche yiyesh'lallile' cho' na' soe' gone' ka ben Chioza' lo nee gone' daa nake' bxo'z choo bxo'z xen checho. Na' bzani kwine' wite' kwenche bizi'xen Chioza' saaxya chechoka'.

¹⁸ Na' daa bizo bizakile' btile' daa nan kooyelaan le' bi gone' ka cheeni Chioza', wak gaklene' cho' kat' za' daa cheenin kooyelaan cho' goncho daa bi chazlall' Chioza'.

3

¹ Na' naa, le' beṇ' bish' na' le' beṇ' zan', le' ba nxi nyech yichjall'do'lena' na' ba gox wṇab Chioza' le' kwenche nakle lall' nee, li se wṇeyi ka nak daa ben Cristo Jesúsza', beena' choe'cho dill' nonlilall'chone'. Nake' beena' bsel' Chioza' na' naktie' bṇoz choo bṇoz xen checho.

² Len' bene' yog'lol daa goll Chioza'ne', kon ka ben dii Moiséza' ladj beṇ'ka' nak yell che Chioza'.

³ Na' chidol'ch Jesúsza' balaan xench aga ka dii Moiséza', ka chak che to beṇ' chone' to yoo chooche' balaan xench aga ka yoonaa' daa bene'.

⁴ Yog'z yoo zoa beṇ' bene'n, per Chioza' nake' beena' ben yog'lolte dii de.

⁵ Dii Moiséza', beena' gok wen llin che Chioza', bene' yog'lol diika' golle' gone' ladj beṇ'ka' nak yell che Chioza'. Na' diika' bene' chaklenan kwenche shajniicho diika' zi' we' Chioza' dill' cheyin.

⁶ Per Crístona', beena' nak Xiin Chioza', lekzka' bene' yog'lol diika' golle'ne', na' ngoo lall' nee beṇ'ka' nak lall' na' Chioza'. Na' chon', nakcho lall' na' Chioza' shi soachecho gonlilall'chone' na' yibaicho daa noncho lez lljazoalenchone'.

⁷ Daan, Espíritu Sántona' wne':

Shi chenile daa na Chioza' naanlla,

⁸ bi gagle beṇ' lall'do' wal ka gok dii xozxto'leka'

na' bshaagake' Chioza' daa bi wyajle'gake' gone' ka bchebe' kana' wdagake' gana' bibi chashj chleb.

⁹ Na' wna Chioza': Kana' dii xozxto'leka' gokgake' beṇ' widenag daa bi wyajlegake' gon' daa bcheb' gon' chegake', la'kzi choa yiz ble'gakile' diika' ben' chegake'.

¹⁰ Daan, bllaa legake',

na' wnia': "Toshiizi chongake' kon ka nazan chegake', na' bi chzenaggake' cha'."

¹¹ Daan, lo yel' chllaa cha'na' bcheb', wnia':

Nezganzi wi'a latj gaki chegake' yel' wixi'lall' cha'na'.

¹² Le' beṇ' bish' na' le' beṇ' zan', li wsak' kwenche ni tole bi xinjz yichjall'do'lena' na' gonan ka bich shajle'le na' yilaala'ole Chios yaa Chios banna'.

¹³ San li wtip lall' ljwell-le yog' lla shlak naa ni de latj wzenagle che Chioza', kwenche bi siye' dii mala' le' na' yiyonan le' lall'do' wal.

¹⁴ Nakkzcho Crístona' txen shi shnon mbancho soachecho wxenilall'chone' kon ka wzoacho kana' zi' bxenilall'chone'.

¹⁵ Kon ka na Cho'a Xtill' Chioza':

Shi chenile daa na Chioza' naanlla,

bi gagle lall'do' wal ka gok dii xozxto'leka' kana' wdagake' gana' bibi chashj chleb, kana' biyechj bibiitezgake' Chioza'.

¹⁶ ¿Nora beṇ'ka' beni daa goll Chioza' na' biyechj bibiitezgake'ne', lla? Yog' beṇ'ka' bibej dii Moiséza' Egíptonan' ben ka'.

¹⁷ Na' ¿nora beṇ'ka' bllaa Chioza' choa yiz, lla? Beṇ'ka' bxinj bṇenan, beṇ'ka' wit gana' bibi chashj chleb.

¹⁸ Na' ¿nora beṇ'ka' wna Chioza' chegake' bat lljazi'lall'gake' lo yell-liona' bchebe' wi'e legake', lla? Legaken' beṇ'ka' gok beṇ' widenag lawe'na'.

¹⁹ Na' nezicho bi gok yillingake' gana' yizi'lall'gake' daa bi wyajle'gake' che'.

4

¹ Daan, shlak ni de latj idolicho yel' wixi'lallaa daa ba bcheb Chioza' gone' cho', chiyal' goncho byen kwenche idol' illonichon na' ni tocho bi igaanzcho ka'z.

² La' cho' ba benicho dill' wen dill' kob che Chioza', ka daa beni dii xozxto'choka'. Per la'kzi bengakile'n, bi goklenan legake' daa bi wyajle'gake' cheyin.

³ San cho' ba wyajle'cho cheyin ba nakten gon Chioza' cho' yel' wixi'lallaa daa bllonile' ben'ka' kana' wne':

Daa bllaa legake' na' wnia':

nezganz wi'a latj gaki chegake' yel' wixi'lall' cha'na'.

Per ka nak Chioza', wzoloe' chizi'lallee ka biyoll bxe bsile' yell-lioni.

⁴ La' Cho'a Xtilleena' cho'en dill' che lla gall llana', gana' nan:

Ka bllin lla gall llayina', ba biyoll ben Chioza' yog'lol daa bene', na' bizi'lallee.

⁵ Na' lekzka' cho'en dill' kana' wne':

Nezganz wi'a latj gaki chegake' yel' wixi'lall' cha'na'.

⁶ Per ni de latj gat' to yel' wixi'lall' che zi bal ben' cheeni, la' ben'ka' bengakile' dii nech dill' wen che Chioza' bi gok yillingake' gana' yizi'lall'gake' daa bi bzenaggake' che'.

⁷ Daan, bllia Chioza' bia' che sto lla, na' wde zan yiz wnie' dii Davina' kwenche wi'e dill' che llani naa, na' wne':

Shi chenile daa na Chioza' naanlla,

bi gake lall'do' wal.

⁸ Shel' dii Josuéna' bene' ka yizi'lall' dii xozxto'choka' ka bcheb Chioza' gone' chegake', aga bllia Chioza' bia' sto lla yoblə gat' yel' wixi'lall', shel'ka'.

⁹ Daan, nezicho ni de latj idol' ben'ka' nak lall' na' Chioza' yel' wixi'lall' che'na'.

¹⁰ La' beena' ba bdoli yel' wixi'lallaa daa bcheb Chioza', ba chizi'lallee ka bizi'lall' Chioza' kana' biyoll bxe bsile' yog'lol dii de.

¹¹ Na' cho' chiya' goncho byen idolicho yel' wixi'lallaa daa bcheb Chioza' kwenche ni tocho bi gakcho ben' widenag ka gok ben'ka' kani'yi.

¹² Na' cho'a xtill' Chioza' nsa'n yel' mban na' yel' wak, na' nakan ka to dii chchogch aga ka to spad dii nlatit chop laa. La' chazan ga zeelo loo yichjlall'do'chona'. Na' chli'n lao daa chza'lall'cho loo yichjlall'do'chona' shi nakan wen wa shi nakan mal.

¹³ Ni to diika' bxe bsil Chioza' bi ngashaan lawe'na'. Yog'lolte nez nle'i beena' yizi'e cho' kwent.

¹⁴ Jesús, Xiin Chioza', beena' billin yabana', nake' bxo'z choo bxo'z xen checho, na' daan chiya' soachechcho gonlilall'cho beena' choe'cho xtilliinna'.

¹⁵ Na' bxo'z choo bxo'z xen chechona' chiyesh'lallile' cho' daa nakcho ben' yell-lioz, la' lekzka' btile' daa nan kooyelaan le' wxinj wlene' ka chak checho, per le', wzo wzakile' bi bxinj blene'.

¹⁶ Daan, do lall'cho chiya' ibig'cho xni'a Chioza', beena' chnabia' na' nake' ben' chiyesh'lallii, kwenche yizi'xene' checho na' gaklene' cho' kat' bitteza dii chak checho.

5

¹ Chioza' chbeje' yog' bxo'z choo bxo'z xenka' ladj ben' Israelka', na' chzoe'ne' kwenche inabe' gaklene' ben' wlall' che'ka' na' lljwee lawe'na' yog' daa chzangakile', na' chite' bayix'ka' kwenche chizi'xen Chioza' saaxya che'ka'.

² Na' beena' nak bxo'z choo bxo'z xen nape' yel' chxenlall' che ben'ka' chxinj chlen daa bi ntegakile', la' lekzka' zoe' dii nxoll wxinj wlene' daa nake' ben' de beli chen.

³ Daan, chonan byen chite' bayix'ka' kwenche yizi'xen Chioza' saaxya che'na', na' ka'kz chone' che ben' wlall' che'ka'.

⁴ Na' kono chzoa kwini' gake' bxo'z choo bxo'z xen tobialoze', san Chiozan' chbeje' beena' gak bxo'z choo bxo'z xen che', ka bene' che dii Aarónna'.

⁵ Na' lekzka' Cristona', aga tobialozen' ben kwine' bxo'z choo bxo'z xen, san Chiozan' wlo'ene' balaan daa bzoe'ne' nake' bxo'z choo bxo'z xen. Na' kwine' golle'ne':

Li' nako' Xiin',

na' naa daa solo inabi'o inezi ben' nad' nak' Xo'.

⁶ Na' lekzka' Cho'a Xtill' Chioza' nan:
Li' nako' b̄xoz zejli kani,
ka b̄xoz Melquisedeca'.

⁷ Na' Crístona', shlak wbane' yell-lioni, wchelle' na' wnie' zilljə, wnable' Chioza', beena' nap yel' wak kwenche yisle'ne' lao yel' wita', na' daa goke' ben' wizoa dill', Chioza' bzenague' che'.

⁸ Na' la'kzi goke' Xiin Chios, diika' bllagloe' benan ka wyajniile' daa nak yel' wizoa dill'.

⁹ Na' ka', biyoll bido goke' ka chiya' gake' kwenche wi'e yel' mban daa bi te cheyin ben'ka' chzoa xtilleena'.

¹⁰ Na' Chioza' bzoe'ne' goke' b̄xoz choo b̄xoz xen ka gok Melquisedeca'.

¹¹ Dii zanch de dii we'len' le' dill' che diiki ba wnia', per chonan lallj wzajniida'n le' daa bi chonle ka dii le.

¹² Naa ba gok ssha nombia'le cho'a xtill' Chioza', len' ba chiya' wli' wsedilen ben' yoblə, shel'ka'. Per le'lə ni chyalljzile no wzajni'chi le' diika' bi chontek lallj shajniile che cho'a xtill' Chioza' daa ba bsdle. Ni chonzle ka bi'do' ni chall' na' bin' gak gaob' yel' wao.

¹³ Na' nottezə ben' bin' shajniile' bi daa nak wen na' bi daa nak mal nake' ka bi'do' ni chall'.

¹⁴ San ben'ka' chzoachech chzenaggake' che Chioza', chakbe'gakile' daa nak wen na' daa nak mal. Legaken' nakgake' ka ben' ba cheej chao yel' wao, aga ka bi'do'na' ni chall'.

6

¹ Daan, chiya' goncho ka dii le gakchachcho lo xnez Crístona', na' bi yiyechj yibiilenzcho diika' ba nezkzicho: ka daa chiya' chilenicho dii malka' bencho daa nsa' yel' wit, daa gonlilall'cho Chioza',

² daa chchoa ben' nis, daa chxoā na'choka' yichj ben' kat' chnabcho gaklen Chioza'ne', daa yiban ben' ladj ben' wetka', na' daa wchoglo Chioza' che ben' ga idol' to toe' zejli kani.

³ Chioza' gaklene' cho' kwenche goncho ka dii le gakchacho.

⁴ Ben'ka' ba yoo beeni' che Chioza' loo yichjlall'do'eka', na' ba bnix blliagake' dii wenna' cho'e ben'ka' nak lall' nee, na' zoalen Espíritu Sántona' legake',

⁵ na' ba bnix blliagake' dill' wen che Chioza' na' yel' wak che'na' daa yiyoll yido ile'icho kat' illin llana',

⁶ shi yilaala'ogake' lo xnez Chioza', bich inan yiyaj yilengakile' sto shii. La' lengake' ba chongake' ka ben ben'ka' betgake' Xiin Chioza' lee yag cruza' na' chsi'gake'ne' yel' zto' ladj lkwe' ben'.

⁷ Benecha' zaklebile' to yell-lio dii chiyaalli kat' cheejan nis yeja' daa chxop zekizezi lawinna'. Shi nakan yell-lio wen, beena' chaz chaan yitope' daa yeej gawe' lawinna', na' Chioza' gone' ka gashj ilebchan dii wenka'.

⁸ San shi chashj chlebzan no yag yesh' na' no yag ley, aga bi zakii yell-liona' na' chishj Chioza' bia' blag' cheyin na' wzey wtie'n.

⁹ Na' le' ben' bish'dawaa na' le' ben' zandawaa, la'kzi ba wnia' ka', nezid' kwasloł gonle wen lega ben' ba bisla Chioza'.

¹⁰ Na' Chioza' nake' ben' li ben' shao', na' bi gal-lallee dii wenka' ba benle na' daa ba bli'le chakilene' daa goklenle ben'ka' naklenle lall' nee, kon ka ni chonle naa.

¹¹ Na' cheenid' to tole soale gonchle wen do yichj do lall'le shnon mbanle, kwenche gak chele ka ba nonle lez.

¹² Bi gake' ben' lia, san li gonto ka ba chon ben'ka' zoatezi zoagake' chonlilall'gake' Chioza' na' chzi'gake' banez daa bchebe' wi'e legake'.

¹³ Ka bcheb Chioza' gone' wen che dii Abrahama', bzoa kwine' de taschiw gone' ka bchebe', la' koch no zoa ben' zak'chi ka le' wzoe' de taschiw.

¹⁴ Na' golle': "Dii li gonleey' li' na' gon' ka shesh shan xiin dia cho'ka'."

15 Na' dii Abrahama' wdape' yel' chxenlall' wleze' axt ki bllin lla gok ka bcheb Chioza' gone' che'.

16 Kat'ka' ben' yell-lioki chchebgake' to dii gongake', chzoagake' to ben' zak'chi ka legake' kwenche chakbal daa chchebgake', na' len chonan ka shajle' ben' chegake'.

17 Na' ka'kzə Chioza', goklallee inezi ben'ka' ikaa dii wenna' zi' gone' nan aga wde daa bchebe', san dii li, gonkze' ka wne'. Daan, bzoa kwine' de taschiw.

18 Na' ka nak daa bchebe' gone' len daa bzoa kwine' de taschiw zejin aga wishee daa wne' gone', ni bi chziyee. Na' daa nezicho dga, chtipan lall'cho, cho' ba wbig'cho lawe'na' na' ba nxenilall'cho gone' ka ba bchebe'.

19 Ka chak che barkwa' chchinan to dii chbekwan daa tozga, kan' chon daa ba noncho lez Crístona', chaklenan cho' chajle'chacho na' bi gak choplall'cho. Loo lill xlatj Chioza' wze lechaa daa bkwashaan latja' gana' wzoe' na' bi gok sho'gake', san cho' ba noncho lez sho'cho

20 gana' ba wyoo Jesúsza' na' chnabe' checho, cho' zi' yillincho na'. Na' nake' bxo'z choo bxo'z xen checho zejli kani ka bxo'z Melquisedeca'.

7

1 Melquisedeca' goke' ben' wñabia' che yella' le Salem na' goke' bxo'z che Chioza', beena' liizelozi nak ben' choo ben' xen. Na' ka ziza' dii Abrahama' lo wdila' gana' bene' gan ben' wñabia'ka', jatil Melquisedeca' le' na' wñabe' ka gak wen che'.

2 Na' dii Abrahama' bene' shi kwen yog' diika' bikee che ben' wñabia'ka' lo wdila' na' wleje' tkwenan* bi'en Melquisedeca'. Na' Melquisedec zejin Ben' wñabia' ben' chon daa nak shlichá. Na' lekzka' nake' ben' wñabia' che yell Salema', na' zejin ben' wñabia', beena' chon ka soalen ljwellin mbalaz.

3 Kono nezi no gok xaxnee ni no gok dii xozxto'e, ni kono nezi bat golje' na' bat wite'. Daan nake' bxo'z zejli kani ka nak Xiin Chioza'.

4 Li wwia ka ben' zakii nleb gok Melquisedeca', la' kwin dii xozxto'cho Abrahama' bi'ene' tkwen che de shi kwen che yog' diika' bikee che ben'ka' bene' gan lo wdila'.

5 Ley che dii Moisésza' nan ben'ka' nak xiin dia che dii Levína', ben'ka' nak bxo'z, chiyal' ikaagake' tkwen che de shi kwen che yog' daa chon to to ben' wlall che'ka' gan, ben'ka' nak bish' ljwellgake', la'kzi lengake' nakgake' xiin dia che dii Abrahama'.

6 Per Melquisedeca', la'kzi bi goke' dia che dii Levína', dii Abrahama' bi'ene' tkwen de shi kwen che yog' diika' bikee che ben'ka' bene' gan lo wdila'. Na' Melquisedeca' wñabe' gak wen che dii Abrahama', beena' bcheb Chioza' shesh shan xiin dia che'na' na' gaki che' yell-liona' gana' wzoe'.

7 Na' nezicho kwaslol beena' chnabe' ka gak wen che ben', nakche' ben' zak'chi aga ka beena' chñab gak wen che'.

8 Na' ka nak bxo'zka' chkaa tkwen che de shi kwen che yog' diika' chat' chbe' che ben' wlall che'ka', nakgake' ben' chet. San che bxo'z Melquisedeca', Cho'a Xtill' Chioza' cho'en dill' mbane' toshiizi.

9 Na' bxo'zka', ben'ka' chkaagake' tkwen che de shi kwen che yog' diika' chon ben' wlall che'ka' gan, nakgake' xiin dia che dii Levína', na' wak inacho lenkzgaken' be'gake' Melquisedeca' daa be' dii Abrahama' le',

10 la' kana' jatil Melquisedeca' dii Abrahama', ba nakkzan galj dii Levína' na' gake' xiin dia che dii Abrahama'.

11 Chioza' wleje' dii Aarónna', beena' nak xiin dia che dii Levína', gake' bxo'z kana' bi'e dii xozxto'choka' ley che'na'. Per bxo'zka' wzoa lo dia che dii Aarónna' bi gok yiyongake' cho' ben' li ben' shao' lao Chioza'. Daan, benan byen soa sto bxo'z yoblə, beena' gak ka bxo'z Melquisedeca'.

* 7:2 Bene' shi kwen yog' diika'...na' wleje' tkwenan: Literalmente la décima parte.

12 Na' kwenche to ben' bi nak xiin dia che dii Levina' gake' bxo, lekzka' chonan byen yilla' leya'.

13 La' bxo chechona', beena' choe' Cho'a Xtill' Chioza' xtillee, aga golje' lo dia che dii Levina', san golje' lo dia che dii Judana', beena' konon bxo ichej lo dia che'na'.

14 Nezteicho kwaslo Xancho Jesuza' golje' lo dia che dii Judana', na' Moiseza' bi bzetje' dia che Judana' ka bi'e dill' no xiin dia cheyin gak bxo.

15 Wyajni'chicho dga ba wnia' shi ichej to bxo kob, beena' gak ka bxo Melquisedeca',

16 to ben' bi nake' bxo daa golje' lo dia che dii Levina' kon ka wna leya', san nake' bxo daa bibi de dii gak wliayi'n yel' mban che'na'.

17 La' ki wna Chioza' che':

Li' nako' bxo zejli kani,

ka bxo Melquisedeca'.

18 Na' daa golle' ka', zejin ba wde che leya' daa bi gok gaklenan ben'.

19 La' leya' bi gok yiyonan cho' ben' li ben' shao' lao Chioza', na' bich chiyal' goncho lez gaklenan cho'. San goncho lez beena' ba bzoa Chioza' yiyone' cho' ben' li ben' shao', na' ka' gak ibig'cho lawe'na'.

20 Na' Chioza' bzoa kwine' de taschiw ka bchebe' gone' ka'. Ka wleje' ben'ka' nak xiin dia che dii Levina' gaggake' bxo bi bzoa kwine' de taschiw gaggake' bxo toshiizi.

21 Per ka nak Xancho Jesuza', Chioza' bzoa kwine' de taschiw ka bchebe' wzoe'ne' gake' bxo, la' cho'a xtilleena' cho'en dill' chi'ene':

Nad' Chios ba bzoa' kwin' de taschiw na' aga wiyajid' cheyi dga nia':

“Li' nako' bxo zejli kani,

ka bxo Melquisedeca'.”

22 Na' daa bzoe' Jesuza' nake' bxo zejli kani, nxenlall'cho gon Chioza' checho sto dii wentech aga ka daa bchebe' gone' dii nech.

23 Ben' zan ba gok bxo choo bxo xen, la' daa chetgake' benan byen yizoa lwaagake'.

24 San ka nak Jesuza', daa mbane' zejli kani, nake' bxo choo bxo xen toshiizi.

25 Daan, wak yisle' cho' toshiizi, la' daa nonlilall'chone' wak ibig'cho lao Chioza', la' len' zoe' toshiizi chnabe' gaklen Chioza' cho'.

26 Na' Jesuza', leyen'en' beena' chyalljicho gake' bxo choo bxo xen checho. Nake' ben' nxi nyech, ben' bibi saaxya bene', ben' bi nda' nchene' ni to dii mal, ben' bi wllall' lao dii mala' chon ben' saaxyaka', na' biyep'e' jazoe' yabana' gana' chgoogake'ne' balaan.

27 Na' bi chone' ka ben bxo choo bxo xenka', ben'ka' benan byen betgake' bayix'ka' yog' lla na' bzeygake'b lao Chioza' kwenche zigaate legake' chiyakxen saaxya daa chongake', na' lekzka' betgake' bayix'ka' kwenche chiyakxen saaxya che ben' wllall' che'ka'. San Jesuza', shlin shlaxjzan bzani kwine' wite' ni che saaxya chechoka', na' daa bene' shlinz chonan llin zejli kani.

28 Ley che dii Moiseza' bzoan ben' goke' bxo choo bxo xen la'kzi bi gaggake' dowalj ben' wen. Per ka ba gok ssha chon bxo'ka' llin, Chioza' wne' wzoe' Xiine'na', beena' toshiizi nak dowalj ben' wen, gake' bxo choo bxo xen, na' bzoa kwine' de taschiw gak ka wne'.

8

1 Dga nak dii llialach lao diiki cho'a dill' cheyin: bxo choo bxo xen chechona' zoe' zejli kani na' ba chi'e shlaa de shli che Chioza' yabana' gana' chnabi'e.

2 Na' nake' bxo yabana' gana' non Xancho Chioza' dowalj lill xlatje', na' aga nakan dii ben ben' yell-lioni.

3 Yog' bxo choo bxo xenka' chzoa Chioza' legake' kwenche chjwa'gake' lawe'na' yog' daa chzani ben' wi'ene', na' chitgake' bayix'ka' lawe'na'. Daan, lekzka' benan byen bxo choo bxo xen chechona' bzanile' daa bi'e Chioza'.

⁴ Shel' zoe' yell-lioni aga nake' b̄xoz, shel'ka', la' zoakz b̄xozka' choe'gake' Chioza' diika' nllia leya' bia' we'gake'.

⁵ Diika' chon b̄xozka' bi nakan dowalj ka daa de yabana'. Daan, ka zi' gon dii Moiséza' lill xlatj Chioza', Chioza' bzajniile'ne', chi'ene': "Ben byen gonle yog'te diika' kon ka ba bzajniid' li' lo yaana'."

⁶ Daa chon b̄xoz choo b̄xoz xen chechona' naa zak'chin aga ka daa chon b̄xozka' sto. Na' daa ba bizoe' cho' wen kon Chioza', Chioza' ba b̄chebe' gone' to dii zak'chi checho aga ka daa b̄chebe' lao dii xozxto'choka'.

⁷ Shel' daa b̄cheb Chioza' dii nech gone' che dii xozxto'choka' benan ka yiyakgake' ben' li ben' shao', bi benan byen b̄chebe' gone' sto dii yoblə, shel'ka'.

⁸ Per Chioza' ble'ile' bi ben ben'ka' ka bllie' bia', na' bene' ka wna dii beena' wdixjee xtilleena':

Xancho Chioza' ne': Wllin lla
kat' w̄cheb' sto dii kob dii gaklenan le',
le' zoale Israela' na' le' zoale Judána'.

⁹ Na' aga gakan ka daa b̄cheb' gon' che dii xozxto'leka'
llana' bibej' legake' Egíptona'.

La' legake' bi bengake' daa b̄chebgake' gongake',
na' daan wchoonlall'gakee, na' Xancho Chioza'.

¹⁰ Na' naa de sto dii w̄cheb' gon' kat' illin llana' kwenche gaklen' ben' Israelka'.

Gon' ka kwe' yichjgake' diika' ba bllia' bia' gongake',
na' gon' ka kooshao'gake'n loo yichjlall'do'eka'.

Na' nad' gak' Chios chegake',
na' legake' gakgake' yell cha'.

¹¹ Na' bich gonan byen no wli' wsedi bish' ljwellin,
ni bich gonan byen no wli' wsedi ben' dialla cheyin, ye'ze'ne':

"Chiyal' gombi'o Xancho Chioza'",
la' yog'z ben' gombi'e nad', ka bi'do' ka ben' gol.

¹² "Nad' yizi'xen' xtoleeka',
na' bich lljadinid' saaxya che'ka'."

¹³ Na' daa wna Chioza' gone' to dii kob dii gaklenan legake', zevin daa b̄chebe' gone' kani'yi
ba nakan dii wde cheyin. Na' daa ba nakan dii gol dii ba wde cheyin ba zoa yinitlon.

9

¹ Kana' b̄cheb Chioza' dii nech gaklene' ben' Israelka', bllie' bia' ka chiyal'
we'la'ogake'ne', na' lekzka' bllie' bia' gongake' to lill xlatje' ga we'la'ogake'ne' lo yell-lioni.

² Na' ki nak lill xlatj Chioza' daa bengake': bengake' lo'inna' choplə, na' latj necha'
bsi'gake'n Latj che Chios, na' bzoagake' to candeler na' to mes gana' bkwa'gake' yetxtilka'
lao Chioza'.

³ Na' lechaa daa bzegake' loo lill xlatj Chioza' kwenche bengake'n choplə bkwashaan
latja' sto daa bsi'gake' Latj Ga Zoa Chios,

⁴ gana' bzoagake' to diido' nongake' ka mes de or gana' bzeygake' yala', na' sto yiin
dii nwazjgake' or ka loolə ka koll'lin, na' bsi'gake'n yiin daa yoo daa chonli daa b̄cheb
Chioza'. Na' lo'inna' wyooshao' to xwag de or daa yoo yel' wawa' be' Chioza' legake' daa le
maná, na' lekzka' loo yiina' wyoo bar che dii Aarónna' daa bigaa, na' yaj taaka' gana' nyoj
daa nllia Chioza' bia' gongake'. ⁵ Na' koll' yiina' bzoagake' lwaa lsak' anjlka' le kerubin
kwenche chli'n zoa Chioza' na', beena' yoo balaan xen. Na' xil anjlka' zen chxolgakan
kollinna' gana' chxit' b̄xoza' x̄chen bayix'ka' kwenche chizi'xen Chioza' saaxya che'ka'.
Per aga diikiyen'an cheenid' wsees'chid' le' naa.

⁶ Na' ka ba nzoagake' yog' diika', na'ch b̄xozka' wzolo choogake' lle' zil loo latj necha'
kwenche chongake' ka bllia Chioza' bia' gongake' kat' we'la'ogake'ne'.

7 Per latj wchopina' tochga b̄xoz choo b̄xoz xenna' de lsens sho'e shlin non twiz. Na' kat' cho'e, chonan byen lljwee x̄chen bayix'ka' daa wx̄itee loo latja' kwenche yizi'xen Chioza' xtoleena' na' xtol' ben' wlall che'ka' daa bi chakbe'gakile' chongake'.

8 Na' Espíritu Sántona' chzajniile' cho' daa chon b̄xoza' ka' zejín shlak ni chon lill x̄latj Chioza' llin daa bengake' yell-lioni, bin' gat' lsens sho'cho Latja' Gana' Zoa Chioza'.

9 Na' yog' diiki chzajniin cho' zoacho naa nan la'kzi be'gake' diika' bzangakile' lao Chioza' na' betgake' bayix'ka' na' bzeygake'b lawe'na' kwenche be'la'ogake'ne', diika' bengake' bi bizogakin yixis yiyibgakan yichjlall'do'eka' kwenche gongake' lez ba bizi'xen Chioza' xtoleeka' toshiizi.

10 Diiki zeelo bengakan llin che to beli chen che'ka'chga: ka che no dii bi gak yeej gaogake' wa ka che daa chiya' gongake' kwenche yixis yiyib kwingake'. Na' yog' diiki bengake' benan llin shlak bin' gon llin dii koba' b̄cheb Chioza' gone'.

11 Per naa ba bid Crístona', beena' nak b̄xoz choo b̄xoz xen checho, na' nsee dii wenka' chbezcho gak. Na' lill x̄latj Chioza' gana' billin Crístona' nakan dii zak'chi na' dowalj daa aga no ben' yell-lío b̄xe bsile'n, la' bi nakan che yell-lioni.

12 Na' Crístona', aga bexee no x̄chen shib wa no x̄chen goon ka wyo'e Latja' gana' zoa Chioza', san daa wlalj x̄chene'nan' wyo'e shlin shlax̄jz, na' che toshiizin wdixje' xtol'choka'.

13 B̄xoza' b̄chine' x̄chen goon na' x̄chen shib, na' de che bakdo'na' chzeygake', na' b̄xiteen ben'ka' bi nxi nyech lao Chioza', la' kan' na leya' chiya' gak kwenche bixi biyech kwerp che'ka' lao Chioza'.

14 Na' shi kan' nakan, ¿alechl̄e x̄chen Crístona', beena' ni to dii mal bi nda' nchene', nsa'chan yel' wak? Espíritu Sántona', beena' zoa zejli kañi, goklene'ne' kwenche ben kwine' lall' na' Chioza' na' wlalj x̄chene'na' daa yixis yiyib diika' nda' nchen yichjlall'do'choka', diika' chon ka kwiayi'cho. Na' ka', inezicho ba biyakxen xtol'choka' na' gak goncho daa cheeni Chioza', beena' nak ben' yaa ben' ban.

15 Daan, Crístona' b̄xie' dii koba' daa b̄cheb Chioza' gone' checho, cho' gox w̄nabe'. La' daa bi'e yel' mban che'na' wite' ni checho, wdixje' saaxyaka' bencho shlak ben leya' llin, kwenche gak ikaacho daa b̄cheb Chioza' gone' checho zejli kañi.

16 Shi to ben' ba bene' lishi daa yikwaanlene' to ben', aga wak ikaa beena' diika' chwal' yisha' shi bin' guet beena' chikwaan.

17 La' yisha' daa bene' solo gonan llin kat' ba wite', na' bibi zakiin shlak ni mbane'.

18 Daan, ka b̄xe Chioza' dii necha' b̄chebe' gone', bene' byen betgake' bayix'ka' blalj x̄chemka'.

19 La' biyoll bzajniin dii Moiséza' dii x̄ozxto'choka' yog' diika' nllia leya' bia', na'ch bexee lat' xa xil' dii mben dii x̄na na' txis daa le hisopo na' b̄leeje'n loo chen che shibka' na' che goonka' betgake' na' zi lat' nis, na' b̄xiteen lee libra' gana' nyoj leya', na' lekzka' b̄xiteen yog'lol' ben'ka' lle' na'.

20 Na' golle' legake': "Chennin chonan ka chakli daa n̄heb Chioza' gone' checho na' lekzka' zejín chiya' goncho yog' daa nllie' bia' goncho."

21 Na' lekzka' b̄xit' dii Moiséza' chenna' lill x̄latj Chioza' daa bengake' de lech' na' yog' diika' b̄chingake' lo'inna' ka be'la'ogake'ne'.

22 Leya' bllian bia' nan de dii zan daa chiya' wx̄it'gake' x̄chen bayix'ka' kwenche yixi yiyechgakan lao Chioza'; na' kono yiyakxen cheyin shi bi lalj chenna'.

23 Benan byen wlalj x̄chen bayix'ka' kwenche bixi biyech diika' ben llin lill x̄latj Chioza' yell-lioni, diika' nak ka b̄xen che diika' de yabana'. Per diika' de yabana', byalljin lalj to chen dii zak'chi aga ka x̄chen bayix'ka'.

24 La' Crístona' aga wyo'e loo lill x̄latj Chioza' daa ben ben' yell-lioni daa bi nakan dowalj ka daa de yabana', san yabanan' wyo'e kwenche ch̄nabile' Chioza' yizi'xene' checho.

²⁵ Na' aga zekizezin wyo'e be' kwine' blalj x̄chene'na', ka ben b̄xoz choo b̄xoz xenna' ze twiz wej wyo'e gana' le Latj Ga Zoa Chios kwen̄che b̄xitee x̄chen bayix̄'ka'.

²⁶ Shel' byalljin gone' ka chon b̄xozka', ba be' kwine' wite' zan shii, shel'ka', wzolozan ka wx̄e wzil yell-lioni. Per aga kan' nakan. San naa llaki zeelo, shlin shlax̄jzan bzani kwine' wite' ni checho kwen̄che bsol bn̄ite' saaxya chechoka'.

²⁷ Na' kon ka llia bia' gak che to to beñ' yell-lioni guete' shlinz, na'tech w̄choglo Chioza' nak gak che to toe',

²⁸ ka'kzə Crístona' be' kwine' wite' shlinzə kwen̄che bsol bn̄ite' xtol' beñ' yell-lioki. Na' ka yiyede' de wchop shiyi, aga yiyede' kwen̄che wsol wn̄ite' xtol' beñaan, san yidixi'e beñ'ka' chbezgake'nen'.

10

¹ Ley che dii Moiséza' chzajniin cho' lat' che dii wenka' zi' za' gon Chioza', na' bi nakan ka daa nak dowalj. Daan, bi chzaki leya' yiyonan beñ' li beñ' shao' beñ'ka' yog' yiz chitgake' bayix̄'ka' chzangakile' we'gake' Chioza' ka nllian bia' gongake'.

² Shel' daa chitgake' bayix̄'ka' gok b̄ixis biyiban saaxya che'ka', aga wyooch yichjgake' nan nakgake' beñ' saaxya na' bich betgake' bayix̄'ka', shel'ka'.

³ Per daa betgake' bayix̄'ka' lao Chioza' ze twiz wej bisa'lan lall'gake' saaxya che'ka',

⁴ la' x̄chen goonka' na' x̄chen shibka' bi gak yisol yin̄itan saaxyaka'.

⁵ Daan, ka bid Crístona' yell-lioni, golle' Chioza':

Aga cheenchilo' no wit bayix̄' lawo'na' wa izangakile' bichlə dii gongake' li', san ba beno' nad' beñ' de beli chen kwen̄che izanid' kw̄in' lo lazgakin.

⁶ Bi chibailo' no wit bayix̄'ka' wa wzeygake'b lawo'na' kwen̄che wsol wn̄ito' saaxya che'ka'.

⁷ Na'ch wnia' li': "Ka choe' libr cho'na' xtillaa, Chios cha', ni zoa' kwen̄che gon' daa cheenilo'."

⁸ Na' zigaate wne': "Aga cheenchilo' no wit bayix̄' na' wzeygake'b lawo'na' wa gongake' bichlə dii gongake' li' kwen̄che yizi'xeno' xtol̄eeka'", la'kzi nakgakan daa nllia leya' bia' gongake'.

⁹ Na'tech chi'ene': "Chios cha', ni zoa' kwen̄che gon' daa cheenilo'." Na' daa golle' ka' zejin bzoe' ka'lə dii gola' ben b̄xozka' na' b̄xie' to dii kob lwaayi daa bzoe' ka'lə.

¹⁰ Na' daa ben Jesucrístona' ka cheeni Chioza', be' kwerp che'na' na' wite' shlin shlax̄j ni checho, kwen̄che bixi biyech yichjlall'do'chona' lao Chioza'.

¹¹ B̄xozka' chilalgakile' choe'la'ogake' Chioza' yog' lla, na' zekizezi chitgake' bayix̄'ka' lawe'na', la'kzi biga gak yisol yin̄itgakan saaxya che'ka'.

¹² San Crístona' bzani kwine' wite' shlin shlax̄j kwen̄che bsol bn̄ite' xtol'choka'. Na' ka bibane', jachi'e sh̄laa de sh̄li che Chioza' gana' ch̄nabia'lene'ne'.

¹³ Na' na' zoe' chbeze' shlak wzoa Chioza' beñ'ka' chwiyi le' x̄ni'ena'.

¹⁴ Na' daa bzani kwine' wite', biyone' beñ'ka' bene' lall' na' Chioza' beñ' li beñ' shao' zejli kani.

¹⁵ Na' lekzka' Espíritu Sántona' bi'e dill' cheyi dga, kana' wne':

¹⁶ Ki nak daa ch̄chēb' gon' chēgake' kat' illin llana', na X̄ancho Chioza': Gon' ka kooshao'gake' loo yichjlall'do'eka' diika' nllia' bia' gongake', na' gon' ka kwe' yichjgake'n.

¹⁷ Na' wnache': Bichga lljadinid' saaxya che'ka' ni xtol̄eeka'.

¹⁸ Na' shi Chioza' ba bizi'xene' xtol' beñ', aga chyalljch witgake' bayix̄'ka' kwen̄che yiyakxenan.

¹⁹ Le' beñ' bish' na' le' beñ' zan', daa ba wit Jesucrístona' na' blalj x̄chene'na' ni checho, wak sho'cho do lall'cho Latja' Gana' Zoa Chioza'.

²⁰ Daa bi'e kwerp che'na', bsalje' to nez kob dii lljwa'n cho' gana' de yel' mban zejli kani. La' kwerp che'na' zaklebin lechaa daa ze loo lill xlatj Chioza' daa bchez' ka wite', na' zejlin byalj latja' gana' zoa Chioza' kwenche gak sho'cho.

²¹ Na' Jesucristona', beena' nak liizelozi bxo'z choo bxo'z xen, nake' bxo'z checho, cho' nakcho lall' na' Chioza'.

²² Daan, chiya' l' ibig'cho lao Chioza' do yichj do lall'cho, na' wxenilall'cho wlebe' cho', la' nezicho ba nxi nyech yichjlall'do'chona' daa ba bsol bnite' xtol'choka', na' ba bixi biyechi kwerp chechoki nis xtila'.

²³ Chiya' l' soachehcho goncho lez lljazoalencho Chioza', kon ka choe'cho dill', la' nezicho chone' ka nchebe'.

²⁴ Na' chiya' l' yiyiljall'cho nakla ka goncho gaklen ljwellcho kwenche to tocho gakchi ljwellcho na' gonchcho dii wen.

²⁵ Bi chiya' l' kwej yichjcho daa chdop chllagcho choe'la'ocho Chioza' ka chonz bal ben', san chiya' l' wtip lall' ljwellcho, ¿alechli naa daa chakbe'icho ba zoa yiyed Xanchona'?

²⁶ Na' shi ni chonchcho dii mala' daa nezicho bi chiya' l' goncho kat' ba nombia'cho dill' li che Chioza', bich bi de we'cho Chioza' kwenche yizi'xene' xtol'choka'.

²⁷ Lechoza' kwezcho do chall chllbzcho wchoglo Chioza' checho llana' wzalee ben'ka' chakzbangakile'ne' lo yi'na' chal'ni' daa wlliai' legake'.

²⁸ Kat' to ben' bi chzenague' che ley che dii Moiséza', shi zoa chop shon ben' ble'gakile' daa bene', na' chchoglo guete' na' kono gak yiyesh'lallii le'.

²⁹ ¿Alechlin ki gak yel' zak'zi'na' idol' beena' chonile' nakzi Xiin Chioza' na' xchene'na' daa blalje', na' chnie' zban che Espiritu Sántona' beena' chiyesh'lallii cho'? La' xchene'nan' bixis biyiban yichjlall'do'chona', na' ka blalje'n bxie' dii koba' daa bcheb Chioza' gone' checho.

³⁰ Na' nezicho Chioza' wne': "Nad' yizi'a wzon che beena' chon dii mala', na' wsak'zi'ane' ka chiya' l' gak che'." Na' lekzka' wne': "Nad' Xanle wchogloa' chele, le' nakle yell cha'."

³¹ ¡Nyesh'laz wal inleeb gak che beena' wchoglo Chios yaa Chios banna' che' sak'zi'e!

³² Li lljadini ka nak dii lalljka' ble'ile ka bleble beeni' che Chioza' loo yichjlall'do'lena', na' bizo bizakile' yel' zak'zi'ka' bdil' bllagle.

³³ Bal-le biya dii ben wna ben' le' na' biya dii bchi' bsak'gake' le' lao lkwe' ben'. Na' zi bal-le goklenle ben'ka' biya dii gok chegake'.

³⁴ Na' biyeshile' ben'ka' got' lillyana', na' wzoale mbalaz la'kzi bikaa ben' bi dii de chele, daa nezile de to dii wench chele yabana' daa bi te cheyin.

³⁵ Daan, bi kwej yichjle daa wxenilall'le Chioza', la' to banez choo banez xen si'le cheyin.

³⁶ Chiya' l' so sakile diika' chen chle'ile kwenche yiyoll yido gonle ka cheeni Chioza' na' gaki chele daa nchebe' gone'.

³⁷ La' Cho'a Xtill' Chioza' nan:

Ba zoa gaoshosh yiyed beena' chiya' l' yiyed, na' aga wllachile'.

³⁸ Na' beena' nak ben' li ben' shao' daa nonlilallee nad' ibane' zejli kani.

Na' shi bich gonlilallee nad', bich ile'shiidee.

³⁹ Per cho', aga nakcho ka ben'ka' kwiayi' daa chibiigake' bich chonlilall'gake'ne', san cho' zoacho nonlilall'chone' yilacho bi kwiayi'cho.

11

¹ Daa nonlilall'cho Chioza', lennan' chonan kwenche chakliyicho daa noncho lez na' chajle'chacho cheyi daa bin' ile'icho.

² Daa benlilall' dii xozxto'choka' Chiozan', ble'shiile' legake'.

³ Na' daa nonlilall'cho Chioza', nezicho len' bxe bsile' yabana' len yell-lioni na' ka bene'n aga bi bchine', san kon ka wnie' wxw wzil yog' diika' chle'icho.

⁴ Daa benlilall' dii Abela' Chiozan', bi'ene' to dii zak'chi aga ka daa be' dii Caínna'. Na' daa benlilalleene', Chioza' wne' che' goke' ben' li ben' shao' na' bibaile' diika' bi'ene'. Na' la'kzi ba wit dii Abela', daa benlilallee Chioza' ni chzajniin cho' ka chiya' goncho.

⁵ Na' daa benlilall' Enoca' Chiozan', bi ble'ile' yel' wita', san Chioza' bikeene' shi'a shbane' na' koch no ble'i le'. Na' ka zi' yikaa Chioza'ne' wzeyi che' chone' ka chazlall' Chioza'.

⁶ Na' shi bi gonlilall'cho Chioza', aga wak goncho ka ile'shiile' cho', la' chonan byen beena' cheenile' gombi'e Chioza' chiya' shajli'e che' nan zoakze' na' chone' wen che ben'ka' chiylj le'.

⁷ Daa benlilall' dii Noéna' Chiozan', wyajli'e ka bsi'nile'ne' che yejsiwaa daa zi' za' gak daa konon' yen ile'i. Na' daa bllebe' Chiozan', bzenague' che' na' bene' barkwa' gana' wyoo do bxoone' kwenche bilagake'. Na' daa benlilallee Chioza' na' bzoe' xtilleena', bli'n ben'ka' wlliaiyi' yell-lioni gokgake' ben' mal. Na' Chioza' ble'ile'ne' ben' li ben' shao' daa benlilalleene'.

⁸ Na' ka'kzə dii Abrahama', daa benlilallee Chiozan', bzenague' ka goxe' le' na' golle'ne' shaje' lljsoe' to latj dii bchebe' wi'ene' gakin che'. Na' wzee lalle'na' zeje' la'kzi bi wnezile' gan illine'.

⁹ Na' daa benlilallee Chiozan', jsoe' ka ben' zit' lo yell-liona' bcheb Chioza' wi'ene'. Na' bene' lille'na' de lech', ka'kzə dii Isaaca' na' dii Jacoba', ben'ka' lekzka' goki chegake' daa bcheb Chioza' lao dii Abrahama'.

¹⁰ Na' dii Abrahama' jsoe' na', la' nezile' wllin lla lljazoalene' Chioza' to latj wen daa ben kwin Chioza', daa bi te cheyin.

¹¹ Na' lekzka' daa benlilallee Chiozan', wyajli'e gon Chioza' ka soa xiine' la'kzi ba nake' ben' gol na' nakte dii xoole' Sárana' nool will.

¹² Ka' gok wzoa ben' zan inlleb xiin dia che', ka beljka' llia xan yabana' na' ka yoxa' chi' cho'a nido'na' daa kono ibabi, la'kzi ba nake' ben' gol ka wzoa xiine'na'.

¹³ Yog' ben'ki ni nonlilall'gake' Chioza' ka witgake' la'kzi lo yell-lioni bi wxi' wkaagake' diika' bcheb Chioza' wi'e legake'. Per wnezgakile' wllin lla gak ka wne', na' bibagakile' daa zi' gak. Na' wnagake' nakgake' ka ben' zit', ben' za' xtit shollz lo yell-lioni.

¹⁴ Na' daa wnagake' ka', zedin ni chbezgake' gana' gak dowalj lallgake'.

¹⁵ La' shel' gokgakile' yella' gana' wza'gake' nakan dowalj lallgake', zak biyajgake' na' dii yoblə shel'ka'.

¹⁶ San legake' wzelall'gake' yillingake' yabana' gana' zoa to lallgake' dii wench. Daan, Chioza' bi chiyiile' daa nagake' nake' Chios chegake', na' ba nonshawee gana' lljzoa-gake'.

¹⁷ Na' dii Abrahama', beena' bcheb Chioza' gak xiin dia che'na' ben' zan, daa benlilalleenen' bzenague' che' kana' golle'ne' izani xiine'na', bi'na' nak tlish' tyaj, wite'b lao Chioza' kwenche gakbia' shi dii li nxenilalleene',

¹⁸ la'kzi ba goll Chioza'ne': "Xiin dia cho'ka' galjgake' lo xiin dia che dii Isaaca'."

¹⁹ Na' daa wyajle' dii Abrahama' nap Chioza' yel' wak yisbane' ben' wetka', wak inacho Chioza' bisbane' xiine'na' ladj ben' wetka' daa biz bi'e latj wite'b'.

²⁰ Na' lekzka' dii Isaaca', daa benlilallee Chiozan', wnable'ne' gone' ka gak wen che xiine' Jacoba' na' Esaúna' llaka' zi' za'.

²¹ Na' lekzka' dii Jacoba', daa benlilallee Chiozan', ka ba zoa guete' wnable'ne' gone' ka gak wen che chopte xiin dii Joséna', na' de nchish'zi yag bar che'na' be'lawee Chioza'.

²² Na' lekzka' dii Joséna', daa benlilallee Chiozan', kana' ba zoa guete', bi'e dill' wllin lla yichej ben' Israelka' Egíptona', na' golle' legake' yisa'gake' llit wet che'na' kat' yilleshgake'.

²³ Na' lekzka' daa benlilall' dii xaxna' dii Moiséza' Chiozan', ka goljb' bkwash'gakeeb' shon beo' daa ble'gakile' ka xochi gokb'. Na' bi bllebgake' daa bchoglo faraónna' guet bdo'ka'.

²⁴ Na' lekzka' daa benlilall' dii Moiséza' Chiozan', ka bgole' bi goonile' ina ben' nake' xiin bi' nool che faraónna'.

²⁵ Wyazlall'che' biya dii sak'zi'lene' ben' wlall che'ka', ben'ka' nak yell che Chioza', aga ka daa gone' dii malka' nak toldezə daa chibayi ben'.

²⁶ Gokbe'ile' zak'chi kwell ine ben' che' ni che Crístona', aga ka daa si'e banez che yel' wni'ana' de Egíptona', daa bzoa yichje' dii wenna' we' Chioza'ne'.

²⁷ Daa benlilall' dii Moiséza' Chiozan', bizee Egíptona' na' bi bllbe' illaa faraónna' le', san goke' wal daa wnezile' Chioza', beena' kono chle'i, wzoalene' le'.

²⁸ Na' daa benlilallee Chiozan', bene' Ini Paskwa'. Na' golle' ben' wlall che'ka' witgake' twej xil'do' na' wxit'gake' xchema' yichj puert che'ka' kwenche anjla', beena' lljet bi' byo nechka', bi wite' bi' byo nech che'ka'.

²⁹ Na' daa benlilall' ben' Israelka' Chiozan', gok bidegake' loo nisdona' le Nisdona' Xna, la' Chioza' bene'n chop laalə kwenche gok bidegake' lo yo billa'. Na' ka nan te ben' Egíptoka', to biyejzan na' wche'gake' yel.

³⁰ Lekzka' daa benlilall'gake' Chiozan', bene' ka billee zeeka' nechj yell Jericóna' ka biyoll wyechjgake'n gall la.

³¹ Na' lekzka' nool wdana' wle Rahab, daa benlilallee Chiozan', blebe' ben' Israelka' lille'na' ka bllingake' jawia jayigake' lalle'na' na' bi wlliyi'lene' ben' Jericóna' ben'ka' bi bzenag che Chioza'.

³² Dii zanch dii de inia', per bich bi latj de wi'a dill' ka ben dii Gedeónna', dii Baráca', dii Sansónna', dii Jefténa', dii Davina', dii Samuela' na' dii ben'ka' wdixjee daa goll Chioza' legake'.

³³ Daa benlilall'gake' Chiozan', wkaagake' yell-lio che ben'ka' wdil-lengake', na' wñabia'gake' xochi ka wyazlall' Chioza', na' goki chegake' daa bcheb Chioza' wi'e legake'. Na' Chioza' bisle' balgake' lao bell zniaka',

³⁴ na' zi bale' bene' kwenche bi bzey yi' wala' legake', na' zi bale' bilagake' bi witgakile' spada'. Na' bal ben' blan'ka', ben Chioza' legake' ben' wal, na' ka wdil-lengake' soldadka' nak ben' zit', bengake' legake' gan.

³⁵ Na' Chioza' goklene' bal noolka', bisbane' no xiin che'ka' ba wit.

Na' zi bal ben' biya dii bchi' bsak' ben' legake' ax̄t ka witgake' na' bi goklall'gake' kwej yichjgake' Chioza' kwenche yilagake' lao yel' zak'zi'na', daa bengake' lez gak wen chegake' kat' yisban Chioza' legake'.

³⁶ Na' zi balgake' btitjgakile' na' bet wdingake' legake', na' bchejgake' legake' gdenna' na' wdixjgake' legake' lillyana'.

³⁷ Na' zi balgake' betgakile' yaj, na' zi balgake' wlejgake' choplə kon sierra', na' zi balgake' betgakile' spad. Na' zi balgake' biga wzoa lill xlatjgake' na' bchingake' no xa xil'ka' no xa shibka' lwaa xagake', na' gokgake' ben' yesh'do' na' dii zan dii ben ble'gakile' daa bchi' bsak' ben' legake'.

³⁸ Wdagake' latja' gana' bibi chashj chleb na' do yaa yaoka', na' bigaangake' do xan blejka'zə na' no loo yech. Na' ben'ka' kana', ni lat' bi nan chidol'gake' soa ben' wenka' ladje'ka', shel'ka'.

³⁹ Na' la'kzi Chioza' wyazlallee ka benlilall'gake'ne', ni togake' shlak wzoagake' yell-lioni bi ble'gakile' gak daa bchebe' gone' chegake'.

⁴⁰ La' wlo'e xnezin kwenche aga to lezgake' yizi'gake' banez ka nak daa bchebe' gone', san cheenile' lencho yizi'cho banez che to dii zak'chi kwenche yog'cho yiyakcho kwaslōl ka cheenile'.

12

¹ Na' daa nezicho ben' zan ben'ka' wzoachechgake' benlilall'gake' Chioza', lekzka' cho' chiyal' kwej yichjcho yog' dii chllonan goncho ka cheeni Chioza' na' kwej yichjcho

saaxyana' daa chombegui cho', na' soachehcho gonchcho ka dii le koochcho nez lo xneze'na' ka to ben' chxonj na' chgooyibe' kwenche gone' gan.

² Chiyal' soacho wwiacho ka ben Jesús'a, beena' chon ka chonlilall'cho Chioza', na' lekze' gaklene' cho' kwenche yiyoll yido gonlilall'chone' kwaslol. La' le' bizo bizakile' ka betgake'ne' lee yag cruza', na' bi bene' kwent che yel' zto'na' wxi'e daa nezile' ka yiyoll ile'ile' yel' zak'zi'na', yiba yizakile'. Na' naa chi'e gana' chnabia' Chioza' shlaa de shli che'na'.

³ Chiyal' koo yichjcho ka bizo bizakile' biya daa beni ben' malka' le' kwenche bi lljxakicho ni bi wshe'lall'cho gonlilall'chone'.

⁴ Na' ka nakle le', aga bin' xchenle wlaljle ni cheyi daa chdil-lenle dii mala'.

⁵ Ba gol-lall'le daa wna Chioza' cho' daa nakcho xiine', ka wne': Xiindawaa, bi gonilo' nakzi yel' zak'zi'na' chselaa kwenche wzajniid' li', na' bi yidinjilo' kat' chon' ka yiyakbe'ilo' daa chono'.

⁶ La' nad' Chios, chigwaa shli lall' ben'ka' chakid', na' chsak'zi'a ben'ka' nak xiin'.

⁷ Chtil-le yel' zak'zi'ka' kwenche yigooshlilall'le, la' Chioza' chonile' le' ka' daa nakle xiine'. La' aga ga zoa to bi'do' bi chsak'zi' xabaa leb' kwenche yigooshlilall'b'.

⁸ Na' shi Chioza' bibi gonile' le' kwenche yigooshlilall'le, ka chone' che yog' xiine'ka', zevin nakle ka ben' bi wyoo xayin.

⁹ Kana' nakcho bi'do', xachoka', ben'ka' bisgol cho', bsak'zi'gake' cho' na' wdapchogake' balaan. Na' llialotech wzexj yichjcho wzenagcho che Xacho Chioza', beena' zoa yabana', kwenche gat' yel' mban checho zejli kani.

¹⁰ Na' xachoka', shlak bisgolgake' cho' bsak'zi'gake' cho' kon ka gokgakile' nakan wen. Per Chioza' chsak'zi'e cho' kwenche gaklene' cho' gakcho ben' li' ben' shao' ka nake' le'.

¹¹ Aga no chibayi kat' chllagloe' yel' zak'zi'na', san le chakyeshile'. Per beena' yiyakbe'i cheyi daa chllagloe' na' yigooshlilallee, yisa' che wen na' soe' mbalaz.

¹² Li gondiplall', na' li gon ka dii le gonlilall'le Chioza'.

¹³ Li gon ka cheeni Chioza' kwenche beena' ba chshe'lall' ile'ile' ka chonle na' yiyondiplallee na' bi kwej yichje' Chioza'.

¹⁴ Li gon byen soalenle yog'te ben' mbalaz, na' li wsa'to chele lega ben' nxi nyech lao Chioza', la' kono yillin lawe'na' shi bi nxi nyech yichjlall'do'ena'.

¹⁵ Li gon byen gap wwia ljwell-le kwenche ni tole bi gonle daa wllonan si'le banez daa ba ben Chioza' chele yel' ben' wen che'na', na' kwenche bi galj xe loo yichjlall'do'leka' dii mala' daa wxinj wlenan ben' zan.

¹⁶ Na' ni tole bi talenle no xiin xool ben'. Na' bi gonile nakzi daa nak che Chioza', ka ben dii Esaúna'. Tyeenz yel' wawa' bsha'ile' daa nan gaki che' daa nake' ben' nech.

¹⁷ Na' nezkzile ka wde, goklallee inab xe'na' gak wen che' daa nake' ben' nech, na' bich gokan. La'kzi le wchelle' wnabile'n xe'na', bich bi gok gongake'.

¹⁸ Aga ka gok che dii xozxto'chokan' chak chele. Legake' wbig'gake' kwit yaa Sinaína' na' ble'gakile' chal'niinan, axt wche' chola'n, na' wzen to be' wal,

¹⁹ na' bengakile' wchell trompeta' na' wne Chioza' legake'. Na' ka bengakile' shi'ena' got'yogakile'ne' bich inie' legake',

²⁰ daa le bblebgake' daa goll Chioza': "Nottez yidlej lo yaani chiyal' wítilene' yaja', laa ben' laa bayix'."

²¹ Daa ben ble'gakile' le bsheban legake', axt kwín Moiséza' wne': "Axt chxiztit' daa le chllebchga'."

²² San le' ba wbig'le gana' zoa Chios, ben' yaa ben' banna', gana' le yaa Sión na' Jerusalén daa zoa yabana', gana' lle' lla' ben' zan inlleb anjl che'ka',

²³ gana' ndop nllag ben'ka' nak xiin' Chioza', ben'ka' nak ka bi' nech, na' ba da' lie'ka' lee libr che'na' de yabana'. Na' ba wbig'le lao Chioza', beena' yizi'e kwent che yog'lol ben'.

Na' ba nakcho txen beṅ' li beṅ' shao'ka' ba wit, beṅ'ka' ba biyon Chioza' dowalj beṅ' li beṅ' shao'.

²⁴ Lekzka' ba wbig'le lao Jesúza', beena' be' yel' mban che'na' kwenche bxie' dii koba' daa ncheb Chioza' gone' checho. Na' xchene'na' daa blalje' ni checho chaklenlan cho', aga chonan ka xchen dii Abela' daa wdao xya che dii beṅ' bisheena'.

²⁵ Li wsak' kwenche bi gakte widenag lao Chioza', beena' chne cho'. La' shi beṅ' Israelka' bi bilagake' lo yel' zak'zi'na' daa bi bzenaggake' daa goll Chioza' legake' lo yell-lioni, ¿alechlə cho', aga wilacho lo yel' zak'zi'na' shi yizechj koll'cho beena' zoa yabana' na' bi wzenagcho xtilleena'?

²⁶ Ka wne Chioza' beṅ'ka' kani'yi, shi'ena' benan ka wxo' wñib yell-lioni, per naa ne': "Sto shii gon' ka xo' inib yell-lioni, na' aga toz yell-lioni, san lente yabana'."

²⁷ Na' daa ne' "sto shii gon' ka xo' iniban", zejín yinit yog' diika' bene', diika' te cheyin, na' yigaan diika' biga te cheyin.

²⁸ Na' yel' wñabia' daa gon Chioza' cho' gana' zoe', biga te cheyin. Daan, chiyal' we'chone' yel' choxken na' we'la'ochone' ka chazlallee na' gall illebchone'.

²⁹ La' Chios chechona' nake' ka to yi' wal daa chzey chte.

13

¹ Li soatezi soa gaki ljwell-le ka chakile to beṅ' bish' goljle.

² Na' bi gal'lall'le wleble beṅ' loo yoo lill-le na' we'le legake' ga yigaangake', la' bal beṅ'ka' ben ka' blebgake' anjlka' lille'ka', la'kzi bi gokbe'gakile'.

³ Li lljadini gaklenle beṅ'ka' de lillyana', na' li gaktezi lenkzlen chak chele ka'. Li gaklen beṅ'ka' chiya dii chchi' chsak' beṅ' legake', na' li gaktezi lenkzlen chak chele ka'.

⁴ Dii wen inleb daa ne' nkaa che', na' le' nshagna'le bi chiyal' talenle beṅ' yoblə, la' Chioza' wsak'zi'e nottez beṅ'ka' soalengake' nool bi nak nool chegake' wa beṅ' byo bi nak beṅ' chegake'.

⁵ Bi chiyal' selall'cho yel' wni'ana', san goncho banez ka'k' dii de checho, la' Chioza' ba wne': "Biga wsan' li' ni bi kwej yichj' li'."

⁶ Daan, wak inacho do yichj do lall'cho:

Xancho Chioza' zoe' chaklene' nad'.

Na' bi gall illeb' shi bi goni beṅ' nad'.

⁷ Na' li lljadini ka ben beṅ'ka' bli' bsedi le' cho'a xtil' Chioza'. Li wwia ka wzoa wlezgake' benlilall'gake' Crístona' toshiizi, na' li gonlilallee ka benlilall'gake'ne'.

⁸ Jesucrístona' biga chillee, lekzen' kani'yi, lekzen' naa na' lekzen' zejli kani.

⁹ Bi we'le latj no wli' wsedi le' dii yoblə dii chyiljall' beṅ' dii gonan ka yilaale lo nez li che Chioza'. Wenchan wzoachech yichjlall'do'choni lo yel' chaki che Chioza', aga ka daa sho'z yichjcho cheyi diika' na' beṅ' bi chiyal' yeej gaocho. La' beṅ'ka' chinal' chinogake'n bi chaklenan legake'.

¹⁰ Daa ba wit Crístona' ni checho, ba chizi'cho to banez daa bi bizi' bxozka' bet bayix'ka' gana' wzoa lill xlatj Chioza' daa bengake' de lech'.

¹¹ Bxoz choo bxoz xenna' jwee xchen bayix'ka' Latja' Gana' Zoa Chioza' kwenche yizi'xene' xtoleeka', per bchejgake' latja' gana' wchengake' kwenche jazeygake' kwerp che bayix'ka'. ¹² Na' ka'kzan gok che Jesúza', lekzka' wlejgake'ne' yella' ka betgake'ne'. Na' wlalj xchene'na' kwenche yisol yinite' saaxya che beṅ'ka' gonlilall'gake'ne'.

¹³ Na' cho' naa, chiyal' nocho Crístona' la'kzi le gakzbani beṅ' cho' ka gokzbangakile'ne'.

¹⁴ La' yell-lioni gani zoacho nakan dii te cheyin, per noncho lez yillincho gana' soacho zejli kani.

¹⁵ Daan, chiyal' we'la'ocho Chioza' toshiizi daa wit Crístona' ni checho, na' koochone' balaan kon cho'a loll'choni we'cho dill' len' nake' Xancho, la' lennan' nakan ka dii chzanicho we'chone'.

¹⁶ Bi gal-lall'cho goncho dii wenna' na' izanicho bi de checho we'chon ben' chyallj chchinile'n, la' lannan' chazlall' Chioza' na' daa choncho ka', len' choe'la'ocho.

¹⁷ Li wzenag che ben'ka' chli' chsedi le' na' li wlexj yichjle lawe'ka', la' legaken' chap chwiagake' le' daa yoo yichjgake' wllin lla yidegake' kwent lao Chioza' daa bengake'. Li wzenag daa nagake' kwenche yibagakile' gon xshine'ka' na' bi gaggakile'n to dii lallj. La' shi bi wzenagle che daa chli' chsedgake', bibi banez cheyin si'le.

¹⁸ Li inabi Chioza' gaklene' neto', la' nezyen'into' chonnto' ka cheenile', na' cheeninto' wsa' chento' wen lao yog'lolte.

¹⁹ Na' chat'yoid' le' inabile Chioza' ni cha' kwenche yob gak yid' sto shii gana' zoale.

²⁰ Chioza', beena' chzoe' cho' mbalaz, bisbane' ladj ben' wetka' Xancho Jesucristona', beena' chap chwia cho' ka chon xan xilaa, beena' choe'la'ochga xil' che'ka'. Na' lekzen' beena' bxe daa bcheb Chioza' gone' checho zejli kani kana' blalj xchene'na' na' wite'.

²¹ Na' Chioza'kzə gonshgue' ka gak gonle dolol dii wenna' ka cheenile' gonle, na' gonshgue' ka gaklen Jesucristona' le' gakte ka chazlallee. ;Sho'shgue' balaan zejli kani! Ka' gakan.

²² Chat'yoid' le' ben' bish' na' le' ben' zan', li koo yichjle diiki chnabid' le' gonle, diiki to chop cho'a ba bzej'.

²³ Na' cheenid' inezile ba bichej ben' bish'cho Timotewa' lillyana', na' shi ba wdaile' yide' ni, na' wchi'ane' yidwianto' le'.

²⁴ Li wwap chiox yog' ben'ka' chli' chsedi le' na' yog' ben'ka' nakle txen nakle lall' na' Chioza'. Na' ben' Italiaki nakcho txen chwapgake' le' chiox.

²⁵ Chioza' gaklenshgue' yog'lol-le.

Kart daa bzej Santiágoná'

1 Nad' Santiago,* nongake' nak' wen llin che Chioza' na' wen llin che Xancho Jesu-crístona', chwap' le' chiox, ka le' nakle ka shllin kwen xiin dia che dii Israela' daa nakle lall' na' Chioza' na' neslesle doxen yell-lioni.

2 Le' ben' bish'dawaa na' le' ben' zandawaa, li yiba yizaki kat' ile'ile yiya yel' zak'zi'.

3 La' ba nezkele kat' chzak'zi'cho daa nonlilall'cho Chioza', chaklenan cho' soatipchcho gonlilall'chone'.

4 Na' li gap yel' chxenlall' lao bittez daa gak chele kwenche yiyoll yido gakchale kon ka chazlall' Chioza'.

5 Shi nole chyalljile yel' sin'na', li inabin Chioza' na' gone'n. La' Chioza' cho'en nottezə ben' chnabe'n, aga no chllonile'n.

6 Li inaban na' li gonyen' lez gone'n na' bi gakchoplall'le. La' beena' chonchoplall' nake' ka bli che niso'da' daa choa' be'na' to ni to na'lə.

7 Beena' chakchoplall', bi gone' lez we' Xancho Chioza' daa chnabe',

8 la' chiya dii na yichjlall'do'ena' gone', na' sha'l' ki sha'l' ka'lə chake' lao yog'lol' daa chone'.

9 Ben' bish'chona', beena' nak ben' yesh'do', chiya'l' yiba yizakile' daa nake' ben' zakii lao Chioza'.

10 Na' ben' bish'chona', beena' nak ben' wni'a, chiya'l' yibaile' daa ba biyakbe'ile' aga no nake' lao Chioza'. La' ka chde che yejdo'ka' lli lyixaa ka'kzan te che ben' wni'aka'.

11 Kat' chla' wbilldo'na' na' chna'n zi'bia' na' chbill yag yeja', na' chllib yeja' llian na' yel' mba cheyinna' chbiayi'n. Ka'kzan ben' wni'ana', yiyol yinite' lao delgens che'na' chone'.

12 Chakomba beena' chzo chzaki chtile' bittez dii mal. La' kat' ba wdie' lawinna', Chioza' wi'ene' yel' mban zejli kani daa bchebe' wi'e ben'ka' chakgakile'ne'.

13 Nottez ben' kat' chza'lallee gone' dii malka', bi chiya'l' ine': "Chioza' bzoe' dii mali lawa'ni". La' Chioza' aga bi dii mal chone' ni bibi dii mal chzoe' lao ben' kwenche gone'n.

14 San daa chzelall'cho goncho dii malan', lennan' chgooyelaan cho' kwenche ixopcho lawinna'.

15 Na' daa chzelall'cho dii mala', chxopcho lao saaxyana', na' saaxyana' daa choncho chlliyi'n cho'.

16 Le' ben' bish'dawaa na' le' ben' zandawaa, bi siye'z kwindle.

17 Chioza', beena' zoa yabana' na' bxe bsile' yog' diika' chzeeni' xan yabana', len' chone' cho' yog'lol' daa nak dii wen dii shao' na' toshiizi zoe' chone' wen na' biga chillee.

18 Len' wyazlallee gone' yel' mban checho zejli kani daa wyajle'cho dill' li che'na', kwenche ladj yog' ben'ka' bxe bsile' gokcho ben' nech ben' biya'o bizi'e, na' zaklebicho diika' chizi' chilapgabe' dii nech daa chzangakile' choe'gabe' Chioza'.

19 Le' ben' bish'dawaa na' le' ben' zandawaa, li wzoa yichjle dga: yog'lol' ben' chiya'l' wsede' wzenague', na' wsakee bin ine', na' gape' to yel' chxenlall' bi illaa iloke'.

20 La' yel' chllaa chloka' chllonan goncho ka cheeni Chioza'.

21 Daan, li choonlall' yog'lol' dii zbanka' chonle na' yog'lol' dii malka' chonle, na' li wlexj yichjle wzenagle cho'a xtil' Chioza' daa ba nezile. La' lennan' napan yel' wak yislan le' kwenche bi kwiayi'le.

22 Aga to wzenagzcho cho'a xtil' Chiozan', san chiya'l' goncho ka nan. Na' shi bi goncho ka nan, chziye'zə kwinchon, shi naa.

23 Beena' to chzenagz cho'a xtil' Chioza' na' bi chone' ka nan, chone' ka beena' chwia cho'alawe'na' lo wanna',

24 na' ka chikwase' chiyoll chwia cho'alawe'na', li chal-lall'tie' nakan nake'.

* 1:1 Santiago Lekzen' Jacóbona'.

²⁵ Beena' bi chal-lall' dii wenna' nllia Chioza' bia' gone' daa yisell yilaan le' lao dii mala', na' zie'n wneyi, na' toshiizi zoa'tip zoashoshe' chone' ka nan, beenan' zoa mbalaz.

²⁶ Shi no chakzi chone' ka cheeni Chioza', per bi chak gox' cho'a lolleena', chziye'z kwinen' na' bibi zakii daa ne' chone' ka cheeni Chioza'.

²⁷ Daa cheeni Xacho Chioza' goncho na' nxi'n lawe'na', len dga: yiyesh'lalicho bi wizebdo'ka' na' nool wizebka' lao dii lalljka' chen chle'gakile', na' gap wwia kwincho bi goncho txen dii malka' de yell-lioni.

2

¹ Le' ben' bish' na' le' ben' zan', ka le' chonlilall'le Xancho Jesucristona', beena' yoo balaan xenna', aga nakzi ben' gakile.

² Shi gana' ndop nllagle yida to ben' nllin xbene'na' niy de or na' nakw xalaane' dii wen, na' lekzka' yida to ben' yesh'do' na' nakwe' xalaane' dii ba bida' bichollee,

³ na' chle'shi'chile beena' le nak xalaaninna', na' che'lene': "Wche' latji gani nak wen", na' che'le ben' yesh'do'na': "Na'zə wze, li'", wa ba che'lene': "Lo yo na'tezə wche'",

⁴ ¿aaga nakzin ba chle'ile bal ben' daa chwia chyile nak nake', na' ba chza'lall'le chegake'?

⁵ Le' ben' bish'dawaa na' le' ben' zandawaa, li wzenag dga: Chioza' ba wleje' ben'do'ka' nak ben' yesh' yell-lioni kwenche do yichj do lall'gake' gonlilall'gake'ne' na' soalengake'ne' gana' chnabi'e, kon ka ba bchebe' gone' che ben'ka' chakgakile'ne'.

⁶ Na' le', chonzile legake' nakzi. ¿Aaga ben' wnia'kan' chsak'zi'gake' le' na' chjtaogake' xya chele lao ben'ka' chnabia'?

⁷ ¿Aaga legaken' chbell chnegake' mal che Xanchona', beena' nakcho lall' nee, beena' le zakii?

⁸ Dii wen inleban chonle shi dii li chonle daa lliyalote nllia Cho'a Xtill' Chioza' bia' gonle daa nan: "Goki bish' ljwello'na' ka chaki kwino'."

⁹ Per shi nakzi ben' gakile, chxinj chlenle, na' ba de xtol'le daa bi chonle ka na ley che Chioza'.

¹⁰ Shi to ben' zeje' chone' yog'te daa nllia ley che Chioza' bia', per shi ton bi gone', doxente leya' chawan xya nape' dol'.

¹¹ Chios, beena' wna: "Bi chiyal' inelene' ben' yoblə", lekzka' wne': "Bi wito' ben'." Na' shi chito' ben', la'kzi bi chnelene' ben' yoblə, chyishjo' daa nllia ley che'na' bia'.

¹² Chiyal' wshaljle wen na' wsa' chele wen kon ka nllia leya' bia', lega ben' nezi wllin to lla leya' daa chisell chila' cho' lao dii mala', wchoglon checho.

¹³ Ben'ka' bi chiyesh'lalii ben', lekzka' Chioza' bi yiyesh'lallile' legake' llana' wchogloe' che ben'. San ben'ka' chiyesh'lalii ben', Chioza' yiyesh'lallile' legake'.

¹⁴ Le' ben' bish' na' le' ben' zan', bibi zjanayin inaz ben' nonlilallee Chioza' shi bi nla' dii wenna' chone'. ¿Awak to daa nonlilall'ze' yislan le' shi bi chone' wen?

¹⁵ Inatezcho to ben' byo wa to noolə, ben' nakcho txen nonlilall'cho Jesucristona', bibi xalaane' de na' chyalljte dii yeej gawe' ka naa ka wxə.

¹⁶ Na' tole ye'lene': "Soashgo' mbalaz, na' gat'shga xalaano' na' dii yeej gawo'", na' bi we'lene' daa chyalljile', bibi zejin ye'zlene' ka'.

¹⁷ Ka'kzan beena' nonlilallee Chioza', shi bi chone' daa nak wen, bibi zjanayin ne' nonlilalleene'.

¹⁸ Zoa ben' ine': "Li' no' nonlilalloo Chioza', na' nad' chon' daa nak wen. Aga wakbe'i ben' shi nonlilalloo Chioza' shi bi chono' daa nak wen. San nad', daa chon' daa nak wen chli'a nonlilallaa Chioza'."

¹⁹ Li' chajli'o toz Chiozan' zoa, na' wenkzan chono' chajli'o. Lekzka' dii xiw'ka' chajle'gakan na' le chllebgakan.

²⁰ Bi gono' ka ben' bi nteyi. Chiyal' gakbe'ilo' shi bi chono' daa nak wen, bibi zjanayin no' chajli'o che Chioza'.

²¹ Daa bzani dii xoxxto'cho Abrahamama' xiine' Isaaca', bchi'eb' lo yaana' nan lljete'b' ka goll Chioza'ne' gone', na' wna Chioza' nak dii Abrahamama' ben' wen lawe'na'.

²² ¿Abi chakbe'ilo' daa benlilall' dii Abrahamama' Chiozan', bzanile' xiine'na'? Na' daa bene' ka', bli'en nan dii licha nonlilallee Chioza'.

²³ Na' billinin daa nyoj lee Cho'a Xtill' Chioza' daa nan: "Abrahamama' wyajli'e che Chioza', na' Chioza' wne' nake' ben' li ben' shao' lawe'na'." Na' wnagake' che' goke' to ben' bllagui Chioza'.

²⁴ Na' chakbe'ile beena' chonlilallee Chioza' nake' ben' wen lawe'na' shi chone' ka cheenile', na' aga to daa inaze' nonlilalleene'.

²⁵ Ka'kzə gok che noolə wdana' wle Rahab. Chioza' wne' nake' ben' li ben' shao' daa bkwashēe loo lille'na' ben'ka' jawia jayi lalle'na', na' bigwee legake' to nez yoblə ka bichejgake' lalle'na' kwenche kono bet legake'.

²⁶ Ka chak che to kwerp, shi bi yoon bishbe, netan, ka'kzan beena' to nonlilall'ze' Chioza' na' bi chone' ka cheenile', bibi zjanayin nonlilalleene'.

3

¹ Le' ben' bish' na' le' ben' zan', bi shanzle selall'le gakte ben' chli' chsedi, la' ba nezczile' kat' yizi' Chioza' cho' kwent wsak'zi'che' neto' chli' chsedinto' ben' shi bi gonnto' ka cheenile'.

² Yog'lolcho chxinjcho. Na' beena' bi chxinje' de cho'a dill' nake' to ben' li ben' shao', na' lekzka' chak inabi'e doxen kwerp che'na'.

³ Kat' chgoocho dona' cho'a kabaya' kwenche gom ka cheenicho, chzakicho chgoochob neza' gana' cheenicho shajb. ⁴ Na' lekzka' li wwiakachi barkwka', la'kzi nakgakan dii xen wal na' chde be' wala' chlligaan diika', ben'ka' chsa' legakan chdagake' toz yagdo' xaninka' na' chajgakan gana' cheengakile'. ⁵ Ka'kzan chak che loll'choni. La'kzi nakan to diido'zə, dii zan dii chshalj chshonan. Nezicho toz bzeyi'do' wak wzeyan to yix' diñ xen wal.

⁶ Na' loll'choni nakan ka to yi'. Na' nakan to dii lliashesh' chiya dii mal na' chxinj chlenan do ka nak benecha' shlak mbane' daa chzenague' che dii xiwaa.

⁷ Benecha' chak gonmaxe' yog'te bayix', ka ba ze xan yabana', ka ba chxob le'in, ka ba yoo loo niso'na'. Per la'kzi chnabi'e legakb,

⁸ bi chak inabi'e lolleena'. Nakan to dii mal dii bi cheeni no inabia' len, na' nakan ka yierb dii chitan ben'.

⁹ Chchincho loll'choni choe'la'ocho Xacho Chioza', beena' nak Xancho, na' lekzka' chchinchon chyishjcho bia' blag' che ben'ka' bxe bsile', ben'ka' bene' lwaa lsakee.

¹⁰ Cho'a loll'choni choe'la'olenchon Chioza' na' lekzka' len chyishjan bia' blag' che ben'. Le' ben' bish' na' le' ben' zan', bi chiyal' goncho ka'.

¹¹ To ga chal nis, aga wak galan nis dii gak yeejcho na' galten nis zxi'.

¹² Le' ben' bish'dawaa na' le' ben' zandawaa, nezile to yag yixwew aga wbian daa ne' aceituna, na' yag uvana' aga wak kwian yixwew. Na' ka'kzə gana' chal nis zxi'na' aga walan dii gak yeejcho.

¹³ Shi ladjlena' zoa ben' sin', ben' chajni, chiyal' wli'en wsa' che' wen na' wlexj yichje' gone' kon ka na' yel' sin'na' daa noe' Chioza' le'.

¹⁴ Na' shi we'le latj wxinj wlen yel' xe'na' yichjlall'do'lēna', na' gonile ben' nakzi, bi chiyal' wshalj wshonle inale napple yel' sin' daa chon Chioza'. La' shi ka' chonle aga dill' lin choe'le.

¹⁵ Ka nak yel' sin'na' daa nale napple, bi nakan dii ben' Chioza', san nakan de yell-liozə dii chalj yichjlall'do'lēna', na' nakten che dii xiwaa.

¹⁶ Gana' zoa ben'ka' chakxe'i ljwellgake' na' chakdilgake' nogaken' mbejlawi, nan' chxe wdil wishesh na' chiya dii mal.

17 Ben'ka' nap yel' sin' daa choe' Chioza', nakgake' ben' chon ka cheenile', na' bi nakgake' ben' wishagdil. Nakgake' ben' wen, ben' wizo a dill', ben' chiyesh'lallii ben', na' aga nakzi ben' chakgakile', na' nakgake' ben' chda do lallii.

18 Ben'ka' chon to dii byen soalen ljwellgake' mbalaz, na' lekzka' chongake' ka soalen ljwell ben' yoblə mbalaz, si'gake' banez goni ben' legake' wen, na' soagake' mbalaz.

4

1 ¿Biche chakile de wdil wshesha' ladjlena' shi aga dii malka' lle' lla' loo yichjlall'do'lenan' chnabia'gakan le'?

2 Chzelall'le bi gat' chele na' bi chatilen. Shel' wxē'ile witle ben' na' ikaale bi de che', na' chakxe'ile' bi de che ben'. Na' daa bi chat' chbe'ile daa chzelall'le gat' chele, chdil chsheshlen ljwell-le. Na' bibi chat' chbe'ile daa bi chnabilen Chioza'.

3 Na' kat' chnabilene'n, bi chone'n daa nezile' chnablen kwēchez gonditjlen we'le cho'a xbayi beli chen chelena'.

4 Le' ben' bi yootli lallin. ¿Abi nezile daa nonle txen dii mala' de yell-lionin chonan ka chakzbanile Chioza'? Nottezə ben' cheenile' gone' txen dii mala' de yell-lioni chakzbanile' Chioza'.

5 Bi gakilo' nazə Cho'a Xtill' Chioza' daa nan: “Daa ba ngoo Chioza' Espiritu che'na' loo yichjlall'do'chonin lialallee toze' le' wzenagcho che'.”

6 Per dii xen chaklene' cho', na' Cho'a Xtilleena' nan: “Chioza' bi chle'shiile' ben'ka' chep cha'lall', per chaklene' ben'ka' nak ben' gaxjlall'.”

7 Daan, li wlexj yichjle lao Chioza'. Na' li soachech bi we'zle latj che dii xiwaa, na' yikwasan ka'lə.

8 Li wxenilall' Chioza' na' soalene' le'. Le' ben' saaxya, li yiyaj yileni che dii malka' chonle. Na' ka le' cheenile' gonlilall'le Chioza' na' gontele txen dii mala' de yell-lioni, li we' latj yixis yiyib Chioza' yichjlall'do'lēna'.

9 Li gakyeshii na' li kwellyesh'. Lwaa wxill-le li kwellyesh'. Li yisha' yel' chiba chizaki chelena' yiyakan yel' chakyeshii.

10 Li gak ben' gaxjlall' lao Xanchona', na' gone' le' ben' choo ben' xen.

11 Le' ben' bish', bi kwell ine che ljwell-le. Beena' chbell chne che to ben' nakcho txen nonlilall'cho Chioza' wa chiya chiyilje'ne', che ley che Chioza'n chbell chnie' na' chiya chiyilje'n. Na' shi ka' chono', lwaa wzenago' daa na leya', ba chzoaz kwino' chchoglo' cheyin.

12 Toz beena' zoa, beena' wdixj leya', na' naktie' ben' chchoglo che ben'. Na' len' wak yisle' ben' wa wlliaeyene'. Na' li', naa, ¿nora nako' yiya yiyiljo' bish' ljwello'na'?

13 Li wzenag, ka le' nale: “Naa wa wxē shajcho yell yoblə na' lljsoacho twiz lljencho delgens na' goncho gan mech.”

14 Ni bi nezile bi gak chele ka wxē. Yel' mban chelena' nakan ka gopaa daa chbe' xtitz na' lli chinitten.

15 Kin chiyal' inale: “Shi Chioza' wi'e latj ibanchcho, na' goncho dga cheenicho goncho.”

16 Per latjin dii inale ka', chshalj chshonləle, na' daa chshalj chshonle nakan mal.

17 Beena' nezi chiyal' gone' wen na' bi chone'n, nakan xya lao Chioza'.

5

1 Li wzenag dga, le' ben' wni'a. ¿Li gosyaadia kwell-le, daa ba za' yel' zi'ka' yen ile'ile!

2 Yel' wni'a chelena' ba gooll' bteban; na' bel' zidaa ba blliaiyib xalaanleka'.

3 Or plat cheleka' ba chasgakan bej. Na' daa nakgakan ka', chaogakan xya chele na' wlliaiy'gakan le' ka chon yi'na' chzey chten. La' ba bkwa' bti'azle yel' wni'ana' naa ba zoa kwiaiyi' yell-lioni.

4 Daa bi be'le laxj ben'ka' bizi' bilap cheleka' chawan xya chele. Na' Xancho Chioza', beena' zeelo nap yel' wak choo yel' wak xen, ba bzenague' xyana' daa chao wen llinka'.

⁵ Yell-lioni ba weej wdaoshao'le na' ba be' cho'a xba beli chen cheleka'. Ba be'la'o kwinle ka ben' choe'la'o to bayix' kwenche wite'b gawe'b, na' kan' gak chele, ba zoa kwiayi'le.

⁶ Ba bchoglole che ben'do' bibi ben, na' ba betle legake', la'kzi bibi bengake' chele.

⁷ Na' le' ben' bish' na' le' ben' zan', li gap yel' chxenlall' axt kat' yiyedch Xancho Jesucristona'. Ben' goz goona' none' lez yizi' yilape', na' nape' yel' chxenlall' chbeze' gak yeja'.

⁸ Ka'kzə le', chiyal' gape yel' chxenlall' na' soachechle gonlilall'le Xancho Jesucristona', la' ba zoa yiyede'.

⁹ Le' ben' bish' na' le' ben' zan', bi gaoz xya che ljwell-le kwenche bi wchoglo Chioza' chele. La' ba zoa gaoshosh yiyed beena' wchoglo che ben'.

¹⁰ Le' ben' bish' na' le' ben' zan', li wwia ka ben dii ben'ka' wdixjee daa goll Xancho Chioza' legake' kani'yi, wdapgake' yel' chxenlall' la'kzi chiya dii wxak'zi'gake'.

¹¹ Dii li, chakomba ben'ka' chizo chizaki yel' zak'zi'ka'. Ba benzkile ka ben dii Joba', bizo bizakile' wdie' lo yel' zak'zi'ka'. Na' nezakile ka ben Xancho Chioza' che' biyoll wxak'zi'e, la' Xanchona' nake' liizelozi ben' chiyesh'lallii.

¹² Le' ben' bish' na' le' ben' zan', dii llialote dga: bi wzoazle de taschiw yabana' ni yell-lioni, ni sto dii yoblə kwenche shajle' ben' chele. Kat' inale: “wakan”, ka'kzan gonle. Na' kat' inale: “bi gakan”, la' bi gakkzannan', kwenche bi gat' xtol'le lao Chioza'.

¹³ Shi nole chak dii chak chele, li we'llwill Chioza'. Na' shi nole zoa mbalaz, li gol inie'.

¹⁴ Shi to ben' bi shawee, chiyal' gaxe' ben'ka' ngoo lall' na'gake' ben'ka' nonlilall' Crístona' kwenche we'llwillgake' Chioza' ni che', na' chebgake' yichje'na' seta' na' inabgake' yiyakile' kon yel' wak che Xancho Jesucristona'.

¹⁵ Na' kat' we'llwillgake' Chioza' na' shajle'gake' gone' daa chnabgake', na' yiyaki beena' bi shao', la' Xanchona' yiyone'ne'. Na' shi ba bxinj blene' na' yiyakxen che'.

¹⁶ Daan, li yixoadol' lao ljwell-le na' li we'llwill Chioza' inab che ljwell-le kwenche yiyakile. Chioza' chzenague' che beena' nak ben' li ben' shao', na' chone' daa chnabile'ne'.

¹⁷ Elíaza', beena' wdixjee daa goll Chioza'ne' kani'yi, goke' ben' de beli chen ka cho', na' ka be'llwille' Chioza' do yichj do lallee wnable'ne' bi gak yeja', na' bi gok yeja' lo yell-lioni shon yiz yo gashjə.

¹⁸ Na' be'llwille'ne' sto shii, na' bizolo yeja' na' biyashj bileb lo yell-lioni dii weej wdaogake'.

¹⁹ Le' ben' bish' na' le' ben' zan', shi tole yilaale lo nez li che Chioza', na' sto ben' yoblə yigwee le' sto shii, to dii wenan chone'.

²⁰ La' chiyal' inezile beena' yigoyoe' to ben' saaxya lo nez mala' na' yigweene' lo nez lina', ba chaklene'ne' yile' lo yel' wita' na' yiyakxen saaxya che'na' la'kzi nakan dii zan.

Kart nech daa bzej Pédróna'

¹ Nad' Pedro nak' postl che Jesucristona', chzej' le', ka le' ba wlej Chioza' gagle lall' nee na' neslesle zoale do Póntona', Galáciana', Capadóciána', Ásiana' na' Bitíniana', gana' bi naki lall-le.

² Kon ka wlo'e xñezin gone' chele kani'teyi, Xacho Chioza' ba wleje' le' na' Espíritu che'na' ba bikobe' yichjall'do'léna' kwenche soale wzenagle che Jesucristona' na' gagle ben' nxi nyech ni che xchene'na' daa bixis biyib le'. Chioza' gaklenshgue' le' dii xen wal na' gonshgue' ka soale mbalaz inleeb.

³ We'la'ocho Chioza', Xa Xancho Jesucristona'. Daa ba biyesh'lallile' cho', ba bene' sto yel' mban kob checho daa bisbane' Jesucristona' ladj ben' wetka', na' soacho gonchon lez toshiizi.

⁴ Na' ikaacho daa ba ngooshawee yabana' daa biga kwiayi', na' daa bibi nda' nchen, na' daa biga te che yel' mba cheyinna'.

⁵ Daa nonlilall'cho Chioza' lekze' wkwash' wkweejlene' cho' yel' wak che'na' kwenche idol' illonicho yel' mbanna' daa ba nakten gone' cho' kat' illin lla te che yell-lioni.

⁶ Na' ni cheyi dgan chiba chizakile, la'kzi llaki naa wde wdeli dii chdil' chllagle tolde.

⁷ Ka nak ora', chiyal' ten lo yi'na' kwenche wli'lawin shi nakan dowalj. Ka'kzan le', kat' chtil-le yel' zak'zi'ka' chli'lawin shi dowaljkzan ba nonlilall'le Jesucristona'. Na' daa nonlilall'léne' zak'chan ka ora', la' ora' wllin lla kwiayi'n. Per le' zoachechle nonlilall'le Jesucristona', kat' ba biyoll wdele lo yel' zak'zi'ka', na' shajla'ole na' sho'le to balaan xen kat' yiyede'.

⁸ La'kzi bin' ile'ilene', le chakilene'. Na' la'kzi bi chle'ilene' naa, chajle'le che' na' dii xen wal chiba chizakile axt bichkz bi dill' chillelile we'le cheyin,

⁹ daa ba nezile gat' yel' mban chele zejli kani daa nonlilall'léne'.

¹⁰ Dii ben'ka' wdixjee daa goll Chioza' legake' kani'yi, be'gake' dill' ka nak yel' chiyesh'lalli che'na'. Na' biyiljyollgake' daa golle' legake' kwenche shajni'gakile' nakan gone' yisle' cho' na' gone' yel' mban checho zejli kani.

¹¹ Na' Espíritu che Crístona'kzan be'léne' legake' dill' che yel' zak'zi'ka' ile'ile' na' che balaan xenna' daa sho'e ka yiyoll tie' yel' zak'zi'ka'. Na' goklall'gake' inezgakile' nakan gak yide' na' bi lla bi goran' gak dga.

¹² Na' Chioza' bzajniile' legake' nan aga legaken' yen ile'gakile' diika' be'gake' xtiliin, san len' yen ile'ilen. Na' lénan' dill' wen dill' kob che Crístona' daa benile ka be'len ben'ka' le' dill' kon yel' wak che Espíritu Sántona', beena' bsel' Chioza'. Na' axt anjlka' cheengakile' inezhgakile' cheyi diiki.

¹³ Na' ni che daa ba ben Chioza' chele, chiyal' se kwasle na' gagle ben' nyeeñ nyeeniyi. Li gonyen' lez dii wenna' gon Chioza' le' kat' yiyed Jesucristona'.

¹⁴ Daa nakle xiin Chioza' na' chzoale xtilleena', bich chiyal' gonle dii mala' wzelall'le kana' bin' gombia'léne'.

¹⁵ San chiyal' soale gagle dowalj ben' li ben' shao'. La' Chioza', beena' gox wñabe' le', nake' dowalj ben' li ben' shao'.

¹⁶ La' Cho'a Xtilleena' nan: "Li gak dowalj ben' li ben' shao', ka nad' nak' dowalj ben' li ben' shao'."

¹⁷ Daa che'le "Xa", beena' chchoglo che ben' kon ka chidol' to toe', chiyal' gall illebléne' shlak zoale yell-lioni gani nakle ka ben' zit'.

¹⁸ Chioza' ba bisle' le' lo yel' mban daa bi nxe bi nzak' daa bkwaanlen dii xozxto'leka' le'. Na' nezile daa bisle' le' aga wdixjile'n or wa plat, diika' chbiayi',

¹⁹ san xchen Crístona' daa zak'chgayi, lënnan' biya'o biziile' le' kana' betgake'ne' ka to xil'do' ba bibi nda' nchen.

²⁰ Kana' zi' xe silte yell-lioni, Chioza' wleje' Crístona' sak'zi'e. Na' naa ba zoa te che yell-lioni ba bide' ni checho.

²¹ Na' ni che Crístonan' ba nonlilall'le Chioza', beena' bisbane'ne' ladj beñ' wetka' na' wlo'ene' balaan xen. Daan, ba chonlilall'le Chioza' na' ba nonlene' lez.

²² Na' le' naa, daa ba chonle ka na dill' li che Chioza' ba bixi biyechle, na' do lall'le chaki ljwell-le. Na' chiyal' gakchi ljwell-le do yichj do lall'le axt ga zeelo.

²³ La' nakle ka beñ' ba golj dii yoblə, per aga de beli chen daa chde cheyi, san Chioza' ba bikobe' yel' mban chelena' daa wyajle'le cho'a xtilleena' daa nsa' yel' mban na' biga te cheyin.

²⁴ Cho'a Xtill' Chioza' nan:

Yog'lol beñ' yell-lioki nakgake' ka yixaa,
na' balaan che'ka' nakan ka yejka' ze lyixaa.

Yixaa chbillan na' chllib yejdo' cheyinna',

²⁵ san cho'a xtill' Chioza' zejli kani den, na' biga te cheyin.

Na' lënnan' dill' wen dill' koba' daa ba wdixje'gakile' le'.

2

¹ Daan, chiyal' choonlall'le yog'lol dii mal, yog'lol de wxiye', na' yel' xe', na' yel' chbell chne che beñ'.

² Ka chon to bdo' cheendo' chdom' nillaa, kan' chiyal' ibil' idonle cho'a xtill' Chioza' daa nak dowalj, kwenche gaklenan le' gonlilall'chlene' na' idol'le yel' mbanna' daa gone'.

³ La' ba bnix bliiatele ka beñ' wen nak Xanchona'.

⁴ Li ibig' lao Xancho Crístona', beena' nap yel' mban, beena' zaklebi yaja' daa bi wyoolallii wen yooka', la'kzi lao Chioza' nake' to beñ' zakii nleb na' wleje'ne' kwenche gone' ka chazlallee.

⁵ Na' lekzka' le', Chioza' ba beñe' to yel' mban kob chele daa nonlilall'le Crístona', na' zaklebile ka yajka' daa chkwaagake' ljwellin kwenche gakan to yoo ga sho' Chioza' balaan. Na' gakle bxož che', na' Jesucrístonan' gaklene' le' kwenche soale we'la'ole Chioza' ka chazlallee.

⁶ Cho'a xtill' Chioza' nan:

Wselaa to beñ' yell Siónna',

na' zaklebile' yaja' daa mbejlawin dii wlejjakile' kwenche gakan yaja' daa wchejcha yoonaa'.

Na' beena' wxenilalleene', biga si'e yel' zto'.

⁷ Ka le' ba nonlilall'le beena' zaklebi yaja', chakbe'ile nake' beñ' zakii. San beñ'ka' bi nonlilall'gake'ne' chongake' ka chillini Cho'a Xtill' Chioza' daa na:

Yaja' daa bi wyoolall' wen yooka',

leyen'lannan' yaja' daa ba nchejcha yoonaa'.

⁸ Na' lekzka' nan:

Zaklebile' to yaj dii chgoo chchew' beñ' na' chchixan legake'.

Chbixgake' daa bi chzenaggake' cho'a xtill' Chioza', na' ka'kzan chiyal' gak chegake'.

⁹ San le', nakle beñ' wlej Chioza' kwenche gonlilall'lene', na' nakle bxož che beena' chnabia', na' yell che', to yell dii biya'o bizi'e. Na' wleje' le' kwenche we'le dill' ka nak yel' wak choo yel' wak xen che beena' bibej le' gana' nak shgasj shchol' kwenche biyoole lo beeni' choo beeni' xen che'na'.

¹⁰ Kana', bi gokle lall' na' Chioza', san naa ba nakle lall' nee. Kana', bi biyesh'lallii Chioza' le', san naa ba chiyesh'lallile' le'.

¹¹ Le' beñ' bish'dawaa na' le' beñ' zandawaa, daa nakle ka beñ' zit' yell-lioni, chat'yoid' le' bi we'le latj we' cho'a xbayi beli chen chelena' daa cheeni inabia' yichjlall'do'lena'.

12 Li wsa' chele wen ladj ben'ka' bi nonlilall' Chioza', kwenche llana' wchoglo Chioza' che to to ben', gakbe'gakile' benle wen na' we'la'ogake'ne', la'kzi naa chnegake' chele nan nakle ben' mal.

13 Daa ba nonlilall'le Xancho Jesucristona', chiyal' wlexj yichjle lao yog'lol ben'ka' chnabia': ka lao beena' liizelozi chnabia',

14 na' ka'kz lao ben'ka' chselee kwenche wdezi'gake' ben'ka' chon dii mala' na' kwee balaan ben'ka' chon wen.

15 Chioza' cheenile' gonle wen kwenche idap cho'a ben'ka' biz chon chna chele, ben'ka' bi nteyi ni bi chajni'gakile'.

16 Li soato lega ben' ba biyell bila', na' aga ni che ba biyell bila'le na' gonle kon daa nan chele. Li soato lega ben' chon ka cheeni Chioza'.

17 Li gap balaan yog'lol ben'. Li gaki bish' ljwell-leka'. Li gall illeb Chioza'. Na' li gap balaan ben' wnabia'na'.

18 Ka le' chonle xshin ben', li wlexj yichjle lao xanleka' do yichj do lall'le. Aga to ben'ka' chonzi le' wen gonile ka', san ka'kzə li goni ben'ka' chsak'zi' le'.

19 La' wenan no gon banez kat' no chsak'zi' le' la'kzi bibi dol' nape' daa ba ngoo yichje' daa cheeni Chioza'.

20 Per shi le' chzak'zi'le ni che to dii mal dii benle, bibi zakiin lao Chioza' gonlen banez. San shi chzak'zi'le ni che dii wenna' chonle na' chonlen banez, lennan' zakii lao Chioza'.

21 Kwenche gonle dgan gox wñab Chioza' le'. La' Crístona' wxak'zi'e ni chele na' bliile' le' nakan chiyal' gonle.

22 Aga bi saaxya ben Crístona', ni bibi dill' wxiye' bi'e.

23 Kana' biz ben wñagake' che', bi biyechj bibi'e, na' ka bsak'zi'gake'ne' bi bwall bshebe' legake', san ben kwine' lall' na' Chioza', beena' chchoglo che ben' ka chiyal'.

24 Crístona' biyoni che' saaxya chechoka' ka wite' lee yag cruza' kwenche bich goncho txen saaxyana', san soacho goncho ka cheeni Chioza'. Na' daa wxak'zi'en, zoale shi'a shao'.

25 Kani'yi wdale ka xil'do' ba wnit. Per naa ba nakle lall' na' Crístona', beena' chap chwia le' ka ben' chap chwia xil' cheyin, na' zie' wñeyi chele.

3

1 Le' noolə zoa ben' chele, li wlexj yichjle lawe'ka' kwenche shi bi chajle'gake' cho'a xtill' Chioza', gakbe'gakile' nakan dii wen ka ile'gakile' nsa' chele wen. Na' aga chini gat'yoile legake' shajle'gake' cheyin,

2 san daa wwiazgake' chonle wen lega ben' chall chlleb Chios shajle'gake'.

3 Bitek sele wñeyi naklə gon kwine' xochi: ka no naklə yipaa yichjle, na' wchinze no bga no niy de or, wa gakwle lech' dii zakii nleb. La' aga diikin dii lialote.

4 San dii lialote gakshao' loo yichjlall'do'ləna' kwenche gakle ben' gaxjlall' na' ben' lall'do' xen, la' lennan' nakan yel' xochi dii bi te cheyin na' zak'chgayin lao Chioza'.

5 La' kan' ben noolka' kani'yi, ben'ka' gok ben' li ben' shao'. Bxənilall'gake' Chioza' na' blexj yichje'ka' bzenaggake' che ben' che'ka'.

6 Ka ben dii Sárana', bzoe' xtill' dii ben' che', Abrahama', na' golle'ne' "xan". Na' le' nakle dia che' shi gonle wen ka bene' na' bi illeble bi gak chele.

7 Na' ka le' ben' byo, li goni xool-leka' wen. Li gapshiigake' daa bi nakgake' chech ka cho' ben' byo, na' daa nezile lengaken' chidol' ikaa yel' mbanna' daa gon Chioza' chele. Li gon dga kwenche bibi wsej wllonan wzenag Chioza' chele kat' choe'llwill-lene'.

8 Na' sto dii nia' le', yog'loltele chiyal' soalen ljwell-le wen, na' gakle ben' lall'do' yesh', na' gaki ljwell-le ka chakile' to ben' bish' goljle. Li yiyesh'lalii ben', na' li gak ben' gaxjlall'.

9 Bi yizi'zle wzon che beena' chon mal chele wa beena' chbell chne chele. San li inabi Chioza' gak wen che', daa nezile gox wñabe' le' kwenche gak wen chele.

¹⁰ La':

Beena' cheeni idie' lo yell-lioni na' gakte wen che',
chiyal' wsakee kwell inie',
na' bi wi'e latj ichej dill' wxiye' cho'a lolleena'.

¹¹ Chiyal' yilaalawee dii mala', na' gone' daa nak wen.

Chiyal' sie' wneyi soalene' ben' mbalaz.

¹² La' Xancho Chioza' chap chwie' ben'ka' nak ben' li ben' shao',
na' chzenague' kat' chnabgake' yel' goklen che'na',
per bi chle'shiile' ben'ka' chon mal.

¹³ Aga no bi goni le' shi toshiizi zele chonle dii wenna'.

¹⁴ Per shi yel' chon wen chelena' wtil'le yel' zak'zi'ka', chakomba le'. Na' bi gall illebzle
bi goni ben' le', na' bi gakshejlall'le.

¹⁵ San do yichj do lall'le li koo Crístona' balaan, beena' nak Xancho. Na' toshiizi li se
wneyi che dill'ka' yilliile lao nottezə ben' inabile' le' cheyi daa ba nonle lez. Na' xochi li
we'lengake' dill'.

¹⁶ Na' li gon daa nezile nak wen daa nakle Crístona' txen, kwenche ben'ka' naz chele bi
chonle wen si'gake' yel' zto'.

¹⁷ Wenchlan sak'zi'cho daa choncho wen, shi ka' cheeni Chioza', aga ka daa sak'zi'cho
daa choncho mal.

¹⁸ La' shlin shlaxjzan wxak'zi' Crístona' ni che saaxya chechoka'. Aga bi xtolee got', per
wxak'zi'e ni checho cho' ben' mal, kwenche bizoalencho Chioza' wen. La'kzi beli chen
che'na' ble'in yel' wita', Espíritu che Chioza' bisbane'ne' ladj ben' wetka'.

¹⁹ Na' wyaje' latja' gana' nej ben' malka'* jtixje'ile' legake' daa bene' gan dii mala' na'
yel' wita'.

²⁰ Legaken' gokgake' widenag kana' wzoa dii Noéna', na' wdap Chioza' yel' chxenlall'
chegake' shlak ben dii Noéna' barkwa'. Na' xon'chga ben'ka' wyoo loo barkwa' bi
wlliyi'gake' loo nisa'.

²¹ Na' daa bila ben'ka' loo nisa' kani'yi, zaklebin daa chchoacho nisa' naa. Na' daa
chchoacho nisa' aga chixis chiyiban kwerp chechoni, san chli'n ba wñabicho Chioza'
yixis yiyibe' yichjlall'do'choni kwenche sho' yichjcho bich bi xto'cho de. Na' de yel'
mban checho zejli kani daa biban Jesucrístona' ladj ben' wetka'.

²² Na' biyepé' yabana', jachi'e shlaa de shli che Chioza' na' chñabi'e lao anjlka' na' lao
bichlə yel' wñabia' dii de.

4

¹ Na' kon ka gok che Crístona' wxak'zi'lene' beli chen che'na', ka'kzan chiyal' izani
kwinle. La' beena' ba wxak'zi' beli chen che'na' bich chñabia' saaxyana' le'.

² Na' bich gonze' daa nazan che beli chen che'na' shlak ni mbane', san gone' ka cheeni
Chioza'.

³ Ba gok to ka't' chonle txen ben'ka' bin' gombia' Chioza', choe'gake' cho'a xbayi beli
chen che'ka', chongake' kon daa nazan chegake', chzoll chnitgakile', chaoxatgake', biz
chegake' chon, na' choe'la'ogake' no yaj yag, diika' chakzbani Chioza'.

⁴ Na' dii xen chakllejgakile' naa daa bich chonle legake' txen lawi diika' bi yejni'alallii,
na' chiya dii chon chnagake' chele.

⁵ Per wllin lla yidegake' kwent lao beena' ba ze kwas wchogloe' che yog'lol ben', ka
ben' ni mban ka ben' ba wit.

⁶ Daan, ben'ka' bengakile' dill' wen dill' kob che Chioza' na' wyajle'gake'n, la'kzi witgake'
ka ba nchogbia' gak che yog' ben' yell-lío, ni mbankzgake' lao Chioza'.

⁷ Daa ba zoa gao kwiayi' yog'lolte dii de, chiyal' gakle ben' nyeen nyeeniya na' sele
wneyi we'llwill-le Chioza'.

* 3:19

⁸ Na' dii lliälote, gaki ljwell-le, la' beena' nap yel' chakina' chonxenlallee ka'k'tezə dii choni beñ' le'.

⁹ Li wleb ljwell-le loo yoo lill-le do lall'le.

¹⁰ To tole chiya! wgonle llin wde wdeli diika' non Chioza' gak gonle kwenche kon ga chyalljan wchinlen gakenle beñ' yoblə.

¹¹ Beena' naki che' wi'e cho'a xtil' Chioza', chiya! ine' kon ka nan. Na' beena' naki che' gaklene' gone' to llin, chiya! wchine' doxente fuerza' be' Chioza' le'. Na' yog'lol daa gonle, li gonan kwenche shajla'o Chioza' daa nakle Jesucristona' txen. La' le' chidolee sho'e balaan na' inabi'e zejli kañi. Kan' nakan.

¹² Le' beñ' bish'dawaa na' le' beñ' zandawaa, bi gakklejile na' yibanzile daa chle'ile yel' zak'zi'ka', la' bi nakan ka dii yibanicho.

¹³ San li yibayi daa lenle chzak'zi'le ka diika' wxak'zi' Crístona', kwenche lekzka' yiba yizakile kat' ile'ile ziza'lene' balaan xen che'na'.

¹⁴ Chakomba le' shi no ine zban chele daa nakle Crístona' txen, la' Espirituna', beena' nak beñ' choo beñ' xen che Chioza', zoalene' le'.

¹⁵ Shi nole chzak'zi'le, wenlan sak'zi'le daa chonle dii wenna' aga ka daa sak'zi'le daa nakle wen xya, wa jlanle, wa benle bichlə dii mal, wa jalalli chele ga bi chak che beñ'.

¹⁶ Na' shi chzak'zi'le daa nakle Crístona' txen, bi chiya! yiyii yido'ile, san li we'la'o Chioza' daa naklene' txen.

¹⁷ Ba bllin lla solo gon Chioza' yel' joschis che beñ'ka' nonlilall'gake'ne'. Na' shi solon ladjchoni, çnakla gak che beñ'ka' bi chzenag dill' wen dill' kob che Chioza', lla?

¹⁸ Na' shi beñ'ka' zej shli dii zan dii chen chle'gakile' na' axt kayaadia yilagake' lawinka', çalechli ki gak che beñ'ka' bi chall chleb Chioza' na' beñ' saaxyaka'?

¹⁹ Na' beñ'ka' chzak'zi' kon ka nllia Chioza' bia' gak chegake', toshiizi chiya! gongake' dii wenna' na' gon kwingake' lall' na' Chioza', beena' bxe bsile' legake', na' gaklene' legake' ka bchebe' gone'.

5

¹ Le' ngoo lo na'le bish' ljwellchoka' nonlilall' Crístona', lekzka' nad' nlan' ka daa nlanle, na' ble'teid' ka wxak'zi' Crístona', na' len' chidołaa ikaa balaan xenna' kat' yilee. Daan, chat'yoid' le':

² Gap wwiale beñ'ka' ba nonlilall' Chioza', beñ'ka' ba none' lall' na'le. Li gonan lega beñ' chibayi gon ka chazlall' Chioza'. Na' aga gonyaadiazlen, ni bi gonle lez gaxjle dii xen, san li gonan do yichj do lall'le.

³ Na' bi gonze ka chñabia'tegal lao beñ'ka' nak lall' na'le, san chiya! wli'le chonle wen lawe'ka'.

⁴ Na' kat' yila' Jesucristona', beena' chñabia' yog'lol beñ'ka' chap chwia beñ'ka' nonlilall'gake'ne', na' gone' le' to balaan xen daa biga te cheyin.

⁵ Na' lekzka' le' bi' xkwid', wlexj yichjle lao beñ' golka'. Na' yog'lol-le chiya! wlexj yichjle lao ljwell-le ganga, na' gakte beñ' gaxjlall', la':
Chioza' bi chle'shiile' beñ'ka' chep cha'lall',
san chaklene' beñ'ka' nak gaxjlall'.

⁶ Li gak beñ' gaxjlall' lao Chioza', beena' nap yel' wak choo yel' wak xen, kwenche kwee le' balaan kat' illin llana'.

⁷ Li gon lall' na' Chioza' yog'lol dii chak chele, la' le' zie' wneyi chele.

⁸ Li gakte beñ' nyeen nyeeniya na' li se kwas. La' dii xiwaa daa chakzi' chakzbani cho' chdan ka to bell zña, ba chbił chdon, na' chyiljan no wlliaiyi'n. ⁹ Li soatip li soashosh gonlilall'le Crístona' na' bi we'zle latj che dii xiwaa, la' nezkzile' doxenzə yell-lioni yog'lol beñ'ka' nakcho txen ba chle'gakile' yel' zak'zi'ka' ka diika' chen chle'ile.

¹⁰ Na' ka ba biyoll wdele yel' zak'zi'ka' shloll, Chioza', beena' nap yel' chiyesh'lall' xen, yiyone' le' ka chazlallee na' gone' ka gakchachle na' yizoatip yizoashoshe' le'. La'

lekzen' gox wñabe' cho' kwenche yidol' cho balaan xen che'na' daa bi te cheyin daa nakcho Crístona' txen.

¹¹ Len' chidolee sho'e balaanna' na' inabi'e zejli kani. Kan' nakan.

¹² Ben' bish'cho Silvónoni, beeni nezid' zoatip zoashoshe' nonlilallee Crístona', goklene' nad' bzej' le' to chop cho'a dill' kwenche wtip' lall'le. Na' dga nia' le' chli'n dii licha chaki Chioza' cho'. Li soatip li soashosh lo yel' chaki che'na'.

¹³ Ben'ki nonlilall' Crístona' yell Babilóniani, ben'ki ba gox wñab Chioza' ka gox wñabe' le', na' lekzka' Márconi, bi'ni nak ka dowalj bi' cha', chwapgake' le' chiox.

¹⁴ Li wwap chiox ljwell-le lega ben' chaki ljwellin.

Soashgale mbalaz yog'lol-le le' nakle Crístona' txen.

Kart wchopi daa bzej Pédróna'

¹ Nad' Pedro, nak' wen llin che Jesucristona' na' nak' postl che'. Chzej' le', ka le' ba nonlilall'cho Jesucristona', beena' nak Chios checho na' ba bene' cho' yel' mban zejli kani daa nake' ben' li ben' shao'. Na' daa nonlilall'chone' nakan to dii zakii.

² Gaklenshga Chioza' le' na' gone' ka soale mbalaz inleeb daa ba nombia'lene' na' nombia'tele Xancho Jesúsza'.

³ Kon yel' wak che'na' ba none' cho' yog'lol daa chyalljicho kwenche soacho goncho ka cheenile' daa nombia'chone', na' lo yel' ben' wen che'na', daa nak dii xen inleeb, gox wñabe' cho'.

⁴ Na' daa nake' ben' wen inleeban, bchebe' gone' ka gake ben' wen ka nake' le', na' yilale lao daa chxinj chlenan ben' yell-lioni daa chongake' daa nazan chegake'. Na' daa bchebe' gone' checho nakan dii wen inleeb na' dii xen zaka'n.

⁵ Daan, le' ba chonlilall'lene' chiya' gonle ka dii le kwenche gonle wen, na' gapchle yel' sin',

⁶ na' inabia' kwinle, na' gaple yel' chxenlall' kat' bi chak chele, na' gonle ka cheenile',

⁷ na' ile'shii ljwell-le na' gakile yog' ben'.

⁸ Shi zizikchli gonle yog' diiki, gonan ka gakbia' lo yel' mban chelena' bi bembia'dadzle Xancho Jesucristona'.

⁹ Per beena' bi chon diiki, nake' ben' bi nteyi daa ba gol-lallee ba bixi biyech saaxya che'na' bene'.

¹⁰ Daan, le' ben' bish'dawaa na' le' ben' zandawaa, daa ba gox wñab Chioza' le', li gon ka dii le soachechle gonle diiki. La' kat' ba chonle diiki bibi de wchixan le',

¹¹ na' le shajla'ole kat' yillinle gana' chñabia' Xancho Jesucristona', beena' bisle' cho'.

¹² Daan, toshiizi yisaa lall'le diiki, la'kzi ba nezilen na' ba zoachechle chajle'le dill' li che Chioza' daa ba nombia'le.

¹³ Shlak ni mban', chakid' chiya' yisaa lall'le diiki,

¹⁴ la' nezid' ba zoa gaoshosh guet' kon ka ba wna Xancho Jesucristona' gak cha'.

¹⁵ Na' gontekz' to dii byen we'len' le' dill' naa ni mban' kwenche lekzka' kat' ba wit' lljadinile' diiki ba wnia' le'.

¹⁶ Diika' ba bli' bsedinto' le' che yel' wak che Xancho Jesucristona' na' cheyi daa yiyede', aga nakan dii biyiljall'zə ben', san chopshosh jalaonto'kin ble'into' yel' ben' choo ben' xen che'na'.

¹⁷ Ble'into' ka wloo Xacho Chioza'ne' balaan len yel' chey cheeni' che'na' ka wñie' yabana' gana' nak liizelozu mbalaz, na' wne': "Beenin xiinaa, le chakidee na' chazlall'chgaid' ka chone'."

¹⁸ Neton' zelennto'ne' lo yaa che Chioza' na' kwinnton' beninto' shii Chioza' ka wñie' yabana'te.

¹⁹ Na' daa ble'into' dga, bichop cho'a dill' daa bzej dii ben'ka' wdixjee daa goll Chioza' legake' kani'yi. Na' le', chiya' sele wñeyi xtilleeka', daa nakan ka to yi' daa chzeeni' ga nak shgasj shchol, axt ki illin lla yiyed Jesucristona', beena' chzaklebi belj xsila', na' kooche' beeni' che'na' loo yichjlall'do'leka'.

²⁰ Na' dii llialote shajniile dga: ni to cho'a dill'ka' bzej dii ben'ka' wdixjee daa goll Chioza' legake' kani'yi bi nakan dii wdiljall'zgake'.

²¹ La' dii ben'ka' wdixjee daa goll Chioza' legake' kani'yi, biga wñegake' tobia'lall'zgake', san Espiritu Sántonan' bzajniile' legake' kwenche be'gake' xtil' Chioza'.

2

¹ Per lekzka' ladj beṅ' Israelka' wzoa beṅ' wxiye', wnazgake' chyixje'gake' daa goll Chioza' legake'. Na' ka'kzə ladjlena' soa beṅ' wli' wsemi de wxiye'ka'. Na' wli' wsemi'gake' le' ka ki gakbe'zile' de wxiye' che'ka' daa chlliyi' beṅ'. Na' wzoagake' ka'lə Xanchona', beena' wdixj saaxya che'ka'. Na' daa gongake' ka', tolbe' kwiayi'gake'.

² Beṅ' zan gongake' txen dii mal che'ka' na' gongake' dii zban daa nazan chegake'. Na' ni chegake' ine beṅ' zban che dill' li che Chioza' daa nocho.

³ Daa selall'gake' gat' kwe'gakile', wli' wsemi'gake' le' daa chyiljall'zgake'. Kani'teyi ba nchogbia' chegake' kwiayi'gake', na' bich gakxen chegake'.

⁴ Chioza' bi wxi'xene' che anjlka' bxinj, san btakw bcheje' legake' lo yel cholā' latja' gana' nseje' legake', na' nan' nkweze' legake' axt kat' illin lla wchogloe' chegake'.

⁵ Ni bi wxi'xene' che beṅ' yell-lioka' kani'yi, san bene' yejsiw' wala' bliiayee beṅ' malka'. Per dii Noéna', beena' wdixje'i beṅ' nan chiyal' gongake' wen, Chioza' bisle'ne' len zi gall beṅ'.

⁶ Lekzka' Chioza' bchogloe' che beṅ'ka' lle' yell Sodómana' na' ch yell Gomórrana', na' bzey bte' yellka' axt ka biyakgakan de, kwenche ile'i beṅ' ka gak che beṅ' malka'.

⁷ Per bisle' dii Lota', beena' gok beṅ' wen, beena' bwiyi dii zbanka' ben beṅ' malka'.

⁸ Na' beṅ' wenni wzoa ladjeka', gokyeshii loo yichjlall'do'ena' ni cheyi dii malka' ble'ile' bengake' yog' lla.

⁹ Yog'lol diiki chli'gakan nan Xanchona' nezile' nak gone' yisle' beṅ'ka' chon ka chazlallee lawi bittezə dii lallj. Na' lekzka' nezile' nak wkweze' beṅ' malka' axt kat' illin lla wchogloe' che yog'lol beṅ'.

¹⁰ Na' dii lialote wsak'zi'ch Xanchona' beṅ'ka' choe' cho'a xbayi beli chen che'ka' daa nxinj yichjlall'do'eka', na' bi cheentegakile' no inabia' legake'. Beṅ'ka' bibi nalli na' nakgake' beṅ' cha'sib, na' ni bi chllibgake' inegake' che anjlka'.

¹¹ San anjlka', la'kzi nakchgake' beṅ' walch na' napchgake' yel' wak xench, bi chiyaxj-gakile' inegake' che anjlka' bi bzenag kwenche gaogake' xya chegake' lao Chioza'.

¹² Per beṅ'ki chnetezgake' zban che diika' bi chajni'gakile'. Nakgake' ka bayix'ka' baka' bi nteyi, baka' chalgakb na' chzen beṅ' legakb na' chitgake'b. Ka'kzan gak che beṅ'ka', lekzka' kwiayi'gake'.

¹³ Na' ikaagake' laxji dii mala' ba bengake'. Beṅ'ki chakgakile' zix' sia choe'gake' cho'a xbayi beli chen che'ka' axt tellatekzə. Na' kat' chlengake' le' cheej chaole, bi nxe bi nzak' nakgake' daa chibagakile' chongake' daa nazan chegake'.

¹⁴ Nottezə noolə ile'gakile' chzelall'gake'ne', na' bi chelj chlla'gakile' gongake' saaxya'. Na' chgooyel'gake' beṅ'ka' bin' gakcha lo xnez Chioza' kwenche gongake' dii mala', na' le chzelall'gake' gat' kwe'gakile'. Beṅ'ki chon ka' ba nakten kwiayi'gake'.

¹⁵ Ba wlej yichjgake' nez li che Chioza' na' ba zejgake' lo nez daa wyoo Balaama' xiin Beora', beena' wyoolall' sho' laxje' che dii mala' bene'.

¹⁶ Na' ni che dii mala' nan gone', to burr, ba bi chak ine, wneb ka beṅ' na' bsheshlem le' kwenche bi gone' dii mala' ba ngoo yichje' gone' daa nchol nitile'.

¹⁷ Beṅ' malki zaklebgakile' beja' daa bich bi nis chal, na' ka bejka' choa' be'na'. Ba nchoglo chegake' soagake' zejli kani' gana' liizelozi nak shgasj shchol.

¹⁸ Chnegake' cha'sibə choe'gake' dill' dii bibi zakii, na' chgooyel'gake' beṅ'ka' kayaadia ba bichejgake' ladj beṅ'ka' chon dii mala' kwenche sto shii yizologake' yiyoe'gake' cho'a xbayi beli chen che'ka'.

¹⁹ Na' che'gake' wak gongake' daa nazan chegake', la' aga bi xya che dii mala' de, na' le'yen'gaken' ntakw nchej dii mala'. La' nottezə beṅ' chone' kon ka na daa chnabia' le', ba ndo'e lawinna'.

²⁰ Na' beṇ'ka' ba biyell bila'gake' lao dii mala' daa de yell-lioni daa ba benlilall'gake' Xancho Jesucristona', beena' bisla cho', shi sto shii yitakw yichej dii mala' legake', gaktechlə mal chegake' aga ka gok chegake' dii nech kana' biṇ' gonlilall'gake'ne'.

²¹ Wenchlan shel' bi bembia'kzgake' nez li che Chioza' aga ka daa bembia'gake'n na' bilaala'ogake' cho'a xtilleena' daa bli' bsemi beṇ' legake'.

²² Na' daa bengake' ka', billinin che dillaa de daa na: "Bekwaa chiyaob daa biyebb, na' kusha', bana' zi' gozj, chibix chitolb loo benja' sto shii."

3

¹ Le' beṇ' bish'dawaa na' le' beṇ' zandawaa, dgan de wchop shii chzej' le'. Na' chopten choe'len' le' dill' kwenche chisaa lall'le sele wneyi che dii wenna' daa ba nezile.

² Li lljadini dill'ka' be' dii beṇ'ka' wdixjee daa goll Chioza' legake' kani'yi, na' daa bllia Xanchona' bia', beena' bisla cho', daa ba bli' bsemi postlka' le'.

³ Dii llialote chiya' inezile, kat' ba zoa te che yell-lioni, na' ichej beṇ' gongake' daa nazan chegake' na' gonlegake',

⁴ inagake': "¿Berache biṇ' yiyed Crístona' ka bchebe' gone'? Ba wit dii xaxna'choka' na' toz ka ni chak naa ka kana' wxw wzilte yell-lioni."

⁵ Beṇ'ka' na' ka', bi cheengakile' yisa'lall'gake' daa gok kani'yi, kana' to ka wnezə Chioza' na' wya' wbiṇ' yabana', na' biyak nido'ka' toz na' bli'lao yell-liona'.

⁶ Na' lekzka' len' bllie' bia' gok yejsiwaa kwenche blliai' nisa' yell-lioni kani'yi.

⁷ Na' yabana' len' yell-lioni, diiki chle'icho naa, ba nllia Chioza' bia' chegakin wzey wte yi'na' legakan llana' wchogloe' kwiayi' yog' beṇ' malka'.

⁸ Na' le' beṇ' bish'dawaa na' le' beṇ' zandawaa, bi gal-lall'le Xanchona' chle'ile' tlla ka to mil yiz na' to mil yiz ka tlazə.

⁹ Zoa beṇ' ne' chshe'lall' Xanchona' gone' ka bchebe'. Aga chshe'lalleen', san nape' yel' chxenlall' daa bi cheenile' no kwiayi', na' cheenile' yog' beṇ' yiyaj yileni.

¹⁰ Llana' yiyed Xanchona' tokonganzan yilee, ka chon to beṇ' wban tokonganz cho'e loo yoo lill beṇ'. Na'ch gak to sshag wal na' yinitlo yabana' na' diika' llia xaninna', wzey yi'na' legakan na' kwiayi'gakan, na' yell-lioni na' yog' dii de lawinna' sheygakan.

¹¹ Daa nezicho yog'lolte dii de kwiayi'gakan, chiya' goncho ka dii le gakcho beṇ' li beṇ' shao' na' soacho goncho ka cheeni Chioza'

¹² shlak chbezcho llana' wchogloe' che beṇ', na' goncho to dii byen kwenche yob gakan. Llana' gak ka', yi'na' wlliai'n yabana' na' diika' llia xaninna' yilengakan na' kwiayi'gakan.

¹³ Na' cho', chbezcho to yaba kob na' sto yell-lio kob daa bcheb Chioza' gone' cho' gana' she' shgal' beṇ' li beṇ' shao'.

¹⁴ Daan, le' beṇ' bish'dawaa na' le' beṇ' zandawaa, shlak zoale chbezle diiki, li gon to dii byen kwenche soalenle Chioza' wen, na' bibi xtol'le gat' ni bibi nda' nchen yichjlall'do'lena' kat' lljazele lawe'na'.

¹⁵ Na' chiya' shajniile' dga: Xanchona' nape' yel' chxenlall' checho daa bi cheenile' kwiayi'cho, san cheenile' yog'cho yilacho. Na' lekzka' beṇ' bish'cho Páblona', beena' le' chakicho, bzeje' xtillii diiki kon yel' sin' daa be' Chioza'ne'.

¹⁶ To to ka bzej Páblona', bi'e dill' che diiki. Na' bal' diika' bzeje' le' lallj shajniichon, na' beṇ'ka' bi nteyi len beṇ'ka' biṇ' gakcha lo xnez Chioza' chajni'gakile'n klelə, ka chongake' che bichlə daa na' Cho'a Xtill' Chioza', chajni'gakile'n klelə, na' chlliai' kwingake'.

¹⁷ Na' le' beṇ' bish'dawaa na' le' beṇ' zandawaa, daa ba nezile dga, li wsak' kwenche ki gonlleji beṇ' malka' le' na' yilaale lo xnez Chioza'.

¹⁸ San li gon ka dii le shajni'chile ka chaklen Xancho Jesucristona' cho', na' li gombia'ch beena' bisle' cho'. Len' chidolee sho'e balaan naa na' zejli kani. Kan' gakan.

Kart nech daa bzej Juanna'

¹ Chzejnto' le' kwenche inezile che beena' ba zoa kana' zi' xe sil yell-lioni, beena' bzenagnto' bi'e dill' na' chopshosh jalaonto'kin ble'into'ne'. Bwianto' ka nake' na' bex'nto'ne' kon na'nto'ki kana' wde' yell-lioni. Len' nake' Xtill' Chioza' na' len' cho'e ben' yel' mban zejli kani.

² Na' beeni nsa' yel' mban zejli kani bide' yell-lioni, na' ble'into'ne' na' choe'nto' dill' che'. Na' chyixje'into'n le' kwenche inezile ba zoalenkze' Xacho Chioza' kana' zi' xe silte yell-lioni na' ba bidsoe' ladjchoni.

³ Chyixje'into' le' che beeni ble'into' na' bzenagnto' bi'e dill', kwenche yiyoll yido gagle neto' txen. Na' dii li ba nakkzcho txen Xacho Chioza' na' Xiine' Jesucristona'.

⁴ Chzejnto' le' diiki kwenche yiyoll yido soale mbalaz.

⁵ Diikin bli' bsemi Jesucristona' neto', na' chyixje'into'n le': Chioza' nake' ka beeni' daa nake' liizelozi ben' li ben' shao', na' bibi dii mal ni de wxiye' nsee, diika' nak ka yel chol.

⁶ Shi inacho nakchone' txen na' chdatecho lo yel chola', chziye'zchon na' bi zejlencho daa nak dii li.

⁷ San shi zoacho lo beeni'na' ka zoa Chioza' lo beeni'na', na' ba nakcho toz, na' xchen Xiine' Jesucristona' chixis chiyiban yichjlall'do'chona' kwenche bibi saaxya nda' nchenan.

⁸ Shi inacho bibi saaxya napcho, chziye'z kwinchon, shi naa, na' nakbia' bi nombia'cho dii lina'.

⁹ San shi yixoadol'cho saaxya chechoka' lao Chioza', beena' toshiizi chon ka chchebe' na' nake' ben' li ben' shao', wizi'xene' saaxya chechoka' na' yixis yiyibe' cho' che yog'lol dii malka' ba bencho.

¹⁰ Shi inacho bin' goncho saaxya, ba chtobicho Chioza' de wxiye'na', na' nakbia' bin' gombia'cho cho'a xtilleenan', shi naa.

2

¹ Le' xiindawaa, chzej' le' dga kwenche bi wxinj wlenle. Na' shi nocho ba bxinj blencho, zoa to ben' inabe' cho' lao Xacho Chioza', len' Jesucristona', beena' nak dowalj ben' li ben' shao'.

² Na' len' wdixje' saaxya chechoka' kon yel' mban che'na', na' aga che to cho'zan wdixje', san len' che yog' ben' lle' zbii zkaan yell-lionin.

³ Shi choncho ka nllia Chioza' bia' goncho, nezicho ba nombia'chone'.

⁴ Na' shi zoa ben' ne': "Nombi'ane'", na' bi chone' daa nllie' bia', nake' to ben' wxiye' na' nakbia' bi nombi'e dii lina'.

⁵ San shi ba choncho ka na' cho'a xtil' Chioza', dii li ba chakichone' ka chiyali. Na' kan' chakbe'icho ba nakchone' toz.

⁶ Beena' ne' ba nake' Chioza' toza chiyal' wsa' che' ka bsa' che Jesucristona'.

⁷ Le' ben' bish'dawaa na' le' ben' zandawaa, ka nak dga chzej' le' bi nakan dii kob, lekzannan' bzenagle dii nechte. Nakan dii nllia Chioza' bia' kani'teyi na' bakza' yoon nagle.

⁸ La'kzi ka', wak inacho dga chzej' le' nakan dii kob, la' dii li nakan ka ben' Crístona' na' ka chonle. Na' dii mala' daa nak ka yel chol' zej chiyol chinitan, na' beeni' che Chioza' ba chzeeni'n.

⁹ Shi to ben' ne' zoe' lo beeni' che Chioza', na' chakzbanile' bish' ljwelle'na', lo yel chol'an' ni zoe'.

¹⁰ Beena' chaki bish' ljwelle'na' ba zoe' lo beeni' che Chioza', na' bibi de wchixan le'.

¹¹ San beena' chakzbani bish' ljwelle'na' chde' lo yel chola' na' bi nezile' galan zeje', la' dii mala' chone' ba nonan le' ka to ben' lchol'.

12 Le' xiindawaa, chzej' le' dga, daa ba bizi'xen Chioza' saaxya cheleka' daa wit Jesucristona'.

13 Le' zoa xiin chele, chzej' le' dga daa nombia'le beena' ba zoa kana' zi' xe silte yell-lioni. Le' bi' wew', chzej' le' dga daa chzoile bi chzenagle che dii xiwaa.

Le' xiindawaa, chzej' le' dga daa nombia'le Xacho Chioza'.

14 Le' zoa xiin chele, chzej' le' dga daa nombia'le beena' zoa kana' wxe wzil yell-lioni. Lekzka' chzej' le' bi' wew', daa nakle bi' wal na' ba bleble Cho'a Xtill' Chioza' loo yichjlall'do'lena', na' bi chzenagle che dii xiwaa.

15 Bi gaktekile yell-lioni, ni daa de lawinna'. Nottescho shi chakicho daa de yell-lioni, bi chakicho Xacho Chioza'.

16 La' yog'lol diiki de yell-lioni: dii mala' daa chzelall' beli chenna', na' daa chzelall'cho bi dii chle'icho, na' yel' cha'siba'. Aga legakannan' chshab Xacho Chioza', san nakan dii chshab yell-lioni.

17 Na' yell-lioni chde cheyin len dii malka' chzelall'cho lawinna', san beena' chon ka chazlall' Chioza' de yel' mban che' zejli kani.

18 Le', xiindawaa, ba zoacho llaka' zeelo. Na' ba benile za' Beena' gatzbanile' Cristona'.* Na' naa ba chle'icho ben' zan ben'ka' chakzbangakile'ne'. Daan, ba nezicho ba zoacho llaka' zeelo.

19 Legake' ba bengake' cho' txen la'kzi aga dii li gokgake' cho' toza. La' shel' dii li gokgake' cho' toza, ni nakgake' cho' txen, shel'ka'. Na' daa bikwasgake', bli'gake'n kwaslol aga do lall'gake'n gokgake' cho' txen.

20 Per beena' nak liizelozi ben' wen ben' shao' ba bene' kwenche zoa Espiritu Santona' loo yichjlall'do'lena'. Na' daan, yog'le chajniile dill' li che Chioza'.

21 Aga chzej' dga daa inacho bi nombia'le dii linan', san chzeja'n daa ba nombia'lennan', na' nezicho bibi dill' wxiye' nchix dill' li che Chioza'.

22 ¿Noran ben' wxiye'na'? Len' beena' na che Jesúza' aga len' Cristona', beena' chbezcho wsel' Chioza'. Beena' na ka', len' chakzbanile' Cristona', na' chzoe' Xacho Chioza' ka'lə len Xiine' Jesucristona'.

23 Beena' chzoe' Xiin Chioza' ka'lə lenkz Xe' Chiozan' chzoe' ka'lə. San beena' ina chonlilallee Xiin Chioza', lenkz Xe'nan' nake' txen.

24 Daan, li kooshao' loo yichjlall'do'lena' yog'lol daa wzolo chsedle ka wyoole lo xnez Chioza'. Na' shi ba wlooshao'len loo yichjlall'do'lena', toshiizi gake toza Xacho Chioza' len Xiine'na'.

25 Na' dgan ba bcheb Jesucristona' checho: gone' yel' mban zejli kani.

26 Chzej' le' dga, daa chda ben'ka' cheengakile' siye'gake' le'.

27 Na' ka nakle le', ba nzoa Jesucristona' Espiritu Santona' loo yichjlall'do'lena', na' aga chyalljchile no wsemi le' daa nak dii li. La' kwin Espiritu Santona' ba chsedile' le' yog' diika', na' daa chli' chsedile' le' nakan dii li, bi nakan de wxiye'. Na' toshiizi li gak Cristona' toza, ka ba bli' bsemi Espiritu Santona' le'.

28 Na' naa, xiindawaa, chiya' gakcho Cristona' toz toshiizi kwenche kat' yiyede' yibaicho na' bi yiyi yido'icho lawe'na'.

29 Na' daa ba nezile nake' ben' li ben' shao, lekzka' chiya' inezile yog' ben'ka' chongake' daa nak shli'cha nakgake' xiin Chios.

3

1 Li gakbe'i ka chaki Xacho Chioza' cho' daa ne' nakcho xiine'. Na' dii li ba nakkzcho xiinen'. Daan, ben'ka' bi nonlilall'gake' Chioza' bi chle'shi'gakile' cho', la' bi nombia'gake'ne'.

* 2:18 Beena' gatzbanile' Cristona': xtila' nagake' El Anticristo. Lekzka' bwia 1Jn. 2:22; 4:3; 2Jn. 1:7, na' 2Tes. 2:3.

² Le' beṇ' bish'dawaa na' le' beṇ' zandawaa, ba nakcho xiṇ Chios. Na' la'kzi biṇ' iṇezyeṇ'icho nakan yiyakcho, neṇzicho kat' yila' Jesucristona' yiyakcho ka nake', la' ile'ichone' do ka nake'.

³ Na' nottez beena' ba none' lez dga, bich chone' txen dii mala' kwenche gake' ka nak Jesucristona', beena' bibi dii mal nda' nchene'.

⁴ Na' beena' chxiṇj chlen chyishje' daa nllia Chioza' bia', la' kat' chxiṇj chlencho, xtilleenan' chyishjcho.

⁵ Le' ba neṇzile bid Jesucristona' yell-lioni kwenche bikwase' saaxya chechoka', na' nezteile bibi saaxya che' de.

⁶ Na' yog' beṇ'ka' nakgake'ne' toz bi chdagake' lao saaxyana'. San yog' beṇ'ka' chda lao saaxyana' biṇ' gakbe'gakile' non nak Cristona', ni bi nombia'gake'ne'.

⁷ Le' xiṇdawaa, bi we'le latj no siye' le'. Beena' chon daa nak shli nake' beṇ' li beṇ' shao' ka Jesucristona' nake' beṇ' li beṇ' shao'.

⁸ Na' beena' chxiṇj chlen nake' xiṇ dii xiwaa, la' dii xiwaa bxiṇj bṇenan kana' zi' xe silte yell-lioni. Na' ni cheyi dgan bid Xiṇ Chioza', kwenche wlliyee yog'lol daa chon dii xiwaa.

⁹ Beena' ba nak xiṇ Chios bich chde' lao saaxyana', la' Chioza' ba bikobe' yel' mban che'na'. Na' daa ba nake' xiṇ Chioza', bich gak te' lao saaxyana'.

¹⁰ Na' nakbia' beṇ'ka' dii licha nakgake' xiṇ Chios na' beṇ'ka' nak xiṇ dii xiwaa. La' nottez beena' bi chon daa nak shli na' bi chakile' bish' ljwelle'na' bi nake' xiṇ Chios.

¹¹ Kana' wzolotele bzenagle xtil' Cristona' benile dga: chiyal' gaki bish' ljwellcho.

¹² Bi chiyal' goncho ka ben dii Caínna', bene' dii xiwaa txen na' bete' beṇ' bisheena'. Na' ¿biche betze'ne'? Bete'ne' daa bentezi ben Caínna' dii mala', na' beṇ' bisheena' bene' daa chiyoollalii Chioza'.

¹³ Le' beṇ' bish'dawaa na' le' beṇ' zandawaa, bi gakklejile shi beṇ'ka' bi chajle' che Chioza' chakzbangakile' le'.

¹⁴ Daa chakicho bish' ljwellchona' neṇzicho bich chdacho lo neza' gana' kwiayi'cho, san ba de yel' mban checho zejli kaṇi. La' beena' bi chaki bish' ljwelle'na' ni zeje' lo neza' gana' kwiayee.

¹⁵ Nottez beṇ' chakzbanile' bish' ljwelle'na', lebzín chonlene' beṇ' wen xyana'. Na' neṇzile ni to wen xya bi de yel' mban che' zejli kaṇi.

¹⁶ Cristona' bliile' cho' ka nak yel' chakina' daa bzani yel' mban che'na' ni checho. Na' lekzka' cho' chiyal' izani yel' mban chechoni ni che bish' ljwellchona'.

¹⁷ Shi ga zoacho chaj chdecho mbalaz na' chwiacho bish' ljwellchona' chyallj chchinile' na' bi chiyesh'lallichone', ¿nakran goncho inacho chakicho Chioza'?

¹⁸ Le' xiṇdawaa, bi chiyal' gaki ljwellcho de cho'a dill'z, san chiyal' wli'cho dii li chaki ljwellcho.

¹⁹ Na' neṇzicho shi ba chaki ljwellcho, na' wli'n ba zejcho lo nez lina', na' neṇzicho Chioza' chibaile' ka choncho,

²⁰ la'kzi yichjlall'do'choni inan nakcho beṇ' saaxya. La' Chioza' nakche' beṇ' choo beṇ' xench ka cho' na' neṇzile' yog'lolte.

²¹ Le' beṇ' bish'dawaa na' le' beṇ' zandawaa, shi yichjlall'do'choni chakbe'in bibi xtol'cho de, na' bi gall illebcho we'llwillchone',

²² na' gone' bittezə daa inabichone', la' chzenagcho daa nllie' bia' goncho na' choncho ka chazlallee.

²³ Na' dgan nllie' bia' goncho: gonlilall'cho Xiṇe' Jesucristona', na' gaki ljwellcho ka ba bllie' bia' goncho.

²⁴ Beṇ'ka' chongake' ka nllia Chioza' bia' ba nakgake'ne' toz na' zoalene' legake'. Na' neṇzicho zoalene' cho' daa ba bene' Espíritu che'na' zoe' loo yichjlall'do'choki.

4

¹ Le' beṇ' bish'dawaa na' le' beṇ' zandawaa, bi shajle'le che nottez beṇ' ine': "Ba chne Chioza' nad'", san li wwiagaxjə shi leile' Chioza' chnie'ne' wa shi naze'n. La' yell-lioni ba chas chda beṇ' zan beṇ' chziye' nazgake' chyixje'gake' daa na Chioza'.

² Dgan gonan ka gakbe'ile beena' chyixjee daa na Espíritu che Chioza': yog'lol beṇ'ka' cho'e dill' nan Jesucristona' nake' Chios na' bide' golje' goke' beṇ' de beli chen ka cho', beenan' zoalen Espíritu che Chioza'ne'.

³ Na' nottez beena' ina Jesucristona' bi goke' beṇ' de beli chen, bi zoalen Espíritu che Chioza'ne' na' chakzbanile' Crístona'. Na' ba nezile ba zoa wli'lao beena' gakzbanile' Crístona', na' naa ba chdakz beṇ' chon ka' yell-lioni.

⁴ Le' xiindawaa, ba nakle Chioza' tozə, na' bich chajle'le che beṇ' wxiye'ka', la' beena' zoalene' le' napche' yel' wak xench aga ka dii xiwaa daa chda yell-lioni.

⁵ Beṇ' wxiye'ka' nogake' diika' na beṇ' yell-lioki, daan, zle che yell-lionizə choe'gake' dill', na' beṇ'ka' bi nombia'gake' Chioza' chzenaggake' xtilleeka'.

⁶ San cho' ba nakcho Chioza' tozə, na' beṇ'ka' nombia'gake' Chioza' chzenaggake' checho. Na' beṇ'ka' bi nakgake' Chioza' tozə, bi chzenaggake' checho. Na' kan' chnezicho non cho'e dill' li daa chzajni Espíritu che Chioza'ne' na' non cho'e dill' wxiye' daa chzajni dii xiwaane'.

⁷ Le' beṇ' bish'dawaa na' le' beṇ' zandawaa, chiya'l' gaki ljwellcho, la' kan' chon Chioza' chakile' beṇ'. Nottezə beṇ' zoe' chaki ljwelle', nakbia' dii li nake' xiin Chios na' nombi'e Chioza'.

⁸ Na' beena' bi chaki bish' ljwelle'na' bin' gombi'e Chiozan', la' Chioza' zoe' chakile' cho'.

⁹ Chioza' bli'e ka chakile' cho' daa bselee Xiine'na' tlish' tyaj yell-lioni kwenche gonlilall'chone' na' gat' yel' mban checho dii bi te cheyin.

¹⁰ Kin nak yel' chaki daa nak dowalj: aga inacho cho'lan gokicho Chioza', san daa chaki Chioza' chon' bselee Xiine'na' wite' kwenche wdixje' saaxya chechoka'.

¹¹ Na' le' beṇ' bish'dawaa na' le' beṇ' zandawaa, shi kan' chaki Chioza' cho', ka'kzan chiya'l' gaki ljwellcho.

¹² Ni to beṇ' bin' ile'ile' Chioza', per shi chaki ljwellcho, Chioza' zoalene' cho' na' yel' chaki che'na' ba chonan llin lo yel' mban chechoki ka chiya'li.

¹³ Nezicho zoalench Chioza' na' le' zoalene' cho' daa ba nzoe' Espíritu che'na' loo yichjlall'do'choki.

¹⁴ Na' neto' ble'into' Xiin Chioza' na' choe'nto' dill' nan Xacho Chioza' bselee Xiine'na' kwenche yisle' beṇ' yell-lioni na' bi kwiayi'gake'.

¹⁵ Nottezə beṇ' chajli'e na' cho'e dill' ne' Jesús'a nake' Xiin Chioza', Chioza' zoalene'ne' na' le' zoalene' Chioza'.

¹⁶ Cho' ba nezicho na' ba chajle'cho chaki Chioza' cho'. Chioza' zoe' chakile' cho', na' shi zoacho chakichone' na' chaki ljwellcho, zoalench Chioza' na' le' zoalene' cho'.

¹⁷ Na' shi ba chaki ljwellcho, chli'cho yel' chaki che Chioza' ba chonan llin lo yel' mban chechoki ka chiya'li, na' bi illebcho llana' yizi'e cho' kwent, la' ka wda Jesucristona' ka'kzan chdacho chakicho beṇ' yell-lioni.

¹⁸ Gana' zoa yel' chaki che Chioza' bibi yel' chlleb de. Na' shi dii li napcho yel' chakina' aga wlebbcho yel' zi'na' wsel' Chioza'. La' beena' chlleb, bin' gon xshin yel' chaki che Chioza' lo yel' mban che'na' ka chiya'li.

¹⁹ Cho' chakicho Chioza', la' zigaate len' gokile' cho'.

²⁰ Shi zoa beṇ' ne': "Chakid' Chioza'", per chakzbanile' bish' ljwelle'na', chziye'ze'n. ¿Nakran gone' gakile' Chioza', beena' bi chle'ile', len chle'itele bish' ljwelle'na' na' bi chakile'ne'?

²¹ Dgan nllia Jesucristona' bia' goncho: Beena' chakile' Chioza', lekzka' chiya'li' gakile' bish' ljwelle'na'.

5

¹ Yog'lol ben'ka' chajle'gake' Jesúza' nake' Crístona', beena' bsel' Chioza', legaken' ba nakgake' xiin Chios. Na' yog' ben'ka' chakgakile' Xacho Chioza' lekzka' chakgakile' ben'ka' nak xiine'.

² Nezicho shi chakicho Chioza', choncho daa nllie' bia' goncho, lekzka' chakicho yog'lol ben'ka' ba nak xiin Chios.

³ Shi choncho daa nllia Chioza' bia' goncho, ba chakichonen', shi naa. Na' diika' nllie' bia' goncho bi nakan zii sshab.

⁴ Na' yog' ben'ka' ba nakgake' xiin Chios chizogakile' bich chongake' dii mala' de yell-lioni. Na' daa chonlilall'cho Jesucristona', chizoicho bi choncho dii mala' de yell-lioni.

⁵ Ben'ka' chajle' Jesúza' nake' Xiin Chios, legaken' chzogakile' bi chongake' dii mala' de yell-lioni.

⁶ Ka bid Jesucristona' yell-lioni wchoe' nisa' na' blalj xchene'na' kana' betgake'ne'. Aga to wchoaze' nisan', san bene' diiki chopte, wchoe' nisa' na' blalj xchene'na'. Na' Espiritu che Chioza' choe' dill' ka daa gokə, la' len' zeelo cho'e dill' daa nak dii li.

⁷ Na' shon diika' choe'n dill' che Jesucristona':

⁸ Daa bidsoalen Espiritu che Chioza' le', na' daa wchoe' nisa', na' daa blalj xchene'na'. Na' toz ka choe'gakan dill'.

⁹ Chajle'cho dillaa choe' ben', per zak'chi dillaa daa choe' Chioza', na' len' cho'e dill' che Xiine'na'.

¹⁰ Beena' chajle' che Xiin Chioza', nezile xtill' Xacho Chioza' daa bi'e che Xiine'na' nakan dill' li. Na' beena' bi chajle' che Chioza' ba chone' Chioza' ka to ben' wxiye' daa bi chajli'e che dillaa bi'e che Xiine'na'.

¹¹ Na' dillaa bi'e nan: ba bene' cho' yel' mban zejli kani, na' bene'n daa nonlilall'cho Xiine'na'.

¹² Beena' nake' Xiin Chioza' tozə, de yel' mban che' zejli kani, na' beena' bi nake' Xiin Chioza' tozə, bi gat' yel' mban che' zejli kani.

¹³ Chzej' le' dill'ki, ka le' nonlilall'le Xiin Chioza', kwenche inezile ba de yel' mban chele zejli kani.

¹⁴ Nxenlall'cho wzenag Chioza' checho kat' bin inabichone' shi nakan daa cheenile' gakə.

¹⁵ Na' daa nezicho chzenague' checho bin chnabichone', lekzka' nezicho gone' daa chnabichone'.

¹⁶ Na' shi chle'icho to bish' ljwellcho chone' dii mala' daa bi nak dii kwiayi'lene', chiyal' inabicho Chioza' gaklene'ne', na' Chioza' gone' ka yiyakshao' yichjlall'do'ena'. Kan' goncho shi chone' dii mala' daa bi kwiayi'lene'. De dii mala' daa chon ben' daa wlliyi'n le', na' bi nia' inabile Chioza' gaklene' beena' chon daa nak ka'.

¹⁷ Yog' dii mala' nakan saaxya, per de saaxyana' daa bi wlliyi'n cho'.

¹⁸ Nezicho beena' ba biyak xiin Chioza' bich zoe' chone' dii mala', la' Jesucristona', Xiin Chioza', chap chwie'ne' kwenche dii xiwaa bich gak gox' wnizan le'.

¹⁹ Nezicho nakcho lall' na' Chioza', na' yog' ben'ka' bi chzenag che Chioza' nakgake' lall' na' dii xiwaa.

²⁰ Na' lekzka' nezicho ba bid Xiin Chioza' na' bidzajniile' cho' kwenche nombia'cho beena' nak dowalj Chios. Na' ba nakcho lall' nee daa nonlilall'cho Jesucristona'. La' Jesucristona' nake' dowalj Chios, na' chone' yel' mban checho zejli kani.

²¹ Le' xiindawaa, mara gonlilall'le chioska' chon bene'cha'.

Kart wchopi daa bzej Juanna'

¹ Nad' ngoo lall' na' bish' ljwellchoki nonlilall' Crístona' chzej' li', noolə ba wlej Chioza' gako' lall' nee len xiino'ka'.* Na' le chakid' le', na' aga toz nad' chakid' le' san len yog' ben'ka' ba nombia' daa nak dii lin.

² Le chakid' le' daa ba nombia'cho daa nak dii li daa yoo loo yichjlall'do'choka' naa, na' soalanen cho' toshiizi.

³ Chioza', beena' nak Xacho, len Xiine' Jesucrístona', gongake' ka gak wen checho, na' yiyesh'lall'gakile' cho', na' gongake' ka soacho mbalaz kwenche zejch gombia'cho daa nak dii li na' gaki ljwellcho.

⁴ Dii xen biba bizakid' ka wnezid' bal xiino'ka'† chdagake' lo nez li che Chioza', kon ka na Xachona' goncho.

⁵ Na' naa, nia' le' chiyal' gaki ljwellcho ganga. Dga nia' le' aga nakan dii zi' benicho, san dezd nechte wnezicho dga.

⁶ Dgan yel' chakina': goncho daa non Chioza' mandad. Na' dgan cheenile' goncho: soacho gakichone' na' lekzka' gaki ljwellcho kon ka ba benicho dezd nech.

⁷ Ben' zan ben' wxiye'ka' ba chda yell-lioni, na' bi chajle'gake' nan ba bid Jesucrístona' yell-lioni goke' ben' de beli chen. Ben'ka' bi chajle', legaken' ben' wxiye'ka', ben'ka' chakzbangakile' Crístona'.

⁸ Wsak'gale kwenche bi gakdadz linna' ba benle, san yizi'le banez do ka nak daa chidol'le.

⁹ Nottezə beena' yilaa nez li che Chioza' na' bich zejlene' daa bli' bsemi Crístona', bi zoalen Chioza'ne'. Na' beena' zejlen daa bli' bsemi Crístona', zoalen Xacho Chioza'ne' na' lekzka' Xiine'na'.

¹⁰ Shi no za' gana' zoale zidye'lene' le' dill' daa bi chidilin daa bli' bsemi Crístona', bi wleblene' loo yoo lill-lena', ni bi wwaplene' chiox.

¹¹ La' beena' chlebe'ne', chone' txen dii mala' chone'.

¹² Dii zan dii cheenid' inia' le', per bi chaklallaa gona'n yishzə. San chbez' gat' latj yidkz' gana' zoale kwenche ile'i ljwellcho na' we'cho dill', na' yiyoll yido soacho mbalaz.

¹³ Ben'ka' nak xiin ben' bilo'na',‡ beena' wlej Chioza' gake' lall' nee, chwapgake' le' chiox.

* **1:1** Noolə ba wlej Chioza' gako' lall' nee len xiino'ka': ben'ka' nsemi nagake' daa na Juanna' ka' zejin ben'ka' chdop chllag choe'la'ogake' Crístona' gana' bselee karta'. † **1:4** Bal xiino'ka': ben'ka' nsemi nagake' zejin ben'ka' chdop chllag choe'la'ogake' Crístona' gana' bselee karta'. ‡ **1:13** Xiin ben' bilo'na': Llekzka' ben'ka' nsemi nagake' zejin ben'ka' chdop chllag choe'la'ogake' Crístona' gana' zoa Juanna'.

Kart wyoni daa bzej Juanna'

¹ Nad' ngoo lall' na' bish' ljwellchoki nonlilall' Crístona', chzej' li', Gayo, nako' beñ' chakid' do yichj do lallaa.

² Beñ' bish'dawaa, chñabid' Chioza' kon ka mbalaz nak yichjlall'do'na' lawe'na', ka'kz gak wen cho' lao yog'lołte na' so' shi'a shao'.

³ Le biba bizakid' ka bid bał beñ' bish'choka' na' wnagake' zoachecho' lo nez li che Chioza'.

⁴ Bich bi de dii chonan ka yiba yizakchid' ka daa inezid' nan beñ'ka' nak ka xiin' zejgake' lo nez li che Chioza'.

⁵ Beñ' bish'dawaa, le wen chono' daa chakleno' bish' ljwellchoka' chon xshin Crístona', la'kzi nakgake' beñ' zit' beñ' bi nombi'o.

⁶ Lao beñ'ki lle' ni nonlilall'lenchogake' Crístona' ba be'gake' xtilloo daa le chakilo' legake'. Ben goklen, be'gake' daa chyallj chchingakile' kon ka chaklall' Chioza' goncho, kwenche koochgake' nez.

⁷ La' legake' ba wloogake' nez kwenche gongake' xshin Jesucrístona', na' bibi beñ'gake' che beñ'ka' bi nonlilall'gake'ne'.

⁸ Daan, chiyal' we'cho daa chyallj chchingakile' kwenche gaklenchogake' we'gake' dill' li che Chioza'.

⁹ Ba bzej' le', le' chdop chllagle choe'la'ole Crístona', per Diótrefeza' bi chzenague' daa nia' le' daa cheenile' toze' inabi'e.

¹⁰ Na' daan shi ba gokan yid' gana' zoale na' wsheshlenee, la' chde' biz chon chne' cha'. Na' leyi bi chlebe' bish' ljwellchoka' chla' gana' lle'le. Na' beñ'ka' cheeni wleb legake', chsej chllone', na' chibeje' legake' bich cho'e latj idop illaglengake' le' txen.

¹¹ Li' bish'dawaa, bi leno' gono' dii mala', san ben daa nak wen. Beena' chon daa nak wen nake' Chioza' txen, san beena' chon dii mala' bin' gombi'e Chiozan'.

¹² Yog'zə beñ' choe' xtill' Demétriona' daa chone' wen, na' nakbia'cha chzenague' dill' li che Chioza'. Na' lezkza' neto' choe'nto' dill' ka wen chone', na' nezkzilo' dill' lin choe'nto'.

¹³ Na' dii zan dii cheenid' inia' li', per bi cheenid' gona'n yishzə,

¹⁴ la' chbez' yob gat' latj yidkz' gana' zo' kwenche ile'i ljwellcho na' we'cho dill'.

¹⁵ Chioza' gone' ka soashgo' mbalaz. Beñ'ki nllaguicho chwapgake' li' chiox. Bwapgach chiox to to beñ'ka' nllaguicho gana' zo'.

Kart daa bzej Júdaza'

¹ Nad' Judas, nak' wen llin che Jesucristona' na' lekzka' nak' ben' bish' Jacóbona'. Chzej' le', ka le' chaki Xacho Chioza', le' ba gox wñabe', na' chap chwia Jesucristona' le'.

² Chioza' yiyesh'lall'shgaile' le', na' gonshgue' ka soachle mbalaz na' gone' ka gakbe'chile' ka chakile' le'.

³ Le' ben' bish'dawaa na' le' ben' zandawaa, le ba goklall'chga' wzej' le' na' we'len' le' dill' ka nak daa ba ben Chioza' bisle' cho'. Per chonchan byen wzej' le' kwenche gonle ka dii le shajle'le kwasloł dill' li che Chioza' daa bkwaanlene' cho' che toshiizi, ka cho' nakcho lall' nee.

⁴ La' ladjlena' do ngash'zə ba chda bal ben', na' legaken', kani'teyi ba nchogbia' chegake' kwiayi'gake' daa nakgake' ben' mal. Na' nagake' daa chiyesh'lalli Chioza' cho' wak goncho kon daa nan checho. Na' chzoagake' ka'lə Xancho Jesucristona', beena' zeelo chñabia' cho'.

⁵ La'kzi le' ba nezilen, cheenid' yisaa lall'le ka biyoll bibej Xancho Chioza' ben' Israelka' Egíptona', blliyee ben'ka' bi wyajle' che'.

⁶ Na' lekzka' bene' che anjlka', ben'ka' wlej yichjgake' yel' wñabia' che'ka' daa bene' lall' nagake', na' bchejgake' latj gana' lle'gake'. Chioza' ntakw ncheje' legake' zejli kani' gana' shgasj shchol, na' nan' nkweze' legake' axt kat' illin lla choo lla xenna' wchogloe' che yog'loł ben'.

⁷ Lekzka' ben'ka' wlle' yell Sodómana' na' yell Gomórrana', na' yellka' nllaggakan, bengake' daa wnaz beli chen che'ka', na' wñelen ljjwellgake', na' axt ben' byoka' biyat'len ljjwellgake' na' bengake' dii zban ka daa bi chiyal' gonlencho beli chen chechona'. Na' Chioza' bselee yi'na' bzey bten legake'. Na' daa bene' chegake' ka', chsi'nile' yog'loł ben' nan de yel' zak'zi' zejli kani' che ben'ka' bi chon wen.

⁸ Na' kan' chon ben' wxiye'ka' chda ladjlena', nazgake' chle'do'gakile', na' choe'gake' cho'a xbayi beli chen che'ka', na' bi cheengakile' no inabia' legake' na' bi nallgakile' chnegake' che anjlka'.

⁹ Kana' anjla' le Miguel, beena' nak ben' choo ben' xen ladj anjlka', gokdil-lenile' dii xiwaa kwerp che dii Moiséza', bi biyaxjile' chishje' bia' blag' che dii xiwaa, san golle'n: "Chioza', beena' nak Xan', wsheshlene' li'."

¹⁰ San ben' wxiye'ka', chnegake' che dii bi chajni'gakile'. Na' chontezgake' diika' na' beli chen che'ka', ka chon bayix' ba bi nteyi. Na' diika' chongake', leyen'gakannan' chlliyi'n legake'.

¹¹ jNyesh'laz gak che ben'ki!, daa chongake' ka ben dii Caínna', na' daa chongake' dii mala' ni che yel' wzelall' che'ka', ka ben dii Balaama'. Na' daa nakgake' widenag ka dii Coréna', kwiayi'gake'.

¹² Ben'ki nakgake' ka dii bi nxe bi nzak' lengake' ladjlena' kat' chonle lnina' choe'la'o ljjwell-le, na' lengake' le' cheej chaogake' ni bi chiyii chido'gakile'. Na' nakgake' ka to ben' chap bayix' na' bi zie' wñeyi chegakb, san legake' chap chwia kwingake'. Na' nakgake' ka bejka' ze xan yabana' diika' bibi nis yollə na' choa' be'na' legakan. Na' nakgake' ka yag zix dii bi chbia kat' chllin lla kwian. Latjin dii nan kwian, chilleelan chlall'te do loyin na' chbillan. Na' ben'ka' chon ka' axt chop shiilə ba mbiayi'gake'.

¹³ Na' nakgake' ka bli che nisdona' daa chas chat', na' yel' zto'ka' chongake' nakgakan ka bllin' besja' daa chchoon bli che nisdona'. Na' lekzka' nakgake' ka beljka' diika' chlaa xnezinka'. Na' daa chongake' ka' ba nchoglo chegake' soaga

ke' gana' zeelo nak shgasj shchol zejli kani.

¹⁴ Beena' wle Enoc, goke' beṇ' de galli lo dia che Adánna'. Wdixji'e daa goll Chioza' che beṇ'ki chon dii mala', wne': "Li wwiakachi, za' Xanchona' nchi'e beṇ' zan wal inleeb anjl che'ka'

¹⁵ kwenche wchogloe' che yog'lol beṇ', na' wsak'zi'e beṇ' malka' ni che yog' dii malka' bengake' yel' beṇ' mal che'ka', na' ni che yog'lol daa wchell wnegake' che'."

¹⁶ Beṇ'ki bibikzə chazlall'gake', na' lillinzi chwia chyigake' che beṇ', na' toshiizi choe'gake' cho'a xbayi beli chen che'ka'. Na' chshalj chshon che kwingake', na' choe'la'o choe'dill'gake' beṇ' kwenchezə gongake' beṇ' gan.

¹⁷ Na' le' beṇ' bish'dawaa na' le' beṇ' zandawaa, li lljadini dill'ka' be' postlka', beṇ'ka' ben Xancho Jesucristona' lall' na'gake' we'gake' cho'a xtilleena'.

¹⁸ Wnagake' le', "Kat' ba zoa te che yell-lioni, yid beṇ' wtitjgakile' che cho'a xtill' Chioza' daa chajle'cho, na' gongake' kon daa nazan chegake'."

¹⁹ Legaken' chongake' choplə beṇ'ka' nonlilall' Chioza', na' chongake' daa na' beli chen che'ka' na' bi yoo Espíritu che Chioza' loo yichjlall'do'eka'.

²⁰ Na' le' beṇ' bish'dawaa na' le' beṇ' zandawaa, li soachech gonlilall'chle Chioza', na' li inabi Espíritu Sántona' gaklene' le' we'llwill-le Chioza'.

²¹ Li gon ka cheeni Chioza', beena' le' chaki le', na' li gon lez llana' gon Xancho Jesucristona' cho' yel' mban zejli kanina' daa chiyesh'lallile' cho'.

²² Li yiyesh'lallii beṇ'ka' chakchopi.

²³ Na' zi bale', li yislagake' lawi dii mala' kwenche bi lljayaake' lo yi' gabiła'. Na' li yiyeshlallii zi bal beṇ' chon dii malka', per li gakzbani saaxya che'ka' na' li wsak' ki gonle ka chongake'.

²⁴ Shajla'oshga Chioza', beena' nap yel' wak gap wwie' le' kwenche bi ibixle lao dii mala', na' gone' ka lljazele lawe'na' gana' yoo balaan xen che'na' na' yiba yizakile daa bibi xtol'le de.

²⁵ La' zeelo len' nake' Chios, na' bisle' cho' daa bselee Xancho Jesucristona', na' chidolee koochone' balaan na' we'cho xtillee nake' beṇ' choo beṇ' xen, beṇ' liizelozi chnabia', na' beṇ' yel' wak choo yel' wak xen, naa na' zejli kan. Kan' nakan.

Jesucrístona' bliile' Juanna' che diika' zi' gak

¹ Dgan blii Chioza' Jesucrístona' kwenche bliile' ben'ka' nonlilall' le' daa ba zoa gaoshosh gak. Na' Jesucrístona' bselee anjl che'na' kwenche bidzajniile' nad' Juan, nak' wen llin che'.

² Na' cho'a dill' che yog'lol daa ble'id', na' nezid' nakan dowalj daa wna Chioza' na' daa bli'yi Jesucrístona' nad'.

³ Chakomba beena' chlab dill'ki, diiki na Chioza' zi' gak, na' chakomba ben'ka' chzenaggake' na' zegake' wneyi cheyin, la' ba zoa gaoshosh gaggakan.

Juanna' chwape' chiox ben'ka' nonlilall' Crístona' gana' mbani Ásiana'

⁴ Nad' Juan chwap' le' chiox, ka le' chdop chllagle choe'la'ole Jesucrístona', le' lle'le yel-lka' gall gana' mbani Ásiana'. Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, na' espírituka' gall lle' gana' zoe' chñabi'e, gaklenshgagake' le' na' wzoagake' le' mbalaz.

⁵ Na' lekzka' Jesucrístona' gaklenshgue' le' na' wzoe' le' mbalaz. Len' beena' choe' dill' li che Chioza', na' len' ben' necha' biban ladj ben' wetka' na' bich bi yel' wit ile'ile', na' nape' yel' wñabia' lao yog'lol ben' wñabia'ka' lle' yell-lioni. Len' chakile' cho' na' ba bisle' cho' lao saaxya chechoka' daa blalj xchene'na',

⁶ na' ba bene' cho' yel' wñabia'na', na' ba none' cho' bxoz che Xe' Chioza'. Len' chidolee sho'e balaan na' inabi'e zejli kani. Kan' nakan.

⁷ Crístona' yiyede' ladj bejka' ze xan yabana', na' yog'lol ben' ile'gakile'ne', lente ben'ka' betgake'ne'. Na' yog'lol ben' lle' yell-lioni kwellyesh'gake' ka ile'gakile'ne'. Kan' nakan.

⁸ “Nadaan zaklebid' letr necha' le A* daa ba zoakz' ka wxw wzil yell-lioni, na' daa zoakz' kat' te cheyin zaklebid' letra' chiyollin daa le Z”,† kan' na Xancho Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, beena' nak ben' yel' wak choo yel' wak xen.

Juanna' ble'do'ile' Jesucrístona'

⁹ Nad' Juan, nak' le' txen, na' chñabia' Chioza' cho' daa nakcho Crístona' txen na' la'kzi dii zan dii chen chle'icho daa chonlilall'chone', lekzen' chaklene' cho' chizo chizakicho diika' chen chle'icho. Na' daa chyixji'a xtill' Chioza' na' xtill' Jesucrístona' bengake' nad' pres na' bsel'gake' nad' yell-liodo'ni le Patmos, dga llia lo niso'dni.

¹⁰ Na' gok to lla, llana' nak lla che Xanchona', Espíritu che Chioza' bene' ka benid' wne to ben' zillj inleeb koll'lá', ka ga chbell to trompet.

¹¹ Na' wne' nad':

—Bzej dga chle'ilo' to lee yish, na' bsełaan lao ben'ka' chdop chllag choe'la'ogake' Jesucrístona' yellka' gall gana' mbani Ásiana': Éfesona', Esmírnana', Pérgamona', Tiatírana', Sárdiza', Filadélfiana', na' Laodiceana'.

¹² Na' biyechj' kwenche ile'id' non chne nad', na' ka biyechj' ble'id' gall candeler de or chal'gakan.

¹³ Na' ladj candelerka' gall ble'id' to ben' nake' ka cho' benech, na' nakwe' to xe' dii ton dii ze koll' ni'ena'te, na' ngoo li'ena' to bad' de or blinten ka de cho'alcho'ena'.

¹⁴ Yish' yichje'na' nakan xtil ka xa xil' wa ka beyaa, na' jalawe'na' chzeeni'n ka bel'yi'.

¹⁵ Na' ni'ena' chep yesan ka daa ne' bronce dii ba benschawee lo yi'na'. Na' shi'ena' nenan sshag wal ka nen to yao xen daa chxop cho'a bnanja'.

¹⁶ Nee de shlina' noxee gall belj, na' cho'ena' chchejan to spad dii nlatit chop laa. Na' cho'alawe'na' chña'titan ka chña'tit wbilla'.

* 1:8 Letr necha' le A: de dill' griegona' letri len alfa. † 1:8

17 Ka ble'idee, na' bgoonaa ka beṅ' wet xṅi'ena'. Na' bikwise' nad' kon nee de shḷina', na' wne' nad':

—Bi illebo'. Nadaan zoa' kana' wxe wzil yell-lioni na' nad'kzan ni zoa' kat' te cheyin.

18 Na' nad'kzan beṅ' yaa beṅ' banna'. Betgake' nad', per biban' na' mban' zejḷi kaṅi. Na' nap' yel' wak yisla' beṅ' lo yel' wita'.

19 Bzej dga ba ble'ilo', dga chak naa, na' daa zi' gak.

20 Kin zeji che beljka' gall daa noḡaa lo na' de shḷini na' che candelerka' gall diika' nak de or: beljka' gall zaklebin gall beṅ'ka'‡ chap chwiagake' beṅ'ka' chdop chllag choe'la'ogake' nad' yellka' gall. Na' candelerka' gall zaklebin beṅ'ka' gall kwen.

2

Daa golle' beṅ'ka' lle' yell Éfesona'

1 'Bzej dga inia' li' na' bseḷaan lao beena' chap chwia beṅ'ka' chdop chllag choe'la'ogake' nad' yell Éfesona': "Ki na beena' noḡ' beljka' gall lo nee de shḷina', na' zie' ladj candelerka' gall, diika' nak de or:

2 Nad' nez nḷe'id' yog' dii wenna' chonle, ka chonchgale xshin'na' na' ka zoacheche. Na' nezid' bi chleble beṅ'ka' bi nsa' cheyin wen, na' ba biyiljni'ale ka chon beṅ'ka' nazo nakgake' postl cha' na' ba gokbe'ile beṅ' wxiye'zgakan.

3 Dii xen ba benxenlall'le lao diika' ba ben ble'ile ni cha', na' bichga bshe'lall'le.

4 Per de to dii bi chazlallid' chele: bich naple yel' chakina' ka daa wdaple dii nechte.

5 Li yiyakbe'i bich chonle dii wenna' benle kana'. Na' li yiyaj yileni na' li yiyon sto shii ka benle dii nechte kana' wzolole benḷilall'le nad'. Shi bi yiyaj yilenile, na' yid' yikaa candeler chelena' gana' zoale.

6 De to dii ni chazlallid' chele: daa chakzbanile daa chon nicolaítaka', diika' lekzka' chakzbanid'.

7 Beena' cheni, chiyaḷ' wzenagyenee daa che' Espíritu che Chioza' beṅ'ka' gall kwente chdop chllag choe'la'ogake' nad'. Na' beena' so saki soacheche' gonḷilallee nad', wi'a latj gawe' daa llia lo yaga' daa nsa' yel' mbanna', daa zoa latj che Chioza' gana' nak mbalaz inleeb."

Daa golle' beṅ'ka' lle' yell Esmírnana'

8 'Na' lekzka' bzej dga inia' li' na' bseḷaan lao beena' chap chwia beṅ'ka' chdop chllag choe'la'ogake' nad' yell Esmírnana': "Ki na beena' zoa ka wxe wzil yell-lioni, na' ni zoakze' kat' te cheyin, beena' wit na' bibane':

9 Nad' nezid' yel' zak'zi'ka' chen chle'ile na' yel' yeshaa daa chak chele. Per de to dii zak'chi chele aga ka yel' wni'ana'. Na' nezid' dii mala' daa chbell chne beṅ' chele, beṅ'ka' nazgake' nakgake' beṅ' Israel, la'kzi dii licha lao Chioza' aga nakgake' beṅ' Israel, san nakgake' xonj beṅ' chzenag che dii xiwaa.

10 Bi gall illeble yel' zak'zi'ka' yen ile'ile. Dii xiwaa gonan ka koogake' baḷ-le lillyana' kwenche gonan ka bich gonḷilall'le nad', na' tele lo yel' zak'zi'na' shi lla. Li soachech gonḷilall'le nad' axt ni ka guetle, na' nad' gon' yel' mban chele zejḷi kaṅi.

11 Beena' cheni, chiyaḷ' wzenagyenee daa che' Espíritu che Chioza' beṅ'ka' gall kwente chdop chllag choe'la'ogake' nad'. Na' beena' so saki soacheche' gonḷilallee nad' bi ile'ile' yel' wit wchopina'."

Daa golle' beṅ'ka' lle' yell Pérgamona'

12 'Na' lekzka' bzej dga inia' li' na' bseḷaan lao beena' chap chwia beṅ'ka' chdop chllag choe'la'ogake' nad' yell Pérgamona': "Ki na beena' noḡ' spada' daa nḷatit chop laate:

‡ 1:20 Beṅ'ka': Dill' griegona' nan angeloi. Zoa kat' dillii zejin anjl, na' zoa kat' zejin to beṅ' nsel' beṅ' lljwee rson wa lljtixji'e to dii lljtixji'e.

13 Nad' nezid' zoale gana' chñabia' Satanáza', per ni zoachechle nonlilall'le nad'. Na' bi wlej yichjle daa nonlilall'le nad', ni kana' betgake' Antípaza', beena' bi bsan wi'e cho'a xtilaana', beena' betgake' lall-lena' gana' zoa Satanáza'.

14 Per de to chop dii bi chazlallid' chele: ni lenzə ladjlena' bal beñ' bi cheengakile' yilaala'ogake' daa bli' bsemi dii Balaama' dii Balaca' kwenche wlooyelee beñ' Israelka' bxinj blengake', na' wdaogake' yel' waoka' daa bliagake' lao lwaa lsak' diika' be'la'o beñ'ka', na' wñelen ljwellgake'.

15 Lekzka' ladjlena' ni len bal beñ' bi cheengakile' yilaala'ogake' daa chli' chsemi nicolaítaka'.

16 Na' daan, chiyal' yiyaj yilenile cheyi diika' chak ladjlena'. Na' shi bi yiyaj yilenile, lii za'tia' yidtil-len' le' kon spada' daa chchej cho'ani.

17 Beena' cheni, chiyal' wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', na' wwawee daa le maná daa ngash'. Na' lekzka' wi'a to yaj llyish che' gana' da' to le kobe' daa kochno nombia', san toz beena' ikaan gombi'en."

Daa golle' beñ'ka' lle' yell Tiatira

18 'Na' lekzka' bzej dga inia' li' na' bseñaan lao beena' chap chwia beñ'ka' chdop chllag choe'la'ogake' nad' yell Tiatírana': "Ki na Xiñ Chioza', beena' chzeeni' jalawe'na' ka bel yi', na' ni'ena' nakan ka de bronce dii chñachga:

19 Nad' nez nle'id' yog' dii wenna' chonle. Nezid' naple yel' chaki na' nonlilall'le nad', na' chaklenle beñ', na' chzo chzakile bittezə dii chen chle'ile. Na' nezid' ba chonchle dii wenna' ñaa aga ka benle kana' zi' benlilall'le nad'.

20 Per de to dii bi chazlallid' chele: choe'zle latj zoa noola' le Jezabel ladjlena', beena' chonz ka beñ' chyixjee daa che' Chioza' le'. Na' daa chli' chsedile' chziye'lene'n beñ'ka' chonlilall' nad', na' chone' ka chñelengake' beñ' na' chaogake' yel' wawa' daa chllia beñ' lao lwaa lsak' diika' choe'la'ogake'.

21 Nad' ba bi'a latj che' kwenche yiyaj yilenile' daa chñelene' beñ', per bi cheenile' kwej yichje'n.

22 Na' ni cheyin wsak'zi'ane', na' lekzka' wsak'zi'chga' beñ'ka' chongake'ne' txen chxinj chñengake' shi bi yiyaj yilengakile' cheyi daa chonlengake'ne'.

23 Na' wit' beñ'ka' nak ka xiine' daa chongake'ne' txen. Na' yog' beñ'ka' chdop chllag choe'la'ogake' nad' to to yell inezgakile' nan nadaan nombi'a do ka nak yichjlall'do' beñ', na' gonid' to tole kon ka nak daa chonle.

24 Na' ka le' lle'le Tiatírana' na' bi chonle txen diika' chli' chsemi noola' ni diika' nagake' chzajnií Satanáza' legake' daa kochno ñezi, bich bi dii yoblə inia' le' chiyal' gonle.

25 Kon li se wñeyi gontezi gonle daa nak wen axt kat'ch yiyed'.

26 Na' beena' so saki soacheche' gonlilallee nad' na' soe' gone' ka chazlallaa axt ni ka yiyed', na' wi'ane' yel' wñabia' kwenche inabi'e lao yog' yellka' lle' yell-lioni,

27 ka ben Xa'na', bene' nad' yel' wñabia'na'. Na' inabi'e legake', na' bi si'xene' che nottez beñ' bi chzenag che', na' wlliyee legake' ka beñ' chxoxj chtin to yes' yo.

28 Na' lekzka' wi'ane' belj xsila'.

29 Beena' cheni, chiyal' wzenagyenee daa che' Espíritu che Chioza' beñ'ka' gall kwente chdop chllag choe'la'o nad'."

3

Daa golle' beñ'ka' lle' yell Sárdiza'

1 'Bzej dga inia' li' na' bseñaan lao beena' chap chwia beñ'ka' chdop chllag choe'la'ogake' nad' yell Sárdiza': "Ki na beena' ngoo lall' nee gall espírituka' nak che Chioza' na' noxee beljka' gall: Nad' nez nle'id' yog' daa chonle. Na' la'kzi zeyi chele le wen chonle, lawa'ni bibi zakii daa chonle.

² Li yiyakbe'i, na' li yiyon ka dii le kwenche bi yiyoll yido kwej yichjle dii wenna' ni chonle. La' nez nle'id' daa chonle bi nakan kwaslo' ka cheeni Chios cha'na'.

³ Li lljadini diika' ba bli' bsedgakile' le' na' li wzenag cheyin, na' li yiyaj yileni. Shi bi chonle ka dii le, tokonganza yidsak'zi'a le', ka chon to wban aga no chsi'nile' kat' chjlane'.

⁴ Na' la'kzi chonle ka', ni len bal' ben' ladjlena' yell Sárdiza' ben' bi nda' nchen yichjlall'do'ena' dii mala'. Na' chidol'gake' soalengake' nad' na' gakwgake' to lech' xtil.

⁵ Beena' so saki soacheche' gonlilallee nad', na' wi'ane' to lech' xtil gakwe'. Na' biga yisol' lie'na' lee libr' cha'na' gana' nda' le yog' ben'ka' napgake' yel' mban zejli kani. Na' we'len' Xa'na' dill' len anjl' che'ka', yepgakee nake' nad' txen.

⁶ Beena' cheni, chiyal' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'."

Daa golle' ben'ka' lle' yell Filadélfiana'

⁷ Bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Filadélfiana': "Ki na beena' nak dowalj ben' li ben' shao', beena' nap yel' wnabia' ka daa wdap dii Davina'. Daa chsalje', kono gak yisejan, na' daa chseje', kono gak yisaljan.

⁸ Nad' nez nle'id' yog' dii wenna' chonle. Na' ba bsalj' ka to puert chele na' kono gak wsej wllon sho'le. Na' la'kzi xonjchgale nak, chonle ka na cho'a xtilaana' na' toshiizi chcheble nakle nad' txen.

⁹ Ka nak ben'ka' chzenag che Satanáza' na' chziye'gake' nazgake' nakgake' ben' Israel, nad' gon' ka yidchek' xibe'ka' laolena' na' gakbe'gakile' nad' chakid' le'.

¹⁰ Daa ba benle banez wzoacheche' benlilall'le nad', na' gapshii gapshawaa le' kat' illin lla yen ile'i yog'lol' ben' yell-lioni yel' zak'zi'ka' kwenche wli'lawin non chzenag cha'.

¹¹ Ba zoa gaoshosh yiyed'. Li se wneyi gontezi gonle daa nak wen kwenche bi wnitle daa ba non' lkwez chele.

¹² Beena' so saki soacheche' gonlilallee nad', ka zoa pilarka' nox'gakan lill Chios cha'na', ka' soe' gana' zoa Chioza' na' yigaanlene'ne' zejli kani. Na' wda' le Chios cha'na' le', na' le yell che Chios cha'na', yell Jerusalénna' daa nak dii kob daa za' yaba che Chios cha'na', na' lekzka' wda' lia'na' le' daa nak dii kob.

¹³ Beena' cheni, chiyal' wzenagyenee daa che' Espiritu che Chioza' ben'ka' gall kwente chdop chllag choe'la'ogake' nad'."

Daa golle' ben'ka' lle' yell Laodicéana'

¹⁴ Bzej dga inia' li' na' bselaan lao beena' chap chwia ben'ka' chdop chllag choe'la'ogake' nad' yell Laodicéana': "Ki na beena' na gakshga yog' daa na Chioza', beena' toshiizi choe' dill' kon ka nak dill' li che Chioza', beena' chnabia' lao yog'lol'te daa bxe bsil Chioza':

¹⁵ Nad' nez nle'id' yog' daa chonle, nezid' bi chonle ka chazlallaa na' ni bi chbej yichjle nad'. Wenchlan shel'ka' gonle tozan.

¹⁶ Na' daa ni ton bi chchoglall'le gonle, kweyjichjchokl' le'.

¹⁷ Le' nazle nakle ben' wni'a, na' nale le wen chak chele na' bich bi de dii chyalljile. Na' bi chakbe'ile lao Chioza' nakle ka ben' bi chak wen cheyin, ka ben' yesh', ka ben' lchol, ka ben' chda gal'yid gal'bel'.

¹⁸ Na' daan, nia' le' chiyal' si'le lawa'na' or daa ba gokshao' lo yi'na', kwenche gakle dowalj ben' wni'a; na' si'le lawa'na' lech' xtila' gakwle kwenche bich si'le zto' tale gal'yid gal'bel'le; na' si'le rmecha' kaale jalaoleka' kwenche ile'ile.

¹⁹ Nad' chsheshlen' yog' ben'ka' chakid', na' chsak'zi'a legake' kat' bi chongake' wen. Na' daan, li gon ka dii le, na' li yiyaj yileni.

²⁰ Nad' chnia' le' ka to ben' ze to cho'a yoo. Shi zoa ben' guenile' chnia' na' wsalje', na' sho'a na' gaolenee txen.

²¹ Beena' so saki soacheche' gonlilallee nad', na' wi'a latj inabia'lene' nad', ka ben' nad', wzoachech' wzo wzakid' daa btil' na' ba chnabia'len' Xa'na'.

²² Beena' cheni, chiyal' wzenagyenee daa che' Espíritu che Chioza' ben'ka' gall kwente chdop chllag choe'la'ogake' nad'."

4

Choe'la'ogake' Chioza' yabana'

¹ Ka biyoll bzej' diika' wne' nad', na' ble'do'id' nyalj to puert xan yabana'. Na' bizenid' bishbena' daa benid' dii nech daa nen ka ga chbell to trompet, na' wne' nad':

—Nilə wyep, na' wliid' li' diika' zi' za' gak.

² Na' ka wñie' nad', Espíritu che Chioza' bene' ka ble'id' yabana' gana' llia to ben' chñabi'e.

³ Na' beena' llia na', chey cheeni'chgue' ka yaj wan daa le jaspe na' daa le cornalina. Na' tcho'a tlawi gana' llie' ze to betyaa na' chña'titan ka yaj wan daa le esmeralda.

⁴ Na' gana' llie', ble'id' nechj zi tapichoa ben' lliagake' chñabia'gake', na' zoagake' do xtil na' nzoa twej corona de or yichje'ka'.

⁵ Na' gana' llia ben' necha' chep yes, na' chashj chtin, na' chak sshag inlleb. Na' lawe'na' ze gall yi' chal'ninan na' legakannan' espírituka' gall che Chioza'.

⁶ Lekzka' lao beena' llia chñabia' de to dii nak katekzə nisdona' na' nakan ka de vidr. Na' gchol' gana' chi'e chñabi'e lle' tap ben' de yel' mban cheyin, na' dii zan jalaogake' llia, ka laoləgake' na' ka koll'əgake'.

⁷ Ben' necha' nake' ka bell, na' ben' wchopina' nake' ka goon, na' ben' wyonina' nak cho'alawe'na' ka che benech, na' ben' wdapina' nake' ka bsia, ba chzo.

⁸ To to ben'ki zoa xop wej xilgake', na' zoa dii zan jalaogake' ka loolə na' ka koll'lə xile'ka'. Na' bi chsangake' ka wal' ka tella nagake':

Dowalj ben' li ben' shao', dowalj ben' li ben' shao', dowalj ben' li ben' shao', nak Xancho Chioza',

beena' nap yel' wak choo yel' wak xen,

beena' zoa ka wxe wzil yell-liona',

na' lekzen' zoe' naa, na' zoakze' zejli kañi.

⁹ Na' ben'ka' tap chgoogake' balaan beena' llia chñabia', beena' mban zejli kañi. Na' choe'gake' xtillee nake' ben' zakii nlleb na' choe'gake'ne' yel' choxken. Na' to to ka chongake' ka',

¹⁰ ben'ka' tapichoa chchek' xibe'ka' lao beena' mban zejli kañi na' choe'la'ogake'ne'. Na' chzal'gake' corona che'ka' lawe'na', nagake':

¹¹ Chios, li' nako' Xannto', na' chidoloo koonto' li' balaan na' we'nto' xtilloo nako' ben' zakii nlleb,

na' ben' yel' wak choo yel' wak xen.

Lin' bxe bsilo' yog'lolte dii de,

na' daa goklalloo soagakan, bxe bsilgako'n.

5

Yisha' daa ndos' gall sey

¹ Na' beena' llia chñabia' noxee lo nee de shlina' to yish dii ndobə, na' chop laaten' nyoj. Na' gana' biyoll bidoban ndosa'n gall sey.

² Na' ble'id' to anjl, ben' nap yel' wak xen, na' wñie' zillj inlleb, chñabe':

—¿Notg zakii wxoxje' seyka' na' wselle' yisha'?

³ Na' kono bllel yabana' ni lo yell-liona', ni xan yell-liona', ben' gak wzeshe'n na' wwie' bin da'n.

⁴ Na' le wchellchga' daa kono bllel ben' zakii wzeshe' yisha' na' wwie' bin da'n.

⁵ Na'ch to beena' len ben'ka' tapichoa wne' nad':

—Bich kwello', la' beena' nsi'gake' Bell che Judá daa mbejlawe' lo dia che dii Judána', beena' nak xiin dia che dii Davina', ba bene' gan dii mala' na' wak wxoxje' seyka' gall na' wzeshe' yisha'.

⁶ Na'ch ble'idee zie' gchoł gana' llia beena' chñabia' na' gana' nechj beñ'ka' tap na' beñ'ka' tapichoa. Na' ble'idee ka to xil'do', ba betgake'. Na' llia gall lozb na' zi gall jalaob, diikan' nak espírituka' gall daa nak che Chioza' daa nselee doxen yell-lioni.

⁷ Na'ch beena' ble'id' ka xil'do' wbiguee lao beena' llia chñabia' na' wdoyoe' yisha' daa ndobə daa noxee lo nee de shlina'.

⁸ Na' kon ka wdoyoe' yisha' daa ndobə, beñ'ka' tap na' beñ'ka' tapichoa bçhek' xibe'ka' lao beena' ble'id' nak ka xil'do'. To togake' nox'gake' twejə arpa, na' lekzka' nox'gake' barser de or yoogakan yala' daa chzeygake', na' llen yala' zaklebin xtilł' beñ'ka' nak lall' na' Chioza', dill'ka' choe'lengake'ne' kat' choe'llwillgake'ne'.

⁹ Na' belgake' to dii kob dii chgoon le' balaan, na' ki nan:
Lin' chidołoo goxoo yishi ndobə na' wxoxjo' seyka', daa betgake' li',
na' daa blalj xcheno'na' biya'o bizi'o
beñ' za' yog' dia, yog' yell na' yog' nación,
na' beñ' chne wde wdeli dill',
kwenche nakgake' lo na' Chioza'.

¹⁰ Na' ba nono' lall' na'gake' inabia'gake' lo yell-liona'
na' gakgake' bxoz che Chios chechona'.

¹¹ Na'ch ble'id' anjl zan, na' benid' shi'eka'. Nechjgake' gana' llia beena' chñabia' len beñ'ka' tap na' beñ'ka' tapichoa. Na' daa nakgake' beñ' zan inleeb ni bi wbabid'gake'.

¹² Na' wñagake' zillj nleeb:
Beena' nak ka xil'do', beena' betgake',
chidolee we'nto' xtillee nape' yel' wñabia' xen,
na' naki che' yog'łol yel' wni'a dii de,
nape' yel' sin' xen na' yel' wak choo yel' wak xen,
nake' beñ' zakii nleeb,
na' chidolee we'la'onto'ne' na' koonto'ne' balaan.

¹³ Na' benid' wne yog'łol dii de yel' mban cheyin na' yog'łol diika' bxe bsil Chioza' yabana' na' yell-lioni, na' xan yell-lioni, na' loo niso'na', nagakan:
Beena' llia chñabia' len beena' nak ka xil'do',
chidoł'gake' we'la'ocho legake' na' koocho legake' balaan zejli kani,
na' we'cho xtilł'gake' nakgake' beñ' zakii nleeb, na' napgake' yel' wak choo yel' wak xen.

¹⁴ Na' beñ'ka' tap nechj le', nagake':

—jKan' nakan!

Na' beñ'ka' tapichoa bçhek' xibe'ka' be'la'ogake' legake'.

6

Bxoxje' seyka'

¹ Na' ble'id' Beena' Zaklebi to Xil'do' bxoxje' sey necha' lawi diika' gall, na' benid' wne to beñ'ka' tap lle' na', na' shi'ena' nenan ka ga chashj chtin. Na' wne' nad':

—Nilə da, na' bwia dga.

² Na' ble'id' to kabay llyish, na' beena' llia koll'ba' noxee to xis wixit'. Na' bzoagake' to corona yichje'na', na' bcheje' lega beñ' ben gan lo wdil na' zeje' sto shii lljene' gan.

³ Na' ka bxoxj Beena' Zaklebi to Xil'do' sey de wchopina', benid' wna beñ' wchopina', beena' len ladj beñ'ka' tap:

—Nilə da, na' bwia dga.

⁴ Na' ble'id' bchej sto kabay, ba xna. Na' beena' llia koll'ba' gok loo nee gone' ka bich soalen ljwell beñ' yell-lioni mbalaz na' wit ljwellgake'. Na' bi'ene' to spad xen.

⁵ Na' ka bxoxj Beena' Zaklebi to Xil'do' sey de wyonina', benid' wna ben' wyonina' len ladj ben'ka' tap:

—Nilə da, na' bwia dga.

Na' bwia' na' ble'id' to kabay gasj. Na' beena' llia koll'ba' noxee to xig'libr.

⁶ Na' benid' wne to ben' ladj ben'ka' tap, chi'e:

—Gono' ka sak' chop ya trígona' che shlla llin, na' xop ya cebádana' che shlla llin, na' bi wwal' wsilo' seta' ni vinona'.

⁷ Na' ka bxoxj Beena' Zaklebi to Xil'do' sey de wdapina', benid' wna ben' wdapina':

—Nilə da, na' bwia dga.

⁸ Na' bwia', na' ble'id' to kabay, ba te, na' beena' llia koll'ba' lie' Yel' Wit. Na' daa le Hades* zjanon le'. Na' gok lo nagake' witgake' to kwart ben'ka' lle' yell-lioni lo wdił, lo wbin, lo yillwe' na' lao ba zniaka'.

⁹ Na' ka bxoxj Beena' Zaklebi to Xil'do' sey de gayi'na', ble'id' to dii nak ka gana' chzeygake' diika' chjwa'gake' lao Chioza', na' xni'ayinna' lle' ben'ka' betgake' ni che cho'a xtill' Chioza', na' daa bi bsangake' we'gake' xtilleena'.

¹⁰ Na' wnegake' zillj inleeb, che'gake':

—Chios, li' nako' Xannto'. Nako' dowalj ben' li ben' shao' na' nako' ben' chon yog' dii chchebo', ¿bat gono' yel' joschis che ben'ka' lle' yell-liona' na' yizi'o wzon daa betgake' neto'?

¹¹ Na'ch bi'e twej xa xtilgake', na' golle' legake' kwezgake' zi' xtit ax̄t ki yizaa yibab ben'ka' nakgake' txen, ben'ka' zi' witgake' daa choe'gake' xtill' Chioza'.

¹² Na' ka bxoxj Beena' Zaklebi to Xil'do' sey de wxopina', ble'id' gok to bedxo' xen wal. Na' wbillā' biyakan dii gasj ka lech' gasj daa chakw ben' kat' chet to bish' ljwelle'. Na' doxen beo'do'na' biyakan dii xna ka chen,

¹³ na' bllib beljdo'ka' llia xan yabana', bxopgakan lo yell-liona' ka chxop yixwew yaa kat' chta be' wala' xyaguinna'.

¹⁴ Na' yabana' bidobłolan ka chidob to yish, na' yog'łol yaaka' na' yog'łol yell-liodo'ka' llia lo nido'na' blla' xishna'inka'.

¹⁵ Na' ben'ka' chnabia' lo yell-lioni, na' no ben' zakii, na' no ben' wni'a, na' no xan soldadka', na' no ben' mbejlawin, no ben' ndoo lla yel chone' xshin ben' na' no ben' chon xshinkze', jakwash'gake' no loo blej, no ladj yajka' lle' lo yaaka'.

¹⁶ Na' che'gake' yaa yaoka' na' yajka':

—Li idakwtega neto', na' li wkwash' neto' lao beena' llia chnabi'e na' lao yel' zak'zi' daa chon Beena' Zaklebi to Xil'do',

¹⁷ la' ba bllin lla wsak'zi'gake' ben', na' aga no so saki yel' zak'zi'na'.

7

Ben'ka' nak to guiyoa tapiyona mil

¹ Ka biyoll ble'id' diiki, bizle'id' tap anjl zechagake' tap laate yell-lioni, chzag'gake' be'na' za' tap laate kwenche bibi be' se lo yell-lioni ni lo nido'na' na' ni lo yagka'.

² Lekzka' ble'id' sto anjl zee gana' chla'lə wbillā', na' noxee sey che Chios yaa Chios banna'. Na' besyaa anjli zillj inleeb wnie' anjlka' tap, ben'ka' gok lo na'gake' yel' waka' kwenche gak wlliyi'gake' diika' de lo yell-liona' na' loo nido'na', na' chi'e legake':

³ —Bibi gonile yell-lioni, nido'na', ni yagdo'ka' shlak bin' wda'cho seya' loxga ben'ka' nonlilall' Chios chechona'.

⁴ Na' benid' ka'k' ben'ka' wda' seya' loxgue'ka', na' nakgake' to guiyoa tapiyona mil ben', ben'ka' nak shllin kwen dia che dii Israela'.

⁵ Shllina mil ben'ka' nak dia che dii Judána', shllina mil ben'ka' nak dia che dii Rubénna', shllina mil ben'ka' nak dia che dii Gada',

⁶ shllina mil ben'ka' nak dia che dii Asera', shllina mil ben'ka' nak dia che dii Neftalina', shllina mil ben'ka' nak dia che dii Manaséza',

⁷ shllina mil ben'ka' nak dia che dii Simeónna', shllina mil ben'ka' nak dia che dii Levína', shllina mil ben'ka' nak dia che dii Isacara',

⁸ shllina mil ben'ka' nak dia che dii Zabulonna', shllina mil ben'ka' nak dia che dii Joséna', na' zi shllina mil ben'ka' nak dia che dii Benjamínna'.

Ben' be ben' zil ben'ka' zoa do xtil

⁹ Ka biyoll dga, na'ch bwia' na' ble'id' ben' zan inleeb, ben' za' doxen yell-lioni, na' lo wde wdeli dia, na' ben' chne wde wdeli dill', na' ben' za' yog' yell. Zegake' lao beena' lia chnabia' na' lao Beena' Zaklebi to Xil'do', na' kono ibabi legake' daa nakgake' ben' be ben' zil inleeb. Na' nakwgake' twej xagake' dii xtil na' nox'gake' twej zin.

¹⁰ Na' yog'lolzgake' chosyaagake' zillj inleeb, nagake':

Chios chechona', beena' lia gana' chnabi'e,
na' Beena' Zaklebi to Xil'do'
ba bislagake' cho'.

¹¹ Na' yog'lol anjlka' nechjgake' beena' lia chnabia', na' ben'ka' tapichoa len ben'ka' tap, b'chek' xibe'ka' lawe'na' ax't lo yona' bllin loxgue'ka', na' be'la'ogake' Chioza',

¹² nagake':

¡Kan' nakan! Toshiizi we'la'ocho Chios chechoni, na' koochone' balaan,
na' we'cho dill' ka nak yel' sin' che'na', na' we'chone' yel' choxken,
na' we'cho dill' nake' ben' zakii nleeb, ben' chnabia' doxen, na' ben' yel' wak choo yel' wak xen. ¡Kan' nakan!

¹³ Na' to beena' len ben'ka' tapichoa wnable' nad':

—¿Nora ben'ki nakw lech' xtila'? ¿Gara za'gake', lla?

¹⁴ Na' goshee:

—Li'kz nezilo' daa, ben'do'.

Na' le' wne' nad':

Ben'kin ba bichej lo yel' zak'zi' xenna', na' ba biyib bixisi xe'ka' x'chen Beena' Zaklebi to Xil'do', na' daan nakwgake' lech' xtila'.

¹⁵ Daan, zegake' lao Chioza' gana' zoe' chnabi'e na' ka wal' ka tella choe'la'ogake'ne'. Na' Chioza', beena' lia chnabi'a soalene' legake' na' gap wwie' legake'.

¹⁶ Bich ibil idongake', ni bich wzey wbilldo'na' legake', ni bich gaggakile' zey',

¹⁷ ¡a' Beena' Zaklebi to Xil'do', beena' zoa gana' chi' Chioza' chnabi'e, gap wwie' legake'. Na' w'chi'e legake' gana' chal nisa' daa nsa' yel' mbanna'. Na' Chioza' wkwase' yog'lol daa chkwellyeshaan legake'.

8

Bxoxje' sey de gállina'

¹ Na' ka bxoxj Beena' Zaklebi to Xil'do' sey de gállina', goklli yabana' ka do gashj gor.

² Na'ch ble'id' gall anjlka' zegake' lao Chioza', na' bi'e legake' gall trompet.

³ Na'tech bla' sto anjl noxee to barser de or, na' jsie' kwit daa nak ka mes de or gana' chzeygake' yala' daa zoa lao beena' chnabia'. Na' bi'ene' yal zan kwenche wzeye'n lawinna', na' gakan toz xtil' ben'ka' nak lall' na' Chioza' kat' choe'lwillgake'ne'.

⁴ Na' llen che yala' daa yoo loo barsera' nox' anjla' wyasan zejan lao Chioza' nakan txen xtil' ben'ka' choe'lwillgake'ne'.

⁵ Na' anjla' bexee barsera', wlo'en yi' galja' daa chi' gana' chey yala', na' bzaleen lo yell-lioni. Na' goshj wtin, na' gok sshag, na' wyep yes, na' wxo' wñib yell-lioni.

Trompetka' gall

⁶ Na' anjlka' gall, ben'ka' nox' trompetka', wze kwasgake' wkwel'gake'n.

⁷ Na' anjl necha' bkwelle' trompet che'na', na' bxop lo yell-lioni yaj yaba na'ch yi' na' nchixgakan chen. Na' schoo yell-lioni wyey, zi lat'zə ki gokan gashjə,* na' wyeylenan dii zan inleeb yag, na' doxen gana' de shga'.

⁸ Na' anjl wchopina' bkwell trompet che'na', na' bxop loo nisdona' to dii nak ka to yaa xen dii chal'nin. Na' zi lat'zə ki gok gashjə nisdona' biyakan chen.

⁹ Na' zi lat'zə ki gok gashjə bado'ka' lle' loo nisdona' witgakb, na' lekzka' zi lat'zə ki gok gashjə barkwka' chda lo nisdona' wlliyai'.

¹⁰ Na' anjl wyonina' bkwell trompet che'na' na' bxop to belj xen chal'ninan, na' bxopan gana' de yaoka' na' gana' chal niska'.

¹¹ Na' belj xenna' len Dii Zla'. Na' zi lat'zə ki gok gashjə nisa' gokan zla', na' ben' zan wit ni che nis zla'na'.

¹² Na' anjl wdapina' bkwelle' trompet che'na', na' zi lat'zə ki gok gashjə wbillla' na' beo'dona' na'ch beljdo'ka' wnit beeni' cheyinka'. Na' bich bzeeni'gakan zi lat'zə ki gok shgobill na' gashj yel.

¹³ Na'ch ni zej chwia' na' benid' to bsia chzob gchoł xan yabana' na' wneb zillj inleeb, nab:

—jNyesh'laz gak che ben' yell-lioka' kat' wkwell anjlka' tompetka' zi shon!

9

¹ Na' anjl, ben' gayi'na', bkwelle' trompet che'na', na' ble'id' to belj dii bxop xan yabana' jet'an lo yell-liona'. Na' be'gake'ne' xiinya che yecha' daa bi chiyoll chido nak zitj.

² Na' bsalje' cho'a yecha' daa bi chiyoll chido nak zitj na' bchej lo'inna' llen ka che to gorn xen. Na' llenna' daa bchej lo'inna' bkwashaan wbillla' na' xan yabana'.

³ Na' loo llenna' bllesh ba zan inleeb bish'zo na' bllijgakb doxen lo yell-lioni. Na' bene' kwenche gak gad'gakb ka chad' bexjoni'ka'.

⁴ Na' bi bi'e latj bi gongakib yix ga'na' daa de yell-lioni, ni tlish' dii nak shi'a shga', ni tlish' yag, san toz ben'ka' bi da' sey che Chioza' loxgue'ka' bzoazi'yaagakb.

⁵ Na' bi bi'e latj witgakb legake', san to wzoazi'yaazgakb legake' gay' beo'. Na' gana' god'gakb wlan ka chla gana' chad' bexjoni'na'.

⁶ Na' kat'ka' gak dga, ben' yell-lioka' gaklall'gake' guetgake' per bi guetgake'; na' selall'gake' bich soagake' per yel' wita' wxonj wkwashiin legake'.

⁷ Na' bish'zoka' nakgakb ka kabay ba shaj lo wdil. Na' yichjbka' zoa twej dii nak ka corona de or, na' cho'alaobka' nakan ka cho'alao ben'.

⁸ Na' yish' yichjbka' nakan ka yish' yichj noolə, na' leybka' nakan ka ley bell.

⁹ Na' daa nakwgakb nakan de ya na' chkweejan kwerp chebka'. Na' xilbka' chongakan sshag inleeb ka ga za' zan kabay ba ngoyo karret dii zej lo wdila'.

¹⁰ Na' lo xbambka' zoagakan ka lew bexjoni', na' wchingakban kwenche wzoazi'yaagakb ben' yell-liona' gay' beo'.

¹¹ Na' anjla', beena' nak lall' nee yech zitja', chnabi'e bish'zoka', na' dill' hebrewa' lie' Abadón, na' dill' griegona' lie' Apolión, na' zejin Williyai' Williade.

¹² Na' biyoll yel' zak'zi' necha', per ni chyallj zi chopan.

¹³ Na'ch anjl, ben' wxopina', bkwell trompet che'na', na' benid' wne to ben' gana' zoa daa nak ka mes de or gana' chzeygake' yala' daa lia ka lozdo'in to to schin daa zoa lao Chioza'.

¹⁴ Na' golle' anjl, ben' wxopina', beena' nox' trompeta':

—Bsell anjlka' tap, ben'ka' nchej cho'a yao xenna' le Éufrates.

* 8:7 Zi lat'zə ki gokan gashjə: literalmente la tercera parte.

15 Na' bselle' tapte anjlka', beṅ'ka' nzoē' kwenche witgake' beṅ', na' zi lat'zə ki gok gashjə* beṅ' yell-liona' betgake'. La' ba nllie' bia' gongake' ka' ka lo gora', lo llana', lo bewaa, na' lo yiza'.

16 Na' benid' nak chop guiyoa millón soldadka' lliagake' kabay.

17 Na' ki nak kabayka' ble'do'id' na' beṅ'ka' lliā koll'bka': daa nkweej cho'alcho'eka' nakan dii xṅa ka yi'na', na'ch de azul ka yaj wan daa le zafiro, na' dii gush ka bishte daa ne' azufre. Na' yichj kabayka' nakgakan ka yichj bell, na' loo cho'abka' chchej yi' dii nchix azufre na'ch llen.

18 Zlat'zə ki gok gashjə† beṅ' yell-lioka' witgake' ni che shon yel' zi'ki: yi'na', llenna', na'ch azufrena' diika' bchej cho'a kabayka'.

19 Na' kabayka', bchingakb cho'abka' na' xbambka' kwenche betgakb beṅ', la' xbam-bka' nakgakan ka beḷ, na' yichji daa zoa xbamka' daa nak ka beḷ bzoazi'yaagakan beṅ'.

20 Na' beṅ'ka' bi biya gueti diiki, bi biyaj bilengakile' dii malka' chongake', ni bi wlej yichjgake' we'la'ogake' dii xiw'ka' na' diika' nongake' de or, de plat, de bronce, na' de yaj na' de yag, diika' bi chle'i ni bi chengakin, ni bi chak sa'gakan.

21 Ni bi biyaj bilengakile' daa chitgake' beṅ', daa nlangake' yel' willa'na', ni daa chṅelen ljwellgake', ni daa chzi' chbangake'.

10

Anjla' noxee to yish dii ba biyesh

1 Na'ch ble'id' sto anjl, beṅ' nap yel' wak xen, chetje' yabana' zindobe' to bej. Yichje'na' xoa to betyaa, na' cho'alawe'na' chep cheeni'n ka wbillā', na' ni'eka' nakgakan ka beḷ yi' dii chzolla'.

2 Na' noxee to yish dii ba biyesh, na' bzoe' ni'e de shlina' lo nido'na' na' de robesa' bzoe'n lo yell-liona'.

3 Na' besyaadie' zillj inleeb ka chosyaa to bell. Na' ka besyee, wne wziwaa gall shii.

4 Na' ka biyoll wne wziwaa gall shii, na'ch nan wzej' daa wnagakan. Per benid' wne to beṅ' yabana', na' wne' nad':

—Bi wzejo' daa wna wziwaa, san wlooshawaan loo yichjlall'do'na'.

5 Na' anjla', beena' ble'id' nzoa ni'ena' tlaa lo nido'na' na' daa zi tlaa lo yell-liona', blis nee de shlina' yabalə

6 na' bzoe' de taschiw beena' zoa zejli kaṅi, beena' bxe bsil yabana' na' yog'loḷ daa lliā xaninna', na' yell-lioni na' yog'loḷ daa de lawinna', na' nido'na' na' yog'loḷ daa lle' lo'inna', na' wne':

—Aga chllach gak daa lliā bia' gak.

7 San kat' wkwel anjl, beṅ' gállina', trompet che'na', na' yiyoll yido gak yog'loḷ daa blliā Chioza' bia' gak, kon ka golle' dii beṅ'ka' wdixjee daa wne' kani'yi.

8 Na' sto shii benid' shii beena' wne yabana', na' wne' nad':

—Wyaj kwit anjla', beena' nzoa ni'ena' lo nido'na' na' lo yell-liona', na' jaxi' yisha' daa noxee.

9 Na' wya' kwit anjla' na' binabidee yisha'. Na' wne' nad':

—Ni den, wdawan. Na' idawilon' zix sia ka shin basera', per loo li'ona' yiyakan zichj zla'.

10 Na' bikaa yisha' lo na' anjla' na' wdawa'n. Na' bdawidaan zix sia ka shin basera', per ka bidon wdaw' na' biyakan zichj zla' loo li'ana'.

11 Na' wne' nad':

—Chonan byen wi'o dill' daa na Chioza' gak che beṅ'ka' lle' yellka', na' naciónka', na' beṅ' chne wde wdeli dill', na' beṅ' wṅabia'ka'.

* 9:15 Zi lat'zə ki gokan gashjə: literalmente la tercera parte. † 9:18 Zi lat'zə ki gokan gashjə: literalmente la tercera parte.

11

Chop ben' wi'e dill' daa che' Chioza' legake'

¹ Na' bene' nad' to ya dii gak wchixid', na' wne':

—Wyaj na' jachix ka'k' nak yoodo' che Chioza' na' ka'k' nak gana' chzeygake' yala', na' blab ka'k' ben'ka' choe'la'o Chioza' na'.

² Na' bi wchixo' lesh' chyoodo'na', la' ba nakan lall' na' ben'ka' bi nombia' Chioza', ben'ka' wlej wshoshjgake' yell che Chioza' chopiyon beo'.

³ Na' wselaa chop ben' wi'e cho'a xtilaana', na' gakwgake' lech' zeshaa, na' to mil chop guiyoa guiyon lla chixje'gake' daa yepgakee.

⁴ Ben'ki chop zaklebgake' chop yag olivoka' na' chop candelerka' zoa lao Chioza', beena' nak Xan yell-lioni.

⁵ Na' shi no bi goni legake', loo cho'eka' ichej yi' na' wlliaiyi'n ben'ka' chakzbani legake'. Na' ka' kwiayi' nottezə ben' gaktallee bi gonile' legake'.

⁶ Ben'ka' chop napgake' yel' wak kwenche bi gak yeja' shlak chixje'gake' daa ye' Chioza' legake'. Na' lekzka' napgake' yel' wak yiyongake' nisa' chen, na' gongake' yiya dii wsak'zi'n ben' yell-lioki kon ka'k'to cheengakile'.

⁷ Na' kat' yiyoll chixje'gake' cho'a xtil' Chioza', daa nak ka bayix' znia daa ichej loo yecha' daa bi chiyoll chido nak zitj, goxaan legake' na' gonan gan witan legake'.

⁸ Na' kwerp che'ka' gat'gakan yawi nez che yell xenna' gana' bda'gake' Xancho Jesucristona' lee yag cruza', daa zaklebi Sodómana' na'ch Egíptona'.

⁹ Na' ben' wde wdeli yell, na' wde wdeli dia, na' ben' chne wde wdeli dill', na' ben' wde wdeli nación wwiagake' kwerp che'ka' shon lla shgobill, na' bi we'gake' latj no wkwash' legake'.

¹⁰ Na' ben'ka' zoa lo yell-lioni yiba yizakgakile' daa ba witgake'. Na' daa le yiba yizakgakile' we' ljwellgake' dii chiza'lall'gake', la' ben'ka' wdixjee daa goll Chioza' legake' chiya dii bengake' kwenche bsak'zi'gake' legake'.

¹¹ Na' ka gok shon lla shgobill, Chioza' bisbane' legake', na' biyasgake' sto shii. Na' yog' ben'ka' ble'gakile' legake' le bllebgake'.

¹² Na' ben'ki chop bengakile' wne to ben' yabana', chi'e legake':

—Li yiyep nilə.

Na' biyepgake' yabana' to lo bej, chwiate ben'ka' gokzi' gokzbani legake'.

¹³ Na' ka chiyepgake' gok to bedxo' xen, na' bchinjan lat'* yella', na' wit galla mil ben'. Na' ben'ka' bi wit le bllebgake' na' be'la'ogake' Chioza', beena' llia yabana'.

¹⁴ Na' biyoll yel' zak'zi' de wchopina', per lii za'te de wyonina'.

Bkwelle' trompet de gállina'

¹⁵ Na' anjl, ben' gállina', bkwelle' trompet che'na', na' benid' wne ben' zan zillj inlleb yabana', wnagake':

Yel' wñabia'na' de yell-liona'

ba nakan che Xancho Chioza' len Crístona',

beena' wleje' kwenche inabi'e;

na' inabi'e zejli kanì.

¹⁶ Na' ben'ka' tapichoa, ben'ka' llia lao Chioza', bchek' yichje'ka' axt lo yona', be'la'ogake'ne',

¹⁷ nagake':

Chonnto' li' yel' choxken, Chios,

ben' liizelozi nap yel' wak choo yel' wak xen, ben' nak Xannto'.

Li'kzan zo' naa, na' li'kzan zo' ka wxw zil yell-liona', na' zejli kanì zo'.

Na' ba wzolo chñabia'leno' yel' wak choo yel' wak xen cho'na'.

* **11:13** Lat': literalmente la décima parte.

18 Ben'ka' lle' yell-liona' ba bllaa blokgabe',
na' ba bllin lla wsak'zi'gako'ne'.
Na' naa gono' yel' joschis che ben' wetka',
na' wi'o daa chidol' ben'ka' wdixjee daa gollo' legake',
na' ben'ka' nak lall' no', len ben'ka' chgoo li' balaan,
ka ben' zakii ka ben' bi zakii;
na' wliayoo ben'ka' chliayi' ben' yell-liona'.

19 Na'ch byalj yoodo'na' zoa yabana', na' loo yoodo'na' nla' yiina' gana' lle' yaj taaka'
gana' bzej Chioza' diika' bllie' bia' gon ben' Israelka'. Na' wyep yes, na' gok sshag, na'
goshj wtin, na' gok to bedxo' wal, na' wche'chga yaj yabana'.

12

Noola' na' bayixaa nak ba xna

1 Na' xan yabana' ble'id' to dii chonan ka yibanicho. Ble'id' to nool ndobə beeni' che
wbilla' le', na' zoa beo'do'na' xni'ena', na' nzoa to corona yichje'na' na' llian shllin belj.

2 Na' noa' noola' to bdo', na' chosyee daa chllagloe' chaz besa' sane'b'.

3 Na'ch bizle'id' xan yabana' sto dii chon ka yibanicho. Ble'id' to bayix' xen inleeb, ba
xna, na' llia gall yichjb na' zi shi lozb, na' twej corona zoa to to yichjba'.

4 Na' bta xbama' bshibb zan beljdo'ka' llia xan yabana', zi lat'zə ki gokan gashj,*
na' bzal'b legakan lo yell-lioni. Na' wze bayixaa lao noola' beena' san, kwenche guebb
xiine'na' kate galjb'.

5 Na' noola' wxane' to bi' byodo', bi'na' inabia' doxen zbii zkaan yell-lioni na' gom' byen
wzenaggake' cheb'. Na' Chioza' lii bigoyotie'b' ziyajb' gana' chi'e chnabi'e.

6 Na' bxonj noola' zeje' gana' bibi chashj chleb, gana' ba nonshao' Chioza' to latj che',
na' we'gake' dii gawe' to mil chop guiyoa guiyon lla.

7 Na'tech gok to wdil' yabana'. Anjl, beena' le Miguel, na' anjlka' ngoo lall' nee wdil-
lengake' bayix' xnana'. Na' bayix' xnana', daa nak dii xiwaa, len anjl cheyinka' wdil-
lengakan legake',

8 per bi wzogakin gongakan gan. Na' bich bi latj chegakin got' yabana'.

9 Na' wlejgake' bayix' xnana', daa nak bel kani'teyi, daa le dii xiw' na' Satanás, daa
chziye' doxen yell-lioni. Bzal'gake'n yell-lioni len anjl cheyinka'.

10 Na' benid' wne to ben' zillj inleeb yabana', wne':

—Ba bllin lla bisla Chios chechona' ben' yell-liona', ba bli'e yel' wak choo yel' wak xen
che'na' na' yel' wñabia' che'na', na' yel' wñabia' che Cristona', beena' wleje' inabia'lene' txen.
La' ba bibejgake' dii xiwaa daa chao xya che ben'ka' nakcho txen, daa chao xya chegake'
lao Chios chechona' ka tella ka wal.

11 Ba bengake'n gan daa chonlilall'gake' Jesucristona', Beena' Zaklebi to Xil'do', beena'
blalj xchene'na' ni chegake'. Na' bi bllebgake' be'gake' xtilleena', san bzani kwingake'
guetgake'.

12 ¡Ka le' zoale yabana', li yiba yizaki! Per jnyesh'laz gak chele, le' lle'le yell-liona' na' lo
nisdona'! La' dii xiwaa ba betjan gana' zoale na' chllaa chlokan nall inleeb daa nezin bich
bi latj xen cheyin de.

13 Na' ka gokbe'i bayix' xnana' ba bzal'gake'b lo yell-liona', na' blagdob noola' wxan bi'
byodo'na'.

14 Na' bzoa Chioza' chop xil noola', ka xil bsia xen, kwenche bxonjile' dii xiwaa na'
lljsoe' gana' bibi chashj chleb, gana' ba nonshao' Chioza' to latj che', na' we'gake' dii gawe'
shon yiz yoo gashjə.

15 Na' dii xiwaa, daa nak bayix' xnana', bem ka bchej nis zil loo cho'aba' gokan to yao
kwenche nan wa'n noola'.

* 12:4 Zi lat'zə ki gokan gashjə: literalmente la tercera parte.

16 Per yell-liona' byaljan kwenche goklenan noola', na' wdeban yawa' daa bchej loo cho'aba'.

17 Na' daa gok ka', bllaa blokchga bayix' xnana' noola' na' wyajb jtil-lem xiin dia che'na' bgaan, ben'ka' chzoa dill' daa nllia Chioza' bia' gongake', ben'ka' zoachech chajle'gake' cho'a xtill' Jesucristona'.

18 Na' wze bayix' xnana' cho'a nildo'na'.

13

Bayixaa bchej loo nildo'na'

1 Na' ble'id' bchej loo nildo'na' to bayix' llia gall yichjb na' zi shi lozb. Na' to to lozba' zoan twej corona, na' to to yichjba' llian leba' daa zeji chon kwim ka Chioza'.

2 Na' bayixaa ble'id', nakb katekzə bell tigr*, na' ni'a naba' nakan ka ni'a na' oso, na' cho'aba' nakan ka che bell lión. Na' bayix' xnana' be'b leb yel' wak na' yel' wñabia' cheba' kwenche inabia'b.

3 To yichj bayixaa zoalejan byaljan to we' daa nan guetib, na' we'na' biyakin. Na' yog' ben' yell-lioka' bibangakile' na' bengake' bayixaa txen.

4 Na' be'la'ogake' bayix' xnana', daa be' yel' wñabia' cheba' bayixaa nak ka bell tigr, na' lekzka' be'la'ogake' bell tigra', nagake':

—Kono zoa sto ka bayixii, na' kono so saki til-lem.

5 Na' kono bsej bllon be'b dill' cha'sibə na' wñeb zban che Chioza', na' wñabia'b chopiyon beo'.

6 Wñeb zban che Chioza', na' biz ben wñab che', na' che yabana' gana' zoe', na' che ben'ka' zoa yabana'.

7 Na' gok lo na'b til-lem ben'ka' nak lall' na' Chioza', na' bem legake' gan. Na' lekzka' gok lo na'b inabia'b lao yog'lol ben' za' yog' dia, ben' lle' yog' yell, ben' lle' yog' nación, na' ben' chne wde wdeli dill'.

8 Na' yog'lol ben'ka' lle' yell-lioni, ben'ka' bi da' leinna' lee libr che Jesucristona', we'la'ogake' bayixaa. La' kana' wxw wzilte yell-lioni, Jesucristona', Beena' Zaklebi to Xil'do' daa betgake'ne', bzeje' lee libr che'na' le yog' ben'ka' gat' yel' mban cheyin zejli kani.

9 Beena' cheni dga nia', chiya' wzenagyeneen.

10 Beena' wche'gake' wsejgake', shajshaze' gatee lillyana'. Na' beena' ba nakan guetile' yesyana', guetshazile'n. Na' daan, ben'ka' nak lo na' Chioza' chiya' soachechgake' gonlilall'gake'ne'.

11 Na'tech ble'id' sto bayix' bchejb loo yell-liona' na' llia chop lozb dii nak ka che to xil'do', per chneb ka bayix' xnana'.

12 Na' wdapb do ka nak yel' wñabia' che bayix' necha', na' ba necha' be'b latj wñabia'b kwenche bem byen yog' ben' lle' yell-lioni be'la'ogake' ba necha', bana' biyaki we' cheba' daa nan guetib.

13 Na' lekzka' bana' bchej loo yell-liona' bem yel' wak xen daa benan ka bibani ben', axt bem ka betj yi' xan yabana' bxopan lo yell-lioni chwiate ben' yell-lioka'.

14 Na' ni che yel' wakki gok lo na'b gom gana' llia ba necha', wxiye'b ben'ka' lle' yell-lioni kwenche bzenaggake' che ba necha', na' bem byen bengake' to lwaa lsak' ba necha' bana' biyaki we' cheba' daa bsalj yesyana'.

15 Na' bayix' wchopina' wdapb yel' wak kwenche wloob bishbe daa nak lwaa lsak' bayix' necha', kwenche gak inen na' gonan ka witgake' yog' ben'ka' bi we'la'o len.

16 Na' lekzka' bem byen yog'lol ben' sho' nee de shlina' wa loxgue'na' to sen, ka ben' zakii ka ben' bi zakii, ka ben' wni'a ka ben' yesh', ka ben' ndoo lla yel chone' xshin ben' na' ka ben' chon xshinkze'.

* 13:2 Bell tigr: literalmente leopardo.

¹⁷ Na' kono gok wit' wde bi dii de che' wa si'e bi dii chyalljile' shi bi yo'e sen che bayixaa daa nak leb wa número daa zeji leba'.

¹⁸ Chyalljicho yel' sin' kwenche shajniicho dga. Beena' shajniile'n na' yiyiljni'e número che bayixaa daa nak to número che ben'. Na' número na' nakan xop guiyoa guiyon xop.

14

Daa be ben'ka' to guiyoa tapiyona mil

¹ Na' ble'id' Jesucristona', Beena' Zaklebi to Xil'do', zie' lo yaana' le yaa Sión. Na' lene' to guiyoa tapiyona mil ben', na' da' loxgue'ka' le Jesucristona', Beena' Zaklebi to Xil'do', na' le Xe'na'.

² Na'ch benid' to sshag wal za'n yabana', na' sshaga' nenan ka nen yao xenna' daa chxop cho'a bnanja' na' ka nen kat' chashj chtin. Daa benid', nenan ka shii dii zan arpa dii chsillgake'.

³ Na' cholgake' to dii kob lao beena' llia chnabi'a na' lao ben'ka' tap zoa xilin, na' lao ben'ka' tapichoa. Na' koch no ben' yoblə gok gol daa cholgake', san toz ben'ka' nak to guiyoa tapiyona mil, ben'ka' bisla Chioza' ladj ben'ka' lle' yell-lioni.

⁴ Ben'kin wdapshii kwingake' na' bi bdi'gake' nool, na' nogake' Jesucristona', Beena' Zaklebi to Xil'do', gattezə zeje'. Na' bisla Chioza' legake' ladj ben' yell-lioka' kwenche gakgake' lo nee na' lo na' Jesucristona'. Na' zaklebgakile' ka to dii nech dii chizi' chilap ben' cho'en Chioza'.

⁵ Na' biga bchej dill' wxiye' cho'eka', na' ni to bibi nda' nchengake' lao Chioza'.

Dill' daa be anjlka' shon

⁶ Na' ble'id' sto anjl chzoe' xan yabana', na' chyixji'e dill' wen dii kob che Chioza' daa bi te cheyin lao ben'ka' lle' yell-lioni, ben'ka' lle' yog' naciónka', yog' yell, ben'ka' za' yog' dia, na' ben'ka' chne' wde wdeli dill'.

⁷ Na' wnie' zillj inleeb, chi'e:

—Li illeeb Chioza' na' li kwee balaan, la' ba bllin lla gone' yel' joschis che to to ben'. Li we'la'o beena' ben yabana' len yell-liona', na' nisdona', na' gana' chal niska'.

⁸ Na' no sto anjl le', na' ne':

—Ba wlliyi' Babilóniana', yella' le wzeyi cheyi, yella' gana' wlle' ben'ka' zaklebi noola' chsolli ben' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' ben'ka' lle' yog' naciónka' kwenche gongake' dii malka' bengake'.

⁹ Na' jano sto anjl legake', ben' wyoni, na' wnie' zillj inleeb, wne':

—Nottezə ben' we'la'o bayixaa na' lwaa lsak'ba', na' wi'e latj sho' sen cheba' loxgue'na' wa neena',

¹⁰ yen ile'ile' do ka nak yel' chllaa che Chioza'. Na' sak'zi'e lo yi' gabila' daa nak ka yina' nchix azúfrena' chwiate ben'ka' nak anjl che Chioza' na' Jesucristona', Beena' Zaklebi to Xil'do'.

¹¹ Na' llen che yi'na' gana' sak'zi'gake' chasan zejli kani. Na' ben'ka' choe'la'o bayixaa na' lwaa lsak'ba' na' ben'ka' we'gake' latj sho'gake' sen cheba', bibi yel' wixi'lall' gat' chegake' ka tella ka wal.

¹² Na' daa gak ka', ben'ka' nak lall' na' Chioza' na' chzoagake' xtilleena', na' zoatezi zoagake' chonlilall'gake' Jesús'a, chiyal' so sakgakile' daa yen ile'gakile'.

¹³ Na' benid' wne to ben' yabana', na' wne' nad':

—Bzej dga: “Chakomba ben'ka' nak Xancho Jesucristona' txen, ben'ka' guet naa na' ben'ka' zi' guet ni che'.” Kan' nakan, —na Espíritu che Chioza'—, legaken' yizi'lall'gake' che yog' dii ben'ble'gakile', na' yog' dii wenka' bengake' bi gal'-lallii Chiozan'.

Chioza' yitope' ben' yell-liona' ka ben' chizi' chilap

¹⁴ Na' bwia' na' ble'id' to bej llyish, na' lo beja' chi' to ben' nake' ka benech. Na' nzoa to corona de or yichje'na' na' noxee to garbat dii nlatit.

¹⁵ Na' bchej sto anjl loo yoodo' che Chioza', na' chosyee zillj inleeb chi'e beena' chi' lo beja':

—Bchin garbata' daa noxoo na' bizi' bilap, la' ba gol' yizi' yilapo' daa de yell-liona'.

¹⁶ Na' beena' chi' lo beja' bizi' bilape' daa de lo yell-lioni.

¹⁷ Na'ch bchej sto anjl loo yoodo' che Chioza' zoa yabana', lezkza' noxee sto garbat dii nlatit.

¹⁸ Na' bchej sto anjl gana' zoa daa nak ka mes de or gana' chzeygake' yala', na' nak lo nee yi'na'. Na' wnie' zillj beena' nox' garbata' daa nlatit, chi'ene':

—Bichogui garbata' noxoo uvana' de yell-liona', la' ba wegakan.

¹⁹ Na' anjla' bichoguile' garbata' uvaka' de lo yell-liona' na' bizi' bilape'n, na' bleen gana' chsigake'n. Na' zejin Chioza' bitope' ben' yell-lioka' bi nakgake'ne' txen, na' wlo'e legake' gana' sak'zi'gake', gana' yen ile'gakile' yel' chllaa che'na'.

²⁰ Na' ben'ka' zaklebi uvaka', wzak'zi'gake' cho'a yella'. Na' gana' blee legake' wlalj dii zil inleeb xchene'ka' na' wyasan ka to ze cho'a kabaya' na' blliljan shon guiyoa kilómetro.

15

Anjlka' gall

¹ Na' ble'id' yabana' sto dii wal, dii chonan ka yibanicho. Ble'id' gall anjl, ben'ka' nak lall' na'gake' wisgake' zi gall yel' zak'zi'ka' gat' lo yell-lioni kwenche yiyoll yido yel' chllaa che Chioza'.

² Na' lezkza' ble'id' daa nak ka niso' de vidr nchixan yi'. Na' ble'id' ben'ka' bizo bizaki bi be'la'ogake' bayixaa na' lwaa lsak'ba' na' bi be'gake' latj sho'gake' sen cheba', zegake' cho'a niso' de vidra' na' nox'gake' twej arpa daa be' Chioza' legake'.

³ Na' cholgake' to dii bel dii Moiséza', beena' ben ka cheeni Chioza', na' daa bel Jesucristona', Beena' Zaklebi to Xil'do', nagake':

Le nak diika' chono' na' chongakan ka chibaninto',
Chios, ben' nak Xannto', ben' yel' wak choo yel' wak xen.

Yog' diika' chono', chono'n ka chiyal',
li' nako' ben' wñabia' che yog' ben' yell-lio.

⁴ Biga zoa ben' bi gall illebe' li', Xan'.

Biga zoa ben' bi kwe' li' balaan.

La' tozo' lin' nako' dowalj ben' li' ben' shao'.

Na' ben'ka' lle' doxen yell-lioni yidgake' we'la'ogake' li',
daa ble'gakile' diika' chono' nakan shlich.

⁵ Na' ka biyoll dga, bizle'id' byalj yoodo' che Chioza' yabana', latj gana' yooshao' ley che Chioza' daa bzeje' lee yaj taaka'.

⁶ Na' loo yoodo'na' bchej gall anjl, ben'ka' nak lall' na'gake' wisgake' gall yel' zak'zi'ka' gat' lo yell-liona'. Nakwgake' twej lech' xtil dii chey cheeni' na' ngoo li'eka' twej bad' de or bllinten ka de cho'alcho'eka'te.

⁷ Na' to ben'ka' tap, ben'ka' zoa xilinna', bi'e to to anjlka' twej kop de or nakgakan tolla' yel' zak'zi' che Chioza', beena' zoa zejli kan.

⁸ Na' loo yoodo'na' gokan tolla' llenna' ni cheyi balaan xen che Chioza' na' yel' wak choo yel' wak xen che'na'. Na' kono gok yiyoo loo yoodo'na' axt ki biyoll bido gallte yel' zak'zi'ka' daa nak lo na' anjlka' gall.

16

Yel' zak'zi'ka' gall daa yoll loo kopka'

¹ Na' benid' wne to ben' zillj inleeb loo yoodo'na', chi'e anjlka' gall:

—Li shaj na' li lljalatj lo yell-liona' yel' zak'zi' che Chioza' diika' yoll loo kopka' gall.

² Na' wyaj anjl necha', jalatje' yel' zak'zi' daa yoll loo kop che'na' lo yell-liona' na' yog'lol ben'ka' yoo sen che bayixaa na' be'la'ogake' lwaa lsak'ba' byalgake' we' dii wyoll guull' na' wyey wlagake'.

³ Na' anjl, ben' wchopina', jalatje' yel' zak'zi' daa yoll loo kop che'na' lo nido'na', na' nido'na' biyakan ka xchen ben' witi yesya, na' wit yog'lol dii de yel' mban cheyin loo nido'na'.

⁴ Na' anjl, ben' wyonina', jalatje' yel' zak'zi' daa yoll loo kop che'na' loo yaoka' na' yog' ga chal nis, na' biyagakan chen.

⁵ Na' benid' wne anjla' blalj yel' zak'zi'na' lo nisa', wne':

—Chios, lin' nako' dowalj ben' li ben' shao'. Lin' zo' naa, na' li'kzan zo' ka wxe wzil yell-lioni. Lin' chono' daa nak shlichā daa ba bchoglo' che ben'ki kon ka chiya' gak.

⁶ La' legake' blaljgake' xchen ben'ka' nak lall' no' na' ben'ka' wdixjee daa gollo' legake', na' ba be'gako'ne' chenna' yeejgake', ka chidol'kzə gak chegake'n.

⁷ Na' lekzka' benid' wna beena' ze kwit daa nak ka gana' chzeygake' diika' chjwa'gake' lao Chioza', ne':

—Kan' nakan Chios, ben' nak Xannto', ben' yel' wak choo yel' wak xen, li' ba beno' yel' joschis kon ka chiya' gakan.

⁸ Na' anjl, ben' wdapina', jalatje' yel' zak'zi' daa yoll loo kop che'na' lo wbilldo'na', na' bzeyan ben' yell-liona'.

⁹ Na' yog'logake' wyeygake' nall inleeb. Per bi biyaj bilengakile' lao Chioza', ni bi be'la'ogake'ne', san wnelgake' zban che' daa bi'e latj chak yel' zak'zi'ka'.

¹⁰ Na' anjl, ben' gayi'na', jalatje' yel' zak'zi' daa yoll loo kop che'na' gana' llia bayixaa chnabia'b, bana' bchej loo nido'na', na' gok shgasj shchol doxen gana' chnabia'b. Na' ben' yell-lioka' non leeb txen wdaoyaa lolleeka' daa le wyey wlagake'.

¹¹ Na' wnelgake' zban che Chioza', beena' zoa yabana', daa chey chlagake' ni che we'ka' lliagake', na' bi biyaj bilengakile' dii mala' chongake'.

¹² Na' anjl, ben' wxopina', jalatje' yel' zak'zi' daa yoll loo kop che'na' loo yao xenna' le Éufrates, na' biyeej yao xenna' kwenche gok wde ben' wnabia'ka' za' gana' chla'lə wbillā'.

¹³ Na' ble'id' shon dii xiw' dii nak ka bloll. Ton bchej loo cho'a bayix' xnana', na' ston bchej lo cho'a bayixaa bana' be'la'o ben' yell-liona', na' ston bchej loo cho'a bana' chziye' ben', cho'eb dill' daa che' bayixaa sto leeb.

¹⁴ Na' dii xiw'ki chongakan yel' wak. Na' bchejgakan jatopgakan ben' wnabia'ka' lle' doxen yell-lioni kwenche yiyakgake' toz til-lengake' Chioza', beena' zeelo nap yel' wak choo yel' wak xen, kat' illin lla choo lla xen che'na'.

¹⁵ “Li se wneyi, nad' zizaa tokonganzi, ka chon to ben' wban aga no chsi'nile' kat' chjlane'. Chakomba beena' ze wneyi na' nakw xe'na' kwenche bi te gal'yid gal'bel'ze' na' si'e yel' zto'.”

¹⁶ Na' dii xiw'ka' btopgakan ben' wnabia'ka' latja' le Armagedón de dill' hebreo.

¹⁷ Na' anjl, ben' gállina', blatje' yel' zak'zi' daa yoll loo kop che'na' lo llazə. Na' loo yoodo'na' zoa yabana', gana' llia Chioza' chnabi'e, wnie' zillj, wne':

—Ba gok daa chiya' gak.

¹⁸ Na'ch wyep yes, na' gok sshag, na' goshj wtin, na' bnib yell-liona' ni che to bedxo' xen inleeb dii nakch zibia' ka yog' bedxo'ka' ba gok shlak wzoa ben' lo yell-lioni.

¹⁹ Na' yell daa le zeyi cheyin gokan shon laalə, na' yellka' lle' yell-lioni wlliaiyi'gakan. Na' ngoo yichj Chioza' wsak'zi'e Babilóniana', yella' le zeyi cheyin, kwenche ben'ka' lle' na' yen ile'gakile' yel' zak'zi' xen che'na' daa le bshaagake' le'.

²⁰ Na' yog' yell-liodo'ka' llia lo nido'na' na' no yaaka' binitlogakan.

²¹ Na' xan yabana' bxop yaj yaba dii yel' inleeb na' ziigakan wdeli choa kil. Na' ben' yell-lioka' wnelgake' zban che Chioza' ni che yaj yabana' daa gokan to yel' zak'zi' xen inleeb.

17

Nool wdana' beena' lia koll' bayix' xnana'

¹ To anjla', beena' len beŋ'ka' gall, beŋ'ka' nox'gake' kopka', bide' gana' zia' na' wne' nad':

—Da, wliid' li' yeŋ' zak'zi'na' ile'i noolə wdana', beena' zaklebi yella' le zeyi cheyin daa lia gana' chde yao zan.

² Beŋ' wŋabia'ka' lle' yell-liona' ba benlengake'ne' txen lo yeŋ' wdana', na' beŋ'ka' lle' yell-liona' ba lenzgake' nak ka beŋ' chzoll chniti daa chongake' dii malka' chone'.

³ Na' anjla' bchi'e nad' latja' gana' bibi chashj chleb na' Espiritu che Chioza' bene' ka ble'do'id' to noolə llie' koll' to bayix' xna, na' doxem da' dill' daa chne zban che Chioza', na' lia gall yichjb na' zi shi lozb.

⁴ Na' noola' nakwe' to lech' de morad na' dii xnali, na' le nonilen' nchine' or, yaj wan na' perla. Na' noxee to kop de or daa nak tolla' dii zbanka' na' yeŋ' wdana' chone'.

⁵ Na' loxgue'na' da' to lie' daa kono wyajni bin zejin, na' nan: “Babilóniana', yella' le zeyi cheyin, xaxna' yeŋ' wdana' na' yog'lol dii zban daa chak doxen lo yell-lioni.”

⁶ Na' gokbe'id' wzolli noola' daa weeje' xchen beŋ'ka' bete', beŋ'ka' benlilall' Chioza' na' beŋ'ka' be' cho'a xtill' Jesúza'.

⁷ Na' anjla' wne' nad':

—¿Biŋe chibanzilo'? Na' inia' li' bi zeji daa ble'ilo' noola' na' bayixaa, bana' llie', bana' lia gall yichjin na' zi shi lozb.

⁸ Bayix' xnana' ble'ilo', leban wzoa kani'yi, na' bich zoab naa. Na' wiyedb sto shii ichejb loo yecha' daa bi chiyoll chido nak zitj kwenche kwiayi'b toshiizi. Na' beŋ'ka' lle' lo yell-lioni, beŋ'ka' bi da' lie'ka' lee libra' gana' da' le beŋ'ka' de yeŋ' mban chegake' zejli kani kana' zi xe silte yell-lioni, yibangakile' ile'gakile' bayixaa, bana' wzoa kana', na' bich zoab naa, per wibam sto shii.

⁹ Nin chyaljicho yeŋ' sin'na' na' yeŋ' chajniina'. Yichjbka' gall, zaklebin gall yaaka' gana' lia noola',

¹⁰ na' lekzka' nakgakan gall beŋ'ka' chnabia'. Gay'gake' bich chnabia'gake', toe' chnabi'e naa, na' beena' sto zi' solo inabi'e. Na' kat' solo inabi'e, xtitzan inabi'e.

¹¹ Na' bayixaa, bana' wzoa kani'yi na' bich zoab naa, leban' beŋ' wŋabia' de wxoni'na'. Na' lene' beŋ'ka' gall, na' ba nakten kwiayi'tekze'.

¹² Na' lozbka' shi, diika' ba ble'ilo', zaklebigakan shi beŋ'ka' zi' solo inabia', per shlollzan inabia'lengake' bayixaa.

¹³ Na' beŋ' wŋabia'ki shi gagkake' toz, na' we'gake' bayixaa yeŋ' wŋabia' che'ka'.

¹⁴ Na' til-lengake' Jesucristona', Beena' Zaklebi to Xil'do', na' Jesucristona' gone' legake' gan, la' len' Beena' zeelo nak Xan yog'lol beŋ', na' Beena' liizelozzi chnabia' lao yog'lol beŋ'. Na' beŋ'ka' zejlen le' txen nakgake' beŋ' wlej Chioza' na' zoachehgake' nonlilall'gake'ne' do yichj do lallgake'.

¹⁵ Na' lekzka' wna anjla' nad':

—Yaoka' ble'ilo' gana' lia noolə wdana', zejin beŋ' zan inleeb, beŋ' za' yog' yell na' yog' nación, na' beŋ' chne wde wdeli dill'.

¹⁶ Na' bayixaa na' beŋ' wŋabia'ka' zaklebi lozba' shi gakzbangakile' nool wdana'. Na' gagkake' txen choonlall'gake'ne' gal'yid gal'belee na' gaogake' xpeleena', na' leyi wzeygake'ne' lo yi'na'.

¹⁷ Chioza' ba bzoe' loo yichjlall'do'eka' daa cheenile' gongake', na' gagkake' toz we'gake' yeŋ' wŋabia' che'ka' bayixaa na' yiyoll yido gak daa wna Chioza' gak.

¹⁸ Na' noola' ba ble'ilo', len' zaklebi yell daa le zeyi cheyin, yella' chnabia' lao yog'lol beŋ' chnabia' yell-lioni.

18

Kwiayi' yell Babilóniana'

¹ Ka biyoll ble'id' dga, na'ch ble'id' sto anjl chetje' yabana', na' nsa'chgue' yeł' wñabia' xen inleeb, na' beeni' che'na' bzeeni'n doxen yell-lioni.

² Na' besyaadie' ne':

—¡Ba wlliyi' Babilóniana', yella' le wzeyi cheyi! ¡Ba wlliyi'n! Ba biyakan lill xlatjə dii xiw'ka'. Ba biyakan ga lle' lla' chiya dii xiw' na' ga lle' lla' yog'lol ba chda xan yabana' ba nak zban, ba chpani beñ'.

³ La' yella' wlle' beñ'ka' zaklebi noola' chsolli beñ' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' beñ'ka' lle' yog' naciónka' len beñ'ka' chñabia' legake' kwenche gongake' dii malka' bengake'. Na' beñ'ka' chit' chde lo yell-lioni biyakgake' beñ' wni'a ni che yella' daa chit' chdegake' diika' zeelo chibayi beñ'ka' lle' na'.

⁴ Na' benid' wñe sto beñ' yabana', ne':

—Li yichej yell Babilóniana', ka le' nakle lall' na', kwenche bi gonle txen saaxyaka' chongake', na' bi ile'ile' yeł' zak'zi'ka' ile'i beñ'ka' lle' na'.

⁵ La' saaxyaka' chak yella' nakan dii zan inleeb, na' ngoo yichj Chioza' dii malka' chongake'.

⁶ Ka ba bsak'zi'gake' beñ', ka'kzan sak'zi'gake'. Yeł' zak'zi' xench yen ile'gakile' aga ka daa ba bengakile' beñ', ax̄t choplə ka daa bchi' bsak'gake' beñ' yen ile'gakile'.

⁷ Ka to ba be'la'o kwingake' na' ka to ba biba bizakgakile' bengake' daa nazan chegake', ka'kzan illaglogaken' na' kwellyesh'gake' lao yeł' zak'zi' che'ka'. La' loo yichjlall'do'eka' nan: “Ni zoanto' ka beñ' wñabia'. Bi naknto' ka beñ' ba bzeb na' biga kwellyesh'nto'.”

⁸ Na' daa nagake'ka', shllazə yen ile'gakile' yeł' zak'zi'ki: balgake' guet, na' beñ'ka' yigaan kwellyesh'gake' na' ibil idongake', na' sheygake' lo yi'na', la' beñ' yeł' wak choo yeł' wak xen nak Xancho Chioza', beena' ba bchogloe' chegake'.

⁹ Na' beñ' wñabia'ka' lle' yell-lioni beñ'ka' ben legake' txen bengake' yeł' wdana' na' biba bizakgakile' lawi daa na' beli chen che'ka', kwellyesh'gake' ni che yell Babilóniana' kat' ile'gakile' chasan llenna' daa cheyan.

¹⁰ Na' segake' zit'lə daa chllebgake' yeł' zak'zi'na' chllaglo beñ'ka' lle' na', na' inagake':

—¡Nyesh'laz inleeb chak cho', yell Babilonia, li' le zeyi cho' chñabi'o! La' tolbe' ba bla' yeł' zak'zi' cho'ni.

¹¹ Na' beñ'ka' chit' chde lo yell-lioni lekzka' kwellgake' na' gakyesh'gakile' ni cheyin, la' kochno zoa no si' diika' chit' chdegake',

¹² diika' nak de or, de plat, yaj wan, perla, lech' shao' de lino na' de sed, lech' morad na' dii xnalil, na' biya yagla' dii chla' zix, no diika' chongakile' loshj lefantka' na' de yagla' diika' nak mbalaz inleeb, na'ch de ya, na' de yajes.

¹³ Na' lekzka' chit' chdegake' canel, clab pimient, yal, set zix, nill' che yag dii chla' zix, vino, set, yezj widi, trigo, bayix' ba choa' yoa', xil', kabay na' karret daa chgoyogakb, ga biyollin ax̄t chit' chdetegake' beñ' gon xshin beñ'.

¹⁴ Na' ye'gake' beñ'ka' lle' yella':

—Bichbi yeł' shao' cheleka' de, diika' bibaile. Ba binit yeł' wni'a cheleka' na' bichga ile'ile' dii wen dii shao'ka'.

¹⁵ Na' beñ'ka' bet' bde chiya diika' bsa'gake' na' bni'agake' daa bet' bdegake'n yella', zit'lə segake' daa chllebgake' yeł' zak'zi'na' chllaglo beñ'ka' lle' na', na' kwellyesh'gake'.

¹⁶ Na' inagake':

—¡Nyesh'laz inleeb chak che yella' le wzeyi cheyi, gana' gokwgake' lech' shao'ka' nak de lino, na' lech' morad na' dii xnalil, daa da' or, perla na'ch yaj wan!

¹⁷ ¡La' tolbe' binit yeł' wni'a cheyinna'!

Na' yog' beṅ'ka' chsa' barkwka', na' yog' beṅ'ka' choogake'n, na' beṅ'ka' chon llin loo barkwka', na' yog' beṅ'ka' chon llin lo nisdona' kwenche cheej chaogake', segake' zit'lə wwiagake'n.

¹⁸ Na' ka ile'gakile' chey yella' na' gosyaagake', inagake':

—;Bichga zoa sto yell dii zaklebin yelli dga le zeyi cheyin!

¹⁹ Na' yillee bishte yona' yichje'ka', leyi kwellyesh'gake', na' gosyaagake' inagake':

—;Nyesh'laz inleeb chak che yelli dga le zeyi cheyin! Yog' beṅ'ka' wdalen barkwka' lo nisdona' bni'alengake' yel' shao' cheyinna'. ;Na' tolbe' ba wlliyai'n!

²⁰ Ka le' lle'le yabana', le' nakle lall' na' Chioza', na' ka le' bselee we'le xtilleena', na' ka le' nakle beṅ' wdixjee daa wna Chioza' le', li yiba yizaki, la' Chioza' ba bizi'e wzonna' daa bchi' bsak'gake' le'.

²¹ Na'ch to anjl, beṅ' wal, blise' to yaj xen inleeb na' bzaleen loo nisdona', na' chi'e:

—Kan' gak che yell Babilóniana' daa le zeyi cheyin, na' bichga llia ile'i beṅ' len.

²² Bichga yeni beṅ' chsillgake' árpana', ni beṅ' chkwel no bllej no trompet lawinna'. Ni bichga soa beṅ' wlan wde wdeli llin, ni bich gak sshag che yaj molinna'.

²³ Bich bi beeni' che yi' kandil gat' lawinna', ni bich bi lni che wishagna' gat' lawinna'. La' beṅ'ka' bet' bde bi de cheyin lawinna' gogake' beṅ' choo beṅ' xen yell-lioni, na' beṅ' Babilóniaka' wxiye'lengake' yel' willa' che'ka' yog' beṅ' lle' yell-lioni.

²⁴ Na' lawinna' betgake' beṅ'ka' wdixjee daa goll Chioza' legake' len beṅ'ka' nak lall' nee, na' ndobgakile' yel' wit che yog' beṅ' ba betgake' doxen lo yell-lioni.

19

¹ Ka biyoll ble'id' diiki, benid' chosyaa beṅ' zan yabana', nagake':

;We'la'ocho Chioza'!

Xancho Chioza', beena' chisla beṅ'ka' nonlilall'gake'ne',

chidolee sho'e balaan na' inabi'e toshiizi,

² la' len' chone' yel' joschis kon ka chiyal' gakan.

Ba bliayee yella' daa le wzeyi cheyi.

Yelli zaklebin nool wdana' daa wlooyel'gake' beṅ' yell-liona' bengake' legake' txen bxinj blengake'.

Ba bizi'e wzon che beṅ'ka' nak lall' nee, beṅ'ka' betgake'.

³ Na'ch wiznagake' sto shii:

—;We'la'ocho Chioza'! Ba wlliyai' wlliaide yella' toshiizi.

⁴ Na' beṅ'ka' tapichoa len beṅ'ka' zi tap, beṅ'ka' zoa xilin, bchek' xibe'ka' na' yichje'ka' bllinan axt lo yona' be'la'ogake' Chioza', beena' llia gana' chnabi'e. Na' nagake':

—Kan' nakan. We'la'ocho Chioza'.

⁵ Na' gana' llie' chnabi'e benid' wne to beṅ', na' ne':

Li we'la'o Chios chechona',

yog'lol-le le' nakle lall' nee na' chall chlleblene',

ka beṅ' zakii ka beṅ' bi zakii.

Yel' wishagna' che Beena' Zaklebi to Xil'do'

⁶ Na' benid' shii beṅ' zan inleeb, na' nenan ka nen to yao xen daa chxop cho'a bnanja' na' ka ga chne to wziw' xen inleeb, nagake':

;We'la'ocho Chioza'!

Xancho Chios, beṅ' yel' wak choo yel' wak xenna', ba wzoloe' chnabi'e.

⁷ Yiba yizakicho dii xen wal na' koochone' balaan.

La' ba bllin lla wshagna' Beena' Zaklebi to Xil'do'.

Na' beṅ'ka' nonlilall' le' ba ze kwasgake' chbezgake'ne' ka chon noola' llana' wshagnee.

⁸ Na' ba bi'e twej xagake' de lech' shao' dii nxi nyech na' chep cheeni'n.

Na' lech' shawaa zaklebin dii wenka' bengake'.

⁹ Na' wna anjla' nad':

—Bzej dga: “Chakomba beṅ'ka' gox wṅab Jesucristona' soagake' kat' gak yel' wishagna'na'.”

Na' wne':

—Diikin dill' li che Chioza'.

¹⁰ Na' b'chek' xibaa lao anjla' kwenche nan we'lawaane', na' wne' nad':

—iBi gono' ka! La' lekzka' wen llin che Chioza' nad', ka nako' li' na' ka bish' ljwello'ka', beṅ'ka' zoachechake' chajle'gake' che Jesúza'. iBe'la'o Chioza'!

La' beṅ'ka' choe' dill' li che Jesúza', zoa Espíritu che Chioza' chzajniile' legake' kwenche we'gake' xtilleena'.

Beena' llia koll' kabay llyisha'

¹¹ Na' ble'id' nyaljə yabana' na' bli'lao to kabay llyish. Na' beena' llie'b lie' Ben' Chon Kon Ka Ne' na' Cho'e Dill' Li. Na' chchogloe' che beṅ' kon ka chidol' gone' chegake', na' chdil-lene' beṅ'ka' chidol' til-lene'.

¹² Jalawe'na' chzeeni'gakan ka bel' yi', na' nllin yichje'na' dii zan corona. Na' da'n to lie' daa toze' le' nombi'e.

¹³ Na' nakwe' to xe' dii nak ka dii wleej chen, na' lie' Cho'a Xtill' Chios.

¹⁴ Na' nchi'e wen wdil' che'ka', beṅ'ka' lle' yabana', na' nakwgake' lech' shao' daa nxi nyech, na' kabayka' lliagake' nakgakb ba llyish.

¹⁵ Na' chchej cho'ena' to spad dii nlatit kwenche wlliyi'lene'n beṅ'ka' lle' yell-lioni. Na' inabi'e legake', na' bi si'xene' che nottez beṅ' bi chzenag che'. Na' lo yel' chllaa che Chios, beṅ' yel' wak choo yel' wak xenna', wsak'zi'e legake' gonile' legake' ka chon to beṅ' chlej chshoshj uvana' kwenche chzin.

¹⁶ Lee lechaa nakwe' ka do lee xichje'na' da'n lie'na', nan: “Beṅ' zeelo nak Xan yog'lol beṅ', na' Ben' liizelozi chṅabia' lao yog'lol beṅ'.”

¹⁷ Na' ble'id' to anjl zie' lo wbilldo'na', na' chosyee, chi'e yog' baka' ze xan yabana':

—Li yidop yillag kwenche yeej gaole to xshe' xen daa ba ben Chioza' chele.

¹⁸ Na' gaole xpel' beṅ' wṅabia'ka', na' che beṅ'ka' ngoo lall' na' wen wdil'ka', na' che beṅ' walka', na' gaole xpel' kabayka' na' che beṅ'ka' chbiab. Na' gaole xpel' yog'lol beṅ', ka beṅ' ndoo lla yel chone' xshin beṅ' ka beṅ' chon llin chekze', ka beṅ' zakii ka beṅ' bi zakii.

¹⁹ Na' ble'id' bayixaa, bana' bchej loo niso'na' len beṅ' wṅabia'ka' chṅabia' lo yell-lioni na' wen wdil' che'ka' bidop billaggake' kwenche til-lengake' beena' llia kabaya' na' wen wdil' che'ka'.

²⁰ Na' beṅ'gake' bayixaa bchej loo niso'na' len bana' chyixjee xtill'ba', bana' ben chiya yel' wak gana' llia bayixaa. Na' daa bem ka' wxiye'b beṅ'ka' be' latj sho'gake' sen che bayixaa na' be'la'ogake' lwaa lsak'ba'. Na' shi'a shbangakb bzalee chopteb lo yi'na' chal'niṅ daa nchix azúfrena'.

²¹ Na' beṅ'ka' len legakb, beti beena' llia kabaya' legake' spad daa chchej cho'ena', na' yog'lol baka' ze xan yabana' belj blla'gakib xpeleeka'.

20

Wseje' dii xiwaa' to mil yiz

¹ Na' ble'id' to anjl chetje' yabana', na' noxee xiinya che yecha' daa bi chiyoll chido nak zitj na' noxee sto gden xen.

² Na' anjla' bcheje' bayix' xṅana', bana' nak bel' kani'teyi, leban dii xiwaa na' Satanáza', na' bcheje'n to mil yiz.

³ Na' bzaleen loo yecha' daa bi chiyoll chido nak zitj, na' bsejtipe'n kwenche shejan to mil yiz na' bich siye'n beṅ' yell-lioka'. Ka yiyoll gak to mil yiz na' yiselle'n xtit.

⁴ Na'ch ble'id' gana' llia ben'ka' gok lo na'gake' gongake' yel' joschisa'. Na' lekzka' ble'id' ben'ka' bchoggake' yene'ka' ni cheyi daa be'gake' xtill' Jesúza' na' cho'a xtill' Chioza'. Legaken' bi be'la'ogake' bayixaa bchej loo nisdona' ni bi be'gake' latj ta' sen cheba' loxgue'ka' wa neeka'. Na' bibangake' sto shii na' wñabia'lengake' Crístona' to mil yiz.

⁵ Legaken' ben' nechka' yiban ladj ben' wetka'. Na' ben' wetka' sto, ka biyollch bza' de to mil yiza' bibangake'.

⁶ Chakomba ben'ka' yiban nech ladj ben' wetka', la' ben'kan' nak lall' na' Chioza'. Na' bi ile'gakile' yel' wit wchopina', san gagkake' bxoz che Chioza' na' che Crístona' na' inabia'lengake'ne' to mil yiz.

⁷ Kat' yiyoll iza' de to mil yiza', yiselle' Satanáza' gana' ncheje'n.

⁸ Na' tan siye'n ben'ka' lle' tap laate yell-lioni, ben'ka' zaklebgake' ben'ka' lle' yellka' le Gog na' Magog, na' wtopan legake' kwenche shajlengake'n lo wdila', na' gagkake' ben' be ben' zil ka yoxa' chi' cho'a nisdona'.

⁹ Na' bllesh bcheengake' doxen lo yell-lioni na' wyeçhjgake' yella' daa le chaki Chioza', gana' lle' ben'ka' nak lall' nee, nan wlliyi'gake' legake'. Per Chioza' bletje' yi'na' xan yabana' bisya bislenan legake'.

¹⁰ Na' bzalee dii xiwaa, daa wxiye'n legake', lo yi' gabila' daa nchix' azúfrena', gana' bzalee bayixaa bchej loo nisa' na' bana' wdixjeeb xtill'ba'. Nan' illaglogakan yel' zak'zi'na' ka tella ka wal zejli kañi.

Chioza' gone' yel' joschis che ben' wetka'

¹¹ Na' ble'id' gana' llia Chioza' chñabi'e, nakan to dii llyish na' to dii xen. Na' lawe'na' binitlo yell-lioni len yabana', na' koch no ble'i legakan.

¹² Na' ble'id' ben' wetka', ka ben' zakii na' ka ben' bi zakii, zegake' lao Chioza' gana' llie' chñabi'e. Na' bsalje' librka', na'tech bsalje' sto libr yoblə gana' da' le ben'ka' de yel' mban cheyin zejli kañi. Na' bene' yel' joschis che ben' wetka' kon ka choe' librka' dill' ben to toe'.

¹³ Na' biban yog' ben'ka' wit loo nisdona', na' ben' wetka' lle' latj che yel' wita' gana' le Hades, * na' yog'lolgake' gok yel' joschis che'ka' kon ka ben to toe'.

¹⁴ Na'ch lekzka' bzal' Chioza' yel' wita' na' latja' le Hades lo yi' gabila'. Na' lo yi' gabilan' nakan yel' wit wchopina'.

¹⁵ Na' bzalee lo yi' gabila' ben'ka' bi da' lie'ka' lee libra' gana' da' le ben'ka' de yel' mban cheyin zejli kañi.

21

To yaba kob na' sto yell-lio kob

¹ Na'ch ble'id' to yaba kob na' sto yell-lio kob, la' yaba necha' na' yell-lio necha' binitlogakan na' lekzka' nisdona'.

² Na' ble'id' yell che Chioza', yell koba' le Jerusalén chetjan yabana' gana' llia Chioza'. Ba none'n xochi ka to noolə ben' ba nakwe' xe'na' kwenche wshagna'lene' ben' che'na'.

³ Na' gana' llia beena' chñabia', benid' wne to ben' zillj inlleb, ne':

—Chioza' ba zoe' ladj ben' yell-lioka' naa. Na' soalene' legake', na' gagkake' yell che', na' kwin Chioza' soalene' legake' na' we'la'ogake'ne'.

⁴ Na' gone' ka bich gat' daa gonyeshiin legake'. Bich bi yel' wit gat', ni kochno kwell, ni koch no gakyeshii, ni koch no shey la, la' ba wde che yog' diika' got' lo yell-lio necha'.

⁵ Na' beena' llia gana' chñabi'e wne' nad':

—Nadaan chikob' yog'lolte.

Na' lekzka' wne' nad':

—Bzej dill'ki, la' nakgakan dii li na' nakgakan dii gak wxenilall' ben'.

⁶ Na' lekzka' wne' nad':

* 20:13

—Ba gok daa chiyal' gak. Nadaan zaklebid' letr necha' le A* daa ba zoakz' ka wxe wzil yell-lioni, na' daa zoakz' kat' te cheyin zaklebid' letra' chiyollin daa le Z.† Nad'kzan bxe bsil' yog'lol dii de, na' nad'kzan gon' ka te chegakin. Na' beena' chbili, wi'ane' nis daa nsa' yel' mbanna' na' bibi sakile'n.

⁷ Beena' so saki soacheche' gonlilallee nad', gaki che' dii wen dii shao' daa ba wnia' gaki che', na' nad' gak Chios che' na' le' gake' bi' cha'.

⁸ San ka nakben'ka' blleb gon nad' txen, na' ben'ka' bi wyajle' cha', na' ben'ka' chongake' daa chakzbanid', na' ben' wen xyaka', ben'ka' chnelen ljwellin, ben'ka' nlan yel' willa'na', ben'ka' choe'la'o yaj yagka', na' yog'lol ben' wxiye'ka', legaken' chidol'gake' shajgake' lo yi' gabila' daa nchix azufrena', na' lennan' yel' wit wchopina'.

Yell Jerusalénna' daa nak dii kob

⁹ Na' gana' zia' bid to anjl beena' len anjlka' gall, ben'ka' nox' gall kopka' nakgakan tolla' yel' zak'zi'ka' zeelo, na' wne' nad':

—Da, wliid' li' xool Beena' Zaklebi to Xil'do'.

¹⁰ Na' Espiritu che Chioza' bene' kwenche wyaalen' anjla' to lo yaa xen na' dii sibə, na' bliile' nad' yell Jerusalénna' daa nak yell che Chioza', chetjan yabalə gana' zoe'.

¹¹ Na' yella' chey cheeni'n daa yoon yel' chey cheeni' che Chioza', na' chna'titan ka to yaj wan daa zakii daa le jaspe, daa chep yes ka vidr.

¹² To zee xen dii sibə nechjan yella' na' zoan shllin puert xen, na' to to cho'a puertka' ze twej anjl. Na' lekzka' to to lee puertka' lia le tkwen dia che dii Israela'.

¹³ Na' tap laate zeena' nechj yella' zoan shon wej puertka'.

¹⁴ Loo len zee xenna' nechj yella' yoon shllin yaj, na' da'gakan le shllinte postl che Jesucristona', Beena' Zaklebi to Xil'do'.

¹⁵ Na' anjl, beena' bshaljlene' nad', noxee to dii nak ka xis de or kwenche wchixile'n yella' len puertka' na'ch zee daa nechjan.

¹⁶ Na' yella' toz ka nakan de tonlə na'ch de zlag'lə. Na' bchix anjla' yella' na' nakan chopo mil chop guiyoa kilómetro, na' toz ka nakan ka de tonlə, ka de siblə, na'ch ka de zlag'lə.

¹⁷ Na'ch bchixe' zeena' na' chillan to guiyoa tapiyon llit.‡ Kon ka chchixə nottezə ben', ka'kzə bchix anjlan'.

¹⁸ Na' zeena' daa nechj yella' nakan de yaj wan daa le jaspe, na' yella' nakan de or dowalj daa chep yes ka vidr.

¹⁹ Na' yajka' yoo loo len zeena' nakan xochi, nakan de biya yaj wan. Dii necha' nakan yaj wan daa le jaspe, de wchopina' nakan yaj wan daa le zafiro, de wyonina' nakan yaj wan daa le ágata, de wdapina' nakan yaj wan daa le esmeralda,

²⁰ de gayi'na' nakan yaj wan daa le ónice, de wxopina' nakan yaj wan daa le cornalina, de gállina' nakan yaj wan daa le crisólito, de wxoni'na' nakan yaj wan daa le berilo, de gayina' nakan yaj wan daa le topacio, de shiyina' nakan yaj wan daa le crisoprasa, de shnejina' nakan yaj wan daa le jacinto, na'ch de shllinina' nakan yaj wan daa le amatista.

²¹ Na' puertka' shllin nakgakan shllin perla, to to puertka' nakan de toz perla. Na' nez daa chde yella' nakan de or dowalj daa chep yes ka vidr.

²² Na' ni to yoodo' bi ble'id' yella', la' kwinq Xancho Chioza', beena' nak liizelozi ben' yel' wak choo yel' wak xen, len Jesucristona', Beena' Zaklebi to Xil'do', zoagake' ladj ben'ka' lle'na'.

²³ Na' yella' bi byalljin wbilla' ni beo'do'na' kwenche wzeeni'gakan lawinna', la' yel' chey cheeni' che Chioza' na' che Jesucristona', Beena' Zaklebi to Xil'do', chzeeni'n lawinna'.

* **21:6** Letr necha' le A: de dill' griegona' letri len alfa. † **21:6** Letra' chiyollin daa le Z: de dill' griegona' letri len omega. ‡ **21:17** To guiyoa tapiyon llit: nakan ka do guiyon gay' metr.

²⁴ Na' ben'ka' za' doxen lo yell-liona' soagake' lao beeni' che Chioza' de yella'. Na' ben'ka' chñabia' yell-lioni wsa'gake' yel' zakii che'ka' na' balaan che'ka' yella'.

²⁵ Na' puertka' zoa yella' toshiizi iyalljgakan, la' bichbi wal gat' na'.

²⁶ Na' yisa'gake' yella' do ka nak balaan na' yel' zakii che naciónka'.

²⁷ Na' biga sho' ni to dii nda' nchen dii mal, ni nottez ben' chon dii chakzbani Chioza', ni ben' chziye', san toz ben'ka' da' lie'ka' lee libr che Beena' Zaklebi to Xil'do', gana' da' le ben'ka' de yel' mban cheyin zejli kañi.

22

Yao daa nsa'yel' mbanna'

¹ Na' bli'yi anjla' nad' to yao dii nxi nyech yollan nis daa nsa' yel' mbanna', na' nakan nis xtil inleeb ka'kza' vidr. Na' chchejan gana' llia Chioza' chñabi'e len Jesucristona', Beena' Zaklebi to Xil'do',

² na' chden gchoł neza' daa chde yella'. Na' chop laate cho'a yawa' zoa yagka' nsa' yel' mbanna', na' ze tbeo' wej chbiagakan dii zixka', na' shllin shii chbiagakan twiz. Na' xlaguiinka' nakgakan bell rmech che ben' yell-lioka'.

³ Na' bibi daa nashj bia' blag' cheyin gat'ch yella', la' nan' kwia Chioza' inabia'lene' Jesucristona', Beena' Zaklebi to Xil'do'. Na' yog' ben'ka' lle' na' we'la'ogake'ne'.

⁴ Na' ile'gakile'ne' kon ka nakyenee, na' ta' lie'na' loxgue'ka'.

⁵ Aga bich bi wal gat', ni bich bi yi' kandil iyalljgakile' ni beeni' che wbilldo'na', la' beeni' che Xancho Chioza' wzeeni'n gana' soagake', na' inabia'gake' zejli kañi.

Ba zoa yila' Jesucristona'

⁶ Na' wna anjla' nad':

—Dill'ki nakgakan dii li na' nakgakan dii gak wxenilall' ben'. Xancho Chioza', beena' chxoa xtilleena' cho'a lol' ben'ka' chyixjee daa chi'e legake', ba bselee nad' nak' anjl che' kwenche wliid' ben'ka' nak lall' nee daa ba zoa gaoshosh gak.

⁷ —iBa zoa gaoshosh yiyed'!

Chakomba beena' ze wneyi dill'ki llia lee libri cheyi diika' ba wna Chioza' gak.

⁸ Nad', Juan, ben ble'id' diiki. Na' ka biyoll ben ble'ida'n, bchek' xib' nan we'lawaa anjla', beena' bli'yi nad' diika'.

⁹ Na' le' wne' nad':

—iBi gono' ka! Nad' nak' wen llin che Chioza' ka li' na' ka bish' ljwello'ka', ben'ka' cho'e cho'a xtil' Chioza', na' ka yog' ben'ka' zegake' kwent wneyi daa llia lee libri. Toz Chiozan' chiyal' we'lawoo.

¹⁰ Na' lekzka' wne' nad':

—Bi wkwashoo dga ba bzejo' lee libri, dga chyixje'n che diika' wna Chioza' gak, la' ba zoa gaoshosh gakan.

¹¹ Ben' mala' shajlenshaze' dii mala' chone', na' beena' nda' nchen saaxyana' shajlenshaze' saaxya che'na'; na' ben' wenna' soatezi soe' gone' wen, na' beena' nak lall' na' Chioza' soatezi soe' gonche' daa cheeni Chioza'.

¹² —iBa zoa gaoshosh yiyed'! Na' wi'a daa chidol' to to ben' kon ka nak daa ben to toe'.

¹³ Nadaan zaklebid' letr necha' le A* daa ba zoakz' ka wxw wzil yell-lioni, na' daa zoakz' kat' te cheyin zaklebid' letra' chiyollin daa le Z,† Nad'kzan bxe bsil' yog'lol' dii de na' nad'kzan gon' ka te cheyin.

¹⁴ Chakomba ben'ka' chñabgakile' nad' yixis yiyib' yichjlall'do'eka', kwenche idol'gake' gaogake' dii zixa' llia lo yaga' daa nsa' yel' mbanna', na' sho'gake' cho'a puert che yella'.

* 22:13 Letr necha' le A: de dill' griegona' letri len alfa. † 22:13 Letra' chiyollin daa le Z: de dill' griegona' letri len omega.

¹⁵ San bi gak sho' ben' malka', ben'ka' nlan yel' willa'na', ben'ka' chnelen ljwellin, ben' wen xyaka', ben'ka' choe'la'o lwaa lsak' diika' non chios chegake', na'ch yog' ben'ka' chibayi siye'.

¹⁶ Nad', Jesús, ba bselaa anjl cha'na' kwenche bzajniile' li' diiki ba bzejo' na' wi'on dill' lao ben'ka' chdop chllag choe'la'ogake' nad'. Nad' nak' xiin dia che dii Davina', na' zaklebid' belj xsila' daa chna'tit.

¹⁷ Na' Espíritu che Chioza', na' cho' zaklebicho noola' wshagna'lene' Jesucrístona' daa nonlilall'chone', che'chone':

—¡Bida!

Na' beena' yeni dill'ki yeene':

—¡Bida!

Nottez' ben' chbili, wak yide' na' yeeje' nisa' daa nsa' yel' mbanna', na' aga bi sakile'n.

¹⁸ Nad' chsi'nid' yog' ben' yeni dill'ki llia lee libri cheyi diika' wna Chioza' gak: Shi no chixoatelə cheyin lo dill'ki, Chioza' wdie'ne' lao yel' zak'zi'ka' ba bzetje' lee libri.

¹⁹ Na' shi no yikwas bal dill'ki llia lee libri cheyi diika' wna Chioza' gak, Chioza' bi wi'e latj gawe' dii zixa' llia yaga' daa nsa' yel' mbanna', ni bi wi'e latj sho'e yell che'na', diiki choe' libri dill' cheyin.

²⁰ Jesúsza', beena' bzajni nad' diiki, ne':

—Dii li, ba zoa gaoshosh yiyed'.

Kan' nakan. ¡Bidagach, Xan' Jesús!

²¹ Na' yel' goklen che Xancho Jesucrístona' soalenshgan yog'loltele. Kan' gakan.